









# বাংলার ইতিহাসের দু'শো বছর : স্বাধীন সুলতানদের আমল ( ১৩৩৮-১৫৩৮ খ্রীঃ )

ডক্টর রমেশচন্দ্র মজুমদারের লেখা  
ভূমিকা সংবলিত

শ্রীমুখময় মুখোপাধ্যায় এম.এ.  
অধ্যাপক, বিশ্বভারতী

ভারতী বুক স্টল  
প্রকাশক ও পুস্তক-বিক্রেতা  
৬, রমানাথ মজুমদার স্ট্রীট, কলকাতা-৯

Copyright : Sukhamay Mukhoyadhyay

দ্বিতীয় সংস্করণ,

১৯৬৬

মূল্য—পনেরো টাকা মাত্র

প্রচ্ছদ :

সুখেন গাঙ্গুলি

প্রকাশক :

জয়ীকেশ বারিক

ভারতী বুক স্টল,

৬, রমানাথ মজুমদার স্ট্রীট,

কলকাতা-৯

মুদ্রাকর :

শ্রীগৌরহরি মাইতি

বাণী-২

৯এ, মনমোহন বোস

কলকাতা-৬

# উৎসর্গ

পরম শ্রদ্ধাভাজন

ডক্টর বিমানবিহারী মজুমদার

মহোদয়ের করকমলে

ইতিহাসের লক্ষ্মী ওঠেন

এই জীবনের সিন্ধু-তীরে,—

বিস্মরণের সরণীতেই

তার নিলয়ে চলেন ফিরে ।

মিলিয়ে গেল রথখানা তার

মহাকালের ঘোড়ায় টানা ;

চাকার আঁকা দাগ দেখে আজ

মিলবে কি তার ঠিক্ ঠিকানা

## ভূমিকা

এ বইখানি বাংলায় স্বাধীন মুসলমান রাজ্যের প্রতিষ্ঠা থেকে আরম্ভ করে মুঘল যুগের অব্যবহিত পূর্ব শের শাহের অধিকার পর্যন্ত বাংলা দেশের একখানি সম্পূর্ণ ইতিহাস। অবশ্য এতে গণেশ ও হোসেন শাহ এবং আর কয়েকজন স্থলহানের প্রসঙ্গ যেমন বিস্তৃতভাবে আলোচিত হয়েছে, অল্প রাজাদের বর্ণনা তার তুলনায় কিছু সংক্ষিপ্ত। কিন্তু সংক্ষিপ্ত হলেও অগ্রাগ্র রাজগণের সম্বন্ধে সমস্ত জ্ঞাতব্য তথ্যই আলোচনা করা হয়েছে এবং প্রকৃত বিজ্ঞানসম্মত প্রণালীতে তাঁদের রাজত্বের ঘটনাগুলির বিচার করা হয়েছে। মোটের উপর ৮খালদাস বন্দ্যোপাধ্যায়ের বাঙ্গালার ইতিহাস দ্বিতীয় ভাগ প্রকাশিত হবার পর বাংলা ভাষায় বাংলা দেশের মুসলমান যুগের প্রথম ভাগের একরূপ ধারাবাহিক ইতিহাস আর কেহ লেখেন নাই। ইংরেজীতেও ঢাকা বিশ্ববিদ্যালয় থেকে প্রকাশিত বাংলার ইতিহাস দ্বিতীয় খণ্ড ব্যতীত এই যুগের আর কোন ধারাবাহিক ইতিহাস নাই।

গ্রন্থকার বাংলা দেশের মধ্যযুগের সাহিত্য ও ইতিহাস সম্বন্ধে তাঁর পূর্ব-প্রকাশিত গ্রন্থের ম্যায় এই গ্রন্থেও গভীর পাণ্ডিত্যের পরিচয় দিয়েছেন। বস্তুতঃ এই যুগের সম্বন্ধে জ্ঞান ও গবেষণায় তিনি যে লক্ষ্যপ্রতিষ্ঠা এ সম্বন্ধে আজ আর কোন সন্দেহ নাই। আলোচ্য গ্রন্থে তিনি যে সকল নূতন তথ্যের সন্ধান দিয়েছেন এবং জটিল ঐতিহাসিক সমস্যাগুলি বেরূপ নিপুণভাবে ও যুক্তির সঙ্গে বিশ্লেষণ করেছেন তাতে মধ্যযুগের বাংলার ইতিহাসে তাঁকে একজন বিশেষজ্ঞ বলে অভিনন্দিত কর্তে কারও বিমুদ্রাজ্ঞ কুষ্ঠা হবে না বলেই আমার দৃঢ় বিশ্বাস।

রাজা গণেশের সম্বন্ধে এমন সম্পূর্ণ ও যুক্তিমূলক বিবরণ আর কোন গ্রন্থে নাই। অবশ্য গণেশের সম্বন্ধে সকল সমস্তারই চূড়ান্ত মীমাংসা করবার মত প্রমাণ আমাদের হাতে নাই—সুতরাং কতকগুলি ঘটনা সম্বন্ধে সন্দেহের অবকাশ থাকবেই। কিন্তু এ যাবৎ যেখানে যা কিছু প্রমাণ পাওয়া গেছে—তার একটিও গ্রন্থকারের দৃষ্টি এড়ায় নি বলেই মনে হয়। আর তার থেকে তিনি যে সকল সিদ্ধান্ত করেছেন তাও খুব যুক্তিসঙ্গত। গণেশ ও ইব্রাহিম শকীর বিরোধ সম্বন্ধে তিনি সম্প্রতি-অবিদ্বৃত কতকগুলি নূতন তথ্যের সাহায্যে যে স্থিতিস্থিত মন্তব্য করেছেন তা খুবই প্রামাণিক বলে গ্রহণ করা যায়। এ সম্বন্ধে

এতদিন যে কতগুলি অস্পষ্ট ও পরস্পরবিরুদ্ধ ধারণা ছিল তা দূর করে তিনি একটি মোটামুটি বিশ্বাসযোগ্য বিবরণ দিয়ে বাংলার ইতিহাসের এই অন্ধকার যুগের উপর নূতন আলোক পাত করেছেন। নূর কুৎব্ আলম ও আশ্রফ সিমুনানী ইব্রাহিম শর্কীকে বাংলার কাকের রাজার বিরুদ্ধে যে ভাষায় উত্তেজিত করেছিলেন ( দ্বিতীয় সং, পৃ: ১১:-১৩ ) তাতে বোঝা যাবে সে যুগে হিন্দু ও মুসলমানের প্রকৃত সম্বন্ধ কি ছিল। যারা মনগড়া হিন্দু-মুসলমানের কাল্পনিক ভ্রাতৃত্বাবে বিশ্বাস না করে এ সম্বন্ধে প্রকৃত তথ্য জানতে চান—তঁারা এই গ্রন্থের দ্বিতীয় সংস্করণের ১১০ থেকে ১২৬ পৃষ্ঠা পড়লে অনেক খাঁটি তথ্য পাবেন। আর গণেশ এই প্রতিকূল অবস্থার বিরুদ্ধে লড়াই করে যে অন্ততঃ কিছুকাল গোড়ের সিংহাসন অধিকার করেছিলেন তাতে প্রমাণিত হয় যে রাজা গণেশ একজন অসাধারণ প্রতিভাশালী পুরুষ ছিলেন। বাঙ্গালী ও বাংলার ইতিহাস তাঁর স্মৃতির যথোচিত সমাদর করেনি। বাঙ্গালীর এই অপবাদ কতকটা দূর করে গ্রন্থকার আমাদের বিশেষ ধন্যবাদভাজন হয়েছেন।

হোসেন শাহ সম্বন্ধে যে রকম পূর্ণাঙ্গ বিবরণ এই গ্রন্থে আছে পূর্বে তা কখনও পড়িনি। এই প্রসঙ্গে গ্রন্থকারের একটি প্রাংসনীয় উত্তমের কথা উল্লেখ করা উচিত। অনেক প্রচলিত ও বদ্ধমূল ধারণার মূলে যে কোন সত্য নেই তিনি তার কতকগুলি উৎকৃষ্ট দৃষ্টান্ত দিয়েছেন। হোসেন শাহ সম্বন্ধে কতকগুলি ধারণা এদেশে প্রচলিত আছে। তিনি নাকি বাংলা সাহিত্যের বড় একজন পৃষ্ঠপোষক ছিলেন এবং তাঁর ধর্মমত নাকি ছিল খুবই উদার ( দ্বিতীয় সং, ৩২৩ পৃষ্ঠা দ্রষ্টব্য )। এই সব কারণে ‘হোসেন শাহী আমল’ নামে বাংলার ইতিহাসের এক উজ্জ্বল অধ্যায়েরই সৃষ্টি হয়েছে। কিন্তু বাংলার মুসলমান যুগের এই আদর্শ রাজার সম্বন্ধে ৬দীনেশচন্দ্র সেন থেকে আরম্ভ করে বর্তমান কালের বাংলা সাহিত্যের ইতিহাসলেখকেরা যে কাল্পনিক কাহিনী ইতিহাস বলে চালিয়ে এসেছেন আলোচ্য গ্রন্থে তা একেবারে ভূমিসাৎ হয়েছে। এটি গ্রন্থকারের সর্বশ্রেষ্ঠ ঐতিহাসিক অবদান বলে আমি মনে করি। বিজয় গুপ্তের মনসামঙ্গলে ( দ্বিতীয় সং, ২২০ পৃ: ) এবং যুগাবতীর ক্লোকে ( দ্বিতীয় সং, ৩২০ পৃ: ) যে হোসেন শাহের উল্লেখ আছে—তিনি যে বাংলার সুলতান আলাউদ্দীন হোসেন শাহ এটা সকলেই বিনা বিচারে মেনে নিয়েছেন। কিন্তু গ্রন্থকার যে সমস্ত যুক্তি দেগিয়েছেন তাতে বিজয় গুপ্তের বর্ণিত হোসেন শাহ যে জালালুদ্দীন ফতে শাহ—তাঁই অধিকতর সঙ্গত মনে

হয়। অধ্যাপক সৈয়দ হাসান আসকারির মত উদ্ধৃত করে গ্রন্থকার দেখিয়েছেন যে মৃগাবতীর হোসেন শাহও খুব সম্ভবত ভিন্ন ব্যক্তি। হোসেন শাহ বিজ্ঞা ও সাহিত্যের পৃষ্ঠপোষক ছিলেন কিনা এবং তাঁর ধর্মসম্বন্ধীয় নীতি কতটা উদার ছিল—এই দুইটি প্রশ্ন সম্বন্ধে যুক্তিপূর্ণ আলোচনা দ্বারা গ্রন্থকার যে প্রচলিত মতের ভ্রান্তি দেখিয়েছেন ( দ্বিতীয় সং, ৩২৩-৪১১ পৃঃ ) তা এই গ্রন্থের একটি বিশেষ মূল্যবান অংশ। হোসেন শাহের সম্বন্ধে আর একটি প্রচলিত ধারণা এই যে তিনিই প্রথম সত্যাপীরের সিনি প্রবর্তন করেন। এ সম্বন্ধে যে কোন প্রমাণ নাই এবং সন্দেহের যথেষ্ট অবকাশ আছে গ্রন্থকার সে সম্বন্ধে অনেক যুক্তি দেখিয়েছেন।

হোসেন শাহের প্রসঙ্গে গ্রন্থকার আর একটি গুরুত্বপূর্ণ তথ্যের সন্ধান দিয়েছেন। ‘রাজমালা’ নামক ত্রিপুরার ইতিহাস বাংলা সাহিত্যে সুপরিচিত। দুর্গামণি উজ্জীরের সম্পাদিত ( ও সংশোধিত ) পুঁথিই এখন আমাদের একমাত্র সম্বল। এবং এর থেকে মূল পুঁথি রচনার তারিখ ও ২হার ঐতিহাসিক মূল্য সম্বন্ধে অনেক আলোচনা হয়েছে। বিশ্ববিদ্যালয়ে গবেষণা করে যারা এই গ্রন্থ সম্বন্ধে খাদিস্ লেখেন তাঁরাও জানেন না যে এর পুরাতন পুঁথি এখনও পাওয়া যায়। বঙ্গীয় সাহিত্য পরিষদে রক্ষিত একখানি পুঁথির গ্রন্থকার উল্লেখ করেছেন। দুর্গামণি উজ্জীর কর্তৃক রাজমালা সংশোধনের আগেই এই পুঁথি লিপিকৃত হয়েছিল। এই পুঁথি থেকে ত্রিপুরার রাজা ধর্মমাণিক্যের বঙ্গদেশ আক্রমণ ও হোসেন শাহের ত্রিপুরা-অভিযান সম্বন্ধে যে অংশ গ্রন্থকার উদ্ধৃত করেছেন তার সঙ্গে মুদ্রিত রাজমালার পাঠের অনেক অনৈক্য দেখা যায়। এ সম্বন্ধে গ্রন্থকার সুদীর্ঘ আলোচনা করেছেন। বাংলা দেশ ও বাংলা সাহিত্যের ইতিহাস সম্বন্ধে এই পুরানো রাজমালার পুঁথি অনেক নূতন তথ্যের সন্ধান দিয়েছে। গ্রন্থকার এটি উদ্ধৃত করে বাংলা ঐতিহাসিক সাহিত্যের সমৃদ্ধি খুব বাড়িয়েছেন।

এ পর্যন্ত যা লেখা হয়েছে তা থেকেই আলোচ্য গ্রন্থের ঐতিহাসিক মূল্য সম্বন্ধে স্পষ্ট ধারণা করা যাবে। বাংলা সাহিত্যে এই গ্রন্থখানির স্থান যে খুব উঁচুতে এটা আমার দৃঢ় বিশ্বাস। আমি এই উদীয়মান প্রতিভাশালী লেখককে সমর্থনা করে ও অভিনন্দন জানিয়ে এই ভূমিকার উপসংহার করছি।

শ্রীরমেশচন্দ্র মজুমদার





# গ্রন্থকারের নিবেদন

( প্রথম সংস্করণ )

বর্তমান বইটি পাঠকদের হাতে তুলে দিতে পেরে আজ যেমন আমার আনন্দ হচ্ছে, তেমনি আবার আশঙ্কাও হচ্ছে। কারণ মধ্যযুগের বাংলাদেশের ইতিহাস রচনার মত জটিল এবং অসমাপ্য কাজ খুব কমই আছে। অলৌচ্য যুগের ইতিহাস সম্বন্ধে কোন সমসাময়িক ধারাবাহিক বিবরণ পাওয়া যায় না। কিছু কিছু স্মৃতি-বিকল্প ভাবে এদিকে সেদিকে ছড়িয়ে আছে, সেগুলি অলম্বন করে অনেক কষ্টে ঐ ইতিহাসকে পুনর্গঠন করে নিতে হয়। কিন্তু এই জাতীয় স্মৃতির পরিমাণও এত অপ্রচুর যে পুনর্গঠন সন্তোষজনক হয় না। তাছাড়া এই দুক্লহ কাজে হাত দেওয়া তাঁরই সাজে—যিনি সুশিক্ষিত, বহুভাষাবিদ এবং মুসলিম সংস্কৃতি সম্বন্ধে বিশেষজ্ঞ। সেদিক দিয়ে আমার অযোগ্যতা সম্বন্ধে আমি যতটা সচেতন, এমন বোধ হয় আর কেউই নন। তা সত্ত্বেও বাংলাদেশের মধ্যযুগের ইতিহাসের একটি পর্ব সম্বন্ধে বই লিখলাম—একে দুঃসাহস ছাড়া আর কিছুই বলা যায় না। তাই আজ আনন্দের সঙ্গে সঙ্গে আশঙ্কাও হচ্ছে যে আমার দুঃসাহস হয়তো তিরস্কৃত হবে।

এই দুঃসাহস কেন আমার হল, সে সম্বন্ধে আমি এখানে কৈফিয়ৎ দিতে চাই। তা দিতে হলে এই ইতিহাস-গ্রন্থ রচনার ইতিহাসটি সংক্ষেপে বলা দরকার। কয়েক বছর আগে অল্প কোন একটি বিষয় সম্বন্ধে একটি প্রবন্ধ লিখতে গিয়ে আমার ‘রাজা গণেশ’ সম্বন্ধে কিছু জানার প্রয়োজন হয়। সে সম্বন্ধে বিভিন্ন ঐতিহাসিকের লেখা সমস্ত আলোচনা পড়েও ঠিক তৃপ্তি পেলাম না, মনে হল ঐ বিষয় সম্বন্ধে বলবার কথা আরও অনেক বাকী থেকে গিয়েছে এবং যেটুকু এঁরা বলেছেন, তারও কিছু সংশোধন দরকার। তখন আমি নিজেই ঐ বিষয় সংক্রান্ত মূল স্মৃতিগুলি পড়তে এবং এ নিয়ে ভাবতে শুরু করলাম। আমার অধ্যয়ন ও চিন্তার ফল হল ‘রাজা গণেশ ও তাঁর বংশ’ নামে একটি প্রবন্ধ। এই প্রবন্ধের পরে পঞ্চদশ শতাব্দীর প্রথম দিকের বাংলার ইতিহাসের বিভিন্ন দিক সম্বন্ধে আরও কয়েকটি প্রবন্ধ লিখলাম। সেই প্রবন্ধগুলি একত্র করে ১৯৫৫ খ্রীষ্টাব্দে আমি একখানি বই প্রকাশ করলাম—তার নাম ‘রাজা গণেশের আমল’। বইটি প্রকাশের সময় ধরে নিয়েছিলাম যে এ বই বিশেষজ্ঞদের কাছে শুধু দিকার ও উপহাসই লাভ

করবে এবং সেই সঙ্গেই আমার ইতিহাস-রচনা-প্রচেষ্টাতে পড়বে পূর্ণচ্ছেদ। কিন্তু তার বদলে বইটি তাঁদের অমুমোদন ও আশীর্বাদ লাভ করল। বিভিন্ন পত্রিকায় ঐ বইয়ের যে সমস্ত সমালোচনা প্রকাশিত হল, তাতে লেখকের উৎসাহ বিশেষভাবে বর্ধিত হল।

এই সমস্ত সমালোচনার মধ্যে দু'টির কথা বিশেষভাবে উল্লেখ করা দরকার মনে করছি। মধ্যযুগের বাংলাদেশের ইতিহাস ও সংস্কৃতি সম্বন্ধে অত্যন্ত শ্রেষ্ঠ বিশেষজ্ঞ স্বর্গীয় দীনেশচন্দ্র ভট্টাচার্য ১৩৬৩ বঙ্গাব্দের ( ৫৬শ ভাগ, ২য় খণ্ড, ৩য় সংখ্যা ) পৌষ মাসের 'প্রবাসী'র 'পুস্তক-পরিচয়'-এ ( পৃ: ৩৮২ ) লেখেন,

“ইতিহাস ও জীবনীর ক্ষেত্রে বিজ্ঞানবিরোধী কল্পনাবিলাস যেভাবে খরতর গতিতে বাংলা সাহিত্যকে অভিভূত করিয়া ফেলিতেছে তাহাতে বিজ্ঞানসম্মত ঐতিহাসিক গবেষণা বাংলাদেশে লুপ্তপ্রায় হইয়া আসিতেছে। উল্লীযমান গ্রন্থকার বাংলা ভাষায় এই গবেষণাগ্রন্থ লিখিয়া সংসাহসের পরিচয় দিয়াছেন। যাহারা ‘বঙ্গালার সামাজিক ইতিহাস’ জাতীয় গ্রন্থ অবলম্বন করিয়া রাজ্য গণেশকে রূপকথার নায়ক সাজাইয়া তৃপ্তিবোধ করেন—বহু শিক্ষিত বাঙ্গালী অজ্ঞাপি করিতেছেন—তাঁহারা আলোচ্য গ্রন্থটি একবার পড়িয়া দেখুন। বর্তমানে বহু নূতন তথ্য আবিষ্কৃত হওয়াতে রাজ্য গণেশের রাজত্বের উপর প্রচুর আলোকপাত হইয়াছে এবং গ্রন্থকার যাবতীয় উপকরণ বিচারপূর্বক খণ্ডন-মণ্ডন করিয়া একটি পূর্ণাঙ্গ ঐতিহাসিক চিত্র অঙ্কিত করিয়াছেন। কোন কোন ঘটনার বৈচিত্র্য এতই চিত্তাকর্ষক যে, রূপকথাকেও পরাস্ত করিতে পারে।”

তাঁর এই সমালোচনা আমার জীবনের এক অমূল্য সম্পদ।

‘বাঙ্গালা সাহিত্যের ইতিহাস’ রচয়িতা ড: সুকুমার সেন ১৩৬৩-৬৪ বঙ্গাব্দের মাঘ-চৈত্র মাসের (২য় বর্ষ, ১ম সংখ্যা) ‘ষাত্রী’ পত্রিকায় (পৃ: ৬৬-৬৮) ‘রাজ্য গণেশের আমল’-এর যে সমালোচনা করেন, তাও এই প্রসঙ্গে উল্লেখ-যোগ্য। ড: সেন তাঁর সমালোচনার উপক্রমে লেখেন,

“নানাদিক থেকে সাক্ষ্যপ্রমাণ আহরণে লেখক যে তীক্ষ্ণ অল্পসন্ধিসার পরিচয় দিযেছেন তা এখনকার দিনের গবেষণা গ্রন্থে ( অবশ্য বাংলায় লেখা ) মিলবে না।”

ড: সুকুমার সেন তাঁর সমালোচনা শেষ করেন এই বলে,

“স্বথময় বাবু আমাদের ভূতপূর্ব ছাত্র। এঁর ভাবিগ্রন্থ সম্বন্ধে আশা রাখি। অনেকদিন কোন বাংলা বই পড়ে এমন তৃপ্তি পাইনি।”

এঁদের এই উক্তিগুলি আমাদের বিশেষ অহুপ্রেরণা যোগায়। তার ফলে এবারে ব্যাপকতর ক্ষেত্রে প্রবেশের চেষ্টা করেছি—বাংলার দ্বিশতবর্ষব্যাপী স্বাধীন সুলতানদের আমল (১৩৩৮-১৫৩৮ খ্রীঃ) সম্বন্ধে যথাসম্ভব পূর্ণাঙ্গ আকারে আলোচনা করে এই বইটি লিখেছি। এ বই লেখার যোগ্যতা যে আমার নেই, তা আগেই বলেছি। কিন্তু কয়েক বৎসরের অধ্যয়ন ও চিন্তার ফলে যে তথ্যগুলি পেয়েছি, সেগুলিকে প্রকাশ করাই আমি নানা কারণে যুক্তিযুক্ত বলে বিবেচনা করেছি। আমার অপটু হাতের এই সামান্য প্রচেষ্টার মূল্য নিঃসন্দেহে অকিঞ্চিৎকর, কিন্তু তার মধ্যে যদি অল্প কিছু প্রয়োজনীয় বস্তু থাকে, তবে তা পরবর্তী গবেষকদের কাজে লাগবে। সুতরাং তাকে অপ্রকাশিত রেখে কোন লাভ নেই। এই পর্বের ইতিহাস রচনার যোগ্য ব্যক্তি যিনি আসবেন—সেই পরম দক্ষ ও পরম পণ্ডিত ইতিহাসিকের পথের কয়েকটি কাঁটা হ্রত এই বইটির মধ্য দিয়ে অপসারিত করতে পেরেছি এবং তা যদি পেরে থাকি, তাকেই যথেষ্ট বলে আমি মনে করব।

এই বই লেখার সময় আমি এপর্যন্ত আবিষ্কৃত সব সূত্র থেকেই তথ্য আহরণ করার প্রয়াস পেয়েছি। অনেকের মনে এই ধারণা আছে যে আলোচ্য যুগের বাংলার ইতিহাসের উপকরণ যে সমস্ত সূত্রে পাওয়া যায়, তাদের অধিকাংশই ফার্সী ভাষায় লেখা। কিন্তু এই ধারণা যথার্থ নয়। এই যুগের ইতিহাসের ফার্সী সূত্র খুব বেশী নেই; যে ক'খানি আছে, তাদের প্রায় সবগুলিই ইংরেজীতে অনূদিত হয়েছে এবং তাদের নিয়ে এপর্যন্ত আলোচনাও হয়েছে বিস্তর। সুতরাং ফার্সী সূত্রগুলিতে প্রদত্ত তথ্য যে কেউই আহরণ করতে পারেন এবং তাদের মধ্য থেকে নতুন কিছু পাবার আশা নেই। পক্ষান্তরে এই যুগের সংস্কৃত ও বাংলা ভাষায় রচিত বহু গ্রন্থে ইতিহাসের অনেক উপকরণ ছড়িয়ে আছে, সেগুলি খুবই মূল্যবান; দৃষ্টান্তস্বরূপ বলা যায়, চৈতন্যচরিত-গ্রন্থগুলির মধ্যে জলালুদ্দীন ফতে শাহ ও আলাউদ্দীন হোসেন শাহের রাজত্বকালের নানা ব্যাপার সম্বন্ধে বহু তথ্য পাওয়া যায়। মধ্যযুগের বাংলার কোন প্রামাণিক ধারাবাহিক ইতিহাস যখন পাওয়া যায় না, তখন সেই ইতিহাসকে পুনর্গঠন করে তুলতে হবে এবং সেই পুনর্গঠনে অনেকখানি উপাদান যোগাবে এই সংস্কৃত ও বাংলা গ্রন্থগুলি। অথচ আজ পর্যন্ত এগুলি বিশেষ কারও দৃষ্টি আকর্ষণ করতে পারেনি। বর্তমান বইটির মধ্যে সুপরিচিত ও ইতিপূর্বে-আলোচিত সূত্রগুলি ব্যবহৃত হয়েছে, সেইসঙ্গে এযাবৎ-অবহেলিত

এই সংস্কৃত ও বাংলা গ্রন্থগুলির সাক্ষ্যও বর্ণনাবর্ণন করা হয়েছে। তার ফলে হয়তো আমার পক্ষে কোন কোন বিষয় সংক্ষেপে কিছু কিছু নতুন সংবাদ দেওয়া সম্ভব হয়েছে।

এই বইতে বিভিন্ন মুদ্রিত গ্রন্থের নাম যেভাবে উল্লেখ করা হয়েছে, তার সংক্ষেপে কয়েকটি কথা বলা দরকার। এইসব গ্রন্থের যতটুকু পরিচয় উল্লেখ করলে যথেষ্ট হবে তার বেশী করিনি। যে সমস্ত বইয়ের নাম এবং পৃষ্ঠাসংখ্যা মাত্র উল্লেখিত হয়েছে, সংস্করণের উল্লেখ নেই, সে সব বইয়ের প্রথম সংস্করণ ব্যবহৃত হয়েছে বুঝতে হবে। 'চৈতন্যভাগবত' গ্রন্থের অধ্যায়সংখ্যা উল্লেখের সময় বসুমতী সাহিত্য মন্দির প্রকাশিত সংস্করণকে এবং চৈতন্যচরিতামৃতের পরিচ্ছেদসংখ্যা উল্লেখের সময় বঙ্গবাণী প্রেস প্রকাশিত সংস্করণকে অনুসরণ করেছি, কিন্তু ঐ দুই সংস্করণের পাঠকে সর্বত্র অনুসরণ করিনি, তার বদলে বিভিন্ন মুদ্রিত সংস্করণ ও কয়েকটি পুঁথি মিলিয়ে দেখার পরে যে পাঠ আমার কাছে সঙ্গত বলে মনে হয়েছে, তারই উপর নির্ভর করেছি ও তাই উদ্ধৃত করেছি। এই বইয়ে আলোচ্য পর্বের বিভিন্ন শিলালিপি থেকে বহু তথ্য সংগৃহীত হয়েছে; এই ব্যাপারে আমি প্রধানত তিনটি বই থেকে সাহায্য পেয়েছি, (১) রাখালদাস বন্দ্যোপাধ্যায়ের 'বাক্সালার ইতিহাস, দ্বিতীয় ভাগ' (২) ডঃ আহমদ হাসান দানীর Bibliography of the Muslim Inscriptions of Bengal, (৩) মৌলভী শামসুদ্দীন আহমদের Inscriptions of Bengal (Vol. IV)। এখানে একটি কথা বিশেষভাবে উল্লেখযোগ্য। রাখালদাস বন্দ্যোপাধ্যায় 'বাক্সালার ইতিহাস, দ্বিতীয় ভাগ'-এ তাঁর সময় পর্যন্ত আবিষ্কৃত প্রাক-মোগল যুগের বাংলার মুসলিম স্থলতানদের শিলালিপিগুলির সংক্ষিপ্ত বিবরণ সমেত প্রায় পূর্ণাঙ্গ তালিকা প্রণয়ন করেন। পরবর্তীকালে যারা বাংলার স্থলতানদের শিলালিপিগুলির তালিকা বা বিবরণ প্রস্তুত করেছেন, তাঁরা রাখালদাসের তালিকা থেকে বিশেষভাবে সাহায্য পেয়েছেন; কিন্তু অত্যন্ত দুঃখের বিষয়, তাঁরা যথোপযুক্তভাবে রাখালদাসের কাছে ঋণ স্বীকার করেন নি।

এই বইতে বাংলার ইতিহাসের যে পর্বটি আলোচিত হয়েছে, তাকে আগে অনেকে "পাঠান স্থলতানদের আমল" নামে অভিহিত করতেন। কিন্তু ঐ নাম সম্পূর্ণ অসার্থক, কারণ শের শাহের আগে কোন পাঠান স্থলতানই বাংলাদেশ শাসন করেন নি। আলোচ্য পর্বের প্রধান বৈশিষ্ট্য হল এই যে এই পর্বে

বাংলাদেশ একটানা দুশো বছর ধরে নিরঙ্কুশ স্বাধীনতা ভোগ করেছে। এই সুদীর্ঘকাল ধরে বাংলাদেশের সম্পদ বাংলার ভিতরেই ছিল—বাইরে যায় নি। তা ছাড়া এই পর্বের অধিকাংশ সময় বাঙালীরাই বাংলাদেশ শাসন করেছেন বলা যায়। রাজা গণেশ ও তাঁর বংশধরেরা বাঙালী ছিলেন। নাসিরুদ্দীন মাহমুদ শাহ ও তাঁর বংশধরদেরও তাই বলা যেতে পারে। আলাউদ্দীন হোসেন শাহও বাঙালী ছিলেন বলে এই বইতে দেখবার চেষ্টা করেছি। বাংলার স্বাধীন সুলতানদের আমল আর একদিক দিয়ে স্মরণীয়। এই পর্বে বাংলা সাহিত্যের লক্ষ্যণীয় বিকাশ ঘটে। কয়েকজন দিকপাল কবি এই পর্বেই আবির্ভূত হয়ে বাংলা সাহিত্যকে স্ফুটিত ও সমৃদ্ধিসম্পন্ন করে তোলেন; তাঁদের মধ্যে অনেকেই বাংলার রাজা ও রাজকর্মচারীদের কাছে পৃষ্ঠপোষণ লাভ করেছিলেন। কাজেই, বাংলার ইতিহাসের আলোচ্য পর্বটি সবদিক দিয়েই বৈশিষ্ট্যপূর্ণ। এই পর্বে যে সব সুলতান বাংলাদেশ শাসন করেছিলেন, তাঁদের মধ্যে অনেকেই অসাধারণ ছিলেন। তবে একে প্রসঙ্গে একটা কথা বলে রাখি। এই বইটিতে কোন কোন রাজার সম্বন্ধে সুদীর্ঘ আলোচনা করা হয়েছে, কারণ তাঁদের সম্বন্ধে অগ্র রাজাদের তুলনায় অপেক্ষাকৃত বেশী তথ্য পাওয়া যায়। কিন্তু তার দ্বারা এই কথা বোঝায় না যে অগ্র রাজাদের তুলনায় তাঁরা শ্রেষ্ঠ ছিলেন। প্রকৃতপক্ষে সব দিক দিয়ে বিচার করলে বাংলার স্বাধীন সুলতানদের মধ্যে রুকনুদ্দীন বারবক শাহকেই সর্বশ্রেষ্ঠ বলতে হয়। এই বইতে তাঁর সম্বন্ধে যে আলোচনা আছে, তা অগ্র কোন কোন রাজা সম্বন্ধীয় দীর্ঘতর আলোচনার তুলনায় স্বল্পায়তন হওয়ার দরুন হয়তো তেমনভাবে পাঠকদের দৃষ্টি আকর্ষণ করতে পারবে না। সেইজন্তে এখানেই এ সম্বন্ধে সকলকে অবহিত করে রাখলাম।

আধুনিক যুগের কোন কোন লেখক রাজনৈতিক ইতিহাসকে তেমন গুরুত্বপূর্ণ বলে করেন না; তাঁদের মতে সামাজিক ও সাংস্কৃতিক ইতিহাসই দেশের আসল ইতিহাস। কিন্তু এই ধারণা একেবারেই যুক্তিসঙ্গত নয়। কারণ প্রথমত, সর্বদেশের ও সর্বকালের ইতিহাসে দেখা যায়, জাতীয় জীবনের অগ্রাগ্র দিকের তুলনায় রাজনৈতিক দিকই সবিশেষ গুরুত্ব লাভ করে। আঙ্গকের দিনের সংবাদপত্রগুলিতেও প্রথম পৃষ্ঠায় বড় বড় শিরোনামায় রাজনৈতিক সংবাদগুলিই পরিবেশিত হয়, সামাজিক ও সাংস্কৃতিক সন্দেশ তাতে গৌণতর স্থান লাভ করে। দ্বিতীয়ত, রাজনৈতিক ইতিহাসকে বাদ দিয়ে কোন

দেশের অগ্রান্ত দিকের ইতিহাসও লেখা যায় না। দেশের সামাজিক ও সাংস্কৃতিক ইতিহাস রচনা করতে হলেও প্রথমে রাজনৈতিক ইতিহাস ভালভাবে অধ্যয়ন করা দরকার। কারণ রাজনৈতিক ইতিহাসের প্রভাবেই সামাজিক ও সাংস্কৃতিক ইতিহাসের গতি নিয়ন্ত্রিত হয়, সামাজিক ও সাংস্কৃতিক ইতিহাসের বেশীর ভাগ বৈচিত্র্য ও পরিবর্তনই সংঘটিত হয় রাজনৈতিক ইতিহাসের পট-পরিবর্তনের ফলে। এই সমস্ত কারণে আমাদের দেশের অতীতকালের রাজনৈতিক ইতিহাসের গুরুত্ব কোনক্রমেই ছোট করে দেখা চলে না, বরং তার সম্বন্ধে এখন আগেকার চেয়ে আরও ব্যাপকভাবে গবেষণা হওয়া দরকার।

বর্তমান বইয়ে মুসলমানী নামগুলি এবং অগ্রান্ত আরবী-ফারসী শব্দগুলি বাংলা অক্ষরে যেভাবে লিপিবদ্ধ হয়েছে, তার সম্বন্ধে দু'একটি কথা বলা দরকার। এই নাম ও শব্দগুলি বেভাবে উচ্চারিত হয়, যতদূর সম্ভব সেইভাবেই লেখবার চেষ্টা করেছি। এগুলি রোমান অক্ষরে যেভাবে লেখা হয়, তার সঙ্গে উচ্চারণের অনেক সময় একটা পার্থক্য দেখা যায়। এই নাম ও শব্দগুলি বাংলা অক্ষরে কীভাবে লিখব, সে বিষয়ে আমি আরবী ও ফার্সী ভাষার অধিতীয় পণ্ডিত শ্রীযুক্ত কিশোরীমোহন মৈত্র মহোদয়কে জিজ্ঞাসা করেছিলাম। তিনি এগুলি যেভাবে লেখা উচিত, সে সম্বন্ধে আমায় যে পরামর্শ দিয়েছেন, তা'ই গ্রহণ করেছি।

এই বইটির রচনা ও প্রকাশের ব্যাপারে অনেকেই আমায় বিশেষভাবে সাহায্য করেছেন। স্বনামধন্য ঐতিহাসিক ডক্টর রমেশচন্দ্র মজুমদার মহোদয় এই বইটির ভূমিকা লিখে দিয়ে একে অসামান্য গৌরব দান করেছেন। তাঁর কাছে আমার ঋণের অন্ত নেই। শ্রীযুক্ত কিশোরীমোহন মৈত্রের কাছে যখনই কোন সাহায্য চেয়েছি, তিনি তখনই তাঁর নিজের কাজ ফেলে রেখে আমায় সাহায্য করেছেন। পাটনা কলেজের অধ্যাপক মৈয়দ হাসান আসকারির কাছেও আমি কয়েকটি বিষয়ে সাহায্য পেয়েছি। বিশ্বভারতী হিন্দীভবনের অধ্যাপক ডঃ শিবনাথ কুব্জবনের 'মৃগাবতী' থেকে উদ্ধৃত রাজ-প্রশস্তিটির পাঠ নির্ণয় ও তার বাংলা অনুবাদ করেছেন। এই পাঠ ও অনুবাদের সম্পূর্ণ দায়িত্ব তাঁরই। বিশ্বভারতী চীনভবনের অধ্যাপক শ্রীযুক্ত নারায়ণচন্দ্র সেন ও সহকারী গ্রন্থাগারিক শ্রীযুক্ত রান-মুন-হুয়া এবং বিশ্বভারতীর ওড়িশা বিভাগের অধ্যাপক ডঃ দেবীপ্রসন্ন পট্টনায়ক ও ডঃ নরেন্দ্রনাথ

মিশ্রণ আমাকে কোন কোন বিষয়ে সাহায্য করেছেন। আর একজনের কাছে আমি ঋণী। তিনি ঢাকা বিশ্ববিদ্যালয়ের বাংলা বিভাগের অধ্যাপক জনাব আহমদ শরীফ।

এই বই যদি বাঙালী পাঠকদের মনে, বিশেষভাবে তরুণদের মনে মধ্যযুগের বাংলার ইতিহাস সন্ধক্ষে কিছুমাত্র অমুরাগ জাগাতে সক্ষম হয়, তাহলে আমি আমার সমস্ত পরিশ্রম সফল বলে মনে করব। আমাদের শিক্ষা-পদ্ধতি এমনই যে আমরা বাংলাদেশের ইতিহাস, বিশেষত মধ্যযুগের ইতিহাস সন্ধক্ষে ছাত্রজীবনে প্রায় কিছুই জ্ঞানবার সুযোগ পাই না। কোন ইংরেজ, সে উচ্চ-শিক্ষিতই হোক আর স্বল্পশিক্ষিতই হোক আর তার পেশা যা'ই হোক না কেন—ইংলণ্ডের ইতিহাসটি মোটামুটিভাবে জানতে বাধ্য। ইংলণ্ডের আলফ্রেড দি গ্রেট অথবা উইলিয়ম দি কংকারারের মত প্রসিদ্ধ রাজাদের সন্ধক্ষে কিছু খবর রাখে না এমন ইংরেজ তো কেউ নেইই, অথ্যাত্তর রাজাদেরও অন্তত নামটুকু সে জাতের প্রত্যেকেই জানে। কিন্তু বাংলাদেশের খুব শিক্ষিত লোকদের মধ্যেও অধিকাংশই এদেশের শামসুদ্দীন ইলিয়াস শাহ বা গিয়াসুদ্দীন আজম শাহ বা রুকনুদ্দীন বারবক শাহ প্রভৃতি শ্রেষ্ঠ নৃপতিদের নাম জানেন না এবং জানেন না বলে ঘোষণা করতে তাঁরা কিছুমাত্র সঙ্কোচ বোধ করেন না! এর চেয়ে লজ্জার বিষয় আর কিছুই হতে পারে না। রাজা গণেশ বা হোসেন শাহের নাম অনেকে শুনেছেন, কিন্তু ঐ শোনাযাত্রই সার, তাঁদের সন্ধক্ষে আর কিছুই তাঁদের জানা নেই। অনেকে আবার বহুলপ্রচারিত কিন্তু সম্পূর্ণ অপ্রামাণিক কোন কোন বই পড়ে বাংলার ইতিহাসের আলোচ্য পর্ব সন্ধক্ষে এক ভ্রান্ত ধারণা গঠন করে বসে আছেন; এই জাতীয় বইগুলির মধ্যে অত্যন্ত দুর্গাচরণ সান্যালের লেখা 'বাঙ্গালার সামাজিক ইতিহাস', বইখানা নামে 'ইতিহাস' হলেও আসলে বটতলার বস্তাপচা উপন্যাসের সমগোত্রীয়, আগাগোড়াই নিরুপস্থিত ধরনের কাল্পনিক উপাখ্যানে ভর্তি। শিক্ষিত বাঙালী জনসাধারণের কাছে আমি এই আশাই করব যে তাঁরা নিজের দেশের অতীতকে জানতে আগ্রহবোধ করবেন, মধ্যযুগের বাংলার ইতিহাসের প্রতি অমুরাগী হবেন এবং নকল ছেড়ে আসলের স্বাদ গ্রহণ করবেন।



# গ্রন্থকারের নিবেদন

( দ্বিতীয় সংস্করণ )

চার বছর আগে—১৯৬২ সালে এই বইয়ের প্রথম সংস্করণ প্রকাশিত হয়েছিল। আজ প্রায় বছর দুই তা' নিঃশেষিত হয়েছে। ছাপার ব্যাপারে দেবী হওয়ার জন্য এই সংস্করণ প্রকাশিত হতে বেশ দেরীই হয়ে গেল।

প্রথম সংস্করণের সঙ্গে এই সংস্করণের কয়েকটি পার্থক্য সকলেই লক্ষ্য করবেন। প্রথম সংস্করণ ছ'টি খণ্ডে বিভক্ত ছিল—এই সংস্করণ তা' নেই। তারপর, প্রথম সংস্করণে বাংলার স্বাধীন সুলতানদের আমলের রাজনৈতিক ইতিহাসই কেবল ছিল; কিন্তু বর্তমান সংস্করণের দশম, একাদশ ও দ্বাদশ অধ্যায়ে ঐ আমলের বাংলার ইতিহাসের অন্ত্র কোন কোন দিক তুলে ধরার চেষ্টা করা হয়েছে। দশম অধ্যায়ে 'স্বাধীন সুলতানদের আমলে বাংলার শাসন-ব্যবস্থা ও সামরিক ব্যবস্থা' সম্বন্ধে আলোচনা করা হয়েছে। এই অধ্যায়টি রচনার সময় Journal of the Asiatic Society of Pakistan, Vol. IIIতে প্রকাশিত ডক্টর আবদুল করিমের Aspects of Muslim Administration in Bengal down to A. D. 1538 প্রবন্ধটি থেকে খুব বেশী পরিমাণে সাহায্য পেয়েছি। সুলতানী আমলের বাংলার শাসন-ব্যবস্থা ও সামরিক ব্যবস্থা সম্বন্ধে যে সব তথ্য বিভিন্ন শিলালিপিতে পাওয়া যায়, সেগুলি ডক্টর করিম তাঁর প্রবন্ধে পরিপাটিভাবে সংগ্রহ করেছিলেন; এই অধ্যায়ে সেই তথ্যগুলি উল্লেখ করার সময় আমি সংশ্লিষ্ট শিলালিপিজ্ঞানির নির্দেশনী না দিয়ে ডক্টর করিমের প্রবন্ধের নির্দেশনী দিয়েছি। শিলালিপি ছাড়া আর যে সমস্ত সূত্র থেকে তিনি তথ্য আহরণ করেছেন, সেগুলি ব্যবহার করার সময়ও আমি ঐ পন্থাই অনুসরণ করেছি। এ ছাড়া আরও অনেক সূত্র থেকে আমার বইয়ের দশম অধ্যায়ের তথ্য সংগৃহীত হয়েছে, যেগুলি পূর্ববর্তী গবেষকরা ব্যবহার করেন নি। এই সব সূত্রের যথাযথ নির্দেশনী দিয়েছি। একাদশ অধ্যায়ে বিভিন্ন বৈদেশিক বিবরণ, সাহিত্যগ্রন্থ ও শাস্ত্র-গ্রন্থের সাক্ষ্য অবলম্বনে 'সমসাময়িক দৃষ্টিতে এ' যুগের বাংলাদেশ'-এর একটি প্রামাণিক ছবি ফুটিয়ে তোলার চেষ্টা করেছি। বিভিন্ন সূত্রে এ' যুগের বাংলা দেশ সম্বন্ধে যতটা সংবাদ পাওয়া যায়, তার সবটাই অবিকৃতভাবে সংগ্রহ

করার চেষ্টা করেছি। বিষয়ানুক্রমে এ' যুগের বাংলার সামাজিক ইতিহাস লেখার চেষ্টা আমি করি নি, কারণ তা লেখার মত পর্যাপ্ত উপকরণ পাওয়া যায় না। অজ্ঞেয় ডক্টর রমেশচন্দ্র মজুমদার মহোদয় তাঁর সম্পাদিত সম্প্রতি-প্রকাশিত 'বাংলাদেশের ইতিহাস : দ্বিতীয় খণ্ড'তে ত্রয়োদশ থেকে অষ্টাদশ শতাব্দীর বাংলার সামাজিক ইতিহাস বিষয়ানুক্রমে রচনা করেছেন, সকলকে সেটি পড়তে আমি অনুরোধ জানাচ্ছি।

ডক্টর রমেশচন্দ্র মজুমদার মহোদয় এই বইয়ের ভূমিকায় এবং তাঁর অন্ত বহু গ্রন্থে ও প্রবন্ধে এই মত ব্যক্ত করেছেন যে, বাংলার হিন্দু ও মুসলমানদের মধ্যে কোনদিন কোনরকম ঐক্য ছিল না এবং মুসলমান রাজারা সব সময়েই হিন্দুদের উপর অত্যাচার করতেন ও হিন্দু ধর্মের অবমাননা করতেন। এ সম্বন্ধে আমার নিজস্ব মত কী, তা অনেকে জানতে চেয়েছেন। আমার মত এই যে, হিন্দু ধর্ম ও হিন্দু জাতির প্রতি মনোভাবের দিক দিয়ে সে যুগের মুসলমানদের তিনটি স্তরে ভাগ করা চলে। প্রথম স্তরের অন্তর্গত ছিলেন গোঁড়া মোল্লা, আলিম ও দরবেশেরা—এঁরা হিন্দু ধর্ম ও হিন্দু জাতির প্রতি সত্যিই বিদ্বেষভাব পোষণ করতেন এবং সেই বিদ্বেষ রাজাদের মনেও সংক্রামিত করার চেষ্টা করতেন। দ্বিতীয় স্তরের অন্তর্গত ছিলেন মুসলমান রাজারা, এঁদের মধ্যে অনেকেই অন্তরে অন্তরে হিন্দুদের প্রতি সহানুভূতিশীল ছিলেন না (কেউ কেউ অবশ্য উদারমতাবলম্বী ছিলেন)। গোঁড়া মোল্লা, আলিম ও দরবেশেরা যখন এঁদের কাছে হিন্দুবিদ্বেষ প্রচার করতেন, তখন এঁরা মুখে তাতে সমর্থন জানাতেন, কিন্তু কাণ্ডত কেউই বড় একটা হিন্দুবিরোধী নীতি অনুসরণ করতেন না, কারণ তা করলে অথবা হিন্দুদের অসন্তোষ উত্থেক করে রাজ্যের শান্তি-শৃঙ্খলা বিপন্ন করার ঝুঁকি নেওয়া হতো। অবশ্য কোন হিন্দু রাজ্যে অভিযানে যাবার সময় এঁরা কয়েকটি মন্দির ও দেবমূর্তি প্রভৃতি ভাঙতেন এবং দেশে ফিরে সে কথা প্রচার করতেন, মুখ্যত মোল্লা, দরবেশ প্রভৃতির কাছে বাহবা পাবার জন্য; অবশ্য এই মন্দির-ভাঙার সংবাদ প্রচারের সময়েও অতিশয়নের আশ্রয় নেওয়া হত (বর্তমান গ্রন্থ, পৃ: ৪৫৬-৫৭ প্রস্তব্য)। সে যুগের মুসলমানদের তৃতীয় স্তরের অন্তর্গত ছিলেন মুসলিম জনসাধারণ, এঁরা হিন্দুদের প্রতি খুব একটা বিদ্বেষের ভাব পোষণ করতেন না, বরং তাদের সঙ্গে গ্রামসম্পর্ক স্থাপন করতেন ও তাদের কোন কোন পবিত্র গ্রন্থের (সাময়িক, মহাভারত প্রভৃতি) রস আবাদন করতে

বিধা করতেন না। সুতরাং সব মুসলমানদেরই সঙ্গে যে হিন্দুদের অনৈক্য ছিল এবং মুসলিম রাজারা যে সাধারণত হিন্দুদের প্রতি অত্যাচার করতেন, এ কথা বলা যায় না বলেই মনে হয়।

‘বাংলার ইতিহাসের দু’শো বছর’-এর প্রথম সংস্করণ প্রকাশিত হবার পরে আরও এমন দু’খানা বই প্রকাশিত হয়েছে, যাদের মধ্যে স্বাধীন সুলতানদের আমল সম্বন্ধে বিশদ আলোচনা আছে। একখানি বইয়ের নাম ‘বঙ্গদেশের ইতিহাস’, এর লেখিকা ডক্টর সুনীলা মণ্ডল; দ্বিতীয় বইখানির নাম ‘বাঙলার ইতিহাস’, এর লেখক শ্রীযুক্ত প্রভাসচন্দ্র সেন। এই দু’খানি বইয়ের সুলতানী আমল সংক্রান্ত অংশ প্রধানত আচার্য যদুনাথ সরকার সম্পাদিত ও ঢাকা বিশ্ববিদ্যালয় প্রকাশিত History of Bengal ( Vol. II ) অবলম্বনে লেখা। এই বই দু’খানির মধ্যে “নতুন গবেষণা” যেটুকু আছে, তা একেবারেই গ্রহণযোগ্য নয়। কারণ ডক্টর সুনীলা মণ্ডলের “নতুন গবেষণা”র প্রধান আকরগ্রন্থ দুর্গাচরণ সান্যালের ‘বাঙ্গালার সামাজিক ইতিহাস’, যা মোটেই ইতিহাসগ্রন্থ নয়, কতকগুলি গালগল্পের সমষ্টি; আর শ্রীযুক্ত প্রভাসচন্দ্র সেনের “নতুন গবেষণা”র সূত্রগ্রন্থ জৈশান নাগরের ‘অদ্বৈতপ্রকাশ’ ও লাউড়ি কৃষ্ণদাসের ‘বাল্যলীলাসূত্র’ প্রভৃতি অপ্রামাণিক গ্রন্থ। ঐ দু’খানি বইতে অনেক চমকপ্রদ ভুলও আছে, যেমন ডঃ সুনীলা মণ্ডলের গ্রন্থে হোসেন শাহের তথাকথিত উজীর ‘পুরন্দর খান’-এর ( বর্তমান গ্রন্থ, পৃঃ ৩৮৩-৮৪ দ্রষ্টব্য ) প্রকৃত নাম ‘গোপীনাথ বহু’ না বলে ‘পুন্দর বহু’ বলা হয়েছে, ঊনবিংশ শতাব্দীর কবি কৃষ্ণকমল গোস্বামীকে ষোড়শ শতাব্দীর কবি বলা হয়েছে এবং বর্তমান গ্রন্থকারের নাম ‘স্বথময় বন্দ্যোপাধ্যায়’ লেখা হয়েছে। শ্রীযুক্ত প্রভাসচন্দ্র সেনের গ্রন্থে ভুলের সংখ্যা ডক্টর সুনীলা মণ্ডলের বইয়ের তুলনায়ও অনেক বেশী। আমার এই বইয়ের বর্তমান সংস্করণ রচনার সময় এই দু’খানি বই আমার বিশেষ কাজে লাগে নি।

এই সংস্করণের ছাপা শেষ হবার পরে ঢাকা বিশ্ববিদ্যালয়ের অধ্যাপক ডক্টর মমতাজুর রহমান তরফদারের লেখা Husain Shahi Bengal : a Socio-Political Study নামে বইখানি আমার হাতে পৌঁছেছে। এই বইখানি খুব সুলিখিত, এর সব জায়গাতেই লেখকের পাণ্ডিত্য ও সংগ্রহশক্তির উজ্জল নিদর্শন মেলে। লেখক পুঁথুরীদের গবেষণাকে যথোচিত মূল্য দেবারও চেষ্টা করেছেন। অবশ্য কতকগুলি বিষয় ( যেমন জয়ানন্দের ‘চৈতন্যমঙ্গল’

বর্ণিত গোড়েশ্বরের “নদীয়া উচ্ছন্ন” করার কাল এবং গোরাই মল্লিকের ত্রিপুরা অভিযানের ফলাফল ) সম্বন্ধে সমস্ত তথ্যের যথোচিত ব্যবহার করতে না পারায় তাঁর সিদ্ধান্ত নিতুল হতে পারে নি ; অনেক ব্যাপারে আমরা তাঁর সঙ্গে একমতও নই ; কিন্তু তাঁর এই গ্রন্থের উৎকর্ষ সম্বন্ধে আমাদের মনে কোন সন্দেহ নেই ।

এই বইয়ের প্রথম সংস্করণ প্রকাশিত হবার পরে কোন কোন সমালোচক এই অভিমত প্রকাশ করেছিলেন যে এর মধ্যে আকরগ্রন্থ থেকে উদ্ধৃতি একটু বেশী পরিমাণে দেওয়া হয়েছে, তার ফলে বর্ণনার ধারাবাহিকতা স্থানে স্থানে ক্ষুণ্ণ হয়েছে । এই অভিমতের যৌক্তিকতা আমি স্বীকার করি । তা সত্ত্বেও বর্তমান সংস্করণে আমি উদ্ধৃতির পরিমাণ কমাই নি, তার কারণ তিনটি । প্রথমত, বাংলা দেশের ( বিশেষত তার মুসলমান আমলের ) ইতিহাস সংক্রান্ত গবেষণা এখনও শৈশবাবস্থা অতিক্রম করে নি, সুতরাং এ বিষয়ের গবেষণায় যারাই প্রবৃত্ত হবেন, তাঁদের কোন কিছু মত প্রতিষ্ঠা করার সময় তথ্য-প্রমাণগুলি একটু বিস্তৃতভাবে উদ্ধৃত করতে হবে, তাতে বর্ণনার ধারাবাহিকতা একটু ক্ষুণ্ণ হলেও তাকে স্বীকার করে নিতে হবে । দ্বিতীয়ত, আমার এ বই যারা পড়বেন, তাঁরা সাধারণ পাঠক বা প্রথম শিক্ষার্থী হবেন না, বাংলার ইতিহাস সম্বন্ধে কতকটা বিশেষ জ্ঞান তাঁদের থাকবে, এটাই আমি আশা করি ; উদ্ধৃতির প্রাচুর্য তাঁদের পক্ষে বর্ণনার ধারা অহুসরণে অনুবিধার কারণ হবে না বলেই আমি মনে করি । তৃতীয়ত, এ বইতে তথ্য-প্রমাণগুলি আমি যেভাবে বিশ্লেষণ করেছি ও বিভিন্ন বিষয় সম্বন্ধে যে সমস্ত সিদ্ধান্ত করেছি, তা সকলে গ্রহণ না করতে পারেন ; কিন্তু যারা গ্রহণ করবেন না, মূল সূত্রগুলির পুণাঙ্গ উদ্ধৃতিগুলি তাঁদেরও কাজে লাগবে । অর্থাৎ আমার বই গবেষণা-গ্রন্থ হিসাবে মূল্যবান হোক বা না হোক, প্রয়োজনীয় আকর-সূত্রাবলীর সংকলন হিসাবে তার একটা মূল্য থাকবে । খুঁটিনাটি আলোচনা ও বিস্তৃত উদ্ধৃতি বর্জন করে বাংলার স্বাধীন সুলতানদের আমলের সংক্ষিপ্ত ইতিহাস আমি ডঃ রমেশচন্দ্র মজুমদার সম্পাদিত ‘বাংলাদেশের ইতিহাস : দ্বিতীয় খণ্ড’ বইয়ে (পৃঃ ৩১-১০৮ ) লিখেছি, সাধারণ পাঠকদের তা’ পড়তে অহুরোধ জানাচ্ছি ।

বিভিন্ন পত্রিকায় এই বইয়ের অনেক সমালোচনা প্রকাশিত হয়েছে । এই সব সমালোচনা আমাদের বর্তমান সংস্করণে বইটির উন্নতি সাধন করতে ও প্রথম সংস্করণের ত্রুটিগুলি সংশোধন করতে সাহায্য করেছে । কোন

কোন সমালোচক অবশ্য ভুল ধরতে গিয়ে নিজেই ভুল করেছেন। যেমন; আমি যেখানে লিখেছি—কোন ইতিহাসগ্রন্থে আলাউদ্দীন ফিরোজ শাহের (১ম) “নাম পাওয়া যায় নি,” তার সমালোচনা করে একজন সমালোচক লিখেছেন—কেন? আচার্য যদুনাথ সরকারের লেখা ইতিহাসগ্রন্থ (History of Bengal, Vol. II) তো আলাউদ্দীন ফিরোজ শাহের নাম আছে। ঐ সরলবুদ্ধি সমালোচক বুঝতে পারেন নি যে আলোচ্য জায়গায় “ইতিহাসগ্রন্থ” বলতে আমি ইতিহাসের মূলগ্রন্থ (Source-book of history) কে বুঝিয়েছিলাম, আধুনিক ঐতিহাসিকদের লেখা গবেষণা-গ্রন্থকে বোঝাই নি। আবার কোন কোন সমালোচক রজনীকান্ত চক্রবর্তী, নিখিলনাথ রায় প্রভৃতি ঐতিহাসিকদের অভিমতকে যথোচিত মূল্য না দেওয়ার জন্য আমার উপরে দোষারোপ করেছেন; কিন্তু রজনীকান্ত ও নিখিলনাথের বাংলার ইতিহাস সংক্রান্ত গবেষণা এখন কালবারিত হয়ে পড়েছে, তা’ ছাড়া তাঁরা অপ্রামাণিক কুলজীগ্রন্থ (অনেক ক্ষেত্রে জাল কুলজীগ্রন্থ) কে তাঁদের গবেষণার অগ্রতম সূত্ররূপে ব্যবহার করেছিলেন। এই কারণে তাঁদের অভিমত নিয়ে আলোচনার প্রয়োজন এখনকার দিনে আছে বলে আমি মনে করি না।

এই সংস্করণে প্রথম সংস্করণের “গ্রন্থকারের নিবেদন”টি সংশ্লিষ্ট আকারে ছাপা হল। উৎসর্গ-পত্রের পর পৃষ্ঠায় দেওয়া “ইতিহাসের লক্ষ্মী ওঠেন” কবিতাটি কার লেখা, তা অনেকে জানতে চেয়েছেন। ওটি আমারই লেখা।

বর্তমান সংস্করণে ভুলবশত বইয়ের ভিতরে ‘পঞ্চম অধ্যায়,’ ‘ষষ্ঠ অধ্যায়,’ ‘সপ্তম অধ্যায়,’ ও ‘অষ্টম অধ্যায়’-এর জায়গায় যথাক্রমে ‘দ্বিতীয় পরিচ্ছেদ,’ ‘তৃতীয় অধ্যায়,’ ‘চতুর্থ অধ্যায়’ ও ‘পঞ্চম অধ্যায়’ ছাপা হয়েছে (এগুলি আসলে ঐ সব অধ্যায়ের প্রথম সংস্করণের ক্রমিকসংখ্যা)। পাঠকেরা সূচীপত্র দেখে এই ভুলগুলি সংশোধন করলে অতুগৃহীত হব।

শান্তিনিকেতন,  
৫ই সেপ্টেম্বর, ১৯৬৬

}

সুখময় মুখোপাধ্যায়

# বাংলার স্বাধীন সুলতানদের কালানুক্রমিক তালিকা

## (ক) মুবারক শাহী বংশের সুলতানগণ ও আলী শাহ

নাম	শাসনকাল
(১) ফখরুদ্দীন মুবারক শাহ ১	৭৩২-৭৫০ হিঃ/১৩৩৮-১৩৪৬ খ্রিঃ
(২) ইখতিয়ারুদ্দীন গাজী শাহ ১	৭৫০-৭৫৩ হিঃ/১৩৪৬-১৩৫২ খ্রিঃ
( মুবারক শাহের পুত্র )	
(৩) আলাউদ্দীন আলী শাহ ২	৭৪২-৭৪৩ হিঃ/১৩৪১-১৩৪২ খ্রিঃ
১ সোনারগাঁওয়ের সুলতান।	
২ লখনৌতির সুলতান।	

## (খ) ইলিয়াস শাহী বংশের সুলতানগণ

নাম	শাসনকাল
(১) শামসুদ্দীন ইলিয়াস শাহ	৭৪৩-৭৫২ হিঃ/১৩৪২-১৩৫৮ খ্রিঃ
(২) সিকন্দর শাহ	৭৫২-(আঃ) ৭২৩ হিঃ/১৩৫৮-( আঃ ) ১৩২১ খ্রিঃ
( ইলিয়াস শাহের পুত্র )	
(৩) গিয়াসুদ্দীন আজম শাহ (আঃ) ৭২৩-৮১৩ হিঃ/(আঃ) ১৩২১-১৪১০ খ্রিঃ	
( সিকন্দর শাহের পুত্র )	
(৪) সৈফুদ্দীন হুমজা শাহ	৮১৩-৮১৫ হিঃ/১৪১০-১৪১২ খ্রিঃ
( আজম শাহের পুত্র )	

## (গ) বায়াজিদ শাহী বংশের সুলতানগণ

নাম	শাসনকাল
(১) শিহাবুদ্দীন বায়াজিদ শাহ	৮১৪-৮১৭ হিঃ/১৪১২-১৪১৪ খ্রিঃ
(২) আলাউদ্দীন ফিরোজ শাহ ( ১ম )	৮১৭ হিঃ/১৪১৪ খ্রিঃ
( বায়াজিদ শাহের পুত্র )	

## (ঘ) রাজা গণেশ ও তাঁর বংশের সুলতানগণ

নাম	শাসনকাল
(১) রাজা গণেশ বা দহুজমর্দনদেব	৮১৮ হি:/১৪১৫ খ্রি: ৮২০-৮২১ হি:/১৪১৭-১৪১৮ খ্রি:
(২) জলানুদ্দীন মুহম্মদ শাহ ( রাজা গণেশের পুত্র )	৮১৮-৮১৯ হি:/১৪১৫-১৪১৬ খ্রি: ৮২১-৮৩৬ হি:/১৪১৮-১৪৩৩ খ্রি:
(৩) মহেন্দ্রদেব ( রাজা গণেশের পুত্র )	৮২১ হি:/১৪১৮ খ্রি:
(৪) শামসুদ্দীন আহমদ শাহ ৮৩৬-(আ:) ৮৩৯ হি:/১৪৩৩-(আ:) ১৪৩৬ খ্রি: ( জলানুদ্দীন মুহম্মদ শাহের পুত্র )	

## (ঙ) মাহমুদ শাহী বংশের সুলতানগণ

নাম	শাসনকাল
(১) নাসিরুদ্দীন মাহমুদ শাহ(১ম)	(আ:) ৮৩৯-৮৬৪ হি:/ (আ:) ১৪৩৬-১৫৫৯ খ্রি:
(২) রুকনুদ্দীন বারবক শাহ ( মাহমুদ শাহের পুত্র )	৮৬০-৮৮০ হি:/১৪৫৫-১৪৭৬ খ্রি:৩
(৩) শামসুদ্দীন যুসুফ শাহ ( বারবক শাহের পুত্র )	৮৭৯-৮৮৫ হি:/১৪৭৭-১৪৮০ খ্রি:
(৪) নিকম্বর শাহ ( যুসুফ শাহের পুত্র ? )	৮৮৫-৮৮৬ হি:/১৪৮০-১৪৮১ খ্রি:
(৫) জলানুদ্দীন ফতেহ শাহ ( মাহমুদ শাহের পুত্র )	৮৮৬-৮৯২ হি:/১৪৮১-১৪৮৭ খ্রি:

৩ রুকনুদ্দীন বারবক শাহ ৮৬০-৬৪ হিজরায় তাঁর পিতা নাসিরুদ্দীন মাহমুদ শাহের সঙ্গে এবং ৮৭৯-৮০ হিজরায় তাঁর পুত্র শামসুদ্দীন যুসুফ শাহের সঙ্গে যুক্তভাবে রাজত্ব করেন।

### (চ) সুলতান শাহজাদা ও হাবশী সুলতানগণ

নাম	শাসনকাল
(১) বারবক বা সুলতান শাহজাদা	৮৯২ হি:/১৪৮৭ খ্রি:
(২) সৈফুদ্দীন ফিরোজ শাহ ( হাবশী )	৮৯২-৮৯৫ হি:/১৪৮৭-১৪৯০ খ্রি:
(৩) নাসিরুদ্দীন মাহমুদ শাহ ( ২য় )	৮৯৫-৮৯৬ হি:/১৪৯০- ( হাবশী—ফিরোজ শাহের পুত্র ) ১৪৯১ খ্রি:
( ) শাহরুদ্দীন মুজাফফর শাহ ( হাবশী )	৮৯৫-৮৯৮ হি:/১৪৯১-১৪৯৩ খ্রি:

### (ছ) হোসেন শাহী বংশের সুলতানগণ

নাম	শাসনকাল
(১) আলাউদ্দীন হোসেন শাহ	৮৯৮-৯২৫ হি:/১৪৯৩-১৫১৯ খ্রি:
(২) নাসিরুদ্দীন নসরৎ শাহ	৯২৫ ৯৩৮ হি:/১৫১৯ ১৫৩২ খ্রি: ৪ ( হোসেন শাহের পুত্র )
(৩) আলাউদ্দীন ফিরোজ শাহ ( ২য় )	৯৩৮-৯৩৯ হি:/১৫৩২-১৫৩৩ খ্রি: ( নসরৎ শাহের পুত্র )
(৪) গিয়াসুদ্দীন মাহমুদ শাহ	৯৩৯-৯৪৫ হি:/১৫৩৩-১৫৩৮ খ্রি: ৫ ( হোসেন শাহের পুত্র )

৪ নসরৎ শাহ ৯২৫ হিজরার আগে কয়েক বৎসর হোসেন শাহের সঙ্গে যুক্তভাবে রাজত্ব করেছিলেন।

৫ মাহমুদ শাহ নসরৎ শাহের রাজত্বের শেষ দিকে স্বনামে মুদ্রা প্রকাশ করেছিলেন।



## শুদ্ধিপত্র

পৃষ্ঠা	ছত্র	আছে	হবে
১৮২	৭	১৪৫৮	১৪৫৯
৩৮০	১৩	(১৫) বিজ্ঞাবাচস্পতি	(১৮) বিজ্ঞাবাচস্পতি
৩৮১	১	(১৬-১৭) জগাই-মাধাই	(১৯-২০) জগাই-মাধাই
৪৬৪	১৪	(১) ইব্ন্ বক্তুতার বিবরণ	ইব্ন্ বক্তুতার বিবরণ
৪৭০	৪	(১) ওয়াংতা-ইউয়ানের বিবরণ	ওয়াংতা-ইউয়ানের বিবরণ

# সূচীপত্র

## প্রথম অধ্যায়

স্বাধীনতার প্রথম পর্যায় ( ১-১৯ )

অবতরণিকা	১
ফখরুদ্দীন মুবারক শাহ	১
ইখতিয়ারুদ্দীন গাজী শাহ	১১
আলাউদ্দীন আলী শাহ	১৩

## দ্বিতীয় অধ্যায়

ইলিয়াস শাহী বংশ ( ২০-৯৫ )

শামসুদ্দীন ইলিয়াস শাহ	২০
সিকন্দর শাহ	৪৭
গিয়াসুদ্দীন আজম শাহ	৬০
সৈয়দুদ্দীন হুমজা শাহ	৯৪

## তৃতীয় অধ্যায়

রাজা গণেশের ক্ষমতা-অধিকার—ক্রৌড়নক রাজবংশ ( ৯৬-৯৮ )

শিহাবুদ্দীন বায়াজিদ শাহ	৯৬
আলাউদ্দীন ফিরোজ শাহ ( ১২ )	৯৮

## চতুর্থ অধ্যায়

রাজা গণেশ ( ৯৯-১৪৯ )

অবতরণিকা	৯৯
রাজার নাম	১০০
ঐতিহাসিক সূত্র	১০২
গণেশের পূর্ব-ঐতিহাস ও দেশ	১০৪
গণেশের অভ্যাস	১০৭
গণেশ কি প্রথমেই নিজে রাজা হয়েছিলেন ?	১০৮

মুসলমান দরবেশদের সঙ্গে গণেশের বিরোধ	১১০
নূর কুৎব্ আলম ও ইব্রাহিম শকী	১১০
ইব্রাহিম শকীর বঙ্গাভিযান—মিথিলায় শিবসিংহের সঙ্গে যুদ্ধ	১১৪
ইব্রাহিমের বাংলায় আগমনের ফলে গণেশের সিংহাসনত্যাগ	১১৭
জলালুদ্দীনের প্রথম দফার রাজত্ব	১২০
দহুজমর্দনদেব ও মহেন্দ্রদেবের মৃত্যু	১২৬
গণেশ ও দহুজমর্দনদেব অভিন্ন লোক	১২৭
চন্দ্রদ্বীপের দহুজমর্দন	১৩১
গণেশের দ্বিতীয়বার সিংহাসনে আরোহণ ও পরবর্তী ঘটনাবলী	১৩৬
গণেশের মৃত্যু	১৪০
অপ্রামাণিক সূত্রে রাজা গণেশ	১৪০
গণেশের রাজ্যের আয়তন	১৪১
গণেশের চরিত্র	১৪৪

### পঞ্চম অধ্যায়

#### রাজা গণেশের বংশ ( ১৫০-১৬৯ )

মহেন্দ্রদেব কে ?	১৫০
জলালুদ্দীনের দ্বিতীয় দফার রাজত্ব	১৫২
জলালুদ্দীনের রাজত্বকালে ইব্রাহিম শকীর দ্বিতীয়বার বাংলা আক্রমণ	১৫৩
জলালুদ্দীন ও আরাকানরাজ	১৫৫
জলালুদ্দীনের পূর্ব-নাম	১৫৭
জলালুদ্দীনের ধর্ম-নিষ্ঠা	১৫৮
জলালুদ্দীনের হিন্দু সেনাপতি	১৬০
হিন্দুদের সহক্ষে জলালুদ্দীনের নীতি	১৬১
জলালুদ্দীনের মৃত্যু	১৬৩
জলালুদ্দীন ও বৃহস্পতি মিশ্র	১৬৪
অগ্রাগ্র তথ্য	১৬৪
জলালুদ্দীনের মৃত্যুর সময়	১৬৫
শামসুদ্দীন আহম্মদ শাহ	১৬৭

### ষষ্ঠ অধ্যায়

#### মাহমুদ শাহী বংশ ( ১৭০-১৮১ )

নাসিরুদ্দীন মাহমুদ শাহ ( ১ম )	১৭০
ককসুদ্দীন বারবক শাহ	১৮২

শামসুদ্দীন যুসুফ শাহ	২১৩
জলালুদ্দীন ফতেহ শাহ	২১৬

সপ্তম অধ্যায়

হাবশী রাজত্ব ( ২৪২-২৬৭ )

অবতরণিকা	২৪২
বারবক বা সুলতান শাহজাদা	২৪৪
সৈফুদ্দীন ফরোজ শাহ	২৫১
নাসিরুদ্দীন মাহমুদ শাহ ( ২য় )	২৫২
শামসুদ্দীন মুজাফফর শাহ	২৬৩

অষ্টম অধ্যায়

আলাউদ্দীন হোসেন শাহ ( ২৬৮-৪১১ )

অবতরণিকা	২৬৮
পূর্ব ইতিহাস	২৭০
সিংহাসন লাভের আগে	২৭৮
সিংহাসনে আরোহণের তারিখ	২৮০
সিংহাসন লাভের পরে	২৮১
সিকন্দর লোদীর সঙ্গে হোসেন শাহের সংঘর্ষ	২৮৫
হোসেন শাহের কামতাপুর-কামরূপ অভিযান	২৮৭
হোসেন শাহের আসাম অভিযান	২৯০
উড়িষ্যার সঙ্গে হোসেন শাহের যুদ্ধ	২৯৩
ত্রিপুরার সঙ্গে হোসেন শাহের যুদ্ধ	৩১৩
আরাকানের সঙ্গে হোসেন শাহের সংঘর্ষ	৩২২
ত্রিছত্ত ও বিহারে হোসেন শাহের অভিযান	৩৩৩
হোসেন শাহের সামরিক কীর্তির সার-সংকলন	৩৩৫
বাংলায় পতুগীজদের আগমন	৩৩৬
হোসেন শাহের রাজধানী	৩৩৮
হোসেন শাহ ও খ্রীষ্টেতত্ত্ব	৩৪২
হোসেন শাহ কি সভাপীর-পূজার প্রবর্তক ?	৩৫২
হোসেন শাহের মন্ত্রী, কর্মচারী ও অমাত্যবর্গ	৩৫৪
হোসেন শাহের রাজ্যসীমা	৩৮৪
হোসেন শাহের চরিত্র	৩৮৯
হোসেন শাহ কি বিদ্যা ও সাহিত্যের পৃষ্ঠপোষক ছিলেন ?	৩৯৩
হোসেন শাহের ধর্ম-সম্বন্ধীয় নীতি	৪০১
হোসেন শাহের মৃত্যু	৪১১

হোসেন শাহের পুরগণ<sup>১</sup>

উপসংহার

৪১৩

## নবম অধ্যায়

হোসেন শাহী বংশের শেষ পর্ব ( ৪১৫-৫৮ )

নাসিরুদ্দীন নসরৎ শাহ

৪১৫

আলাউদ্দীন ফিরোজ শাহ ( ২৪ )

৪৩৮

গিরাসুদ্দীন মাহমুদ শাহ

৪৪০

## দশম অধ্যায়

স্বাধীন সুলতানদের আমলে বাংলার শাসন-ব্যবস্থা ও সামরিক

ব্যবস্থা ( ৪৫৯-৪৬৩ )

## একাদশ অধ্যায়

সমসাময়িক দৃষ্টিতে এ' যুগের বাংলাদেশ ( ৪৬৪-৫.৪ )

ইব্ন্ বতুতার বিবরণ

৪৬৪

ওয়াংতা-ইউয়ানের বিবরণ

৪৭০

মা-হোয়ানের বিবরণ

৪৭১

ফেই-শিনের বিবরণ

৪৮০

নিকলো কাস্তির বিবরণ

৪৮৪

রায়মুন্সুট বৃহস্পতি আমের বিবরণ

৪৮৭

কুতিবাদের বিবরণ

৪৮৯

সনাতনের বিবরণ

৪৯১

ভাস্কো-দা-গামার বিবরণ<sup>২</sup>

ভারথেমার বিবরণ

৪৯২

বারবোসার বিবরণ

৪৯৪

বাবরের বিবরণ

৪৯৮

জোর্জা-দে-বারোসের বিবরণ

৪৯৯

বৃন্দাবনদাসের বিবরণ

৫০০

অগ্রাগ্র চরিতকারের বিবরণ

৫১০

## দ্বাদশ অধ্যায়

স্বাধীন সুলতানদের আমলের স্মৃতিচিহ্ন ( ৫১৫-৫২১ )

প্রশিষ্ট : অতিরিক্ত টাকা ও সংশোধনী

৫২২

হিটরা ও খ্রীষ্টাব্দ

৫৫৬

সঙ্কেতপঞ্জী

৫৬০

## সংযোজন

### হোসেন শাহের পুত্রগণ

( ৪১২ পৃষ্ঠা ৩০ ছত্রের পরে সংযোজনীয় )

‘তবকাৎ-ই-আকবরী’, ‘মাসির-ই-রহিমী’, ‘রিয়াজ-উস-সলাতীন’ প্রভৃতি ঐতিহাসিক গ্রন্থের মতে হোসেন শাহের ১৮ জন পুত্র ছিল। প্রামাণিক সূত্র থেকে হোসেন শাহের তিনজন পুত্রের কথা জানা যায়—নাসিরুদ্দীন নসরৎ শাহ, গিয়াসুদ্দীন মাহমুদ শাহ ও দানিয়েল। নসরৎ শাহ হোসেন শাহের মৃত্যুর পরে ও মাহমুদ শাহ আরও পরে স্থলতান হয়েছিলেন। কয়েকটি প্রামাণিক ইতিহাসগ্রন্থ থেকে জানা যায় যে,—১৪২৫ খ্রীষ্টাব্দে সিকন্দর লোদীর সৈন্যবাহিনীকে বাবা দেবাব জন্ত হোসেন শাহ যে সৈন্যবাহিনী পাঠান, তাঁর পুত্র দানিয়েল তার নেতা ছিলেন। একটি শিলালিপি থেকে জানা যায় যে, দানিয়েল ২০৩ হিজরা বা ১৪২৭-২৮ খ্রীষ্টাব্দে মুক্তেরের শাহ নফাহর দরগায় একটি সমাধি-কক্ষ নির্মাণ করিয়েছিলেন। হোসেন শাহের আর একজন পুত্র আসাম-অভিযানের সময়ে নিহত হয়েছিলেন, এ কথা বিভিন্ন সূত্রে পাওয়া যায়। কোন কোন কিংবদন্তী অনুসারে এই পুত্রের নাম “দুলাল গাজী”। দানিয়েল ও “দুলাল গাজী” অভিন্ন হতে পারেন। তবে এ সম্বন্ধে জোর করে কিছু বলা যায় না।

### ভাঙ্কো-দা-গামার বিবরণ

( ৪২২ পৃষ্ঠা ১৫ ছত্রের পরে সংযোজনীয় )

ভাঙ্কো-দা-গামা ১৪২৮ খ্রীষ্টাব্দে পর্তুগালে ফিরে বাংলাদেশ সম্বন্ধে একটি অতিসংক্ষিপ্ত বিবরণ দিয়েছিলেন ; বিবরণটি আমরা নীচে উদ্ধৃত করলাম,

“বেন্গুআলা ( বাংলা )-র রাজা মুরিশ ( মুসলমান )। এখানে খ্রীষ্টান ( ! ) ও মুর ( মুসলমান ) উভয় সম্প্রদায়ের লোকরাই বাস করে। এ’ দেশের সৈন্য-বাহিনীর সৈন্যসংখ্যা প্রায় চব্বিশ হাজার ; তার মধ্যে দশ হাজার অঝারোহী এবং অবশিষ্ট পদাতিক। রণহস্তীর সংখ্যা চারশো। এ’ দেশ থেকে প্রচুর গম ( ! ) এবং খুব দামী তুলার জিনিস রপ্তানী হতে পারে। এখানে যে কাপড় বাইশ শিলিং ছ’ পেনি দামে বিক্রী হয়, তা’ কালিকটে বিক্রী করে নব্বই শিলিং পাওয়া যায়। এখানে রূপার পরিমাণ অত্যধিক।” ( J. J. A. Compos, History of the Portuguese in Bengal. p 25 )



বাংলার ইতিহাসের দু'শো বছর :  
স্বাধীন সুলতানদের আমল  
( ১৩৩৮—১৫৩৮ খ্রীঃ )





## প্রথম অধ্যায় স্বাধীনতার প্রথম পর্যায় অবতরণিকা

বাংলাদেশে মুসলিম অধিকার প্রতিষ্ঠার স্বপ্ন থেকে শেষ পর্যন্ত বাংলা দেশ পর্যায়ক্রমে একবার দিল্লীর অধীন হয়েছে, আবার স্বাধীন হয়েছে। কিন্তু ১৩০৮ খ্রীষ্টাব্দে ফখরুদ্দীন মুবারক শাহের স্বাধীনতা ঘোষণা থেকে স্বপ্ন করে ১৫৩৮ খ্রীষ্টাব্দে গিয়াসুদ্দীন মাহমুদ শাহের উচ্ছেদ পর্যন্ত পুরোপুরি দু’শো বছর বাংলাদেশ যে রকম অবিচ্ছিন্নভাবে স্বাধীনতা ভোগ করেছিল, তত দীর্ঘদিন ধরে আর কোন সময় তার স্বাধীনতা স্থায়ী হয় নি। এই দু’শো বছর বাংলা দেশের ইতিহাসের একটি গৌরবময় অধ্যায়। এই সময়ে বাংলার সুলতানরা নিজেদের যোগ্যতা, শক্তি ও ঐশ্বর্যের মধ্য দিয়ে ভারতবর্ষের প্রেষ্ঠ নৃপতিদের অন্ততম হয়ে উঠেছিলেন। শুধু তা’ই নয়, তাঁরা দেশের আভ্যন্তরীণ শাসন-ব্যবস্থার পরিচালনায় এবং রাজার নানা রকম কর্তব্য পালনেও অপরিসীম দক্ষতা দেখিয়ে গিয়েছেন। তার ফলে তাঁরা বাংলার জনসাধারণের, এমন কি বিধর্মী হিন্দুদেরও আস্থা ও ভালোবাসা অর্জন করেছিলেন। বাংলার ইতিহাসের এই স্মরণীয় পর্বটির সম্বন্ধেই আমরা অতঃপর আলোচনা করব।

### ফখরুদ্দীন মুবারক শাহ

১৩২২ খ্রীষ্টাব্দে বাংলার স্বাধীন সুলতান শামসুদ্দীন ফিরোজ শাহের মৃত্যু হবার পর তাঁর পুত্রদের মধ্যে সিংহাসন নিয়ে বিরোধ বাধে। এঁদের মধ্যে শেষ পর্যন্ত জয়ী হন গিয়াসুদ্দীন বাহাদুর শাহ। কিন্তু তাঁর দু’জন ভ্রাতা দিল্লীর তৎকালীন সুলতান গিয়াসুদ্দীন তোগলকের সাহায্য প্রার্থনা করেন। গিয়াসুদ্দীন তোগলক সসৈন্তে বাংলায় এসে গিয়াসুদ্দীন বাহাদুর শাহকে পরাজিত ও বন্দী করেন এবং বাংলাদেশকে সম্পূর্ণভাবে নিজের অধীনে আনেন (১৩২৪ খ্রিঃ)। ৭৩২ হিজরা বা ১৩৩৮ খ্রীষ্টাব্দ পর্যন্ত বাংলাদেশ তোগলক সাম্রাজ্যের অন্তর্ভুক্ত থাকে। ঐ সময়ে বাংলাদেশ তিনটি প্রশাসনিক অঞ্চলে বিভক্ত ছিল—লখনৌতি (লক্ষণাবতী), সোনারগাঁও এবং সাতগাঁও।

১৩৩৮ খ্রীঃ অব্যবহিত পূর্বে এই তিনটি অঞ্চলের শাসনকর্তা ছিলেন যথাক্রমে কদর খান, বহরাম খান ও মালিক অভুদ্দীন যাহিয়া। কয়েক-বছর সাফল্যের সঙ্গে সোনারগাঁও অঞ্চল শাসন করবার পর বহরাম খান পরলোকগমন করেন। এই বহরাম খানের তরবারি-বাহক ছিলেন ফখরুদ্দীন। তিনি ৭৩৯ হিজরায় দিল্লীর সুলতানের বিরুদ্ধে বিদ্রোহ করে সোনারগাঁও অঞ্চলে নিজের কর্তৃত্ব প্রতিষ্ঠা করলেন এবং ফখরুদ্দীন মুবারক শাহ নাম নিয়ে নিজেকে স্বাধীন সুলতান বলে ঘোষণা করলেন। এই সময়ে দিল্লীর সুলতান মুহম্মদ তোগলকের খামখেয়ালীপনা ও অত্যাচারের ফলে তাঁর সাম্রাজ্য ভেঙে পড়ছিল, কাজেই ফখরুদ্দীন তাঁর উচ্চাশা নিবৃত্তির স্বযোগ পেয়ে গেলেন।

কীভাবে ফখরুদ্দীন মুবারক শাহ দিল্লীর সুলতানের বিরুদ্ধে বিদ্রোহ করে স্বাধীন হলেন, তার সংক্ষিপ্ত অথচ নির্ভরযোগ্য বিবরণ সমসাময়িক ঐতিহাসিক জিয়াউদ্দীন বারনির 'তারিখ-ই-ফিরোজ শাহী'তে পাওয়া যায়। জিয়াউদ্দীন বারনি দোয়াব ও বারনে মুহম্মদ তোগলকের অত্যাচার বর্ণনা করার পরে লিখেছেন,

“এই সময়ের দ্বিতীয় ঘটনা হচ্ছে বাংলাদেশে বহরাম খানের মৃত্যুর পরে ফখরার গোলযোগ। ফখরা এবং তার বাঙালী সৈন্তেরা বিদ্রোহী হয়; কদর খান (তাদের হাতে) নিহত হয় এবং তার স্ত্রী, পুত্র, হাতী ও অস্ত্রশস্ত্র খণ্ড খণ্ড হয়ে যায়। লখনৌতির ধন-সম্পদ লুণ্ঠিত হয়। লখনৌতি, সাতগাঁও ও সোনারগাঁও (মুহম্মদ তোগলকের) হস্তচ্যুত হয়, এগুলি ফখরা ও অত্যাচারী বিদ্রোহীদের হাতে গিয়ে পড়ে \* ; অতঃপর আর (এদের) পুনরুদ্ধার করা যায় নি।”

ফখরুদ্দীনের বিদ্রোহ ও স্বাধীনতা অর্জন সম্বন্ধে যাহিয়া বিন্ সিরহিন্দীর 'তারিখ-ই-মুবারক শাহী'তে অপেক্ষাকৃত বিস্তৃত সংবাদ পাওয়া যায়। এতেন্দ্র লেখা আছে,

“বহরাম খান সোনারগাঁওয়ে শেষ নিঃশ্বাস ত্যাগ করলেন এবং তাঁর তরবারি-বাহক মালিক ফখরুদ্দীন ৭৩৯ হিজরায় (১৩৩৮ খ্রীঃ) বিদ্রোহী

\* এর দ্বারা বোঝার না যে, লখনৌতি, সোনারগাঁও, সাতগাঁও—সমস্ত জায়গাই ফখরুদ্দীনের হাতে গিয়ে পড়ল; বাংলাদেশের বিভিন্ন বিদ্রোহী বিভিন্ন জায়গা দখল করল—এই কথাই বারনি বলতে চেয়েছেন।

হয়ে সুলতান ফখরুদ্দীন নীচ নিয়ে রাজচিহ্ন ধারণ করল। লখনৌতির শাসনকর্তা মালিক পিণ্ডার খিলজি কদর খান, মুন্তোফি-ই-মমালিক মালিক হিসামুদ্দীন আবু রেজা, সাতগাঁওয়ের জায়গীরদার আজম-ই-মুলক অজুদ্দীন রাহিআ এবং করহু-এর আমীর নসরৎ খানের পুত্র ফিরোজ খান বিক্রোহীর বিরুদ্ধে যুদ্ধযাত্রা করে সোনারগাঁওয়ে গেলেন। সেও (ফখরুদ্দীন) তাঁর লোকদের নিয়ে তাঁদের সম্মুখীন হল। তারপর যে যুদ্ধ হল, তাতে ফখরুদ্দীন পরাধীন হয়ে পরাভূত হল। পরাভূতের হাতী এবং ঘোড়াগুলি বিজয়ী পক্ষের দখলে এল। কদর খান ঐ জায়গায় রইলেন, অগ্রাগ্র আমীররা তাঁদের নিজের নিজের জায়গীরে ফিরে গেলেন।

“বর্ষাকাল উপস্থিত হলে কদর খানের বাহিনীর বেশীর ভাগ ঘোড়া মারা গেল। তিনি ছ’তিন মাস ধরে বিপুল পরিমাণ রোপ্যমুদ্রা সংগ্রহ করে তাঁর নিজের গৃহে তৃপাকারে ভাণ্ডারজাত করেছিলেন। তিনি বলতেন যে সম্রাটের সামনেও তিনি এইভাবে রোপ্যমুদ্রা সঞ্চয় করতেন, কারণ তিনি যত বেশী সঞ্চয় করবেন, সুলতানের তাতে তত বেশী কাজ হবে। মালিক হিসামুদ্দীন তাঁকে এই মর্মে উপদেশ দিলেন, ‘দূর দেশে প্রভূত ধন সংগ্রহ করা ক্ষতিকর, কারণ তার উপর লোকদের লোভ হবে এবং তারা সন্দেহ করবে কেন এই অর্থ সম্রাটকে পাঠানো হচ্ছে না। যা কিছু অর্থ ও সম্পদ সংগ্রহ করা হয়েছে, সমস্ত রাজকোষে পাঠিয়ে দেওয়া উচিত। এর চেয়ে ভাল আর কিছুই হতে পারে না।’ কদর খান তাঁর কথায় কর্ণপাত করলেন না; তিনি সৈন্যদের তাদের প্রাপ্য (লুণ্ঠের অংশ) দিলেন না, রাজকোষেও ঐ সম্পদ পাঠালেন না। তাঁর সৈন্তেরা ঐ ধনের জন্য লালসায়িত হয়ে উঠল। ইতিমধ্যে ফখরুদ্দীন এসে পৌছোলো এবং পৌছোবামাত্র কদর খানের সৈন্তেরা তার সঙ্গে যোগ দিয়ে কদর খানকে হত্যা করল।

“ফখরুদ্দীন সোনারগাঁওকে তার রাজধানী করল এবং তার গোলাম মুখলিশকে লখনৌতিতে রেখে দিল। কদর খানের অধীনস্থ আরিজ-ই-লস্কর (সৈন্তবাহিনীর বেতনদাতা) আলী মুবারক মুখলিশকে বধ করে লখনৌতি অধিকার করলেন। কিন্তু তিনি সার্বভৌম রাজা হবার কোন লক্ষণ না দেখিয়ে সম্রাটের (মুহম্মদ তোগলক) কাছে এই মর্মে এক আবেদন পাঠালেন যে তিনি লখনৌতি অধিকার করেছেন; যদি সম্রাট তাঁর কোন ভৃত্যকে সেখানে পাঠান এবং (লখনৌতির) সিংহাসনে বসান (অর্থাৎ শাসনকর্তার

পদে নিযুক্ত করেন), সে (ফখরুদ্দীন) সত্ৰাটকে প্রজ্ঞা দেখাবে। সুলতান আদেশ জারী করলেন যে নগরীর (অর্থাৎ দিল্লীর) শাসনকর্তা যুহুফকে ‘খান’ পদবী দিয়ে (লখনৌতিতে) পাঠান হল। ইতিমধ্যে (অর্থাৎ লখনৌতিতে পৌছোবার আগেই) মালিক যুহুফের মৃত্যু হল, কিন্তু সুলতান এদিকে মন দিলেন না এবং কাউকেই তিনি লখনৌতিতে পাঠালেন না। আলী মুবারক তখন ফখরুদ্দীনের সঙ্গে তাঁর শত্রুতার জগ্ন বাধ্য হয়ে রাজচিহ্ন ধারণ করলেন এবং সুলতান আলাউদ্দীন নামে নিজেকে অভিহিত করলেন।”

সমসাময়িক গ্রন্থ ‘তারিখ-ই-ফিরোজ শাহী’তে ফখরুদ্দীনের বিদ্রোহ ও সাফালালাভ সম্বন্ধে যে বিবরণ লিপিবদ্ধ হয়েছে, কিঞ্চিৎ পরবর্তী গ্রন্থ ‘তারিখ-ই-মুবারক শাহী’তে তার সম্পূর্ণ সমর্থন মিলছে, উপরন্তু তাতে এই ঘটনার বিস্তৃততর বিবরণ পাওয়া যাচ্ছে। এই বিবরণ খুব পরিষ্কার এবং সম্পূর্ণ বিশ্বাসযোগ্য। পরবর্তী কালে লেখা ইতিহাসগ্রন্থগুলিতে মোটামুটি ভাবে ‘তারিখ-ই-মুবারক শাহী’র বিবরণেরই পুনরাবৃত্তি করা হয়েছে।

‘রিয়াজ-উল-সলাতীন’র মতে ফখরুদ্দীন কদর খানের সিলাহদার বা বর্ষরক্ষক ছিলেন, কিন্তু ‘তারিখ-ই-মুবারক শাহী’তে পরিষ্কারভাবে লেখা আছে যে, ফখরুদ্দীন বহরাম খানের তরবারি-বাহক ছিলেন, বদাওনীর ‘মস্তখব-উল-তওয়ারিখে’ এই উক্তির সমর্থন আছে; সোনারগাঁওয়ে বহরাম খানের মৃত্যুর পর সেই জায়গাতেই ফখরুদ্দীন বিদ্রোহ করেন। অতএব ‘রিয়াজ’-এর উক্তি সম্পূর্ণ ভুল। কদর খান আসলে ফখরুদ্দীনের প্রভু ছিলেন না, শত্রু ছিলেন; ফখরুদ্দীনকে পরাজিত করেও কদর খান নিজের অতিরিক্ত অর্থলোভের জগ্ন শেষরক্ষা করতে পারেননি। তারই জগ্ন ফখরুদ্দীন কদর খানকে বধ করে সংগ্রামে জয়ী হতে পেরেছিলেন।

ফখরুদ্দীন মুবারক শাহ ৭৫০ হিজরা (১৩৪২-৫০ খ্রিঃ) পর্যন্ত রাজত্ব করেছিলেন, কারণ ৭৪০ হিঃ থেকে ৭৫০ হিঃ পর্যন্ত সোনারগাঁও টাকশালে উৎকীর্ণ তাঁর মুদ্রা পাওয়া যাচ্ছে। ৭৫০ হিজরাতেই তাঁর রাজত্ব শেষ হয়, কারণ ৭৫০ হিঃর পরে আর তাঁর মুদ্রা মিলছে না, তার জায়গায় ৭৫০ হিঃ থেকে ৭৫৩ হিঃ পর্যন্ত সোনারগাঁও টাকশালে তৈরী ইখতিয়ারুদ্দীন গাজী শাহের মুদ্রা পাওয়া যাচ্ছে।

‘তারিখ-ই-মুবারক শাহী’তে লেখা আছে, “ফখরুদ্দীন সোনারগাঁওকে তার রাজধানী করল এবং তার গোলাম মুখলিশকে লখনৌতিতে রেখে দিল।”

এর থেকে পরিকার বোঝা যায়, ফখরুদ্দীন লখনৌতি জয় করেছিলেন এবং মুখলিশকে তার শাসনকর্তার পদে নিযুক্ত করেছিলেন; কিন্তু নিজের রাজধানী স্থাপন করেছিলেন সোনারগাঁওয়ে, সম্ভবত লখনৌতি তাঁর পক্ষে যথেষ্ট নিরাপদ জায়গা নয় বলে। এরপর আলী মুবারক মুখলিশকে বধ করে লখনৌতি পুনরধিকার করে নেন। ফখরুদ্দীন কোনদিন লখনৌতি জয় করেন নি বলে যে ধারণা আছে, তা ‘তারিখ-ই-মুবারক শাহী’র বিবরণ থেকে ভুল প্রমাণিত হচ্ছে। আলাউদ্দীন আলী খাহের অধীনে লখনৌতি অঞ্চল ছাড়া আর কোন অঞ্চল কোনদিন ছিল বলে প্রমাণ পাওয়া যায় না।

ফখরুদ্দীন মুবারক শাহ চট্টগ্রাম জয় করে সেখানে প্রথম মুসলিম অধিকার প্রতিষ্ঠা করেন বলে প্রসিদ্ধি আছে। এই বিষয়ের প্রাচীনতম উল্লেখ পাওয়া যায় ঔরংজেবের অন্ত্যতম কর্মচারী শিহাবুদ্দীন তালিশের লেখায়। শিহাবুদ্দীন তালিশ লিখেছেন, “সুদূর অতীতে ফখরুদ্দীন নামে বাংলার একজন সুলতান চট্টগ্রাম সম্পূর্ণভাবে জয় করেন এবং ত্রিপুরের ঘাঁটির সামনে নদীর বিপরীত পারে অবস্থিত চাঁদপুর থেকে চট্টগ্রাম পর্যন্ত একটি বাঁধ তৈরী করেন। চট্টগ্রামে যে সমস্ত মসজিদ ও সমাধি রয়েছে, সেগুলি ফখরুদ্দীনের আমলে নির্মিত হয়েছিল। ধ্বংসাবশেষ থেকে তা প্রমাণ হয় (The ruins prove it)।” (Studies in Mughal India, by Jadunath Sarkar, p. 122 অষ্টব্য)।

শিহাবুদ্দীন তালিশের উক্তি থেকে অবশ্য ফখরুদ্দীনের চট্টগ্রাম বিজয় সম্বন্ধে নিঃসন্দেহ হওয়া যায় না, কারণ শিহাবুদ্দীন তালিশ ফখরুদ্দীনের মৃত্যুর প্রায় সওয়া তিনশো বছর বাদে তাঁর বিবরণ লিপিবদ্ধ করেন। তবে শিহাবুদ্দীন তালিশের বিবরণের শেষ দুটি বাক্য থেকে মনে হয় যে তিনি চট্টগ্রামের অনেক ধ্বংসাবশেষের শিলালিপিতে ফখরুদ্দীনের নাম দেখেছিলেন। শিহাবুদ্দীন তালিশ কিছুদিন চট্টগ্রামে বাস করেছিলেন এবং চট্টগ্রামের প্রাচীন ইতিহাস জানবার সুযোগ পেয়েছিলেন, কাজেই ফখরুদ্দীনের চট্টগ্রাম বিজয় সম্বন্ধে তাঁর উক্তি সত্য বলেই মনে হয়।

ইবনু বত্তুতা ফখরুদ্দীনের রাজত্বকালে বাংলাদেশে এসেছিলেন (১৪৭ হিঃ)। তাঁর ভ্রমণ-বিবরণী থেকে আমরা ফখরুদ্দীন সম্বন্ধে অনেক তথ্য জানতে পারি। ফকীরদের উপর ফখরুদ্দীনের অসামান্য প্রীতি, আলাউদ্দীন

আলী শাহের সঙ্গে তাঁর যুদ্ধ এবং ফখরুদ্দীনের রাজত্বকালে বাংলাদেশের অবস্থা সম্বন্ধে ইব্ন বতুতা অনেক সংবাদ দিয়েছেন। আমরা এখানে ইব্ন বতুতার লেখা থেকে প্রয়োজনীয় অংশ উদ্ধৃত করছি।

“বাংলার সুলতান—ইনি সুলতান ফখরুদ্দীন, ডাকনাম ফখরা। ইনি গুণী রাজা এবং বিদেশীদের, বিশেষত ফকীর ও সুফীদের ভালবাসেন।...আলী শাহ লখনৌতিতে ছিলেন।...ফখরুদ্দীন...‘সোদকাওয়াডে’ এবং বাংলার অবশিষ্ট অংশে বিদ্রোহ করেন। সেখানে তিনি নিজের শাসন সুপ্রতিষ্ঠিত করেন। কিন্তু তাঁর সঙ্গে আলী শাহের যুদ্ধ বাধে। শীতকালে এবং বর্ষাকালে জলকাদার মধ্যে ফখরুদ্দীন জলপথে লখনৌতি আক্রমণ করতেন, কারণ জলে তিনি শক্তিশালী ছিলেন। কিন্তু শুষ্ক ঋতু (গ্রীষ্মকাল) এলে আলী শাহ স্থলপথে বাংলা আক্রমণ করতেন, কারণ স্থলে তাঁর শক্তি বেশী ছিল।

“সুলতান ফখরুদ্দীনের ফকীরদের প্রতি প্রীতি এত প্রগাঢ় ছিল যে তিনি তাদের (ফকীরদের) মধ্য থেকে শায়দা নামে একজনকে ‘সোদকাওয়াডে’ তাঁর নায়ব (প্রতিনিধি) নিযুক্ত করেছিলেন। অতঃপর ফখরুদ্দীন তাঁর একজন শত্রুর বিরুদ্ধে যুদ্ধ করবার জন্ত সৈন্তবাহিনী নিয়ে যাত্রা করেন। কিন্তু শায়দা নিজে স্বাধীন হবার অভিপ্রায়ে তাঁর বিরুদ্ধে বিদ্রোহ করে। সে সুলতান ফখরুদ্দীনের পুত্রকে হত্যা করে। এইটি ছাড়া সুলতানের আর কোন পুত্র ছিল না। এই খবর শুনে সুলতান রাজধানীতে ফিরে আসেন। শায়দা এবং তার দলের লোকেরা পালিয়ে ‘সুনারকাওয়াড’ (সোনারগাঁও) শহরে আশ্রয় নিল। ঐ স্থান খুব দুর্ভেদ্য। সুলতান ঐ জায়গা দখল করার জন্ত এক সৈন্তবাহিনী পাঠালেন। সেখানকার অধিবাসীরা নিজেদের প্রাণের ভয়ে শায়দাকে বন্দী করে সুলতানের বাহিনীর কাছে পাঠিয়ে দিল। এই খবর সুলতানের কাছে গেলে তিনি বিদ্রোহীর মাথা (তাঁর কাছে) পাঠাতে আদেশ দিলেন। ফলে তার (শায়দার) মাথা কেটে ফেলা হল ও (সুলতানের কাছে) পাঠানো হল এবং তার জন্ত এক বিরাট সংখ্যক ফকীর নিহত হল। আমি যখন ‘সোদকাওয়াডে’ প্রবেশ করি, আমি তার সুলতানকে দেখিনি বা তাঁর সঙ্গে সাক্ষাৎ করিনি, কারণ তিনি ভারতবর্ষের সম্রাটের বিরুদ্ধে বিদ্রোহ করেছেন এবং আমি যদি সাক্ষাৎ করি, তার ফলাফল কী হবে, সে সম্বন্ধে আমার ভয় হয়েছিল।”

ইব্ন বতুতা এখানে একটি নতুন সংবাদ দিয়েছেন। সেটি এই যে, তাঁর

বাংলাদেশে ভ্রমণের সময়ে 'সোদকাওয়াড' ফখরুদ্দীন মুবারক শাহের রাজধানী ছিল। ফখরুদ্দীন পর্যায়ক্রমে সোনারগাঁও ও 'সোদকাওয়াডে' তাঁর রাজধানী স্থানান্তরিত করতেন বলে মনে হয়।

এখন প্রশ্ন হচ্ছে, এই 'সোদকাওয়াড' আসলে কোন্ শহর? ধনির দিক দিয়ে মাত্র দুটি শহরের নামের সঙ্গে 'সোদকাওয়াড'-এর মিল দেখা যায়— সাতগাঁও ও চাটগাঁও। আমি ইতিপূর্বে এই বইয়ের প্রথম সংস্করণে (পৃ: ৩৭২-৩৮৩) এ সম্বন্ধে আলোচনা করে সিদ্ধান্ত করেছিলাম যে 'সোদকাওয়াড' ও 'সাতগাঁও' অভিন্ন। কিন্তু এখন সে সিদ্ধান্ত পরিবর্তন করতে বাধ্য হয়েছি। কারণ সাতগাঁও যে ফখরুদ্দীনের রাজ্যের অন্তর্ভুক্ত ছিল, তার স্বতন্ত্র কোন প্রমাণ পাওয়া যায় না। বারনির 'তারিখ-ই-ফিরোজ শাহী'র যে সংক্ষিপ্ত অল্পবাদ এলিয়ট করেছেন (Tarikh-i-Firoz Shahi, Translated by Elliot, edited by Dowson, 1953, p. 167 দ্র:), তা পড়লে মনে ধারণা জন্মায় যে, ফখরুদ্দীন সাতগাঁও অধিকার করেছিলেন, কিন্তু বারনির মূল গ্রন্থ পড়লে ঐ ধারণা অপনোদিত হয়। 'তারিখ-ই-মুবারক শাহী' থেকে জানা যায়, ফখরুদ্দীন যখন সোনারগাঁওয়ে বিদ্রোহ করেছিলেন, তখন সাতগাঁওয়ের শাসনকর্তা ছিলেন মালিক অভুদ্দীন যাহিআ; তিনি কদর খানের সহযোগী হয়ে ফখরুদ্দীনকে দমন করতে এসেছিলেন; প্রথম সংঘর্ষে পরাজিত হয়ে ফখরুদ্দীন পলায়ন করলে অভুদ্দীন সাতগাঁওয়ে ফিরে গিয়েছিলেন। ইব্ন্ বত্তুতা কর্তৃক উল্লিখিত 'সোদকাওয়াড' যে 'সাতগাঁও' নয়, তার একটি বড় প্রমাণ এই যে, যে বছরে ইব্ন্ বত্তুতা বাংলাদেশে এসেছিলেন সেই বছরেই অর্থাৎ ৭৪৭ হিজরায় সাতগাঁওয়ের টাকশাল থেকে শামসুদ্দীন ইলিয়াস শাহের মুদ্রা উৎকীর্ণ হয়েছিল (J. N. S. I., Vol. V, 1943, p. 66 দ্রষ্টব্য) স্মরণ্য যে তদূর মনে হয়, মালিক অভুদ্দীন যাহিআ অথবা তাঁর কোন স্থলাভিষিক্তের কাছ থেকে ইলিয়াস শাহ সরাসরি সাতগাঁও জয় করেছিলেন, সাতগাঁও কোনদিন ফখরুদ্দীন মুবারক শাহের রাজ্যভূক্ত হয় নি। পক্ষান্তরে, ফখরুদ্দীন চাটগাঁও অধিকার করেছিলেন বলে শিহাবুদ্দীন তালিশ লিখেছেন এবং শিহাবুদ্দীনের উক্তি যে সত্য, তা আমরা ইতিপূর্বে দেখাবার চেষ্টা করেছি। অতএব 'সোদকাওয়াড' চাটগাঁওয়ের সঙ্গে অভিন্ন বলেই সিদ্ধান্ত করা যায়।

ইব্ন্ বত্তুতার বিবরণ থেকে জানা যায় যে, ঐ সময় বাংলাদেশ ধনে-ধানের ভরা ছিল এবং তার জিনিসপত্র এত সস্তা ছিল, যেমনটি পৃথিবীর আর কোথাও



ছিল না। ইব্ন্ বত্তুতার বিবরণের মধ্যে সেযুগের বিভিন্ন জিনিষের দাম উল্লিখিত আছে।

ফখরুদ্দীনের রাজ্যের অন্তর্গত হব্ব (বর্তমান খ্রীষ্ট জেলার অন্তর্গত) শহরে ইব্ন্ বত্তুতা হিন্দুদের যে অবস্থা দেখেছিলেন, তার তিনি এই বর্ণনা লিপিবদ্ধ করেছেন, “হব্বের অধিবাসীরা বিধর্মী, তারা ‘জিম্মা’র (রক্ষণব্যবস্থা) অধীন। যে শস্ত তারা উৎপাদন করে, তার অর্ধেক নিয়ে নেওয়া হয়। তাছাড়াও তাদের কোন কোন কর দিতে হয়।” এর থেকে বোঝা যায়, ফখরুদ্দীনের কাছ থেকে হিন্দুরা উদার ব্যবহার পায় নি।

ইব্ন্ বত্তুতা নীল নদী অর্থাৎ মেঘনা দিয়ে হব্ব থেকে সোনারগাঁওয়ে এসেছিলেন। তিনি লিখেছেন, “সুলতান ফখরুদ্দীন আদেশ দিয়েছেন যে এই নদীতে ফকীরদের কাছ থেকে কোন ভাড়া আদায় করা হবে না এবং যার কিছু নেই, তাকে খাওয়া দেওয়া হবে। যে ফকীর এই শহরে (সোনারগাঁওয়ে) আসে, তাকে আধ দীনার (প্রায় আট আনার মত) দেওয়া হয়।”

ইব্ন্ বত্তুতা লিখেছেন যে, ‘সোদকাওয়াউ’ বা চাটগাঁওয়ের কাছে নদীতে “অসংখ্য জাহাজ আছে, এগুলি দিয়ে এরা লখনৌতির লোকদের সঙ্গে যুদ্ধ করে।” এর থেকে বোঝা যায়, লখনৌতির তৎকালীন সুলতান ইলিয়াস শাহের সঙ্গে ফখরুদ্দীনের যুদ্ধ হত।

কিন্তু ইব্ন্ বত্তুতা তাঁর বিবরণে ফখরুদ্দীনের সম্বন্ধে একটি ভুল খবর দিয়েছেন। তিনি লিখেছেন যে বাংলাদেশ থেকে সুলতান নাসিরুদ্দীনের (বলবনের পুত্র বুগরা খান) বংশের আধিপত্য লুপ্ত হলে ফখরুদ্দীন মুহম্মদ তোগলকের বিরুদ্ধে বিদ্রোহ ঘোষণা করেন এবং নিজে স্বাধীন রাজা হন, কারণ তিনি নাসিরুদ্দীনের বংশের মিত্র ছিলেন। কিন্তু বাংলায় নাসিরুদ্দীনের বংশের আধিপত্য ১৩০১ খ্রীষ্টাব্দে বা তার কিছুকাল আগে নাসিরুদ্দীনের পুত্র রুকনুদ্দীন কায়কাউলের মৃত্যুর সঙ্গে সঙ্গেই শেষ হয়েছিল। ফখরুদ্দীনের বিদ্রোহ তার বহু পরে সংঘটিত হয়েছিল। ইব্ন্ বত্তুতা শামসুদ্দীন ফিরোজ শাহ (১৩০১-১৩২২ খ্রি:) ও তাঁর পুত্রদের নাসিরুদ্দীনের বংশের লোক বলে মনে করেছেন, কিন্তু তাঁরা নাসিরুদ্দীনের বংশধর নন (এ সম্বন্ধে আলোচনার জন্য *History of Bengal, D. U., Vol. II, p. 77, pp. 93-94* এবং *I. H. Q., Vol. XVIII, No. 1, 1942, p. 65 ff.* দ্রষ্টব্য)। শামসুদ্দীন ফিরোজ শাহের বংশের উচ্ছেদ ফখরুদ্দীনের বিদ্রোহের ১০১১ বছর আগে ঘটেছিল (*History*

of Bengal, D. U., Vol. II. p. 89 দ্রষ্টব্য), হুতরাং তা'ও ফখরুদ্দীনের বিজ্রোহের কারণ হতে পারে বলে মনে হয় না। 'তারিখ-ই-মুবারক শাহী'র মতে গিয়াসুদ্দীন তোগলকের পালিত পুত্র—দিল্লী থেকে প্রেরিত বহু রাম খানের তরবারি-বাহক ছিলেন ফখরুদ্দীন। শামসুদ্দীন ফিরোজ শাহের বংশের সঙ্গে ফখরুদ্দীনের কোন ঘনিষ্ঠতা ছিল বলে অল্প কোন সূত্র থেকে জানা যায় না। তবে এরকম ঘনিষ্ঠতা থাকা অসম্ভব নয়। ফখরুদ্দীন শামসুদ্দীন ফিরোজ শাহের বংশের উচ্ছেদকে তাঁর বিজ্রোহের অভ্যুত্থান হিসাবে উপস্থাপিত করেছিলেন, এরকম হতে পারে।

কীভাবে ফখরুদ্দীন মুবারক শাহের মৃত্যু হল, তা সঠিকভাবে বলা যায় না। এ সম্বন্ধে বিভিন্ন বিবরণে বিভিন্ন ধরনের কথা লেখা আছে এবং আশ্চর্যের বিষয়, কারও কথা সত্য নয়। নীচে আমরা এ সম্বন্ধে আলোচনা করছি।

শামস-ই-সিরাজ আফিক রচিত 'তারিখ-ই-ফিরোজ শাহী'তে লেখা আছে যে ফিরোজ শাহ তোগলক ও শামসুদ্দীন ইলিয়াস শাহের যুদ্ধের পর ফিরোজ শাহ দিল্লীতে ফিরে গেলে ( ৭৫৫ হিঃ = ১৩৫৪ খ্রিঃ ) ইলিয়াস শাহ সোনারগাঁও আক্রমণ করে ফখরুদ্দীনকে নিহত করেন এবং তাঁর রাজ্য অধিকার করেন। কিন্তু মৃত্যুর সাক্ষ্য থেকে দেখা যায়, ৭৫০ হিজরায় ফখরুদ্দীন মুবারক শাহের মৃত্যু হয় এবং ঐ বছরেই ইখতিয়ারুদ্দীন গাজী শাহ তাঁর স্থলাভিষিক্ত হন ও ৭৫৩ হিঃ পর্যন্ত রাজত্ব করেন। অতএব ৭৫৫ হিজরায় ফখরুদ্দীনের নিহত হওয়া এবং ইলিয়াস শাহের ফখরুদ্দীনের কাছ থেকে রাজ্য কেড়ে নেওয়া—দুইই অসম্ভব।

মাহিআ বিন্ সিদ্দিকি তাঁর 'তারিখ-ই-মুবারক শাহী'তে লিখেছেন যে ইলিয়াস শাহ ৭৪১ হিজরায় সোনারগাঁও আক্রমণ ও অধিকার করেন এবং ফখরুদ্দীনকে প্রথমে গলায় শৃঙ্খল বেঁধে বন্দী করেন ও পরে বধ করেন। কিন্তু ফখরুদ্দীন ৭৫০ হিঃ পর্যন্ত বেঁচে ছিলেন এবং ৭৫৩ হিঃ অবধি তাঁর পুত্র রাজত্ব করেন। অতএব ৭৪১ হিজরায় তাঁর পরাজয় ও রাজ্যচ্যুতি অসম্ভব।

বদাওনী তাঁর 'মস্তুখ-উল-তওয়ারিখে' লিখেছেন যে ফখরুদ্দীন বিজ্রোহ ঘোষণা করলে সুলতান মুহম্মদ তোগলক তাঁর বিরুদ্ধে যুদ্ধযাত্রা করেন এবং ৭৪১ হিজরায় সোনারগাঁওয়ে এসে সোনারগাঁও অধিকার করেন ও ফখরুদ্দীনকে দিল্লীতে নিয়ে গিয়ে হত্যা করেন। কিন্তু মুহম্মদ তোগলকের সমসাময়িক ঐতি-

হাসিকেরা তাঁর এই তথাকথিত ৭৪১ হিজরার বদাভিযান সম্বন্ধে বিন্দুমাত্রও উল্লেখ করেননি, তাঁদের লেখা বিবরণ থেকে স্পষ্ট জানা যায় যে মুহম্মদ তোগলক ৭৪১ হিজরায় বাংলাদেশ থেকে দূরে ভারতের অগ্নান্ত্র অঞ্চলে গিয়েছিলেন। আলোচ্য যুগের প্রধান সমসাময়িক ঐতিহাসিক জিয়াউদ্দীন বারনি স্পষ্টই লিখেছেন যে ফখরুদ্দীন বিদ্রোহ করে মুহম্মদ তোগলকের সাম্রাজ্যের যে সমস্ত অংশ অধিকার করেছিলেন, মুহম্মদ সেগুলি কোন দিন পুনরধিকার করতে পারেন নি। যাহোক, ৭৪১ হিজরায় যখন মুহম্মদ তোগলক বাংলাদেশে আসেননি এবং ফখরুদ্দীন যখন ৭৫০ হিঃ পর্যন্ত বেঁচেছিলেন, তখন বদাওনীর উক্তি ভুল বলে প্রমাণিত হচ্ছে।

বখশী নিজামুদ্দীন তাঁর 'তবকাৎ-ই-আকবরী'তে এবং গোলাম হোসেন তাঁর 'রিয়াজ-উস-সলাতীনে' লিখেছেন যে লখনৌতির সুলতান আলাউদ্দীন আলী শাহ এক বিরাট সৈন্যবাহিনী নিয়ে সুলতান ফখরুদ্দীনের বিরুদ্ধে যুদ্ধবাজা করেন; যুদ্ধের পরে আলী শাহ ফখরুদ্দীনকে বন্দী করেন এবং তাঁকে বধ করে তিনি কদর খানের হত্যার প্রতিশোধ গ্রহণ করেন। 'তবকাৎ' ও 'রিয়াজ'-এর মতে ৭৪১ হিজরায় এই ঘটনা ঘটেছিল। আবার ৭৪১ হিজরা! 'আইন-ই-আকবরী'তেও লেখা আছে যে আলী শাহ ফখরুদ্দীনকে আক্রমণ করে বন্দী ও বধ করেছিলেন, কিন্তু তাতে কোন সালের উল্লেখ করা হয়নি। মুজা ও শিলালিপির সাক্ষ্য থেকে দেখা যায় যে, ৭৪৩ হিজরায় আলাউদ্দীন আলী শাহের মৃত্যু ঘটে ও শামসুদ্দীন ইলিয়াস শাহ তাঁর স্থলাভিষিক্ত হন; ফখরুদ্দীন মুবারক শাহ যখন ৭৫০ হিঃ পর্যন্ত বেঁচে ছিলেন, তখন আলাউদ্দীন আলী শাহের হাতে তাঁর মৃত্যু ঘটতে পারে না।

অতএব এ সম্বন্ধে প্রত্যেকটি বিবরণের উক্তিই ভ্রান্ত। আসলে যতদূর মনে হয়, ফখরুদ্দীন মুবারক শাহের স্বাভাবিক মৃত্যু হয়েছিল।

ফখরুদ্দীন মুবারক শাহের প্রসঙ্গ শেষ করবার আগে তাঁর সম্বন্ধে আর একটি কথা উল্লেখ করা দরকার। তাঁর মুদ্রাগুলির গঠন ও আকৃতি চমৎকার এবং এ পর্যন্ত বাংলার সুলতানদের যত মুদ্রা পাওয়া গিয়েছে তাদের মধ্যে এগুলি সবচেয়ে সুন্দর। এ সম্বন্ধে ডঃ নলিনীকান্ত ভট্টশালী লিখেছেন, "The coins of Fakhruddin are veritable gems of the art of coin-striking and speak volumes in favour of the skill of the Sonargaon artists. Their shape is regular, the lettering on

them delightfully neat and well-shaped, and they carry about them a refreshing air of refinement. It is a joy to behold them and a delight to read them. It may be safely asserted that coin-making never again attained such excellence in Bengal.” রাখালদাস বন্দ্যোপাধ্যায়ও লিখেছেন, “সুলতান ফখরু-উদ্দীন মুবারক শাহের মুদ্রা অবিস্মরণীয়ভাবে নির্মিত এবং ইহার গঠন অতি সুন্দর।”

বিখ্যাত দরবেশ শেখ জলানুদ্দীন তব্রিজী ফখরুদ্দীন মুবারক শাহের সমসাময়িক ছিলেন। তিনি কামরুপের পার্বত্য অঞ্চলে বাস করতেন। ইব্নু বতুতা ৭৪৭ হিজরা বা ১৩৪৬ খ্রীষ্টাব্দে তাঁর সঙ্গে দেখা করেন। পরের বছর ১৫০ বছর বয়সে তাঁর মৃত্যু হয়।

### ইখতিয়ারুদ্দীন গাজী শাহ

ইখতিয়ারুদ্দীন গাজী শাহের নাম কোন ইতিহাসগ্রন্থে পাওয়া যায় না। কেবলমাত্র মুদ্রার সাক্ষ্য থেকে তাঁর অস্তিত্ব জানা গিয়েছে।

ইখতিয়ারুদ্দীন গাজী শাহের সমস্ত মুদ্রা ফখরুদ্দীন মুবারক শাহেরই মত সোনারগাঁওয়ের টাকশাল থেকে উৎকীর্ণ। তাঁর মুদ্রায় ‘অস-সুলতান বিনু অস-সুলতান’ লেখা আছে। এর থেকে বোঝা যায় যে ইখতিয়ারুদ্দীনের পিতা সুলতান ছিলেন। কিন্তু কোন মুদ্রাতেই তাঁর পিতার নাম লেখা নেই। না থাকলেও, ফখরুদ্দীন মুবারক শাহই যে ইখতিয়ারুদ্দীনের পিতা, তা তিনটি প্রমাণ থেকে বলা চলে। প্রথমত, ফখরুদ্দীনের মুদ্রা শেষ হবার সঙ্গে সঙ্গেই ইখতিয়ারুদ্দীনের মুদ্রা শুরু হয়েছে। দ্বিতীয়ত, ফখরুদ্দীন ও ইখতিয়ারুদ্দীনের মুদ্রার গঠন অবিকল এক এবং দু’জনের মুদ্রারই উটো-পিঠে “খলীফা-এর ডান হাত” কথাটি লেখা আছে একইভাবে। তৃতীয়ত, ঐ সময়ে বা তার অব্যবহিত আগে সোনারগাঁওয়ে ফখরুদ্দীন মুবারক শাহ ছাড়া এমন কোন সুলতানের সন্ধান পাওয়া যায় না, ইখতিয়ারুদ্দীন গাজী শাহ ধীর পুত্র হতে পারেন। এই তিনটি প্রমাণ থেকেই টমাস ইখতিয়ারুদ্দীন ফখরুদ্দীনের পুত্র ছিলেন বলে সিদ্ধান্ত করেছেন এবং পরবর্তী সমস্ত ঐতিহাসিক তাঁর সিদ্ধান্ত সমর্থন করেছেন।

ইখতিয়ারুদ্দীন যে ফখরুদ্দীনের পুত্র, সে সম্বন্ধে আমাদের কোন সংশয়

নেই। তবে ইব্ন বত্তুতার একটি উক্তি এ সম্বন্ধে খানিকটা সংশয়ের সৃষ্টি করে। ইব্ন বত্তুতা লিখেছেন যে ফখরুদ্দীন শায়দা নামক একজন ফকীরকে সাতগাঁওয়ের শাসনকর্তার পদে নিযুক্ত করে কোন একজন শত্রুর বিরুদ্ধে যখন যুদ্ধযাত্রা করেছিলেন, তখন ছুট শায়দা ফখরুদ্দীনের বিরুদ্ধে বিদ্রোহ ঘোষণা করে ফখরুদ্দীনের পুত্রকে হত্যা করে। এইটি ছাড়া স্থলতানের আর কোন পুত্র ছিল না। ফখরুদ্দীনের একমাত্র পুত্র যখন শায়দার হাতে নিহত হয়েছিলেন বলে জানা যাচ্ছে, তখন ইখতিয়ারুদ্দীন ফখরুদ্দীনের পুত্র হন কেমন করে? এ প্রশ্নের একমাত্র উত্তর এই যে, ইব্ন বত্তুতার বাংলাদেশে ভ্রমণের পরে ফখরুদ্দীনের আর একটি পুত্র জন্মগ্রহণ করেন এবং তিনিই ইখতিয়ারুদ্দীন। এই মত যদি সত্য হয়, তাহলে বলতে হবে ৭৫০ হিজরায় সিংহাসনে আরোহণের সময় ইখতিয়ারুদ্দীন নিতান্ত শিশু ছিলেন, কারণ ৭৪৭ হিজরা বা ১৩৪৬ খ্রীষ্টাব্দে ইব্ন বত্তুতা বাংলাদেশে ভ্রমণ করেন। ৭৫৩ হিজরায় যখন ইখতিয়ারুদ্দীনের রাজত্বের অবসান হয়, তখনও তিনি শিশুই ছিলেন।\* আমাদের মত সত্য হলে কেন ইখতিয়ারুদ্দীন কোন ইতিহাসগ্রন্থে উল্লিখিত হন নি, তা বোঝা যাবে।

৭৫৩ হিজরা থেকে ৭৫৮ হিজরা অবধি সোনারগাঁও টাকশাল থেকে উৎকর্ষী শামসুদ্দীন ইলিয়াস শাহের মুদ্রা অব্যাহতভাবে পাওয়া যাচ্ছে। এর থেকে বোঝা যায় যে, ৭৫৩ হিজরায় ইখতিয়ারুদ্দীন গাজী শাহ শামসুদ্দীন ইলিয়াস শাহ কর্তৃক রাজচ্যুত ও সম্ভবত নিহত হন।

শামসু-ই-সিরাজ আফিফ তাঁর 'তারিখ-ই-ফিরোজ শাহী'তে লিখেছেন যে, ইলিয়াস শাহ কর্তৃক ফখরুদ্দীন নিহত ও তাঁর রাজ্য অধিকৃত হবার পরে ফখরুদ্দীনের জামাতা জাফর খান দিল্লীতে ফিরোজ শাহের কাছে গিয়ে নালিশ করেন। আফিফের এই উক্তির মধ্যে যে ভুল আছে, সেকথা আগেই বলেছি। আমরা সিকন্দর শাহের প্রসঙ্গে এ সম্বন্ধে আরও বিস্তৃতভাবে আলোচনা করব এবং এই ভুলের কারণ কী, তাও নিরূপণের চেষ্টা করব। আসলে জাফর খান ইলিয়াস শাহ কর্তৃক ইখতিয়ারুদ্দীন গাজী শাহের রাজ্য

---

\* ডঃ আবদুল করিমের মতে এরকম সিদ্ধান্ত গ্রহণের কোন প্রয়োজন নেই (সাহিত্য পত্রিকা, বর্ষা সংখ্যা, ১৩৬৯, পৃ: ২২৭ ত্র: )। কিন্তু ইব্ন বত্তুতার উক্তির সঙ্গে ইখতিয়ারুদ্দীন সম্বন্ধে সমস্ত ইতিহাসগ্রন্থের বীরবতাকে একত্র পর্যালোচনা করলে এই সিদ্ধান্তে আসা ই সম্ভব বলে আমাদের মনে হয়।

অধিকারের পরেই ফিরোজ শাহের কাছে গিয়ে নালিশ করেছিলেন সন্দেহ নেই। যতদূর মনে হয়, শিশু ইখতিয়ারুদ্দীন গাজী শাহের অভিভাবকরূপে তাঁর ভগ্নীপতি জাফর খান রাজ্য শাসন করতেন। এই শিশুর কথা সমসাময়িক ও পরবর্তী ঐতিহাসিকেরা উল্লেখ করেননি বা কয়বার প্রয়োজন বোধ করেননি। শাম্-ই-সিরাজ আফিফের মতে ইলিয়াস শাহের সোনারগাঁও অধিকারের সময় জাফর খান শুধু আদায় এবং শুধু সংগ্রাহকদের হিসাবপত্র পরীক্ষার কাজে ব্যস্ত ছিলেন। এই কথা সত্য বলে মনে হয়। জাফর খানের অভিযোগের ফলেই ফিরোজ শাহ দ্বিতীয়বার বাংলাদেশ আক্রমণ করেন।

### আলাউদ্দীন আলী শাহ

আলাউদ্দীন আলী শাহের পূর্ব নাম আলী মুবারক। তিনি লখনৌতির শাসনকর্তা কদর খানের অধীনে সৈন্তবাহিনীর বেতনদাতা ছিলেন। কদর খান সোনারগাঁওয়ে ফখরুদ্দীন মুবারক শাহের বিরোধে দমন করতে যান এবং প্রথমে ফখরুদ্দীনকে পরাজিত করেও তারপর নিজের অর্থলোভের দরুণ সৈন্তবাহিনীর বিরাগভাজন হন, ফলে তারা ফখরুদ্দীনের সঙ্গে যোগ দিয়ে তাঁকে নিহত করে। ফখরুদ্দীন তারপর লখনৌতি অধিকার করে সেখানে নিজের ভৃত্য মুখলিশকে শাসনকর্তা নিযুক্ত করেন। আলী মুবারক কিন্তু বিশেষ যোগ্যতার পরিচয় দিয়ে মুখলিশকে বধ করে লখনৌতি অধিকার করেন। তিনি নিজেকে স্বাধীন সুলতান হিসাবে ঘোষণা করার বিন্দুমাত্র অভিপ্রায় না দেখিয়ে দিল্লীর মুহম্মদ তোগলকের কাছে লখনৌতির একজন শাসনকর্তা নিযুক্ত করার আবেদন জানিয়ে চিঠি পাঠান। মুহম্মদ তোগলক কর্তৃক নিযুক্ত শাসনকর্তা যুসুফ দিল্লীতে এসে পৌছোবার আগেই তাঁর মৃত্যু হয় এবং উম্মাদ মুহম্মদ তোগলক তাঁর জায়গায় আর কোউকে নিযুক্ত করেন নি। তখন আলী মুবারক বাধ্য হয়ে সিংহাসনে বসলেন এবং আলাউদ্দীন আলী শাহ নাম নিলেন। কারণ তাঁর শত্রু ফখরুদ্দীন অনবরত লখনৌতি জয়ের চেষ্টা করছেন, লখনৌতিতে কোন শাসনকর্তা নেই, অতএব আলী মুবারককেই সে আক্রমণ ঠেকাতে হবে। কিন্তু লোকে রাজা ভিন্ন কারণ নির্দেশ সহজে মানবে না, তাই বাধ্য হয়ে তিনি রাজা হলেন। আলী মুবারক যে সত্যিকারের বীর, নিঃস্বার্থপরায়ণ এবং কর্তব্যনিষ্ঠ ছিলেন, তা ‘তারিখ-ই-মুবারক শাহী’তে বর্ণিত তাঁর এই ইতিহাস থেকে বোঝা যায়।

ইব্ন বস্তুতার বিবরণ থেকে জানা যায়, আলী শাহ কীরকমভাবে ফখরুদ্দীন মুবারক শাহের সঙ্গে যুদ্ধ করতেন। বর্ষাকাল এবং শীতকালে ফখরুদ্দীন লখনৌতি আক্রমণ করতেন, কারণ ফখরুদ্দীন জলে শক্তিশালী ছিলেন; কিন্তু আলী শাহ স্থলে বেশী শক্তিশালী ছিলেন বলে গ্রীষ্মকালে তিনিই ফখরুদ্দীনের রাজ্য আক্রমণ করতেন।

আলাউদ্দীন আলী শাহের সমস্ত মুদ্রাই ফিরোজাবাদ বা পাণ্ডুরার টাকশাল থেকে তৈরী। এর থেকে বোঝা যায়, উত্তরবঙ্গের অঞ্চলবিশেষ তাঁর অধিকারে ছিল। সমসাময়িক ইতিহাসগ্রন্থগুলিতে বলা হয়েছে, লখনৌতি অঞ্চল (অর্থাৎ পূর্বতন মুসলমান সুলতানদের রাজ্যের মধ্যে উত্তরবঙ্গের যে সমস্ত অঞ্চল ছিল) তাঁর অধিকারে ছিল। বাংলার আর কোন অঞ্চল যে তিনি কোন দিন অধিকার করেছিলেন, তাঁর কোন প্রমাণ নেই। সোনারগাঁও অঞ্চল অর্থাৎ পূর্ববঙ্গ যে তাঁর শত্রু ফখরুদ্দীন মুবারক শাহের অধীনে ছিল, তাঁর প্রমাণ আছে। এসম্বন্ধে আমরা আগেই আলোচনা করেছি।

আলাউদ্দীন আলী শাহ কতদিন রাজত্ব করেছিলেন, সে প্রশ্ন আগে বেশ জটিল ছিল। কারণ টমাস এবং তাঁর অনুবর্তী গবেষকেরা বলেছিলেন, আলী শাহের ১৪২, ১৪৩, ১৪৪, ১৪৫ ও ১৪৬ হিজরার মুদ্রা পাওয়া গিয়েছে। আলী শাহের পরবর্তী সুলতান শামসুদ্দীন ইলিয়াস শাহেরও ১৪০, ১৪৩, ১৪৪, ১৪৫ ও ১৪৬ হিজরার মুদ্রা পাওয়া গিয়েছে বলে এঁরা বলেছিলেন। দুই সুলতানের মুদ্রাই ফিরোজাবাদের টাকশালে তৈরী। টমাস এবং তাঁর অনুবর্তী গবেষকদের মত সত্য হলে বলতে হত, আলী শাহ ও ইলিয়াস শাহ ১৪০ বা ১৪২ হিজরা থেকে নিজেদের মধ্যে যুদ্ধ করেছেন, এবং কখনও একজন, কখনও অপরজন ফিরোজাবাদ দখল করে তাঁর টাকশাল থেকে মুদ্রা প্রকাশ করেছেন। কিন্তু এইভাবে যে সে টাকশাল থেকে মুদ্রা প্রকাশ করলেই লোকে সে মুদ্রাকে গ্রহণ করে না। আসলে টমাস প্রভৃতি গবেষকেরা আলী শাহ ও ইলিয়াস শাহের অনেক মুদ্রার তারিখ ভুল পড়াতেই এই সমস্তার সৃষ্টি হয়েছিল। প্রকৃতপক্ষে আলাউদ্দীন আলী শাহের এ পর্যন্ত যে সমস্ত মুদ্রা পাওয়া গিয়েছে, সমস্তই ১৪২ ও ১৪৩ হিজরায় তৈরী; ইলিয়াস শাহের ১৪০ হিজরার কোন মুদ্রা নেই, ঐ তারিখ ভুল পড়া হয়েছিল (Bhattashali, Coins and Chronology of the Early Independent Sultans of Bengal, pp. 14-17, 19-24)। ইলিয়াস শাহের রাজত্বের প্রাচীনতম তারিখ ১৪০ হিজরার ২রা শাবান। ঐ

তারিখে উৎকীর্ণ তাঁর একটি শিলালিপি পাওয়া যায়। ৭৪৩ থেকে ৭৫৮ হিজরার পর্বন্ত ইলিয়াস শাহের মৃত্যু পাওয়া যাচ্ছে। অতএব ৭৪৩ হিজরার শাবান মাসের আগেই যে আলাউদ্দীন আলী শাহের রাজত্ব শেষ হয়েছিল, সে বিষয়ে সন্দেহ নেই। তাঁর রাজত্ব কবে আরম্ভ হয়েছিল, তা'ও অসুস্থমান করা কঠিন নয়। ৭৪২ হিজরায় সর্বপ্রথম আলাউদ্দীন আলী শাহের মৃত্যু পাওয়া যাচ্ছে। ঐ বছরেই তিনি সিংহাসনে আরোহণ করেন। কারণ ৭৩৯ হিজরায় ফখরুদ্দীন মুবারক শাহ বিদ্রোহ ঘোষণা করেন। তারপর কদর খান কর্তৃক বিদ্রোহ দমন, কদর খানের হত্যা, ফখরুদ্দীন কর্তৃক লখনৌতি অধিকার, সেখানে মুখলিশকে শাসনকর্তা নিযুক্ত করা, আলী শাহ কর্তৃক মুখলিশকে বধ ও লখনৌতি পুনরধিকার, মুহম্মদ তোগলকের কাছে শাসনকর্তা নিয়োগ করতে চিঠি লেখা, মুহম্মদ তোগলক কর্তৃক শাসনকর্তা নিয়োগ, সেই শাসনকর্তার মৃত্যু, অতঃপর মুহম্মদ তোগলকের কিছুকাল নতুন শাসনকর্তা নিয়োগে অবহেলা এবং তার ফলে আলী শাহের সিংহাসনে আরোহণ—এই ঘটনাগুলি যথাক্রমে ঘটে। এত ঘটনা ঘটে ৩৪ বছরের কম সময় লাগবার কথা নয়। অতএব আলী শাহ ৭৪২ হিজরায় সিংহাসনে আরোহণ করেন বলে ধরা যায়। পরবর্তী কালের ইতিহাসগ্রন্থগুলিতে লেখা আছে যে আলী শাহ এক বছর কয়েক মাস ('রিয়াজ'-এর মতে এক বছর পাঁচ মাস) রাজত্ব করেন। এই কথাই সত্য বলে মনে হয়। সুতরাং আলাউদ্দীন আলী শাহ ৭৪২ হিজরার গোড়ার দিকে সিংহাসনে আরোহণ করেন বলে অসুস্থমান করা যায়।

শামস-ই-সিরাজ আফিফ তাঁর 'তারিখ-ই-ফিরোজ শাহী'তে লিখেছেন যে, শামসুদ্দীন ইলিয়াস শাহের কাছ থেকে পাওয়া জয় করার পরে (১৩৫৪ খ্রী:) ফিরোজ শাহ তোগলক ঐ শহরের নাম ফিরোজাবাদ রাখেন। কিন্তু আলাউদ্দীন আলী শাহের মৃত্যুগুলি ফিরোজাবাদের টাকশালে উৎকীর্ণ হয়েছিল বলে মৃত্যুগুলিতে লেখা আছে। অতএব শামস-ই-সিরাজ আফিফের উক্তি ভুল বলে প্রমাণিত হচ্ছে। যতদূর মনে হয়, আলী শাহই প্রথম পাণ্ডুরা বা ফিরোজাবাদে তাঁর রাজধানী স্থাপন করেন। এর প্রায় একশো বছর পর পর্বন্ত এই শহর বাংলার রাজধানী ছিল।

শামসুদ্দীন ইলিয়াস শাহের সঙ্গে আলাউদ্দীন আলী শাহের কী সম্পর্ক ছিল, তা সঠিকভাবে জানা যায় না। 'আইন-ই-আকবরী'র মতে ইলিয়াস বাংলার অন্ততম আমীর ছিলেন, 'দ্বিয়াজ-উস-সলাতীনে'র মতে ইলিয়াস



ছিলেন আলী শাহের ধাত্রীমাতার পুত্র এবং বুকাননের বিবরণীর মতে তিনি ছিলেন আলী শাহের ভৃত্য। প্রায় সমস্ত বিবরণীরই মতে ইলিয়াস ষড়মন্ত্র করে আলী শাহকে বধ করে নিজে রাজা হন। এই সব বিবরণের মধ্যে 'তারিখ-ই-মুবারক শাহী'ই সব চেয়ে প্রাচীন। এতে লেখা আছে, "মালিক ইলিয়াস হাজীর বহু সমর্থক ছিল। তিনি লখনৌতির আমীর ও মালিকদের এবং জনসাধারণের সঙ্গে যোগ দিয়ে আলাউদ্দীনকে বধ করেন এবং সুলতান শামসুদ্দীন নাম নিয়ে সিংহাসনে আরোহণ করেন।" এই কথা সত্য বলেই গ্রহণ করা যায়।

'রিয়াজ-উস-সলাতীনে' আলাউদ্দীন আলী শাহের উত্থান ও পতন সম্বন্ধে যে কাহিনী লিপিবদ্ধ হয়েছে, তা আমরা নীচে উদ্ধৃত করলাম,—

"কথিত আছে মালিক আলী মুবারক প্রথমে মালিক ফিরোজ রজবের একজন বিশ্বস্ত ভৃত্য ছিলেন। মালিক ফিরোজ সুলতান গিয়াসুদ্দীন তোগলক শাহের ভ্রাতুষ্পুত্র এবং সুলতান মুহম্মদ শাহের জ্যেষ্ঠ ভ্রাতা ছিলেন। সুলতান মুহম্মদ শাহ যখন দিল্লীর সিংহাসনে আরোহণ করলেন, তখন রাজত্বের প্রথম বছরেই তিনি মালিক ফিরোজকে তাঁর সচিব (সেক্রেটারী) নিযুক্ত করলেন। এই সময়ে আলী মুবারকের ধর্ম-ভাই হাজী ইলিয়াস কোন অপকর্ম করেন এবং তার জন্ত তিনি দিল্লী থেকে পলায়ন করেন। মালিক ফিরোজ আলী মুবারককে তাঁর কথা বললে তিনি তাঁর (ইলিয়াসের) খোঁজ করলেন। যখন তাঁর কোন পাতা পাওয়া গেল না, তখন আলী মুবারক মালিক ফিরোজকে তাঁর পলায়নের কথা জানালেন। মালিক ফিরোজ তখন তাঁর উপর চটে গিয়ে তাঁকেও তাড়িয়ে দিলেন। আলী মুবারক বাংলাদেশের দিকে রওনা হলেন। পথে তিনি স্বপ্নে হজরৎ শাহ মখদুম জলালুদ্দীন তব্রিজীর (ভগবান তাঁর সমাধি পবিত্র করুন) দেখা পেলেন এবং তাঁকে বিনয় ও আহুত্যা দেখিয়ে পরিতুষ্ট করলেন; সেই দরবেশ তাঁকে বললেন, 'আমরা তোমাকে বাংলার স্বাধীন দান করছি, কিন্তু তুমি আমাদের জন্ত একটি দরগা তৈরী করে দেবে।' আলী মুবারক তাতে সন্মত হয়ে জিজ্ঞাসা করলেন, কোথায় দরগা তৈরী করতে হবে। দরবেশ বললেন "পাণ্ডুয়া শহরে এক জায়গায় তুমি তিনটি ইট দেখতে পাবে। একটির উপরে আর একটি করে ইটগুলি রয়েছে এবং এই ইটগুলির নীচে আছে একটি তাল্লা একশো পাপড়ীওয়ালা গোলাপ ফুল। ঐ জায়গায় দরগা নির্মাণ করতে হবে।" যখন তিনি (আলী মুবারক) বাংলায়

পৌছোলেন, তিনি কদর খানের কাছে চাকরী নিয়ে সেখানেই থেকে গেলেন এবং ক্রমে ক্রমে তিনি কদর খানের বাহিনীর প্রধান সেনাপতির পদে উন্নীত হলেন।...আলী মুবারক আলাউদ্দীন নাম নিয়ে সুলতান হয়ে...অসীম ক্ষিপ্ততার সঙ্গে, লখনৌতিতে একদল সৈন্য রেখে বাংলার অন্তান্ত অঞ্চল জয়ে মন দিলেন। বাংলাদেশে নিজের নামে খুৎবা এবং মুত্ৰা প্রবর্তন করার পর তিনি বিলাস এবং সাফল্যের নেশায় এমনই মত্ত হয়ে গেলেন যে দরবেশের আদেশের কথা ভুলে গেলেন। তার ফলে এক রাত্রে আবার ঐ দরবেশ তাঁকে স্বপ্নে দেখা দিয়ে বললেন, ‘আলাউদ্দীন! তুমি বাংলার রাজ্য পেয়েছ, কিন্তু আমার আদেশ ভুলে গেছ।’ আলাউদ্দীন পর দিনই ইটগুলির খোজ করে দেখলেন দরবেশ যে নিশানা দিয়েছিলেন, সেই ভাবেই সেগুলি আছে। তিনি সেখানে একটি দরগা তৈরী করলেন, এখনও তার চিহ্ন বর্তমান আছে। এই সময়ে হাজী ইলিয়াসও পাণ্ডুয়ায় এলেন। সুলতান আলাউদ্দীন কিছু সময় তাঁকে বন্দী করে রেখে দিলেন, কিন্তু তাঁর ধাত্রী—ইলিয়াসের জননী অতুরোধে তাঁকে ছেড়ে দিলেন এবং তাঁকে গুরুত্বপূর্ণ পদ দিয়ে—তাঁর সামনে আসতে আজ্ঞা দিলেন। হাজী ইলিয়াস অল্প সময়ের মধ্যেই সৈন্যবাহিনীকে নিজের দলে টানলেন। একদিন তিনি খোজাদের সাহায্যে আলাউদ্দীনকে হত্যা করলেন এবং নিজে সুলতান শামসুদ্দীন ভাঙ্গরা নাম নিয়ে লখনৌতি এবং বাংলার রাজ্য অধিকার করলেন। আলাউদ্দীনের রাজ্য এক বছর পাঁচ মাস স্থায়ী হয়েছিল।”

বুকাননের বিবরণীতে আলী শাহ সম্বন্ধে যে কাহিনী বর্ণিত হয়েছে, তার সঙ্গে ‘রিয়াজ’-এর বিবরণের মিল আছে, কিন্তু অমিলও যথেষ্ট। বুকাননের বিবরণীতে যা লেখা আছে, তা আমরা নীচে উদ্ধৃত করলাম এবং এই বিবরণীর বিভিন্ন বিষয় সম্বন্ধে আমাদের মন্তব্য [ ] বন্ধনীর মধ্যে দিলাম।

“Firuz Shah, king of Delhi [ ফিরোজ শাহ তখনও দিল্লীর সুলতান হননি ], was a desolute prince, fond of hunting in company with his women, one of whom was corrupted by Shamsudin, then a servant of Alawudin, a principal officer under the king. [ ‘রিয়াজ’-এর মতে শামসুদ্দীন ইলিয়াস আলাউদ্দীন আলী শাহের ধর্মভাতা আর এই বিবরণীর মতে ভৃত্য ; ‘রিয়াজ’-এ শুধু লেখা আছে ইলিয়াস

দিল্লীতে কোন এক অপকর্ম করেছিলেন, আর এখানে বলা হয়েছে ইলিয়াস ফিরোজ শাহের জনৈক দ্বীলোক (উপপত্তী)কে নষ্ট করেছিলেন।] The culprit having secreted himself, the king was enraged with his master, and sent him to AzmutKhan, governor of Bengal, [নতুন নাম ; স্টেপলটন এঁকে মুহম্মদ তোগলকের অধীনস্থ সাতগাঁওয়ের শাসন-কর্তা আজম-উল-মুল্ক-এর সঙ্গে অভিন্ন ধরতে চান (Memoirs of Gaur and Pandua, p. 21. f. n.) I suppose with a view of having him killed. On the road he met with a holy man, Shyekh Jalaludin, of Tabriz, [‘রিয়াজ’-এর মতে আলী শাহ স্বপ্নে জলালুদ্দীন তব্রিজীর দেখা পেয়েছিলেন, আর এই বিবরণীর মতে তাঁর সাক্ষাৎ দর্শন পেয়ে-ছিলেন ; এ ব্যাপার সম্ভাব্য, কারণ জলালুদ্দীন তব্রিজী ঐ সময় জীবিত ছিলেন, ইব্নু বতুতা ১৩৪৬ খ্রীষ্টাব্দে তাঁকে দেখেছিলেন।] who prophesied to him that he would be king, and requested that he would then bestow an endowment on him. I suppose the holy man also discovered to the noble the design of his being sent to Bengal ; as the manuscript [ যার থেকে এই বিবরণী সংকলিত হয়েছে ] states that he immediately killed Azmut Khan, and seized on the government. [ অতঃপর কোন বিবরণীতে এই উক্তির সমর্থন পাওয়া যায় না।] He only, however, assumed the title of Muktagh, or governor ; but retained his authority for 20 years. [ ভুল কথা।] He probably neglected the saint, who, according to the manuscript, seems to have assisted the fugitive servant, Shamsudin, to seize on the government. After having murdered Alawudin, under the disguise of a religious mendicant, by the advice of the saint Jalal, of Tabriz, [ ধর্মনিষ্ঠ সর্বজনপূজ্য দরবেশ জলালুদ্দীন তব্রিজী বৃদ্ধ বয়সে ইলিয়াসের সঙ্গে আলী শাহের বিরুদ্ধে ষড়যন্ত্রে যোগ দিয়েছিলেন বলে বিশ্বাস করা যায় না ] usually called Mukhdum Shah, Shamsudin fixed the seat of his government at Peruya, [ পেড়ো অর্থাৎ পাটুয়া ] and assumed the title of king.” [ পাটুয়া বা ফিরোজাবাদ সম্ভবত

আলাউদ্দীন আলী শাহেরও রাজধানী ছিল, কারণ সেখানকার টাকশাল থেকে তাঁর মুদ্রা প্রকাশিত হবেছিল।]

পাওয়াতে জলালুদ্দীন তব্রিজীর নামাঙ্কিত একটি দরগা এখনও বর্তমান ; এই দরগাটি ‘শাহ জলালের দরগা’ বা ‘বড়ী দরগা’ নামে পরিচিত। এই দরগার মধ্যে অনেকগুলি কোঠা আছে, এগুলি আলাউদ্দীন আলী শাহের রাজত্বকালের অনেক পরে নির্মিত। আলাউদ্দীন আলী শাহ যে দরগাটি নির্মাণ করিয়েছিলেন, তার কিছুই বোধ হয় এখন আর বর্তমান নেই। ১৭৮৮ খ্রীষ্টাব্দে গোলাম হোসেন ‘রিয়াজ-উস-সলাতীন’ বইয়ে লিখেছিলেন যে ঐ সময়ে আলাউদ্দীন আলী শাহ কর্তৃক নির্মিত দরগার “চিহ্ন” মাত্র অবশিষ্ট ছিল।

## দ্বিতীয় অধ্যায়

### ইলিয়াস শাহী বংশ

#### শামসুদ্দীন ইলিয়াস শাহ

আলাউদ্দীন আলী শাহকে হত্যা করে হাজী ইলিয়াস শামসুদ্দীন ইলিয়াস শাহ নাম নিয়ে রাজা হলেন। ‘রিয়াজ-উস-সলাতীন’ ও বুকাননের বিবরণী— উভয় সূত্রেই লেখা আছে যে ইলিয়াস দুশ্চরিত্র লোক ছিলেন এবং ষড়যন্ত্র করে তাঁর প্রভু আলী শাহকে বধ করেছিলেন। এই সব কথা কতদূর সত্য, তা বলা যায় না। তবে রাজা হবার আগে ইলিয়াস যা’ই করে থাকুন না কেন, রাজা হবার পরে তিনি অসীম যোগ্যতার পরিচয় দেন। আলী শাহকে বধ করে তিনি শুধু উত্তর বঙ্গের রাজা হলেন না, অল্পদিনের মধ্যেই তিনি আরও বৃহত্তর গৌরবের অধিকারী হলেন। নানা রাজ্য তিনি জয় করলেন, সমগ্র বাংলাদেশকে এবং বাংলার বহির্ভূত অনেক অঞ্চলকেও নিজের অধিকারে আনলেন, দিল্লীর সুলতানের সঙ্গে যুদ্ধ করে নিজের স্বাধীনতা অক্ষুণ্ণ রাখলেন এবং এমন এক রাজবংশের প্রতিষ্ঠা করলেন, যা দীর্ঘকাল ধরে গৌরব ও কৃতিত্বের সঙ্গে বাংলাদেশ শাসন করতে সক্ষম হয়েছিল।

অথচ এই কীর্তিমান নৃপতির পূর্ব-ইতিহাস সম্বন্ধে বিশেষ কিছুই জানা যায় না। ‘রিয়াজ-উস-সলাতীন’, বুকাননের বিবরণী প্রভৃতি অর্বাচীন সূত্রে এ সম্বন্ধে যা বলা আছে, সেটুকু আলাউদ্দীন আলী শাহের প্রসঙ্গে লিপিবদ্ধ করেছি। ইলিয়াস যে বাংলার বাইরে থেকে এসেছিলেন, এ সম্বন্ধে সব বিবরণীই একমত। কিন্তু তাঁর আদি নিবাস কোথায় ছিল, তার উল্লেখ প্রায় কোন সূত্রেই মেলে না। আরবের দু’জন ঐতিহাসিক ইব্ন-ই-হজর এবং অল-সখাওয়া গিয়াসুদ্দীন আজম শাহের কথা লেখবার সময় গিয়াসুদ্দীনের পিতামহ ইলিয়াস শাহকে অল-সিজিস্তানী বলেছেন (Islamic Culture, 1958, p. 199) এঁরা চতুর্দশ বা পঞ্চদশ শতাব্দীর লোক এবং প্রামাণিক গ্রন্থকার হিসাবে পরিচিত। এঁদের উক্তি থেকে মনে হয়, হাজী ইলিয়াসের আদি নিবাস ছিল পূর্ব ইরানের সিজিস্তানে। ইলিয়াস শাহ যে মক্কায় তীর্থ করে এসেছিলেন, তা তাঁর ‘হাজী’ উপাধি থেকে বোঝা যায়। ‘তারিখ-ই মুবারক শাহী’তে ইলিয়াসকে “মালিক ইলিয়াস” বলা হয়েছে; এম থেকে বোঝা যায়

যে, আলাউদ্দীন আলী শাহের রাজত্বকালে ইলিয়াস লখনৌতি রাজ্যের একজন অভিজাত রাজপুরুষ ছিলেন।

যাহোক, প্রথম জীবনে যিনি একজন নগণ্য ব্যক্তি ছিলেন, তিনিই পরবর্তীকালে এক বিরাট রাজ্যের অধীশ্বর হয়েছিলেন এবং জয়ের পর জয়ের মুকুট পরে, প্রবল শত্রুর আক্রমণ প্রতিহত করে নিজের গৌরবের পতাকা উড়িয়েছিলেন। এইরকম অসাধারণ প্রতিভাসম্পন্ন ক্ষণজন্মা ব্যক্তির আবির্ভাব শুধু এদেশে নয়, ভিন্ন দেশেও খুব কমই হতে দেখা গিয়েছে। এঁর ইতিহাস যেটুকু জানা যায়, তা আমরা এখন বর্ণনা করব।

৭৪৪ হিজরা থেকে ফিরোজাবাদ বা পাণ্ডুয়ার টাকশালে তৈরী শামসুদ্দীন ইলিয়াস শাহের মুদ্রা পাওয়া যাচ্ছে। কারণ কারও মতে তাঁর কতকগুলি পাণ্ডুয়ায় তৈরী মুদ্রার তারিখ ৭৪৩ হিজরা, কিন্তু এ সম্বন্ধে সকলে একমত নন। যাহোক, ৭৪৩ হিজরায় যে ইলিয়াস পাণ্ডুয়া তথা উত্তর বঙ্গ অধিকার করেন তাতে কোন সন্দেহ নেই। কারণ কলকাতার বেনিয়াপুকুর এলাকার একটি আধুনিক মসজিদে একটি শিলালিপি সংলগ্ন আছে, সেটি শামসুদ্দীন ইলিয়াস শাহের রাজত্বকালে ৭৪৩ হিজরার ২রা শাবান তারিখে অর্থাৎ ১৩৪২ খ্রীষ্টাব্দের ৩১শে ডিসেম্বর তারিখে উৎকীর্ণ হয়েছিল বলে স্পষ্টাক্ষরে লেখা আছে (Bibliography of the Muslim Inscriptions of Bengal, Dr. A. H. Dani, p. 10)। শিলালিপিটি কলকাতায় আবিষ্কৃত হয়েছে বলে কেউ কেউ মনে করেন যে ইলিয়াস শাহ প্রথমে দক্ষিণ বঙ্গ বা সাতগাঁও অঞ্চল অধিকার করেছিলেন। কিন্তু যে মসজিদে শিলালিপিটি পাওয়া গেছে, সেটি আধুনিক। এই মসজিদটি তৈরী হবার আগে শিলালিপিটি যে দক্ষিণ বঙ্গে ছিল, সে সম্বন্ধে কোন প্রমাণ নেই। শিলালিপিটিতে প্রসিদ্ধ দরবেশ আলা অল-হকের জন্ম একটি মসজিদ নির্মাণের কথা লেখা আছে। আলা অল-হক যে পাণ্ডুয়ায় বাস করতেন, সে সম্বন্ধে সব স্ত্রই একমত। (পরে ইলিয়াস শাহের পুত্র সিকন্দর শাহের রাজত্বকালে তিনি পাণ্ডুয়া থেকে সোনারগাঁওয়ে যেতে বাধ্য হন।) স্তত্রাং ইলিয়াস শাহের এই শিলালিপিটি যে মূলে পাণ্ডুয়ায় ছিল, সে বিষয়ে সন্দেহের অবকাশ অল্প।

অবশ্য এ বিষয়ে কোনই সন্দেহ নেই যে, ইলিয়াস শাহ ৭৪৭ হিঃ বা ১৩৪৬ খ্রীঃর মধ্যেই সাতগাঁও অঞ্চল জয় করেছিলেন, কারণ ৭৪৭ হিজরায় সাতগাঁওয়ের টাকশাল থেকে তাঁর মুদ্রা প্রকাশিত হয়েছিল।

সিংহাসনে আরোহণ করে শামসুদ্দীন ইলিয়াস শাহ রাজ্যজয়ের দিকে মন দিলেন। ১৩৫০ খ্রীষ্টাব্দে তিনি নেপাল আক্রমণ করেন এবং সেখানকার বহু নগর ভস্মীভূত করেন, বহু মন্দির ভেঙে ফেলেন ও বিখ্যাত পশুপতিনাথের মূর্তিকে তিন খণ্ড করেন। চতুর্দশ শতাব্দীর শেষ দিকে সংকলিত একটি নেপাল রাজবংশাবলীতে লেখা আছে,

“সম্বৎ ৪৬২ পৌর্ণমাস্তাং শ্রীশ্রীরাজাজয়রাজদেবেন শ্রীপশুপতিভট্টারকশ্চ কোষ প্রটোকিতম্। তেন তত্র পূর্বস্বরাজা সমসদীনেনাগত্য শ্রীপশুপতিজি-  
খণ্ডীকৃতঃ, নেপাল সমস্ত ভস্মীভবান। হাহাকরোন্তি লোকাশ্চ।” ( ইতিহাস,  
৮ম খণ্ড, ৩য় সংখ্যা, পৃ: ১৫৩ )

এখানে বলা হয়েছে যে ৪৬২ নেওয়ারী সংবৎ বা ১৩৪২ খ্রীষ্টাব্দে নেপালের রাজা জয়রাজ (মল্ল) পশুপতিনাথের কোষ থেকে অর্থ গ্রহণ করেন এবং তার পরে পূর্বদেশের ( অর্থাৎ বাংলার ) স্বরাজা (সুলতান) সমসদীন ( শামসুদ্দীন = শামসুদ্দীন ইলিয়াস শাহ ) নেপালে এসে পশুপতিনাথকে তিন খণ্ড করেন এবং সমস্ত পুড়িয়ে দেন। ১৩৪২ খ্রীঃর কত পরে বাংলার সুলতান নেপাল আক্রমণ করেছিলেন, তা এখানে লেখা হয় নি। কিন্তু কাঠমণ্ডুর নিকটস্থ স্বয়ম্ভূনাথ মন্দিরের এক শিলালিপিতে এই আক্রমণের সঠিক বৎসরটি পাওয়া যায়। এই শিলালিপির প্রাসঙ্গিক অংশ নীচে উদ্ধৃত হল।

সপ্তত্যাভ্যধিকে শ্রীমল্লেনালাক চতুঃশতে।

মার্গশীর্ষে সিতে পক্ষে দশম্যাং গুরুবাসরে ॥

স্বরাজা সমসদীনো বঙ্গাল বহুৈ বটৈঃ।

সহাগত্য চ নেপালে ভগ্নো দক্ষশ্চ সর্বশঃ ॥

( ইতিহাস, ঐ সংখ্যা, পৃ: ১৫২ )

এখানে স্পষ্টভাবে বলা হয়েছে যে ৪৭০ নেওয়ারী সংবৎ বা ১৩৫০ খ্রীষ্টাব্দে শামসুদ্দীন নেপাল আক্রমণ করে ছারখার করেছিলেন।

প্রাচীন ললিতপুরী বা পাটনের লিপিতে ইলিয়াস শাহের নেপাল আক্রমণের কথা এইভাবে উল্লিখিত হয়েছে,

শ্রতান সমসদীন যবনাধিরাজঃ

নেপাল সর্বনগরং ভস্মীকরোতি।

( ইতিহাস, ঐ সংখ্যা, পৃ: ১৫১ )

‘তোরিখ-ই-ফিরিশ্তা’য় লেখা আছে যে ইলিয়াস শাহ জাজনগর অর্থাৎ উড়িষ্যা

আক্রমণ করেছিলেন। তিনি চিহ্না হ্রদের সীমা পর্যন্ত অভিযান চালিয়েছিলেন এবং ৪৪টি হাতী সমেত বহু সম্পত্তি লুণ্ঠ করেছিলেন। ‘তবকাৎ-ই-আকবরী’-তেও লেখা আছে যে ইলিয়াস এক সৈন্যবাহিনী গঠন করে জাজনগরে অভিযান করেছিলেন এবং সেখান থেকে অনেক হাতী লাভ করে নিজের রাজধানীতে ফিরে এসেছিলেন।

উত্তরে ও দক্ষিণে নেপাল ও উড়িষ্যা অভিযানে ইলিয়াস শাহ লুণ্ঠপাট করে বহু সম্পদ হস্তগত করেন বটে, কিন্তু এর দ্বারা তাঁর রাজ্যের আয়তন কতখানি প্রসারিত হয়েছিল তা জানা যায় না। অথচ পশ্চিম ও পূর্বে তাঁর রাজ্যের সীমা যে অনেক দূর প্রসারিত হয়েছিল, তা সুস্পষ্টভাবে জানা যায়। সমসাময়িক ঐতিহাসিক জিয়াউদ্দীন বারনি লিখেছেন যে ইলিয়াস শাহ ত্রিহত আক্রমণ করে তা অধিকার করে নিয়েছিলেন এবং ঐ দেশ লুণ্ঠ করে, তার বহু নগর ছারখার করে হিন্দু-মুসলমান উভয় সম্প্রদায়ের উপরেই তিনি সমানভাবে অত্যাচার চালিয়েছিলেন। ষোড়শ শতাব্দীর ঐতিহাসিক মুন্না তকিয়া তাঁর বয়াজে লিখেছেন যে হাজী ইলিয়াস উত্তর বিহারের হাজীপুর পর্যন্ত জয় করেছিলেন। হাজী ইলিয়াসের নাম অনুযায়ী হাজীপুর নামক স্থানের নামকরণ হয়েছিল বলে প্রবাদ আছে।

‘সিরাৎ-ই-ফিরোজ শাহী’ নামে আর একটি সমসাময়িক ইতিহাসগ্রন্থে লেখা আছে যে ইলিয়াস শাহ চম্পারণ, গোরক্ষপুর ও কাশী জয় করে এক বিরাট ভূখণ্ড তাঁর রাজ্যের অন্তর্ভুক্ত করেন এবং বহরাইচের সিপাহসালার শেখ মসুদ গাজীর সমাধিতে দু’বার গিয়ে নিজের শ্রদ্ধার্থ্য নিবেদন করেন। এই বইয়ের মতে ইলিয়াস বহরাইচ থেকে বাংলাদেশে প্রত্যাবর্তন করে বলেছিলেন, “এত প্রচুর শক্তি ও সম্পদ, স্থলবাহিনী ও নৌবাহিনী নিয়ে আমি যদি দিল্লী গিয়ে শেখ-উল-ইসলাম নিজামুদ্দীনের উদ্দেশে শ্রদ্ধা নিবেদন করতাম তাহলে কেমন সন্দের হত? আমাকে এবং আমার বাহিনীকে বাধা দিতে কে সাহস করত?”

পূর্বদিকেও ইলিয়াস শাহ নতুন নতুন রাজ্য জয় করেছিলেন। মুন্সীর সাক্ষ্য থেকে দেখা যায়, ৭৫৩ হিজরা বা ১৩৫২-৫৩ খ্রীষ্টাব্দে ইলিয়াস শাহ কথকুদ্দীন মুবারক শাহের পুত্র ইখতিয়ারুদ্দীন গাজী শাহের কাছ থেকে সোনারগাঁও তথা পূর্ববঙ্গ জয় করে নেন। এর ফলে ইলিয়াস শাহ সমগ্র বাংলাদেশেরই অধীশ্বর হলেন।



এছাড়া ইলিয়াস শাহ কামরূপেরও অন্তত কতকাংশ জয় করেছিলেন। কারণ তাঁর পুত্র সিকন্দর শাহের রাজত্বের একেবারে গোড়ার দিকে—১৫২ হিজরায় উৎকীর্ণ একটি মুদ্রায় টাকশালের নাম লেখা আছে, “চৌলীস্তান ওরফে কামরূপ।” (“চৌলীস্তান” মানে চাউলের দেশ। ডঃ আবদুল করিমের মতে স্থানটির প্রকৃত নাম ‘আওয়ালিস্তান’—Corpus of the Muslim Coins of Bengal, p. 50 দ্রষ্টব্য।) এর দ্বারা বোঝা যায় যে সিকন্দর শাহের রাজত্বের শুরু থেকেই কামরূপ বা তার কতকাংশ তাঁর রাজ্যের অন্তর্ভুক্ত ছিল। ইলিয়াস শাহ ১৫২ হিঃ পর্যন্ত রাজত্ব করেছিলেন। সুতরাং “কামরূপ” অঞ্চল জয় তাঁরই রাজত্বকালের ঘটনা, তাতে কোন সন্দেহ নেই।

কিন্তু ইলিয়াস শাহের এই সমস্ত বিজয়ের গৌরবও যান হয়ে যায়, যখন দিল্লীর পরাক্রান্ত সুলতান ফিরোজ শাহ তোগলকের সঙ্গে তাঁর সংঘর্ষের কথা স্মরণ করি।

যদিও ফিরোজ শাহের অহুগত লোকদের লেখা ইতিহাস-গ্রন্থে দেখাবার চেষ্টা করা হয়েছে যে ইলিয়াস এই যুদ্ধে শোচনীয়ভাবে পরাজিত হয়েছিলেন, কিন্তু তাঁদের উক্তি বিশ্লেষণ করলে এ বিষয়ে কোন সন্দেহ থাকে না যে প্রকৃত সত্য অজ্ঞরূপ। এ সম্বন্ধে বিচার করার আগে এই সংঘর্ষের বিবরণ সংক্ষেপে লিপিবদ্ধ করব।

তিনখানি সমসাময়িক গ্রন্থে এই সংঘর্ষের কথা পাওয়া যায়। এই তিনটি গ্রন্থের মধ্যে একটি জিয়াউদ্দীন বারনি রচিত ‘তারিখ-ই-ফিরোজ শাহী’। দ্বিতীয়টি শাম্-ই-সিরাজ আফিফ রচিত ‘তারিখ-ই-ফিরোজ শাহী’। তৃতীয়টি অজ্ঞাতনামা কোন ব্যক্তি কর্তৃক স্বয়ং ফিরোজ শাহের নির্দেশে রচিত ‘সিরাত-ই-ফিরোজ শাহী’। তিনটিই ফিরোজ শাহের অহুগত লোকের লেখা। সুতরাং যেক্ষেত্রে জয়পরাজয়ের প্রশ্ন জড়িত, সেক্ষেত্রে তাঁদের উক্তি একদেশদৃষ্টিতা-দোষে ছুঁই হয়ে পড়েছে।

এই তিনটি বইয়ের মধ্যে জিয়াউদ্দীন বারনির বইই সব চেয়ে আগে—ফিরোজ শাহ ও ইলিয়াস শাহের সংঘর্ষের মাত্র পাঁচ বছর পরে—১৩৫২ খ্রিষ্টাব্দে রচিত হয়। তাই বারনির বইয়ে এ সম্বন্ধে যা লেখা আছে, তা খুব মূল্যবান। নীচে তার সংক্ষিপ্তসার দেওয়া হল।

সুলতান ফিরোজ শাহের রাজত্বের প্রথম বছরেই (১৩৫১-৫২ খ্রিঃ) তাঁর কানে এই খবর পৌঁছোলো যে লখনৌতির শাসনকর্তা ঐ দেশ জোর করে

অধিকার করে অসংখ্য পাইক ও ধনুককে (ধনুকধারী সৈন্যদের) একত্র সমবেত করেছে এবং ত্রিহত আক্রমণ করে, সেখানকার মুসলমান ও জিম্মিদের (হিন্দুদের) উপর অত্যাচার করে সেই দেশ লুণ্ঠ করেছে ও শহরগুলি ছারখার করেছে। সেই সঙ্গে ত্রিহত ও ফিরোজ শাহের রাজ্যের সীমান্তে সে উৎপীড়ন চালাচ্ছে। এই কথা শুনে ফিরোজ শাহ ৭৫৪ হিজরার ১০ই শওয়াল (৮ই নভেম্বর, ১৩৫৩ খ্রিঃ) তারিখে লখনৌতি ও পাণ্ডুয়ার উদ্দেশ্যে রওনা হলেন এবং অবিরাম যাত্রা করে অবোধ্যা প্রদেশে পৌঁছোলেন। বহু রাজার সাহায্যপুষ্ট বিশাল বাহিনী নিয়ে ফিরোজ শাহ সরযু নদী পার হলেন। ভাঙখোর ইলিয়াস শাহ ফিরোজ শাহের আগমনের কথা শুনে সীমান্ত ছেড়ে ত্রিহতে পালিয়ে গেলেন। তারপর ফিরোজ শাহের বাহিনী খরোসা ও গোরক্ষপুরে পৌঁছোলে ইলিয়াস ত্রিহত থেকে পাণ্ডুয়ায় পালিয়ে গিয়ে আত্মরক্ষার বন্দোবস্ত করতে লাগলেন। গোরক্ষপুর ও খরোসার রাজারা ফিরোজ শাহের কাছে বশুতা স্বীকার করে তাঁকে কর ও উপঢৌকন দিলেন এবং তাঁর বাহিনীতে নিজেদের বাহিনী নিয়ে যোগ দিলেন। ফিরোজ শাহও তাঁদের সর্বতোভাবে অভয় দান করলেন। এদিকে ফিরোজ শাহের বাহিনী আসছে শুনে ইলিয়াস পাণ্ডুয়া থেকে চলে গিয়ে একডালা নামক একটি নিকটবর্তী জায়গার দুর্গে আশ্রয় নিলেন এবং আত্মরক্ষার বন্দোবস্ত করতে লাগলেন। ফিরোজ শাহের বাহিনী গোরক্ষপুর থেকে জাকাং এবং জাকাং থেকে ত্রিহতে গিয়ে পৌঁছোলো। ত্রিহতের রাজা ও জমিদাররা ফিরোজ শাহের সভায় এসে বশুতা স্বীকার করে উপঢৌকন দিলেন। ফিরোজ শাহ ত্রিহতে স্বশাসনের বন্দোবস্ত করলেন এবং তাঁর বাহিনী ত্রিহতে কোনরকম অত্যাচার করল না। ইলিয়াস পাণ্ডুয়ার সমস্ত লোকজন নিয়ে একডালায় আশ্রয় নিয়েছিলেন, ঐ স্থানের এক দিকে জল, অপর দিকে জঙ্গল। ইলিয়াস তাঁর পরামর্শদাতা ও সমর্থকদের সঙ্গে পরামর্শ করলেন। তাঁরা সকলেই একবাক্যে বললেন যে বর্ষাকাল খুব সন্নিগ্ধ, আশপাশের জমিগুলি খুব নীচু, বর্ষায় তারা জলে ভরে যাবে এবং বড় বড় মশা জন্মাবে, ফলে ফিরোজ শাহের বাহিনীর পক্ষে সেখানে থাকা সম্ভব হবে না, তাদের ঘোড়াগুলি মশার কামড় সহ করতে পারবে না। এই সমস্ত কারণের জন্ত বর্ষা নামলে ফিরোজ শাহের বাহিনী পশ্চাদ্ধসরণ করতে বাধ্য হবে। এদিকে ফিরোজ শাহের বাহিনী পাণ্ডুয়ায় পৌঁছোলে ফিরোজ শাহ এই মর্মে এক ফরমান জারী করলেন যে তাঁর দলের

কেউ যেন পাণ্ডুরার লোকদের কোন ক্ষতি না করে এবং ইলিয়াস শাহের প্রসাদ ও উত্তান নষ্ট বা ভস্মীভূত না করে। তাঁর যে সমস্ত অশ্বারোহী ও পদাতিক সৈন্য পাণ্ডুরায় পৌঁছেছিল, তারা পাণ্ডুরার সাধারণ লোকদের কিছু বলল না, কিন্তু ইলিয়াস শাহের প্রাসাদে যে সমস্ত বিদ্রোহী ছিল, তাদের অনেককে বধ করল। তাঁর প্রাসাদের ঘোড়াগুলিও তারা দখল করল। তারপর ফিরোজ শাহের বাহিনী একডালার দিকে রওনা হল। একডালার সামনে যে জলের বেঠনী ছিল, তারই ধারে ফিরোজ শাহের বাহিনী একটি “কংথর”-এ\* তাঁবু গাড়ল। ফিরোজ শাহ এক ফরমান জারী করে আদেশ দিলেন যে তাঁর বাহিনীর লোকেরা যেন নদী পার হবার ব্যবস্থা করতে ও বাঁধ, সেতু প্রভৃতি তৈরী করতে স্লু করবে এবং নদী পার হবার ব্যবস্থা সম্পূর্ণ হলে সবাই যেন একসঙ্গে নদী পার হয়ে একডালা দুর্গ দখল ও ধূলিমাংস করে। ফিরোজ শাহের লোকেরা যতশীঘ্র সম্ভব নদী পার হয়ে একডালা দুর্গ ধ্বংস করবার জন্তে ব্যগ্র হয়ে উঠল। কিন্তু স্লততানের মনে হল দুর্গ ধ্বংস করলে দোষী লোকদের সঙ্গে নির্দোষ লোকদেরও প্রাণ যাবে, স্ত্রী মুসলমানদের জেনানা অমুসলমান পাইক ও ধনুক সৈন্য এবং অগ্রাগ্র উচ্ছৃঙ্খল লোকদের হাতে পড়বে; বহু উচ্চ, সম্ভ্রান্ত ও জ্ঞানী লোক এবং সূফীরা, ছাত্রেরা, দরবেশরা, সন্ন্যাসীরা, বিদেশীরা ও পথিকেরা প্রাণ হারাবে। অথচ দুই ইলিয়াস শাহের জল ও জঙ্গলে ঘেরা দুর্গ ধ্বংস করতে গেলে হাতী ব্যবহার করতে হবে এবং তা করলেই এ সমস্ত ঘটবে। সেই কারণে স্লতান প্রার্থনা করতে লাগলেন যে ইলিয়াস যেন সসৈন্তে দুর্গ থেকে বেরিয়ে এসে তাঁর বাহিনীকে আক্রমণ করে, তাহলেই তিনি তাকে শাস্তি দিতে পারবেন। তাঁর প্রার্থনা একদিন পূর্ণ হল। একদিন সকালে ফিরোজ শাহ এই মর্মে এক ফরমান জারী করলেন যে অত্যধিক লোকের অবস্থানের জন্ত বর্তমান ঘাঁটি তাঁর সৈন্যদের পক্ষে অস্বাস্থ্যকর হয়ে উঠেছে, স্লতরাং ঘাঁটি পরিবর্তন করতে হবে। তাই শুনে তাঁর বাহিনীর লোকেরা আনন্দিত হয়ে সোরগোল করে ঐ কংথর ছেড়ে নতুন ঘাঁটির জন্ত নির্দিষ্ট স্থানের দিকে এগিয়ে যেতে লাগল।

এদিকে ইলিয়াস শাহ এবং তাঁর দলের লোকেরা ভাবলেন যে ফিরোজ শাহের সৈন্যদল পশ্চাদপসরণ করছে। ইলিয়াস এ সম্বন্ধে কোন খোঁজখবর

---

\* “কংথর”-এর অর্থ ছাউনি ফেলবার উপযোগী বিশেষভাবে প্রস্তুত স্থান (The place dressed with concrete for camping’—Bhattachali)।

না নিয়ে ভাঙের নেশা এবং অত্যধিক আত্মবিশ্বাসের বশবর্তী হয়ে একভালা থেকে তাঁর হাতীসওয়ার, ঘোড়সওয়ার ও পদাতিক সৈন্য নিয়ে বেরিয়ে এলেন এবং ফিরোজ শাহের পরিত্যক্ত ঘাঁটির সামনে তাঁর হাতীগুলোকে সাজালেন। তার ফলে তাঁর বাহিনী ফিরোজ শাহের বাহিনীর মুখোমুখি দাঁড়াল।

যুদ্ধ শুরু হয়ে গেল। ইলিয়াসের সৈন্যেরা প্রতিপক্ষকে আক্রমণ করল। ফিরোজ শাহ তাঁর বাহিনীর কয়েকটি দলের প্রতি ফরমান জারী করে শত্রু-বাহিনীকে আক্রমণ করতে বললেন। তাঁর সৈন্যেরা আল্লা-হো-আকবর ধ্বনি করে কোষ থেকে অসি নিষ্কাশিত করল এবং প্রথম আক্রমণেই ইলিয়াস শাহের বাহিনীকে ছত্রভঙ্গ করে দিল। শত্রু-বাহিনী দিশাহারা হয়ে পড়ল। স্তরের শ্রোত বয়ে গেল। ফিরোজ শাহের সৈন্যেরা ইলিয়াস শাহের রাজছত্র, রাজদণ্ড, তুর্ঘ ও পতাকা এবং ১৪টি হাতী দখল করল। ইলিয়াস চক্ষের নৈমেঘে যুদ্ধক্ষেত্র থেকে অস্তহিত হলেন। ফিরোজ শাহের সৈন্যেরা তাদের তরবারি দিয়ে তাঁর অশ্বারোহী ও পদাতিক সৈন্যদের মাথা কেটে ফেলতে লাগল। ফলে অনতিবিলম্বে যুদ্ধক্ষেত্রে মৃতদেহের স্তূপ জমে উঠল। বাংলার বিখ্যাত পাইক সৈন্যেরা বহুবছর ধরে নিজেদের বাংলাদেশের পিতা বলে অভিহিত করত, লোকে তাদের বীর বলত, ভাঙখোর ইলিয়াসের কাছে তারা তাদের সাহসের জন্ত বখশিস পেয়ে আসছিল এবং বাংলার জলের দ্বারা দীতকায় (হিন্দু) “রাজা”-দের সঙ্গে তারা সেই জংলী উন্মাদটার (ইলিয়াসের) পাশে দাঁড়িয়ে বেপরোয়াভাবে হাত-পা ছুঁড়ছিল। যুদ্ধ শুরু হলে তারাই বিজয়ী সৈন্যবাহিনীর সম্মুখীন হয়ে মুখে দুটি আঙুল পুরে দিল, ঠিকমত পাড়াতে ভুলে গেল, হাত থেকে তরবারি ও তীরধনুক ফেলে দিল, মাটিতে পাল ঘসতে লাগল এবং প্রতিপক্ষের তরবারিতে কাটা পড়তে লাগল।

বিকালের মধ্যে শত্রুর মৃতদেহের স্তূপে সমস্ত জায়গাটা ভরে গেল। ফিরোজ শাহের সৈন্যেরা বিজয়ী হল এবং প্রচুর লুণ্ঠের সম্পত্তি তাদের হস্তগত হল। তাদের কারও মাথার একটি চুলও এই যুদ্ধে নষ্ট হল না।

সাক্ষ্য উপাসনার পরে বিজয়ী ফিরোজ শাহ তাঁর সভায় বসে এই ফরমান জারী করলেন যে ইলিয়াস শাহের পক্ষের যেসব লোক বন্দী হয়েছে এবং তাঁর রাজছত্র প্রভৃতি যেসব জিনিস তাঁর বাহিনী হস্তগত করেছে—তাদের যেন তাঁর কাছে নিয়ে আসা হয়। ৪৪টি অতিকায় পর্বতের মত হাতী—যেগুলি

ইলিয়াস শাহের সঙ্গে যুদ্ধে তিনি জয় করেছিলেন—সেগুলি তাঁর সামনে দিয়ে নিয়ে যাওয়া হল। ফিরোজ শাহের মাহত ও হস্তীরক্ষকরা বলল এত বড় হাতী এর আগে কখনও দিল্লীতে যায়নি।

এই হাতীগুলিকে দেখে ফিরোজ শাহ আমীর ও রাজাদের বললেন, “এইসব হাতীর জোরেই ইলিয়াস দিল্লীর বাহিনীর সঙ্গে যুদ্ধ করার কথা কল্পনা করেছিল। এমন হাতীগুলি হারাবার ফলে তার গর্ব আর মাথা তুলবে না এবং সে আমার কাছে বশতা স্বীকার করবে ও দিল্লীতে প্রতি বছর উপঢৌকন সমেত তার ভৃত্যদের পাঠাবে। গ্রায়সঙ্গত রাজা ভিন্ন আর কারও হাতীশালে বড় হাতী থাকা উচিত নয়। অবিবেচক লোকদের বড় হাতী থাকলে তাদের মাথায় অহঙ্কার জন্মায়। নির্ভীক প্রকৃতির দুর্বৃত্তের হাতে বড় হাতী পড়লে মহা বিপদের সৃষ্টি হয় এবং তার ফলে পরিণামে তারই পতন ও ধ্বংস হয়।”

এইসব ঘটনার পরে ফিরোজ শাহ এক ফরমান জারী করে সমস্ত লুঠের মাল তাঁর সেনাপতির কাছে জমা দিতে বললেন। পরদিন সকালে ঘুম ভাঙার পর সুলতান ভগবানের কাছে তাঁর বিজয়ের জ্ঞাত ধন্যবাদ জানালেন। তার পরদিন তাঁর বাহিনীর সমস্ত লোকেরা—উচ্চ, নীচ, অখারোহী, পদাতিক, মুসলমান, হিন্দু, বাজারের লোক এবং ভৃত্য, সকলে রাজসভার সামনে সমবেত হয়ে বলল তারা একডালা দুর্গ লুঠ করবে এবং হাতী দিয়ে তা ধুলিসাং করে ইলিয়াস শাহের অম্লগত লোকদের তাড়িয়ে দেবে। কিন্তু সুলতান তা করার অমুমতি দিলেন না। তিনি বললেন, “যারা বিদ্রোহ করেছিল তারা নিহত হয়েছে। যে সমস্ত হাতী ইলিয়াসের দস্ত ও বিশ্বাসঘাতকতার কারণ ছিল, সেগুলি অধিকৃত হয়েছে। ভগবান আমাদের সাহায্য করে বিজয়ী করেছেন। এখন বর্ষাকাল আসন্ন হয়ে উঠেছে। আমাদের লক্ষ্য হবে মুসলমানদের মধ্যে এবং বর্তমান ইসলামের বাহিনীর লোকদের মধ্যে যারা এখন নিরাপদে আছে, তারা যাতে নিরাপদে গৃহে ফিরতে পারে, তার জ্ঞাত চেষ্টা করা। এইরকম বিজয় লাভের পরে আর অতিরিক্ত কিছু চাওয়া উচিত নয়।”

সুলতানের নির্দেশে তাঁর বাহিনীর লোকেরা দিল্লীর দিকে ফিরতে সুরু করল। ৭৫৫ হিজরার ১২ই শাবান (১লা সেপ্টেম্বর, ১৩৫৪ খ্রি:) তারিখে তারা দিল্লী পৌছোলো। ইলিয়াস শাহের যে সমস্ত সম্পত্তি ফিরোজ শাহের সৈন্তেরা লুঠ করেছিল এবং তাঁর দলের যে সমস্ত লোককে তারা বন্দী করেছিল, তাদের দিল্লীর পথে পথে দেখিয়ে বেড়ানো হল। দিল্লীর লোকেরা ফিরোজ

শাহের বিজয় উপলক্ষে মহা আনন্দে উৎসব, পানভোজন ও নৃত্যগীত করতে লাগল। স্থলতান দরিদ্রদের এই বিজয় উপলক্ষে বহু অর্থ দান করলেন। তিনি দিল্লীর আলিমদের অনেক উপহার দিলেন, শেখদের আশ্রমে দান করলেন এবং সন্ন্যাসীদের আন্তানায় ঐচ্ছার্য্য নিবেদন করলেন। দরবেশদের সমাধিতে গিয়েও তিনি দানধ্যান করলেন। এই বিজয়ের ফলে লখনৌতির শাসনকর্তা ইলিয়াস নব্ব হুয়ে বশ্বতা স্বীকার করলেন। তিনি ফিরোজ শাহের দরবারে হু'বার উপঢৌকন পাঠালেন এবং একজন আমীর যেভাবে বশ্বতা স্বীকার করে আবেদন জানায়, তেমন ভাবেই আবেদন জানিয়ে চিঠি লিখলেন।

শামসু-ই-সিরাজ আফিক এবং 'সিরাং-ই-ফিরোজ শাহী'র বিবরণ বারনির বিবরণের সঙ্গে মূলত অভিন্ন। তবে কোন কোন বিষয়ে তাদের মধ্যে বৈশিষ্ট্য দেখা যায়। নীচে আমরা এই বিষয়গুলির উল্লেখ করলাম।

শামসু-ই-সিরাজ আফিক লিখেছেন যে ফিরোজ শাহ কুশী নদীর তীরে পৌছে দেখেছিলেন অপর তীরে গঙ্গা ও কুশীর সঙ্গমস্থলের খুব কাছে ইলিয়াস শাহের সৈন্তেরা রয়েছে। তার ফলে ফিরোজ শাহের বাহিনী কুশীর উজানে ১০০ ক্রোশ উঠে গিয়ে চম্পারণের নীচে অনেক কষ্ট করে খরশ্রোতা কুশী নদী পার হয়। ফিরোজ শাহ চম্পারণ ও রচাপ হয়ে বাংলাদেশে পৌছোন। অতঃপর ইলিয়াস শাহ একডালা দুর্গে আশ্রয় নেন। ফিরোজ শাহ ঐ দুর্গ অবরোধ করেন এবং তার চারদিকে পরিখা খনন করান। প্রত্যেক দিন ইলিয়াস শাহের সৈন্তেরা একডালা থেকে বেরিয়ে এসে পায়তড়া ভাঁজত, কিন্তু প্রতিপক্ষের শরবর্ষণে জর্জরিত হয়ে একডালা দ্বীপে ফিরে গিয়ে সেখানে আশ্রয় নিত। ফিরোজ শাহের সৈন্তবাহিনী বাংলাদেশ ছেয়ে ফেলেছিল। বাংলার অনেক রাও, রাণা এবং জমিদার ফিরোজ শাহের দলে যোগ দিলেন। বাংলার জনসাধারণের মধ্যেও অনেকে তাঁর দলে যোগ দিল।

এইভাবে কিছুদিন কাটবার পর সূর্য ককটরাশিতে প্রবেশ করার উপক্রম করল এবং আত্ম আবহাওয়া দেখা দিল। তখন ফিরোজ শাহ তাঁর অমাত্যদের সঙ্গে পরামর্শ করে দিল্লীর দিকে কয়েক ক্রোশ এগিয়ে গেলেন এবং একডালা দুর্গে কয়েকজন কালান্দার বা ফকীরকে পাঠালেন। এইসব কালান্দার একডালা দুর্গে গিয়ে বন্দী হল এবং তাদের ইলিয়াস শাহের কাছে নিয়ে যাওয়া হলে তারা ইলিয়াস শাহকে জানাল যে ফিরোজ শাহ সমস্ত সৈন্তসামন্ত ও

মালপত্র নিয়ে দিল্লীর দিকে রওনা হয়েছেন।\* এই খবর শুনে ইলিয়াস ১০,০০০ ঘোড়া, ৫০টি হাতী এবং ২,০০,০০০ পদাতিক সমেত এক বিরাট বাহিনী নিয়ে ফিরোজ শাহকে আক্রমণ করলেন। তখন ফিরোজ শাহ একডালা থেকে সাত ক্রোশ দূরে নদীতীরে তাঁর সৈন্যবাহিনী নিয়ে অপেক্ষা করছিলেন। তিনি ইলিয়াস শাহের আসার খবর পেয়ে তাঁর অখারোহী বাহিনীকে তিনভাগ করে সাজালেন। ডান দিকের বাহিনীতে ৩০,০০০ সৈন্য রইল মীর-শিকার মালিক দিলান-এর অধীনে, বাঁ দিকের বাহিনীতে মালিক হিসাম নওয়ার অধীনে ৩০,০০০ ঘোড়া রইল এবং মাঝের বাহিনীতে তাতার খানের অধীনে ৩০,০০০ সৈন্য থাকল। হাতীগুলিকেও তিন ভাগ করে সাজানো হল। ফিরোজ শাহ সমস্ত বাহিনীতে ঘুরে তাঁর লোকদের উৎসাহিত করতে লাগলেন। ইলিয়াস ফিরোজ শাহের সৈন্যসজ্জা দেখে বুঝতে পারলেন যে কালান্দাররা তাঁকে ঠকিয়েছে। তিনি ভয়ে কাঁপতে লাগলেন। যুদ্ধ শুরু হয়ে গেল। প্রথমে তীর খস্কের যুদ্ধ, তারপর বর্ষা ও তরবারির যুদ্ধ হল এবং তারপর দু'দলের সৈন্যেরা পরস্পরের এত কাছাকাছি এল যে হাতাহাতি যুদ্ধ চলতে লাগল। অনেকক্ষণ ধরে প্রচণ্ড যুদ্ধের পরে ইলিয়াস শাহ পরাজিত হয়ে পালাতে লাগলেন। তাতার খান তাঁকে বিদ্রোপ করতে লাগলেন। ইলিয়াস শাহের সমস্ত বাহিনী ছত্রভঙ্গ হয়ে গেল, তাঁর ৪৮টি হাতী ফিরোজ শাহের লোকের দখল করল এবং ৩টি হাতী প্রাণ হারাল।\* ইলিয়াস মাত্র ৭ জন অখারোহী নিয়ে গালিয়ে একডালা দুর্গে প্রবেশ করে অনেক কষ্টে দুর্গের দ্বার বন্ধ করে দিলেন। ফিরোজ শাহের সৈন্যরা শহর (একডালা শহর) অধিকার কবল। ফিরোজ শাহ সেখানে এসে পৌছোলে (ইলিয়াস শাহের অন্তঃপুরের) সম্ভ্রান্ত মহিলারা দুর্গের ছাদে চড়লেন এবং ফিরোজ শাহকে দেখে মাথার কাপড় খুলে গভীর শোক প্রকাশ করতে লাগলেন। ফিরোজ শাহ তা'ই দেখে দুঃখিত হয়ে ভাবলেন যে অনেক মুসলমানকে হত্যা করে তিনি এই শহর ও এই দেশ অধিকার করেছেন এবং দুর্গ দখল করতে হলে আরও বহু মুসলমানকে হত্যা

\* জিয়াউদ্দীন বারনির উক্তির সঙ্গে আফিকের এই উক্তির প্রভেদ লক্ষণীয়। বারনির মতে ইলিয়াস আপনার থেকেই ভেবেছিলেন যে ফিরোজ শাহ পশ্চাদ্গমন করছেন।

\* একথা সত্য হতে পারে না, কারণ শামস-ই-সিরাজ আফিক নিজের লিখেছেন যে ইলিয়াস ৫০টি হাতী নিয়ে যুদ্ধে এসেছিলেন। ৫০টি হাতীর মধ্যে ৩টি হাতী যদি যুদ্ধে মারা পড়ে, তাহলে ৪৮টি হাতী বিজিত হতে পারে না।

করতে ও সম্ভ্রান্ত মহিলাদের অমর্যাদার মধ্যে নিক্ষেপ করতে হবে। তা করলে তিনি চরম বিচারের দিনে কী কৈফিয়ৎ দেবেন এবং মোগলদের সঙ্গে তাঁর কী পার্থক্য থাকবে? তাতার খান বারবার সুলতানকে অমুরোধ করতে লাগলেন বিজিত অঞ্চলগুলি স্থায়ীভাবে অধিকারে রাখার জন্ত। কিন্তু ফিরোজ শাহ বললেন যে এর আগে দিল্লীর বহু রাজা বাংলাদেশকে নিজেদের অধীনে এনেছেন, কিন্তু তাঁদের কেউই সেখানে বেশীদিন থাকা উচিত মনে করেন নি, কারণ বাংলাদেশ জলাভূমিতে পূর্ণ এবং এখানকার সম্ভ্রান্ত লোকরা ঘাঁপে বাস করেন; অতএব পূর্ববর্তী রাজারা যা করেছেন, তার তুলনায় স্বতন্ত্র কিছু করা তাঁর পক্ষে উচিত হবে না। এই বলে ফিরোজ শাহ তাঁর বাহিনীকে ফিরে যেতে আদেশ দিলেন। যাবার আগে সুলতান নিহত বাঙালীদের মাথাগুলি এক জায়গায় জড়ো করতে আদেশ দিলেন এবং এক একটি মাথা সংগ্রহের জন্ত একটি করে রূপোর টকা পুরস্কার ঘোষণা করলেন। ১,৮০,০০০-এরও বেশী মাথা পাওয়া গেল, কারণ পুরো একদিন ধরে সাতকোশ ব্যাপী জায়গা জুড়ে যুদ্ধ হয়েছিল। সুলতানের বাহিনী দিল্লীর দিকে রওনা হল। মাঝপথে পাণ্ডুয়ার ফিরোজ শাহের নামে থুংবা পড়া হল। ফিরোজ শাহ একডালা ও পাণ্ডুয়ার নাম পরিবর্তন করে যথাক্রমে আজাদপুর ও ফিরোজাবাদ রাখলেন। তারপর তিনি দিল্লীতে প্রত্যাবর্তন করলেন। লখনৌতি থেকে পাওয়া হাতীগুলিকে সামনে রেখে তাঁর বাহিনী দিল্লীতে প্রবেশ করল।

‘সিরাৎ-ই-ফিরোজ শাহী’তে মোটামুটিভাবে শামসু-ই-সিরাজ আফিকেরই অমুরূপ বিবরণ লিপিবদ্ধ হয়েছে, তবে এই বইয়ের মধ্যে খুঁটিনাটি বিষয়ের বর্ণনা অপেক্ষাকৃত কম। এই বইয়ের মতে ইলিয়াস শাহ একডালা দুর্গে ঢোকবার আগে একবার তাঁর বাহিনীর সঙ্গে ফিরোজ শাহের বাহিনীর যুদ্ধ হয়েছিল এবং তাতে ইলিয়াসের বাহিনী পরাস্ত হয়েছিল; তারপর তিনি বহু হাতী এবং আট লাখ পদাতিক সৈন্য সংগ্রহ করে নতুন এক বাহিনী গঠন করেন এবং দ্বিতীয়বার ফিরোজ শাহের বাহিনীর সঙ্গে যুদ্ধ করেন; এবারও তিনি পরাজিত হন; তাঁর পক্ষের প্রায় ৬০,০০০ লোক এই যুদ্ধে প্রাণ হারায়\* এবং অনেকে বন্দী হয়; বিজয়ী পক্ষ ইলিয়াস শাহের অনেকগুলি হাতী

---

\* শামসু-ই-সিরাজ আফিকের মতে ইলিয়াস শাহের পক্ষের এক লক্ষ আশী হাজারেরও বেশী লোক নিহত হয়েছিল। আসলে নিহতের সংখ্যাকে ‘সিরাৎ’—এই যথেষ্ট অতিরঞ্জিত করে বলা হয়েছে। আফিক অতিরঞ্জিত করেছেন আরও অনেক বেশী পরিমাণে।



দখল করে। 'সিরাত-ই-ফিরোজ শাহী'র মতে যুদ্ধ জয়ের পর ফিরোজ শাহের বাহিনী একডালা দুর্গ জয়ের উদ্যোগ করছিল। কিন্তু এই সময় বিপন্ন মুসলমানরা চীৎকার করে তাদের দুঃখের কথা জানাতে থাকে। মুসলিম স্ত্রীলোকেরা ফিরোজ শাহের কাছে করুণভাবে নিরস্ত হবার জন্য আবেদন জানায়; তারা বলে যে শামসুদ্দীন ইলিয়াস শাহ তাদের আটক করে রাখার তারা বিপন্ন হয়ে পড়েছে; একে তারা ঐ দুর্বৃত্তের অত্যাচারে পীড়িত, তার উপর ফিরোজ শাহ কর্তৃক দুর্গ অবরোধের ফলে তারা ভয়ে দিশাহারা হয়ে পড়েছে; কারণ ফিরোজ শাহের সৈন্তেরা দুর্গ জয় করলে তারা দুর্গ লুণ্ঠ করবে এবং মেয়েদের ক্রীতদাসী বানাবে; তারা (মেয়েরা) শামসুদ্দীনের সমর্থক নয়, বরং সম্রাট ফিরোজ শাহেরই আজ্ঞাবহ; সম্রাট যদি তাদের রক্ষা না করেন, তাহলে অপমানের হাত থেকে বাঁচবার জন্যে তারা বিষ খেয়ে মরবে। এদের অহুন্নয় ও আবেদনের ফলে ফিরোজ শাহ দুর্গ জয়ের চেষ্টা থেকে নিরস্ত হন। বাংলার (বন্দী) সৈন্তেরা কান্নাকাটি করার পর ফিরোজ শাহ তাদের মুক্তি দেন এবং একডালার নাম আজাদপুর রাখেন।\* জয় এবং প্রভূত ধনসম্পদ লাভ করে ফিরোজ শাহ দিল্লী ফিরে যান। ইলিয়াসও শিক্ষা পাওয়ার পরে অত্যাচার বন্ধ করেন এবং সম্রাটের কাছে অতীত আচরণের জন্য ক্ষমা চেয়ে প্রতি বছর দিল্লীতে উপঢৌকন প্রেরণের প্রতিশ্রুতি দেন।

জিয়াউদ্দীন বারনি, শামসু-ই-সিরাজ আফিক এবং 'সিরাত-ই-ফিরোজ শাহী'র লেখক, এই তিনজন ঐতিহাসিকই দেখাবার চেষ্টা করেছেন যে ফিরোজ শাহের সঙ্গে যুদ্ধে ইলিয়াস শাহ শোচনীয়ভাবে পরাজিত হয়েছিলেন। এঁরা এমনভাবে যুদ্ধের বর্ণনা দিয়েছেন, যার থেকে মনে হয় ফিরোজ শাহের প্রচণ্ড শক্তির কাছে ইলিয়াস শাহ মেষশাবকের মত অসহায় হয়ে পড়েছিলেন। বারনি আরও এক ধাপ অগ্রসর হয়ে লিখেছেন যে প্রথম আক্রমণেই ফিরোজ শাহের বাহিনী ইলিয়াস শাহের সৈন্তদের ছত্রভঙ্গ করে দেয়, তারপর যথেষ্টভাবে তাদের মাথা কাটতে থাকে এবং এই যুদ্ধে ফিরোজ শাহের পক্ষের কারও মাথার একটি চুলও নষ্ট হয় নি। কিন্তু আফিক এতখানি নির্লজ্জ অভ্যুজ্ঞি করতে পারেন নি, তিনি লিখেছেন যে, প্রচণ্ড যুদ্ধের পর ইলিয়াস শাহ পরাজয় বরণ করেন। এঁদের

---

\* এ কথা সম্ভবত সত্য। শামসু-ই-সিরাজ আফিকও এ কথা বলেছেন। আফিকের মতে ফিরোজ শাহ অধিকন্তু পাণ্ডয়ার নামও বদলে 'কিরোজাবাদ' রেখেছিলেন। এই কথা সত্য নয়।

কিঞ্চিৎ পরবর্তী ঐতিহাসিক গ্রাহিষা বিন্ সিরহিন্দী তাঁর ‘তারিখ-ই-মোবারক শাহী’তে এই যুদ্ধের বিবরণ দেবার সময় একে “মহাযুদ্ধ” ( great battle ) বলেছেন।

একডালার যুদ্ধে ইলিয়াস শাহ শোচনীয়ভাবে পরাজিত হয়েছিলেন বলে বিশ্বাস করা যায় না। ফিরোজ শাহের অল্পগত তিনজন ঐতিহাসিক এই যুদ্ধের যে বিবরণ দিয়েছেন, তা বিশ্লেষণ করলে পরিষ্কার বোঝা যায় যে ফিরোজ শাহই এই যুদ্ধে সুবিধা করতে না পেরে পশ্চাদপসরণ করতে বাধ্য হন। এ সম্বন্ধে টমাস ও রাখালদাস বন্দ্যোপাধ্যায় যা বলেছেন, তা অথগুণীয়। টমাস লিখেছেন, “the invasion only resulted in the confession of weakness, conveniently attributed to the periodical flooding of the country.” রাখালদাস লিখেছেন, “সুলতান্ ফিরোজ শাহের সমসাময়িক ঐতিহাসিক শমস্-ই-সিরাজ্ আফিফ্ লিপিবদ্ধ করিয়া গিয়াছেন যে, গোড়ীয় অবরোধবাসিনীগণের রোদনধ্বনিতে বিচলিত হইয়া বাদশাহ্ দিল্লীতে প্রত্যাবর্তন করিতে কৃতসঙ্কল্প হইয়াছিলেন। আফিফের এই উক্তি ফিরোজ শাহের গোড়াভিযানের বিফলতা গোপন করিবার জন্য লিপিবদ্ধ হইয়াছিল। বাদশাহ যখন গোড়াভিযানে যাত্রা করিয়াছিলেন, তখন কি জানিতেন না যে, গোড়-যুদ্ধে বহু মুসলমান নিহত হইবে এবং তাহাদিগের পুত্র কলত্রের আর্তনাদ সতত তাঁহার কর্ণে প্রবেশ করিবে? সম্মুখযুদ্ধে পরাজিত হইলেও ইলিয়াস শাহের সেনা তখনও যুদ্ধ পরিত্যাগ করে নাই, গোড়-দেশ অধিকৃত হইলেও রাজধানীর প্রধান দুর্গ তখনও অনধিকৃত ছিল, এই অবস্থায় যুদ্ধ পরিত্যাগ করিয়া প্রত্যাবর্তন করা যদি বিজয় হয়, তাহা হইলে মুসলমান ঐতিহাসিকগণের উক্তি সত্য। বর্ষাকালে গোড়দেশে অবস্থান অসম্ভব দেখিয়া এবং সুরক্ষিত চূর্ত্তে একডালা দুর্গ অধিকার অসম্ভব জানিয়া, গোড়াভিযানে ব্যর্থ-মনোরথ হইয়া দিল্লীর বাদশাহ্ ফিরোজ শাহ্ প্রত্যাবর্তন করিতে বাধ্য হইয়াছিলেন। জিয়া-উদ্দীন বাগী বঙ্গদেশীয় রাজা ও পদাতিক সেনার কাপুরুষতার কথা লিপিবদ্ধ করিয়াছেন। .....শমস্-ই-সিরাজ্ আফিফ্ সুলতান্ শমস্-উদ্দীন ফিরোজ্ (ইলিয়াস) শাহের কাপুরুষতার কথা লিপিবদ্ধ করিয়াছেন,.....কিন্তু এই কাপুরুষ সুলতান্, তাঁহার অধীন কাপুরুষ বাঙ্গালী রাজগণ এবং তাঁহাদিগের অধীন কাপুরুষ পদাতিক সেনার জন্য ভারতেশ্বর ফিরোজ্ শাহকে একডালার অবরোধ পরিত্যাগ করিয়া দিল্লীতে প্রত্যাবর্তন করিতে হইয়াছিল।

জিয়া-উদ্দীন বাণী স্পষ্ট স্বীকার করিয়া গিয়াছেন যে, গোড়াভিযানে ফিরোজ শাহের দুর্বলতাই প্রকাশ পাইয়াছিল এবং সৌভাগ্যক্রমে বর্ষাকাল আসিয়া পড়ায়, পরাজয়ের পরিবর্তে উহাই প্রত্যাবর্তনের কারণ বলিয়া নির্দিষ্ট হইয়াছিল।”

জিয়াউদ্দীন বারনি লিখেছেন যে সুলতান ফিরোজ শাহ ইলিয়াস শাহের ৪৪টি হাতী দখল করে বলেছিলেন যে এর ফলেই ইলিয়াস শাহ বশীভূত হবে ; কারণ এইসব বড় বড় হাতীর জোরেই ইলিয়াস শাহের গর্ব এত বেড়েছিল। অদ্ভুত কথা ! যেন ইলিয়াস শাহের এই ৪৪টি ভিন্ন আর কোন হাতী ছিল না এবং নতুন হাতী সংগ্রহ করা এতই দুরূহ ব্যাপার ! ফিরোজ শাহ নিজের দুর্বলতা গোপন করার জগুই এই কথা বলেছিলেন সন্দেহ নেই।

তারপর, বারনি, আফিফ ও ‘সিরাৎ-ই-ফিরোজ শাহী’-রচয়িতা তিন-জনেই লিখেছেন যে পাছে নিরীহ লোকেরা নিহত বা উৎপীড়িত হয় এবং সম্ভ্রান্ত মহিলাদের মর্যাদা ক্ষুণ্ণ হয়, সেই কারণে ফিরোজ শাহ একডালা দুর্গ জয় করেননি। কিন্তু তা’ই যদি হয়, তাহলে ফিরোজ শাহ ইলিয়াস শাহের পুত্র সিকন্দর শাহের রাজত্বকালে আবার বাংলাদেশ আক্রমণ ও একডালা দুর্গ অবরোধ করেছিলেন কেন ? তখনও তো নিরীহ ব্যক্তিদের প্রাণনাশ ও সম্ভ্রান্ত মহিলাদের মর্যাদা হানির একইরকম সম্ভাবনা ছিল। এইসব বাজে কথা লিখে ফিরোজ শাহের চাটুকার ঐতিহাসিকেরা ফিরোজ শাহের ব্যর্থতাই উদ্ঘাটিত করেছেন।

আসল কথা, ফিরোজ শাহের সঙ্গে সংঘর্ষে ইলিয়াস শাহ পরাজিত হন নি, পলায়নও করেন নি ; তিনি উচ্চাঙ্গের রণকৌশল অহুসারেই কাজ করেছিলেন। ফিরোজ শাহকে সৈন্যবাহিনী সমেত নিজের রাজ্যে অনেক দূর প্রবেশ করতে দিয়ে তিনি একডালা দুর্গে আশ্রয় নিয়ে কালক্ষেপণ করছিলেন। তিনি জানতেন যে বর্ষার আগে ফিরোজ শাহ একডালা দুর্গ জয় করতে পারবেন না। তারপর বর্ষা উপস্থিত হলে ফিরোজ শাহের বাহিনী অসহায় হয়ে পড়বে, তখন তিনি অতি সহজেই তাদের পরাজিত করতে পারবেন। সম্ভবত ফিরোজ শাহের সৈন্যসংখ্যা ইলিয়াস শাহের তুলনায় বেশী ছিল, তাই ইলিয়াস এই কৌশল অবলম্বন করেছিলেন। তারপর ফিরোজ শাহের সৈন্যেরা চলে যাচ্ছে ভেবে তিনি তাদের আক্রমণ করেছিলেন, যার বর্ণনা আফিফ দিয়েছেন। পূর্বোক্ত ঐতিহাসিকেরা এই যুদ্ধে ইলিয়াস পরাজিত হয়েছিলেন বলে দেখাবার

চেষ্টা করলেও পরবর্তী ঘটনাপ্রবাহ থেকে বোঝা যায় যে কোন পক্ষই এই যুদ্ধে চূড়ান্তভাবে জয়ী হতে পারে নি। ফিরোজ শাহ কয়েকজন বন্দী, কিছু লুণ্ঠের মাল ও কয়েকটি হাতী ভিন্ন আর কিছুই এই যুদ্ধ থেকে লাভ করতে পারেন নি। তাঁর পক্ষেও নিশ্চয় কিছু ক্ষতি হয়েছিল, যার কথা পূর্বোক্ত লেখকরা চেপে গিয়েছেন। ইলিয়াস এই যুদ্ধের পরে আবার একডালা দুর্গে আশ্রয় নিয়েছিলেন। কাজেই তাঁর অবস্থা আগে যা ছিল, এখনও তাই থেকে গেল। কিন্তু ফিরোজ শাহ এই যুদ্ধেই ইলিয়াস শাহের বলবীর্ষের পরিচয় পেয়েছিলেন। তিনি বুঝেছিলেন যে ইলিয়াসকে পযুর্দস্ত করা বা একডালা দুর্গ জয় করা দুইই তাঁর পক্ষে অসম্ভব, উপরন্তু বর্ষাকাল এলে তাঁর বাহিনীর শোচনীয় বিপর্যয় ঘটবে। তাই তিনি হাতী জয়ের দ্বারাই যুদ্ধ জয় হয়েছে এই জাতীয় কথা বলে কোন রকমে নিজের মান বাঁচিয়ে বাংলাদেশ থেকে সশস্ত্র প্রস্থান করলেন। পরে প্রচারের মধ্য দিয়ে তিনি নিজের মানি গোপন করেছিলেন। (প্রসঙ্গত উল্লেখ করা যেতে পারে, ফিরোজ শাহ প্রায় সমস্ত অভিযানেই এই ভাবে অসাফল্য বরণ করেছিলেন।)

এই হচ্ছে ফিরোজ শাহ ও ইলিয়াস শাহের সংঘর্ষের পরিণামের প্রকৃত চিত্র। এই যুদ্ধের ফলে বাংলাদেশে ও তার পূর্বদিকে ইলিয়াস শাহের অধিকার কিছু মাত্র খর্ব হয় নি, কিন্তু বাংলার পশ্চিমে যে সব রাজ্য ইলিয়াস জয় করেছিলেন, সেগুলি ফিরোজ শাহের অধিকারভুক্ত হয়েছিল। যাহোক, এই সংঘর্ষের কিছুদিন পরে ফিরোজ শাহকে ইলিয়াস শাহ উপঢৌকন পাঠিয়েছিলেন, এর থেকে বোঝা যায় ইতিমধ্যে ফিরোজ শাহের সঙ্গে তাঁর সন্ধি স্থাপিত হয়েছিল। অবশ্য বারনি, আফিফ এবং ‘সিরাৎ-ই-ফিরোজ শাহী’র লেখকের মতে ইলিয়াসের এই উপঢৌকন প্রেরণ বশত স্বীকারের চিহ্ন, কিন্তু ফিরোজ শাহের প্রভাব থেকে মুক্ত যাহিআ বিন্ সিরুহিন্দী তাঁর ‘তারিখ-ই-মুবারক শাহী’তে স্পষ্টই লিখেছেন যে ইলিয়াস শাহ সমকক্ষ রাজা হিসাবে ফিরোজ শাহকে উপঢৌকন পাঠিয়েছিলেন; এই বইয়ের মতে একবার ইলিয়াস শাহের উপঢৌকন পেয়ে ফিরোজ শাহ ইলিয়াসের দূতকে বলেছিলেন, “তুমি যা এনেছ, আমার দীন ভৃত্যরা তার চেয়ে ভাল জিনিষ তৈরী করে। এখন থেকে তোমাদের বাছা বাছা হাতী আনা উচিত। একজন রাজার আর একজন সমকক্ষ রাজাকে (Brother king) এই ধরনের উপহারই দেওয়া উচিত।” পরবর্তীকালে রচিত ‘তবকাৎ-ই-আকবরী’ গ্রন্থের মতে ৭৫৫ হিঃর ২৭শে রবী

অল-আখির তারিখে ইলিয়াস শাহের সঙ্গে ফিরোজ শাহের সন্ধি হয় এবং এরপর ফিরোজ শাহ বাংলাদেশ থেকে দিল্লী অভিমুখে যাত্রা শুরু করেন। এই কথা সঠিক হওয়া অসম্ভব নয়। সম্ভবত ফিরোজ শাহের গৌরবহানি হতে পারে, এটো আশঙ্কায় সমসাময়িক ঐতিহাসিকেরা এই সন্ধি সম্বন্ধে কিছু লেখেন নি। তবে এ সম্বন্ধে নিশ্চয় করে কিছু বলা যায় না।

শাম্‌স্-ই-সিরাজ আফিফ 'তারিখ-ই-ফিরোজ শাহী'তে লিখেছেন যে বাংলাদেশ থেকে ফিরোজ শাহের প্রত্যাবর্তনের পরে একটি ঘটনা ঘটে। সেটি এই, "When Shamsu-d din entered Ikhdala, he seized the Governor, who had shut the gates, and had him executed." (শাম্‌স্-ই-সিরাজ আফিফের লেখার ইলিয়ট কৃত ইংরেজী অনুবাদ)। এই বাক্যটির অর্থ অনেকে ধরতে পারেন নি। আমাদের মনে হয়, এখানে "Ikhdala" বলতে একডালা দুর্গকে নয়, একডালা শহরকে বোঝাচ্ছে। ফিরোজ শাহ একডালা দুর্গ অধিকার করতে না পারলেও একডালা শহর যে অধিকার করেছিলেন, তা আফিফ লিখেছেন। এই শহরেরই নাম ফিরোজ শাহ পরিবর্তিত করে আজাদপুর রাখেন, এ কথা আফিফ ও 'সিরাৎ' থেকে জানা যায়। আমাদের মনে হয়, উপরে উদ্ধৃত বাক্যে আফিফ এই বলতে চেয়েছেন যে ফিরোজ শাহ চলে যাবার পরে ইলিয়াস একডালা দুর্গ থেকে বেরিয়ে একডালা শহরে প্রবেশ করে সেখানে ফিরোজ শাহ যে শাসনকর্তা নিযুক্ত করে গিয়েছিলেন এবং যিনি একডালা দুর্গের দ্বার অবরোধ করেছিলেন, তাঁকে বন্দী ও বধ করেন। সম্ভবত এর পরে ইলিয়াস বাংলাদেশে ফিরোজ শাহের অধিকৃত সমস্ত অঞ্চলগুলি জয় করে নেন।

স্বাহিআ বিন্‌ সিরহিন্দী 'তারিখ-ই-মুবারক শাহী'তে একডালার যুদ্ধ সম্বন্ধে কয়েকটি নতুন সংবাদ দিয়েছেন। তিনি লিখেছেন যে ৭৫০ হিজরার ২৮শে (পাঠান্তর ২৭শে) রবী অল-আউয়ল (২১শে এপ্রিল, ১৩৫৪ খ্রী:) তারিখে এই যুদ্ধ হয় এবং এই যুদ্ধে ইলিয়াস শাহের বাঙালী পাইক-বাহিনীর অধিনায়ক ("পাইক-ই-মুকাদ্দম") ছিলেন সহদেও (সহদেব), তিনি যুদ্ধে নিহত হন। বলা বাহুল্য স্বাহিআ বিন্‌ সিরহিন্দীর এই উক্তি সম্পূর্ণ নির্ভরযোগ্য, কারণ তিনি যে সময় 'তারিখ-ই-মুবারক শাহী' লেখেন, তখনও নিশ্চয়ই একডালার যুদ্ধে অংশগ্রহণকারী বা এই যুদ্ধের প্রত্যক্ষদর্শী সাক্ষীদের মধ্যে অনেকে জীবিত ছিলেন।

এখানে আর একটি বিষয় উল্লেখযোগ্য। ইলিয়াস শাহের সেনাপতি ছিলেন হিন্দু সহদেব। এছাড়া জিয়াউদ্দীন বারনি স্পষ্টই লিখেছেন যে হিন্দু রাজারা তাঁকে বিশেষভাবে সাহায্য করেছিলেন। তারপর, ইলিয়াস শাহের শক্তির প্রধান উৎস ছিল পাইকেরা। সে যুগের পাইকেরা সাধারণত হিন্দু হত, ফিরোজ শাহের পক্ষীয় পাইকদেরও অনেকে যে হিন্দু ছিল, সে কথা বারনি বলে গেছেন। সুতরাং যে ইলিয়াস শাহ নেপালে গিয়ে হিন্দুর দেবমন্দির ও প্রতিমা ধ্বংস করেছিলেন, তিনি এখন হিন্দুদেরই সাহায্যে তাঁর স্বাধীনতা রক্ষা করলেন। বাংলার স্বাধীন সুলতানদের হিন্দুর সহায়তা গ্রহণের প্রথম ঐতিহাসিক নিদর্শন এইখানেই পাওয়া গেল। পরবর্তী কালে বাংলার সুলতানদের হিন্দুরা যে আরও বেশী সাহায্য করেছিল, তা আমরা পরে দেখতে পাব। হিন্দুরা মুসলমান সুলতানদের জগ্ন প্রাণ দিতেও কুণ্ঠিত হয় নি। একডালার যুদ্ধে যেমন সহদেব প্রাণবিসর্জন দিয়েছিলেন, ১৫২২ খ্রীষ্টাব্দে নসরৎ শাহের সঙ্গে বাবরের যুদ্ধে তেমনি বসন্ত রাও নামে আর একজন হিন্দু বীর নসরৎ শাহের হয়ে যুদ্ধ করে প্রাণ দেন।

‘রিয়াজ-উস-সলাতীনে’ ফিরোজ শাহ ও ইলিয়াস শাহের সংঘর্ষ সম্বন্ধে কয়েকটি নতুন কথা লিপিবদ্ধ হয়েছে। এই বইয়ে লেখা আছে যে, ইলিয়াস শাহ তাঁর পুত্রকে পাণ্ডুয়ার দুর্গে এক সৈন্যবাহিনী সমেত রেখে একডালায় গিয়েছিলেন; ফিরোজ শাহ পাণ্ডুয়ায় এসে ইলিয়াসের পুত্রের সঙ্গে যুদ্ধ করে তাঁকে বন্দী করে একডালা অভিমুখে যাত্রা করেন; ফিরোজ শাহ বাইশ দিন ধরে একডালা দুর্গ অবরোধ করার পরে ইলিয়াস দুর্গ থেকে বেরিয়ে এসে তাঁর সঙ্গে যুদ্ধ করেন; দুই পক্ষে বহু লোক নিহত হবার পরে ইলিয়াস পরাজিত হন এবং আবার একডালা দুর্গে আশ্রয় গ্রহণ করেন। এই প্রসঙ্গে ‘রিয়াজ’-রচয়িতা লিখেছেন, “কথিত আছে দরবেশ শেখ রাজা বিয়াবানি এই সময় মারা যান। এর উপরে সুলতান শামসুদ্দীনের গভীর বিশ্বাস ছিল। সুলতান শামসুদ্দীন ফকীরের ছদ্মবেশে দুর্গ থেকে বেরিয়ে শেখের অন্ত্যেষ্টিক্রিয়ার অনুষ্ঠানে যোগদান করেন। অন্ত্যেষ্টিক্রিয়া শেষ হলে তিনি একা ঘোড়ায় চড়ে ফিরোজ শাহের সঙ্গে দেখা করে দুর্গে ফিরে যান; কিন্তু ফিরোজ শাহ তাঁকে চিনতে পারেন নি। সুলতান (ফিরোজ শাহ) যখন এই ব্যাপার জানতে পারলেন, তখন তিনি (ইলিয়াসকে ধরতে না পারার জগ্ন) দুঃখ প্রকাশ করেছিলেন।” ‘রিয়াজ’-এর মতে বর্ষা এসে গেলে ফিরোজ শাহ স্বতঃপ্রসূত হয়ে

সন্ধির প্রস্তাব করেছিলেন এবং ইলিয়াস শাহ ও একটানা অবরোধের ফলে ক্লান্ত হয়ে আংশিক বশুতা স্বীকার করে সন্ধি করেছিলেন। তখন ফিরোজ শাহ ইলিয়াসের পুত্র ও অগ্রাগ্র বন্দীদের মুক্তি দিয়ে দিল্লী ফিরে যান। এই সব উক্তির যথার্থ্য সম্বন্ধে কোন প্রমাণ পাওয়া যায় না।

বখ্শী নিজামুদ্দীনের 'তবকাৎ-ই-আকবরী'তে ফিরোজ শাহ ও ইলিয়াস শাহের সংঘর্ষের বিভিন্ন ঘটনার সময় নির্দেশ করা হয়েছে। এই বইয়ের মতে (১) ৭৫৪ হিঃর ১০ই শওয়াল তারিখে ফিরোজ শাহ দিল্লী থেকে রওনা হন, (২) ৭৫৫ হিঃর ৭ই রবী অল-আউয়ল তারিখে ফিরোজ শাহ এক-ডালায় পৌছোন, (৩) ৭৫৫ হিঃর ২২শে রবী অল-আউয়ল তারিখে তিনি একডালা থেকে দিল্লী ফিরে যাবার ভান করেন, (৪) ৭৫৫ হিঃর ৫ই রবী অল-আখির তারিখে ইলিয়াস শাহ ফিরোজ শাহকে আক্রমণ করেন, (৫) ৭৫৫ হিঃর ৭ই রবী অল-আখির তারিখে ফিরোজ শাহ গোড়ের বন্দীদের মুক্তি দান করেন, (৬) ৭৫৫ হিঃর ২৭শে রবী অল-আখির তারিখে ইলিয়াস শাহ ও ফিরোজ শাহের সন্ধি হয় এবং ফিরোজ দিল্লী অভিমুখে প্রত্যাবর্তন শুরু করেন, (৭) ৭৫৫ হিঃর ১২ই শাবান তারিখে ফিরোজ শাহ দিল্লী পৌছোন। এর মধ্যে (১) ও (৭) নং ঘটনার তারিখ সঠিক, কারণ বারনির 'তারিখ-ই-ফিরোজ শাহী'তে এই দুই তারিখ উল্লিখিত হয়েছে। (৩) ও (৪) নং ঘটনার তারিখ ভুল, কারণ 'তারিখ-ই-মুবারক শাহী'তে লেখা আছে যে ৭৫৫ হিঃর ২৭শে বা ২৮শে রবী অল-আউয়ল তারিখে (৪) নং ঘটনা ঘটেছিল। অগ্রাগ্র তারিখগুলি নিজামুদ্দীন কোথা থেকে সংগ্রহ করেছিলেন, তা জানা যায় না, কাজেই তাদের যথার্থ্য সম্বন্ধে কিছু বলা যায় না। (৬) নং "ঘটনা" আদৌ ঘটেছিল কিনা বলা যায় না, কারণ সমসাময়িক বইগুলিতে এই বিষয়ের কোন উল্লেখ পাওয়া যায় না; তবে ফিরোজ শাহের সঙ্গে ইলিয়াস শাহের সন্ধি যে সম্পূর্ণ সম্ভাব্য ব্যাপার, তা আগেই আলোচনা করে দেখিয়েছি। বুকাননের বিবরণীতে ইলিয়াস শাহ ও ফিরোজ শাহের সংঘর্ষের কারণ সম্বন্ধে লেখা হয়েছে যে ইলিয়াস "made war on Ibrahim, governor of Behar, on the part of Firuz... The royal party, however, repulsed the usurper. The emperor then invaded Bengal." এই কথা সত্যতা সম্বন্ধে প্রমাণ সস্ত্রতি আবিস্কৃত হয়েছে। বিহারে প্রাপ্ত মালিক ঝাঘুর কবরের শিলালিপি এবং রাজগীরের বিপুল পাহাড়ের একটি মন্দিরের

( সংস্কৃতে লেখা ) শিলালিপি থেকে জানা যায় যে, মালিক ইব্রাহিম বায়ু ( সংস্কৃতে লেখা শিলালিপিতে মালিক বয়া নামে উল্লিখিত ) ফিরোজ শাহের অধীনে বিহারের ( মগধের ) শাসনকর্তা ছিলেন ; প্রথমোক্ত শিলালিপি থেকে জানা যায় যে, তিনি ৭৫৩ হিঃর ১৩ই জিহাদ ( ২০শে জাহুয়ারী, ১৩৫৩ খ্রীঃ ) তারিখে পরলোক গমন করেন (J.A.S.P., Vol. VIII, No. 1, p. 48 ত্রঃ) । সুতরাং যতদূর মনে হয়, ইলিয়াস বিহার জয়ের জন্য মালিক ইব্রাহিম বায়ুকে আক্রমণ করেন এবং তাঁকে বিব্রত করেন ; তার ফলেই ফিরোজ শাহ বাংলাদেশ আক্রমণের সিদ্ধান্ত করতে বাধ্য হন ; মালিক বায়ুর মৃত্যুর তারিখ ফিরোজ শাহের বাংলাদেশ আক্রমণের তারিখের কয়েক মাস পূর্ববর্তী, সুতরাং অশ্রুমান করা যেতে পারে যে ইলিয়াস শাহের সঙ্গে যুদ্ধেই মালিক বায়ু নিহত হন ।

সমসাময়িক ইতিহাস-গ্রন্থগুলিতে একডালা-র অবস্থান স্পষ্টভাবে নির্দেশ করা হয়নি । তাই এই বিষয় নিয়ে আধুনিক কালের পণ্ডিতদের মধ্যে যথেষ্ট বিতর্ক হয়েছে । জিয়াউদ্দীন বারনি, শাম্-ই-সিরাজ আফিফ, ফিরিশতা, গোলাম হোসেন প্রভৃতির উক্তি বিশ্লেষণ করে এঁরা একডালার প্রকৃত অবস্থান নির্ণয়ের চেষ্টা করেছেন । কারও কারও মতে একডালা বর্তমান মালদহ জেলায় অবস্থিত । অন্তদের মধ্যে কেউ ঢাকা জেলায়, কেউ দিনাজপুর জেলায় একডালার অবস্থিতি নির্ণয় করেন । কিন্তু শেষোক্ত পণ্ডিতরা দেখেননি যে ফিরোজ শাহ ও ইলিয়াস শাহের সমসাময়িক এবং সম্ভবত একডালা যুদ্ধের প্রত্যক্ষদর্শী ব্যক্তি\* কর্তৃক যুদ্ধের অল্প পরে রচিত ‘সিরাৎ-ই-ফিরোজ শাহী’তে লেখা আছে, “...Ikdala which was situated on the banks of the Ganges and was surrounded by one of the branches of said river.” ( কে. কে. বহুর অনুবাদ, J. B. O.

---

\* এরকম ধারণার কারণ, ‘সিরাৎ-ই-ফিরোজ শাহী’তে লেখা আছে যে ইলিয়াস শাহের বিজ্ঞেয় যুদ্ধযাত্রার সময় ফিরোজ শাহ মাঝে এক জায়গায় নেকড়ে, চিতা, বাঘ, ভালুক, সিংহ প্রভৃতি বন্য জন্ত শিকারের নেশায় মতে ওঠেন, সিংহ শিকারের সময় গ্রন্থকারের কলম চলছিল । ( At the time when the pon ( of the author ) was being set in motion, furious lions fell before the fierce arrows of the ( imperial ) army.—কে. কে. বহুর অনুবাদ ) এর থেকে মনে হয়, সিরাৎ-ই-ফিরোজ শাহী’র লেখক এই অভিযানে ফিরোজ শাহের সহযাত্রী ছিলেন ।



R. S. Vol. XXVII, pt. I, p. 87 জুটব্য।) দিনাজপুর বা ঢাকা জেলায় গঙ্গা নদী নেই। আমরা এই বইয়ের অষ্টম অধ্যায়ে 'হোসেন শাহের রাজধানী' শীর্ষক আলোচনার মধ্যে এই বিষয়টি সযত্নে বিস্তৃতভাবে আলোচনা করেছি এবং দেখাবার চেষ্টা করেছি যে এই একডালা বর্তমান মালদহ জেলার অন্তর্গত প্রাচীন গোড় নগরীর পাশেই অবস্থিত ছিল।

একডালা দুর্গে আশ্রয় নিয়ে ইলিয়াস শাহ ফিরোজ শাহ তোগলকের আক্রমণ প্রতিহত করেছিলেন। তাঁর পুত্র সিকন্দর শাহের রাজত্বকালে যখন ফিরোজ শাহ দ্বিতীয়বার বাংলাদেশ আক্রমণ করেন, তখনও সিকন্দর এই একডালা দুর্গে আশ্রয় নিয়েই তাঁকে ঠেকিয়ে রাখেন ও সন্ধি করতে বাধ্য করেন। অথচ এই ইতিহাসপ্রসিদ্ধ একডালা দুর্গের বিস্তৃত প্রামাণিক বিবরণ কোথাও পাওয়া যায় না। সমসাময়িক ঐতিহাসিক জিয়াউদ্দীন বারনি লিখেছেন যে একডালা দুর্গের এক পাশে নদী এবং আর একপাশে জঙ্গল ছিল। 'সিরাত-ই-ফিরোজ শাহী'র মতে একডালা দুর্গ গঙ্গার তীরে অবস্থিত এবং গঙ্গার একটি শাখানদী দ্বারা বেষ্টিত ছিল। তার ফলেই দুর্গটি এত দুর্ভেদ্য হয়ে উঠেছিল সন্দেহ নেই। বারনির বিবরণ থেকেই জানা যায় যে, একডালা দুর্গের আয়তন অসাধারণ রকমের বৃহৎ ছিল, যার ফলে ইলিয়াস শাহ পাণ্ডুয়া শহরের সমস্ত লোকজন নিয়ে তার মধ্যে ঢুকে বসেছিলেন। শাম্-ই-সিরাজ আফিফ লিখেছেন যে একডালা দুর্গ একটি দ্বীপের ("জুজের") উপর অবস্থিত ছিল। দ্বীপ বলতে আফিফ নদী দ্বারা বেষ্টিত ভূখণ্ড বুঝিয়েছেন সন্দেহ নেই। কিন্তু আফিফ লিখেছেন যে, একডালা দুর্গটি কাদামাটি দিয়ে তৈরী ছিল; তিনি "বিশুদ্ধ লোকদের" কাছে এই কথা শুনেছিলেন বলে জানিয়েছেন। এই বিষয়টি আমাদের মনে বিস্ময় ও সন্দেহের সৃষ্টি করে। যদিও তখন পর্যন্ত এ দেশের যুদ্ধে কামান ব্যবহৃত হয়নি, তাহলেও কাদামাটি দিয়ে তৈরী দুর্গ এতদিন ধরে কী করে পরাক্রান্ত শত্রুবাহিনীর আক্রমণ ঠেকিয়ে রাখতে পারল, তা আমরা বুঝতে পারি না। সম্ভবত আফিফ ভুল খবর পেয়েছিলেন।

ইলিয়াস শাহের বিরুদ্ধে অভিযান করবার পূর্বাঙ্কে ফিরোজ শাহ তোগলক একটি "নিশান" বা ঘোষণাপত্র জারী করেছিলেন। সেটি পাওয়া গিয়েছে। ফিরোজ শাহের অন্ততম বিশিষ্ট কর্মচারী মালিক অয়তুল-মুল্ক মাহক্কর চিঠিপত্রের সংকলন গ্রন্থ 'ইন্শা-ই-মাহক্কর'র মধ্যে এই "নিশান"টি

সংরক্ষিত হয়ে আছে ( J. A. S. B. 1923, pp. 279-280 দ্রষ্টব্য ) । আমরা  
নীচে “নিশান”টির পূর্ণাঙ্গ বাংলা অনুবাদ দিলাম ।

“যেহেতু আমাদের কানে ( এই সংবাদ ) এসেছে যে—ইলিয়াস হাজী  
লখনৌতি এবং জিহত অঞ্চলের লোকদের উপর যথেষ্টাচারিতা ও উৎপীড়ন  
চালাচ্ছে, অহেতুক রক্তপাত করছে এমন কি জীলোকদেরও রক্তপাত করছে,  
যদিও প্রত্যেক ধর্ম ও মতবাদেরই সুপ্রতিষ্ঠিত নীতি এই যে, কোন জীলোককে  
হত্যা করা চলবে না, যদি সে জীলোক কাফের হয়, তবুও না ; এবং  
( ইলিয়াস হাজী ) ইসলামের আইনে অনুমোদিত নয়, এমন সব কর আদায়  
করে লোকদের কষ্ট দিচ্ছে ; জীবন ও সম্পত্তির কোন নিরাপত্তা নেই, সম্মান  
ও সতীশ্বেতও নিরাপত্তা নেই ; এবং যেহেতু এই অঞ্চল আমাদের প্রভুরা  
( পূর্ববর্তী রাজারা ) জয় করেছিলেন, এবং উত্তরাধিকারসূত্রে ও ইমামের দান  
হিসাবে আজ তা আমাদের হাতে এসেছে, আমাদের রাজকীয় ও সাহসী সন্তার  
উপরে ঐ রাজ্যের অধিবাসীদের নিরাপত্তা বিধান ( করার দায়িত্ব ) বর্তেছে ;  
এবং যেহেতু ইলিয়াস হাজী পরলোকগত সম্রাটের ( মুহম্মদ-বিন-তোগলক )  
জীবিতাবস্থায় সম্রাটের প্রতি বশ ও অনুগত ছিল, এবং আমাদের পবিত্র  
অভিষেকের সময়ে সে অধীন ব্যক্তির মত বশতা স্বীকার ও রাজভক্তি প্রদর্শন  
করেছিল, আমাদের কাছে সে দরগাস্ত পাঠিয়েছিল এবং আমাদের সেবা  
করবার জন্ত ( তার ) ভৃত্যদের পাঠিয়েছিল ; তাই ভগবানের স্মৃতি প্রাণীদের  
উপরে সে যে অত্যাচার ও যথেষ্টাচারিতা চালাচ্ছে, তার অতি ক্ষুদ্র অংশ যদি  
ইতিপূর্বে আমাদের গোচরে আসত, তাহলে আমরা তাকে সাবধান করে  
দিতাম, যার ফলে সে তা থেকে নিবৃত্ত হতে পারত ; এবং যেহেতু সে সীমা  
ছাড়িয়ে গিয়েছে ও প্রকাশে আমাদের কর্তৃত্বের বিরুদ্ধে বিদ্রোহ করছে, তাই  
আমরা এক অপরাধেয় সৈন্যবাহিনী নিয়ে এই দেশ উন্মুক্ত করবার জন্ত এবং  
এখানকার অধিবাসীদের সুখের ( সুশাস্ত্রাচ্ছন্দ্য বিধান করার ) জন্ত এর সন্নিহিত  
হয়েছি এই আশা নিয়ে যে এর দ্বারা সবাইকে উৎপীড়ন থেকে মুক্ত করব,  
বিচার ও দয়ার প্রলেপ দিয়ে তার অত্যাচারের ক্ষত আরোগ্য করব ; এবং তার  
অত্যাচার ও নৃশংসতার উত্তপ্ত দূষিত ঝটিকায় বিভক্ত তাদের অস্তিত্বের বৃক্ষ  
আমাদের উদারতার নির্মল জলনিষেকে বধিত ও ফলবন্ত হয়ে উঠবে । সুতরাং  
আমাদের দয়ার আধিক্যেহেতু আমরা আদেশ দিয়েছি যে লখনৌতি অঞ্চলের  
সমস্ত লোকেরা—সাদাং, উলেমা, মশায়খ, ও এই জাতীয় অন্যান্য লোকেরা  
এবং খান, মালিক, উমারা, সদর, আকাবের ও মারিফ এবং তাঁদের অনুচরবর্গ,

যারা তাদের আন্তরিকতার প্রমাণ দিতে পারে অথবা যাদের ইসলামের প্রতি অমুরাগ এইদিকে চালিত করে, তারা অপেক্ষা বা বিলম্ব না করে আমাদের বিশ্বরক্ষাকারী উপস্থিতির কাছে আসবে। তারা তাদের জায়গীর, গ্রাম, জমি, বৃত্তি, পারিশ্রমিক ও বেতন থেকে যা পেত, তার চাইতে তাদের আমরা বেশী দেব; এবং কসই (কোশী) নদী থেকে লখনৌতির বেলায়ং নদীর সূদূর সীমা পর্যন্ত অঞ্চলে যে শ্রেণীর লোকেরা জমীনদার (জমিদার) ও মুকদম নামে অভিহিত, তারাও আমাদের বিশ্ব-রক্ষাকারী উপস্থিতির সমীপে আসতে পারে। আমরা বর্তমান বছরের ফসল (যা করস্বরূপ দিতে হয়) এবং শুক পরিপূর্ণভাবে মাপ করে দেব; এবং আগামী বছর থেকে পরলোকগত সুলতান শামসুদ্দীনের (শামসুদ্দীন ফিরোজ শাহ) রাজত্বকালে বলবৎ আইন অনুসারে রাজস্ব ও শুক আদায়ের জ্ঞান আমরা নির্দেশ দিয়েছি; কিন্তু কোন ক্ষেত্রেই তার চেয়ে বেশী দাবী করা হবে না এবং অতিরিক্ত ও অনৈবধ যে সমস্ত কর ও শুক দেশের ঐ অঞ্চলের লোকদের উপর অতিরিক্ত ভারী বোঝা হয়ে উঠতে পারে, সেগুলিকে সম্পূর্ণভাবে মুকুব ও উচ্ছেদ করা হবে; এবং যে সমস্ত সন্ন্যাসী, সাঁই ও গব্বর (?) ইত্যাদি দলবদ্ধভাবে আমাদের বিশ্বরক্ষাকারী উপস্থিতির কাছে আসবে, তারা তাদের জায়গীর, গ্রাম, জমি, পারিশ্রমিক ও বেতন থেকে যা পেত, আমরা তাদের সম্পূর্ণভাবে তাই মঞ্জুর করব; এবং যারা হুদলে ভাগ হয়ে আসবে, আমরা তাদের একটি বেকনা (?) মঞ্জুর করব; এবং যে কেউ একা আসবে, সে যা পেত, তাই আমরা মঞ্জুর করব। তাছাড়া আমরা তাদের আদি বাসভূমি থেকে উচ্ছেদ করব না অথবা তাদের ক্রেশের কারণ ঘটাব না; আমরা এই আদেশ দিয়েছি যে এই অঞ্চলের প্রত্যেকেই তাদের গৃহে অন্তরের আশা অনুযায়ী বাস করতে পারে এবং চিরকাল হুশিস্তা থেকে মুক্তি ও পরিতৃপ্তি উপভোগ করতে পারে—যদি ঈশ্বর ইচ্ছা করেন।”

জিয়াউদ্দীন বারনি তাঁর ‘তারিখ-ই-ফিরোজ শাহী’তে ইলিয়াস শাহের যে সব অত্যাচারের কথা লিখেছেন, “নিশান”টিতেও সেই ধরণের কথাই লেখা আছে। “নিশান”টি পড়লেই বোঝা যায় যে ফিরোজ শাহ ইলিয়াস শাহের প্রজাদের নানারকম লোভ দেখিয়ে নিজের দলে টানবার চেষ্টা করেছিলেন; আসল কথা, ফিরোজ শাহ বুঝতে পেরেছিলেন যে ইলিয়াস শাহের বিরুদ্ধে জয়লাভ দুঃসাধ্য; তাই ইলিয়াস শাহের দল ভাঙবার জন্তে তিনি সম্ভাব্য সব রকম উপায় অবলম্বন করেছিলেন।

“নিশান”টিতে দাবী করা হয়েছে যে ফিরোজ শাহের অভিষেকের সময়ে ইলিয়াস তাঁর কাছে বশুতা স্বীকার ও রাজভক্তি প্রদর্শন করেছিলেন। আসলে সম্ভবত ইলিয়াস ঐ সময়ে সৌজন্যসূচক উপহার ও চিঠি পাঠিয়েছিলেন; তাকেই “নিশান”-এ এইভাবে ব্যাখ্যা করা হয়েছে। “নিশান”-এর মতে ইলিয়াস মুহম্মদ তোগলকের রাজত্বকালে তাঁর প্রতি অলুগত ছিলেন, কিন্তু মুহম্মদ তোগলকের রাজত্বকালের শেষ নয় বছর ( ৭৪৩-৭৫২ হিঃ ) ইলিয়াস বাংলাদেশে পরিপূর্ণ স্বাধীনভাবে রাজত্ব করেছিলেন এবং নিজের নামে মুদ্রা প্রকাশ করেছিলেন।

এই “নিশান”-এ এবং বারনির বইয়ে ইলিয়াস শাহের অত্যাচারের কথা ফলাও করে লেখা হয়েছে। নিরপেক্ষ কোন সূত্র থেকে এই সব কথার সমর্থন না পাওয়া পর্যন্ত এদের উপর কোন গুরুত্ব আরোপ করা যায় না। তবে একটি ব্যাপার এ সম্বন্ধে খানিকটা সন্দেহের সৃষ্টি করে। বিহারের বিখ্যাত দরবেশ শরফুদ্দীন রাহিআ মনেরি এই সময়ে জীবিত ছিলেন। শেখ হাসামুদ্দীন মাণিক-পুরীর ‘রফীক অল-আরেফীন’ ( রচনাকার পঞ্চদশ শতাব্দীর প্রথমভাগ )-এর এক জায়গায় লেখা আছে, “সুলতান ফিরোজ শেখ শরফুদ্দীন মনেরির সঙ্গে দেখা করার জন্য বিহার ( শরীফ )-এ আসেন। ...সুলতান নিজের মনে ভাবলেন শেখের সঙ্গেই তিনি প্রার্থনা করবেন। শেখ ইমামের ভূমিকা গ্রহণ করলেন। তিনি প্রথমবার হাটু গেড়ে “এজাজা নসরুল্লাহ্” শ্লোক আবৃত্তি করলেন এবং দ্বিতীয়বার তিনি “তব্বৎ ইয়াদা” শ্লোক পড়লেন। প্রার্থনা শেষ হলে সুলতান বললেন যে এর থেকে তিনি শুভ সঙ্কেত পাচ্ছেন। শেখ উত্তর দিলেন তিনি তাঁর ( ফিরোজ শাহের ) জয়ের জন্য ‘এজাজা’ এবং তাঁর শত্রুর পরাজয়ের জন্য ‘তব্বৎ ইয়াদা’ আবৃত্তি করেছেন।” ফিরোজ শাহ তোগলক একবার ইলিয়াস শাহের বিরুদ্ধে অভিযান করার সময় এবং দ্বিতীয়বার ইলিয়াসের পুত্র সিকন্দর শাহের বিরুদ্ধে অভিযান করার সময় বিহারে এসেছিলেন। শরফুদ্দীন রাহিআ মনেরি ফিরোজ শাহের যে শত্রুর পরাজয় কামনা করেছিলেন, তিনি সিকন্দর শাহ হতে পারেন না, কারণ সিকন্দর শাহের সঙ্গে শরফুদ্দীনের গভীর প্রীতির সম্বন্ধ ছিল ( সিকন্দর শাহ ও গিয়াসুদ্দীন আজম শাহ সংক্রান্ত আলোচনা দ্রষ্টব্য )। অতএব ইলিয়াস শাহের সঙ্গে সংঘর্ষের পূর্বাভূই ফিরোজ শাহ শরফুদ্দীনের কাছে এসেছিলেন এবং শরফুদ্দীন ইলিয়াস শাহেরই পরাজয় কামনা করেছিলেন, তাতে কোন

সন্দেহ নেই। এর থেকে মনে হয়, শরফুদ্দীন যাহিআ মনেরি ইলিয়াস শাহের উপরে অসন্তুষ্ট হয়েছিলেন। সুতরাং ইলিয়াস শাহ তাঁর প্রজাদের উপরে কিছু অত্যাচার করেছিলেন এবং তারই ফলে এই সর্বজন-প্রদ্বৈয় দরবেশের তিনি অসন্তোষ উদ্বেক করেছিলেন বলে কেউ কেউ অনুমান করতে পারেন। আমাদের মনে হয়, ফিরোজ শাহের “নিশান” এবং বারনির বইয়ে ইলিয়াসের যে সমস্ত অত্যাচারের কথা লেখা আছে, তার অধিকাংশই সত্য নয়, কিন্তু “নিশান”-এ ইলিয়াসের প্রজাদের উপরে নতুন নতুন কর বসানো সম্বন্ধে যা লেখা আছে তা সত্য, কারণ “নিশান”-এ ফিরোজ শাহ সমস্ত কর এক বছরের জন্য মুকুব করার এবং পরে স্থায়ীভাবে হ্রাস করার আশ্বাস দিয়েছেন। ইলিয়াস শাহ সম্ভবত অর্থলোভ বা প্রয়োজননির্বাহের জন্য এই রকম বহু নতুন কর বসিয়েছিলেন এবং এরই জন্য তিনি শরফুদ্দীন যাহিআ মনেরি প্রমুখ অনেক লোকের অপ্রীতিভাজন হয়েছিলেন বলে মনে হয়।\*

‘রিয়াজ’ এবং বুকাননের বিবরণীতে লেখা আছে যে ফিরোজ শাহ ও ইলিয়াস শাহ যথাক্রমে দিল্লীর সম্রাট ও বাংলার শাসনকর্তা হবার আগেই ইলিয়াস দিল্লীতে সাংঘাতিক অপকর্ম করে ফিরোজ শাহের অসন্তোষ উদ্বেক করেছিলেন ও বাংলায় পালিয়ে এসেছিলেন। কিন্তু আলোচ্য নিশানটিতে এই ব্যাপারের বিন্দুমাত্রও উল্লেখ দেখা যায় না। এতে ইলিয়াসের যে সমস্ত “অপরাধ”-এর কথা বলা হয়েছে, সমস্তই সাম্প্রতিক কালের ব্যাপার। ‘রিয়াজ’ ও বুকাননের বিবরণীর উক্তি সত্য হলে ফিরোজ শাহ তার উল্লেখ করে তাঁর অভিযোগের তালিকা বর্ধিত করার সুযোগ ছেড়ে দিতেন বলে বোধ হয় না। সুতরাং এই দুই বিবরণীর আলোচ্য উক্তি মিথ্যা বলে মনে হয়।

শামসুদ্দীন ইলিয়াস শাহ সম্বন্ধে আর বিশেষ কিছুই জানা যায় না। যুদ্ধ-বিগ্রহের ব্যাপারে তিনি উচ্চাঙ্গের প্রতিভার পরিচয় দিয়েছিলেন। কিন্তু দেশ শাসনের ব্যাপারে তাঁর দক্ষতা কী রকম ছিল, তা জানবার বর্তমানে কোন উপায় নেই।

\* ডঃ আবদুল করিম এই বইয়ের প্রথম সংস্করণের সমালোচনা করার সময় আমাদের এই সিদ্ধান্ত সমর্থন করতে পারেন নি। তিনি মন্তব্য করেছেন, “ইলিয়াস শাহ যদি এত অত্যাচার করেন, তিনি বাঙালীদের সমর্থন পেলেন কি করে?” (সাহিত্য পত্রিকা, বর্ষা সংখ্যা, পৃঃ ২২৭) কিন্তু ইলিয়াস শাহ যে অত্যাচার করেছিলেন, তা আমরা বলি নি, আমরা বলেছি বোধ হয় তিনি বহু নতুন কর বসিয়েছিলেন।

ইলিয়াস শাহ যে লৌহকঠিন ব্যক্তিত্বের অধিকারী ছিলেন, তা ফিরোজ শাহের বিরুদ্ধে দৃঢ়তাপূর্ণ প্রতিরোধ ও পরিণামে জয়যুক্ত হওয়া থেকেই বোঝা যায়। কিন্তু তাঁর চরিত্রের অগ্ন্যান্ত দিক সম্বন্ধে কিছুই আমরা জানি না। ইলিয়াস শাহ মুসলিম সন্ত ও দরবেশদের খুব সম্মান করতেন। তাঁর সময়ে বাংলাদেশে তিনজন বিশিষ্ট মুসলিম সন্ত বর্তমান ছিলেন—অখী সিরাজুদ্দীন, তাঁর শিষ্য আলা অল-হক এবং রাজা বিয়াবানি। শেষোক্ত দুজনের সঙ্গে ইলিয়াস শাহের ঘনিষ্ঠ সম্পর্ক ছিল। তাঁর রাজত্বকালে ও সম্ভবত তাঁরই আদেশে আলা অল-হকের জন্ম ৭৪৩ হিঃর ২রা শাবান বা ১৩৪২ খ্রিঃর ৩১শে ডিসেম্বর তারিখে একটি মসজিদ নির্মিত হয়েছিল (Dani, Bibliography of the Muslim Inscriptions of Bengal, p. 10 দ্রষ্টব্য)। ‘রিয়াজ-উস-সলাতীনে’র মতে ফিরোজ শাহ যখন একডালা দুর্গ অবরোধ করেছিলেন, সেই সময়ে শেখ রাজা বিয়াবানির মৃত্যু হয় এবং ইলিয়াস শাহ অসীম বিপদের ঝুঁকি নিয়ে ফকীরের ছদ্মবেশে একডালা দুর্গ থেকে বেরিয়ে তাঁর অন্ত্যেষ্টিক্রিয়ার অস্থানে যোগদান করেন।

‘তবকাং-ই-আকবরী’ ও ‘রিয়াজ-উস-সলাতীনে’ লেখা আছে যে, জনসাধারণকে সন্তুষ্ট করা ও সৈন্যবাহিনীর হৃদয় জয় করার জন্ত ইলিয়াস শাহ আপ্রাণ চেষ্টা করতেন। ‘রিয়াজ’-এর মতে ইলিয়াস দিল্লীর শামসী স্নানাগারের অনুরূপ একটি স্নানাগার নির্মাণ করেছিলেন।

জিয়াউদ্দীন বারনি এবং অন্যান্য সমসাময়িক ও পরবর্তী ঐতিহাসিকেরা লিখেছেন যে ইলিয়াস শাহ ভাঙ বা সিদ্ধির নেশা করতেন। একথা সত্য বলেই মনে হয়। পরবর্তীকালে লেখা বহু গ্রন্থে ইলিয়াস শাহের নামের সঙ্গে ‘ভাঙ্গরা’ নামে একটি উপাধি বা উপনাম যুক্ত দেখা যায়। ‘রিয়াজ-উস-সলাতীনে’র মতে ইলিয়াস শাহ অত্যধিক পরিমাণে ভাঙ খেতেন বলে ‘স্বলতান শামসুদ্দীন ভাঙ্গরা’ নামে পরিচিত ছিলেন। ডঃ আহমদ হাসান দানী একথা বিশ্বাস করেন না, কারণ ‘তারিখ-ই-ফরিশতা’য় লেখা আছে যে ইলিয়াস শাহ সিংহাসনে আরোহণ করে নিজেই ‘স্বলতান শামসুদ্দীন ভাঙ্গরা’ উপাধি গ্রহণ করেন। কিন্তু ফরিশতার কথা যে সত্য, তার কোন প্রমাণ নেই। ডঃ দানী মনে করেন ‘স্বলতান শামসুদ্দীন বাঙ্গালাহ্’ বিকৃত হয়ে ‘স্বলতান ভাঙ্গরা (বা ভাঙ্গরা)’য় পরিণত হয়েছে। এখানে উল্লেখযোগ্য, শামসু-ই-সিরাজ আফিফ ইলিয়াস শাহকে ‘শাহ-ই-বাঙ্গালাহ্’ উপাধিতে অভিহিত

করেছেন। ‘সিরাৎ-ই-ফিরোজ শাহী’র মতে ইলিয়াস শুধু ভাঙখোর ছিলেন না, কুষ্ঠরোগীও ছিলেন এবং কুষ্ঠরোগ থেকে মুক্ত হবার জন্ত তিনি বহু রাইচের সিপাহসালার শেখ মসুদ গাজীর সমাধির ধূলি সর্বাঙ্গে লেপন করেন। কিন্তু ‘সিরাৎ-ই-ফিরোজ শাহী’ ইলিয়াস শাহের শত্রুপক্ষের লোকের লেখা, কাজেই তার উক্তি কতখানি সত্য আর কতখানি বিদ্বেষপ্রণোদিত, তা বলা কঠিন। ফিরোজ শাহের অসুস্থত লোকদের লেখা বইগুলিতে ইলিয়াস শাহের চরিত্রে নানাভাবে কালিমা লেপন করা হয়েছে, বলা বাহুল্য তার অধিকাংশই বিশ্বাসযোগ্য নয়।

শামসুদ্দীন ইলিয়াস শাহের ৭৫৮ হিজরা অবধি তারিখের মুদ্রা পাওয়া গিয়েছে। ৭৫৯ হিজরা থেকে তাঁর পুত্র সিকন্দর শাহের মুদ্রা পাওয়া যাচ্ছে। সমসাময়িক গ্রন্থ ‘সিরাৎ-ই-ফিরোজ শাহী’ এবং কিঞ্চিৎ পরবর্তী গ্রন্থ ‘তারিখ-ই-মুবরক শাহী’তে লেখা আছে যে ইলিয়াস শাহ ৭৫৯ হিজরায় পরলোক গমন করেন। এ’ কথার সত্যতা সম্বন্ধে সন্দেহের কোন অবকাশ নেই।

‘তবকাৎ-ই-আকবরী’ ও ‘রিয়াজ-উস-সলাতীন’র মতে ইলিয়াস শাহ তাঁর মৃত্যুর কিছুদিন আগে মালিক তাজুদ্দীন এবং আরও কয়েকজন অমাত্যের হাত দিয়ে দিল্লীতে ফিরোজ শাহের কাছে বহু উপহার পাঠিয়েছিলেন। ফিরোজ শাহ এই দূতদের আগের দূতদের চেয়েও বেশী যত্ন করে কিছুদিন পরে তাঁর হাতীশালার অধ্যক্ষ (“শাহনাফীল”) মালিক সৈফুদ্দীন মারফৎ ইলিয়াস শাহকে আরবী ও তুর্কী ঘোড়া এবং আরও নানারকমের উপহার পাঠিয়েছিলেন। ইতিমধ্যে বাংলাদেশে ইলিয়াস শাহের মৃত্যু হয়। মালিক তাজুদ্দীন ও মালিক সৈফুদ্দীন বিহারে পৌঁছে এই খবর পান। সৈফুদ্দীন দিল্লীতে ইলিয়াসের মৃত্যু-সংবাদ পাঠালেন এবং ফিরোজ শাহের আদেশ অনুসারে ঘোড়া ও উপহারগুলি বিহারে অবস্থিত ফিরোজ শাহের সৈন্যদের বেতনের বদলে বণ্টন করে দিলেন। মালিক তাজুদ্দীন বাংলাদেশে ফিরে গেলেন।

শামসুদ্দীন ইলিয়াস শাহের মুদ্রাগুলি ফিরোজাবাদ (পাণ্ডুয়া), সাতগাঁও, সোনারগাঁও এবং শহর-ই-নৌ নামে একটি অজ্ঞাত স্থানের টাকশাল থেকে উৎকর্ণ হয়েছিল। “শহর-ই-নৌ” সম্ভবত নিকলো দা কস্তির ভ্রমণ-বিবরণে উল্লিখিত গঙ্গাতীরে অবস্থিত “শেরনোব” শহরের সঙ্গে অভিন্ন। ইলিয়াস শাহের এ পর্যন্ত একটি মাত্র শিলালিপি আবিষ্কৃত হয়েছে, সেটি কলকাতার বেনিয়াপুকুরের একটি আধুনিক মসজিদে বসানো আছে, মূলে এটি অক্ষত ছিল।

## সিকন্দর শাহ

সিকন্দর শাহ ইলিয়াস শাহের স্ত্রীযোগ্য পুত্র ও উত্তরাধিকারী। পিতার মৃত্যুর পরে তিনি নির্বিঘ্নে ও সর্বসম্মতিক্রমে সিংহাসনে আরোহণ করেন। 'তবকাৎ-ই-আকবরী'র মতে সিকন্দর শাহ ইলিয়াস শাহের মৃত্যুর পরে তৃতীয় দিনে সিংহাসনে আরোহণ করেন এবং দম্মা ও জায়বিচারের বাণী ঘোষণা করে রাজকর্তব্য গ্রহণ করেন। তাঁর রাজত্বকালেও দিল্লীর সম্রাট ফিরোজ শাহ বাংলাদেশ জয় করতে আসেন, কিন্তু ব্যর্থ হয়ে সন্ধি করে ফিরে যান। সুদীর্ঘ তেত্রিশ বছর তিনি রাজত্ব করেছিলেন। বাংলাদেশের আর কোন মুসলমান নৃপতি বা শাসনকর্তা সিকন্দর শাহের মত এত দীর্ঘকাল এ দেশ শাসন করেন নি। পিতার মত তিনিও অসামান্য প্রতিভা ও দক্ষতার অধিকারী ছিলেন। কিন্তু দুঃখের বিষয়, এই অনন্তসাধারণ নৃপতির সম্বন্ধে বিশেষ কোন তথ্যই জানা যায় না।

শাম্-ই-সিরাজ আফিফের লেখা 'তারিখ-ই-ফিরোজ শাহী' এবং অজ্ঞাত-নামা ব্যক্তির লেখা 'সিরাত-ই-ফিরোজ শাহী'তে ফিরোজ শাহ তোগলক এবং সিকন্দর শাহের সংঘর্ষের বিস্তৃত বিবরণ পাওয়া যায়। শাম্-ই-সিরাজ আফিফের বিবরণে খুঁটিনাটি তথ্য বেশী পাওয়া যায়। কিন্তু তার মধ্যে কিছু কিছু ভুল আছে। আফিফ লিখেছেন যে ফখরুদ্দীন মুবারক শাহের জামাতা জাফর খানের অহুরোধে ফিরোজ শাহ বাংলাদেশে দ্বিতীয়বার অভিযান করেন; ফিরোজ শাহ বাংলাদেশে তাঁর প্রথম অভিযানের পর দিল্লীতে ফিরে গেলে ইলিয়াস শাহ ফখরুদ্দীনের উপর প্রতিশোধ নেবার মংলব করে নৌকোয় চড়ে কয়েকদিনের মধ্যে সোনারগাঁওয়ে পৌঁছোন এবং বিপদের ভয় থেকে নিশ্চিন্ত ফখরুদ্দীনকে জীবিত অবস্থায় বন্দী করে অবিলম্বে বধ করেন ও তাঁর রাজ্য অধিকার করেন, ফখরুদ্দীনের সমস্ত বন্ধু ও অহুচররা ছত্রভঙ্গ হয়ে পড়ে; জাফর খান এই সময় শুক আদায় এবং শুক সংগ্রাহকদের হিসাবপত্র পরীক্ষার কাজে ব্যস্ত ছিলেন। তিনি সমস্ত খবর শুনে সোনারগাঁও থেকে পলায়ন করেন এবং নানা পথ ঘুরে অনেক কষ্টে জলপথে খাট্টায় ও সেখান থেকে দিল্লীতে পৌঁছে ফিরোজ শাহকে সমস্ত কথা নিবেদন করেন; ফিরোজ শাহ তাঁকে প্রচুর অর্থ, সম্মান ও উচ্চ রাজপদ দান করেন এবং পরিশেষে, যাতে জাফর খান শত্রুর রাজ্যের অধীশ্বর হতে পারেন, তার জন্ত স্বয়ং ইলিয়াস শাহের বিরুদ্ধে যুদ্ধ যাত্রা করেন। কিন্তু ফিরোজ শাহের প্রথম বাংলা-অভিযান ১৫৫



হিজরাতে শেষ হয়; আর ফখরুদ্দীন ৭৫০ হিজরায় পরলোক গমন করেছিলেন, কারণ তাঁর ৭৫০ হিঃ পর্যন্তই মৃত্যু পাওয়া গিয়েছে; ৭৫০ হিঃ থেকে ৭৫৩ হিঃ পর্যন্ত তাঁর পুত্র ইখতিয়ারুদ্দীন গাজী শাহের মৃত্যু পাওয়া যাচ্ছে। ৭৫৩ হিঃ থেকে ৭৫৮ হিঃ পর্যন্ত একটানা সোনারগাঁও টাকশাল থেকে উৎকীর্ণ ইলিয়াস শাহের মৃত্যু পাওয়া যাচ্ছে! অতএব ইলিয়াস শাহ ৭৫৫ হিজরায় ফখরুদ্দীনকে বন্দী ও নিহত করে তাঁর রাজ্য অধিকার করতে পারেন না। তিনি আসলে উচ্ছেদ (ও সম্ভবত বধ) করেছিলেন ফখরুদ্দীনের পুত্র ইখতিয়ারুদ্দীন গাজী শাহকে এবং এই ঘটনা ঘটেছিল ৭৫৩ হিজরায়—ফিরোজ শাহের প্রথম গোড়-অভিযানের আগেই। সুতরাং শাম্-ই-সিরাজ আফিফ এক্ষেত্রে ভুল করেছেন, তাঁর পক্ষে এই জাতীয় ভুল করা খুবই স্বাভাবিক, কারণ ফিরোজ শাহের বঙ্গাভিযান সম্বন্ধে তাঁর কোন প্রত্যক্ষ জ্ঞান ছিল না; ঐ সময়ে তিনি হয় জন্মান নি বা হয় নিতান্ত বালক ছিলেন। [ শাম্-ই-সিরাজ-আফিফ ‘তারিখ-ই-ফিরোজ শাহী’তে লিখেছেন যে ফিরোজ শাহ ৭০২ হিঃ বা ১৩০২ খ্রীষ্টাব্দে জন্মগ্রহণ করেন এবং তাঁর নিজের পিতামহ শাম্-ই-শহাব-আফিফ ও ফিরোজ শাহ একই দিনে জন্মান (Tarikh-i-Firoz Shahi, Eng. Translation, 1953, pp. 3, 5 দ্রষ্টব্য)। অতএব ৭৫২ হিজরা বা ১৩৫৮ খ্রীষ্টাব্দে ফিরোজ শাহের দ্বিতীয় বঙ্গাভিযানের সময় ফিরোজ শাহ ও শাম্-ই-শহাব আফিফ দুজনেরই বয়স ৪২ বছর ছিল। সুতরাং শাম্-ই-শহাব আফিফের পৌত্র শাম্-ই-সিরাজ আফিফ ঐ সময়ে জন্মান নি বা জন্মালেও নিতান্ত বালক ছিলেন। ] শাম্-ই-সিরাজ আফিফের পিতা ফিরোজ শাহের বঙ্গাভিযানের সময় ফিরোজ শাহের “খওয়াস” (attendant) ছিলেন, তাঁর কাছে শুনে আফিফ এই ঘটনাগুলি লিপিবদ্ধ করেছেন। অবশ্য জাফর খান যে ফিরোজ শাহের কাছে গিয়ে সাহায্য প্রার্থনা করেছিলেন এবং ফিরোজ শাহ যে জাফর খানের দাবী পূরণ করার অজুহাত দেখিয়ে বাংলাদেশে দ্বিতীয়বার অভিযান করেছিলেন, তাতে কোন সন্দেহ নেই। আসলে ইখতিয়ারুদ্দীন গাজী শাহকে উচ্ছেদ করে ইলিয়াস শাহ সোনারগাঁও অধিকার করার বেশ কিছুদিন পরে জাফর খান দিল্লীতে যান।

শাম্-ই-সিরাজ আফিফ ফিরোজ শাহের দ্বিতীয় বঙ্গাভিযানের যে বিবরণ দিয়েছেন, নীচে তার সংক্ষিপ্তসার দেওয়া হল।

যখন বাংলার সুলতান শামসুদ্দীন শুনলেন যে ফিরোজ শাহ তাঁর বিরুদ্ধে

অভিযানের প্রস্তুতি করছেন, তখন তিনি ভয় পেলেন এবং একডালায় থাকা তাঁর পক্ষে আর সম্ভব হবে না বুঝে সোনারগাঁওয়ে চলে যাওয়া উচিত মনে করলেন, কারণ ঐ জায়গা বাংলার কেন্দ্রস্থলে অবস্থিত এবং সেখানে তিনি শত্রুর আক্রমণ থেকে নিরাপদ হতে পারবেন। তিনি সেখানেই গেলেন, কিন্তু সেখানকার লোকেরা তাঁর অত্যাচার থেকে মুক্তি পাবার জন্য ফিরোজ শাহকে আবেদন জানিয়ে পীড়াপীড়ি করতে লাগল। ফিরোজ শাহও তখন সসৈন্তে বাংলার দিকে রওনা হলেন।

ফিরোজ শাহের প্রথম অভিযানের মত দ্বিতীয় অভিযানেও বিরাট ও শক্তিশালী সৈন্যবাহিনী গেল। তাঁর বাহিনীতে ৭০,০০০ ঘোড়সওয়ার, ৪৭০টি রণহস্তী এবং বহু নৌকা ছিল; যে সব তাঁবু গেল, তাঁর মধ্যে দুটি বাইরের তাঁবু, দুটি অভ্যর্থনা করবার তাঁবু, দুটি যুঁমোবার তাঁবু এবং দুটি রান্না-বান্না প্রভৃতি সাংসারিক কাজ করবার তাঁবু ছিল। তাঁর বাহিনীতে ১৮০টি নানা ধরনের পতাকা, ৮৪টি গাধার পিঠে বোঝাই তুর্ঘ ও দামামা এবং বহু উট, গাধা ও ঘোড়া ছিল।

কনৌজ, অযোধ্যা ও জোনপুর হয়ে ফিরোজ শাহ বাংলাদেশে এসে পৌঁছোলেন। ইতিমধ্যে সুলতান শামসুদ্দীন ইলিয়াস শাহ মারা গিয়েছিলেন এবং তাঁর পুত্র সিকন্দর শাহ রাজা হয়েছিলেন। তিনি দুর্ভেদ্য ও জলবেষ্টিত একডালা দুর্গে আশ্রয় নিলেন। ফিরোজ শাহের বাহিনী ঐ দুর্গ বেটন করে রইল এবং কাঠের বাড়ী তৈরী করে বাস করতে লাগল। দু'পক্ষই যুদ্ধের জন্য প্রস্তুত হল এবং চারদিকে আবাদ (শূল ক্ষেপণের যন্ত্র) ও মঞ্জানিক (শর ক্ষেপণের যন্ত্র) স্থাপন করল। উভয় দলে তীর ও বর্ষম ছোঁড়াছুঁড়ি চলতে লাগল। সিকন্দর শাহের পক্ষের লোকেরা ভয়ে দুর্গের ভিতর থেকে বেরোতে পারত না। কিন্তু হঠাৎ একদিন সিকন্দরিয়্য দুর্গের (সিকন্দরের দুর্গ অর্থাৎ একডালা) একটি প্রধান প্রাকার অত্যধিক লোকের ভার সহিতে না পেরে ধ্বসে পড়ল। তার ফলে উভয় পক্ষেরই মধ্যে তুমুল চীৎকার উঠল এবং তারা যুদ্ধের জন্য তৈরী হল। হিশামুলমুলক সুলতান ফিরোজ শাহকে এই সুযোগে দুর্গ আক্রমণ ও অধিকার করে নিতে বললেন। কিন্তু ফিরোজ শাহ বললেন যে এখন অত্যধিক আক্রমণ করে দুর্গ অধিকার করলে নিষ্ঠুর ও অভয় লোকদের হাতে সম্ভ্রান্ত মহিলাদের অমর্যাদা ঘটবে। তাই ভগবানের উপর বিশ্বাস রেখে অপেক্ষা করাই ভাল। তাঁর লোকেরা

হিজরাতে শেষ হয়; আর ফখরুদ্দীন ৭৫০ হিজরায় পরলোক গমন করেছিলেন, কারণ তাঁর ৭৫০ হিঃ পর্যন্তই মুদ্রা পাওয়া গিয়েছে; ৭৫০ হিঃ থেকে ৭৫৩ হিঃ পর্যন্ত তাঁর পুত্র ইখতিয়ারুদ্দীন গাজী শাহের মুদ্রা পাওয়া যাচ্ছে। ৭৫৩ হিঃ থেকে ৭৫৮ হিঃ পর্যন্ত একটানা সোনারগাঁও টাকশাল থেকে উৎকীর্ণ ইলিয়াস শাহের মুদ্রা পাওয়া যাচ্ছে! অতএব ইলিয়াস শাহ ৭৫৫ হিজরায় ফখরুদ্দীনকে বন্দী ও নিহত করে তাঁর রাজ্য অধিকার করতে পারেন না। তিনি আসলে উচ্ছেদ (ও সম্ভবত বধ) করেছিলেন ফখরুদ্দীনের পুত্র ইখতিয়ারুদ্দীন গাজী শাহকে এবং এই ঘটনা ঘটেছিল ৭৫৩ হিজরায়—ফিরোজ শাহের প্রথম গোড়-অভিযানের আগেই। সুতরাং শাম্‌স্-ই-সিরাজ আফিক এক্ষেত্রে ভুল করেছেন, তাঁর পক্ষে এই জাতীয় ভুল করা খুবই স্বাভাবিক, কারণ ফিরোজ শাহের বঙ্গাভিযান সম্বন্ধে তাঁর কোন প্রত্যক্ষ জ্ঞান ছিল না; ঐ সময়ে তিনি হয় জন্মান নি না হয় নিতান্ত বালক ছিলেন। [শাম্‌স্-ই-সিরাজ-আফিক 'তারিখ-ই-ফিরোজ শাহী'তে লিখেছেন যে ফিরোজ শাহ ৭০২ হিঃ বা ১৩০২ খ্রীষ্টাব্দে জন্মগ্রহণ করেন এবং তাঁর নিজের পিতামহ শাম্‌স্-ই-শাহাব-আফিক ও ফিরোজ শাহ একই দিনে জন্মান (Tarikh-i-Firoz Shahi, Eng. Translation, 1953, pp. 3, 5 দ্রষ্টব্য)। অতএব ৭৫২ হিজরা বা ১৩৫৮ খ্রীষ্টাব্দে ফিরোজ শাহের দ্বিতীয় বঙ্গাভিযানের সময় ফিরোজ শাহ ও শাম্‌স্-ই-শাহাব আফিক দুজনেরই বয়স ৪২ বছর ছিল। সুতরাং শাম্‌স্-ই-শাহাব আফিকের পৌত্র শাম্‌স্-ই-সিরাজ আফিক ঐ সময়ে জন্মান নি বা জন্মালেও নিতান্ত বালক ছিলেন।] শাম্‌স্-ই-সিরাজ আফিকের পিতা ফিরোজ শাহের বঙ্গাভিযানের সময় ফিরোজ শাহের “খওয়াস” (attendant) ছিলেন, তাঁর কাছে শুনে আফিক এই ঘটনাগুলি লিপিবদ্ধ করেছেন। অবশ্য জাফর খান যে ফিরোজ শাহের কাছে গিয়ে সাহায্য প্রার্থনা করেছিলেন এবং ফিরোজ শাহ যে জাফর খানের দাবী পূরণ করার অজুহাত দেখিয়ে বাংলাদেশে দ্বিতীয়বার অভিযান করেছিলেন, তাতে কোন সন্দেহ নেই। আসলে ইখতিয়ারুদ্দীন গাজী শাহকে উচ্ছেদ করে ইলিয়াস শাহ সোনারগাঁও অধিকার করার বেশ কিছুদিন পরে জাফর খান দিল্লীতে যান।

শাম্‌স্-ই-সিরাজ আফিক ফিরোজ শাহের দ্বিতীয় বঙ্গাভিযানের যে বিবরণ দিয়েছেন, নীচে তার সংক্ষিপ্তসার দেওয়া হল।

যখন বাংলার সুলতান শাম্‌সুদ্দীন শুনলেন যে ফিরোজ শাহ তাঁর বিরুদ্ধে

অভিযানের প্রস্তুতি করছেন, তখন তিনি ভয় পেলেন এবং একডালায় থাকা তাঁর পক্ষে আর সম্ভব হবে না বুঝে সোনারগাঁওয়ে চলে যাওয়া উচিত মনে করলেন, কারণ ঐ জায়গা বাংলার কেন্দ্রস্থলে অবস্থিত এবং সেখানে তিনি শত্রুর আক্রমণ থেকে নিরাপদ হতে পারবেন। তিনি সেখানেই গেলেন, কিন্তু সেখানকার লোকেরা তাঁর অত্যাচার থেকে মুক্তি পাবার জন্ত ফিরোজ শাহকে আবেদন জানিয়ে পীড়াপীড়ি করতে লাগল। ফিরোজ শাহও তখন সসৈন্তে বাংলার দিকে রওনা হলেন।

ফিরোজ শাহের প্রথম অভিযানের মত দ্বিতীয় অভিযানেও বিরাট ও শক্তিশালী সৈন্যবাহিনী গেল। তাঁর বাহিনীতে ১০,০০০ ঘোড়সওয়ার, ৪১০টি রণহস্তী এবং বহু নৌকা ছিল; যে সব তাঁবু গেল, তাঁর মধ্যে দুটি বাইরের তাঁবু, দুটি অভ্যর্থনা করবার তাঁবু, দুটি ঘুমোবার তাঁবু এবং দুটি রান্না-বান্না প্রভৃতি সাংসারিক কাজ করবার তাঁবু ছিল। তাঁর বাহিনীতে ১৮০টি নানা ধরণের পতাকা, ৮৪টি গাধার পিঠে বোঝাই তুর্ষ ও দামামা এবং বহু উট, গাধা ও ঘোড়া ছিল।

কনৌজ, অযোধ্যা ও জৌনপুর হয়ে ফিরোজ শাহ বাংলাদেশে এসে পৌঁছোলেন। ইতিমধ্যে সুলতান শামসুদ্দীন ইলিয়াস শাহ মারা গিয়েছিলেন এবং তাঁর পুত্র সিকন্দর শাহ রাজা হয়েছিলেন। তিনি দুর্ভেদ্য ও জলবেষ্টিত একডালা দুর্গে আশ্রয় নিলেন। ফিরোজ শাহের বাহিনী ঐ দুর্গ বেটন করে রইল এবং কাঠের বাড়ী তৈরী করে বাস করতে লাগল। দু'পক্ষই যুদ্ধের জন্ত প্রস্তুত হল এবং চারদিকে আবাদা (শূল ক্ষেপণের যন্ত্র) ও মল্লানিক (শর ক্ষেপণের যন্ত্র) স্থাপন করল। উভয় দলে তীর ও বল্লম ছোঁড়াছুঁড়ি চলতে লাগল। সিকন্দর শাহের পক্ষের লোকেরা ভয়ে দুর্গের ভিতর থেকে বেরোতে পারত না। কিন্তু হঠাৎ একদিন সিকন্দরিয়্য দুর্গের (সিকন্দরের দুর্গ অর্থাৎ একডালা) একটি প্রধান প্রাকার অত্যধিক লোকের ভার সহিতে না পেরে ধসে পড়ল। তার ফলে উভয় পক্ষেরই মধ্যে তুমুল চীৎকার উঠল এবং তারা যুদ্ধের জন্ত তৈরী হল। হিসামুলমূলক সুলতান ফিরোজ শাহকে এই সুযোগে দুর্গ আক্রমণ ও অধিকার করে নিতে বললেন। কিন্তু ফিরোজ শাহ বললেন যে এখন অতিক্রম আক্রমণ করে দুর্গ অধিকার করলে নিঃশর ও অভয় লোকদের হাতে সম্ভ্রান্ত মহিলাদের অমর্যাদা ঘটবে। তাই ভগবানের উপর বিশ্বাস রেখে অপেক্ষা করাই ভাল। তাঁর লোকেরা

দুর্গ আক্রমণের জন্ত প্রস্তুত হয়েছিল, কিন্তু ধৈর্যের সঙ্গে তারা স্থলতানের আদেশ মেনে নিল।

এদিকে “কালোদের রাজা” সিকন্দর শাহের উৎসাহী বাঙালী মিস্ত্রীরা সারারাত্রি খেটে বিশ্বস্ত প্রাকার মেরামত করে ফেলল। একডাল দুর্গ কাদামাটি দিয়ে তৈরী ছিল বলে এত কম সময়ের মধ্যেই প্রাকারটি মেরামত করে ফেলা সম্ভব হল। তারপর দু'পক্ষে তুমুল যুদ্ধ চলতে লাগল, যা ভাষায় বর্ণনা করা যায় না। অবশেষে দুর্গে খাণ্ড ফুরিয়ে গেল। বাঙালীরা উৎকণ্ঠিত হয়ে উঠল। কিন্তু দু'পক্ষই যুদ্ধ করে ক্লান্ত হয়ে পড়েছিল। তাই দুই স্থলতান সন্ধি কামনা করলেন। সিকন্দর শাহ তাঁর মন্ত্রীদেবর সঙ্গে পরামর্শ করলেন। তাঁরা ফিরোজ শাহের কাছে সন্ধির প্রস্তাব করে দূত পাঠাতে চাইলেন। সিকন্দর শাহ নিরুত্তর রইলেন, কিন্তু তাঁর মন্ত্রীরা মৌনতাকেই সম্মতির লক্ষণ জ্ঞান করে ফিরোজ শাহের কাছে একজন চতুর ও বিশ্বস্ত দূত পাঠিয়ে বললেন যে যুদ্ধাশ্রম দুই পক্ষই যখন মুসলমান, তখন তাঁদের মধ্যে সন্ধি স্থাপিত হওয়াই উচিত। ফিরোজ শাহ বললেন যে সন্ধি করতে তাঁর আপত্তি নেই, তবে জাফর খানকে সোনারগাঁওয়ের রাজা করতে হবে এই তাঁর একমাত্র সর্ত। ফিরোজ শাহের সিদ্ধান্ত শুনে তাঁর মন্ত্রীরা সিকন্দর শাহের কাছে হৈবৎ খান নামে একজন দূত পাঠালেন। হৈবৎ খানের বাড়ী ছিল বাংলায় এবং তাঁর দুই পুত্র সিকন্দর শাহের অধীনে চাকরী করতেন। হৈবৎ খানের কাছে প্রস্তাব শুনে সিকন্দর শাহ প্রথমে এসম্বন্ধে কিছু না জানার ভান করলেন। কিন্তু সুকোশলী ও মিষ্টভাষী হৈবৎ খান তাঁকে ভাল করে সমস্ত বুঝিয়ে বলে ফিরোজ শাহের প্রদত্ত সর্ত অনুযায়ী সন্ধি করতে রাজী করালেন। সিকন্দর তখন বললেন জাফর খানকে সোনারগাঁওয়ে পুনঃপ্রতিষ্ঠিত করবার জন্তে ফিরোজ শাহের নিজের আশ্রয় কী দরকার ছিল, তিনি দিল্লী থেকে সিকন্দরকে আদেশ পাঠালেই তো সিকন্দর জাফর খানকে সোনারগাঁও ছেড়ে দিতেন!

হৈবৎ খান ফিরোজ শাহের কাছে ফিরে গিয়ে তাঁকে সমস্ত কথা জানালেন। সব কথা শুনে ফিরোজ শাহ খুশী হয়ে বললেন যে তিনি সিকন্দর শাহের সঙ্গে সন্ধি করবেন এবং তাঁকে তিনি নিজের ভ্রাতৃপুত্রের মত জ্ঞান করবেন। তারপর হৈবৎ খানের পরামর্শ অনুযায়ী তিনি সিকন্দর শাহকে উপহার পাঠালেন। ফিরোজ শাহ মালিক কাবুল বা তোরাবান্দ খানের হাত দিয়ে ৮০,০০০ টকা দামের একটি মুকুট এবং ৫০০ আরবী ও তুর্কী ঘোড়া একডাল

দুর্গে পাঠালেন। সেই সঙ্গে এই ইচ্ছা প্রকাশ করলেন যে তাঁর এবং সিকন্দরের মধ্যে আর যুদ্ধ হবে না। ইক্কান্দরের (অর্থাৎ সিকন্দরের) দুর্গের পরিখা ২০ গজ চওড়া ছিল, তা সবেও মালিক কাবুল ঘোড়া চড়ে তা লাফ দিয়ে পার হয়ে গেলেন এবং দুর্গের মধ্যে প্রবেশ করলেন। সিকন্দর শাহের সভায় গিয়ে মালিক কাবুল সাতবার সিকন্দরের সিংহাসন প্রদক্ষিণ করলেন এবং তাঁর মাথায় মুকুট ও বুকে সন্মান-উত্তরীয় পরিয়ে দিলেন। সুলতান সিকন্দর সন্তুষ্ট হয়ে চল্লিশটি হাতী এবং আরও নানা মূল্যবান উপহার পাঠালেন এবং এই কামনা প্রকাশ করলেন যে এখন থেকে প্রতি বছর দুই সুলতানের মধ্যে সৌভ্রাতৃ ও বন্ধুত্বের নিদর্শনস্বরূপ উপহার-বিনিময় চলতে থাকবে। যতদিন ফিরোজ শাহ ও সিকন্দর শাহ বেঁচে ছিলেন, ততদিন দু'জনের মধ্যে উপহার-বিনিময় চলেছিল।

সিকন্দর শাহের প্রেরিত উপহার পেয়ে ফিরোজ শাহ খুব খুশী হলেন। অতঃপর তিনি জাফর খানকে ডাকিয়ে পাঠিয়ে তাঁকে সোনারগাঁওয়ে গিয়ে সেখানকার রাজপদ গ্রহণ করার নির্দেশ দিলেন। এও বললেন যে জাফর খানের নিরাপত্তার জ্ঞাত্তি তিনি তাঁর সমগ্র সৈন্যবাহিনী নিয়ে যেখানে আছেন, সেখানেই কিছু সময় অবস্থান করবেন, ইতিমধ্যে জাফর খান সোনারগাঁওয়ে স্থপতিষ্ঠিত হয়ে যাবেন। জাফর খান তাঁর বন্ধুদের সঙ্গে পরামর্শ করলেন। তাঁরা সকলেই বললেন জাফর খানের পক্ষে সোনারগাঁওয়ে থাকতে পারা একেবারেই অসম্ভব, কারণ তাঁর আত্মীয় ও বন্ধুবান্ধবেরা কেউই বেঁচে নেই, সকলেই বিনষ্ট হয়েছে। জাফর খান তখন ফিরোজ শাহের কাছে ফিরে গিয়ে জানালেন যে দিল্লীতেই তিনি ও তাঁর পরিবার নিরাপদে থাকতে পারবেন, তাই সোনারগাঁওয়ের রাজা হবার বাসনা আর তাঁর নেই, তার বদলে তিনি তাঁর বর্তমান অবস্থাতেই পরিতুষ্ট থেকে শান্তিতে জীবন কাটাতে চান। একথা শুনে ফিরোজ শাহ সন্তুষ্ট হলেন এবং সৈন্যবাহিনী নিয়ে বাংলাদেশ থেকে প্রথমে জৌনপুর ও পরে 'জাজনগর বা উড়িয়ার দিকে গেলেন। তাঁর এই দ্বিতীয় বঙ্গাভিযান শেষ হতে দু' বছর সাত মাস সময় লেগেছিল।

আফিফের বিবরণ মোটামুটিভাবে বিশ্বাসযোগ্য, তবে এই বিবরণের একভালা দুর্গের গহ্বজ ধ্বংস পড়া ও মহিলাদের সন্ত্রম হানির ভয়ে ফিরোজ শাহের তা আক্রমণ করতে অস্বীকৃত হওয়া এবং সিকন্দর শাহের জাফর খানকে সোনারগাঁও ছেড়ে দিতে রাজী হওয়া প্রভৃতি প্রসঙ্গগুলি অমূলক বলে মনে হয়।

‘সিরাৎ-ই-ফিরোজ শাহী’র বিবরণ আফিফের বিবরণের তুলনায় সংক্ষিপ্ত,

কিন্তু এর মূল্য অল্প দিক দিয়ে বেশী, কারণ এই বইয়ের লেখক সম্ভবত ফিরোজ শাহ ও সিকন্দর শাহের যুদ্ধের প্রত্যক্ষদর্শী ছিলেন আর স্বয়ং ফিরোজ শাহের নির্দেশে এই বই লেখা হয়। 'সিরাৎ-ই-ফিরোজ শাহী'তে লেখা আছে যে শামসুদ্দীনের মৃত্যুর পর সুলতান সিকন্দর পিতৃ-সিংহাসনে আরোহণ করেন। যৌবনের ঔদ্ধত্যে তিনি তাঁর শুভাধীনের উপদেশ অগ্রাহ্য করে এবং আগেকার ইতিহাস ভুলে গিয়ে সম্রাট ফিরোজ শাহের কর্তৃত্ব অস্বীকার করেন। এই সময়ে পিণ্ডার খিলজী নামে ফিরোজ শাহের একজন কর্মচারী দিল্লীতে বিশ্বস্ত-ভাবে সুলতানের কাজ করে কাদির খান উপাধি এবং অধিকন্তু “বঙ্গ ও বাঙ্গালা” দেশের কর্তৃত্ব (!) লাভ করেন। ইলিয়াস শাহের এক পুত্র আলী শাহ এই পিণ্ডারের কর্মচারী ছিলেন এবং পিণ্ডার তাঁকে ভাইপো বলে ডাকতেন। (এর দ্বারা ‘সিরাৎ’-র চয়িতা বোঝাতে চাইছেন যে ফিরোজ শাহের কাছে সিকন্দর শাহ নিতান্ত তুচ্ছ ব্যক্তি। ইলিয়াস শাহের সিকন্দর শাহ ছাড়া অল্প কোন পুত্রের নাম একমাত্র এখানেই পাওয়া যায়।) এসব কথা ভুলে গিয়ে সিকন্দর যখন ফিরোজ শাহের কর্তৃত্ব অস্বীকার করলেন, তখন ফিরোজ শাহ তাঁকে শিক্ষা দিতে সঙ্কল্প করলেন। ফিরোজ শাহ তাঁর সভাসদদের জানালেন যে সিকন্দর রাজসিংহাসনে অধিষ্ঠিত থাকার অধিকার হারিয়েছেন এবং ৭৫২ হিজরায় (১৩৫৭-৫৮ খ্রিঃ) তিনি তাঁর বিরুদ্ধে যুদ্ধযাত্রা করলেন। ফিরোজ শাহ তাঁর বাহিনী নিয়ে বাংলায় পৌঁছোলেন এবং একডালা দুর্গ অবরোধ করলেন। তার ফলে সিকন্দর পরিশেষে বিবর্ণ হয়ে বৈরীভাব ত্যাগ করে দয়া ভিক্ষা করলেন। ফিরোজ শাহও তাঁকে ক্ষমা করে বললেন, “বুদ্ধিমান লোক কোন অবিজ্ঞোচিত কাজ করলে তাঁর শাস্তি দেবার সময় উদার ব্যবহার করা প্রয়োজন।” সিকন্দরের যে সমস্ত লোক বন্দী হয়েছিল, তাদের ফিরোজ শাহ মুক্তি দিলেন। সিকন্দরও ফিরোজ শাহকে বড় বড় হাতী ও অনেক সুন্দর উপহার পাঠালেন। সেই সঙ্গে তিনি জানালেন যে যারা মিছামিছি তাঁর উপর দোষ দিয়ে তাঁর নামে কোন কিছু প্রচার করেছে, তাদের উপযুক্ত অহুসঙ্কানের পর তিনি শাস্তি দিতে চান এবং দেশকে দুর্বৃত্তদের হাত থেকে মুক্ত করার ভার তিনিই নিচ্ছেন।

সুতরাং ফিরোজ শাহের প্রথম অভিযানের মত দ্বিতীয় অভিযানও ব্যর্থতায় পর্যবসিত হল। সিকন্দর তাঁর পিতারই মত যোগ্যতার পরিচয় দিয়ে ফিরোজ শাহের প্রচেষ্টা ব্যর্থ করলেন, উপরন্তু স্বাধীন ও সার্বভৌম নৃপতি হিসাবে

ফিরোজ শাহের কাছে স্বীকৃতি আদায় করে নিলেন। শাম্‌স-ই-সিরাজ আফি ও 'সিরাৎ-ই-ফিরোজ শাহী'র লেখক বলেছেন যে সিকন্দরই প্রথমে ফিরোজ শাহের কবীর প্রস্তাব করেছিলেন, কিন্তু এ-সম্বন্ধে সন্দেহের কারণ আছে। অন্তত 'সিরাৎ'-এ সিকন্দর শাহের যে দীনভাবে ক্রমা ভিকার বর্ণনা আছে, তা যে সত্য নয় তা বলাই বাহুল্য। সিকন্দর শাহ যদি সত্যিই এভাবে নত হতেন, তাহলে ফিরোজ শাহ বাংলাদেশে তাঁর সার্বভৌম অধিকার স্বীকার করতেন না, তাঁকে নিজের সামন্ত করে রাখতেন।

ফিরোজ শাহের এই দ্বিতীয় বঙ্গাভিযান যে ৭৫২ হিজরায় শুরু হয়েছিল এবং দু'বছর সাত মাস চলেছিল, তা যথাক্রমে 'সিরাৎ-ই-ফিরোজ শাহী' এবং শাম্‌স-ই-সিরাজ আফিরে বই থেকে জানা যায়। স্তবরাং ৭৬১ হিজরার শেষ দিক অথবা ৭৬২ হিজরার প্রথম দিকে এই অভিযান শেষ হয়েছিল। 'তবকাৎ-ই-আকবরী' প্রভৃতি পরবর্তীকালে রচিত ইতিহাস-গ্রন্থগুলিতে লেখা আছে যে ৭৬২ হিজরার রজব মাসে ফিরোজ শাহ দিল্লীতে প্রত্যাবর্তন করেন। একথা সত্য বলেই মনে হয়।

পরবর্তীকালে লেখা ইতিহাসগ্রন্থগুলিতে ফিরোজ শাহের এই দ্বিতীয় বঙ্গাভিযান সম্বন্ধে কয়েকটি নতুন কথা পাওয়া যায়। 'তারিখ-ই-মুবারক শাহী'তে লেখা আছে যে ৭৫২ হিজরার শেষ দিকে বাংলাদেশ থেকে দূতেরা ফিরোজ শাহের দরবারে উপঢোকন নিয়ে এসেছিল এবং তারপর ফিরোজ শাহ বাংলাদেশে অভিযান করেন। একথা সত্য হলে বলতে হবে, ফিরোজ শাহের অভিযানের প্রস্তুতি তার আগেই সম্পূর্ণ হয়েছিল, কিন্তু ফিরোজ শাহ বাংলার রাজদূতদের কিছুই বুঝতে দেননি এবং তারা চলে যাবার পরে তিনি বাংলার বিরুদ্ধে যুদ্ধযাত্রা করেন। কিন্তু 'তারিখ-ই-মুবারক শাহী'র এই সময় নির্দেশে ভুল আছে বলে মনে হয়। 'রিয়াজ-উন্-সলাতীনে'র মতে সিকন্দর শাহ সিংহাসনে আরোহণ করেই ফিরোজ শাহকে বিভিন্ন ধরনের ৫০টি হুশ্রাপ্য হাতী উপহার পাঠিয়েছিলেন। ফিরিশ্তা ও 'রিয়াজ'-এর মতে ফিরোজ শাহ যখন সিকন্দর শাহের বিরুদ্ধে যুদ্ধযাত্রা করেন, তখন বর্ষার জল গোমতী নদীর তীরে জাকরাদে তাঁকে অপেক্ষা করতে হয়েছিল; সেই সময় ফিরোজ শাহ সিকন্দর শাহের কাছে দূত পাঠান; সিকন্দর শাহ বুঝতে পারেন নি ফিরোজ শাহের আসার উদ্দেশ্য কী। এ সম্বন্ধে তাঁর মনে হুশিষ্টা ছিল, তাই তিনি পাঁচটি হাতী ও অগ্নি উপহার সমেত ফিরোজ শাহের কাছে দূত পাঠান, কিন্তু



তাতে কোন ফল হয়নি। 'তবকাং-ই-আকবরী' ও 'মস্তখব-উৎ-তওয়ারিখ' এর মতে জাফরাবাদ থেকে ফিরোজ শাহ সিকন্দর শাহের কাছে সৈয়দ রত্নদার নামে একজন দূত পাঠিয়েছিলেন।

সিকন্দর শাহের রাজত্বকালের আর কোন ঘটনার কথা জানা যায় না। তাঁর একটি অক্ষয় কীর্তি বিখ্যাত আদিনা মসজিদ নির্মাণ করা। স্থাপত্য-সৌন্দর্যের দিক দিয়ে এই মসজিদটি অতুলনীয়। ভারতবর্ষে নির্মিত সমস্ত মসজিদের মধ্যে এইটি আয়তনের দিক থেকে দ্বিতীয়। এর ধ্বংসাবশেষের মধ্যে বহু হিন্দু দেব-দেবীর মূর্তি ও হিন্দু মন্দিরের উপকরণ দেখতে পাওয়া যায়। এই কারণে, স্থলতানের আদেশে বিভিন্ন হিন্দু মন্দির ধ্বংস করে আদিনা মসজিদের উপকরণ সংগ্রহ করা হয়েছিল বলে অনেকে মনে করেন। এই অমুমান সত্য হলে বলতে হবে ধর্মের ব্যাপারে সিকন্দর শাহের মনোভাব খুব উদার ছিল না। কিন্তু ঐ অমুমান থেকে নিম্নোক্ত একটি সমস্তার সম্ভাষণ জনক সমাধান হয় না।

মুসলমান আমলে হিন্দু মন্দিরের উপকরণে যে সমস্ত মসজিদ তৈরী হত, তাতে সাধারণত দেব-দেবীর মূর্তিগুলিকে নিশ্চিহ্ন বা বিকৃত করা হত অথবা উলটে রাখা হত; কিন্তু আদিনা মসজিদের মধ্যে যেসব দেবদেবীর মূর্তি দেখতে পাওয়া যায়, তাদের অধিকাংশই অবিকৃত এবং সেগুলি সোজা ভাবেই বসানো আছে, তাদের অনেকগুলি—মসজিদের বাইরের দেওয়ালে ও ভিতরে বেশ ভাল জায়গায় প্রতিষ্ঠিত আছে। দ্বিতীয়ত, এই মসজিদের কয়েকটি দরজার উপরের প্যানেলে খুব স্নন্দরভাবে হিন্দু দেবতার মূর্তি খোদাই করা আছে; ঐ প্যানেল-গুলি বাইরের থেকে আনা হয়েছে বলে মনে করা শক্ত, কারণ এগুলি দরজার মাপের সঙ্গে অবিকল মিলে যায়, বাইরের থেকে আনা মূর্তি-সংবলিত প্যানেলকে দরজার মাপের সঙ্গে কৃত্রিমভাবে মেলানো হলে তার মধ্যে এমন সুষমতা ও পরিপূর্ণতা রক্ষা করা সম্ভব হত বলে মনে হয় না।

সুতরাং সিকন্দর শাহ হিন্দু-মন্দির ধ্বংস করিয়ে তার থেকে আদিনা মসজিদের উপকরণ সংগ্রহ করেছিলেন, এ কথা নিঃসংশয়ে বলা চলে না। উপরে যে ছটি সমস্তার উল্লেখ করা হয়েছে, তার সমাধান সম্বন্ধে পাওয়া অঞ্চলে প্রচলিত একটি পুরানো প্রবাদ থেকে খানিকটা ইঙ্গিত পাওয়া যায়; প্রবাদটি এই যে, রাজা গণেশ ক্ষমতা লাভের পরে আদিনা মসজিদকে তাঁর কাছারী-বাড়ীতে পরিণত করেছিলেন। এ সম্বন্ধে এইচ.এস. স্টেপলটন লিখেছিলেন, "It

may also be added with reference to the supposed connection of Rājā Kāns with the Eklākhi building that local tradition states that when the Rājā obtained supreme power over Bengal after the death of the short-lived successors of Ghiyāsuddīn, out of contempt for Muhammadanism he used the adjacent Adina mosque as his Kācherī (Magistrate's Court or Zamindārī Office)." (Memoirs of Gaur and Pandua, p. 126, f. n. )

এই প্রবাদ সত্য হওয়া অসম্ভব নয়। এই প্রবাদ যদি সত্য হয়, তাহলে এমন হতে পারে যে, আদিনা মসজিদ যখন প্রথম নির্মিত হয়, তখন তাতে কোন হিন্দু দেব দেবীর মূর্তি ছিল না ; রাজা গণেশ যখন ক্ষমতা লাভ করে আদিনা মসজিদকে কাছারীতে পরিণত করেছিলেন, সেই সময়ে তাঁরই আদেশে হয়ত এই মসজিদের মধ্যে দেবদেবীর মূর্তিগুলি খোদাই করা হয়েছিল। কিন্তু গণেশের মৃত্যুর পর আদিনা মসজিদ আবার মসজিদে পরিণত হয়। সমসাময়িক আরবী গ্রন্থকার 'ইব্ন-ই-হজর ( ১৩৭২-১৪৪২ খ্রীঃ ) তাঁর 'ইন্বা-উল-গুম্ব' বইয়ে লিখেছেন যে রাজা গণেশের পুত্র জলালুদ্দীন মুহম্মদ শাহ রাজা হবার পরে তাঁর পিতা ( অর্থাৎ গণেশ ) মসজিদ ও অগ্ন্যাগ্নি জিনিষ যা কিছু ধ্বংস করেছিলেন, সেগুলির সংস্কারসাধন করেন। সম্ভবত এইভাবে আদিনা মসজিদকেও আবার মসজিদে রূপান্তরিত করা হয়, কিন্তু দেবদেবীর মূর্তিগুলিকে আর অপসারণ করা হয়নি, এগুলি অপসারণ করলে আদিনা মসজিদের সৌন্দর্যহানি ঘটবে ভেবেই হয়তো জলালুদ্দীন ও তাঁর পরবর্তী মুসলমান সুলতানেরা এগুলিকে অব্যাহতি দিয়েছিলেন। এই যদি প্রকৃত ব্যাপার হয় তাহলে পূর্বোক্ত বিভিন্ন সমস্যার সমাধান হয়।

আদিনা মসজিদের পূর্ব, উত্তর ও দক্ষিণ দিক বর্তমানে প্রায় সম্পূর্ণ ধ্বংস-প্রাপ্ত। কেবল পশ্চিম দিকের অনেকখানি অংশ এখনও অক্ষত অবস্থায় রয়েছে। এত বিরাট ও এত সুন্দর মসজিদটি চারশো বছরও সম্পূর্ণ অক্ষত অবস্থায় থাকতে পারে নি, কারণ অষ্টাদশ শতাব্দীর শেষার্ধ্বে 'রিয়াজ'-রচয়িতা গোলাম হোসেন এর "কিছু চিহ্ন" মাত্র দেখেছিলেন।

আদিনা মসজিদের পশ্চিম দিকের বাইরের দেওয়ালে একটি শিলালিপি আছে, তাতে সিকন্দর শাহের রাজত্বকালে এই মসজিদ নির্মিত হওয়ার কথা

লেখা আছে। শিলালিপিটির তারিখ ৭৭০ হিজরার ৬ই রজব অর্থাৎ ১৪ই ফেব্রুয়ারী, ১৩৬৯ খ্রীষ্টাব্দ। কথিত আছে শিলালিপিটির ভাষা স্বয়ং সিকন্দর শাহের লেখনীনিঃসৃত। 'রিয়াজ'-রচয়িতা সিকন্দর শাহের রাজত্বকাল সম্বন্ধে ভ্রান্ত ধারণার বশবর্তী হয়ে লিখেছেন যে সিকন্দর শাহ আদিনা মসজিদ সম্পূর্ণ করে যেতে পারেন নি। কিন্তু উপরে উল্লিখিত শিলালিপির সাক্ষ্য থেকে নিশ্চিতভাবে প্রমাণিত হয় যে, সিকন্দর শাহের জীবদ্দশাতেই এই মসজিদ সম্পূর্ণ হয়েছিল, কারণ ঐ শিলালিপির তারিখের পরেও সিকন্দর-শাহ আরও একুশ বছর জীবিত ছিলেন। আদিনা মসজিদের পশ্চিম দিকে আগে একটি সমাধি ছিল। লোকে বলে এইটাই সিকন্দর শাহের সমাধি।

সিকন্দর শাহের ৭৫২ হিঃ থেকে ৭৯২ হিঃ পর্যন্ত বছরগুলিতে উৎকীর্ণ মুদ্রা পাওয়া যায়। ৭৯৩ হিঃ থেকে তাঁর পুত্র গিয়াসুদ্দীন আজম শাহের মুদ্রা পাওয়া যাচ্ছে। অতএব ৭৯২ বা ৭৯৩ হিজরায় যে সিকন্দর শাহের মৃত্যু ঘটেছিল, সে সম্বন্ধে কোন সন্দেহ নেই।

সিকন্দর শাহের মুদ্রাগুলি ফিরোজাবাদ (পাণ্ডুয়া), সোনারগাঁও, সাতগাঁও, মুন্সাজ্জমাবাদ, শহর-ই-নৌ এবং কামরূপের টাকশালে উৎকীর্ণ হয়েছিল। আজ অবধি এইসব জায়গায় তাঁর শিলালিপি পাওয়া গিয়েছে :—

দেবীকোট (দিনাজপুর), পাণ্ডুয়া (মালদহ) এবং মোল্লা সিমলা (হুগলী)।

এর থেকে তাঁর রাজ্যের সীমা সম্বন্ধে ধারণা করা যায়। মোল্লা সিমলার শিলালিপিতে স্থলতানের নাম নেই, তবে মুখলিশ খান নামে একজন রাজ-কর্মচারীর নাম পাওয়া যায়।

সিকন্দর শাহের প্রসঙ্গে আর একটি উল্লেখযোগ্য বিষয় এই যে, আজ অবধি কোন মুদ্রা, শিলালিপি বা আর কোন স্মৃতি তাঁর পূর্ণ রাজকীয় নাম পাওয়া যায় নি।

সিকন্দর শাহ তাঁর পিতা ইলিয়াস শাহেরই মত মুসলিম সাধুসন্তদের ভক্ত ছিলেন। দেবীকোটের বিখ্যাত সন্ত মখদুম মোলানা আতা ওয়াহিদুদ্দীন বা মোল্লা আতার সমাধিতে তিনি ৭৬৫ হিজরায় একটি মসজিদ নির্মাণ করিয়েছিলেন। তাঁর সমসাময়িক বিখ্যাত দরবেশ আলা অল-হকের সঙ্গেও তাঁর ঘনিষ্ঠ সম্বন্ধ ছিল। আকবর ও জাহাঙ্গীরের রাজত্বকালে রচিত মুসলিম সন্তদের জীবনীগ্রন্থ 'অখবার অল-অখিয়ার'-এর সাক্ষ্য বিশ্বাস করলে বলতে হয়, শেষের দিকে আলা অল-হকের সঙ্গে সিকন্দর শাহের বিরোধ ঘটে। এই

বইতে লেখা আছে যে আলা অল-হক বাংলার রাজধানী পাণ্ডুয়ায় ছাত্র, ভিক্ষুক ও পণ্ডিতদের খাওয়াবার জন্য বিপুল অর্থ ব্যয় করতেন। সুলতানের পক্ষেও এত অর্থ ব্যয় করা সম্ভব নয় বলে সুলতানের মনে আলা অল-হকের প্রতি ঈর্ষ্যা জাগ্রত হ'ল এবং তিনি তাঁকে রাজধানী পাণ্ডুয়া ছেড়ে সোনারগাঁওয়ে চলে যেতে বললেন। সোনারগাঁওয়ে গিয়ে আলা অল-হক আগের তুলনায় দ্বিগুণ অর্থ ব্যয় করতে লাগলেন। কিন্তু কেউ-ই জানত না কোথা থেকে তিনি এই অর্থ পেতেন। বুকাননের বিবরণীতে 'অখবার অল-অখিয়ার'-এর এই উক্তির সমর্থন পাওয়া যায়। এতে লেখা আছে, "The most celebrated person in the reign of Sekundur, was a holy man named Mukhdum Alalhuk, whose son, Azem Khan, was commander of the troops. The saint having taken disgust at some part of the king's conduct, retired to Sonargang, near Dhaka...The good man was, however, soon after induced to return."

এই বিবরণীতে আর একটি নতুন কথা পাওয়া গেল যে আলা অল-হকের পুত্র আজম খান সিকন্দরের সেনাপতি ছিলেন। 'অখবার অল-অখিয়ার'-এর মতে আজম খান সুলতানের উজীর ছিলেন।

এছাড়া বিহারের বিখ্যাত দরবেশ শেখ-উল-ইসলাম শরফুল হক ওয়াদ্দীন ওরফে শরফুদ্দীন যাহিআ মনেরির সঙ্গে সিকন্দর শাহের ঘনিষ্ঠ সম্বন্ধ ছিল। তাঁদের মধ্যে পত্রবিনিময় চলত। বিহারের দরবেশ মুজফর শামসুল বলখি সিকন্দর শাহের পুত্র গিয়াসুদ্দীন আজম শাহকে যে চিঠিগুলি লিখেছিলেন, তার একটিতে লেখা আছে, "যদিও ফিরোজ শাহ (তোগলক) এবং তাঁর পক্ষের লোকেরা বারবার শেখকে (শরফুদ্দীন যাহিআ মনেরি) কিছু লিখতে অহরোধ করেন যা তাঁরা স্মৃতিচিহ্ন হিসাবে রাখতে পারেন, তিনি তাঁদের পৃথকভাবে কিছু লেখেন নি বা পাঠান নি। পক্ষান্তরে তিনি অত্যন্ত আনন্দের সঙ্গে অন্তরের ইচ্ছায় শহীদ সুলতানকে (সিকন্দর শাহ) প্রায়ই চিঠি লিখতেন।" (Proceedings of the 19th session of Indian History Congress, 1956, p. 214)

নূর কুৎব্, আলমের শিষ্য শেখ হাসামুদ্দীন মাহিকপুরীর বাণী ও উপদেশ সংগ্রহ করে তাঁর শিষ্য ফরীদ বিন সালার 'রফীক অল-আরেকিন' নামে একটি

বই প্রকাশ করেন। এই বইয়ের মধ্যে দেখা যায়, শেখ হসামুদ্দীন মাণিকপুরী রাজা হিসাবে ও মাল্হুস হিসাবে সিকন্দর শাহের ভূয়সী প্রশংসা করেছেন।

সিকন্দর শাহের মৃত্যু সম্বন্ধে 'রিয়াজ-উস-সলাতীনে' একটি অতি কল্পণ কাহিনী লিপিবদ্ধ হয়েছে। সেটি এই :—

সিকন্দর শাহের প্রথম জ্বরী গর্ভে সতেরটি পুত্র এবং দ্বিতীয়া জ্বরী গর্ভে একটিমাত্র পুত্র জন্মগ্রহণ করে। দ্বিতীয়া জ্বরী গর্ভজাত পুত্রের নাম গিয়াসুদ্দীন, তিনি আদবকাযদা জানতেন ও অগ্নাত্ত গুণে ভূষিত ছিলেন এবং তাঁর ভাইদের তুলনায় তিনি সবদিক দিয়ে শ্রেষ্ঠ ছিলেন। শাসনকার্য পরিচালনায়ও তিনি দক্ষ ছিলেন। তার ফলে তাঁর বিমাতা ঈর্ষাপরায়ণ হয়ে উঠলেন এবং তাঁর অনিষ্ট করবার চেষ্টা করতে লাগলেন। একদিন তিনি সুলতান সিকন্দর শাহের কাছে গিয়ে বললেন যে গিয়াসুদ্দীন পিতা ও ভ্রাতাদের বধ করে সিংহাসন অধিকারের মংলব করছেন। অতএব তাকে বন্দী করা অথবা তার চোখ অন্ধ করে দেওয়া উচিত। সিকন্দর একথা শুনে বিরক্ত হলেন। তখন রাগী বললেন যে সুলতানের মঙ্গলের কথা ভেবেই তিনি একথা তাঁকে জানানো প্রয়োজন বোধ করেছেন। তাই শুনে সিকন্দর নিজের মনে বললেন, “গিয়াসুদ্দীন কর্তব্যপরায়ণ পুত্র এবং শাসনদক্ষতার অধিকারী। সে যদি আমার জীবন নিতে চায়, নিষ্। পুত্র কর্তব্যপরায়ণ হলেই স্বথের বিষয়। সে যদি কর্তব্যপরায়ণ না হয়, তাহলে ধ্বংস হোক।” এর পরে তিনি গিয়াসুদ্দীনকে সম্পূর্ণভাবে রাজ্য পরিচালনার ভার দিলেন। কিন্তু গিয়াসুদ্দীন বিমাতার চাতুরী ও কৌশল সম্বন্ধে অতিমাত্রায় সন্দিগ্ধ ছিলেন। একদিন শিকারের অছিলা করে তিনি সোনারগাঁওয়ে পালিয়ে গেলেন। অল্পদিনের মধ্যে তিনি এক বিরাট সৈন্তবাহিনী গঠন করে পিতার কাছে সিংহাসন দাবী করলেন এবং তারপরে রাজ্য অধিকারের জন্য সৈন্তবাহিনী নিয়ে তিনি সোনারগাঁও থেকে রওনা হলেন এবং সোনারগড়িতে ঘাঁটি গাড়লেন। সিকন্দর শাহও এক শক্তিশালী বাহিনী নিয়ে অগ্রসর হলেন। পিতা-পুত্রের মধ্যে এখন আর বিন্দুমাত্রও ভালোবাসা ছিল না। গোয়ালপাড়ার প্রান্তরে দুই পক্ষের মধ্যে যুদ্ধ হল। গিয়াসুদ্দীন তাঁর দলের লোকদের আদেশ দিয়েছিলেন সিকন্দরকে বধ না করে জীবিত অবস্থায় বন্দী করবার জন্য। কিন্তু তাদের মধ্যে একজন সিকন্দরকে না চিনে বধ করে ফেলল। যখন অত্র একজন লোক তাকে জানাল যে সে সিকন্দরকেই বধ করেছে, তখন সে ঐ লোকটির সঙ্গে

গিয়াসুদ্দীনের কাছে গিয়ে জিজ্ঞাসা করল, “কাউকে বধ না করলে যদি নিজে নিহত হতে হয়, তাহলে কি আমরা তাকে বধ করতে পারি?” গিয়াসুদ্দীন বললেন, “নিশ্চয়ই পার।” তারপর তিনি কিছুক্ষণ চিন্তা করে বললেন, “যতদূর মনে হয় তোমরা সুলতানকেই বধ করেছ।” ঐ লোকটি বলল, “হ্যাঁ। না জেনে আমি সুলতানের বৃকে বর্শা বিদ্ধ করেছি। এখনও তাঁর জীবনের কিছু অবশিষ্ট আছে।” গিয়াসুদ্দীন তখন তাড়াতাড়ি ঘোড়ায় চড়ে যেখানে তাঁর পিতা পড়েছিলেন, সেখানে গিয়ে ঘোড়া থেকে নেমে পিতার মাথা কোলে তুলে নিলেন। তাঁর গাল দিয়ে অশ্রু গড়িয়ে পড়ল। তিনি বললেন, “পিতা! চোখ খুলুন। আপনার অন্তিম অভিলাষ ব্যক্ত করুন। আমি তা পূর্ণ করব।” সিকন্দর চোখ খুলে বললেন, “আমার জীবনের কাজ শেষ হয়েছে। এ রাজ্য এখন তোমার। রাজা হিসাবে তুমি সমৃদ্ধি লাভ কর।” এই বলে তিনি প্রাণত্যাগ করলেন। গিয়াসুদ্দীন কয়েকজন অমাত্যকে পিতার অন্ত্যেষ্টিক্রিয়া নির্বাহের জন্য রেখে নিজে ঘোড়ায় চড়ে পাণ্ডুয়ায় গিয়ে সিংহাসনে আবোধন করলেন।

এই কাহিনীর খুঁটিনাটিগুলি সব সত্য কিনা তা বলা যায় না, তবে এর মূল ভিত্তি যে সত্য, তা আমরা গিয়াসুদ্দীন আজম শাহের প্রসঙ্গের মধ্যে আলোচনা করে দেখাবার চেষ্টা করব।

বুکانনের বিবরণে ‘রিয়াজে’ প্রদত্ত এই কাহিনীর সমর্থন পাওয়া যায়। এতে আলা অল-হকের সোনারগাঁও-গমনের বর্ণনার (আগে উদ্ধৃত) ঠিক পরেই লেখা আছে, “...but the king's son, Ghyashudin, having also taken disgust, retired to the same place (Sonargang), and afterwards made war against his father, who, after a reign of 32 years, fell in battle at a place called Satra, near Goyalpara.”

পুত্রের সঙ্গে যুদ্ধে সিকন্দর শাহ যে নিহত হয়েছিলেন, ‘রিয়াজ’ ও বুکانন-বিবরণীর এই উক্তির সমর্থন একটি সমসাময়িক সূত্র থেকেও পাওয়া যাচ্ছে। বিহারের দরবেশ মুজফর শামস বলুখি গিয়াসুদ্দীন আজম শাহকে লেখা এক চিঠিতে সিকন্দর শাহকে “শহীদ সুলতান” (the Martyred Sultan) বলে উল্লেখ করেছেন।

কোন স্থানে পিতা-পুত্রের যুদ্ধ হয়েছিল, সে সম্বন্ধে বিভিন্ন সূত্রের মধ্যে

মোটামুটি মতৈক্য আছে। তবে ঐ গোয়ালপাড়ার অবস্থান সম্বন্ধে পণ্ডিতদের মধ্যে মতভেদ রয়েছে।

সিকন্দর শাহের রাজত্বকালেই দিল্লীর সঙ্গে বাংলার সংযোগ বিচ্ছিন্ন হয়ে গেল। তার ফলে পরবর্তী সুলতান গিয়াসুদ্দীন আজম শাহ থেকে শুরু করে আলাউদ্দীন হোসেন শাহ পর্যন্ত সুলতানদের সম্বন্ধে দিল্লীর সমসাময়িক ঐতিহাসিকেরা প্রায় কিছুই লিপিবদ্ধ করেন নি।

### গিয়াসুদ্দীন আজম শাহ

ইলিয়াস শাহী বংশের একটি বড় বৈশিষ্ট্য এই যে, এই বংশের প্রথম তিনজন রাজাই অত্যন্ত যোগ্য ও ব্যক্তিত্বসম্পন্ন ছিলেন। ইলিয়াস শাহ ও সিকন্দর শাহ প্রধানত যুদ্ধবিগ্রহ ও স্বাধীনতা রক্ষার মধ্যে নিজেদের দক্ষতার পরিচয় দিয়েছেন। ইলিয়াসের পৌত্র ও সিকন্দরের পুত্র গিয়াসুদ্দীন আজম শাহও পিতা ও পিতামহের মতই বাংলার শ্রেষ্ঠ সুলতানদের অন্ততম বলে গণ্য হবেন। কিন্তু তাঁর শ্রেষ্ঠ যুদ্ধবিগ্রহের ক্ষেত্রে নয়, অস্ত্র ক্ষেত্রে। বাংলার সমস্ত স্বাধীন সুলতানদের মধ্যে তাঁর মত আকর্ষণীয় চরিত্র বোধহয় আর কারও নেই। লোকরঞ্জক ব্যক্তিত্বের দিক দিয়ে তাঁর তুলনা হয় না। তাঁর চরিত্রে নানারকম বিচিত্র বৈশিষ্ট্যের সমাবেশ হয়েছিল। এই সুলতানের যে সমস্ত কার্যকলাপের বিবরণ পাওয়া যায়, প্রায় প্রত্যেকটির মধ্যেই একটি উন্নত বৈচিত্র্যপ্রিয় রুচিমান্ বিদগ্ধ মনের পরিচয় মেলে। এঁর জীবনের কোন কোন ঘটনা এতই বিচিত্র যে সেগুলি থেকে এঁকে রূপকথার রাজপুত্রের সমপরিায়ত্ব বলে মনে হয়। এখন আমরা এই অননুসাধারণ নরপতি সম্বন্ধে বিস্তৃত আলোচনায় অগ্রসর হব।

‘রিয়াজ-উন্-সলাতীনে’ গিয়াসুদ্দীন আজম শাহের রাজ্যাধিকার সম্বন্ধে যে কাহিনী বর্ণিত হয়েছে তা যদি সত্য হয়, তাহলে বলতে হবে গিয়াসুদ্দীন পিতার বিরুদ্ধে বিদ্রোহ করে ও পিতাকে যুদ্ধে নিহত করে রাজা হয়েছিলেন। এই ব্যাপার আপাতদৃষ্টিতে ঘোরতর কৃতঘ্নতা ও মনুষ্যত্বহীনতার পরিচায়ক বলে মনে হয়, কারণ সিকন্দর শাহ গিয়াসুদ্দীনকে অত্যন্ত ভালবাসতেন, প্রথমাঙ্গীর প্ররোচনা সত্ত্বেও তাঁর উপর বিরাগ পোষণ করেননি এবং গিয়াসুদ্দীনের উপরেই রাজ্য পরিচালনার সম্পূর্ণ ভার অর্পণ করেছিলেন। কিন্তু ‘রিয়াজ’-এই লেখা আছে যে প্রথমাঙ্গীর কথাতে সিকন্দর শাহের মন একটু টলেছিল ;

এর পরেও যে তিনি গিয়াসুদ্দীনের উপরে রাজ্যের পরিচালনা-ভার অর্পণ করেছিলেন, তা বোধ হয় গিয়াসুদ্দীনকে পরীক্ষা করবার জন্তই ; এ ছাড়া গিয়াসুদ্দীনের বিমাতার চক্রান্তও সব সময় সক্রিয় ছিল। সম্ভবত এই সমস্ত কারণে গিয়াসুদ্দীন আত্মরক্ষার অল্পরোধে সোনারগাঁওয়ে চলে গিয়েছিলেন। পিতার বিরুদ্ধে যুদ্ধ করার কারণ, তিনি সোনারগাঁওতে বেশীদিন পড়ে থাকলে পাণ্ডুয়ায় তাঁর বিমাতা ও বৈমাত্রেয় ভাইয়েরা শক্তিশালী হয়ে উঠত, এবং তার ফলে তাঁর পক্ষে পিতার স্বাভাবিক মৃত্যুর পরে বাংলার রাজা হওয়া দুঃসাধ্য তো হতই, হয়তো সোনারগাঁও-ও হারাতে হত। পিতার বিরুদ্ধে যুদ্ধ করলেও গিয়াসুদ্দীন তাঁর অহুচরদের সিকন্দর শাহকে বধ করতে নিষেধ করেছিলেন। স্বতরাং তাঁর মধ্যে কোন সময়েই মনুষ্যত্বের অভাব সূচিত হয় নি। এই সমস্ত বিষয় বিবেচনা করলে গিয়াসুদ্দীনের আচরণ সম্পূর্ণ না হলেও আংশিকভাবে ক্ষমা করা যায়।

কিন্তু প্রশ্ন হচ্ছে যে ‘রিয়াজে’র ঐ বিবরণ কতদূর সত্য? ঐ বিবরণের সমস্ত খুঁটিনাটিগুলি সত্য কিনা তা বলা যায় না। তবে মূল বিষয়টি সত্য। মূল বিষয়টির সমর্থন বুকাননের বিবরণ থেকে পাওয়া যাচ্ছে। তাছাড়া গিয়াসুদ্দীন যে পিতার বিরুদ্ধে বিদ্রোহ ঘোষণা করে তাঁর জীবদ্দশায় বাংলা-দেশের একাংশে স্বাধীনভাবে রাজত্ব করেছিলেন, তার কয়েকটি প্রমাণ আছে। সেগুলি এই,

(১) পূর্ববঙ্গের মুয়াজ্জমাবাদ এবং পশ্চিমবঙ্গের সাতগাঁওয়ের টাকশালে উৎকীর্ণ গিয়াসুদ্দীন আজম শাহের এমন কতকগুলি মুদ্রা পাওয়া যাচ্ছে, যেগুলি সিকন্দর শাহের রাজত্বকালে উৎকীর্ণ হয়েছিল।

(২) পূর্ববঙ্গের বিভিন্ন টাকশালে উৎকীর্ণ সিকন্দর শাহের যে সমস্ত মুদ্রা পাওয়া যাচ্ছে, তাদের কোনটিই ১১৭ হিজরার পরবর্তী নয়।

এই দু’টি বিষয় থেকে মনে হয়, ১১৭ হিজরার পরবর্তী ও ১২০ হিজরার পূর্ববর্তী কোন এক সময়ে গিয়াসুদ্দীন তাঁর পিতা সিকন্দর শাহের বিরুদ্ধে বিদ্রোহ ঘোষণা করেছিলেন এবং সোনারগাঁও ও সাতগাঁও সমেত বাংলার এক বিস্তীর্ণ অঞ্চলের স্বাধীন রাজা হয়ে বসেছিলেন। কিন্তু এই দু’টি বিষয় এ সযত্নে চূড়ান্ত প্রমাণ বলে গণ্য হতে পারে না। এ সযত্নে অন্ত যে প্রমাণ আছে, এখন তার উল্লেখ করছি।

‘রিয়াজ-উল-সলাতীনে’ ইরানের বিখ্যাত কবি হাকিমজের সঙ্গে



গিয়াসুদ্দীনের যোগাযোগের একটি কাহিনী পাওয়া যায়। কাহিনীটি সংক্ষেপে এই। একবার সুলতান গিয়াসুদ্দীনের খুব কঠিন অসুখ হয়েছিল, বাঁচবার কোন আশা ছিল না। তিনি সে সময়ে সর্ব্ব, গুল ও লালা নামে তাঁর হারেমের তিনটি মেয়েকে তাঁর মৃত্যুর পর শহদেহকে স্নান করাবার জন্ত নির্বাচিত করেন। কিন্তু গিয়াসুদ্দীন সেবার সেরে উঠলেন, উঠে মেয়ে তিনটিকে তিনি আগের চেয়েও বেশী অল্পগ্রহ করতে লাগলেন। কিন্তু অল্প মেয়েরা তাদের উপর ঈর্ষান্বিত হয়ে শবদেহ স্নান করানোর ব্যাপার নিয়ে তাদের টিটকারী মারত। একদিন সুলতানের মেজাজ যখন প্রফুল্ল ছিল, তখন ঐ তিনটি মেয়ে স্নযোগ বুঝে সুলতানের কাছে অল্প মেয়েদের টিটকারী মারার কথা জানাল। সুলতান সঙ্গে সঙ্গে এক ছত্র ফার্সী কবিতা রচনা করলেন। চরণটির ইংরেজী অনুবাদ এই,

“Cup-bearer, this is the story of sarv ( the cypress ), Gul ( the Rose ) and Lalah ( The Tulip ).”

কিন্তু সুলতান কবিতাটির দ্বিতীয় চরণ আর রচনা করতে পারলেন না, তাঁর সভার কোন কবিও পারলেন না। তখন সুলতান এই চরণটি লিখে একজন দূত মারফৎ ইরানের শিরাজ শহরে কাব হাফিজের কাছে পাঠিয়ে দিলেন। হাফিজ সঙ্গে সঙ্গে দ্বিতীয় চরণটি রচনা করলেন; তার ইংরেজী অনুবাদ, “The story relates to the three corpse-washers”\* হাফিজ এই সঙ্গে একটি গজলও লিখে পাঠালেন এবং গিয়াসুদ্দীন তার প্রতিদানে কবিকে অনেক উপহার পাঠালেন। ‘রিয়াজ-উন্-সলাতীনে’ এই গজলটি থেকে দুটি শ্লোক উদ্ধৃত হয়েছে। শ্লোক দুটির ইংরেজী অনুবাদ এই,

The parrots of Hindustān shall all be sugar-shedding  
From this Persian sugar-candy that goes forth to Bengal.  
Hāfiz, from the yearning for the company of Sulṭān

Ghiāṣ-ud-dīn,

Rest not ; for thy (this) lyric is the outcome of lamen-  
tation.

\* “...the word used for ‘morning draughts’ being the same as that used for ‘corpse-washers’”. ( Cambridge History of India, Vol III, Ch. XI, p. 285 )

শেষ শ্লোকটি থেকে মনে হয়, গিয়াসুদ্দীন হাফিজকে বাংলাদেশে আসবার জন্ত অসুস্থতা জানিয়েছিলেন এবং আসতে না পারার জন্ত হাফিজ দুঃখিত হয়েছিলেন।

‘রিয়াজ-উস-সলাতীনে’ বর্ণিত অগ্ন্যস্ত্র কাহিনীর মত এই কাহিনীরও সব খুঁটিনাটিগুলি সত্য কিনা, তা বলা যায় না, তবে মূল বিষয়টি—অর্থাৎ হাফিজের গজল লিখে গিয়াসুদ্দীনকে প্রেরণের কথা যে সত্য, তার প্রমাণ আছে। এই বিষয়ের উল্লেখ ‘রিয়াজ উস-সলাতীনে’র দু’শো বছর আগে রচিত ‘আইন-ই-আকবরী’তেও পাওয়া যায়। ‘আইন-ই-আকবরী’র দ্বিতীয় খণ্ডের ইংরেজী অনুবাদ থেকে প্রাসঙ্গিক অংশটুকু নীচে উদ্ধৃত করছি,

“On Sikandar’s death his son was elected to succeed him and was proclaimed under the title of Ghiyāsu’ddin. Khāwajah Hafiz of Shirāz sent him an ode in which occurs the following verse :

And now shall India’s parroquets on sugar revel all,  
In this sweet Persian lyric that is borne to far Bengal.”

(Ain-i-Akbari, Vol. II, Jarrett’s translation,

2nd Edition, p. 161 )

সুতরাং ষোড়শ শতাব্দী থেকেই আমরা বিভিন্ন সূত্রে আলোচ্য কাহিনীটির উল্লেখ পাচ্ছি। কিন্তু হাফিজের নিজের লেখাই এসম্বন্ধে সবচেয়ে বড় প্রমাণ। হাফিজের মৃত্যুর সামান্য পরে তাঁর ঘনিষ্ঠ বন্ধু মুহম্মদ গুল-অন্দাম ‘দিওয়ান-ই-হাফিজ’ নামে যে হাফিজ-রচিত গানের সংগ্রহ-গ্রন্থ প্রকাশ করেন, তার মধ্যে বাংলার স্থলতান গিয়াসুদ্দীনকে প্রেরিত গজলটি সম্পূর্ণ আকারে পাওয়া যায়। তার মধ্যে ‘আইন-ই-আকবরী’ এবং ‘রিয়াজ-উস-সলাতীনে’ উদ্ধৃত শ্লোকগুলিও রয়েছে। এইচ ডব্লিউ ক্লার্ক এই গজলটির যে ইংরেজী অনুবাদ করেছেন, তা নীচে উদ্ধৃত করলাম,

“Saki ! the tale of the cypress and the rose and the  
tulip—goeth.

And with the three washers ( cups of wine ),  
this dispute—goeth.



এপর্যন্ত আবিষ্কৃত ‘দিওয়ান-ই-হাফিজের’ অসংখ্য পুথিতে এই গজলটি পাওয়া গিয়েছে। ১৯৪১ খ্রীষ্টাব্দে মীর্জা মুহম্মদ কজবীনী এবং ডঃ কাসিম গনী ‘দিওয়ান-ই-হাফিজের’ যে শ্রেষ্ঠ ও প্রামাণিক সংস্করণ প্রকাশ করেন, তার মধ্যে তাঁরা বিপুল পরিশ্রম করে নানারকম প্রমাণের কষ্টপাথরে যাচাই করে হাফিজের নামে প্রচলিত গানগুলির মধ্যে কোন্‌গুলি তাঁর স্বরচিত, তা নির্ণয় করেছেন; আলোচ্য গজলটিকে তাঁরা হাফিজের নিজের রচনা বলেই স্বীকার করেছেন ( Fifty poems of Hafiz, edited by Arthur J. Arberry, Cambridge, 1953, pp. 10-11, 104-105, 160-161 দ্রষ্টব্য )। এই গজলটি হাফিজের শ্রেষ্ঠ রচনাবলীর অগ্রতম এবং Fifty poems of Hafiz প্রভৃতি সংকলনগ্রন্থে এটি স্থান পেয়েছে। হাফিজের নিজের লেখা এই গজলটিতে বলা হয়েছে যে পদটি বাংলাদেশে যাচ্ছে এক বছরের পথ অতিক্রম করে ( সে সময়ে ইরান থেকে বাংলাদেশে আসতে এক বছরই সময় লাগত ) ; সুলতান গিয়াসুদ্দীনের নামও হাফিজ এই গজলে প্রীতির সঙ্গে উল্লেখ করেছেন। সুতরাং হাফিজ কর্তৃক বাংলার সুলতান গিয়াসুদ্দীন আজম শাহকে গজল লিখে পাঠানো একটা ঐতিহাসিক ঘটনা।\*

এই ঘটনা থেকে যেমন গিয়াসুদ্দীন আজম শাহের কাব্যমোহিতার পরিচয় পাওয়া যায়, তেমনি আবার পিতার বিরুদ্ধে বিদ্রোহ করে বাংলাদেশের একাংশে তাঁর স্বাধীনভাবে রাজত্ব করার কথাও প্রমাণিত হয়। কারণ,

\* কোন কোন আধুনিক গবেষকের মতে হাফিজের এই গজলে উল্লিখিত সুলতান গিয়াসুদ্দীন আসদো বাহম্নী রাজ্যের সুলতান দ্বিতীয় মুহম্মদ শাহ। কিন্তু বাহম্নীর সুলতান মুহম্মদ (ফিরিশ্তায় “মাহমুদ” নামে উল্লিখিত) শাহের সঙ্গে হাফিজের যোগাযোগের সম্পূর্ণ স্বতন্ত্র একটি কাহিনী ‘তারিখ-ই-ফিরিশ্তা’য় লিপিবদ্ধ হয়েছে, তার মধ্যে আলোচ্য ব্যাপারের কোন উল্লেখ নেই; আর ঐ সুলতানের নাম ‘গিয়াসুদ্দীন’ ছিল না। গিয়াসুদ্দীন শাহ নামেও বাহম্নী রাজ্যে একজন সুলতান ছিলেন, কিন্তু তিনি হাফিজের মৃত্যুর আট বছর পরে—১৯৯ হিজরার মাত্র মাস দেড়েকের জন্ত সিংহাসনে আরোহণ করেন (J.B.O.R.S., 1941, pp. 455-469 দ্রষ্টব্য )। আবার কোন কোন গবেষকের মতে হাফিজের গজলে উল্লিখিত গিয়াসুদ্দীন হীরাটের রাজপুত্র গিয়াসুদ্দীন পীর আলী, কিন্তু হাফিজ স্পষ্ট লিখেছেন তাঁর এই গজল এক বছরের পথ অতিক্রম করছে। স্বল্পদূরবর্তী হীরাটে গজলটি প্রেরিত হলে তিনি একথা লিখতেন না। এই ছুঁদল গবেষকের মধ্যে কেউই লক্ষ করেননি যে—হাফিজ গজলটিতে বলেছেন যে এটি বাংলা দেশে যাচ্ছে এবং ‘আইন-ই-আকবরী’র মত প্রাচীন গ্রন্থে লেখা আছে যে হাফিজ বাংলার সুলতান গিয়াসুদ্দীনকে এই গান পাঠিয়েছিলেন। সুতরাং এই সমস্ত গবেষকের স্বকপোলকল্পিত মত একেবারেই মূল্যহীন।

সিকন্দর শাহের ৭২২ হিজরা অবধি তারিখের মুদ্রা পাওয়া যাচ্ছে। কিন্তু হাফিজ যে ৭২১ হিজরা বা ১৩৮২ খ্রীষ্টাব্দে পরলোক গমন করেন, তা তাঁর সমাধি-ফলকের লিপি এবং তাঁর বন্ধু মুহম্মদ গুল-অন্দামের লেখা ‘দিওয়ান-ই-হাফিজের’ ভূমিকা থেকে প্রামাণিকভাবে জানা যায়। এর থেকে স্পষ্ট বোঝা যাচ্ছে, সিকন্দর শাহের জীবদ্দশাতেই গিয়াসুদ্দীন আজম শাহ বাংলাদেশের একাংশে স্বাধীন ভাবে রাজত্ব করছিলেন এবং এই সময় তিনি নিজেকে বাংলার সুলতান বলে ঘোষণা করেছিলেন। এই সময়েই কবি হাফিজের সঙ্গে তাঁর সংযোগ স্থাপিত হয় এবং হাফিজ তাঁকে গজল লিখে পাঠান। কোন বছরে এই ঘটনা ঘটেছিল, তা সঠিকভাবে বলা যায় না; কোন কোন গবেষকের মতে গিয়াসুদ্দীন ৭২০ হিজরা বা ১৩৮৮ খ্রীষ্টাব্দে পিতার বিরুদ্ধে বিদ্রোহ ঘোষণা করেছিলেন; এই মত ঠিক হলে বলতে হবে, স্বাধীন রাজা হিসাবে নিজেকে ঘোষণা করার অব্যবহিত পরেই গিয়াসুদ্দীন হাফিজকে চিঠি লেখেন এবং গিয়াসুদ্দীনকে গজল পাঠানোর অব্যবহিত পরেই হাফিজের মৃত্যু হয়। অবশ্য গিয়াসুদ্দীন ৭২০ হিজরার আগেই স্বাধীনতা ঘোষণা করেছিলেন বলে মনে হয়।

সিকন্দর শাহকে যুদ্ধে পরাজিত করে গিয়াসুদ্দীন আজম শাহ সমগ্র বাংলার সিংহাসন আধকার করেছিলেন, ‘রিয়াজ’-এর ও বুকাননের বিবরণীর এই উক্তির পিছনে অল্প প্রমাণ না থাকলেও এই ব্যাপার খুবই সম্ভাব্য।

৭২২ অথবা ৭২৩ হিজরায় সিকন্দরের মৃত্যু ঘটে এবং গিয়াসুদ্দীন সারা বাংলার অধীশ্বর হন। ‘রিয়াজ’-এ লেখা আছে যে সিংহাসনে আরোহণ করার পর “প্রথমে তিনি তাঁর বৈমাত্রেয় ভায়েদের চোখ অন্ধ করে তাদের মায়ের কাছ পাঠিয়ে দিলেন এবং নিজেকে ভায়েদের চক্রান্ত থেকে মুক্ত করলেন।” কিন্তু বুকাননের বিবরণীর মতে গিয়াসুদ্দীন ভাইদের অন্ধ করেননি, বধ করেছিলেন; এতে লেখা আছে, “Ghyashudin, on succeeding to the government, put seventeen brothers to death.”

‘রিয়াজ’-এর মতে রাজা হয়ে বসবার পরে গিয়াসুদ্দীন ত্রায়বিচার করতে থাকেন। এই বইয়ের মতে গিয়াসুদ্দীন শাসক ছিলেন এবং ঐচ্ছামিক আইনের বিধিনিষেধ নিষ্ঠার সঙ্গে পালন করতেন। তাঁর ত্রায়পরায়ণতা সম্বন্ধে ‘রিয়াজ’-এ একটি কাহিনী উল্লিখিত হয়েছে। কাহিনীটি সর্বজনপরিচিত।

কিন্তু অনেকে এটিকে খানিকটা বিকৃত রূপ দিয়ে তাঁদের বইয়ে লিপিবদ্ধ করেছেন। আমরা ‘রিয়াজ-উন্-সলাতীন’ থেকে কাহিনীটি হুবহু অহুবাদ করে দিলাম,

“একদিন তীর ছোঁড়বার সময় সুলতানের তীর আকস্মিকভাবে এক বিধবার পুত্রকে আঘাত করে। বিধবা কাজী সিরাজুদ্দীনের কাছে এর প্রতিকার প্রার্থনা করে। কাজী চিন্তিত হলেন। কারণ তিনি যদি রাজার প্রতি পক্ষপাত দেখান, তাহলে ভগবানের বিচারশালায় তিনি অপরাধী বলে গণ্য হবেন। আর যদি তিনি দেখান, তা’হ’লে রাজাকে বিচারালয়ে আহ্বান করা কঠিন কাজ হবে। অনেক বিচার-বিবেচনার পরে রাজার কাছে সমন জারী করার জ্ঞা তিনি একজন পেয়াদা পাঠালেন এবং নিজে আদালতে বিচারকের মনসদে বসলেন, মনসদের তলায় একটি বেত রেখে দিয়ে। প্রাসাদে পৌঁছে কাজীর পেয়াদা দেখল রাজার কাছে যাওয়া অসম্ভব, সে তখন চীৎকার করে আজান দিতে শুরু করল। রাজা অসময়ে এই আজানধ্বনি শুনে মুহাজ্জিনকে (যে আজান দেয়) তাঁর কাছে নিয়ে আসতে আদেশ দিলেন। যখন রাজার ভূতৈরী ঐ পেয়াদাকে রাজার কাছে নিয়ে গেল, রাজা তাকে অসময়ে আজান দেওয়ার কারণ জিজ্ঞাসা করলেন। সে বলল, ‘কাজী সিরাজুদ্দীন আমাকে পাঠিয়েছেন, রাজাকে বিচারালয়ে নিয়ে যাবার জ্ঞা। রাজার কাছে আসতে পারা কঠিন বলে আমি (এখানে) প্রবেশ লাভের জ্ঞা এই উপায় অবলম্বন করেছি। এখন উঠুন এবং বিচারালয়ে চলুন। আপনি যে বিধবার ছেলেকে তীর মেরে আহত করেছেন, সে-ই অভিযোগ করেছে।’ সুলতান তক্ষণি উঠলেন এবং বগলের নৌচে একটি ছোট তলোয়ার লুকিয়ে প্রাসাদ থেকে বেরোলেন। যখন সুলতান কাজীর সামনে উপস্থিত হলেন, কাজী তাঁকে কিছুমাত্র খাতির না করে বললেন, ‘এই বৃদ্ধা স্ত্রীলোকের হৃদয়কে শাস্ত করুন।’ রাজার পক্ষে যা সম্ভব ছিল সেই উপায়ে (অর্থাৎ প্রচুর অর্থ দিয়ে) বৃদ্ধাকে শাস্ত করে রাজা বললেন, ‘কাজী! এখন বৃদ্ধা সন্তুষ্ট হয়েছে।’ কাজী বৃদ্ধার দিকে ফিরে জিজ্ঞাসা করলেন, ‘তুমি কি ক্ষতিপূরণ পেয়েছ এবং সন্তুষ্ট হয়েছে?’ স্ত্রীলোকটি বলল, ‘হ্যাঁ! আমি সন্তুষ্ট হয়েছি।’ তখন কাজী মহানন্দে উঠে দাঁড়ালেন এবং রাজাকে শ্রদ্ধা দেখিয়ে মনসদে বসালেন। রাজা বগল থেকে তলোয়ার বার করে বললেন, ‘কাজী! আমি পবিত্র আইনের বিধান পালনে বাধ্য বলে তোমার বিচারালয়ে এসেছি। আজ যদি আমি তোমাকে আইনের নির্দেশের

প্রতি নিষ্ঠা থেকে একচুল বিচ্যুত হতে দেখতাম, তাহলে এই তলোয়ার দিয়ে তোমার মাথা কেটে ফেলতাম। ভগবানকে ধন্যবাদ, সমস্তই ঠিকভাবে সম্পন্ন হয়েছে।' কাজীও মসনদের তলা থেকে তাঁর বেতখানা বার করে বললেন, 'হুজুর! যদি আপনাকে আজ আমি পবিত্র আইনের বিধান সামান্যমাত্রও লঙ্ঘন করতে দেখতাম—তাহলে, ভগবানের দোহাই, এই বেত দিয়ে আমি আপনার পিঠ ক্ষতবিক্ষত করে দিতাম।' (অর্থাৎ, আসামী যদি আদালতের নির্দেশ লঙ্ঘন করে, তাহলে তার প্রাণ্য শাস্তি বেত্রদণ্ড, স্থলতান আদালতের নির্দেশ না মানলে কাজী তাকেও সেই শাস্তি দিতেন; অবশ্য, স্থলতানকে বেত্রাঘাত করলে কাজীকে স্থলতান হয়তো বধ করতেন; কিন্তু কাজীর কাছে নিজের জীবনের চেয়েও আইনের মর্যাদা বড়।) এই বলে কাজী বললেন, 'একটি বিপদ এসেছিল, কিন্তু ভালয় ভালয় শেষ হয়েছে।' রাজা খুশী হয়ে কাজীকে অনেক উপহার ও পারিতোষিক দিয়ে ফিরে এলেন।'

এই চমৎকার গল্পটি 'রিয়াজ-উস-সলাতীন' ভিন্ন অত্র কোন সূত্রে এপর্যন্ত পাওয়া যায়নি। তাই এটি কতদূর সত্য, তা বলার কোন উপায় নেই। তবে গল্পটি অত্যন্ত মধুর। এটি যদি সত্য হয়, তাহলে অবশ্য ঘটনা আমাদের দেশে অতীতকালে ঘটেছিল বলে আমরা গবিত হতে পারি। কাজী সিরাজুদ্দীনের মত বিচারক যে কোন দেশেরই পৌরব। স্থলতান গিয়াসুদ্দীনেরও গায়নিষ্ঠা এই গল্পটিতে অতুলনীয় রূপ নিয়ে দেখা দিয়েছে। বিহারের দরবেশ মুজাফফর শামস বলখি গিয়াসুদ্দীন আজম শাহকে যে সমস্ত চিঠি লিখেছিলেন, তাদের অনেকগুলি থেকে জানা যায় যে গিয়াসুদ্দীন সত্যই গায়নিষ্ঠ ও ধর্মপরায়ণ ছিলেন। আলোচ্য গল্পটিতে গিয়াসুদ্দীনের চরিত্র যেভাবে ফুটেছে, সেইটিই তাঁর আসল রূপ বলে মনে করতে ইচ্ছা যায়।

পিতামহ ইলিয়াস শাহ ও পিতা সিকন্দর শাহের মত গিয়াসুদ্দীন আজম শাহও মুসলিম সম্ভদের অত্যন্ত ভক্তি করতেন। পূর্বোক্ত আলা অল-হকের পুত্র নূর কুৎব আলম গিয়াসুদ্দীনের সমসাময়িক ছিলেন। 'রিয়াজ-উস-সলাতীনে' লেখা আছে, "রাজার (গিয়াসুদ্দীন) প্রথম থেকেই সন্ত নূর কুৎব উল-আলমের উপর বিরাট আস্থা ছিল; তিনি তাঁর সমসাময়িক এবং সহপাঠী ছিলেন; হুজুরেই শেখ হামিদুদ্দীন কুন্জুশীন নগোরীর কাছে শিক্ষালাভ করেছিলেন।" বুকাননের বিবরণীতে লেখা আছে, "The most holy man at his court was Mukdum Shah Nur Kotub Alum, son of

Alalhuk.” এই কথা সত্য হলে বলতে হবে, গিয়াসুদ্দীনের সভায় অনেক দরবেশ উপস্থিত থাকতেন এবং নূর কুৎব্ আলম ছিলেন তাঁদের মধ্যে প্রধানতম।

নূর কুৎব্ আলমের শিষ্য শেখ হসামুদ্দীন মানিকপুরীর বাণী ও উপদেশের সংগ্রহ-গ্রন্থ ‘রফীক অল-আরেফীন’ থেকে জানা যায় যে নূর কুৎব্ আলম ও গিয়াসুদ্দীন আজম শাহের মধ্যে বেশ ঘনিষ্ঠ সম্পর্ক ছিল, গিয়াসুদ্দীন প্রায়ই নূর কুৎব্ আলমের কাছে বিভিন্ন বিষয়ে পরামর্শ ও উপদেশ চাইতেন। ‘রফীক অল-আরেফীন’-এ লেখা আছে, একদিন সুলতান গিয়াসুদ্দীন কুৎব্ আলমকে প্রশ্ন করেন যে—‘হাদিস’-এ বলা হয়েছে, আচারনিষ্ঠা পালনকারী এবং আচার-নিষ্ঠাবর্জনকারী দুই ধরনের লোকই ঈশ্বরের দৃষ্টিতে অভিশপ্ত বলে গণ্য হতে পারে ; এই উক্তির মধ্যে আপাতদৃষ্টিতে যে স্ববিবোধ দেখা যায়, তা নিরসনের উপায় কী ? এর উত্তরে নূর কুৎব্ আলম বলেন যে প্রথমটি রাজা ও অমাত্যদের সম্বন্ধে প্রযোজ্য, অর্থাৎ তারা নিজেদের কর্তব্য-কর্মে অবহেলা করে আচারনিষ্ঠা নিয়ে পড়ে থাকলে ঈশ্বরের অভিশাপ লাভ করবে, আর দ্বিতীয়টি দরবেশদের সম্বন্ধে প্রযোজ্য অর্থাৎ তারা আচারনিষ্ঠা বর্জন করলে ঈশ্বরের কাছে অভিশপ্ত হবে ; ঈশ্বরস্বষ্ট প্রাণীদের প্রতি ভাল ব্যবহার এবং গ্রাম্যবিচার করা রাজা ও অমাত্যদের প্রাথমিক কর্তব্য, অতএব কোন কাজে নিয়োজিত থাকার জন্তে যদি সেই কর্তব্যে বাধা পড়ে, তবে তা বিপজ্জনক হয়ে ওঠে। ‘রফীক অল-আরেফীন’-এর আর এক জায়গায় শিষ্যদের প্রতি শেখ হসামুদ্দীন মানিকপুরীর এই উক্তিটি দেখতে পাওয়া যায়, “একদিন বাংলার সুলতান গিয়াসুদ্দীন হজরৎ কুৎব্ আলমের কাছে এক বারকোষ-ভর্তি খাবার পাঠান ; কুৎব্ আলম তা নিজের হাতে পরম প্রদ্বার সঙ্গে গ্রহণ করেন। ঐহিক জগতের রাজার প্রতি ধর্মজগতের রাজার এই ব্যবহার আমার কাছে অদ্ভুত লাগল ; পরের দিন হজরৎ কুৎব্ আলম আমাকে ‘মসাবিহ্’ আনতে বললেন, আমার তখন হঠাৎ মনে হল আমি তাঁর অসন্তোষ উদ্বেক করেছি। হজরৎ কুৎব্ আলম ঐ বইয়ের পাতা খুলে রসুলের ‘যে তার নেতাকে প্রদ্বা করে, সে তাঁকেই প্রদ্বা করে...’ এই উক্তিটি পড়লেন ; তারপর তিনি বললেন, ‘আমরা রাজা এবং রাজপুরুষদেরও প্রদ্বা করি, যাতে আমাদের সম্মানেরা আমাদের দৃষ্টান্তের অহসরণ করে তাঁদের প্রাপ্য সম্মান প্রদর্শন করে।’ ( এই বইয়ে ‘রফীক অল-আরেফীন’-এর যে সমস্ত উক্তি উদ্ধৃত হয়েছে, সেগুলির জন্ত



Current Studies, No. 1, May 1953, pp. 4-11-তে প্রকাশিত অধ্যাপক সৈয়দ হাসান আস্কারির প্রবন্ধ দ্রষ্টব্য।)

আগেই আমরা বলেছি, দরবেশদের প্রাচীন জীবনীগ্রন্থ 'অখবার অল-আখিয়ার'-এ লেখা আছে যে নূর কুৎব্ আলমের ভ্রাতা আজম খান সুলতানের উজীর ছিলেন। আজম খান নাকি নূর কুৎব্ আলমকে রাজদরবারে একটি উচ্চ পদ দিতে চান, কিন্তু নূর কুৎব্ তা প্রত্যাখ্যান করেন।

আর একজন দরবেশকে গিয়াসুদ্দীন আজম শাহ বিশেষ ভক্তি করতেন। তাঁর নাম মুজাফফর শামস্ বলখি। এঁর নিবাস ছিল বিহারে। ইনি শুধু দরবেশ ছিলেন না, একজন মস্ত বড় পণ্ডিতও ছিলেন। গিয়াসুদ্দীন আজম শাহকে ইনি অনেকগুলি চিঠি লিখেছিলেন। তার মধ্যে বারোটি চিঠি অধ্যাপক সৈয়দ হাসান আস্কারি সম্প্রতি আবিষ্কার করেছেন এবং Correspondence of the two 14th century Sufi Saints of Bihar with the contemporary sovereigns of Delhi and Bengal প্রবন্ধে তাদের পরিচয় দিয়েছেন (Proceedings of the Nineteenth session of Indian History Congress, 1956, pp. 206-224 দ্রষ্টব্য। অতঃপর বিভিন্ন চিঠির উল্লেখের সময় আমরা এই Proceedings-এর পৃষ্ঠাসংখ্যা উল্লেখ করব।) এই চিঠিগুলির প্রত্যেকটিতেই মুজাফফর শামস্ বলখি গিয়াসুদ্দীনকে ভগবানের মাহাত্ম্য উপলব্ধি করতে, ইসলামের বিধিনিষেধ নিষ্ঠার সঙ্গে অহুসরণ করতে, কোরাণের শিক্ষা গ্রহণ করতে, প্রত্যহ্ নিয়মিতভাবে প্রার্থনা ও অগ্নাগ্রভাবে ভগবদ্ভক্তি প্রকাশ করতে, রাজার কর্তব্য পালন করতে এবং ন্যায়বিচার করতে উপদেশ দিয়েছেন, সেই সঙ্গে ঐ সব কাজের পস্থা ও পদ্ধতি সম্বন্ধে বিস্তৃতভাবে নির্দেশ দিয়েছেন। একটি চিঠিতে (p. 214) তিনি লিখেছেন, "বন্ধু! ধর্মের বিধানগুলিকে দৃঢ়ভাবে ধরে থাক। ভগবানের কাছে আত্মসমর্পণ কর এবং তাঁরই কাছে আশ্রয় গ্রহণ কর। যে সমস্ত প্রার্থনা করা দরকার এবং এই চিঠিতে আমি যে সব প্রার্থনার কথা লিখেছি, তা করতে হবে।" আর একটি চিঠিতে (p. 222) তিনি লিখেছেন, "রাজার এই গুরুত্বপূর্ণ প্রার্থনা উত্তরোত্তর অধিকভাবে করা উচিত, 'ভগবান! আমার হৃদয় এবং জিহ্বাকে ঠিক রাখবার শক্তি দাও এবং আমাকে দিয়ে মুসলমানদের কাজ ঠিকভাবে করাও ও বিধর্মীদের বিরুদ্ধে জয়যুক্ত কর।' এই চিঠিতে বলখি গিয়াসুদ্দীনকে ৪০ দিন ধরে যাবতীয় পাপ থেকে

বিরত থাকতে\* এবং ঈশ্বরের দয়া ভিক্ষা করতে উপদেশ দিয়েছেন। এছাড়া এই দরবেশ একাধিক চিঠিতে গিয়াসুদ্দীনকে হজরৎ মুহাম্মদের এই বাণী স্মরণ করিয়ে দিয়েছেন যে এক মুহুর্তের জায়বিচার ৬০ বছরের প্রার্থনা ও ভক্তি-প্রকাশের চেয়েও উৎকৃষ্ট। তিনি তাঁর বিভিন্ন চিঠিতে গিয়াসুদ্দীনকে এই রকম বহু উপদেশ দিয়েছেন। সবচেয়ে বেশী উপদেশ দিয়েছেন তাঁর শেষ চিঠিতে। এটি অত্যন্ত দীর্ঘ এবং পুঁথির ১৫ পৃষ্ঠা জুড়ে লেখা হয়েছে। বলুখি চিরদিনের মত দেশ ছেড়ে মক্কায় চলে যাবার আগে এই চিঠিটি লেখেন বলে এর মধ্যে তিনি গিয়াসুদ্দীনকে এত উপদেশ দিয়েছেন।

এই চিঠিগুলি থেকে গিয়াসুদ্দীন ও তাঁর পিতা সিকন্দর শাহ সম্বন্ধে কয়েকটি মূল্যবান তথ্য পাই। চিঠিগুলি গিয়াসুদ্দীনের চরিত্র সম্বন্ধে যে আলোকপাত করেছে, তা খুবই গুরুত্বপূর্ণ। একটি চিঠিতে (p. 213) মুজাফফর শামস্ বলুখি গিয়াসুদ্দীনকে “আমার সমৃদ্ধিশালী পুত্র” বলে সম্বোধন করেছেন এবং ফিরোজ শাহ তোগলকের মৃত্যুর পর দিল্লীতে যে বিশৃঙ্খল অবস্থার সৃষ্টি হয়েছিল, তার বর্ণনা দিয়েছেন। এই চিঠিতেই বলুখি লিখেছেন যে শেখ-উল ইসলাম শরফুল হক ওয়াদীন (বিহারের আর একজন বিখ্যাত দরবেশ, ইনি শরফুদ্দীন যাহিআ মনেরি নামেই বেশী পরিচিত ছিলেন) বাংলাদেশকে খুব ভালবাসতেন এবং যৌবনে তিনি বাংলাদেশে বাস করোছিলেন ; তিনি “শহীদ সুলতানে”র (অর্থাৎ সিকন্দর শাহ) উপর অত্যন্ত প্রসন্ন ও সন্তুষ্ট ছিলেন এবং তাঁকে তিনি প্রায়ই স্নেহচায় ও সাননে চিঠি লিখতেন। এই চিঠিতেই মুজাফফর শামস্ বলুখি গিয়াসুদ্দীনকে লিখেছেন, “তুমি রাজা এবং যুবক। অতীতে কিছুকাল তুমি সুখ এবং আমোদ-প্রমোদে নিমগ্ন ছিলে, কিন্তু এখন তুমি পবিত্র ও ধর্মনিষ্ঠ জীবন কামনা করছ।” গিয়াসুদ্দীন একবার কোন একটি যুদ্ধে লিপ্ত হন। মুজাফফর শামস্ বলুখি এই সময় গিয়াসুদ্দীনকে লেখেন (p. 216), “তোমার শত্রুরা পরাজিত, বিপর্যস্ত এবং অমর্যাদা-লিপ্ত হোক।” আর একটি চিঠিতে (p. 217) তিনি লেখেন, “আমি তুচ্ছ লোক। রাজার সেবা করার মত কিছুই আমার নেই, ছ’টি স্নসজ্জিত ঘোড়া পর্বস্ত নেই, থাকলে আমি রাজার জগ্ন যুদ্ধ করতে পারতাম।”

কয়েকটি চিঠি থেকে জানা যায় যে মুজাফফর শামস্ বলুখি যখন শেষবার মক্কায় যান, তখন চট্টগ্রাম বন্দর থেকে যাত্রা করেন। কিন্তু তার আগে তাঁকে

দীর্ঘ দু'বছর গিয়াসুদ্দীনের রাজ্যে কাটাতে হয়। বলুখি এই সময় অত্যন্ত বৃদ্ধ হয়ে পড়েছিলেন, তাঁর চুল পেকে গিয়েছিল, দাঁত শিথিল হয়ে গিয়েছিল। এর কয়েক বছর বাদে—৮০৩ হিজরায় তিনি এডেনে পরলোক গমন করেন। তাঁর সম্ভানও ছিল না, অর্থ বা শক্তিও ছিল না। মক্কায় গিয়ে দেহত্যাগ করা ও সেখানে কবরস্থ হওয়াই ছিল তাঁর উদ্দেশ্য। গিয়াসুদ্দীন তাঁকে যে সমস্ত মূল্যবান উপহার শ্রদ্ধার্থ্যস্বরূপ দিয়েছিলেন, তার অধিকাংশই তিনি অল্প লোকদের দান করেন এবং অবশিষ্ট অংশ পথ-খরচার জন্ত রেখে দেন। গাদ্দুরা নামক জায়গায় বলুখি গিয়াসুদ্দীনের কাছ থেকে বিদায় গ্রহণ করেন। এর পর চট্টগ্রামে থাকার সময় বলুখি শহরের বাইরে একটি আলাদা এবং বাতাসভরা বেওয়ারিশ বাড়ীতে বাস করেছিলেন। চট্টগ্রামে তিনি মাসাধিককাল ছিলেন। চট্টগ্রাম থেকে বলুখি সুলতান গিয়াসুদ্দীনকে একটি চিঠি (p. 218) লিখে চট্টগ্রামের কারকুনদের কাছে এক ফরমান পাঠাতে অনুরোধ জানান, যাতে তারা প্রথম জাহাজেই মক্কাযাত্রী দরবেশদের স্থান করে দেয়। এর থেকে বোঝা যায়, চট্টগ্রামে ঐ সময় গিয়াসুদ্দীন আজম শাহের রাজ্যেরই অন্তর্ভুক্ত ছিল।

সম্ভবত গিয়াসুদ্দীন বলুখিকে একাধিক ফরমান পাঠিয়েছিলেন। একটি ফরমানের সঙ্গে তিনি বলুখির কাছে একটি পোশাক পাঠিয়েছিলেন, বলুখি সেটি পরিধান করে সুলতানের জন্ত ঈশ্বরের কাছে দু'বার হাঁটু গেড়ে প্রার্থনা জানান। আর একটি ফরমানের সঙ্গে গিয়াসুদ্দীন একটি গজল পাঠিয়েছিলেন, তাতে বলুখির বিচ্ছেদে গিয়াসুদ্দীনের মনোবেদনা উচ্ছ্বাসপূর্ণ ভাষায় অভিব্যক্ত হয়েছিল। বলুখি এটি পড়ে বিহ্বল হন এবং সুলতানকে লেখেন, “আমার হাতে কার্বের কর্তৃত্ব থাকলে আমি রাজার (গিয়াসুদ্দীনের) এলাকা ছেড়ে চলে যেতাম না। কিন্তু ভগবানের ইচ্চার কাছে মানুষের ইচ্ছা হার মানে। গজলের প্রত্যেকটি শব্দ এক একটি শর।” (p. 221) কাব্যামোদী সুলতান গিয়াসুদ্দীন যে নিজেও কবি ছিলেন ও গজল লিখতেন, সে কথা ‘রিয়াজ-উস-সলাতীনে’ পাওয়া যায়, এখন এই সমসাময়িক চিঠি থেকে তার সাক্ষাৎ প্রমাণ পাওয়া গেল। এই চিঠিতেই মুজাফফর শামস্ বলুখি গিয়াসুদ্দীন আজম শাহকে লিখেছেন, “আমার মতে পৃথিবীর সমস্ত রাজাদের মধ্যে তুমিই ভগবানের এই সমস্ত আশীর্বাদ (ভগবন্তক্তি, কবিত্বশক্তি প্রভৃতি) লাভ করেছ, কারণ তুমি অনেক ভালবাসা পেয়েছ এবং জনপ্রিয় হয়েছ। কোন কোন

লোক (রাজা) তাদের রাজ্যের জন্য গর্ববোধ করে। বিধর্মীরা যেমন রাজ্য পায় তারা ঠিক তেমনভাবেই রাজ্য পেয়েছে। কিন্তু তোমার যেরকম বিদ্যা, মহত্ব, উদারতা, নির্ভীক হৃদয় এবং সিংহের মত সাহস প্রভৃতি গুণ আছে, তাদের তা নেই।” গিয়াসুদ্দীন সম্বন্ধে মুজাফফর শামসুলখির এই প্রশংসোক্তি খুব মূল্যবান। কারণ বলখি চাটুকার ছিলেন না। তিনি অর্থ বা সম্মান কোন কিছুই চাইতেন না। স্থলতান অযাচিতভাবে তাঁকে অর্থ বা উপহার দিলে তিনি তক্ষণি তা গরীবদের মধ্যে বিলিয়ে দিতেন। যে সমস্ত আলিম রাজাদের সভায় যেতেন, তিনি তাঁদের নিন্দা করতেন তাঁরা তাঁদের বিচার অমর্যাদা করেছেন বলে। স্থতরাং বলখি গিয়াসুদ্দীনের চরিত্র সম্বন্ধে যা বলেছেন, তা সম্পূর্ণ সত্য, সে বিষয়ে কোন সন্দেহ নেই। তাঁর কথা যে সত্য, তা গিয়াসুদ্দীনের অগ্রান্ত কার্যকলাপ থেকেও প্রমাণিত হয়।

একবার গিয়াসুদ্দীন বলখিকে একটি ফরমান পাঠান এবং সেই সঙ্গে অহরোধ জানান, তিনি যেন তাঁর রাজ্য আরও কিছুকাল থাকেন। এতে বলখি দ্রুত ক্ষুণ্ণ হয়ে লেখেন, “বন্ধু! যখন আমি যাত্রা শুরু করেছি, কী করে তার পরিবর্তন করতে পারি? .....(আব) অবস্থান করা যুক্তিযুক্ত নয় এবং তা আমার অবস্থার সঙ্গে খাপ খায় না .....দেবী করা মোটেই বাঞ্ছনীয় নয়। আমি রহুলকে স্বপ্নে দেখেছি, তিনি তিনবার আমায় আমন্ত্রণ জানিয়েছেন।.....অতএব আমি আমার অহুবতী এবং আশ্রিত লোকদের নিয়ে চলে যাচ্ছি। তুমি যদি ফকিরদের যাত্রার দেবী করিয়ে তাদের মন না ভেঙে দিয়ে তাদের হৃদয় বুঝে তার তৃপ্তিবিধান করতে পারতে, তাহলেই ভাল হত। ( pp. 218-219 )

আর একটি ফরমান পেয়ে খুশী হয়ে বলখি গিয়াসুদ্দীনকে লেখেন, “রাজকীয় ফরমানটি নানারকম জ্ঞানের মণিমুক্তায় পরিপূর্ণ। তার সঙ্গে এই চতুষ্ক শ্লোকটি ( quatrain ) আছে, ‘যদি তুমি আধ্যাত্মিক কামনার মদে মাতাল হয়ে থাক, যদি তুমি স্বর্গীয় প্রেমে চিরমত্ত হয়ে থাক, এই ভিখারীর পায়ে তার একটি ফোঁটা ফেলে দাও।’.....যদিও আমি প্রকৃতিস্থ ছিলাম, এই শ্লোকটি আমার মনে মহা উল্লাস জাগিয়ে তুলল।” ( p. 221 ) এই চিঠিটি থেকে গিয়াসুদ্দীনের পাণ্ডিত্য ও কবিত্ব সম্বন্ধে আর একটি প্রমাণ পাওয়া যাচ্ছে। বলখি এই চিঠিতে লিখেছেন যে গিয়াসুদ্দীন তাঁকে যে আলখাল্লা ও পাগড়ী পাঠিয়েছেন, তা তিনি পরিধান করেছেন এবং তার বিনিময়ে তিনি তাঁকে একটি আয়না উপহার

দিয়েছেন; যে শেখের তিনি সেবা করেছিলেন, তিনি এই আয়নায় মুখ দেখতেন বলে বল্খি এই আয়নাটিকে তাঁর পবিত্র স্মৃতিচিহ্ন হিসাবে যত্নে রক্ষা করেছিলেন; এটি তাঁর অত্যন্ত প্রিয় ছিল। কেউ বল্খিকে কিছু দান করলে তিনি তাঁর সাধ্যমত প্রতিদান দেবার চেষ্টা করতেন। সর্বশেষ চিঠিতে বল্খি গিয়াসুদীনকে লেখেন যে তিনি চিরদিনের মত চলে যাচ্ছেন বলে এই চিঠিতে তাঁকে ধর্ম সম্বন্ধে এত উপদেশ দিয়েছেন। আসন্ন যাত্রা সম্বন্ধে মানসিক উদ্বেগ থাকার দরুণ তিনি তাঁর বক্তব্যকে গুছিয়ে লিখতে পারেন নি, গিয়াসুদীন তাঁর “মার্জিত রুচি”র দ্বারা এগুলিকে নিশ্চয়ই সাজিয়ে নিতে সমর্থ হবেন। (p. 222)

কিন্তু ঈশ্বরগত প্রাণ, সর্বত্যাগী, পণ্ডিতাগ্রগণ্য মুজাফফর শাম্‌স্ বল্খি বিধর্মীদের উপর একেবারেই সদয় ছিলেন না। বিভিন্ন চিঠিতে তিনি বিধর্মীদের তীব্র ভাষায় খিকার দিয়েছেন এবং গিয়াসুদীনের মনে বিধর্মীদের প্রতি বিরাগ বর্ধিত করবার চেষ্টা করেছেন। একটি চিঠিতে (pp. 215-216) তিনি গিয়াসুদীনকে লিখেছেন যে বিধর্মীদের উচ্চ রাজপদে নিযুক্ত করা ও মুসলমানদের উপর কর্তৃত্ব করতে দেওয়া উচিত নয়। পরে আয়রা এ' সম্বন্ধে আরও বিস্তৃতভাবে আলোচনা করছি।

বাহোন্, মুজাফফর শাম্‌স্ বল্খির এই সমস্ত চিঠি পড়ে মনে হয়, ‘রিয়াজ-উস-সলাতীনে’ গিয়াসুদীনের গ্রায়পরায়ণতা ও কাজীর আদালতে আসামী হিসাবে দাঁড়ানো সম্বন্ধে যে কাহিনীটি লিপিবদ্ধ হয়েছে, তা সত্য হওয়া খুবই সম্ভব। কারণ ঐ কাহিনীটিতে দেখি গিয়াসুদীন কাজীকে বলছেন যে পবিত্র আইনের (শরিয়ৎ) বিধান পালনে বাধা হওয়ার জগ্গই তিনি তাঁর আদালতে এসেছেন! বল্খির চিঠিগুলিতেও দেখি বল্খি বারবার গিয়াসুদীনকে শরিয়তের বিধান পালন করতে ও গ্রায়পরায়ণ হতে নির্দেশ দিচ্ছেন। গিয়াসুদীন যে ধর্মপ্রাণ ছিলেন এবং বল্খিকে অত্যন্ত ভক্তি করতেন, তা বল্খির চিঠি পড়েই বোঝা যায়। সেইজগ্গ তিনি সত্যই শরিয়তের নির্দেশ অক্ষরে অক্ষরে পালন করতেন বলে মনে হয়। কাজেই তাঁর পক্ষে শরিয়তের বিধান অনুসারে কাজীর বিচারালয়ে আসামী হিসাবে উপস্থিত হওয়া মোটেই অসম্ভব নয়।

মুজাফফর শাম্‌স্ বল্খির পূর্বোক্ত একটি চিঠি থেকে জানা যায় যে, গিয়াসুদীন আজম শাহ প্রথম জীবনে স্বাধ এবং আমোদপ্রমোদে লিপ্ত ছিলেন, কিন্তু পরে

ধর্মগতপ্রাণ হয়ে ওঠেন। মুজাফফর শামস্ বলখি, নূর কুৎব্ আলম প্রভৃতি দরবেশদের প্রভাবে তাঁর ধর্মনিষ্ঠা দিন দিন বাড়তে থাকে এবং এই ধর্মনিষ্ঠায়ই ফলে গিয়াসুদ্দীন বহু অর্থ ব্যয় করে মক্কা ও মদিনায় দু'টি মাদ্রাসা স্থাপন করেন। দু'জন সমসাময়িক আরবদেশীয় ঐতিহাসিকের লেখা বইয়ে—ইব্ন-ই-হজরের ( ১৩৭২-১৪৪২ খ্রি: ) 'ইন্বাউ'ল-গুম্ব'-এ ও তকী অল-ফাসির ( ১৩৭৩-১৪২২ খ্রি: ) 'ইকহু'থ-খামিন'-এ এ' সম্বন্ধে অনেক তথ্য পাওয়া যায় ; এই দু'টি বইয়ে প্রদত্ত বিবরণ থেকে জানা যায় যে,—গিয়াসুদ্দীন আজম শাহ হানাকী ছিলেন ; বিদ্যা ও সম্পদে তিনি ছিলেন ধনু, তত্ত্ববিদ ও ধার্মিক লোকেরা তাঁকে ভালবাসতেন ; তিনি সাহসী, উদার ও দানশীল ছিলেন এবং পণ্ডিত ও ধার্মিক ব্যক্তিদের পৃষ্ঠপোষণ করতেন। তিনি মক্কার উম্মে-হানী ফটকে একটি মাদ্রাসা নির্মাণ করান ; এই মাদ্রাসা এবং এর সম্পত্তির (endowment) জন্ম তিনি বারো হাজার মিশরী স্বর্ণ-মিথকল খরচ করেন এবং এতে মুসলিম আইনের চারটি পদ্ধতি বা মধহব ( হানাকী, শাফেয়ী, মালেকী ও হানবালী ) শিক্ষা-দানের ব্যবস্থা করেন। ৮১৩ হিজরার রমজান মাসে এই মাদ্রাসার নির্মাণ শুরু হয় এবং ৮১৪ হিজরার মাঝের দিকে শেষ হয়। অবশ্য মাদ্রাসার কাজ ৮১৪ হিজরার গোড়ার দিকেই শুরু হয়েছিল। তকী অল-ফাসি (উপরে উল্লিখিত দু'জন আরবী ঐতিহাসিকের অন্যতম) এই মাদ্রাসার অন্যতম অধ্যাপক ছিলেন ; তিনি 'মালেকী' মধহব পড়াতেন। মাদ্রাসায় ষাটজন ছাত্র ছিল—শাফেয়ী ও হানাকী মধহবের কুড়িজন করে এবং মালেকী ও হানবালী মধহবের দশজন করে ছাত্র। মাদ্রাসার নিকটবর্তী অঞ্চলের দু'খণ্ড জমি এবং চারটি জলাধার ক্রয় করে মাদ্রাসাকে দান করা হয়েছিল। এই সম্পত্তির আয়ের এক-পঞ্চমাংশ থেকে শিক্ষকদের বেতন দেওয়া হত, তিন-পঞ্চমাংশ দ্বারা ছাত্রদের ব্যয় নির্বাহ হত, বাকী এক-পঞ্চমাংশের দুই-তৃতীয়াংশ মাদ্রাসা ভবনের দশজন অধিবাসীর ( ভৃত্যাদি ) ব্যয় নির্বাহ হত ও এক-তৃতীয়াংশ বাড়ীর প্রয়োজনীয় জিনিসপত্রের—বাতি, তেল, জল প্রভৃতি—ব্যয়-নির্বাহ হত। মাদ্রাসা-ভবনের সামনে অবস্থিত একটি বাড়ীও ৫০০ স্বর্ণ-মিথকল দামে কিনে মাদ্রাসাকে দান করা হয়। মক্কার এই মাদ্রাসার জন্ম এত খরচ করেও গিয়াসুদ্দীন তৃপ্ত হন নি, তিনি মদিনার 'বাবুল ইসলাম'-এর কাছে 'হিসামুল-অতিক' নামক স্থানে একটি মাদ্রাসা প্রতিষ্ঠা করেছিলেন। এছাড়া তিনি কয়েকবার মক্কা ও মদিনার অধিবাসীদের

মূল্যবান উপহার পাঠিয়েছিলেন। (Islamic Culture, 1958, pp. 199-200 দ্র:)।

গোলাম আলী আজাদ বিলগ্রামী নামে একজন পরবর্তী লেখক তাঁর 'খজানাহ্-ই-আমিরাহ্' বইয়ে এই বিষয়টি সম্বন্ধে কিছু অতিরিক্ত সংবাদ দিয়েছেন। বিলগ্রামী কাজী কুৎবুদ্দীন হানাফীর লেখা 'তারিখ-ই-মক্কা' নামক বই থেকে উপকরণ সংগ্রহ করেছেন এবং তিনি নিজে গিয়াসুদ্দীন আজম শাহ কর্তৃক প্রতিষ্ঠিত মাদ্রাসা, সরাই, খাল প্রভৃতি দেখেছেন বলে জানিয়েছেন। বিলগ্রামী লিখেছেন, "বাংলার শাসক সুলতান গিয়াসুদ্দীন আজম শাহ তাঁর ব্যক্তিগত ভৃত্য যাকুৎ অনানী মারফৎ মক্কা ও মদিনায় এক বিরাট পরিমাণ অর্থ পাঠান ঐ দুই পবিত্র স্থানের অধিবাসীদের মধ্যে বণ্টন করবার জন্ত এবং পবিত্র মক্কা শহরে তাঁর নামে একটি মাদ্রাসা ও একটি সরাই স্থাপন করবার জন্ত। তিনি (যাকুৎ অনানী) ওয়াক্ফ তৈরী করার জন্ত জমি কিনলেন এবং শিক্ষা প্রভৃতি জনহিতকর কাজের জন্ত অর্থব্যয় করলেন। মক্কার শরীফ মৌলানা হাসান-বিন-অজলানের কাছে তিনি একটি চিঠি লিখলেন এবং তাঁকে মূল্যবান সব উপহার পাঠালেন। শরীফ তা গ্রহণ করে সুলতানের ইচ্ছা অহুসারে কাজ করার আদেশ জারী করলেন। শরীফ তাঁর পারিবারিক প্রথা অহুসারে (প্রেরিত অর্থের) এক তৃতীয়াংশ গ্রহণ করলেন এবং অবশিষ্টাংশ পবিত্র শহর দু'টির বিদ্বান ও অভাবগ্রস্ত লোকদের মধ্যে বণ্টন করা হল। এত অর্থ প্রেরিত হয়েছিল যে দুই পবিত্র স্থানের প্রত্যেক লোকই তার অংশ পেল। যাকুৎ 'বাব-ই-উম্মেহানী' নামক স্থানের কাছে মাদ্রাসা ও সরাই নির্মাণের জন্ত দু'টি বাড়ী কিনলেন। বাড়ী দু'টি ভেঙ্গে ফেলে (তাদের জায়গায়) মাদ্রাসা ও সরাই নির্মাণ করা হল। দুই আসীল চার রহু'বা জমি কেনা হল মাদ্রাসার সম্পত্তি হিসাবে। তিনি (যাকুৎ) চারটি মধ্‌হবের চার জন শিক্ষককে নিযুক্ত করলেন এবং ষাট জন ছাত্র সংগৃহীত হল। এর খরচ (মাদ্রাসার) সম্পত্তির আয় থেকে নির্বাহ হবার ব্যবস্থা করা হল। তিনি মাদ্রাসার সামনে পাঁচশো স্বর্ণ-মিথ্‌কল দিয়ে আর একটি বাড়ী কিনলেন এবং এটিকে সরাইয়ের সম্পত্তি করে দিলেন। যে জমির উপর মাদ্রাসা ও সরাই তৈরী হয়েছিল, তার জন্ত এবং দুই আসীল চার রহু'বা জমির জন্ত মৌলানা হাসান বারো হাজার স্বর্ণ-মিথ্‌কল নিলেন। এ ছাড়াও তিনি এক বিরাট পরিমাণ অর্থ নিলেন, কত তা কেউ বলতে পারে না। সুলতান

গিয়াসুদ্দীন আরাকান্ নামক স্থানে একটি খাল খনন করবার জন্ত পূর্বোক্ত যাকুৎ মারফৎ অর্থ পাঠান। মৌলানা হাসান তা নিয়ে বলেন, ‘এর জন্ত প্রয়োজনীয় ব্যবস্থা আমরাই করব।’ ঐ অর্থের পরিমাণ ত্রিশ হাজার স্বর্ণ-মিথকল।”\* (Social History of the Muslims in Bengal by Abdul Karim, pp. 49-50 দ্রঃ)। মৌলানা হাসান এই অর্থ অল্প কাজে খরচ করেছিলেন বলে সূত্রান্তরে উল্লিখিত হয়েছে। পঞ্চদশ শতাব্দীর আরবী ঐতিহাসিক অল-সখাওয়া লিখেছেন যে যাকুৎ অনানী জাতিতে হাবশী ছিলেন এবং ৮১৫ হিজরায় তিনি পরলোক গমন করেন।

ইব্ন-ই-হজরের ‘ইন্বাউ’ল-গুম্ব’ থেকে জানা যায় যে, খান-ই-জহান নামে গিয়াসুদ্দীন আজম শাহের একজন উজীর ছিলেন; এঁর প্রকৃত নাম যাহিয়া, গিতার নাম আরব শাহ; ৮১৪ হিজরায় খুব করুণভাবে এর মৃত্যু হয়। ‘নজহতুল-খওয়াতির’ নামে একটি অবাচীন গ্রন্থের (এই গ্রন্থেও কুৎবুদ্দীনের ‘তারিখ-ই-মক্কা’র সাফ্য উদ্ধৃত করা হয়েছে) মতে খান-ই-জহানই গিয়াসুদ্দীনকে মকায় মাদ্রাসা খোলার অনুরোধ দিয়েছিলেন এবং মদিনার শাসনকর্তা ও অধিবাসীদের ইনি অনেক টাকাকড়ি ও জিনিসপত্র উপহার পাঠিয়েছিলেন; এঁর ভৃত্য হাজী ইকবাল এই সব উপহার নিয়ে যাকুতের সঙ্গে গিয়েছিল কিন্তু জেড্ডার কাছে একটি নৌকা ডুবে যাওয়ায় অনেক উপহারসামগ্রী নষ্ট হয়ে যায় (Islamic Culture, 1958, pp. 199-207 দ্রঃ)।

বিদেশে দূত প্রেরণ গিয়াসুদ্দীন আজম শাহের একটি অভিনব ও প্রশংসনীয় বৈশিষ্ট্য। পারস্যের সিরাজে কবি হাফিজের কাছে এবং আরবের তীর্থস্থান মক্কা ও মদিনায় তিনি দূত পাঠিয়েছিলেন, তা আমরা দেখে এসেছি। অবশ্য সিরাজে তিনি দূত পাঠিয়েছিলেন তাঁর কাব্যামোদী মনের তাগিদে এবং মক্কা-মদিনায় দূত পাঠিয়েছিলেন ধর্ম-নিষ্ঠার তাগিদে। কিন্তু নিছক বিদেশী রাষ্ট্রের সঙ্গে বন্ধুত্বপূর্ণ সম্পর্ক স্থাপনের জন্ত তিনি দূত ও উপঢৌকন পাঠিয়েছিলেন, এরকম দৃষ্টান্তও আমরা অন্তত দু’টি পাই। প্রথমবার তিনি তা পাঠিয়েছিলেন ভারতবর্ষেরই আর একটি রাজ্যের শাসককে। এই সময়ে খওয়াজা-ই-জহান উপাধিদারী খোজা মালিক সারওয়ার স্বাধীন ও পরাক্রান্ত জৌনপুর রাজ্যের প্রতিষ্ঠা করেছিলেন। ৭৯৬ হিজরার রজব মাসে (মে, ১৩৯৪ খ্রিঃ) তিনি দিল্লী

\* এই বিবরণ থেকে মৌলানা হাসানকে বহুবিধাজনক লোক বলে মনে হয় না



থেকে জৌনপুরে যান এবং কনৌজ, করহ, অযোধ্যা, সন্দীলহ, দালমু, বহরাইচ, বিহার ও ত্রিহুত প্রভৃতি অঞ্চল জয় করে তার একচ্ছত্র অধিপতি হয়ে বসেন। প্রামাণিক গ্রন্থ 'তারিখ-ই-মুবারক শাহী'তে ( Eng. Translation, p. 165 ) লেখা আছে, "জাজনগরের রায় এবং লখনৌতির অধিপতি, যারা প্রতি বছর দিল্লীতে হাতী পাঠাতেন, তাঁরা এখন খওয়াজা-ই-জহানকে হাতী উপহার দিলেন।" বলা বাহুল্য, এই সময় লখনৌতি অর্থাৎ বাংলার অধিপতি ছিলেন গিয়াসুদ্দীন আজম শাহ, জৌনপুর সাম্রাজ্য প্রতিষ্ঠার ৪৫ বছর আগেই তিনি রাজা হন এবং খওয়াজা-ই-জহানের মৃত্যুর ১০১১ বছর পরে তাঁর মৃত্যু হয়। অতএব তিনিই খওয়াজা ই-জহানকে হাতী পাঠিয়েছিলেন। বলা বাহুল্য, এই হাতী প্রেরণ একটা স্বীকারের নিদর্শন নয়, সমবক্ষ রাজা হিসাবে উপহার দান। এখানে বিশেষ উল্লেখযোগ্য, সমসাময়িক মুসলিম ঐতিহাসিক রচিত কোন গ্রন্থে গিয়াসুদ্দীনের এই একটিমাত্র কাজের উল্লেখ পাওয়া যায়।

দ্বিতীয় যে বিদেশী রাজার কাছে গিয়াসুদ্দীন দূত ও উপহার পাঠিয়েছিলেন, তিনি স্বদূর চীনদেশের সম্রাট 'মিং' বংশীয় য়ুং-লো। চীনদেশের বিভিন্ন ইতিহাসগ্রন্থ থেকে গিয়াসুদ্দীনের এই দূত প্রেরণের কথা জানা যায়।

'শি-য়াং-ছাও কুং-তিয়েন-লু' নামে বইটিতে লেখা আছে,

"সম্রাট য়ুং-লোর রাজত্বের ষষ্ঠ বর্ষে ( ১৪০৮ খ্রীঃ ) ( বাংলার ) রাজা জায়-য়া-সজ্জ-তিং ( গি-য়া-সু-দ্দীন ) চীনদেশে ভেট সমেত এক দূত পাঠান।"

'শু য়ু-চো-ৎজ্ লু' নামে বইটিতে লেখা আছে,

"য়ুং-লো'র রাজত্বের তৃতীয় বর্ষে ( ১৪০৫ খ্রীঃ ) বাংলার রাজা জায়-য়া-সজ্জ-তিং চীনের রাজসভায় দূত পাঠান। ( চীন ) সম্রাটও বাংলার রাজা ও রানাকে আনন্দকর রেশমী কাপড় উপহার পাঠাতে আদেশ দেন। য়ুং-লো'র রাজত্বের ষষ্ঠ বর্ষে ( ১৪০৮ খ্রীঃ ) ঐ দেশের ( বাংলার ) রাজা আবার দূত পাঠালেন। এই দূত ভেটসমেত তাই-ৎ-সাং বন্দরে এসে পৌঁছোলেন। ( চীনের ) সম্রাট তাঁকে অভ্যর্থনা জানাবার জন্ত পররাষ্ট্র দপ্তরের মন্ত্রীকে সেখানে পাঠালেন।

'মিং' রাজবংশের সরকারী ইতিহাসগ্রন্থ 'মিং-শু-এ এ'সম্বন্ধে লেখা আছে, "য়ুং-লো'র রাজত্বের ষষ্ঠ বর্ষে ( ১৪০৮ খ্রীঃ ) বাংলার রাজা উপহার সমেত চীনে একজন দূত পাঠান। চীনও প্রতিদানস্বরূপ অনেক উপহার পাঠায়। য়ুং-লোর রাজত্বের সপ্তম বর্ষে ( ১৪০৯ খ্রীঃ ) তাঁদের ( বাংলার )

সূত ২৩০ জন রাজকর্মচারী সঙ্গে নিয়ে চীনে এসেছিলেন। (চীন) সম্রাট সেই সময় বিদেশের সঙ্গে সংযোগ রক্ষার নীতি গ্রহণ করেছিলেন। কাজেই তিনি বাংলাদেশে অনেক উপহার পাঠালেন। এর পর থেকে তারা (বাংলার রাজদূতেরা) প্রতি বছরই (চীনে) আসত।”

এই সব চীনা গ্রন্থের সাক্ষ্য বিশ্লেষণ করলে বোঝা যায় যে গিয়াসুদ্দীন আজম শাহ চীন-সম্রাটের কাছে প্রথমবার ১৪০৫ খ্রীষ্টাব্দে, দ্বিতীয়বার ১৪০৮ খ্রীষ্টাব্দে ও তৃতীয়বার ১৪০৯ খ্রীষ্টাব্দে দূত ও উপহার পাঠিয়েছিলেন। তারপর থেকে প্রতি বছরই বাংলার দূতেরা চীনে যেত। চীন-সম্রাটও গিয়াসুদ্দীনকে নানারকম উপহার পাঠিয়েছিলেন। ১৪১০-১১ খ্রীষ্টাব্দে গিয়াসুদ্দীন আজম শাহের মৃত্যু হয়। বাংলার দূতেরা ১৪১২ খ্রীষ্টাব্দে তাঁর মৃত্যু সংবাদ নিয়ে চীনে পৌঁছেছিল, এ’ কথা ‘মিং-শু’ থেকে জানা যায়। (এসম্বন্ধে বিস্তৃত আলোচনার জ্ঞাত বর্তমান বইয়ের ষষ্ঠ অধ্যায় দ্রষ্টব্য)।

এখানে একটি কথা বলবার আছে। ফিলিপ্‌স তাঁর এক গ্রন্থে (Journal of the Royal Asiatic Society, 1895, pp. 529-533 দ্রষ্টব্য) লিখেছিলেন যে চীন সম্রাট য়ং-লোই প্রথম বাংলাদেশে দূত পাঠিয়েছিলেন। ফিলিপ্‌সের মতে য়ং-লো তাঁর যে পূর্ববর্তী সম্রাটকে সিংহাসনচ্যুত করে রাজা হয়েছিলেন, সেই হুই-তি সাগরপারের কোন দেশে লুকিয়ে আছেন ভেবে য়ং-লো বিভিন্ন দেশে দূত পাঠাতে শুরু করেন এবং এইভাবে বাংলাদেশেও দূত পাঠান। কিন্তু ‘শু-য়ং-চৌ-জং-লু’তে পরিষ্কার লেখা আছে যে বাংলার রাজা গিয়াসুদ্দীনই প্রথম ১৪০৫ খ্রীষ্টাব্দে চীনে দূত পাঠিয়েছিলেন। তার পরে চীন-সম্রাট বাংলায় দূত পাঠান। পঞ্চদশ শতাব্দীর একেবারে প্রথমে চীনে দূত প্রেরণ গিয়াসুদ্দীন আজম শাহের দূরদর্শিতা ও প্রগতিশীল মনের পরিচায়ক।

এতক্ষণ পর্যন্ত আমরা গিয়াসুদ্দীন আজম শাহের যে সমস্ত কার্যকলাপ সম্বন্ধে আলোচনা করলাম, তাদের মধ্যে তাঁর কৃতিত্বই প্রকাশ পেয়েছে। কিন্তু তাঁদের যেমন গুরু ও কৃষ্ণ দুটি পক্ষই থাকে, তেমনি গিয়াসুদ্দীন আজম শাহের কৃতিত্বের নিদর্শনের পাশে তাঁর ব্যর্থতার নিদর্শনও দাঁড়িয়ে আছে। এখন এই দিক সম্বন্ধেই আমরা আলোচনা করব।

গিয়াসুদ্দীনের ব্যর্থতা সবচেয়ে প্রকট হয়েছে যুদ্ধবিগ্রহের ব্যাপারে। যদিও তিনি নিজের পিতার সঙ্গে যুদ্ধে সাফল্য লাভ করে বাংলার সিংহাসনে বসেছিলেন, তাহলেও এরই মধ্য দিয়ে তাঁর সর্বনাশের পথ প্রশস্ত হয়েছিল।

কারণ, পিতার সঙ্গে অন্তত কয়েক বছরব্যাপী বিরোধের পর তিনি তাঁর সঙ্গে যুদ্ধ করেন। বিরোধের সময়টুকুতে দেশের সংহতি নষ্ট হয়ে গিয়েছিল। আর পিতা-পুত্রের যুদ্ধের ফলে উভয় পক্ষের যে ক্ষতি হয়েছিল, তাতে দেশের মোট সামরিক শক্তি অনেকখানি হ্রাস পেয়েছিল সন্দেহ নেই।

সমগ্র বাংলার অধীশ্বর হবার পরেও গিয়াসুদ্দীন কয়েকবার বিভিন্ন শক্তির সঙ্গে যুদ্ধে প্রবৃত্ত হন এবং তারও ফল ভাল হয় নি। বুকাননের বিবরণীর মতে গিয়াসুদ্দীন শহাব খান নামে এক ব্যক্তির সঙ্গে দীর্ঘকাল ধরে যুদ্ধ করেন, কিন্তু সাফল্য লাভ করতে পারেন নি। এই জাতীয় দীর্ঘস্থায়ী যুদ্ধ ও ক্রমাগত অসাফল্যের ফলে যে কোন রাজারই শক্তিহ্রাস পেতে বাধ্য। বুকানন-বিবরণীর মতে দরবেশ নূর কুৎব আলম গিয়াসুদ্দীন ও শহাব খানের মধ্যে শান্তি স্থাপনের চেষ্টা করেন। সন্ধির প্রস্তাব অনেকদূর এগিয়েছিল, এমন সময় গিয়াসুদ্দীন শহাব খানকে হঠাৎ আক্রমণ করে বন্দী করেন। (“...Shah Nur Kotub Alam...attempted to make a peace with a Shaheb Khan, with whom Ghyashudin had been carrying on an unsuccessful war. While the treaty was going forward, Ghyashudin seized on his adversary.”) এ কথা সত্য হলে বলতে হবে, গিয়াসুদ্দীন বিশ্বাসঘাতকতা করে শহাব খানকে পরাজিত করেছিলেন; দীর্ঘকালব্যাপী ব্যর্থ সংগ্রামের পরে এইভাবে বিশ্বাসঘাতকতা দ্বারা জয়লাভ করে গিয়াসুদ্দীন কোন রকমে তাঁর মান হরতো বাঁচিয়েছিলেন কিন্তু মোটের উপর তাঁর যে ক্ষতি হয়েছিল, এই জয়ে তা পূরণ হবার কথা নয়।

বিভিন্ন সূত্র থেকে জানা যায় যে, গিয়াসুদ্দীন কামতা ও কামরূপ রাজ্যে অভিযান করেছিলেন। কুচবিহারে ১৮৬৩ খ্রীষ্টাব্দে এবং গোহাটিতে ১৮৯৩ খ্রীষ্টাব্দে যে মাটির নীচে পৌতা মুদ্রাসমষ্টি আবিষ্কৃত হয়েছিল তাদের সর্বাধুনিক মুদ্রা যথাক্রমে ৭৯৯ ও ৮০২ হিজরার এবং এগুলি গিয়াসুদ্দীন আজম শাহের নামাঙ্কিত। এব থেকে মনে হয়, কামতা ও কামরূপ রাজ্যের কিয়দংশে অন্তত সাময়িকভাবে গিয়াসুদ্দীনের অধিকার স্থাপিত হয়েছিল। গোহাটির যাহুৎবের গিয়াসুদ্দীন আজম শাহের একটি শিলালিপি সংরক্ষিত আছে। মূলে এটি কোথায় ছিল, তা জানা যায় না। এটি যদি ঐ অঞ্চলেরই হয়, তাহলে কামরূপে গিয়াসুদ্দীনের অধিকার সন্দেহ আর একটি প্রমাণ পাওয়া যায়। কামরূপে যে ইলিয়াস শাহ ও সিকন্দর শাহের অধিকার ছিল, তা কামরূপের

টাকশাল থেকে উৎকীর্ণ সিকন্দর শাহের ৭৫২ হিজরার মুদ্রা থেকে বোঝা যায়। সিকন্দর শাহ ও গিয়াসুদ্দীন আজম শাহের বিরোধের সময় সম্ভবত কামরূপ আবার স্বযোগ বুঝে স্বাধীনতা ঘোষণা করেছিল, কারণ পরবর্তীকালে সেখানকার টাকশালে বাংলার সুলতানের আর কোন মুদ্রা উৎকীর্ণ হতে দেখা না। ‘যোগিনীতন্ত্র’ নামে একটি গ্রন্থে কামরূপে ১৩১৬ (?) (তারিখটি স্পষ্ট ভাবে পড়া যায় নি) শকাব্দে (= ১৩২৪-২৫ খ্রি:) মুসলমানদের আক্রমণের এবং দ্বাদশবর্ষব্যাপী আধিপত্যের অস্পষ্ট উল্লেখ পাওয়া যায় (Gait's Report on the progress of Historical Research in Assam, pp. 52-53 দ্রষ্টব্য)। কেউ কেউ মনে করেন এর দ্বারা কামরূপে বাংলার সুলতান গিয়াসুদ্দীন আজম শাহের আক্রমণ ও আধিপত্যের কথাই বোঝাচ্ছে, কারণ কামরূপের আশেপাশে সে সময় আর কোন মুসলিম রাজ্য ছিল না। যোগিনীতন্ত্রের কথা বিশ্বাস করলে বলতে হয় যে মুসলমানেরা (যবন) কোচদের (কুবাচ) সঙ্গে মিলিতভাবে কামরূপ শাসন করে, কিন্তু ১২ বছর যুক্ত শাসনের পর কোচদের সঙ্গে অহোমদের (সৌমর) সন্ধি স্থাপিত হয় এবং কামরূপে শান্তি ফিরে আসে। অবশ্য এই জাতীয় অর্ধাচীন সূত্রের অস্পষ্ট উক্তি এবং তারিখের সন্দেহজনক পাঠের উপর নির্ভর করে কোন সুরূপিত সিদ্ধান্ত করা চলে না। অসমীয়া বুরঞ্জীর সাক্ষ্য বিশ্বাস করলে বলতে হয় যে গিয়াসুদ্দীনের কামতা-রাজ্য জয়ের অভিযান ব্যর্থতায় পর্যবসিত হয়েছিল। কয়েকটি বুরঞ্জীতে লেখা আছে যে, অহোম-রাজ সুদঙ্গফা (১৩২৭-১৪০৭ খ্রি:) কামতা-রাজের উপরে অগ্রসর হয়ে তাঁর রাজ্য আক্রমণ করেছিলেন, কারণ তাঁর স্ত্রীর গুপ্তপ্রণয়ী তাই-সুলাইকে কামতা-রাজ আশ্রয় দিয়েছিলেন। এইভাবে কামতা-রাজ্য একদিক থেকে অহোম-রাজ কর্তৃক আক্রান্ত হলে বাংলার সুলতান স্বযোগ বুঝে কামতা-রাজ্য আক্রমণ করেন। কামতা-রাজ তখন বিপদ দেখে অহোম-রাজের সঙ্গে তাঁর কন্যা ভাজনীকে বিবাহ দিয়ে তাঁর সঙ্গে সন্ধি করলেন এবং অহোম-রাজ ও কামতা-রাজ তখন এক সঙ্গে বাংলার সুলতানের বিরুদ্ধে তাঁদের সৈন্যবাহিনী সমবেত করে রুখে দাঁড়ালেন। তার কলে বাংলার সুলতানের সৈন্যবাহিনীকে পরাস্ত করে নদীর এপার পর্যন্ত গিয়েই ক্ষান্ত হতে হল (The Delhi Sultanate, Bharatiya Vidya Bhavan, pp. 391-392 দ্রষ্টব্য)। বলা বাহুল্য এই সময়ে গিয়াসুদ্দীন আজম শাহই বাংলার সুলতান ছিলেন।

এই সমস্ত বিবরণ পড়লে মনে হয়, গিয়াসুদ্দীন আজম শাহের সামরিক

অভিযানগুলির একটা বড় অংশই ব্যর্থতায় পর্যবসিত হয়েছিল এবং অনেক শক্তি ক্ষয়ের পর কোন কোন ক্ষেত্রে তিনি মাত্র আংশিক সাফল্য অর্জন করেছিলেন।

সমসাময়িক কবি বিদ্যাপতির বিবিধ গ্রন্থ পড়লে মনে হয়, তাঁর পৃষ্ঠপোষক রাজা শিবসিংহ গিয়াসুদ্দীন আজম শাহকে যুদ্ধে পরাজিত করেছিলেন। কারণ ‘পুরুষপরীক্ষা’তে বিদ্যাপতি শিবসিংহ সম্বন্ধে বলেছেন, “যো গোড়েশ্বর-গজ্জনেশ্বর গণক্ষেপিত লক্ষা যশো” এবং ‘শৈবদর্পস্বসারে’ শিবসিংহ সম্বন্ধে বলেছেন, “শোষণবিজিত গৌড়গজ্জনমহীপালোপনয়ীকৃত্য”। ‘পুরুষপরীক্ষা’ শিবসিংহের রাজত্বকালে লেখা। ১৪১৫ খ্রীষ্টাব্দে শিবসিংহের রাজত্ব শেষ হয় (বর্তমান গ্রন্থ, চতুর্থ অধ্যায় দ্রষ্টব্য)। ‘পুরুষপরীক্ষা’ তার আগেই লেখা। শিবসিংহের সঙ্গে “গৌড়েশ্বর” বা “গৌড়মহীপাল”র যুদ্ধ তারও আগেকার ঘটনা। এদিকে গিয়াসুদ্দীন আজম শাহ ১৪১০-১১ খ্রীঃ পর্যন্ত রাজত্ব করেছিলেন। সুতরাং শিবসিংহ কর্তৃক পরাজিত গৌড়েশ্বর গিয়াসুদ্দীন আজম শাহ হবারই খুব বেশী সম্ভাবনা। কীভাবে, কখন ও কোথায় শিবসিংহের সঙ্গে গৌড়েশ্বরের যুদ্ধ হয়েছিল, সে সম্বন্ধে কিছুই জানা যাচ্ছে না। নিজের পৃষ্ঠপোষক সম্বন্ধে বিদ্যাপতির এই উক্তি সম্পূর্ণ সত্য না অতিরঞ্জিত, তা’ও বোঝা যাচ্ছে না; তবে সত্য হওয়া মোটেই অসম্ভব নয়। ক্ষুদ্র রাজ্যের অধিপতি শিবসিংহের কাছে যদি গিয়াসুদ্দীন আজম শাহ পরাজিত হয়ে থাকেন, তাহলে বলতে হবে ঐ সময়ে তাঁর সামরিক শক্তি একেবারে দৈন্য-দশায় এসে পৌঁছেছিল। এর আগেকার দীর্ঘবিলম্বিত এবং অনৈক্যে ব্যর্থ সমর-প্রচেষ্টাগুলিই বোঝায় এর প্রদান কারণ। শিবসিংহের সঙ্গে রাজা গণেশের বন্ধুত্ব ছিল; গণেশের অভ্যুত্থানে সাহায্য করার জন্যই সম্ভবত শিবসিংহ গৌড়েশ্বরকে সঙ্গে যুদ্ধ করেছিলেন।

গিয়াসুদ্দীন আজম শাহ হিন্দুদের সম্বন্ধে যে নীতি অনুসরণ করেছিলেন, তার সম্বন্ধে এখন কিছু আলোচনা করা দরকার। আমাদের মনে হয়, তাঁর রাজত্বের শেষের দিকে তিনি এই বিষয়ে ভ্রান্ত পথে পরিচালিত হয়েছিলেন এবং শেষ পর্যন্ত এ ব্যাপারে তিনি শোচনীয় ব্যর্থতার পরিচয় দিয়েছিলেন। এখন আমরা সেই কথাতাই খাসাছি।

ইলিয়াস শাহী বংশের স্থলতানেরা যুদ্ধবিগ্রহ ও শাসনকাযের ব্যাপারে কেবলমাত্র মুসলমানদের উপবেই নির্ভর করতেন না, হিন্দুদেরও সাহায্য নিতেন। দিল্লীর পরাক্রান্ত সম্রাট ফিরোজ শাহ তোগলকের আক্রমণকে প্রতিহত

করে শামসুদ্দীন ইলিয়াস শাহ যে নিজের স্বাধীনতা অক্ষুণ্ণ রাখতে পেরেছিলেন, এর পিছনে হিন্দুদের সাহায্য একটা বড় উপাদান জুগিয়েছিল। একডালার রণক্ষেত্রে কিরোজ শাহের বিরুদ্ধে ইলিয়াস শাহের শক্তির প্রধান স্তম্ভ ছিল হিন্দু পাইক-বাহিনী এবং তাদের নেতা মহদেব। অহুমান করতে পারি ইলিয়াস শাহের পুত্র সিকন্দর শাহের রাজত্বকালেও হিন্দুদের প্রাধান্য হ্রাস পায় নি। সিবন্দরের পুত্র গিয়াসুদ্দীন আজম শাহের রাজত্বকালের অসুস্থ প্রথমার্ধ পর্যন্ত যে হিন্দু বাহ্য উচ্চ সরকারী পদে অধিষ্ঠিত ছিল, তা আমরা জানতে পারি গিয়াসুদ্দীনকে লেখা মুজাফফর শাম্‌স্ বল্‌গির একটি চিঠি (Proceedings, Ind. Hist. Cong., 1956, pp. 215 216 দ্রষ্টব্য) থেকে। চিঠিটি ৮০০ হিজরার শেষ দিকে লেখা, কারণ এর মধ্যেই এক জায়গায় আছে, “আটশো সাল (হিজরা) সমাপ্ত হল।” এই চিঠিতেই বল্‌খি গিয়াসুদ্দীনকে লিখেছেন,

“মগান্ দৈশ্বর বলেছেন, ‘বিশ্বাসিগণ! তোমাদের শ্রেণীর বাইরের কারো সঙ্গে অন্তরঙ্গতা স্থাপন কোরো না।’ টাকা এবং শব্দকোষগুলিতে এই বিষয়টির মর্মার্থস্বরূপ এই কথা বলা হয়েছে যে মুসলমানরা কাফের এবং অপরিচিত লোকদের বিশ্বস্ত কর্মচারী বা মন্ত্রী হিসাবে নিযুক্ত করবে না। যদি তারা (মুসলমানরা) বলে যে তাদের (অমুসলমানদের) বন্ধু বা প্রিয়জন তারা বানাচ্ছে না, সুবিধার জন্ত এরকম করছে,—তার উত্তর এই যে, ভগবান বলেছেন এতে সুবিধা হয় না, এই বাপার গোলযোগ ও বিদ্রোহের কারণ হয়। তিনি (ভগবান) বলেছেন, ‘তারা তোমাকে দূষিত করতে ব্যর্থ হবে না’ এবং ‘তারা তোমার জন্ত গোলযোগ সৃষ্টি করতে ইতস্তত করবে না বা বিরত হবে না।’ অতএব ভগবানের আদেশ শোনা এবং আমাদের দুর্বল বিচারকে বিসর্জন দেওয়াই আমাদের অবশ্যকর্তব্য। ভগবান বলেছেন, ‘তারা কেবলমাত্র তোমার ধ্বংস কামনা করতে পারে’ অর্থাৎ যখনই তুমি তাদের সঙ্গে অন্তরঙ্গতা স্থাপন করবে, তারা তোমাকে মন্দ কাজে জড়িত করাই পছন্দ করবে। কাফেরদের কিছু কাজ দেওয়া যেতে পারে, কিন্তু তাদের ‘ওয়ার্লি’ (প্রধান তত্ত্বাবধায়ক বা শাসনকর্তা) নিযুক্ত করা উচিত নয়, কারণ তা করলে তারা মুসলমানদের উপর কর্তৃত্ব লাভ করবে এবং তাদের উপর মুক্কব্বীদানা ফলাবে। ভগবান বলেছেন, ‘মুসলমানরা যেন কাফেরদের বন্ধু বা সহায়ক হিসাবে গ্রহণ করে ভগবানকে উপেক্ষা না করে।’ যদি কেউ তা করে, তাহলে ভগবানের সাহায্য তারা পাবে

না—এক সতর্কবাণী ছাড়া, যাতে আমরা তোমাদের তাদের (কাফেরদের) হাত থেকে রক্ষা করতে পারি। যারা মুসলমানদের উপরে কাফেরদের কর্তৃত্ব দান করেছে, তাদের বিরুদ্ধে কোরান, হাদিস্ এবং ঐতিহাসিক গ্রন্থগুলিতে অনেক তীব্র সতর্কবাণী লেখা আছে। 'ভগবান অপ্রত্যাশিত জায়গা থেকে সাহায্য দান করেন এবং তিনিই নুক্তি দেন। খাণ্ড, জয় এবং সমৃদ্ধি দান করতে তিনি প্রতিজ্ঞাবদ্ধ।' পরাজিত কাফেররা নতমস্তকে তাদের নিজেদের যে ভূমি রয়েছে সেখানে নিজেদের শক্তি ও কর্তৃত্ব ফলায় এবং সেই অঞ্চল শাসন করে। কিন্তু তারা ইসলামের দেশগুলিতে মুসলমানদের উপরে উচ্চপদস্থ কর্মচারী হিসাবে নিযুক্ত হয়েছে এবং তাদের উপরে হুকুম চালাচ্ছে। এইরকম ব্যাপার ঘটনা উচিত নয়।"

এই চিঠিটি পড়লে বোঝা যায় যে মুজাফফর শাল্‌স্ বল্‌খি বিধর্মীদের উপর একেবারেই প্রসন্ন ছিলেন না। যাহোক, এই চিঠিগানি অত্যন্ত গুরুত্বপূর্ণ। এর থেকে দু'টি বিষয় খুব পরিষ্কারভাবে জানা যাচ্ছে।

(১) অন্তত ৮০০ হিজরী পর্যন্ত গিয়াসুদ্দীন আজম শাহের রাজ্যে বহু হিন্দু উচ্চ রাজপদে নিযুক্ত হয়েছিলেন এবং অনেক মুসলমান এইসব হিন্দুর অধীনে কাজ করতেন।

(২) বিধর্মী-বিদ্বেষী মুজাফফর শাল্‌স্ বল্‌খি অমুসলমানদের উচ্চ রাজপদে নিযুক্ত করা পছন্দ করেননি এবং গিয়াসুদ্দীনকে এই নীতি পরিত্যাগ করতে উপদেশ দিয়েছিলেন।

বলা বাহুল্য, ধর্মপ্রাণ মুসলমানদের কাছে দরবেশ বল্‌খির এই উপদেশ যতই মধুর লাগুক না কেন ব্যবহারিক দিক থেকে তা কোনমতেই সমর্থন করা চলে না। কারণ মুসলমান স্বলতানরা যে হিন্দু প্রেমের বশবর্তী হয়ে হিন্দুদের উচ্চ রাজপদে নিয়োগ করতেন, তা নয়; সমস্ত পদের জন্য যোগ্য মুসলমান পাওয়া যেত না বলেই তাঁরা হিন্দুদের অনেক পদে নিয়োগ করতে বাধ্য হতেন। এইসব পদ থেকে হিন্দুদের অপসারণ করার অর্থ দেশের শক্তি ও শাসন-ব্যবস্থাকে পঙ্গু করা। উপরন্তু হিন্দুদের এইসব পদ থেকে বরখাস্ত করলে তাদের মনে অসন্তোষের সৃষ্টি হত। তাদের রাখলে যে গোলযোগ ও বিদ্রোহের সম্ভাবনা আছে বলে বল্‌খি বলছেন (ভগবানের আদেশের দোহাই দিয়ে), তাদের সরালে তার চেয়ে বেশী গোলযোগ ও বিদ্রোহের সম্ভাবনা দেখা দিত। কিন্তু তা সত্ত্বেও বল্‌খি ঈশ্বর, কোরান, হাদিস্, ঐতিহাসিক

গ্রন্থ প্রভৃতির দোহাই দিয়ে এবং ভগবানই খাণ্ড, জয় ও সমৃদ্ধি দান করবেন ইত্যাদি কথা বলে গিয়াসুদ্দীনকে বোঝাবার চেষ্টা করেছেন যে বিধর্মীদের উচ্চ রাজপদে নিয়োগ করা উচিত নয় এবং তাঁর প্রয়োজনও নেই !

অধ্যাপক সৈয়দ হাসান আস্কারি বল্খির মতকে সমর্থন করে লিখেছেন, "In view of what happened shortly after to the Ilyassshahi dynasty at the hands of the Hindu Minister, Raja Kans or Ganesh, the warning given by the saint of Bihar to Ghayāsu-ddin Azam Shah appears to be rather prophetic." ( Proceedings, Ind. Hist. Cong., 1956, p. 216 )।

কিন্তু, বাংলার সুলতান হিন্দুদের উচ্চপদে নিয়োগ করেছিলেন বলে হিন্দুদের বাড় বেড়েছিল এবং তারই ফলে একজন হিন্দু অত্যধিক প্রতাপশালী হয়ে উঠে ইলিয়াস শাহী বংশকে উচ্ছেদ করে বাংলার সিংহাসন অধিকার করেছিলেন, এই ধারণা সত্য নয়। মুজাফফর শাম্‌স্ বল্খির একান্ত ভক্ত ধর্মপ্রাণ সুলতান গিয়াসুদ্দীন আজম শাহ বল্খির উপদেশের ফলে হিন্দুদের সম্বন্ধে যে নীতি গ্রহণ করেছিলেন, তার কথা পর্যালোচনা করলেই বাজা গণেশের অভ্যুত্থানের প্রকৃত কারণ বোঝা যাবে। ৮০০ হিজরায় বল্খি গিয়াসুদ্দীনকে এই উপদেশ দেন। গিয়াসুদ্দীন যে বল্খির উপদেশ সত্যিই শুনেছিলেন, তার প্রমাণ আছে। ৮০৮ হিঃর পরে গিয়াসুদ্দীন আজম শাহ ও তাঁর পুত্র সৈয়দুদ্দীন হুম্‌জা শাহের রাজত্বকালে চীন-সম্রাটের কাছ থেকে কয়েকবার বাংলার রাজসভায় দূতের দল এসেছিলেন; তাঁরা বাংলার সুলতানের অমাত্যদের মধ্যে একজনও অমুসলমান দেখতে পান নি। চীনা দূতদলের দোভাষী মা-হোয়ান 'য়িং-য়া-শুং-লান' গ্রন্থে বাংলাদেশ সম্বন্ধে লিখেছেন, "(বাংলার) রাজার প্রাসাদ এবং ছোট বড় সমস্ত আমীরের (noble) প্রাসাদ শহরের (রাজধানীর) মধ্যেই। তাঁরা সবাই মুসলমান।"

ফিরিশ্‌তার মতে রাজা গণেশ ইলিয়াস শাহী বংশীয় সুলতানদের অন্ততম আমীর ('অজ উমরাও') ছিলেন। অথচ মা-হোয়ান বলছেন যে, বাংলার রাজার ছোট বড় সমস্ত আমীরই মুসলমান। এর থেকে আমাদের মনে হয়, গিয়াসুদ্দীন আজম শাহ তাঁর রাজত্বের শেষ দিকে অতিমাত্রায় ধর্মীক হয়ে ওঠেন এবং বল্খি প্রভৃতি দরবেশের উপদেশ শুনে আমীরের পদ ও অন্ত্র উচ্চ রাজপদ থেকে হিন্দুদের বিতাড়িত করেন। অন্ততম হিন্দু আমীর রাজা



গণেশও সম্ভবত এই সময়ে পদচ্যুত হন। এই ধর্মান্ধতার পরিচয় গিয়াসুদ্দীনের অত্যাচার কাজের মধ্যেও মেলে; তাঁর আমলে মা-হোয়ান প্রমুখ চীনা রাজ-প্রতিনিধিবর্গকে কেবলমাত্র বাংলার মুসলমানদের জীবনযাত্রাই দেখানো হয়েছিল, তাই মা-হোয়ান তাঁর বিবরণীতে লিখেছেন, “এদেশের বিবাহ এবং অস্ত্রোষ্টিক্রিয়া মুসলিম ধর্মের বিধান অনুসারে সম্পন্ন হয়। .... এদেশের পাজীতে বারোটি মাস আছে, কিন্তু তাতে মলমাস গণনার কোন ব্যবস্থা নেই।” এদেশে হিন্দুদের মধ্যে যে বিবাহ ও অস্ত্রোষ্টিক্রিয়ার স্বতন্ত্র পদ্ধতি প্রচলিত আছে এবং তাঁদের পাজীতে যে মলমাস গণনার রীতি প্রচলিত আছে, একথা মা-হোয়ান লেখেন নি, তার কারণ একমাত্র এই হতে পারে যে এইসব বিষয় জানবার কোন সুযোগই তাঁরা পান নি বাংলার তৎকালীন রাজশক্তির হিন্দুবিরোধী নীতির দরুণ। আমাদের মনে হয়,—গিয়াসুদ্দীনের এই ধর্মান্ধতা ও অদূরদর্শী নীতির ফলেই রাজা গণেশ, যার অপরিমিত সামরিক শক্তি ছিল (বর্তমান গ্রন্থের চতুর্থ অধ্যায় দ্রষ্টব্য) এবং যিনি ইলিয়াস শাহী বংশীয় সুলতানদের মিত্র ও সেবক ছিলেন, তিনি এখন তাঁদেরই বিপক্ষে গেলেন এবং গিয়াসুদ্দীনকে চক্রান্ত করে হত্যা করিলে (পরে আলোচনা দ্রষ্টব্য) তাঁর বংশকে উচ্ছেদ করে নিজে ক্ষমতা অধিকার করলেন। রাজা গণেশের অভ্যুত্থান কেবলমাত্র তাঁর ব্যক্তিগত উচ্চাভিলাষের দরুণ ঘটে নি। হিন্দুদের সম্বন্ধে গিয়াসুদ্দীন যে ভ্রান্ত নীতি অনুসরণ করেছিলেন, সেই নীতিই এজ্ঞা দায়ী। তবে যতদূর মনে হয়, গিয়াসুদ্দীন তাঁর রাজত্বের প্রথম দিকে এই ভ্রান্ত নীতি অনুসরণ করেন নি, শেষের দিকে করেছিলেন, এবং তারই ফলে এই মহান নৃপতির রাজত্ব ও জীবন এক করুণ পরিসমাপ্তির মধ্যে পর্যবসিত হয়েছিল।

গিয়াসুদ্দীন আজম শাহের ইতিহাস সম্বন্ধে যা জানা যায়, সে সম্বন্ধে আমরা আলোচনা করলাম। কোন কোন ক্ষেত্রে তাঁর ত্রুটিবিচ্যুতি ও ব্যর্থতা সত্ত্বেও তিনি যে বাংলার শ্রেষ্ঠ সুলতানদের মধ্যে অগ্রতম, সে সম্বন্ধে কোন সন্দেহ নেই এবং চিত্তাকর্ষক ও স্বমধুর চরিত্রের দিক দিয়ে তিনি সকলের অগ্রগণ্য।

গিয়াসুদ্দীন আজম শাহের মুদ্রাগুলি উত্তরবঙ্গের ফিরোজাবাদ, পূর্ববঙ্গের মুন্সাজ্জাবাদ এবং পশ্চিমবঙ্গের সাতগাঁও-এর টাকশাল থেকে উৎকীর্ণ হয়েছিল। এর থেকে বোঝা যায় দক্ষিণবঙ্গ বাদে মোটামুটিভাবে বাংলায়

আর সমস্ত অঞ্চলেই তাঁর অধিকার ছিল। এ ছাড়া জন্নতাবাদ নামে আর একটি জায়গার টাকশাল থেকে তাঁর মুদ্রা বেরিয়েছিল, এই জায়গার অবস্থান এপর্যন্ত নির্ণয় করা যায় নি। এই জন্নতাবাদ গোড়ের সঙ্গে অভিন্ন নয়, কারণ গোড়ের ‘জন্নতাবাদ’ নাম ষোড়শ শতাব্দীতে হুমায়ুন রাখেন। এই সমস্ত স্থান ছাড়া কামরূপ ও কামতা রাজ্যের কিয়দংশ অন্তত সাময়িকভাবে তাঁর রাজ্যের অন্তর্ভুক্ত হয়েছিল বলে আগে দেখাবার চেষ্টা করেছি।

এখন গিয়াসুদ্দীন আজম শাহ সংক্রান্ত আর একটি বিষয়ের আলোচনা করে তাঁর প্রসঙ্গ শেষ করব।

পারশুর অমর কবি হাফিজের সঙ্গে গিয়াসুদ্দীনের যোগাযোগ সম্বন্ধে আগে সবিস্তারে আলোচনা কবেছি। ভারতবর্ষের কোন সমসাময়িক কবির সঙ্গে তাঁর মত কাব্যমোদী সুলতানের কোন সম্পর্ক ছিল কিনা, সে প্রশ্ন স্ভাব্যতাই উঠতে পারে। এখন আমরা এট প্রশ্নেরই বিচার করব।

মিথিলার বিখ্যাত কবি বিছাপতির জীবৎকাল আনুমানিক ১৩৭০-১৪৬০ খ্রীষ্টাব্দ। বাংলাদেশে যে সময় গিয়াসুদ্দীন আজম শাহ রাজা ছিলেন, সেই সময়ে মিথিলায় বসে বিছাপতি তাঁর অনেক শ্রেষ্ঠ পদ রচনা করেছিলেন। অনেকে মনে করেন বিছাপতির সঙ্গে গিয়াসুদ্দীন আজম শাহের যোগাযোগ ছিল এবং বিছাপতি তাঁর একটি পদে গিয়াসুদ্দীন আজম শাহের নাম কয়েছেন। এরকম ধারণার কারণ বিছাপতির নামে প্রচলিত একটি পদের (বিছাপতি, খগেন্দ্রনাথ মিত্র ও বিমানবিহারী মজুমদার সম্পাদিত, ২ নং পদ) ভিত্তি এই,

বেকতও চোরি গুপ্ত কর কতিখন বিছাপতি কবি ভান।

মহলম জুগপতি (যুগপতি) চিরে জীব জীবত্ গ্যাসদীন সুরতান ॥

কিন্তু এই “বিছাপতি কবি” কে এবং “গ্যাসদীন সুরতান” কে, সে সম্বন্ধে পণ্ডিতদের মধ্যে মতপার্থক্য দেখা যায়। একদল পণ্ডিত বলেন “বিছাপতি কবি” মৈথিল বিছাপতি এবং “গ্যাসদীন সুরতান” গিয়াসুদ্দীন আজম শাহ।

আবার কোন কোন পণ্ডিত বলেন এই “গ্যাসদীন সুরতান” দিল্লীর সুলতান গিয়াসুদ্দীন তোগলক (রাজত্বকাল ১৩২০-১৩২৫ খ্রী:) এবং “বিছাপতি কবি” চতুর্দশ শতাব্দীর প্রথম দিকের কোন অজ্ঞাতপরিচয় ‘বিছাপতি’ নামধারী কবি; অথবা এটি ঐ সময়কার অথবা কোন কবির লেখা, গায়ন বা লিপিকরের ভ্রমক্রমে ভনিতায় ‘বিছাপতি’র নাম বসে গেছে।

আর একদল পণ্ডিত বলেন এই বিদ্যাপতি সুপরিচিত মৈথিল কবি বিদ্যাপতিই বটেন, কিন্তু “গ্যাসদীন সুরতান” দিল্লীর সুলতান দ্বিতীয় গিয়াসুদ্দীন তোগলক, যিনি ১৩৮৮ খ্রীষ্টাব্দে সিংহাসনে আরোহণ করেন এবং ১৩৮৯ খ্রীষ্টাব্দে পরলোকগমন করেন।

এ সম্বন্ধে চতুর্থ মত হচ্ছে এই যে এই “গ্যাসদীন সুরতান” বাংলার সুলতান গিয়াসুদ্দীন মাহমুদ শাহ ( ১৫৩৩-১৫৩৮ খ্রীঃ ) এবং “বিদ্যাপতি কবি” ষোড়শ শতকের বিখ্যাত পদকর্তা কবিশেখর, যিনি ‘বিদ্যাপতি’ ভনিতাতেও পদ রচনা করতেন।

এই রকম অবস্থায় বিষয়টি সম্বন্ধে চূড়ান্ত সিদ্ধান্ত করা খুবই দুঃস্থ। তবে মোটামুটিভাবে বলা যায়, উপরে উল্লিখিত চারটি মতের মধ্যে দ্বিতীয় ও তৃতীয় মতের ভিত্তি খুব দৃঢ় নয়। কারণ চতুর্দশ শতকের প্রথম দিককার কোন “বিদ্যাপতি কবি”র কথা এ পর্যন্ত জানা যায় নি অথবা পদটির ভণিতা পালটেছে বলেও বিনা প্রমাণে সিদ্ধান্ত করা যায় না। সেই রকম দ্বিতীয় গিয়াসুদ্দীন তোগলক খুব অল্প সময়ের জন্য দিল্লী সমেত ছোট একটি অঞ্চলের রাজা হয়েছিলেন, বিদ্যাপতির দেশ মিথিলা বা তার প্রতিবেশী কোন অঞ্চলে এই রাজার কোন অধিকার ছিল না। সুতরাং বিদ্যাপতি এই নগণ্য সুলতানের নাম তাঁর পদের ভনিতায় উল্লেখ করবেন এবং তাঁকে “যুগপতি” বলবেন বলে বিনা প্রমাণে বিশ্বাস করা যায় না। সুতরাং প্রথম ও চতুর্থ মতের মধ্যে কোনটি গ্রহণীয়, সে সম্বন্ধেই বিতর্কে সীমাবদ্ধ করা চলে। এই “গ্যাসদীন সুরতান” যে গিয়াসুদ্দীন আজম শাহ, সে কথা বলার স্বপক্ষে যুক্তি এই :—

(১) আলোচ্য পদটি মিথিলা-নিবাসী লোচন কর্তৃক সংকলিত ‘রাগ-তরঙ্গিণী’তে পাওয়া যায়। ‘রাগতরঙ্গিণী’র উপক্রমে লোচন মিথিলার বিখ্যাত কবি বিদ্যাপতি সম্বন্ধে অনেক কথা বলেছেন। দ্বিতীয় কোন বিদ্যাপতির কথা তিনি ঘৃণাক্ষরেও উল্লেখ করেন নি। অতএব লোচন বিদ্যাপতি-নামাক্রিত যে সমস্ত পদ সংগ্রহ করেছেন, সেগুলি সবই মৈথিল বিদ্যাপতির রচনা বলে মনে করা যেতে পারে। এই পদটি মৈথিল বিদ্যাপতির লেখা হলে “গ্যাসদীন সুরতান” তাঁর সমসাময়িক সুলতান গিয়াসুদ্দীন আজম শাহ বলেই প্রতিপন্ন হন।

(২) গিয়াসুদ্দীন আজম শাহ কাব্যরসিক ছিলেন। তিনি নিজেও কবিতা লিখতেন এবং মহাকবি হাফিজের কাছে এক ছত্র কবিতা পাঠিয়ে

তাঁকে দিয়ে কবিতাটি পূরণ করিয়েছিলেন। গিয়াসুদ্দীন মাহমুদ শাহের কাব্যরসিকতা সম্বন্ধে কোন প্রমাণ পাওয়া যায় না। অতএব পদটিতে গিয়াসুদ্দীন আজম শাহের কথাই বলা হয়েছে বলে মনে হয়।

(৩) গিয়াসুদ্দীন মাহমুদ শাহ অপদার্থ, বিলাসী ও দুশ্চরিত্র প্রকৃতির লোক ছিলেন। এই কারণে একমাত্র চাটুকার ভিন্ন আর কেউ তাঁকে “যুগপতি” বলতে পারেন না। কিন্তু গিয়াসুদ্দীন আজম শাহ সম্বন্ধে “যুগপতি” বিশেষণ খুব সার্থকভাবেই প্রযুক্ত হতে পারে।

কিন্তু “গিয়াসুদ্দীন সুরতান” যে গিয়াসুদ্দীন মাহমুদ শাহ, তা বলার দিকেও কয়েকটি যুক্তি আছে। এই বইয়ের নবম অধ্যায়ে গিয়াসুদ্দীন মাহমুদ শাহ সংক্রান্ত আলোচনার মধ্যে আমরা ঐ যুক্তিগুলির উল্লেখ করেছি। আজম শাহ ও মাহমুদ শাহ, উভয়েরই স্বপক্ষে যুক্তি আছে, আবার কারও পক্ষের যুক্তিই চূড়ান্ত নয়। এই অবস্থায় আলোচ্য বিষয়টি সম্বন্ধে শেষ কথা বলা বর্তমানে সম্ভব নয়। অবশ্য “গিয়াসুদ্দীন সুরতান”কে গিয়াসুদ্দীন আজম শাহের সঙ্গেই অভিন্ন ধরতে ইচ্ছা যায়। পারস্যের অমর কবি হাফিজ তাঁর গজলের ভিত্তিতে যে সুরতানের নাম পরম সমাদরে উল্লেখ করেছেন, মিথিলার অমর কবি বিদ্যাপতিও তাঁর পদের ভিত্তিতে সেই সুরতানের নামই প্রশস্তি-সহকারে উল্লেখ করেছেন বলে ভাবতে ভালো লাগে। কিন্তু ঐতিহাসিকের কাছে তাঁর ব্যক্তিগত রুচি বড় কথা নয়, তথ্য ও যুক্তিই প্রধান। সেই জন্তে “গিয়াসুদ্দীন সুরতান”-কে গিয়াসুদ্দীন আজম শাহের সঙ্গে অভিন্ন বলে চূড়ান্ত সিদ্ধান্ত করতে পারলাম না।

ডঃ মুহাম্মদ এনামুল হক মনে করেন, ‘ইউসুফ-জোলেখা’ কাব্যের রচয়িতা বাঙালী মুসলমান কবি শাহ মোহাম্মদ সগীর গিয়াসুদ্দীন আজম শাহের পৃষ্ঠ-পোষণ লাভ করেছিলেন। তিনি “চট্টগ্রামের পুঁথির সহিত মিলাইয়া জিপ্সুর খণ্ডিত পুঁথির পত্র হইতে কবির যে আত্মবিবরণী” “প্রস্তুত” করেছিলেন, তা ১৯৫১ খ্রীষ্টাব্দের ‘মাহে-নও’ পত্রিকায় প্রকাশ করেন। এর পরে ‘মুসলিম বাঙালা সাহিত্য’ (১৯৫৭) গ্রন্থে তিনি ঐ আত্মবিবরণীর অবিকল (অসংশোধিত) পাঠ ও আলোকচিত্র প্রকাশ করেছেন। আত্মবিবরণীর নিম্নোক্ত ছত্রগুলি থেকেই ডঃ হক তাঁর পূর্বোক্ত সিদ্ধান্তে উপনীত হয়েছেন,

রাজা রাজ্যেশ্বর মধ্যে ধার্মিক পণ্ডিত।

দেব অবতার নৃপ জগৎ বিদিত ॥

মহুশ্বের মধ্যে যেহু ধর্ম অবতার ।\*  
 মহা নরপতি গোছ পৃথিবীর সার ॥\*  
 ঠাই ঠাই ইচ্ছে রাজা আপনা বিজয় ।  
 পুত্র শিষ্য হস্তে তিহি মাগে পরাজয় ॥  
 মহাজন বাক্য ইহ পূরণ করিআ ।  
 লইলেন রাজ্যপাট বঙ্গাল-গৌড়িআ ॥  
 করুণা হৃদয় রাজা পুণ্যবন্ত গুর ।  
 সবগুণে অসীম অভুল মনোহর ॥  
 পুণিয়ার চান্দ জনি বদন সুন্দর ।  
 মধুর মধুর বাণী কহন্ত সুন্দর ॥  
 রমণীবল্লভ নৃপ রসে অতুপমা ।  
 কনে বা কহিতে পারে সে গুণ মহিমা ॥

মোহাম্মদ সগীর তান আজ্জাক অধীন ।

তাহান আছুক যশ ভুবন এ তিন ॥

এই ছত্রগুলির মধ্যে কোন একজন রাজার বন্দনা করা হয়েছে। শেষ দুই ছত্রের ভাষা থেকে মনে হয়, এই রাজা সগীরের সমসাময়িক। ডঃ এনামুল হক বলেন যে উদ্ধৃত অংশের চতুর্থ ছত্রে “নরপতি গোছ” কথার অর্থ “গোছ” নামক রাজা এবং গোছ = গিয়াস - গিয়াসুদ্দীন আজম শাহ। ঐ অংশের পঞ্চম থেকে অষ্টম ছত্রে ঐ রাজার পিতাকে পরাজিত করে গোড়-বঙ্গের সিংহাসন অধিকার করার ইঙ্গিত পাওয়া যাচ্ছে বলে ডঃ হক মনে করেন। গিয়াসুদ্দীন আজম শাহ তাঁর পিতা সিকন্দর শাহকে যুদ্ধে পরাজিত ও নিহত করে বাংলার সিংহাসন অধিকার করেছিলেন। এই দু'টি বিষয় থেকেই ডঃ হক সিদ্ধান্ত করেছেন যে স্বতন্ত্র গিয়াসুদ্দীন আজম শাহ সগীরের পৃষ্ঠপোষক ছিলেন। অধ্যাপক আহমদ শরীফ, ডক্টর আবদুল করিম প্রভৃতি বিশিষ্ট গবেষকরা ডক্টর হকের সিদ্ধান্তকে সমর্থন করেছেন।

\* এই দুই ছত্রের পাঠ পুঁদির “মল বানানে” এই,

মহুশ্বের মৈছে জেহু ধর্ম অবতার ।

মহা নরপতি গোছ পৃথিবীর সার ॥

শাহ মোহাম্মদ সগীরকে\* গিয়াসুদ্দীন আজম শাহের সমসাময়িক ও পৃষ্ঠ-পোষিত কবি বলে গ্রহণ করার মত যথোপযুক্ত প্রমাণ পাওয়া গিয়েছে কিনা, তা বিচারসাপেক্ষ। এ সম্বন্ধে আমার বক্তব্য নীচে সংক্ষেপে দিলাম।

(১) “মহা নরপতি গোছ পৃথিবীর সার” এই চরণটির “গোছ” শব্দটি কোন রাজার নাম হিসাবে, বিশেষ করে কবির পৃষ্ঠপোষক রাজার নাম হিসাবে গ্রহণ করা চলে কিনা, তা বিতর্কের বিষয়। পৃষ্ঠপোষক রাজার নামকে এরকম সংক্ষেপে ও বিকৃতভাবে কোনক্রমে মাত্র এক জায়গায় উল্লেখ করে চলে যাওয়া দস্তুরমত অস্বাভাবিক ব্যাপার।

(২) শব্দটি মূলে “গোছ” ছিল কিনা, সে বিষয়েও নিঃসংশয় হওয়া যায় না। “যেহু”, “যেহ” প্রভৃতি শব্দ লিপিকর-প্রমাদে “গোছ”-এ রূপান্তরিত হতে পারে, অথবা পুঁথির অস্পষ্ট অক্ষরের জন্য ঐ সব শব্দকে কেউ ভুল করে “গোছ”-রূপে পড়তে পারেন। “গোছ”-এর জায়গায় ঐ শব্দগুলি চরণটির মধ্যে সার্থকতরভাবে স্থান পেতে পারে। মোটের উপর “গোছ”—এই ছোট্ট শব্দটির মধ্যে গিয়াসুদ্দীন আজম শাহের নাম আবিষ্কার করতে হলে আরও জোরালো প্রমাণ দরকার।

(৩) এই প্রসঙ্গে একথাও উল্লেখযোগ্য যে, ডঃ এনামুল হক ‘ইউনুফ-জোলেখার’ পুঁথির যে আলোকচিত্র প্রকাশ করেছেন, তাতে “গোছ” শব্দটি (ম্যাগনিফাইং লেন্স ব্যবহার করেও) স্পষ্টভাবে পড়া যায় না।

(৪) “ঠাঁই ঠাঁই ইচ্ছে রাজা আপনা বিজয়” থেকে “লইলেন্ত রাজ্যপাট বঙ্গাল-গোড়িয়া” পর্যন্ত চরণগুলিতে গিয়াসুদ্দীন আজম শাহের পিতাকে যুদ্ধে হারিয়ে রাজ্য অধিকার করার প্রসঙ্গ পরোক্ষভাবে উল্লিখিত হয়েছে বলে ডঃ হক মনে করেন। তিনি একরকমভাবে চরণগুলিকে ব্যাখ্যা করেছেন। কিন্তু চরণগুলির স্বাভাবিক ব্যাখ্যা হচ্ছে এই যে, এদের মধ্যে এমন একজন রাজার কথা বলা হয়েছে, যিনি মহাজন-বচন সার্থক করে নিজের পুত্র বা শিশুর কাছে পরাজিত হয়েছিলেন এবং অন্তদের হারিয়ে গোড় ও বজের রাজ্য অধিকার করেছিলেন।

---

\* ডঃ এনামুল হক প্রভৃতি গবেষককে অনুসরণ করে আমি এখানে কবিকে “শাহ মোহাম্মদ সগীর” নামেই অভিহিত করেছি। কিন্তু সমস্ত পুঁথিতে “সগীর”-এর জায়গায় “সগিরি” লেখা রয়েছে। জনাব এন্ট. এম. ক্বল আমিন দেখাবার চেষ্টা করেছেন যে “সগিরি” “সগীর”-এর অপভ্রংশ নয় (মাসিক মোহাম্মদী, ব্রাহ্মণ, ১৩৭১ বঙ্গাব্দ, পৃঃ ৭১৬-৭১৭ ত্রঃ)।

(৫) শাহ মোহাম্মদ সগীরকে গিয়াসুদ্দীন আজম শাহের সমসাময়িক বলে মনে করলে বলতে হবে, সগীর বিজাপতির সমসাময়িক এবং কৃতিবাসের চেয়ে প্রাচীনতর কবি। কিন্তু সগীরের কাব্যের যে সমস্ত অংশ ডঃ হক এবং অন্যান্য গবেষকরা এ পর্যন্ত উদ্ধৃত করেছেন, তাদের ভাষা বিচার করলে সগীরকে এত প্রাচীন কবি বলে মনে হয় না। অবশ্য সগীর যে ষোড়শ শতাব্দীর পরবর্তী নন, তা'ও তাঁর ভাষা থেকেই বলা যায়।

(৬) জনাব সুলতান আহমদ ভূঁইয়া সগীরের প্রাচীনত্ব স্বীকার করেন না। তিনি একাধিক প্রবন্ধে এসবক্ষে ডঃ এনামুল হকের মতকে খণ্ডন করার চেষ্টা করেছেন। একটি প্রবন্ধে তিনি দেখিয়েছেন যে ঢাকা বিশ্ববিদ্যালয়ের পুঁথিশালায় রক্ষিত 'ইউসুফ-জোলেখা'র একটি পুঁথিতে কাব্যের কাহিনীর মধ্যে তার অন্ততম চরিত্র রাজা তৈমূসের গুণ-বর্ণনা প্রসঙ্গে লেখা রয়েছে,

মহুশের মৈন্ধে জেন ধর্ম অবতার।

মোহা মোহা নরপতি পৃথিবীর সার।

\* \* \*

রাজা রাজেশ্বর মোহা ধাম্বিক পণ্ডিত।

দেব অবতার নৃপ জগত বিদিত।

\* \* \*

করুণা হৃদএ রাজা পুণ্য ততপর।

সর্বগুণে অসীম অতুল মেনোহর।

পুর্নিমার চন্দ্র জিনি বদন সোন্দর।

মধুর মধুর বানি কহে মূদুশ্বর।

রমনি বল্লব নৃপ রসে নিউপমা।

কনে বা কাহিতে পারে সে গুণ মহিমা।

এই ছত্রগুলিই আবার ডঃ এনামুল হক কর্তৃক প্রকাশিত সগীরের পূর্বোক্ত রাজবন্দনার মধ্যে প্রায় অবিকলভাবে পাওয়া যায়—দু'একটি শব্দ মাত্র পরিবর্তিত হয়েছে। এইভাবে জনাব ভূঁইয়া রাজবন্দনার প্রামাণিকতা সম্বন্ধে ( তাঁরই ভাষায় ) “ঘোরতর সন্দেহের অবকাশ” সৃষ্টি করেছেন।

এরপর জনাব সুলতান আহমদ ভূঁইয়া ‘নও বাহার’ পত্রিকার চতুর্থ বর্ষ পঞ্চম সংখ্যায় ( পৃ: ২২৫-২২৮ ) প্রকাশিত এক প্রবন্ধে লেখেন, “শাহ মোহাম্মদ

সগীরের কাব্যে আমরা যে সমস্ত ভনিতা পাই তাহাতে দেখা যায় যে, কবি ইহাফারসী কোনও কিতাব দেখিয়া রচনা করিয়াছেন। ...পারস্য সাহিত্যের ইতিহাসে আমরা দেখিতে পাই যে, মহাকবি ফেরদৌসী এবং মোল্লা আবদুর রহমান জামী (১৪১৪-৯২ খৃঃ) ‘হুসুফ জোলেখা’ নামীয় কাব্য যথাক্রমে একাদশ ও পঞ্চদশ শতাব্দীতে রচনা করিয়াছেন। .....ফেরদৌসী, জামী ও সগীরের কাব্য আলোচনা করিয়া আমার এই ধারণা বদ্ধমূল হইয়াছে যে, সগীরের কাব্যখানি জামীর কাব্যের অহুসরণে রচিত; ফেরদৌসীর কাব্যের কোন প্রভাব তাঁহার কাব্যে নাই। সুতরাং জামীর ‘হুসুফ জোলেখা’ কাব্য রচনার (রচনাকাল—৮৮৮হিঃ=১৪৮৩ খৃঃ দ্রষ্টব্য—Literary History of Persia—E. G. Brown, Vol. III, page 516) অন্ততঃ পক্ষে একশত বৎসর পরে আমাদের বঙ্গাল দেশের কবি শাহ মোহাম্মদ সগীর তাঁহার ‘হুসুফ জোলেখা’ কাব্য প্রণয়ন করিয়াছিলেন, ইহা সহজেই অনুমেয়। কাজেই খুব নেক নজরে দেখিলেও শাহ মোহাম্মদ সগীরকে কিছুতেই ষোড়শ শতাব্দীর শেষ পাদের পূর্বে ফেলা যায় না।”

এতক্ষণ যে আলোচনা করা হল, তার ফলে আশা করি সকলেই বুঝতে পারবেন যে সগীরকে গিয়াসুদ্দীন আজম শাহের সমসাময়িক বলাব প্রচণ্ড অসুবিধা আছে। কোন কবিকে এতখানি প্রাচীন বলে নিঃসংশয়ে ঘোষণা করতে গেলে আরও জোরালো প্রমাণের প্রয়োজন।\*

মুদ্রার সাক্ষ্য থেকে দেখা যায় যে, গিয়াসুদ্দীন আজম শাহ ৮১৩ হিজরা বা ১৪১০-১১ খ্রীষ্টাব্দে পরলোকগমন করেন, কারণ ঐ বছরেই তাঁর মুদ্রা শেষ হয়েছে এবং তাঁর পুত্র সৈফুদ্দীন হুমজা শাহের মুদ্রা শুরু হয়েছে। সমসাময়িক আরবী ঐতিহাসিক ইব্ন-ই-হজর লিখছেন যে গিয়াসুদ্দীন ৮১৪ হিজরা

\* উদীয়মান-গবেষক শেখ এ. টি. এম রুহুল আমিনের মতে সগীরের আত্মবিশ্বরণীতে উল্লিখিত “গোছ” কবির পৃষ্ঠপোষকেরই নাম, তবে ইনি গিয়াসুদ্দীন আজম শাহ নন, বাংলার আফগান সুলতান গিয়াসুদ্দীন বাহাদুর শাহ (১৫৫৬-১৫৬০ খ্রীঃ)। এই সুলতানের পিতা শামসুদ্দীন মুহম্মদ গাজী—আদিল শাহ সুলতানের সঙ্গে যুদ্ধে পরাজিত ও নিহত হন, তাঁর রাজ্যও (বাংলাদেশ) শত্রুর হস্তগত হয়; গিয়াসুদ্দীন বাহাদুর শাহ নিজের চেষ্টায় হত রাজ্য পুনরুদ্ধার করে এবং পিতৃশত্রু আদিল শাহকে পরাজিত ও নিহত করে পিতার কীর্তিকে গ্লান করে দিয়েছিলেন, এইজন্য “ঠাই ঠাই ইচ্ছে রাজা আপনা বিজয়।...লইলেন্ত রাজ্যপাট বঙ্গাল গোড়িয়া” চরণগুলি তাঁর সন্ধকে সার্থকভাবে প্রযোজ্য (মাসিক মোহাম্মদী, ভাবণ, ১৩৭১, পৃঃ ৬৫৪-৬৫৭ দ্রঃ)। “গোছ” যদি সুলতানের নাম হয়, তা হলে জনাব আমিনের মতই যুক্তিসঙ্গত বলতে হবে।



( ১৪১১-১২ খ্রীঃ ) পরলোকগমন করেছিলেন ; এর কারণ সম্ভবত এই যে, ইবন্-ই-হজর ঐ বছরেই গিয়াসুদ্দীনের মৃত্যু সংবাদ পেয়েছিলেন । ‘মিং শ্বু’ থেকে জানা যায় যে, চীন সম্রাট ১৪১২ খ্রীষ্টাব্দে গিয়াসুদ্দীনের মৃত্যু-সংবাদ পেয়েছিলেন । ‘রিদাজ-উস-সলাতীনে’ লেখা আছে, “রাজা কান্স, যিনি ঐ অঞ্চলের একজন জমিদার ছিলেন, তাঁর কৌশলের দ্বারা সুলতান ( গিয়াসুদ্দীন )-কে বিশ্বাসঘাতকতা করে হত্যা করা হয় ।” অতঃপর কোন সূত্রে এই উক্তির সমর্থন না পাওয়া গেলেও এ ব্যাপার সম্পূর্ণ সম্ভাব্য । আমরা আগেই দেখাবার চেষ্টা করেছি যে গিয়াসুদ্দীন তাঁর রাজত্বের শেষ দিকে ধর্মান্ধ হয়ে উঠে হিন্দু-বিরোধী নীতি অনুসরণ করেছিলেন এবং তাঁর ফলে গণেশ তাঁর পক্ষ থেকে বিপক্ষে চলে গিয়েছিলেন । সম্ভবত এই ব্যাপারেরই পরিণতিস্বরূপ গণেশের ষড়যন্ত্রে গিয়াসুদ্দীন নিহত হন ।

### সৈফুদ্দীন হুমজা শাহ

গিয়াসুদ্দীন আজম শাহের মৃত্যুর পর তাঁর পুত্র সৈফুদ্দীন হুমজা শাহ রাজা হলেন । মৃত্যুর সাক্ষ্য থেকে দেখা যায় যে, ইনি ৮১৩ হিজরায় ( ১৪১০-১১ খ্রীঃ ) সিংহাসনে আরোহণ করেন এবং ৮১৫ হিজরায় ( ১৪১২-১৩ খ্রীঃ ) এর রাজত্ব শেষ হয় । ‘তবকাৎ-ই-আকবরী’, ‘তারিখ-ই-ফিরিশতা’ এবং ‘রিদাজ উস-সলাতীনে’ লেখা আছে যে এর উপাধি ছিল ‘সুলতান-উস-সলাতীন’ ( রাজাধরাজ ) । ‘রিদাজ’-এর মতে অমাত্য ও সেনাপতিরা সৈফুদ্দীনকে এই উপাধি দেন । সৈফুদ্দীনের এই উপাধি সত্যিই ছিল, কারণ বিভিন্ন মৃত্যু এই উপাধি উল্লিখিত আছে ।

‘তারিখ-ই-ফিরিশতা’য় সৈফুদ্দীন হুমজা শাহ সম্বন্ধে লেখা আছে, “তিনি ছিলেন সাহসী, নৈযশীল এবং উদার নরপতি । তাঁর বুদ্ধি ও ব্যবহারিক অভিজ্ঞতা থাকার জন্ত তাঁর কর্মচারীরা সাবধানে শাসনকার্য পরিচালনা করত । দেশের ( হিন্দু ) রাজারা তাঁর বশুতার জোয়াল থেকে মাথা বার করত না এবং রাজস্ব দিতে দেরী করত না । ‘তবকাৎ-ই-আকবরী’তে সৈফুদ্দীন সম্বন্ধে লেখা আছে, “তিনি দয়ালু, ধৈর্যশীল এবং সাহসী রাজা ছিলেন ।”

এই সব প্রশংসোক্তি কতদূর সত্য, তা বলা যায় না । আচার্য ষডুনাথ সরকার মনে করেন যে ফিরিশ্তার কথাগুলি গিয়াসুদ্দীন আজম শাহের

সম্বন্ধে প্রযোজ্য, ফিরিশ্তা ভুলক্রমে এগুলি সৈফুদ্দীন হুম্জা শাহের উপরে আরোপ করেছেন (History of Bengal, D.U., Vol. II, pp. 115-116)। এই অসুস্থমান খুবই যুক্তিসঙ্গত।

সৈফুদ্দীন হুম্জা শাহের রাজত্বকালে অন্তত একবার চীন-সম্রাটের দূতেরা এসেছিল—গিয়াসুদ্দীন আজম শাহের মৃত্যুতে শোকপ্রকাশের জন্ত। এ সম্বন্ধে চীনের মিং রাজবংশের ইতিহাসগ্রন্থ 'মিং-শ'্ব'-এ লেখা আছে,\* “যুং-লো”র রাজত্বের দশম বর্ষে (১৪১২ খ্রিঃ) বাংলার রাজদূতেরা চীনে পৌছোবার পূর্বাঙ্কে সম্রাট তাঁদের অভ্যর্থনার ব্যবস্থা করবার জন্ত কয়েকজন মন্ত্রীকে চেন-চিয়াং-এ পাঠালেন। ব্যবস্থা যখন সম্পূর্ণ, এমন সময় বাংলার দূতেরা তাদের রাজার (গিয়াসুদ্দীন আজম শাহ) মৃত্যু-সংবাদ নিয়ে পৌছালো। (মৃত রাজার) শোকাহুষ্ঠানে যোগ দেবার জন্তে (চীন থেকে) রাজপুরুষদের পাঠানো হল। তাঁর উত্তরাধিকারী পুত্র শাই-উ-তিং (সৈফুদ্দীন) কে রাজারূপে নিযুক্ত করা হল।”†

ইবন-ই-হজরের ‘ইন্বাতুল-গুম্ব’ থেকে জানা যায় যে, সৈফুদ্দীন হুম্জা শাহের ক্রীতদাস শিহাব তাঁকে পরাভূত ও নিহত করে সিংহাসন অধিকার করে। মুদ্রার সাক্ষ্য থেকে দেখা যায় যে, এই শিহাবই শিহাবুদ্দীন বায়াজিদ শাহ নিয়ে সৈফুদ্দীনের পরে সুলতান হন।

কুরুক্ষেত্র-যুদ্ধে মহাবীর ভীষ্ম, দ্রোণ ও কর্ণের পতনের পর যেমন নগণ্য শল্য সেনাপতি হয়েছিলেন, তেমনি ইলিয়াস শাহী বংশের শামসুদ্দীন ইলিয়াস শাহ, সিকন্দর শাহ এবং গিয়াসুদ্দীন আজম শাহ—এই তিনজন দিকপাল সুলতানের পরে দুর্বল-সৈফুদ্দীন হুম্জা শাহ রাজা হন; শল্যের সেনাপতিত্বের মত সৈফুদ্দীনের রাজত্বও অল্পকাল স্থায়ী হয়েছিল।

সৈফুদ্দীন হুম্জা শাহের যে সমস্ত মুদ্রা এপর্যন্ত পাওয়া গিয়েছে, সেগুলি সাতগাঁও, মুন্সাজ্জমাবাদ এবং ফিরোজাবাদ বা পাণ্ডুয়ার টাকশালে উৎকীর্ণ হয়েছিল। তাঁর কোন শিলালিপি এপর্যন্ত পাওয়া যায় নি।

\* ডঃ প্রবোধচন্দ্র বাগচীর ইংরেজী অনুবাদ (Visva-Bharati Annals, Vol. I, p. 133 ত্রঃ) সংশ্লিষ্ট অংশটির ক্ষেত্রে ঠিক মূলানুগ নয়। অধ্যাপক নাগায়ণচন্দ্র সেন মূল চীনা গ্রন্থ থেকে এই অংশটির বঙ্গানুবাদ করে দিয়েছেন এবং আমরা তারই উপর নির্ভর করেছি।

† চীন-সম্রাটেরা পৃথিবীর অসংখ্য রাজাদের নিজেদের সামন্ত বলে মনে করতেন।

## তৃতীয় অধ্যায়

### রাজা গণেশের ক্ষমতা-অধিকার—কীড়নক রাজবংশ

#### শিহাবুদ্দীন বায়াজিদ শাহ

সৈফুদ্দীন হুম্জা শাহের মৃত্যুর পর বাংলাদেশের শাসনক্ষমতা কার্যত রাজা গণেশের হাতে এল। কিন্তু নামে রাজা হলেন অল্প ব্যক্তি। তাঁর নাম শিহাবুদ্দীন বায়াজিদ শাহ।

‘তবকাৎ-ই-আকবরী’, ‘আইন-ই-আকবরী’, তারিখ-ই-ফিরিশ্তা’, ‘রিয়াজ উস্-সলাতীন’ প্রভৃতি গ্রন্থের মতে সৈফুদ্দীন হুম্জা শাহের মৃত্যুর পর তাঁর পুত্র শামসুদ্দীন সিংহাসনে আরোহণ করেন। কিন্তু মৃত্যুর সাক্ষ্য থেকে দেখা যায় যে, সৈফুদ্দীনের পরবর্তী রাজার নাম শিহাবুদ্দীন বায়াজিদ শাহ। শিহাবুদ্দীন তাঁর মৃত্যু নিজেই সৈফুদ্দীনের পুত্র বলেন নি। বাংলাদেশে যখনই কোন স্থলতানের পুত্র স্থলতান হয়েছেন, তিনি মৃত্যু নিজেই স্থলতানের পুত্র বলেছেন। শিহাবুদ্দীন স্থলতানের পুত্র হলে সে কথা তাঁর মৃত্যু অস্বীকারিত থাকত না। অতএব শিহাবুদ্দীন যে সৈফুদ্দীনের পুত্র ছিলেন না, তাতে কোন সন্দেহ নেই।

‘রিয়াজ’-এ শিহাবুদ্দীনের প্রকৃত নাম এবং সৈফুদ্দীনের পুত্র না হওয়ার ব্যাপারটা একটা মতান্তর হিসাবে উল্লেখ করা হয়েছে; ‘রিয়াজ’-এ লেখা আছে, “কেউ কেউ লিখেছেন যে এই শামসুদ্দীন স্থলতান-উস্-সলাতীনের ঔরসপুত্র ছিলেন না, পালিতপুত্র ছিলেন এবং তাঁর নাম ছিল শিহাবুদ্দীন।” একমাত্র বুকানন-বিবরণীতেই ‘শামসুদ্দীন’ নামের উল্লেখ নেই, তাতে স্পষ্টাঙ্গরে লেখা আছে, “...Syafudin, who governed three years, and was succeeded by his slave Sahabudin, who also governed three years.”

বুকানন-বিবরণীতে আর একটি নতুন খবর দেওয়া হয়েছে যে শিহাবুদ্দীন ছিলেন সৈফুদ্দীনের ক্রীতদাস। এতদিন পর্যন্ত অল্প কোন সূত্রে এই কথার সমর্থন পাওয়া যায় নি। কিন্তু একটি সম্প্রতি-আবিষ্কৃত প্রামাণিক সূত্র— সমসাময়িক আরবী ঐতিহাসিক ইব্ন-ই-হজর রচিত গ্রন্থ ‘ইনবাউ’ল গুম্ব-এ

পরিকারভাবে লেখা আছে যে শিহাব অর্থাৎ শিহাবুদ্দীন সৈফুদ্দীনের ক্রীতদাস ছিলেন। ইব্ন-ই-হজরের বিবরণ থেকে আরও জানা যায় যে শিহাব সৈফুদ্দীনকে পরাজিত ও নিহত করে রাজা হয়েছিলেন এবং তাঁকে পরাস্ত ও নিহত করেছিলেন “ফন্দু কাস” অর্থাৎ হিন্দু গণেশ। ইব্ন-ই-হজরের এই বিবরণ সম্পূর্ণ প্রামাণ্য।\*

অতএব শিহাবুদ্দীন সৈফুদ্দীনের ক্রীতদাস ছিলেন বলেই সিদ্ধান্ত করা যেতে পারে। কিন্তু ক্রীতদাস প্রভুকে পরাস্ত ও নিহত করে রাজা হলেন। যতদূর মনে হয়, অমিতশক্তিদর গণেশের সাহায্যের ফলেই শিহাবুদ্দীন এই অসাধ্য সাধন করতে পেরেছিলেন। ফিরিশ্তার মতে গণেশ শিহাবুদ্দীনকে শিখণ্ডী খাড়া করে রেখে নিজে রাজ্যের কর্তৃত্ব হস্তগত করেছিলেন। তিনি লিখেছেন,

“তঁার ( শিহাবুদ্দীনের ) তরুণ বয়সের জ্ঞান বুদ্ধি অত্যন্ত কম ছিল। কান্স নামে একজন বিধর্মী, যিনি এই বংশের ( ইলিয়াস শাহী বংশের ) অন্ততম অমাত্য ছিলেন, তিনি ঐরাজত্বকালে বিরাট ক্ষমতা ও প্রাধিকার অর্জন করেন এবং রাজ্য ও রাজস্ব—সব কিছুই উপর পরিপূর্ণ কর্তৃত্ব লাভ করেন।”

এই বর্ণনা মূলত সত্য বলেই মনে হয়। ‘আইন-ই-আকবরী’ ও ‘রিয়াজ-উস-সলাতীনে’ এই বর্ণনার সমর্থন আছে।

শিহাবুদ্দীন চীনসম্রাটকে ( স্পষ্টত সৈফুদ্দীনের আমলে দূত ও উপহার প্রেরণের জন্ত ) ধন্যবাদ জানিয়ে এক লিপি পাঠান এবং সেই সঙ্গে নানারকম উপহার পাঠান। তার মধ্যে ছিল জিরাফ, বাংলার বিখ্যাত ঘোড়া এবং বাংলার বিভিন্ন উৎপন্ন দ্রব্য। তাঁর পাঠানো জিরাফ চীনদেশে বিপুল উদ্দীপনার সৃষ্টি করে। ‘শি-য়াং-ছাও-কুং-তিয়েন-লু’, ‘শু-যু-চৌ-ংজ-লু’, ‘মিং-শা-ব’ প্রভৃতি চীনা ইতিহাসগ্রন্থে এর বিবরণ পাওয়া যায় ( এই বইয়ের ষষ্ঠ অধ্যায় দ্রষ্টব্য )।

শিহাবুদ্দীন বায়াজিদ শাহ ৮১৫ হিজরায় ( ১৪১২-১৪১৩ খ্রীঃ ) সিংহাসনে বসেন এবং ৮১৭ হিজরায় ( ১৪১৪-১৪১৫ খ্রীঃ ) তাঁর রাজত্ব শেষ হয়। তাঁর মৃত্যুগুলি ফিরোজাবাদ বা পাণ্ডুয়া, সাতগাঁও ও মুন্সাজ্জমাবাদের টাকশাল থেকে উৎকীর্ণ হয়েছিল। এপর্যন্ত তাঁর কোন শিলালিপি মেলে নি।

\* ইব্ন-ই-হজরের কিঞ্চিৎ পরবর্তী আরবী ঐতিহাসিক অল-সখাওয়ারী লিখেছেন যে শিহাব গণেশ কর্তৃক আক্রান্ত ও নিহত হয় নি, গণেশই ( “ফন্দু কাস” ) শিহাব কর্তৃক আক্রান্ত ও নিহত হন এবং গণেশের পুত্র মুসলমান হয়ে শিহাবকে আক্রমণ করে তার রাজ্য কেড়ে নেন। বলা বাহুল্য অল-সখাওয়ারী উক্তি সম্পূর্ণ ভ্রমাত্মক।

শিহাবুদ্দীনের মৃত্যু সন্থকে 'রিয়াজ'-এ তিনটি মত উল্লিখিত হয়েছে, (১) স্বাভাবিক রোগভোগের ফলে তাঁর মৃত্যু হয়; (২) রাজা গণেশের কৌশলে তিনি নিহত হন; (৩) রাজা গণেশ তাঁকে আক্রমণ করে বধ করেন। ইব্ন-ই-হজরের 'ইন্বাউ'ল-গুম্ব' থেকে জানা যায় যে, এদের মধ্যে তৃতীয় মতটিই সত্য, অর্থাৎ শিহাবুদ্দীন গণেশ কর্তৃক আক্রান্ত, পরাজিত ও নিহত হয়েছিলেন। সম্ভবত শিহাবুদ্দীন গণেশের বিরুদ্ধে যাবার চেষ্টা করাতেই গণেশ তাঁকে আক্রমণ ও বধ করেছিলেন।

আচার্য যতুনাথ সরকারের মতে সৈফুদ্দীন ও শিহাবুদ্দীনের রাজত্বকালে আমীরদের ক্ষমতা খুব বৃদ্ধি পেয়েছিল, কারণ উভয় সুলতানকেই আমীরেরা সিংহাসনে বসিয়েছিলেন বলে 'তবকাৎ-ই-আকবরী', 'তারিখ-ই ফিরিশ্তা', 'রিয়াজ-উস-সলাতীন' প্রভৃতি গ্রন্থে লেখা আছে। কিন্তু এই মত সমর্থন করা যায় না, কারণ পূর্বোক্ত গ্রন্থগুলিতে সিকন্দর শাহ, রুকনুদ্দীন বারবক শাহ প্রভৃতি পরাক্রান্ত সুলতানদের সন্থকেও লেখা হয়েছে যে আমীরেরা তাঁদের সিংহাসনে বসিয়েছিলেন। সম্ভবত বাংলার প্রত্যেক সুলতানই সিংহাসনে আরোহণের সময়ে আমীরদের আনুষ্ঠানিক অভ্যুদয় গ্রহণ করতেন। সৈফুদ্দীন ও শিহাবুদ্দীনের রাজত্বকালে গণেশ ছাড়া আর কোন আমীরের ক্ষমতা বৃদ্ধি পেয়েছিল বলে মনে হয় না।

### আলাউদ্দীন ফিরোজ শাহ

মুদ্রার সাক্ষ্য থেকে দেখা যায়, শিহাবুদ্দীন বায়াজিদ শাহের মৃত্যুর পরে তাঁর পুত্র আলাউদ্দীন ফিরোজ শাহ রাজা হন। তাঁর কেবলমাত্র ৮-৭ হিজরার (১৪১৪-১৫ খ্রিঃ) মুদ্রা পাওয়া গিয়েছে। এই মুদ্রাগুলি সাতগাঁও ও মুন্সাজ্জমাবাদের টাকশাল থেকে উৎকীর্ণ হয়েছিল।

অজ্ঞ অবাধ কোন ইতিহাস-গ্রন্থে বা মুদ্রা ভিন্ন অথবা কোন নৃত্রে এই আলাউদ্দীন ফিরোজ শাহের নাম পাওয়া যায় নি। যতদূর মনে হয়, ইনি ছিলেন "তরুণ" শিহাবুদ্দীনের বালক পুত্র; শিহাবুদ্দীনকে বধ করার পরে গণেশ একে রাজা হিসাবে খাড়া করে আগের মত রাজ্যশাসন করতে থাকেন এবং কয়েকমাস বাদে যখন বোঝেন আর কাউকে শিখণ্ডী হিসাবে খাড়া করে না রাখলেও চলবে, তখন তিনি আলাউদ্দীন ফিরোজ শাহকে অপসারিত করে নিজেই সিংহাসনে আরোহণ করেন; সম্ভবত আলাউদ্দীন গণেশের হাতে প্রাণও হারান।

## চতুর্থ অধ্যায় রাজা গণেশ অবতারণিকা

বাংলাদেশের মধ্যযুগের ইতিহাসে যাদের নাম ভাস্কর অক্ষরে লেখা রয়েছে, রাজা গণেশ তাঁদের মধ্যে অন্যতম। একক কৃতিত্বের দিক দিয়ে গণেশের সঙ্গে খুব কম লোকেরই তুলনা চলতে পারে। ত্রয়োদশ শতাব্দী থেকে অষ্টাদশ শতাব্দী পর্যন্ত বাংলা ছিল মুসলমানদের অধিকারে। এর মধ্যে কোন কোন সময় অঞ্চলবিশেষে হিন্দুদের প্রাধাণ্য স্থাপিত হয়েছে বটে, কিন্তু সমগ্র বাংলার সিংহাসন অধিকার এই একটিমাত্র হিন্দুর পক্ষেই সম্ভব হয়েছিল। পঞ্চদশ শতাব্দীর প্রথম দিকে গণেশ বিদ্যাসুন্দরের মত আবির্ভূত হয়ে অসাধ্যসাধন করেছিলেন, প্রবল বিরুদ্ধশক্তির বাধাকে জয় করে বাংলায় হিন্দু রাজত্ব প্রতিষ্ঠা করেছিলেন। গণেশের কীর্তির অসামান্যতা সম্বন্ধে ঐতিহাসিকদের মধ্যে দ্বিমত নেই।

অবশ্য এই হিন্দু অভ্যুদয় বেশীদিন স্থায়ী হয় নি। গণেশের বংশধররা পারিপার্শ্বিক অবস্থার চাপে ধর্মাস্তর গ্রহণ করতে বাধ্য হয়েছিলেন। তা সত্ত্বেও তাঁরা বাংলার সিংহাসন বেশীদিন নিজেদের অধিকারে রাখতে পারেননি। কিন্তু স্বল্পস্থায়ী হলেও গণেশ ও তাঁর বংশের রাজত্ব বাংলার ইতিহাসের এক অত্যন্ত বৈশিষ্ট্যপূর্ণ অধ্যায়। কারণ, প্রথমত এই বংশ হিন্দুর বংশ, দ্বিতীয়ত এই বংশের রাজারা বাংলা দেশেরই সম্ভ্রান্ত। এর আগে যে সমস্ত মুসলমান সুলতান এদেশে রাজত্ব করেছিলেন, তাঁদের পিতৃভূমি ছিল বাংলার বাইরে। তাঁরা নিজেরাও বাংলাকে নিজেদের স্বদেশ বলে মনেপ্রাণে গ্রহণ করতে পারেন নি। তাই বাঙালী জনসাধারণও তাঁদের আপন বলে ভাবতে পারে নি। কিন্তু বাঙালী রাজা গণেশ যেদিন ক্ষমতায় প্রতিষ্ঠিত হলেন, সেদিন থেকে বাংলার রাজশক্তির সঙ্গে বাংলার জনসাধারণের অন্তরের যোগ স্থাপিত হল। এই কারণে রাজা গণেশের আবির্ভাব বাংলার ইতিহাসের একটি যুগ-লক্ষণাক্রান্ত ঘটনা এবং এই ঘটনা থেকেই বাংলার ইতিহাসের একটি নতুন অধ্যায় শুরু হল।

বর্তমান অধ্যায়ে আমরা রাজা গণেশ সম্বন্ধে যথাসম্ভব পূর্ণাঙ্গ ও প্রামাণ্য বিবরণী রচনার চেষ্টা করব। অবশ্য এই অসামান্য রাজার সম্বন্ধে নির্ভরযোগ্য

শূদ্র থেকে খুব কম তথ্য পাওয়া যায়। সেটুকু একত্র সংগ্রহ করে সতর্ক-ভাবে বিচার-বিশ্লেষণ করে আমাদের সত্য নির্ধারণের চেষ্টা করতে হবে।

### রাজার নাম

প্রথমে রাজার নাম সম্বন্ধে কিছু আলোচনা করা দরকার। আমরা যাকে ‘রাজা গণেশ’ বলছি, সত্যিই তাঁর নাম ‘গণেশ’ কিনা, সে সম্বন্ধে সকলে এগনও নিঃসংশয় হতে পারেন নি। বাংলা দেশে রাজা গণেশ এবং তাঁর ছেলে যদুর সম্বন্ধে নানারকম মনোহর কিংবদন্তী ও শ্লোক প্রচলিত আছে। যদু যে ইসলাম ধর্ম গ্রহণ করে জলালুদ্দীন নাম নিয়েছিলেন, এ সম্বন্ধে সব কিংবদন্তীই একমত; কিন্তু এই রাজা ও তাঁর ছেলে যদু-জলালুদ্দীন সম্বন্ধে নির্ভরযোগ্য বিবৃতি কেবলমাত্র মুসলমান ঐতিহাসিকদের লেখা ফার্সী বইয়েই মেলে। তাদের মধ্যে রাজার নাম ‘কান্স’, ‘কানিস’, ‘কেন্স’, ‘কানসি’—এইভাবেই পাওয়া যায়। এর সমনাম্যিক দরবেশ নূর কুন্স্ আলম ও আশরাফ সিমুনানীর লেখা চিঠিতে এর নাম লেখা আছে ‘কান্স্ রায়’। একমাত্র ইস্ট ইণ্ডিয়া কোম্পানীর স্ট্যাটিস্টিক্যাল রিপোর্টার ফ্রান্সিস বুকাননের লেখা বা সংগ্রহ করা একটি বিবরণীতে\* (যা আনুমানিক ১৮১০ খ্রীষ্টাব্দে পাণ্ডুরার একটি পুরোনো ফার্সী পুঁথি অবলম্বনে রচিত হয়েছিল বলে প্রকাশ) রাজার নাম ‘গণেশ’ রূপে মেলে। এই অবস্থার জন্তে কেউ কেউ বলেন রাজার মূল নাম ‘কংস’, ‘গণেশ’ নয়।

দুখানি বাংলা বই এবং একখানি সংস্কৃত বইয়ে “রাজা গণেশ”—এর নাম পাওয়া যায়। বাংলা বই দুটির নাম ‘অদ্বৈতপ্রকাশ’ (রচনাকাল ১৫৬৮ খ্রীঃ বলে স্থিত) ও প্রেমবিলাস (রচনাকাল ১৬০০ খ্রীঃ বলে কথিত) এবং সংস্কৃত বইটির নাম ‘বাল্যলীলাসূত্র’ (রচনাকাল ১৪৮৭ খ্রীঃ বলে কথিত)। তিনখানি বইতেই বলা হয়েছে “রাজা গণেশ” অদ্বৈতের পূর্বপুরুষ নরসিংহ নাড়িয়ালকে মন্ত্রিপদে নিযুক্ত করেছিলেন। প্রেমবিলাসের চতুর্বিংশ বিলাসে আছে,

প্রভাকরের পুত্র নরসিংহ নাড়িয়াল।

গণেশ রাজার মন্ত্রী লোকে ঘোষে সর্বকাল ॥

\* Martin's Eastern India, Vol. II, p. 616—621. এটি আসলে মেজর উইলিয়াম ফ্রাঙ্কলিনের লেখা বলে বেভারিজ মনে করেন (J. A. S. B., 1894, Pt. I, pp. 91—93 ত্রঃ)।

দৈবে ত্রিহট্ট হৈতে ত্রীগণেশ রাজা ।

নরসিংহ নাড়িয়ালে করিলেক পূজা ॥

‘অদ্বৈতপ্রকাশে’ আছে,

সেই নরসিংহের যশ ঘোষে ত্রিভুবন ।

সর্বশাস্ত্রে সুপণ্ডিত অতি বিচক্ষণ ॥

যাহার মন্ত্রণাবলে ত্রীগণেশ রাজা ।

গোড়ের বাদশাহ মারি গোড়ে হৈল রাজা ॥

‘বাল্যলীলাসুত্রে’ আছে,

ত্রীমান নৃসিংহস্য মহাঅনো বৈ যশঃপ্রসূনে ক্ষুটিতে মনোজ্ঞে

তৎসৌরভব্যাহবিমোহিতাত্মা রাজা গণেশো বহুশাস্ত্রদর্শী ॥

গ্রহপক্ষাঙ্কিশশধৃতমিতে শাকে সুবুদ্ধিমান্ ।

গণেশো যবনং জিত্বা গোড়ৈকচ্ছত্রধৃগভূং ॥

বিশেষজ্ঞদের গবেষণার ফলে প্রমাণিত হয়েছে এই তিনখানি বই যতটা প্রাচীনত্ব দাবী করছে, ততটা প্রাচীন নয়। স্ততরাং এদের মধ্যে বণিত ঘটনার ঐতিহাসিকতা সন্দেহজনক। কিন্তু রাজার নাম সম্বন্ধে এদের সাক্ষ্যকে সরাসরি অগ্রাহ করা চলে না।

এই রাজার প্রকৃত নাম যে ‘গণেশ’, একথা মনে করার স্বপক্ষে আরও অনেক যুক্তি আছে। বিখ্যাত ঐতিহাসিক বেভারিজ এই যুক্তিগুলি দেখিয়েছিলেন—গ্ ( গাফ্ ) এবং ক্ ( কাফ্ ) অক্ষরের পার্থক্য ফার্সী পুঁথিতে সাধারণতঃ রক্ষিত হয় না এবং ‘গাফ্’-এর জায়গায় ‘কাফ্’ই প্রায় সর্বত্র লেখা হয়। ১০০১৮৯ খ্রীষ্টাব্দের Journal Asiatique-এর ২০৫ পৃষ্ঠায় প্রকাশিত কান্দাহার শিলালিপিতে দেখতে পাওয়া যায়, ‘ঘোড়াঘাট’, ‘গোড়’ এবং ‘বান্দালা’ নামগুলি লেখা হয়েছে যথাক্রমে ‘কোড়াকাট’, ‘কোড়’ এবং ‘বান্দালা’ রূপে। এই কারণে ‘কান্স’ ও ‘কনেস’ মূলে ‘গণেশ’ ছিল বলে মনে হয়। ১০০১ তাছাড়া সব পুঁথিতেই ‘কান্স’ নাম পাওয়া যায় বললে ভুল হবে। অন্তত একখানি পুঁথিতে নিশ্চয়ই ‘গণেশ’ নাম ছিল, যেখানি বুকানন ব্যবহার করেছিলেন। ১০০১ শুধু তাই নয়, ‘গণেশ’ রাজার স্মৃতি এখনও জনপ্রবাদের মধ্যে বেঁচে আছে। এঁর প্রকৃত নাম যদি ‘কংস’ হয়, তাহলে বলতে হবে, এতবড়



একজন হিন্দু রাজার আসল নাম তাঁর স্বধর্মের লোকেরা ভুলে গেছে, কেবল মুসলমানরাই মনে করে রেখেছে। এ ব্যাপার অসম্ভব বলেই মনে হয়। ( J. A. S. B, 1892, Pt. I, No. 2, pp. 118-119 )

‘গণেশ’ নামের আত্মকর ‘গ্’ যে ফার্সী পুঁথিতে ‘ক্’ হয়ে পড়ত, তার আরও প্রমাণ আমরা পেয়েছি। লোদী বংশের সুলতান সিকন্দর লোদীর সময়ে ‘গণেশ’ নামে একজন হিন্দু রাজা ছিলেন, তাঁর আসল নামটি কেবলমাত্র ‘মখ্জান-ই-আফ্গানী’র পুঁথিতে বিস্তৃতভাবে পাওয়া যায়। ‘তবকাৎ-ই-আকবরী’র পুঁথিতে এঁর নাম হয়ে পড়েছে ‘কনিম্’। স্মরণ্য বাংলায় এই বিখ্যাত রাজার নামও মূলে ‘গণেশ’ ছিল বলে মনে হয়। কিন্তু সমসাময়িক আরবী ঐতিহাসিক ইব্ন-ই-হজর ও তাঁর অনুবর্তী কোন কোন গ্রন্থকার গণেশের নাম লিখেছেন “ফন্দু কাস”। “ফন্দু” “হিন্দুর” বিকৃত রূপ; “কাস” সম্ভবত “গণেশ”-এর বিকৃত রূপ। কিন্তু “কাস” “কাশী”রও অপভ্রংশ হতে পারে। ঊনবিংশ শতাব্দীর প্রথম দিকে মুন্সী শামপ্রসাদ মেজর উইলিয়াম ফ্রাঙ্কলিনের জন্ম ফার্সী ভাষায় গোড়ের সংক্ষিপ্ত ইতিহাস রচনা করেছিলেন; এই ইতিহাসে তিনি লিখেছেন যে জলালুদ্দীনের পিতার নাম ছিল “কাশী রায়” ( J. A. S. B., 1902, Pt. I, p. 44 দ্রঃ)। “কাশী”-ও সংস্কৃত ভাষায় অজ্ঞ লিপিকরের হাতে পড়ে ফার্সী পুঁথিতে “কানস্”-এ পরিণত হতে পারে। এই রাজার নাম ‘গণেশ’ ছিল বলেই আমাদের ধারণা। এই বইয়ের সর্বত্র এই নামেই আমরা এঁর উল্লেখ করেছি। কিন্তু ইব্ন-ই-হজর প্রভৃতি সমসাময়িক লেখকদের এবং হিন্দু ঐতিহাসিক মুন্সী শামপ্রসাদের বিপরীত সাক্ষ্যের জন্ম এ সম্বন্ধে একটু সন্দেহ থেকে গেল।

### ঐতিহাসিক সূত্র

যে সমস্ত সূত্রের মধ্যে গণেশ ও তাঁর বংশের ইতিহাস পাওয়া যায়, তার মধ্যে আইন-ই-আকবরী, তবকাৎ-ই-আকবরী, মাসির-ই-রহিমী, তারিখ-ই-ফিরিশ্তা, রিয়াজ-উস-সলাতীন এবং বুকাননের বিবরণী উল্লেখযোগ্য। কিন্তু এই সূত্রগুলির মধ্যে একটিও গণেশের সমসাময়িক নয়। আইন-ই-আকবরী ও ‘তবকাৎ-ই-আকবরী’ আকবরের রাজত্বকালে এবং ‘মাসির-ই-রহিমী’ ও ‘তারিখ-ই-ফিরিশ্তা’ জাহাঙ্গীরের রাজত্বকালে রচিত হয়। ‘রিয়াজ-উস-সলাতীন’ ১৭৮৮ খ্রীষ্টাব্দে লেখা। এর লেখক গোলাম হোসেন তাঁর ব্যবহৃত

সূত্রগুলির নাম দু'এক জায়গা ভিন্ন কোথাও উল্লেখ করেন নি, কিন্তু তিনি যে 'আইন-ই-আকবরী', 'তবকাং-ই-আকবরী', 'তারিখ-ই-ফিরিশ্তা' এবং আরও কতকগুলি অধুনালুপ্ত বই থেকে উপকরণ সংগ্রহ করেছিলেন, তা বোঝা যায়। গোলাম হোসেনের ঐতিহাসিকোচিত দৃষ্টি ছিল। তিনি কোন কোন ক্ষেত্রে শিলালিপি থেকেও তথ্য আহরণ করেছেন; কিন্তু তিনি অনেক ক্ষেত্রে যে কিংবদন্তীর উপরও নির্ভর করেছেন, তাতে কোন সন্দেহ নেই। বুকাননের বিবরণী একটি অজ্ঞাতনামা ফার্সী বই অবলম্বনে রচিত হয়েছিল। 'রিয়াজ-উস-সলাতীনে'র সঙ্গে এই বিবরণীর উক্তির অনেক ক্ষেত্রে মিল আছে কিন্তু পার্থক্যের পরিমাণও উপেক্ষণীয় নয়।

সমসাময়িক নয় বলে এই সমস্ত সূত্রের উক্তি নির্বিচারে গ্রহণযোগ্য নয়, বিশেষত এদের লেখকরা যে সমস্ত সূত্র থেকে তথ্য আহরণ করেছেন, সেগুলির প্রামাণিকতা সম্বন্ধে যখন আমরা কিছুই জানি না। বিজ্ঞানসম্মত গবেষণার ফলে এইসব সূত্রের উক্তি অনেক ক্ষেত্রে ভুল প্রমাণিত হয়েছে, বিশেষ করে বিভিন্ন রাজার রাজত্বকাল সম্বন্ধে এদের ভুল অত্যন্ত বেশী। এদের মধ্যে দেওয়া প্রায় কোন ঘটনার সালই শুদ্ধ নয়, এমন কি কোন কোন রাজার নাম সম্বন্ধেও এদের মধ্যে গোলমাল আছে।\* এইসব কারণে এদের যে সমস্ত কথা সমসাময়িক সূত্রের উক্তি দ্বারা সমর্থিত, কেবলমাত্র সেইটুকুই নিশ্চিত মনে গ্রহণ করা যায়। অবশ্য যে সব বিষয়ে একাধিক সূত্রের বিবৃতির মধ্যে মিল আছে এবং যে সব

\* এ সম্বন্ধে বিশদ আলোচনার জন্ত আচাঞ্চ যদুনাথ সরকার সম্পাদিত *History of Bengal*, Vol. II, pp. 115-116 দ্রষ্টব্য।

১ জনাব আহমদ হাসান দানী 'দেববংশের ইতিবৃত্তি' নামে আর একটি সূত্রের বিবরণ দিয়েছেন ও ব্যবহার করেছেন (J.A.S., 1952, pp. 151-52)। এই তথাকথিত 'দেববংশের ইতিবৃত্তি' যে আদলে 'বটুভট্টের দেববংশ' নামে একখানি জাল কুলগ্রন্থ অবলম্বনে রচিত, তা জনগোষ্ঠীনাথ বহু রচিত 'বঙ্গের জাতীয় ইতিহাস' রাজশ্রুতিকাণ্ডের ৩৬৭ পৃষ্ঠার প্রস্তুত 'বটুভট্টের দেববংশ'র সংক্ষিপ্তসারের সঙ্গে মিলিয়ে নিলেই বোঝা যাবে। 'বটুভট্টের দেববংশ' যে জাল বই, তা ডঃ রমেশচন্দ্র মজুমদার দেখিয়েছেন (ভারতবর্ষ, কার্তিক, ১৩৪৬, পৃঃ ৬৬০ দ্রষ্টব্য)। "দেববংশের ইতিবৃত্তি" নামটিও ডঃ দানীর স্বকপোলকল্পিত। ডঃ দানী যে বইয়ে এই সূত্রটির উল্লেখ পেয়েছেন, তা হল সতীশচন্দ্র মিত্রের লেখা 'যশোহর-খুলনার ইতিহাস' (প্রথম খণ্ড)। ঐ বইয়ে (পৃঃ ২৭২-২৮০) আলোচ্য সূত্রটিকে "দেববংশের ইতিবৃত্তি" বলা হয় নি, "কায়স্থ দেব-বংশের ইতিবৃত্তসম্বলিত একখানি হস্ত-লিখিত প্রাচীন কুলগ্রন্থ" বলে অভিহিত করা হয়েছে।

উক্তি পারিপার্শ্বিক অবস্থার সঙ্গে খাপ খায় সেগুলিও মোটামুটিভাবে বিশ্বাসযোগ্য। যাহোক গণেশ ও তাঁর বংশের ইতিহাস রচনার আরও কতকগুলি সূত্র আমাদের হস্তগত হয়েছে, তাদের মধ্যে কয়েকটি সমসাময়িক। অবশ্য এই সব সূত্রের মধ্যে কোন ধারাবাহিক ইতিহাস মেলে না, বিচ্ছিন্ন কতকগুলি তথ্য পাওয়া যায় মাত্র। আলোচনার মধ্যে এগুলির উল্লেখ ও ব্যবহার করা হবে।

### গণেশের পূর্ব-ইতিহাস ও দেশ

এবার গণেশ সম্বন্ধে আলোচনা শুরু করা যেতে পারে। কিন্তু প্রথমে আমাদের জানা দরকার, বাংলার শাসনক্ষমতা হস্তগত করার আগে তিনি কী ছিলেন। এ সম্বন্ধে 'রিয়াজ-উস-সলাতীনে' খুব স্পষ্ট নির্দেশ পাওয়া যায়। এতে বলা হয়েছে, গণেশ ছিলেন 'ভাতুড়িয়া'র জমিদার। রেনেলের মানচিত্রে (১৭৭৮) উত্তরবঙ্গের একটি বিস্তীর্ণ অঞ্চল 'ভাতুড়িয়া' নামে চিহ্নিত হয়েছে। এই অঞ্চলটির পশ্চিম দিকে মহানন্দা ও পুনর্ভবা নদী, দক্ষিণে পদ্মা নদী, পূর্ব দিকে করতোয়া নদী এবং উত্তরে দিনাজপুর ও ঘোড়াঘাট। প্রাচীন দলিল-পত্রেও 'ভাতুড়িয়া'র নাম পাওয়া যায়। জাফর খাঁর বন্দোবস্তে (১৭২২) 'ভাতুড়িয়া'কে চাকলা ঘোড়াঘাটের অন্তর্ভুক্ত করা হয়েছে।<sup>১</sup> ভাতুড়িয়া নামটি অত্যন্ত প্রাচীন এবং মীরজুমলার জায়গীরগুলির মধ্যে ভাতুড়িয়া অন্যতম।<sup>২</sup> 'আইন-ই-আকবরী'তে সরকাব বাজুহার অন্তর্গত বাহুড়িয়া বা বাহুড়িয়া নামে একটি মহলের উল্লেখ পাওয়া যায়। বেভারিজ মনে করেন, 'ভাতুড়িয়া' নামই লিপিকর-প্রমাদে বাহুড়িয়া বা বাহুড়িয়া হয়েছে।<sup>৩</sup> যাহোক আমরা দেখতে পাচ্ছি যে, ভাতুড়িয়া অঞ্চল বর্তমানে রাজশাহী জেলার অন্তর্গত এবং অঞ্চলটির নাম অত্যন্ত প্রাচীন। সুতরাং গণেশ যে এই অঞ্চলের জমিদার ছিলেন, 'রিয়াজে'র এই কথা বিশ্বাসযোগ্য বলে মনে হয়।<sup>৪</sup> অন্য কোন বিবরণীতে

১. J. A. S. B., 1892, Pt. I, No. 2., p. 120

২. Do.

৩. Do.

৪. বর্তমান পশ্চিম দিনাজপুর জেলার অন্ততম মহকুমা শহর রায়গঞ্জের কাছে 'রাজা গণেশ' নামে একটি গ্রাম আছে। গ্রামটির এই নাম কে কোন সময়ে দিয়েছে, এবং রাজা গণেশের সঙ্গে এ' গ্রামের কোন সম্পর্ক ছিল কিনা তা জানি না।

‘রিয়াজ’-এর উক্তির বিরোধী কোন কথা নেই। অবশ্য বুকানন লিখেছেন, “Gones, a Hindu, and Hakim, of Dynwaj (perhaps a petty Hindu chief of Dinajpur), seized the government.” বুকাননের উক্তিতে বন্ধনীর মধ্যস্থিত অংশটুকু থেকে অনেকে মনে করেন, তাঁর ব্যবহৃত পুঁথির মতে গণেশ দিনাজপুর অঞ্চলের রাজা ছিলেন। কিন্তু বন্ধনীর মধ্যকার অংশটুকু বুকাননের স্বরচিত। তাঁর ব্যবহৃত পুঁথিতে ‘গণেশ’ সম্বন্ধে ‘দিনাজপুরের জমিদার’ এই উক্তি ছিল না। ছিল এমন একটি শব্দ, বুকানন যার অনুবাদ করেছেন, “Hakim of Dynwaj”; এই শব্দটির বুকানন মানে করেছেন “Perhaps a petty Hindu chief of Dinajpur.” কিন্তু এই ব্যাখ্যা যে তাঁর নিজের কাছে সন্তোষজনক মনে হয় নি তার প্রমাণ হচ্ছে, দিনাজপুর অঞ্চলের বিবরণ দেবার সময় তিনি লিখেছেন, “Whether or not, it is the same with Dynwaj, the governor (Hakim) of which, Gones, usurped the government of Gaur, I cannot say.” (Martin’s Eastern India, Vol. II, p. 624) তাছাড়া পঞ্চদশ বা ষোড়শ শতাব্দীতে ‘দিনাজ’ নামে কোন জায়গা ছিল না। বর্তমানে ‘দিনাজপুর’ নামে যে অঞ্চল পরিচিত তা বিজয়নগর নামে একটি ছোট পরগণার অন্তর্ভুক্ত ছিল।\* যাই হোক, বুকাননের মনগড়া ব্যাখ্যার উপর গুরুত্ব আরোপ করে ‘রিয়াজ-উস্-সলাতীনে’র স্পষ্ট উক্তিকে অবিশ্বাস করার কোন হেতু নেই। অতএব গণেশ বর্তমান রাজশাহী জেলার অন্তর্গত ভাতুড়িয়া অঞ্চলের জমিদার ছিলেন বলেই মনে হয়। বুকাননের বিবরণীতে উল্লিখিত “Hakim, of Dynwaj”-এর আসল মানে কি, সে সম্বন্ধে আমরা পরে আলোচনা করব।

প্রসঙ্গত উল্লেখযোগ্য, সম্প্রতি রাজা গণেশের পুত্র জলালুদ্দীন মুহম্মদশাহের নামাঙ্কিত ও তাঁরই রাজত্বকালে উৎকীর্ণ একটি শিলালিপি পাওয়া গিয়েছে (Dani, Bibliography of the Muslim Inscriptions of Bengal, p. 14 নং)। ডঃ দানীর মতে এতে নির্মাতার নাম এইভাবে উল্লিখিত হয়েছে,

“মালিক সদর অল-মিলাৎ ওয়াদ্দীন সুলতানী আমীর-এ-দীহ্ (?)  
ভাতোরিয়া (?) খাস্।”

\* অধ্যাপক দীনেশচন্দ্র ভট্টাচার্য সর্বপ্রথম এদিকে সকলের দৃষ্টি আকর্ষণ করেন (প্রবাসী, বৈশাখ, ১৩৬০, পৃ: ২০—২৩ ত্রুট্য)।

অবশ্য “দীহ্” ও “ভাতোরিয়া” এই শব্দ দুটির পাঠ স্বয়ং ডঃ দানীর মতেই সম্পূর্ণ সন্দেহাতীত নয়। কিন্তু এই পাঠ ঠিক হলে রাজা গণেশের সঙ্গে ভাতুড়িয়ার সম্পর্কের আর একটি প্রমাণ পাওয়া যায়।\*

যাহোক, গণেশ যে উত্তরবঙ্গের অঞ্চলবিশেষের জমিদার ছিলেন, তাতো জানা গেল। তিনি যে জমিদার ছিলেন তা তাঁর প্রতিপক্ষ মুসলিম দরবেশ নূর কুৎব্ আলমের একটি সম্প্রতি-আবিষ্কৃত চিঠি থেকেও জানা যায়। নূর কুৎব্ লিখেছেন—

“Oh soul of the father, how strange is the affair and astonishing the time that...thousands of Doctors of religion and learned men and ascetics and devotees had fallen under the command of an infidel, a zeminder of 400 years (standing).”

বাংলা ভাষায় এর মর্মালুবাদ এই,

“ঈশ্বরের কী অদ্ভুত লীলা। হাজার হাজার ধার্মিক এবং শিক্ষিত লোক আজ ৪০০ বছরের জমিদার এক বিধর্মীর অধীনস্থ হয়েছে।”

কিন্তু “৪০০ বছরের জমিদার” কথার অর্থ কী? কষ্টকল্পনা করে এই মানে দাঁড় করানো যায়—যার বংশ ৪০০ বছর ধরে জমিদারী করে আসছে। মূলে এখানে ৪০০ মনসবের জমিদার বা এই ধরনের কোন কথা ছিল বলে মনে হয়।

গণেশের জাতি বা গোত্র সম্বন্ধে বা পূর্বপুরুষদের নাম সম্বন্ধে আজ পর্যন্ত কিছুই জানা যায়নি † তবে তাঁর সমসাময়িক দরবেশ নূর কুৎব্ আলম এবং আশ্রফ্ সিম্বানী তাঁদের চিঠিতে গণেশের নাম লিখেছেন ‘কান্স্‌রায়’, কিন্তু

\* মৌলভী শামসুদ্দীন আহমদ Inscriptions of Bengal ( Vol IV )-এ ( p. 48 ) এই শিলালিপিটি যেভাবে প্রকাশ করেছেন, তাতে “আমীর-এ-দীহ্ ভাতোরিয়া”র বদলে, “আমীর ছুদা বিন মুকিয়া ( হুতিয়া ? )” পাঠ দেওয়া হয়েছে।

জনাব আবদুল মোমিন চৌধুরী এই অংশের পাঠ ধরেছেন, “আমীর ( এ )-দীহ্ হুতিয়া” ( J. A. S. P. Vol VIII, No, I, p. 57 প্রঃ ) এবং তিনি সিদ্ধান্ত করেছেন যে, সদব্ অল-মিলাং ওয়াদ্দীন “হুতী”র ( বর্তমান মুর্শিদাবাদ জেলার অন্তর্গত ) শাসনকর্তা ছিলেন।

† অনেকের বিধান, গণেশ “ভাতুড়ী” পদবীধারী বারেন্স প্রেঞ্জার ব্রাহ্মণ ছিলেন। আজ পর্যন্ত এই বিষয়ের স্বপক্ষে কোন প্রমাণ পাওয়া যায়নি।

মুসলমানরা হিন্দু রাজাদের নামের সঙ্গে প্রায় সর্বদাই ‘রায়’ শব্দ যোগ করতেন। তাঁদের হাতে পড়ে পৃথীরাজ ‘রায় পিথোরায়’, লক্ষ্মণসেন ‘রায় লখমনিয়ায়’, দত্তজমাধব ‘রায় দত্তজ’এ পরিণত হয়েছেন। সুতরাং এর থেকে কোন আলোক পাওয়া যায় না।

বাংলার শাসনক্ষমতা হস্তগত করার আগে গণেশ ইলিয়াস শাহী সুলতানদের অমাত্য ছিলেন, এ কথা কেবলমাত্র ফিরিশ্তা বলেছেন। বলা বাহুল্য এ কথা সম্পূর্ণ বিশ্বাসযোগ্য।

### গণেশের অভ্যুদয়

সুলতান গিয়াসুদ্দীন আজম শাহের মৃত্যুর প্রসঙ্গে আমরা রাজা গণেশের প্রথম উল্লেখ পাচ্ছি এবং গিয়াসুদ্দীনের পরবর্তী সুলতানদের সময়ে তাঁকে বিশেষ ক্ষমতাসম্পন্ন দেখতে পাচ্ছি। এই ক্ষমতারই পরিণতি হয়েছিল বাংলার সিংহাসন অধিকার করার মধ্যে। এক হিন্দু জমিদারের এতখানি ক্ষমতা অর্জন সত্যিই বিশ্বয়ের বিষয়। আপাতদৃষ্টিতে এই ব্যাপারকে একটি বিচ্ছিন্ন ঘটনামাত্র মনে হয়; কিন্তু ঐ সময়ের ইতিহাসের দিকে লক্ষ্য রাখলে ঘটনাটিকে বিচ্ছিন্ন বলে মনে হবে না। হিন্দু জমিদারদের শক্তি ঐ সময় নিতান্ত অল্প ছিল না। ফিরোজ শাহ তোগলক যখন বাংলার বিদ্রোহী সুলতান ইলিয়াস শাহকে দমন করতে বাংলাদেশে আসেন, তখন বাংলার হিন্দু রাজা অর্থাৎ জমিদাররা ইলিয়াস শাহের পক্ষ নিয়ে যুদ্ধ করেন, এই কথা জিয়াউদ্দীন বারনির ‘তারিখ-ই-ফিরোজশাহী’তে পাওয়া যায়। ‘তারিখ-ই-মোবারক-শাহী’তে লেখা আছে, সহদেব নামে একজন হিন্দু বীর ইলিয়াস শাহের পক্ষ নিয়ে যুদ্ধ করে প্রাণ দেন। ফিরোজ শাহ তোগলকের প্রচেষ্টা যে ব্যর্থ হয়েছিল, তার জ্ঞাত হিন্দু জমিদারদের শক্তি অনেকখানি কৃতিত্ব দাবী করতে পারে। এই যুগের হিন্দু জমিদারদের অন্ততম গণেশও অসামান্য সামরিক শক্তির অধিকারী ছিলেন। জৌনপুরের বিখ্যাত দরবেশ আশ্রফ সিমুনানী গণেশের প্রতিপক্ষ নূর কুৎব আলমকে এক চিঠিতে লিখেছেন, “As regards what you have written about the overthrowing of the kingdom of Islam by the army of Kāns Rai, the infidel,……everything has become evident.” (“কাকের কান্দ রায়ের সৈন্যবাহিনী কর্তৃক ইসলামের রাজত্বের উচ্ছেদ সম্বন্ধে আপনি যা

লিখেছেন...সে সম্বন্ধে সবই স্পষ্ট হয়েছে।” এই উক্তি থেকে জানা যাচ্ছে, গণেশ প্রধানত সামরিক শক্তির জোরেই ইলিয়াস শাহী বংশের উচ্ছেদ করেছিলেন। ঐ সময়ে তাঁর সামরিক শক্তি ইলিয়াস শাহী সুলতানদের চেয়ে অনেক বেশি হয়ে দাঁড়িয়েছিল।

প্রশ্ন উঠতে পারে, ইলিয়াস শাহী সুলতানদের এরকম শক্তিহানি ঘটল কেন? এর কারণ অসুস্থমান করা কঠিন নয়। ইলিয়াস শাহী বংশের প্রথম দু'জন সুলতান ইলিয়াস শাহ ও সিকন্দর শাহ অত্যন্ত স্বযোগ্য রাজা ছিলেন। তাঁরা দিল্লীর সম্রাটের কাছেও নতি স্বীকার করেননি। সিকন্দর শাহের ছেলে গিয়াসুদ্দীন আজম শাহের যোগ্যতা পিতা ও পিতামহের তুলনায় কিছুমাত্র কম ছিল না; কিন্তু দুর্ভাগ্যক্রমে নিজের পিতার সঙ্গে তাঁর শত্রুতার সম্পর্ক গড়ে উঠেছিল। পিতার বিরুদ্ধে বিদ্রোহ করে তিনি পূর্ববঙ্গে বহুদিন ধরে স্বাধীনভাবে রাজত্ব করেন এবং অবশেষে পিতার সঙ্গে যুদ্ধ করে তাঁকে নিহত করে বাংলার সিংহাসন অধিকার করেন। পিতাপুত্রের এই বন্দের ফলেই যে ইলিয়াস শাহী বংশের সামরিক শক্তি দুর্বল হয়ে পড়েছিল, তাতে সন্দেহ নেই। তারপর গিয়াসুদ্দীন আজম শাহের রাজত্বকালে গোড়ের রাজশক্তি ক্রমাগত একের পর এক যুদ্ধে জড়িয়ে পড়ে হীনবল হয়ে যায়। এসম্বন্ধে আগেই আলোচনা করা হয়েছে। গিয়াসুদ্দীনের পরবর্তী তিনজন সুলতান অপদার্থ ছিলেন। সুতরাং অমিতশক্তিধর গণেশের পক্ষে ক্ষমতা অধিকার করা মোটেই কঠিন হয় নি। কীভাবে তিনি ক্ষমতা অধিকার করলেন, সে ইতিহাস আগের অধ্যায়ে বর্ণিত হয়েছে।

### গণেশ কি প্রথমেই নিজে রাজা হয়েছিলেন?

আলাউদ্দীন ফিরোজ শাহকে অপসারিত করে গণেশ সিংহাসন অধিকার করলে আলাউদ্দীন ফিরোজ শাহের পর তাঁর মৃত্যু পাওয়ার কথা। কিন্তু আলাউদ্দীনের ঠিক পরেই ৮১৮ হিজরা থেকে জলালুদ্দীন মুহম্মদ শাহের মৃত্যু পাওয়া যাচ্ছে। অথচ প্রত্যেকটি বিবরণ থেকেই জানা যায় যে, গণেশের ছেলে যদু বা জিতমল ইসলাম ধর্ম গ্রহণ করে জলালুদ্দীন নাম নিয়ে সিংহাসনে বসেছিলেন। এর থেকে আপাতদৃষ্টিতে মনে হতে পারে যে, ইতিমধ্যে রাজা গণেশের মৃত্যু হয়েছিল, কিন্তু প্রকৃত ব্যাপার তা নয়। যে অবস্থার মধ্যে যদু

ইসলামধর্মাস্তরিত ও সিংহাসনে অভিষিক্ত হয়েছিলেন, তার বর্ণনা 'রিয়াজ-উস-সলাতীনে' মেলে ; তার সংক্ষিপ্তসার এই—

(১) ইলিয়াস শাহী বংশকে উচ্ছেদ করে গণেশ নিজেই সিংহাসনে বসেন।

(২) সিংহাসনে বসবার প্রায় সঙ্গে সঙ্গেই মুসলমান দরবেশদের সঙ্গে তাঁর বিরোধ বেধে ওঠে। গণেশ তখন অনেক মুসলমান দরবেশকে বধ করেন। দরবেশদের নেতা নূর কুৎব্ আলম তখন জৌনপুরের রাজা ইব্রাহিম শর্কীকে এক চিঠি লিখে গণেশকে দমন করতে আহ্বান জানান।

(৩) ইব্রাহিম সসৈন্তে বাংলায় উপস্থিত হলে গণেশ নতি স্বীকার করেন এবং নূর কুৎব্ আলমের সঙ্গে আপোষ করেন। আপোষের সর্ব অল্পযায়ী গণেশের ছেলে যত্নকে ইসলাম ধর্মে দীক্ষিত করে সিংহাসনে অধিষ্ঠিত করা হয়। গণেশ সিংহাসন ত্যাগ করেন, ইব্রাহিমও দেশে ফিরে যান।

বুকাননের বিবরণীতে এই বিবরণের প্রায় সম্পূর্ণ সমর্থন আছে, অবশ্য ইব্রাহিমের পরিচয় ও পবিণাম সম্বন্ধে তার মধ্যে ভ্রান্ত উক্তি করা হয়েছে, তা আমরা পরে দেখাব। আপাতত আমাদের বিচার্য বিষয় হচ্ছে, উপরে উল্লিখিত বিষয় তিনটি সত্য কিনা? এদের মধ্যে দ্বিতীয়টি সম্পূর্ণ সত্য, কারণ সমসাময়িক চিঠিপত্র থেকে এর সমর্থন পাওয়া যাচ্ছে। তৃতীয়টিরও প্রায় ষোল আনা সমর্থন একটি সমসাময়িক সূত্র থেকে পাওয়া যায়। এসম্বন্ধে পরে আলোচনা দ্রষ্টব্য। দ্বিতীয় ও তৃতীয় বিষয় দুটি ঠিক হলে প্রথমটিও সত্য হতে বাধ্য। অর্থাৎ ইলিয়াস শাহী বংশকে উচ্ছেদ করে গণেশ নিজেই কিছু সময়ের জন্য সিংহাসনে বসেছিলেন। তারপর ইব্রাহিমের সঙ্গে তাঁর সংঘর্ষ হয় এবং তার ফলে তিনি নিজের ধর্মাস্তরিত পুত্রের অল্পকূলে সিংহাসন ত্যাগ করতে বাধ্য হন। কেউ কেউ মনে করেন, আলাউদ্দীন ফিরোজ শাহের ঠিক পরেই জলালুদ্দীন সিংহাসনে বসেছিলেন। কিন্তু এই অভিমত সমর্থন করা যায় না। কারণ ইব্রাহিমের সঙ্গে সংঘর্ষ পঞ্চস্ত গণেশ যদি আলাউদ্দীন ফিরোজ শাহের নামেই রাজত্ব করতেন, তাহলে আলাউদ্দীন ফিরোজ শাহকে সরিয়ে গণেশের ছেলেকে সিংহাসনে বসাবার কথা উঠত না। অতএব এ বিষয়ে কোন সন্দেহই নেই যে, আলাউদ্দীন ফিরোজ ও জলালুদ্দীনের মাঝখানে গণেশ নিজেই সিংহাসনে বসেছিলেন। আলাউদ্দীনের সব মুদ্রাই ৮১৭ হিজরার, জলালুদ্দীনের প্রাচীনতম মুদ্রা ৮১৮ হিজরার ; সুতরাং ৮১৭ হিজরার শেষের দিকে খুব সামান্য সময় এবং ৮১৮



হিজরার প্রথমাংশে কিছু সময়\* গণেশ নিজেই সিংহাসনে বসে রাজত্ব করেছিলেন সিদ্ধান্ত করলে কোন দিক দিয়ে কোন অসঙ্গতি থাকে না। ইব্রাহিম শকীর আক্রমণের প্রাক্কালে আশ্রুফ সিমুনানী যে চিঠি লিখেছেন, তাতেও পাওয়া যায় যে গণেশ তাঁর সৈন্তবাহিনীর সাহায্যে “ইসলামের রাজত্বের উচ্ছেদ” করেছেন। এর থেকেও মনে হয়, ঐ সময়ে বাংলার সিংহাসনে কোন নামমাত্র মুসলমান রাজাও ছিল না এবং গণেশ নিজেই সিংহাসনে বসেছিলেন।

### মুসলমান দরবেশদের সঙ্গে গণেশের বিরোধ

এবার এর পরবর্তী ঘটনাপ্রবাহ সম্বন্ধে আলোচনা করা যাক। ‘রিয়াজ’ ও বুকাননের বিবরণীতে লেখা আছে, গণেশ সিংহাসনে বসবার সঙ্গে সঙ্গেই মুসলমান দরবেশদের সঙ্গে তাঁর বিরোধ বেধে ওঠে। গণেশ কঠোর হাতে দরবেশদের দমন করেন। কীভাবে এই বিরোধ চরমে উঠল সে সম্বন্ধে ‘রিয়াজ-উস-সলাতীনে’ পাওয়া যায়—গণেশ একদিন সভায় বসেছিলেন, এমন সময় বদর-উল্-ইসলাম নামে একজন দরবেশ সেখানে এসে তাঁকে অভিবাদন না করেই বসে পড়েন। গণেশ এর কারণ জিজ্ঞাসা করলে বদর-উল্-ইসলাম বলেন, “শিক্ষিত লোক বিধর্মীকে অভিবাদন করেন না।” গণেশ সেদিনকার মত তাঁকে কিছু বলেন না, কিন্তু আরও একদিন বদর-উল্-ইসলাম তাঁকে অপমান করাতে তিনি তাঁকে হত্যা করেন। সেইদিনই পাণ্ডয়ার অগ্রাগ্র দরবেশ এবং উলেমাকে তাঁর আদেশে জলে ডুবিয়ে বধ করা হয়। বুকাননের বিবরণীতে এই কথাগুলিই সংক্ষিপ্তভাবে পাওয়া যায়।

### নূর কুৎব্ আলম ও ইব্রাহিম শকী

যাহোক, গণেশের দমননীতির প্রতিকার করবার জন্তে দরবেশদের নেতা নূর কুৎব্ আলম (‘রিয়াজ’-এর মতে ইনি গিয়াসুদ্দীন আজম শাহের সহপাঠী ছিলেন) জৌনপুরের সুলতান ইব্রাহিম শকীকে এক চিঠি লিখে গণেশকে শাস্তি দিতে অনুরোধ জানান এবং সেই চিঠি পেয়ে ইব্রাহিম নিজেই এক

\* সবশুদ্ধ অন্ততঃ ছ'মাস। কারণ এই সময়ের মধ্যে বাংলা থেকে জৌনপুর, জৌনপুর থেকে বাংলায় অনেকগুলি চিঠি আদানপ্রদান হয়েছিল।

বিরাট সৈন্যবাহিনী নিয়ে গণেশের বিরুদ্ধে যুদ্ধযাত্রা করেন। আগেই বলেছি, এই কথাগুলি ‘রিয়াজ-উস-সলাতীন’ ও বুকাননের বিবরণীতে<sup>১</sup> পাওয়া যায় ; কিন্তু এসম্বন্ধে সমসাময়িক সূত্রই পাওয়া গিয়েছে<sup>২</sup> বলে আর জল্পনার আশ্রয় নেবার দরকার নেই। জৌনপুরে এই সময় একজন বিখ্যাত দরবেশ ছিলেন, তাঁর নাম আশ্রফ সিমুনানী। আশ্রফ সিমুনানীকে স্বয়ং হুলতান ইব্রাহিম অত্যন্ত ভক্তি করতেন এবং ইনি ছিলেন নূর কুৎব্ আলমের পিতার শিষ্য। আশ্রফ সিমুনানীর লেখা তিনখানি চিঠি সৈয়দ হাসান আস্কারি সম্প্রতি আবিষ্কার করেছেন।<sup>৩</sup> এই চিঠিগুলির মধ্যে আলোচ্য ঘটনার পরিপূর্ণ চিত্র পাওয়া যায়। আমরা চিঠিগুলি উদ্ধৃত করছি।

প্রথম চিঠিখানি স্বয়ং ইব্রাহিম শর্কীকে লেখা। নূর কুৎব্ আলমের চিঠি পেয়ে ইব্রাহিম তাঁর কর্তব্য সম্বন্ধে আশ্রফ সিমুনানীর কাছে উপদেশ চেয়ে এক চিঠি লেখেন। এই চিঠিখানি তারই উত্তর। এতে তিনি লিখেছেন,—

“কাফের কান্সের জোর করে ক্ষমতা দখল করার বিরুদ্ধে আপনার সাহায্য চেয়ে কুৎব্ আলম আপনাকে যে চিঠি লিখেছেন, তার সারমর্ম এই—  
‘প্রায় ৩০০ বছর বাদে ঐসলামিক ভূমি বাংলা দেশে বিশ্বাস (ধর্ম)-ধ্বংসকারী

১. ইব্রাহিম যে জৌনপুরের হুলতান, সে কথা বুকাননের পুঁথিতে লেখা ছিল না। বুকানন ইব্রাহিমের পরিচয় জানতেন না। তাই তিনি লিখেছেন, “The saint Kotub Shah..... wrote to a Sultan Ibrahim, who seems to have retained part of the kingdom, while the remainder fell to the share of Gones.”

২. ‘তবকাৎ-ই-আকবরী, “তারিখ-ই-ফরিশ্তা’ প্রভৃতি বইতে ইব্রাহিমের বাংলা আক্রমণের উল্লেখ নেই বলে ইব্রাহিম সত্যিই আক্রমণ করেছিলেন কিনা সে বিষয়ে কেউ কেউ সন্দেহ প্রকাশ করেছিলেন। আচার্য যদুনাথ সরকার মনে করেছিলেন আক্রমণের কথা সত্য হলেও ইব্রাহিম নিজে এই অভিযানের নেতৃত্ব করেন নি। কিন্তু আশ্রফ সিমুনানীর চিঠি, মুন্সী তকিয়ার বয়াজ, সঙ্গীত-শিরোমণি প্রভৃতি নবাবিকৃত সূত্রগুলি থেকে দেখা যাচ্ছে ৮১৮ হিজরায় ইব্রাহিম সত্যিই বাংলা আক্রমণ করেছিলেন এবং তিনি নিজেই সে অভিযানে অধিনায়কতা করেছিলেন।

৩. Bengal, Past and Present, Vol. LXVII, 1948, pp, 32-39 দ্রষ্টব্য। আস্কারি সাহেব চিঠিগুলির যে ইংরেজী অনুবাদ দিয়েছিলেন, আমরা তার বঙ্গানুবাদ দিলাম। দরবেশদের চিঠিপত্র তাঁদের ভক্তেরা সংকলন করে রাখতেন। বহু চিঠি-পত্রের সংকলন-গ্রন্থ এ পর্যন্ত পাওয়া গিয়েছে। এদের ভিতর বহু চিঠি আছে, যেগুলির মধ্যে সূফী দর্শন ও তত্ত্বোপদেশ ছাড়া বিশেষ কিছু নেই। মাত্র কয়েকটি চিঠিতে প্রসঙ্গক্রমে সমসাময়িক রাজনৈতিক ঘটনার উল্লেখ আছে।

কাফেরদের কালো ছায়া পড়াতে দেশ অন্ধকার হয়ে গিয়েছে। মুসলমানরা অমর্যাদার মধ্যে পতিত হয়েছে। দেশের প্রতিটি কোণে ইসলামের প্রদীপ তার জ্যোতি বিকীরণ করে প্রকৃত পথ প্রদর্শন করত, কান্স্‌রায় অবিস্থাসের যে বড় বইয়ে দিয়েছে তাতে তা নিভে গেছে। আপনার বিজয়ী সেনাবাহিনীর আগুন দিয়ে নূরি (স্বয়ং নূর কুৎব্) আর হোসেনির (শেখ হোসেন নামে আর একজন দরবেশ) প্রদীপকে জালিয়ে দিল।.....ইসলামের পীঠস্থানের যখন এই অবস্থা হয়েছে, তখন আপনি কেন শাস্ত ও স্থখী মনে সিংহাসনে বসে রয়েছেন? উঠুন এবং ধর্মের সাহায্যে এগিয়ে আসুন। আপনার এত শক্তি যখন রয়েছে, তখন এ কাজ করা আপনার অবশ্যকর্তব্য। সাহেব কিরান\* আমীর তৈমুর কেন দিল্লীর সাম্রাজ্য জালিয়ে দিয়েছিলেন? ধর্মের ফতোয়াই তার কারণ নয় কি? তিনি দু' তিনটি খারাপ জিনিস দেখেছিলেন বলেই তো দিল্লীর মত এমন একটা জনাকীর্ণ শহর ধ্বংস করেছিলেন!† আপনি নিজে হিন্দুস্থানের সাহেব কিরান, তবুও যে নির্ভরতা ও অত্যাচারে বাংলাদেশ ধ্বংস হচ্ছে, তা আপনি সহ্য করছেন! কাফেরীরা আগুন সেখানে দাউ দাউ করে জলছে আর আপনি আপনার তলোয়ার খাপে ভরে রেখেছেন! এরকম ব্যাপার থেকে কোন বন্ধু যে নিজেকে দূরে সরিয়ে রাখতে পারেন, তা দেখে আমি অবাক হয়ে যাচ্ছি! বাংলাদেশকে স্বর্গ বলা হয়; কিন্তু তা আজ নরাকের দোয়ায় আচ্ছন্ন হয়ে গিয়েছে।...প্রত্যেকের উপর এমন ধরনের অত্যাচার করা হচ্ছে যে, লেখায় তা বিস্তারিতভাবে বর্ণনা করা যায় না। আর এক ঘণ্টাও সিংহাসনে বসে বিশ্রাম কববেন না। আসুন, এসে বিধর্মীকে আপনার অসি দিয়ে উচ্ছেদ করুন।'

এই হচ্ছে মহাপুরুষ নূরের চিঠির মর্ম, যে চিঠি আপনি পেয়েছেন। আপনি লিখেছেন যে, আপনি আপনার অসংখ্য দিগ্বিজয়ী সৈন্যকে বাংলা আক্রমণের জন্তে সমবেত করেছেন। এসম্বন্ধে আমার মত প্রকাশ করা উচিত। আমি আপনার সাক্ষ্য প্রার্থনা করি। ধার্মিক রাজাদের পক্ষে মুসলমান ধর্মের রক্ষার জন্তে সৈন্যবাহিনী পরিচালনা করার চেয়ে আনন্দের কাজ আর কিছুই নেই।.....বাংলাদেশে বড় শহরের তো কথাই নেই,

\* দুই শতাব্দীর প্রভু (Lord of two centuries)

† তৈমুর এই অজুহাতই দেখিয়েছিলেন।

এমন ছোট শহর বা গ্রামও মিলবে না, যেখানে দরবেশরা এসে বসতি করেননি। অনেক দরবেশ পরলোকগমন করেছেন; কিন্তু যারা বেঁচে আছেন, তাঁদের সংখ্যাও অল্প হবে না। তাঁদের সম্মানসম্মতিকে, বিশেষত হজরৎ নূর কুৎব্ আলমের ছেলেকে এবং পরিবারকে যদি ছুরাওয়া বিধর্মীদের কবল থেকে উদ্ধার করা যায়, তাহলে খুবই ভাল কাজ হবে।”

ইব্রাহিম শর্কীকে এই চিঠি দেবার পর আশ্রফ সিম্নানী বাংলার দরবেশ শেখ হোসেন “ধোকরপোশ”\* কে একখানি চিঠি লেখেন। শেখ হোসেনের ছেলেকে গণেশ বধ করেছিলেন। তাঁকে সাব্বনা জানিয়ে আশ্রফ সিম্নানী লেখেন, “আপনাদের সাহায্য করবার জন্য রাজার সৈন্যবাহিনী এখান থেকে যাচ্ছে; এর ফল শীঘ্রই বোঝা যাবে।” এই চিঠিতে আশ্রফ সিম্নানী আত্মজাতা এবং ইসলাম ধর্মের রক্ষকদের শিরোমণি হিসাবে তৈমুরলঙ্গের নাম করেছেন।

তৃতীয় চিঠিখানি স্বয়ং নূর কুৎব্ আলমকে লেখা। এই চিঠিখানি আগের দু'খানি চিঠির কিছু পরে লেখা হয়; কারণ এতে আশ্রফ সিম্নানী বলেছেন যে, ইব্রাহিম ইতিমধ্যে সঠিকভাবে বাংলার দিকে রওনা হয়ে গিয়েছেন। এই চিঠির কতকাংশ উদ্ধৃত করছি,—

“কাফের কান্সের সৈন্যবাহিনী বর্ত্তক মুসলমান রাজত্বের উচ্ছেদ এবং হতভাগা কান্সরূপ প্রচণ্ড বড় ‘ভগবানের সম্মানদের’ (অর্থাৎ মুসলমানদের) বাসস্থানের ধ্বংসপ্রাপ্তি সম্বন্ধে আপনি যা লিখেছেন, সে সম্বন্ধে সবই স্পষ্ট হয়েছে। প্রসিদ্ধ আলাইয়া এবং খলিদিয়া বংশের লোকেরা যে অত্যাচার সহ্য করছেন তা জানলাম। সুলতানের ধ্বজা এবং তাঁর সৈন্যবাহিনী ইতিমধ্যেই আপনার দেশের দিকে রওনা হয়েছে। সুলতান তাঁর অসংখ্য সৈন্যবাহিনী দ্বারা কাফেরদের তাড়াতে দৃঢ়প্রতিজ্ঞ। আশা করা যাচ্ছে যে, মুসলমানরা কান্স রায় এবং তার লোকদের কবল থেকে মুক্তি পাবে।”

\* “ধোকরপোশ” শব্দের অর্থ ‘ধূলায় আবৃত’। এই শেখ হোসেন ধোকরপোশ নূর কুৎব্ আলমের পিতা আলা-উল-হকের শিষ্য ছিলেন, পুণিরাতে এঁর খানকা ছিল। ফ্রান্সিস বুকাশের মতে হোসেন শাহের রাজত্বকালেও হোসেন ধোকরপোশ (Makdum Ghuribal Hoseyn dokorposh) নামে একজন দরবেশ ছিলেন; এঁর আচরণের কালে হিন্দু রাজা মহেশ চাকর চলে যেতে বাধ্য হন এবং এঁর ভাইয়ের সঙ্গে হোসেন শাহ নিজের মেয়ের বিবাহ দেন। হেমন্তাবাদে এই হোসেন ধোকরপোশের সমাধি আছে।

আশ্রয় সন্ধানীর এই চিঠিগুলি থেকে সমস্ত ব্যাপারটার একটা পরিষ্কার ছবি পাওয়া যাচ্ছে। গণেশের অভ্যুদয়ে মুসলমান দরবেশরা যে কতদূর অসন্তুষ্ট হয়েছিলেন, তা এগুলির মধ্য থেকে বোঝা যায়। নূর হুৎব্ আলম কতখানি আগ্রহ নিয়ে ইব্রাহিম শর্কীকে আহ্বান জানিয়েছিলেন, তাও আমরা উপলব্ধি করি। তেমনি গণেশ যে তাঁর বিরোধীদের প্রতি দমন-নীতি প্রয়োগ করেছিলেন এবং অনেককে বধ করেছিলেন, তা'ও এই চিঠিগুলি থেকে আমরা জানতে পারছি।

### ইব্রাহিম শর্কীর বঙ্গাভিযান—মিথিলায় শিবসিংহের সঙ্গে যুদ্ধ

ইব্রাহিম শর্কী কোন্ পথে বাংলায় এসেছিলেন এবং তাঁর অভিযানের মাঝে কোন ঘটনা ঘটেছিল কিনা সে সম্বন্ধে এতদিন কিছু জানা যায়নি; কিন্তু সম্প্রতি-আবিষ্কৃত একটি স্মৃত্তে পাওয়া যাচ্ছে যে, ইব্রাহিম মিথিলা বা ত্রিহত্তের উপর দিয়ে এসেছিলেন এবং মাঝপথে মিথিলার রাজা শিবসিংহ তাঁকে বাধা দেন। এর ফলে শিবসিংহ পরাজিত, বন্দী ও রাজ্যচ্যুত হন। এই স্মৃত্তি হচ্ছে আকবর ও জাহাঙ্গীরের সভাসদ মুন্না তাকিয়ার লেখা একটি বয়াজ।\* সৈয়দ হাসান আস্কারি এই স্মৃত্ত থেকে আলোচ্য তথ্যটি উদ্ধৃত করেছেন। তিনি লিখেছেন, “Moulvi  $\text{Z}^{\text{u}}$  uhammad Ilyās Rahmān, a friend of the writer, has discovered a Bayāz of Mullā Taqyya, a courtier of Akbar and Jahāngīr, and copied in 1023 by Mullā Abul Hasan of Darbhanga, and in it we find references to ‘Rājā Kāns’, a Hindu zamīndār, acquiring ascendancy in Bengal and instigating Sheo Singh, the ‘rebellious son of Deva Sing, the Rājā of Tirhut’, to commit depredations upon the Muslims. Sheo Singh is said to have killed many holy personages and contemplated a similar action against ‘Makhdūm Shāh Sultān Hussain’, the Khalifa

\* ‘বয়াজ’ শব্দের অর্থ ‘পাঁচমিশেলী সংগ্রহ’। এই বয়াজে মুন্না তাকিয়া তাঁর ভ্রমণের বিষয়ণ এবং ভ্রমণের সময়ে দেখা বিভিন্ন দেশের ইতিহাস লিপিবদ্ধ করেছেন। মুন্না তাকিয়ার বয়াজের ত্রিহত্তের ইতিহাস সম্পর্কিত অংশটি পাটনার উর্দু পত্রিকা ‘মাসির’ এর মে-জুন ও জুলাই-আগস্ট (১৯৪২) সংখ্যায় প্রকাশিত হয়েছে। অন্ত কোন অংশ এখনও মুদ্রিত হয় নি।

of Makhdum 'Ala-ul Huq of Pandua. We are also told that Sultān Ibrāhīm Sharqī of Jaunpur, being requested by Makhdum Nūr Qutb 'Alam, marched against Bengal, but had to face the opposition of Sheo Singh in Tirhut. The latter was defeated, pursued and captured and his stronghold, Lehra, was taken. (Bengal, Past and Present, Vol. LXVII, 1948, p. 36, f. n. 31)

মুন্না তকিয়ার বয়াজে এ সম্বন্ধে যা লেখা আছে, তার বাংলা অনুবাদ আমরা উদ্ধৃত করলাম।

“যখন হিন্দু জমিদার কান্‌স্‌ সমগ্র বাংলা প্রদেশের উপর আধিপত্য অর্জন করলেন, তিনি মুসলমানদের নিশিচি করার সঙ্কল্প করলেন এবং তাঁর রাজ্য থেকে ইসলামের মূলোচ্ছেদ করাই হয়ে দাঁড়াল তাঁর লক্ষ্য। এই সময়ে ত্রিহুতের জমিদার শিও সিং (শিবসিংহ) তাঁর পিতা ত্রিহুতের রাজা দেব সিংহের বিরুদ্ধে বিদ্রোহ করে এবং রাজা কান্‌সের সঙ্গে মৈত্রীস্থজে আবদ্ধ হয়ে নিজে ত্রিহুত প্রদেশের স্বাধীন রাজা হয়ে বসেছিলেন। নিজের শক্তি বৃদ্ধি করে তিনি রাজা কান্‌সের প্ররোচনায় তাঁর রাজ্যের মুসলমানদের উপরে লুণ্ঠপাট চালাতে লাগলেন, দারভাঙ্গার অধিকাংশ ধর্মপ্রচারক ও ইসলামের নায়কদের শহীদীর পানীয়েইর আশ্বাদ গ্রহণ করালেন এবং পবিত্রাত্মা মখদুম শাহ সুলতান হোসেনকে আঘাতের পরিকল্পনা করলেন। এখন, মখদুম শাহ পাণ্ডুর আল-উল-হকের শিষ্য ছিলেন। আল-উল-হকের স্ত্রীগণ্য পুত্র নূর কুৎব-উল-ইসলামের অনুরোধে সুলতান ইব্রাহিম শর্কী বাংলার দুর্বৃত্ত কাফেরদের সঙ্গে যুদ্ধ করার জন্তে এবং রাজা কান্‌সকে দমন করার জন্তে ৮০৫ হিজরায়\* এক সৈন্তবাহিনী পাঠান। রাজকীয় সৈন্তবাহিনী যখন ত্রিহুতে

\* এই তারিখ ভুল। এই অনুরোধের শেষে যে শিলালিপি উদ্ধৃত হয়েছে, সেই শিলালিপিটি দেখেই মুন্না তকিয়া স্থির করেছিলেন ইব্রাহিম ৮০৫ হিজরায় বাংলাদেশ আক্রমণ করেছিলেন। কিন্তু ইব্রাহিম যে ৮১৮ হিজরা বা ১৪১৫ খ্রীষ্টাব্দে বাংলাদেশ আক্রমণ করেছিলেন, তাতে কোন সন্দেহ নেই। ৮০৫ হিজরায় সুলতান গিয়াসুদ্দীন আজম শাহ বাংলাদেশ শাসন করছিলেন, তখন ইব্রাহিমের বাংলা আক্রমণের কথা ওঠে না। অবশ্য ঐ শিলালিপির অকৃত্রিমতা সন্দেহের অতীত। আসল কথা, মুন্না তকিয়া জানতেন না যে ইব্রাহিম শর্কী দুবার ত্রিহুতে এসেছিলেন—প্রথমবার রাজা কীর্তিসিংহের পিতৃরাজ্য-অপহরণকারী অসলানকে শাস্তি দিতে, যার বর্ণনা বিজ্ঞাপতির ‘কীর্তিলতা’য় পাওয়া যায়, আর দ্বিতীয়বার এই বাংলা আক্রমণের সময়। সম্ভবত ইব্রাহিমের প্রথমবারের ত্রিহুতে আগমনই ৮০৫ হিজরায় ঘটেছিল, আর সেই সময়েই তিনি এই শিলালিপি সংবলিত মসজিদটি নির্মাণ করিয়েছিলেন।

পৌছেলো, শিও সিং তার বিরুদ্ধে দাঁড়ালেন। যদিও সুলতান বাংলায় দিকে যাচ্ছিলেন, তিনি যখন খবর পেলেন শিও সিং তাঁর তাঁবুর কাছাকাছি পৌছেছেন, সুলতানের রোযানল দাঁউ দাঁউ শিখায় জলে উঠল এবং তিনি খুব সাহস নিয়ে তাঁর দিকে মন দিলেন। শেষে শিও সিং বুঝলেন প্রকাশ্য সংগ্রামে ইব্রাহিমের বিরোধিতা করা তাঁর পক্ষে সম্ভব নয়। তিনি পালিয়ে অত্মদিকে গিয়ে অবশেষে সেখানকার সবচেয়ে সুদৃঢ় দুর্গ লেহ'রায় পৌছে সেখানে আশ্রয় গ্রহণ করলেন। কিছু সময় পরে ঐ দুর্গের পতন ঘটল এবং তিনি বন্দী হলেন। সমগ্র ত্রিভুত রাজ্য আবার তাঁর পিতাকে ফিরিয়ে দেওয়া হল সুলতানের অহুগত ভৃত্য হিসাবে। যে সমস্ত রাস্তা বন্ধ করে রাখা হয়েছিল, সেগুলি আবার খুলে দেওয়া হল, তার ফলে সুলতান রাজ্য কানসুকে দমন করার জন্য বাংলার দিকে রওনা হলেন। মখদুম শাহের বাসস্থানের কাছে একটি মসজিদ নির্মাণ করার আদেশ পালিত হল। এখনও সেটি বর্তমান আছে এবং তাতে এই শিলালিপি আছে :—

পবিত্রাত্মা বহুল বলেছেন, যে আল্লার নামে মসজিদ তৈরী করে, সে স্বর্গে প্রবেশ করে। এই মসজিদ বিশ্বাসীদের প্রধান আবুল ফতে ইব্রাহিম শাহ সুলতান ৮০৫ হিজরায় নির্মাণ করিয়েছিলেন।”

এই বিবৃতির অধিকাংশই সত্য বলে মনে হয়; কারণ, গণেশ ও শিব-সিংহের আবির্ভাবকাল সমসাময়িক। গণেশের মত শিবসিংহও মুসলমানদের প্রাধান্য হ্রাস করে হিন্দু অভ্যুদয় ঘটাবার চেষ্টা করেছিলেন। শিবসিংহের সভাকবি বিদ্যাপতি তাঁর ছ' একটি পদে লিখেছেন যে, শিবসিংহ যবনদের সঙ্গে যুদ্ধে গুরুতর প্রতাপ দেখিয়েছিলেন। ইব্রাহিমের সঙ্গে শিবসিংহের সম্পর্ক সম্ভবত আগে থেকেই তিক্ত হয়েছিল। তার কারণ, মিথিলা ইব্রাহিমের সামন্ত রাজ্য হওয়া সত্ত্বেও শিবসিংহ স্বাধীন রাজ্যের মত নিজের নামে মুদ্রা চালিয়েছিলেন।\* তাছাড়া মিথিলায় প্রাচীন প্রবাদ আছে যে, দিল্লীর সুলতান

\* Annual Report of the Archaeological Survey of India, 1913-14, pp. 248-49 দ্রষ্টব্য। ইব্রাহিমের সঙ্গে শিবসিংহের যে আগে থাকতেই বিরোধ ছিল, তার আরও প্রমাণ আছে। বিদ্যাপতি শিবসিংহ সম্বন্ধে ‘পুরুষপরীক্ষা’তে বলেছেন, “যো গৌড়েশ্বর-গজেন্দ্ররঞ্জনকোণিষ লক্ষা যশো।” এবং ‘শৈবসংস্কারে’ বলেছেন, “শৌর্ধাবর্জিতগৌড়গজেন্দ্রমহীপালোপ-নম্রীকৃত।”। বিদ্যাপতি-কথিত ‘গৌড়েশ্বর’ বা ‘গৌড়মহীপাল’ কে হতে পারেন, সে সম্বন্ধে আগে আমরা আলোচনা করেছি। কিন্তু প্রশ্ন ওঠে ‘গজেন্দ্র’ বা ‘গজেন্দ্রমহীপাল’ বলতে কাকে

শিবসিংহকে যুদ্ধে হারিয়ে বন্দী করে নিয়ে গিয়েছিলেন। কিন্তু ডঃ বিমানবিহারী মজুমদার দেখিয়েছেন যে, ঐ সময় দিল্লীর সৈয়দ বংশীয় সুলতানেরা এত দুর্বল ছিলেন যে, তাঁদের পক্ষে সুদূর মিথিলায় অভিযান চালিয়ে সেখানকার রাজাকে বন্দী করা সম্ভব ছিল না; সুতরাং, প্রবাদোক্ত দিল্লীর সুলতান আসলে সম্ভবত জৌনপুরের সুলতান ইব্রাহিম শর্কী। বিমানবিহারীবাবু এতদূর পর্যন্ত অনুমান করেছেন যে, শিবসিংহ “গণেশের সঙ্গে যোগ” দিয়েছিলেন এবং “জৌনপুরের সৈয়দ ৮১৮ হিজরীতে বাংলা অভিযানের পথে অথবা প্রত্যাবর্তনের সময় শিবসিংহের সহিত যুদ্ধ করিয়াছিল।” মূল্য তকিয়ার বস্বাজে ‘গণেশের উদ্ধারিতে শিবসিংহের মুসলমানদের উপর অত্যাচার সম্বন্ধে যে কথা পাই তা কতদূর সত্য বলা যায় না; সম্ভবত ত্রিছতের দরবেশরা নূর কুৎব আলম প্রভৃতির পক্ষ নিয়েছিলেন বলে গণেশের অহুরোধে শিবসিংহ তাঁদের দমন করেছিলেন। কিন্তু এই সূত্র থেকে উদ্ধৃত অংশের বাকিটুকু পূর্বোক্ত বিষয়গুলি থেকে সমর্থিত হওয়ার সত্য বলেই গ্রহণ করা যায়। পূর্ব ভারতের দুই স্বাধীনচেতা হিন্দু রাজা মৈত্রীর বন্ধনে আবদ্ধ হয়েছিলেন এবং গণেশের বিপদে সাহায্য করতে গিয়ে শিবসিংহ নিজে চরম বিপদ বরণ করেছিলেন, ‘সমসাময়িক ইতিহাসে এই ঘটনা বিশেষ উল্লেখযোগ্য ব্যাপার।

### ইব্রাহিমের বাংলায় আগমনের ফলে গণেশের সিংহাসনত্যাগ

যাহোক, শিবসিংহকে পরাজিত করে ইব্রাহিম তো বাংলায় এলেন। ইব্রাহিমের আসার ফলে গণেশের বিরোধী পক্ষের অভিপ্রায় সাময়িকভাবে

প্রাধান্য হারিয়েছে? মনোমোহন চক্রবর্তী ও রাখালদাস বন্দ্যোপাধ্যায় অনুমান করেছিলেন, এই ‘গজেন্দ্র’ আসলে জৌনপুরের সুলতান ইব্রাহিম শর্কী। এঁদের অনুমান যে ঠিক, তার প্রমাণ আমি ‘সঙ্গীতশিরোমণি’র ইব্রাহিম-প্রশস্তির (পরে এটি সম্পূর্ণ উদ্ধৃত হবে) মধ্যে পেয়েছি তাতে রয়েছে,

আদক্ষিণোদধেরা চ হিমাদ্রেরা চ গাজনাং।

আগোড়াদুষ্কলংরাজ্যমিব্রাহিমভূভূজঃ ॥

প্রথম চরণের ‘গাজনাং’ শব্দটি থেকে বোঝা যায়, বিজাপতি-কবিত গজেন্দ্র বা গজেন্দ্রমহীপাল হচ্ছেন ইব্রাহিম শর্কী। ‘গাজন’ ও ‘গজেন্দ্র’ দুইই ‘গজনীর’ অপভ্রংশ। ‘পুরুষপরীক্ষা’ শিবসিংহের প্রজ্ঞাশ্রবণকালে অর্থাৎ ১৪১৫ খ্রীর মধ্যে লেখা। সুতরাং তারও আগে ইব্রাহিমের (বা তাঁর লোকদের) সঙ্গে শিবসিংহের যুদ্ধ হয়েছিল।



সিদ্ধ হয়। গণেশ সিংহাসন ত্যাগ করতে বাধ্য হন এবং তাঁর ছেলেকে মুসলমান করে সিংহাসনে অভিষিক্ত করা হয়। ‘রিয়াজ-উস-সলাতীনে’ এই ঘটনার বর্ণনা অতিরঞ্জিত আকারে পাওয়া যায়। বাহোকে ‘রিয়াজে’র বর্ণনার মূল বিষয়টুকু যে সত্য, তার প্রমাণ সম্প্রতি মিলেছে। ইব্রাহিম শকীর অধীনে এলাহাবাদ থেকে পাঁচ মাইল দূরে ‘কড়া’ নামে একটি জায়গায় মালিক সুলতা শাহী নামে এক সামন্ত শাসন করতেন। তিনি নানা দেশ থেকে সঙ্গীতশাস্ত্রের বই আনিয়াে সঙ্গীতজ্ঞ পণ্ডিতদের নিয়ে একখানি বই লেখান। বইখানির নাম ‘সঙ্গীতশিরোমণি’। এর রচনাকাল ১৪৮৫ বিক্রমাব্দ ও ১৩৫০ শকাব্দ অর্থাৎ ১৪২৮-২৯ খ্রীষ্টাব্দ।\* এই বইখানির প্রথমেই জৌনপুরের সুলতান ইব্রাহিম শকীর এক প্রশস্তি পাওয়া যায়। প্রশস্তিটি এখানে উদ্ধৃত হ’ল,

“সংগ্রাম (ব) হিযু ॥

অসপত্নং ব্যাধাত্রাষ্ট্রমিবরাহিমভূপতেঃ ।

ব্যানম্রাখিল-ভূমিপাল-মুকুট-প্রত্যগ্র-রত্নপ্রভা-

কিম্মীরাভবদংঘ্রিয়ুখনখরজ্যোতিবিতানোজ্জলং ॥

কীড়িছত্রস্ববর্ণদণ্ড সদৃশশুর্জ্জং প্রতাপোচ্চয়ং

লোকেশ্মিন্নিবরাহিম কি (তি) পতিং কোনাশ্রয়েং পাথিবঃ ।

ঘনাটোপং গর্জ্জদগজতুরগসেনাজলধরৈঃ

সমং নীড়াশঙ্কং শকশলভসপ্তাচ্চিষময়ং ।

তুরুক্ষং নির্মায় প্রকটিতনয়ং তন্ত্র তনয়ং

ব্যাধাদ্ গোড়ান্ প্রোটঃ পুনরপি শকানাং জনপদান্ ॥

আদক্ষিণোদধেরা চ হিমাদ্ধেরা চ গাজনাং ।

আগোড়াহুজ্জলং রাজ্যমিবরাহিমভূভূজঃ ॥”

এই প্রশস্তির নিম্নরেখ অংশটুকুর অম্ববাদ :—

‘এই প্রবীণ (ইব্রাহিম) প্রচুর গর্বসহকারে গর্জনকারী হস্তী, অশ্ব ও

\* দক্ষিণ ভারতীয় পণ্ডিত রামকৃষ্ণ কবি সর্বপ্রথম এই হস্তিটি থেকে আলোচ্য তথ্যটি আবিষ্কার করে Journal of the Andhra Research Society, Vol. XI-এ প্রকাশ করেন। পরে এ সম্বন্ধে অধ্যাপক দীনেশচন্দ্র ভট্টাচার্য বিশদ আলোচনা করেছেন (প্রবাসী, বৈশাখ, ১৩৬০, পৃষ্ঠা ২০-২৩ ঐষ্টব্য)। ‘সঙ্গীতশিরোমণি’র পুঁথি বর্তমানে কলকাতার এশিয়াটিক সোসাইটিতে আছে।

সেনারূপ মেঘবর্ষণে সেই অগ্নিকে নিঃশব্দে নির্বাণ করছিলেন, যে অগ্নিতে শকেরা (অর্থাৎ মুসলমানেরা) শলভের মত (পুড়ে মরেছিল) এবং রাজনীতিজ্ঞ \* তাঁর পুত্রকে তুরস্ক নির্মাণ করে (মুসলমান করে) গোড় দেশকে আবার শকরাজ্যে (মুসলমান রাজ্যে) পরিণত করেছিলেন।

বলা বাহুল্য, এখানে গণেশকেই ‘অগ্নি’ বলা হয়েছে। এই সমসাময়িক সূত্রের সাক্ষ্য গণেশ এবং ইব্রাহিমের সংঘর্ষের ফলাফল সন্ধ্যা সমস্ত জল্পনার অবসান করছে। ‘রিয়াজ’-এ এই সন্ধি সন্ধ্যা যে বিবরণ পাওয়া যায়, তা যে সর্বাংশে সত্য নয়, সে-ও এর থেকে বোঝা যায়। ‘রিয়াজ’-এ বলা হয়েছে, নূর কুৎব আলমের মধ্যস্থতায় সন্ধি হয় এবং ইব্রাহিম সন্ধির প্রভাবে অসন্তুষ্ট হয়েছিলেন, ফলে নূর কুৎব আলমের সঙ্গে তাঁর মনোমালিঙ্গ হয়েছিল। কিন্তু ‘সঙ্গীতশিরোমণি’তে বলা হয়েছে। ইব্রাহিম নিজেই গণেশের ছেলেকে ধর্মাস্তরিত করে সিংহাসনে বসিয়েছিলেন।†

\* “প্রকটিনয়ং” কথাটির আসল অর্থ ‘রাজনীতিজ্ঞ’। অধ্যাপক দীনেশচন্দ্র ভট্টাচার্য এর অনুবাদ করেছিলেন “হুনয়নসম্পন্ন”। কিন্তু তাহলে “প্রকটিনয়ং”-এর বদলে “প্রকটিনয়নং” পাঠ ধরতে হয়; এই পরিবর্তনের কোন হেতু নেই এবং এতে ছন্দ থাকে না। আমার ‘রাজা গণেশের আমল’ বই-এ ঐ অংশটির অনুবাদ করার সময় “প্রকটিনয়ং”কে আমি দীনেশবাবুর মত অনুযায়ী “হুনয়ন-সম্পন্ন” রূপেই অনুবাদ করেছিলাম। এ সন্ধ্যা ডঃ হুসুয়ার সেন লেখেন, “এখানে ‘প্রকটিনয়ং’ কোন মুক্তিও ‘হুনয়ন-সম্পন্ন’ মানে করা যায় তা বুঝতে পারছি না। মানে তো এখানে স্পষ্ট, ‘বিনিয় অর্থাৎ রাজনীতিজ্ঞ প্রকট করেছিলেন।’ এই কথাটির আসল তাৎপর্য হুসুয়ার বাবু এবং তাঁর অধরটি ধরতে পারেন নি।” (যাত্রী, ২য় বর্ষ, ১ম সংখ্যা, ১৩৬৩-৬৪, পৃঃ ৬৭) ডঃ আহমদ হাসান দানী তাঁর *Bibliography of the Muslim Inscriptions of Bengal* পুস্তিকায় (p. 122) “Mr. Mukhopadhyay translates the last two lines as follows” বলে আমার অনুবাদ উদ্ধৃত করেন এবং “প্রকটিনয়ং”-এর আসল অর্থের দিকে দৃষ্টি আকর্ষণ করেন।

† ‘সঙ্গীত শিরোমণি’র “তুরস্ক নির্মাণ...তস্ত তনয়ং” উক্তি থেকে এই সিদ্ধান্তেই আসতে হয়। কিন্তু ডঃ দানী তা মানতে চান না। তাঁর মতে ইব্রাহিমের আগমনের আগেই গণেশের পুত্র মুসলমান হয়েছিলেন। তিনি “তুরস্ক নির্মাণ...তস্ত তনয়ং”-এর অনুবাদ করেছেন, “having established his son, who was a Turushka.” এ সন্ধ্যা তিনি বলেন, “nirmāya (meaning ‘having constructed, built, or established’. It can hardly be construed to mean ‘having converted’). ঠিক কথা, কিন্তু “তুরস্ক নির্মাণ...তস্ত তনয়ং”-এর আক্ষরিক অনুবাদ তো আমরা “having converted his son into a Turushka (Muslim)” করছি না, করছি “having made his son a Turushka (Muslim)” এবং এইটাই এর সহজ অর্থ। “নির্মাণ” ত্রিরাপদটি “তুরস্ক”-এর পরে এবং “প্রকটিনয়ং তস্ত তনয়ং” এর আগে থাকায় মনে হয়, আমাদের অনুবাদই ঠিক। উদ্ধৃত অংশের রচয়িতা যদি ডঃ দানীর ব্যাখ্যা অনুযায়ী উক্তি করতেন, তাহলে তিনি “নির্মাণ তনয়ং তস্ত তুরস্ক প্রকটিনয়ং” লিখে বা অন্ত কোনভাবে সোজাছজি নিজের বক্তব্য প্রকাশ করতেন।

কিন্তু উক্ত অংশটির “একটিতনয়ং তন্ত তনয়ং” উক্তিটির অর্থ আরও বেশী গভীর। এর “আসল তাৎপর্য” স্বষ্টি ডঃ সূর্য্যুমাৰ সেন লিখেছেন, “যহু-জালালুদ্দীন যে চালাকি করে (বাঁপের সঙ্গে বিরোধ করে?) ধৰ্ম্মান্তৰ গ্রহণ করে ইব্রাহিমশাহ শৰ্কীর সাহায্যে রাজ্য লাভ করেছিলেন এতো তারই ইঙ্গিত।” সূতরাং আসল ব্যাপারটা এখন মোটামুটিভাবে বোঝা যাচ্ছে। ইব্রাহিম শৰ্কী সঠিকভাবে বাংলায় উপস্থিত হলে রাজা গণেশের সমুহ বিপদ উপস্থিত হয়। তাঁর সূচতুর পুত্র তখন সূযোগ বুঝে পিতার বিরোধি-পক্ষে যোগ দেন এবং তাঁরা তাঁকে ইসলাম ধৰ্মে দীক্ষিত করে সিংহাসনে অভিষিক্ত করেন। সম্ভবত নূর কুৎব আলমের দলই গণেশ-নন্দনকে নানারকম কৌশল করে নিজেদের দলে টেনেছিলেন।

প্রশ্ন উঠতে পারে, তাহালে রাজা গণেশ তখন কী করছিলেন? এ স্বষ্টি কতকটা নিঃসংশয়েই অসম্ভব বরা যেতে পারে যে রাজা গণেশ ইব্রাহিমের বিপুল সামরিক শক্তির কাছে দাঁড়াতে না পেয়ে পলায়ন করেছিলেন। ইব্রাহিমের সঙ্গে গণেশ খুব বেশী যুদ্ধ করেছিলেন বলে মনে হয় না। মোটেও না করতে পারেন।

যা হোক, গণেশের অপসারণ এবং তাঁর ধৰ্ম্মান্তরিত পুত্রের সিংহাসনে আরোহণের ফলে গণেশের প্রতিপক্ষীয়েরা মনে করলেন তাঁদেরই জয় হ'ল। ইব্রাহিম শৰ্কীও তাঁর সৈন্যবাহিনী নিয়ে দেশে ফিরে গেলেন। ডঃ দানী মনে করেন জালালুদ্দীন ইব্রাহিম শৰ্কীর সামন্ত (feudatory) হিসাবে বাংলাদেশ শাসন করতে সম্মত হয়েছিলেন। আমি এই অভিমত সমর্থন করি। ইতিপূর্বে উক্ত ‘সঙ্গীতশিরোমণি’র “আগোড়াহুজ্জলরাজ্যমিবরাহিম-ভুভুজঃ” উক্তি থেকে বোঝা যায় যে, জৌনপুরের লোকে রাগোড়কে ইব্রাহিমের রাজ্যের অন্তর্ভুক্ত বলেই মনে করতেন।

### জালালুদ্দীনের প্রথম দফার রাজত্ব

যা হোক, আমরা দেখতে পাচ্ছি নূর কুৎব আলমের আহ্বানে ইব্রাহিম শৰ্কী সঠিকভাবে বাংলায় এলেন এবং গণেশকে অপসারিত করে, জালালুদ্দীনকে \* সিংহাসনে বসিয়ে ফিরে গেলেন।

\* ‘রিয়াজ-উস-সলাতীন’-এর মতে প্রথম সিংহাসনে আরোহণের সময়ে জালালুদ্দীনের বয়স ১২ বছর ছিল। কিন্তু এ কথা সত্য হতে পারে না। ১২ বছরের বালকের পক্ষে এই রাজনীতিচতুরতার পরিচয় দেওয়া ও প্রকাশ্যে পিতার পক্ষ ত্যাগ করে শত্রুর পক্ষে যোগ দেওয়া অসম্ভব।

‘রিয়াজ-উল-সলাতীনে’ লেখা আছে যে জলালুদ্দীনের সিংহাসনে আরোহণের সঙ্গে সঙ্গেই বাংলাদেশে আবার “ইসলামের আইন-কানুন জারী হল।” এ’ কথা যে সত্য, তার প্রমাণ ফেই-শিন নামক সমসাময়িক চীনা গ্রন্থকারের লেখা ‘শিং-ছা-শুং-লান’ গ্রন্থ থেকে পাওয়া যায়। এই বই থেকে জানা যায় যে, চীন সম্রাট য়ুং-লো তাঁর রাজত্বের ত্রয়োদশ বর্ষে (১৪১৫ খ্রীঃ) একদল প্রতিনিধিকে বাংলার রাজার সভায় পাঠিয়েছিলেন; এই প্রতিনিধিদলের নেতৃত্ব করেছিলেন হো-শিয়েন। ফেই-শিন স্বয়ং ঐ দলের অন্যতম সদস্য ছিলেন। এই প্রতিনিধিদল বাংলার রাজধানী পাণ্ডুয়ায় এসে রাজার সভায় যান। সেখানে (‘শিং-ছা-শুং-লান’-এর ভাষায়) “প্রধান দরবারে দামী পাথরে খচিত উঁচু এক সিংহাসনে পায়ের উপর পা রেখে রাজা বসেছিলেন। তাঁর কোলের উপর ছিল হু’দিকে ধার-ওয়ালা একটি তলোয়ার।……তিনি আমাদের প্রত্যাভিবাদন করে (চীন) সম্রাটের ফরমানটি একবার মাথায় ঠেকিয়ে তারপর খুলে পড়লেন। রাজা (চীন) সম্রাটের প্রতিনিধিদের এক ভোজসভায় আপ্যায়িত করলেন এবং আমাদের সৈন্যদের অনেক উপহার দিলেন।……তারপর রাজা একটি সোনার আধারে রক্ষিত সোনার পাতের উপরে লেখা এক বাণী (চীন) সম্রাটকে দেবার জন্ত দিলেন।

বাংলার রাজা চীনসম্রাটের প্রতিনিধিদের যে ভোজসভায় আপ্যায়িত করেছিলেন, তাতে পরিবেশিত খাদ্য ও পানীয় সম্বন্ধে ‘শিং-ছা-শুং-লান’-এ লেখা আছে, “(ভোজে) যেম ও গোমাংসের কাবাব দেওয়া হয়। মগপান নিষিদ্ধ ছিল, কেন না এতে ইন্দ্রিয় উত্তেজিত হবার ও শিষ্টাচারের বিধি লঙ্ঘিত হবার আশঙ্কা। তার বদলে আমরা সববৎ খেলাম।”\*

বাংলার এই রাজা নিঃসন্দেহে জলালুদ্দীন মুহম্মদ শাহ। ইনি জলালুদ্দীনের পিতা গণেশ হতে পারেন না, কারণ হিন্দু রাজা গণেশের পক্ষে ভোজসভায় গোমাংসের কাবাব পরিবেশন করা সম্ভব নয়।

চীনা প্রতিনিধিরা যে সময়ে বাংলাদেশে এসেছিলেন, তার দিকে লক্ষ রাখলেও বোঝা যাবে যে, এই রাজা জলালুদ্দীন ভিন্ন আর কেউ নন। চীন দেশের ‘মিং’ রাজবংশের ইতিহাস ‘মিং-শু’ গ্রন্থে লেখা আছে, “য়ুং-লো’র

\* বিশ্বভারতী চানভবনের অধ্যাপক নারায়ণচন্দ্র সেনের অনুবাদ অবলম্বনে। এই অংশের রকহিল যে অনুবাদ করেছিলেন (T'oung Pao, 1915, p. 442 এবং Visva-Bharati Annals, Vol. I, p. 124 জঃ) — তা’ নির্ভুল নয়।

রাজত্বের ত্রয়োদশ বর্ষের সপ্তম মাসে সম্রাট বাংলা এবং অন্যান্য দেশের সঙ্গে সংযোগ স্থাপন করতে ইচ্ছুক হয়ে হৌ-শিয়েনকে এক নৌবহর সমেত (এই সব দেশে) যেতে বললেন।" (Visva-Bharati Annals, Vol. I, p. 104 দ্রষ্টব্য) অর্থাৎ য়ুং-লোর রাজত্বের ত্রয়োদশ বর্ষের সপ্তম মাসে চীনা রাজপ্রতিনিধি দল চীন থেকে যাত্রা করেন, বাংলাদেশে পৌছোন তার কিছুদিন পরে। 'শিং-ছা-শুং-লান' থেকে জানা যায় যে, হৌ-শিয়েনের নেতৃত্বাধীন চীনা রাজপ্রতিনিধিদল চীন থেকে প্রথমে সুমাত্রায় যান এবং সেখান থেকে বাংলার দিকে যাত্রা করে কুড়ি দিন বাদে চট্টগ্রামে পৌছোন এবং তারও কয়েকদিন পরে পাণ্ডুয়ায় পৌছোন। সুতরাং চীন থেকে রওনা হবার প্রায় দু'মাস পরে তাঁরা পাণ্ডুয়ায় পৌছেছিলেন। য়ুং-লোর রাজত্বের ত্রয়োদশ বর্ষের সপ্তম মাস ১৪১৫ খ্রীষ্টাব্দের ৫ই আগস্ট তারিখে আরম্ভ হয় এবং ২রা সেপ্টেম্বর তারিখে শেষ হয় (A Sino-Western Calender for Two thousand years—1-2000 A. D. by Hsieh Chung-San, 1956, p. 283 দ্রষ্টব্য)। অতএব হৌ-শিয়েনের নেতৃত্বাধীন চীনা রাজপ্রতিনিধিদল ঐ সময়ে চীনদেশ থেকে রওনা হয়ে ১৪১৫ খ্রীষ্টাব্দের অক্টোবর-নভেম্বর মাসের অর্থাৎ ৮১৮ হিজরার শাবান-রমজান মত মাসের সময়ে পাণ্ডুয়ায় বাংলার রাজার সভায় পৌছেছিলেন, তাতে কোন সন্দেহ নেই। ততদিনে যে বাংলা দেশে জৌনপুরের সুলতান ইব্রাহিম শর্কীর অভিযান ও তার ফলে রাজা গণেশের আধিপত্যের সাময়িক বিলোপ ঘটে গেছে এবং জলালুদ্দীন মুহম্মদ শাহ সিংহাসনে অধিষ্ঠিত হয়েছেন তা নিঃসংশয়ে বলা যায়। জলালুদ্দীনের ৮১৮ হিজরার সম্রাট সংখ্যাধিক্য থেকে বোঝা যায়, তিনি ৮১৮ হিঃর অন্তত অর্ধাংশ এবং ১৪১৫ খ্রীঃর অন্তত শেষ এক তৃতীয়াংশতে নিশ্চয়ই রাজত্ব করেছেন। জলালুদ্দীনের প্রথমবার সিংহাসনে আরোহণের পরে কিছুদিন তাঁর উপরে তাঁর পিতার কোন প্রভাব ছিল না, সুতরাং ভোজসভায় গোমাস পরিবেশন করা জলালুদ্দীনের পক্ষে অসম্ভব হয়নি। জলালুদ্দীন প্রকৃত নিষ্ঠাবান মুসলমানের মত ভোজসভায় মদ্যপান নিষিদ্ধ করেছিলেন।

কিন্তু এইভাবে পিতার প্রভাব থেকে মুক্ত হয়ে খাঁটি মুসলমানী রীতিতে রাজ্যাশাসন করা জলালুদ্দীনের পক্ষে বেশী দিন সম্ভব হল না। কিছুদিন পরেই আবার বাংলার রাজনৈতিক মধ্যে রাজা গণেশ আবির্ভূত হলেন এবং রাজ্যের সমস্ত ক্ষমতা তিনি হস্তগত করলেন। এর অকাট্য প্রমাণস্বরূপ

আমরা নূর কুৎব্ আলমের একটি চিঠি উদ্ধৃত করছি। এ চিঠিটিও সৈয়দ হাসান আসকারি আবিষ্কার করেছেন। নূর কুৎব্ আলমের কোন প্রিয়জন তাঁকে ছেড়ে পাণ্ডুরায় বাইরে চলে গেলে কুৎব্ আলম তাঁকে এই চিঠি লিখেছিলেন। চিঠিটি জায়গায় জায়গায় একটু দুর্বোধ্য বলে প্রথমে আসকারি সাহেবের ইংরেজী অনুবাদ উদ্ধৃত\* করে তারপর তার বাংলা ভাবানুবাদ দিলাম।

"I, the poor man, reminded that Shah of myself now and then but at this time, when spirits are so low and morbidity so prevalent, I, the poor man, feel extremely unsettled and perturbed. I am so paralysed by the anguish of my existence that I have abandoned the world. May He draw the pen of His forgiveness accross the pages of my shortcomings.....Oh soul of thy father, how strange is the affair and astonishing the time that the river of God, the unapproachable, and unmovable, has become ruffled and thousands of Doctors of religion and learned men and asceties and devotees had fallen under the command of an infidel, a zaminder of 400 years ( standing ), and benefits of true significance have gone. He has allowed the commands and prohibitions to go under the control of an infidel.....The reins of Islam have gone into the hands of those who associate others with God. He had caused Islam to be replaced by infidelity with the results that the benefits of religion have been destroyed and the standard of unbelief has risen to the sky. He has allowed the ruin of faith..... How exalted is God, He has bestowed, without apparent reason, the robe of faith on the lad of an infidel and installed him on the throne of the kingdom over his friends. Kufry (infidelity) has gained predominance

and the Kingdom of Islam has been spoiled. Who knows what divine wisdom ordains and what is fated for what individual existence?...Alas, Alas, oh, how painful, with one gesture and freak of independence, He caused the consumption of so many souls, the destruction of so many lives, and shedding of so much of bitter tears. Alas, woe to me, the sun of Islam has become obscured and the moon of religion has become eclipsed..... It is obligatory on every Musalman to render assistance to and champion the cause of the faith of God. Although so far as the apparent signs are concerned there is no possibility of assistance reaching us, yet at the inside of things and returning to God one should make earnest supplication and sincerely pray and lament throughout the night and solicit the aid from God."

“হতভাগ্য আমি সেই ‘শাহ’কে যখন তখন নিজের কথা স্মরণ করিয়ে দিতাম, কিন্তু এই সময়ে মন এত খারাপ এবং বিষাদের ভার এত গুরু যে, আমি অত্যন্ত বিব্রত ও বিচলিত বোধ করছি। নিজের অস্তিত্বের বেদনা আমাকে এত বিকল করে ফেলেছে যে, পৃথিবীর সঙ্গে সব সম্পর্ক আমি ছিন্ন করেছি। ভগবান যেন আমার দোষত্রুটির পৃষ্ঠাগুলির উপর দিয়ে তাঁর ক্ষমার কলম চালিয়ে দেন। হাজার হাজার ধার্মিকশ্রেষ্ঠ ও পণ্ডিতশ্রেষ্ঠ এবং দরবেশ ও ভক্ত আজ ৪০০ বছরের জমিদার একজন বিধর্মীর অধীনস্থ হয়েছে। প্রকৃত ধর্মের সমস্ত ফলই নষ্ট হয়েছে। ভগবান রাজ্যের সমস্ত কর্তৃত্ব একজন বিধর্মীর হাতে তুলে দিয়েছেন।...ইসলামের রাজত্ব আজ তাদের হাতে গিয়ে পড়েছে, যারা অতীতের ভগবানের সঙ্গে একাসনে বসায়। ভগবান কাফেরী দিয়ে ইসলামের স্থান অধিকার করিয়েছেন। তার ফল হয়েছে এই যে, ধর্মের মাহাত্ম্য নষ্ট হয়েছে এবং অবিশ্বাসের (বিধর্মের) ধ্বজা আকাশ পর্যন্ত উঠেছে। ভগবান বিশ্বাস (ইসলাম ধর্ম) ধ্বংস হতে দিয়েছেন।...কী মহিমা তাঁর। আপাত কোন কারণ ভিন্নই একজন কাফেরের ‘বাচ্ছা’কে তিনি বিশ্বাসের (ইসলাম ধর্মের) পোষাক দিয়ে দেশের সিংহাসনে, তার বন্ধুদের

উপরে, অধিষ্ঠিত করেছেন। কাফেরী প্রাধান্যলাভ করেছে এবং ইসলামের রাজ্য ধ্বংস হয়েছে। কে জানে ভগবানের কী ইচ্ছা এবং কার ভাগ্যে কী আছে?.....হায়! ওঃ! কি যন্ত্রণাদায়ক! এক লহমায় তিনি এতগুলি আত্মার অপচয় ঘটালেন, এতগুলি জীবন নষ্ট হল, এত চোখের জল পড়ল। হায় কী দুঃখ! ইসলামের স্বর্ধ আচ্ছন্ন হয়ে গিয়েছে এবং ধর্মের চাঁদ রাহগ্রস্ত হয়েছে।...প্রত্যেকটি মুসলমানের অবশ্যকর্তব্য ভগবানের প্রতি বিশ্বাসের প্রয়োজনে সাহায্য করা এবং সেই বিশ্বাসকে জয়যুক্ত করা। যদিও লক্ষণ যা দেখা যাচ্ছে, তাতে আমাদের কাছে কোন সাহায্য আসবার কিছুমাত্র সম্ভাবনা নেই, তবুও প্রত্যেকের উচিত সারা রাত্রি ধরে প্রার্থনা করা, শোক করা এবং ভগবানের কাছে সাহায্য ভিক্ষা করা।”

নূর কুৎব্ আলমের এই চিঠিখানির মূল্য অপরিসীম। এটি বিশ্লেষণ করে আমরা দেখতে পাই,

(১) এই চিঠি লেখবার সময় এমন একজন রাজা সিংহাসনে উপবিষ্ট, যিনি কাফেরের সন্তান হয়েও ইসলাম ধর্ম গ্রহণ করেছেন। বলা বাহুল্য এই রাজা জলালুদ্দীন মুহম্মদ শাহ ঝিন্ন আর কেউ হতে পারেন না।\*

(২) কিন্তু রাজ্যের সমস্ত কর্তৃত্ব গিয়ে পড়েছে একজন বিধর্মীর হাতে। এই “বিধর্মী”টি রাজা গণেশ ভিন্ন আর কে হতে পারেন?

সুতরাং ব্যাপারটা এখন পরিষ্কার বোঝা যাচ্ছে। ইব্রাহিমের সৈন্যবাহিনীর সামনে দাঁড়াতে না পেরে রাজা গণেশ পলায়ন করেছিলেন এবং কিছুকাল তিনি অন্তরালেই ছিলেন। তারপর জলালুদ্দীনকে সিংহাসনে বসিয়ে যখন ইব্রাহিম জোনপুরে ফিরে যান, তার কিছুদিন পরে গণেশ স্বযোগ বুঝে আবার প্রত্যাবর্তন করেন এবং হৃত ক্ষমতা পুনরুদ্ধার করেন। জলালুদ্দীনের পক্ষে পিতার প্রাধান্য স্বীকার করে নেওয়া ভিন্ন কোনও উপায়ই ছিল না। হয়তো তিনি প্রতিরোধের চেষ্টা করেছিলেন, কিন্তু অচিরেই পরাজয় স্বীকার করতে বাধ্য হন। কারণ তাঁর পিতার হাতে এক বিরাট সৈন্যবাহিনী এবং জনসাধারণের উপরে তাঁর প্রভাব অপরিসীম। তাছাড়া যিনি একাধিক সুলতানকে

\* নূর কুৎব্ আলম জলালুদ্দীনকে “কাফেরের বাচ্ছা” ( the lad of an infidel ) বলেছেন, এর থেকে কেউ কেউ মনে করেছেন জলালুদ্দীন ঐ সময়ে বালক ছিলেন। কিন্তু এই ধারণা ঠিক নয়। বৃদ্ধ নূর কুৎব্ যুবক জলালুদ্দীনকেও “বাচ্ছা” ( lad ) বলতে পারেন। তাছাড়া এই ধরনের উক্তি সব ধরনেরই লোকের সম্বন্ধে করা হয়ে থাকে।



ইতিপূর্বে হাতের পুতুলে পরিণত করেছিলেন, নিজের পুত্রের উপর প্রভাব বিস্তার করা তাঁর পক্ষে ভুল ব্যাপার। স্বতরাং দেশের শাসনে গণেশের একাধিপত্য আবার পুনঃপ্রতিষ্ঠিত হল, যদিও জলালুদ্দীন নামে-মাত্র সুলতান রয়ে গেলেন। বাংলায় ইসলামের প্রভাব আবার মন্দীভূত হয়ে গেল, তাঁর বদলে হিন্দুধর্মেরই জয়ধ্বজা উড়তে লাগল। নূর কুৎব্ আলম দুঃখ করে লিখেছেন, “আপাত কোন কারণ ভিন্নই” (without apparent reasons) ভগবান এই কাফেরনন্দনকে মুসলমান করে সিংহাসনে বসিয়েছেন। “আপাত কোন কারণ ভিন্নই”—কারণ জলালুদ্দীন সিংহাসনে অধিষ্ঠিত থাকাতে মুসলমানদের বা ইসলামধর্মের কোন লাভ হচ্ছিল না।

আরও একটি ব্যাপার দেখতে হবে। নূর কুৎব্ আলমের এই চিঠি থেকে বোঝা যায় যে, এর আগে যেমন নূর কুৎব্ আলম গণেশকে দমনের জগু ইব্রাহিমকে আহ্বান করে এনেছিলেন, এবার যে কোন কারণে সে পথ বন্ধ; কারণ, চিঠির শেষে নূর কুৎব্ বলছেন, “লক্ষণ যা দেখা যাচ্ছে, তাতে আমাদের কাছে কোন সাহায্য আসবার কিছুমাত্র সম্ভাবনা নেই।” চিঠির প্রথম ছত্রটিও এই প্রসঙ্গে উল্লেখযোগ্য—“হতভাগ্য আমি সেই ‘শাহ’কে যখন তখন নিজের কথা স্মরণ করিয়ে দিতাম, কিন্তু এই সময়ে... আমি অত্যন্ত বিব্রত ও বিচলিত বোধ করছি।” যদিও ‘শাহ’ শব্দটির নানারকম মানে হয়, তবু এখানে ‘রাজা’ অর্থে এবং ইব্রাহিমের প্রতিভূস্বরূপে শব্দটিকে গ্রহণ করলে সব দিক দিয়ে অর্থসঙ্গতি হয়।

### দন্ডুজমর্দনদেব ও মহেন্দ্রদেবের মৃত্যু

‘রিয়াজ-উস-সলাতীন’ এবং বুকাননের বিবরণীতে পাওয়া যায়, জলালুদ্দীন সিংহাসনে অভিষিক্ত হবার কিছুদিন পরে ইব্রাহিমের মৃত্যু হয় এবং গণেশ তখন ছেলেকে সরিয়ে আবার নিজে সিংহাসনে বসেন। এর মধ্যে ইব্রাহিমের মৃত্যুর কথাটি সর্বৈব মিথ্যা; কারণ ইব্রাহিমের মৃত্যু ৮১৯-২০ হিজরায় হয়নি, তিনি ৮৪৪ হিজরা বা ১৪৪০ খ্রীষ্টাব্দ পর্যন্ত বেঁচে ছিলেন। ‘রিয়াজ’ ও বুকাননের পুঁথিতে মনগড়া কথা লেখা হয়েছিল। কীভাবে ইব্রাহিমের মৃত্যু হয়েছিল, সে সম্বন্ধেও দুই সূত্রের উক্তির মধ্যে পার্থক্য দেখা যায়। ‘রিয়াজে’ বলা হয়েছে, নূর কুৎব্ আলমের অভিষাপের ফলে ইব্রাহিমের মৃত্যু হয়েছিল, আর বুকাননের বিবরণীতে পাওয়া যায়, জলালুদ্দীন তাঁকে মুক্ত

পরাজিত ও নিহত করেছিলেন। কল্লনার উপর নির্ভর করাতেই দুই বিরুতিতে এই পার্থক্য সৃষ্টি হয়েছে বলে মনে হয়।

কিন্তু ছেলেকে সরিয়ে গণেশের সিংহাসনে বসার কথাটি সত্য। কারণ, জালালুদ্দীনের ৮১৮ হিজরার অনেক মুদ্রাই পাওয়া গিয়েছে, তাঁর ৮১৯ হিজরার খুব অল্প মুদ্রাই পাওয়া গিয়েছে। ৮২০ হিজরার একটিও মুদ্রা পাওয়া যায়নি এবং ৮২১ হিজরা থেকে আবার তাঁর মুদ্রা মিলছে। এদিকে যে সময়টুকু জালালুদ্দীনের মুদ্রা মিলছে না, মোটামুটিভাবে সেই সময়েই দু'জন হিন্দু রাজার বাংলা অক্ষরে ক্ষোদিত মুদ্রা পাওয়া যাচ্ছে। এই মুদ্রাগুলির এক পিঠে রাজার নাম, অপর পিঠে টাকশালের নাম, সাল এবং “শ্রীচণ্ডীচরণ-পরায়ণস্ত” লেখা আছে। এই হিন্দু রাজাদের নাম, মুদ্রায় উল্লিখিত সাল এবং তাঁদের মুদ্রা যে টাকশালে তৈরী হয়েছিল, তাদের নাম নীচে দেওয়া হল।

রাজার নাম	মুদ্রায় উল্লিখিত সাল	টাকশালের নাম
১। দম্বজমর্দনদেব	১৩৩২ শকাব্দ = ৮২০ হিজরা ১৩৪০ শকাব্দ = ৮২১ হিজরা	পাণ্ডুনগর, স্বর্ণ- গ্রাম, এবং চাটিগ্রাম
২। মহেন্দ্রদেব	১৩৪০ শকাব্দ = ৮২১ হিজরা	

স্পষ্টই বোঝা যায়, পাণ্ডুনগর, স্বর্ণগ্রাম ও চাটিগ্রাম যথাক্রমে পাণ্ডুয়া, সোনারগাঁও ও চাটগাঁও-এর সংস্কৃত রূপ। এই সব জায়গার টাকশাল থেকে জালালুদ্দীনের মুদ্রাও বেরিয়েছিল। স্ততরাং এই দু'জন রাজা ১৩৩২ ও ১৩৪০ শকাব্দে যে প্রায় সারা বাংলারই শাসনক্ষমতা লাভ করেছিলেন, তাতে সন্দেহ নেই।

### গণেশ ও দম্বজমর্দনদেব অভিন্ন লোক

এঁরা কে, সেই প্রশ্নই এখন আলোচ্য। এঁদের মধ্যে মহেন্দ্রদেবের সম্বন্ধে পরে আলোচনা করা হবে। কিন্তু দম্বজমর্দনদেব যে স্বয়ং গণেশ, তাতে সন্দেহের কোন অবকাশ নেই বললেই চলে।\* কারণ নূর কুৎব্ আলমের

\* গণেশ ও দম্বজমর্দনদেবের অভিন্নতা প্রথমে ডঃ নলিনীকান্ত ভট্টশালী দেখান (Coins and Chronology of the Early Independent Sultans of Bengal, pp. 109-115 প্রভৃতি)।

উদ্ধৃত চিঠি জলালুদ্দীনের প্রথম রাজ্যাভিষেকের পরে লেখা। ঐ সময়ে গণেশ যে জীবিত ও সর্বশক্তিমান ছিলেন, তা ঐ চিঠি থেকেই জানা যায়। স্ততরাং তার দুই বছরের মধ্যেই যে দহুজমর্দনদেবের মৃত্যু পাওয়া যাচ্ছে, তিনি গণেশ ছাড়া আর কেউ হতে পারেন বলে মনে করা যায় না। দহুজমর্দনদেবের এই মৃত্যুগুলিই প্রমাণ করছে যে, জলালুদ্দীনের প্রথম রাজ্যাভিষেকের কিছুদিন পরে গণেশ তাঁকে অপসারিত করে সিংহাসনে বসেছিলেন,—‘রিয়াজ’ ও বুকাননের বিবরণীর এই কথা সত্য। অত্ৰ কোন হিন্দু, বার সম্বন্ধে কিছুই জানাশোনা নেই, তিনি আচম্কা আবির্ভূত হয়ে সারা বাংলা জয় করে দহুজমর্দনদেব নামে একই সঙ্গে পাণ্ডুয়া, সোনারগাঁও ও চাটগাঁও-এর টাকশাল থেকে মৃত্যু বার করলেন, এ কথা বিশ্বাস করা যায় না।

এই যুক্তি এতই অকাটা যে বারা অত্ৰ কিছু সিদ্ধান্ত করেছেন, তাঁদের কষ্টকল্পনার আশ্রয় নিতে হয়েছে। কেউ কেউ প্রশ্ন করেছেন দহুজমর্দনদেবের মৃত্যুর উল্লিখিত পাণ্ডুনগর মালদহ জেলার পাণ্ডুয়া না হুগলী জেলার পাণ্ডুয়া? ডঃ দানী এই পাণ্ডুনগরকে হুগলী জেলার পাণ্ডুয়ার সঙ্গে অভিন্ন ধরতে চান। কিন্তু হুগলী জেলার পাণ্ডুয়াতে কোন দিন কোন টাকশাল ছিল বলে জানা যায় না। এই পাণ্ডুয়া থেকে মাত্র ১০১১ মাইল দূরে সাতগাঁওতে একটি চাল টাকশাল এই সময় ছিল বলে এখানে সাময়িকভাবেও কোন টাকশাল স্থাপিত হবার সম্ভাবনা স্বীকার করা যায় না। মৃত্যুর উল্লিখিত পাণ্ডুনগর যে মালদহ জেলার পাণ্ডুয়া, সে সম্বন্ধে অনেক প্রমাণ আছে। বুকানন প্রায় দেড়শো বছর আগে লিখেছিলেন, মালদহ জেলার পাণ্ডুয়া পাণ্ডববংশের জৈনিক রাজা প্রতিষ্ঠা করেছিলেন বলে স্থানীয় জনসাধারণের বিশ্বাস; শতাব্দেক বছর আগে রাভেনশ লিখেছিলেন যে, পাণ্ডুয়ার সাতাশ-ঘড়া নামে যে দীঘি আছে, লোকে বলে সেটি তৃতীয় পাণ্ডব অর্জুন প্রতিষ্ঠা করেছিলেন; সাতাশ-ঘড়া দীঘির দক্ষিণ-পূর্ব কোণে একটি পুরানো বাড়ীর ধ্বংসাবশেষ আছে, লোকে তাকে বলে ‘পাণ্ডপ (পাণ্ডব) রাজা দালান’ (Memoirs of Gaur and Pandua, p. 143 প্রঃ)। অতএব মালদহ জেলার পাণ্ডুয়ার মূল নাম যে পাণ্ডুনগর ছিল, তাতে কোন সন্দেহ নেই; দহুজমর্দনদেব ও মহেন্দ্রদেবের মৃত্যুগুলির প্রাপ্তিস্থানের দিকে লক্ষ্য রাখলেও সব সন্দেহ ভঞ্জন হবে। পাণ্ডুনগরের টাকশালে তৈরী অধিকাংশ মৃত্যুই উত্তর বঙ্গে আবিষ্কৃত হয়েছে। দহুজমর্দনদেবের সর্বপ্রথম যে মৃত্যুটি আবিষ্কৃত হয়েছিল, সেটি গোড়ের

ধ্বংসাবশেষের মধ্যে পাওয়া গিয়েছিল।\* খাস পাণ্ডুয়াতেই ( মালদহ জেলা ) দহুজমর্দনদেব ও মহেন্দ্রদেবের একটি করে মূদ্রা পাওয়া গেছে। দু'টি মূদ্রাই পাণ্ডুনগরের টাকশালে তৈরী। এই সমস্ত প্রমাণ থেকে নিঃসংশয়ে সিদ্ধান্ত করা যায় যে, দহুজমর্দনদেব ও মহেন্দ্রদেবের মূদ্রায় উল্লিখিত পাণ্ডুনগর বর্তমান মালদহ জেলায় অবস্থিত পাণ্ডুয়া।

আমরা নীচে রিয়াজ-উস-সলাতীন ও বুকাননের বিবরণীর উক্তি এবং সমসাময়িক সূত্র ও মূদ্রা থেকে লব্ধ তথ্যের সংক্ষিপ্তসার পাশাপাশি দিলাম। এর থেকেই বোঝা যাবে, গণেশ ও দহুজমর্দনদেব একই লোক।

‘রিয়াজ’ ও বুকাননের বিবরণী

সমসাময়িক সূত্র ও মূদ্রা

গণেশ দরবেশদের উপর অত্যাচার করায় নূর কুৎব্ আলম সুলতান ইব্রাহিমকে আহ্বান জানান—গণেশকে দমন করার জন্ত। ইব্রাহিম এই আহ্বানে সাড়া দিয়ে সসৈন্তে বাংলার দিকে রওনা হন।

আশরফ সিম্বানীর চিঠিতে লেখা আছে, গণেশ দরবেশদের উপর অত্যাচার করেছিলেন এবং তাঁকে দমন করার জন্ত নূর কুৎব্ আলম ইব্রাহিম শর্কীকে আহ্বান জানান। ইব্রাহিম এই আহ্বানে সাড়া দিয়ে সসৈন্তে বাংলার দিকে রওনা হন।

ইব্রাহিম সসৈন্তে উপস্থিত হলে গণেশ নত হন এবং তাঁর পুত্রকে ধর্মাস্তরিত কবে জলালুদ্দীন নাম দিয়ে সিংহাসনে অভিষিক্ত করা হয়।

‘সঙ্গীতশিরোমণি’ থেকে জানা যায় যে, ইব্রাহিমের বাংলায় অভিযানের ফলে গণেশের ক্ষমতার উচ্ছেদ হয়েছিল এবং তাঁর পুত্র মুসলিমধর্মে দীক্ষিত হয়ে সিংহাসনে অভিষিক্ত হয়েছিলেন।

৮১৮ ও ৮১৯ হিজরাদ উংকীর্ণ

জলালুদ্দীনের মূদ্রা পাওয়া গেছে।

\* উনবিংশ শতাব্দীর প্রথমে ক্রেটন এটি আবিষ্কার করেন। তিনি রাজায় নাম পড়েন ‘দহুজমর্দনদেব’; তাঁর Ruins of Gaur (1817) বইয়ে এই মূদ্রার বিবরণ প্রকাশিত হলেও তা তখন সাধারণের দৃষ্টি আকর্ষণ করেনি। ষোড়শ শতাব্দীর প্রথমে দহুজমর্দনদেব ও মহেন্দ্রদেবের আরও অনেকগুলি মূদ্রা আবিষ্কৃত হয় এবং তখন থেকেই এগুলির সম্বন্ধে আলোচনা শুরু হয়।

‘রিয়াজ’ ও বুকাননের বিবরণী

সমসাময়িক সূত্র ও মুদ্রা

নূর কুৎব আলমের চিঠি থেকে জানা যায় যে, একজন বিধর্মী ক্ষমতা অধিকার করেছেন এবং জলালুদ্দীন রাজা থাকায় মুসলমানদের কোন লাভ হচ্ছে না।

এর কিছুদিন পরে জলালুদ্দীনকে অপসারিত করে গণেশ নিজেই রাজা হয়ে সিংহাসনে বসলেন

৮২০ হিজরায় উৎকীর্ণ জলালুদ্দীনের মুদ্রা পাওয়া যাচ্ছে না।

১৩৩৯ ও ১৩৪০ শকাব্দে (= ৮২০-৮২১ হিঃ) উৎকীর্ণ দলুজ-মর্দনদেবের মুদ্রা পাওয়া যাচ্ছে।

এর কয়েক বছর বাদে গণেশের মৃত্যু হয় এবং জলালুদ্দীন আবার রাজা হন।

১৩৪০ শকাব্দে (= ৮২১ হিঃ) উৎকীর্ণ মহেন্দ্রদেবের মুদ্রা পাওয়া যাচ্ছে।

৮২১ হিজরা থেকে আবার নিয়মিতভাবে জলালুদ্দীন মুহম্মদ শাহের মুদ্রা পাওয়া যাচ্ছে।

অতএব দলুজমর্দনদেব স্বয়ং গণেশ ভিন্ন আর কেউ হতে পারেন না। ফার্সী বইগুলিতে গণেশের ‘দলুজমর্দনদেব’ উপাধির কথা উল্লিখিত হয়নি বলেই আপাতদৃষ্টিতে মনে হয়; কিন্তু অধ্যাপক দীনেশচন্দ্র ভট্টাচার্য দেখাবার চেষ্টা করেছেন যে, বুকানন যে পুথিটি ব্যবহার করেছিলেন, তাতে এই উপাধিটি উল্লিখিত ছিল। অধ্যাপক ভট্টাচার্য বলেছেন, “Hakim of Dynwaj পদটি দলুজমর্দন শব্দের ফার্সী অন্বাদ—অর্থাৎ অধিকারী অর্থেও হাকিম শব্দের ব্যবহার আছে। ইহা ছাড়া পদটির কোন অর্থই সম্ভব হয় না—দিনাজপুর নিতাস্তই আধুনিক নাম।……নামটির মধ্যে একটি ‘w’ অক্ষর আছে—তদ্বারা ‘দলুজ’ই প্রতিপন্ন হয়—‘দিনাজ’ নহে।”\* ‘Hakim, of Dynwaj’-এর বুকানন ব্যাখ্যা দিয়েছিলেন, ‘perhaps a petty Hindu chief of

\* প্রবাসী, বৈশাখ, ১৩৬০. পৃঃ ২৩ থেকে উদ্ধৃত। এই উদ্ধৃতিতে “একটি ‘w’ অক্ষর”-এর জায়গায় ‘প্রবাসী’তে ভুলক্রমে “একটি ‘ঘ’ অক্ষর” ছাপা হয়েছে। বর্ণিত দীনেশচন্দ্র ভট্টাচার্যের নির্দেশ অনুসারেই আমরা যথাযথভাবে এই ভুলের সংশোধন করেছি।

Dinajpur'; কিন্তু এই ব্যাখ্যা কী কারণে স্বীকার করা চলে না, তা আগেই দেখানো হয়েছে; স্ততরাং অধ্যাপক ভট্টাচার্য 'Hakim, of Dynwaj'-এর যে ব্যাখ্যা দিয়েছেন, তাই এর যথার্থ ব্যাখ্যা বলে মনে হয়। আমাদের মনে হয়, মূল ফার্সী পুঁথিতে পদটি যেভাবে ছিল, তার প্রকৃত অর্থ, 'দমুজ' নামধারী হাকিম; ফার্সী লিপিতে 'দমুজ' 'দিনওয়াজ' হয়েছে।

কিন্তু গণেশ ও দমুজমর্দনদেব যে পৃথক লোক, এই মতও কোন কোন গবেষক ব্যক্ত করেছেন। স্ততরাং তাঁদের মতের পিছনে কী কী যুক্তি আছে, তা ভালভাবে বিচার করে দেখা দরকার।

প্রথম যুক্তিটি অনেকটা সংস্কারমূলক। এঁরা বলেন জলালুদ্দীনের প্রথম মুদ্রার তারিখ ৮১৮ হিজরা = ১৪১৫-১৬ খ্রীঃ, আর দমুজমর্দনদেবের প্রথম মুদ্রার তারিখ ১৩৩৯ শক = ১৪১৭-১৮ খ্রীঃ। স্ততরাং গণেশ ও দমুজমর্দনদেবকে অভিন্ন ধরলে স্বীকার করতে হয় যে—আগে পুত্র, এবং তারপরে পিতা রাজা হয়েছিলেন। এ ব্যাপার অস্বাভাবিক। এর উত্তরে বলা যায়, অস্বাভাবিক হলেও এরকম ব্যাপার ঘটেছিল বলে যখন 'রিয়াজ-উস-সলাতীন' ও বুকাননের বিবরণীতে লেখা আছে এবং বিভিন্ন সমসাময়িক সূত্র থেকে তার সমর্থন মিলছে, তখন একে স্বীকার করে নিতেই হয়।

দ্বিতীয় যুক্তি, দমুজমর্দন নামে একজন স্বতন্ত্র রাজার সন্ধানও পাওয়া গেছে। ইনি চন্দ্রদ্বীপ রাজবংশের প্রতিষ্ঠাতা। এই সব গবেষকেরা মনে করেন, ইনিই ১৩৩৯ ও ১৩৪০ শককে প্রায় সারা বাংলার অধীশ্বর হয়েছিলেন এবং পাণ্ডুয়া, সোনারগাঁও ও চাটগাঁও-এর টাকশাল থেকে মুদ্রা প্রকাশ করেছিলেন। এখনও কেউ কেউ এই মতে বিশ্বাস করেন বলে এ সম্বন্ধে বিস্তৃতভাবে আলোচনা করা দরকার মনে করি।

### চন্দ্রদ্বীপের দমুজমর্দন

প্রথমেই বলা দরকার, চন্দ্রদ্বীপে যে দমুজমর্দন নামে কোনও রাজা ছিলেন, তা কোন প্রামাণিক সূত্র থেকে জানা যায় না। এই দমুজমর্দন কেবলমাত্র কিংবদন্তী ও কুলগ্রন্থে উল্লিখিত। অবশ্য এই কিংবদন্তী ও কুলগ্রন্থের একটা বড় অংশই দমুজমর্দনদেব ও মহেন্দ্রদেবের নামান্বিত মুদ্রা আবিষ্কারের পরে সৃষ্টি হয়েছে; কীভাবে সৃষ্টি হয়েছে, তারও ইতিহাস বেশ কৌতুকজনক। প্রথমে এই মুদ্রাগুলির তারিখ পড়তে পারা যায় নি। তখন

কেউ কেউ মত প্রকাশ করলেন, এই দহুজমর্দন এবং ত্রয়োদশ শতাব্দীর রাজা দহুজমাধব বা দহুজ রায় অভিন্ন। এই সময় কতকগুলি কুলগ্রন্থ আবিষ্কৃত হল, যাতে লেখা রয়েছে দহুজমর্দন ও দহুজমাধব অভিন্ন। এর পরে মুদ্রাগুলির তারিখ কেউ কেউ আংশিকভাবে পড়তে পারলেন, কিন্তু তাঁরা মহেন্দ্রদেবকে অগ্রবর্তী ও দহুজমর্দনদেবকে পরবর্তী রাজা মনে করলেন। সঙ্গে সঙ্গে কতকগুলি কুলগ্রন্থও বেরোল, যাতে লেখা আছে দহুজমর্দন মহেন্দ্রের পুত্র। ‘বটুভটের দেববংশে’ও ( নামাত্তর ‘দেববংশের ইতিবৃত্তি’ ) এই কথা লেখা আছে; এইসব জঞ্জাল এই সময়ের সৃষ্টি। আবার তারিখ ঠিকভাবে পড়তে পারার পর সেই অনুযায়ী কুলগ্রন্থও বেরিয়েছে।

এই সব আবজ্ঞনাকে আমরা হিসাবের মধ্যে গণ্য করব না। আমাদের দেখতে হবে দহুজমর্দনদেবের মুদ্রা নিয়ে আলোচনা শুরু হবার আগে এ-সম্বন্ধে কী কিংবদন্তী প্রচলিত ছিল এবং কুলগ্রন্থে কী লেখা ছিল। তা জানা যায় চার জায়গা থেকে—(১) এইচ এস বেভারিজ রাঁচত *The District of Backergaunj* বই ( ১৮৭৬ খ্রিষ্টাব্দে প্রকাশিত ), (২) জেমস ওয়াইজ লিখিত *On the Barah Bhuyas of Eastern Bengal* প্রবন্ধ ( *J. A. S. B.*, 1874, pp. 197-214 ), (৩) খোসালচন্দ্র রায় রাঁচত ‘বাখরগঞ্জের ইতিহাস’ ( ১৮৯৫ খ্রিষ্টাব্দে প্রকাশিত ), (৪) রোহিণীকুমার সেন বিবর্তিত ‘বাকলা’ ( লেখকের মৃত্যুর দশ বছর পরে—১৯১৫ খ্রিষ্টাব্দে প্রকাশিত )। ( আরও কয়েকগার্নি বইয়ের নাম শুনেছি, কিন্তু এগুলি সংগ্রহ করতে পারিনি। )

একথা জেনে রাখা দরকার, প্রাচীন চন্দ্রদ্বীপ রাজ্য বর্তমান ফরিদপুর জেলার কিয়দংশ, বরিশাল জেলার কিয়দংশ ও নোয়াখালি জেলার কিয়দংশ নিয়ে গঠিত ছিল। মোগল আমলে এই অঞ্চল ছিল ‘সরকার বাকলা’র অন্তর্গত। যা হোক, উপরে যে চারটি বই বা প্রবন্ধের উল্লেখ করা হল, প্রত্যেকটিতেই বলা হয়েছে, চন্দ্রদ্বীপ-রাজবংশের প্রতিষ্ঠাতার নাম ( বা নামের অংশ ) ছিল দহুজমর্দন। কিন্তু এদের উক্তির মধ্যে কিছু কিছু অনৈক্য দেখা যায়। বেভারিজ ও রোহিণীকুমার সেনের মতে চন্দ্রদ্বীপ-রাজবংশ-প্রতিষ্ঠাতার নাম রামনাথ দহুজমর্দন দে ( বাঙালীর পক্ষে অদ্ভুত নাম ), খোসালচন্দ্র রায়ের মতে ঐর নাম দহুজমর্দন দে এবং এর পুত্রের নাম রামনাথ দে, জেমস ওয়াইজের মতে ঐর নাম দহুজমর্দন দে, ‘রামনাথ’-এর কোন উল্লেখ ওয়াইজের লেখায় নেই।

কীভাবে চন্দ্রদ্বীপ রাজ্য প্রতিষ্ঠিত হল, সে সম্বন্ধে বেভারিজ, ওয়াইজ ও রোহিণীকুমার সেন দুটি প্রাচীন কিংবদন্তীর উল্লেখ করেছেন। এই দুটি কিংবদন্তীর সংক্ষিপ্তসার নীচে দেওয়া হল।

(১) কোন এক সময় বিক্রমপুরে চন্দ্রশেখর নামে একজন ব্রাহ্মণ এমন একটি কন্যাকে বিবাহ করেন, যার নাম তাঁর উপাস্তা দেবীর নামের সঙ্গে অভিন্ন। ব্রাহ্মণ এই ব্যাপারে ক্ষুব্ধ হয়ে আত্মহত্যা করবার জন্ত একটি ছোট নৌকায় চড়ে জলপথে আসেন এবং দুদিন পরে এক জায়গায় এসে এক ধীবরকন্যার দেখা পান। এই ধীবরকন্যা তাঁকে যুক্তি দিয়ে বুঝিয়ে আত্মহত্যা থেকে নিরস্ত করেন এবং অবশেষে প্রকাশ পায় ইনিই চন্দ্রশেখরের উপাস্তা দেবী। দেবী বলেন শীঘ্রই এই জলময় অঞ্চল শস্তাশ্রামলা মেদিনীতে পরিণত হবে এবং চন্দ্রশেখর তার রাজা হবেন। চন্দ্রশেখর রাজা হতে অস্বীকার করেন। শুধু প্রার্থনা করেন যেন তাঁর নাম অনুসারে এই জায়গার নাম হয়। দেবী এই প্রার্থনা পূরণ করেন। ফলে জল সরে গেলে এই অঞ্চল চন্দ্রশেখরের নাম অনুসারে ‘চন্দ্রদ্বীপ’ নামে পরিচিত হয়।

(২) আগে যখন চন্দ্রদ্বীপ অঞ্চল জলমগ্ন ছিল, তখন চন্দ্রশেখর চক্রবর্তী তাঁর কয়েকজন শিষ্য নিয়ে এই জায়গা দিয়ে নৌকায় চড়ে তীর্থ অভিমুখে যাচ্ছিলেন। এই শিষ্যদের মধ্যে একজনের নাম দম্বুজমর্দন দে। একদিন রাত্রে জগদম্বা কালিকাদেবী ব্রহ্মচারীকে স্বপ্নে দেখা দিয়ে বলেন, এখানে জলের তলায় তিনটি পাষাণময়ী দেবমূর্তি আছে, এগুলি যদি দম্বুজমর্দন দে তোলেন, তাহলে জল অপসারিত হয়ে এই অঞ্চল ভূখণ্ডে পরিণত হবে। পরদিন সকালে চন্দ্রশেখরের আদেশ অনুযায়ী দম্বুজমর্দন দে দুবার জলে ডুব দিয়ে প্রথমবার ক্যাত্যায়নীর এবং দ্বিতীয়বার মদনগোপালের মূর্তি পেলেন, কিন্তু তৃতীয়বার ডুব দিতে সাহস করলেন না। গুরু বললেন, “তৃতীয়বার ডুব দিলে মহালক্ষ্মীর মূর্তি পাওয়া যেত।” যাহোক, অবিলম্বেই সমস্ত জল সরে গিয়ে অঞ্চলটি ভূখণ্ডে পরিণত হল এবং দম্বুজমর্দন দে তাঁর প্রথম রাজা হলেন। গুরুর নাম অনুসারে তিনি নতুন রাজ্যের নাম রাখলেন ‘চন্দ্রদ্বীপ’।

বলা বাহুল্য, অলৌকিকরসাম্প্রিত এই সব কিংবদন্তী থেকে আমরা ইতিহাসের কোন উপকরণ পাই না।



পূর্বোল্লিখিত চারজন লেখকই প্রাচীন কুলগ্রন্থ বা কিংবদন্তী অবলম্বনে দহুজমর্দন দের অধস্তন বংশধরদের নামের তালিকা দিয়েছেন। কিন্তু চারটি তালিকার পরস্পরের মধ্যে মিল নেই। আমরা চারটি তালিকা থেকেই বংশলতা প্রস্তুত করে নীচে লিপিবদ্ধ করলাম।

বেভারিজ	ওয়াইজ	রোহিণীকুমার মেন খোশালচন্দ্র রায়	
রামনাথ দহুজমর্দন দে	দহুজমর্দন দে	রামনাথ দহুজমর্দন দে	দহুজমর্দন দে
রমাবল্লভ	রমাবল্লভ	রমাবল্লভ	রামনাথ
শ্রীবল্লভ		কৃষ্ণবল্লভ	রমাবল্লভ
হরিবল্লভ	হরিবল্লভ	হবিবল্লভ	শ্রীবল্লভ
		জয়দেব	হরিবল্লভ
	জয়দেব	কণ্ঠা	
কমলা = বলভদ্র বসু		কমলা = বলভদ্র বসু	কৃষ্ণবল্লভ
	পরমানন্দ		
পরমানন্দ		পরমানন্দ	কমলা
	জগদানন্দ		
জগদানন্দ		জগদানন্দ	প্রেমানন্দ
	কন্দর্পনারায়ণ		
কন্দর্পনারায়ণ		কন্দর্পনারায়ণ	জগদানন্দ
	রামচন্দ্র		
রামচন্দ্র		রামচন্দ্র	কন্দর্পনারায়ণ
			রামচন্দ্র

সুতরাং দেখা যাচ্ছে, এই চারটি বংশলতার শেষ চারটি নামের মধ্যে বিশেষ কোন বিরোধ না থাকলেও ( কেবল খোশালচন্দ্র রায় 'পরমানন্দ'র জায়গায় 'প্রেমানন্দ' লিখেছেন ) তার আগের নামগুলি সম্বন্ধে বিরোধ অল্প

নয়। স্মৃতরাং আগের অংশের প্রামাণিকতা সম্বন্ধে মনে সন্দেহ জাগে। শেষ চারজনের মধ্যে রামচন্দ্র যশোহররাজ প্রতাপাদিত্যের জামাতা এবং বহু প্রামাণিক সূত্রে উল্লিখিত। কন্দর্পনারায়ণও ঐতিহাসিক ব্যক্তি। জগদানন্দের অস্তিত্ব সম্বন্ধে কিংবদন্তী ও কুলগ্রন্থের বাইরে কোন প্রমাণ পাওয়া যায়নি। কিন্তু পরমানন্দের ঐতিহাসিকতা সম্বন্ধে স্থানিচিত প্রমাণ আছে, তাঁৎ আবির্ভাবকালও জানা গেছে। পতু'গীজ ভাষায় লেখা একটি চুক্তিপত্র পাওয়া গেছে; এর থেকে জানা যায় ১৫৫২ খ্রীষ্টাব্দের ৩০শে এপ্রিল তারিখে বাকলার রাজা (Rae de Bacola) পরমানন্দ রায় পতু'গীজদের সঙ্গে এক চুক্তি করেন এবং তাঁর দুজন প্রতিনিধি গোয়ায় গিয়ে চুক্তিপত্রে স্বাক্ষর করেন। (Surendranath Sen, Studies in Indian History, 1930, p. 3 প্রঃ) (এই অঞ্চলের আর একজন পরমানন্দের নাম আবুল ফজলের 'আইন-ই-আকবরী'র দ্বিতীয় খণ্ডে পাওয়া যায়। আবুল ফজল লিখেছেন, আকবরের রাজত্বের ২২শ বর্ষে অর্থাৎ ১৫৮৫ খ্রীষ্টাব্দে এক বিরাট ঝটিকাবর্ত ও জলপ্লাবন হয়ে 'সরকার বাকলা'কে একেবাবে নিমজ্জিত করে দেয়। বাকলার রাজা তখন গীতবাগ উপভোগ করছিলেন। প্রাণ বাঁচাবার জন্ত নৌকায় উঠেও তিনি আত্মরক্ষা করতে পারেন না। কিন্তু তাঁর পুত্র পরমানন্দ রায় উঁচু মন্দিরের চূড়ায় উঠে কোনরকমে রক্ষা পেয়ে যান।)

যা হোক, বাকলা বা চন্দ্রদ্বীপের রাজা পরমানন্দ অন্তত ১৫৫২ খ্রীষ্টাব্দ পর্যন্ত রাজত্ব করেছিলেন। তাঁর উর্ধ্বতন পুরুষদের নাম প্রামাণিকভাবে জানা যায় না। কিংবদন্তী ও কুলগ্রন্থ থেকে যা জানা যায়, সে সম্বন্ধেও বিভিন্ন বিবরণের মধ্যে মতৈক্য নেই। বেভারিজ ও রোহিণীকুমার সেনের মত অনুসারে যদি চন্দ্রদ্বীপ রাজবংশের প্রতিষ্ঠাতা দহুজমর্দন পরমানন্দের উর্ধ্বতন সপ্তম পুরুষ হন তাহলে তিনি মোটামুটিভাবে পঞ্চদশ শতাব্দীর প্রথম পাদে বর্তমান ছিলেন; ওয়াইজের মত অনুসারে যদি তিনি পরমানন্দের উর্ধ্বতন ষষ্ঠ পুরুষ হন, তাহলে মোটামুটিভাবে পঞ্চদশ শতাব্দীর দ্বিতীয় পাদে এবং খোসালচন্দ্র রায়ের মত অনুসারে যদি তিনি পরমানন্দের উর্ধ্বতন অষ্টম পুরুষ হন, তাহলে মোটামুটিভাবে চতুর্দশ শতাব্দীর শেষ পাদে বর্তমান ছিলেন।

চন্দ্রদ্বীপের দহুজমর্দনের কোন পূর্বপুরুষের নাম কোন প্রাচীন কুলগ্রন্থে পাওয়া যায় না। 'বটুভট্টের দেববংশ' বা 'দেববংশের ইতিবৃত্তি'তে এ সম্বন্ধে

যা লেখা আছে, তার কোন মূল্য নেই। স্মৃতরাং এদিক দিয়ে তাঁর আবির্ভাব-কাল নির্ণয়ের চেষ্টা করার কোন উপায় নেই।

যাহোক, চন্দ্রদ্বীপ-রাজবংশের প্রতিষ্ঠাতা দত্তজমর্দনের অস্তিত্ব সন্দেহেই কোন প্রমাণ পাওয়া যায় না। তাঁর সন্দেহে যে সব কিংবদন্তী প্রচলিত আছে, সেগুলি অলৌকিক উপাদানে পূর্ণ। তাঁর অধস্তন বংশলতা বিভিন্ন কুলগ্রন্থে যেভাবে পাওয়া যায় তাদের মধ্যে ঐক্য নেই এবং এদের পিছনে কোন প্রামাণিক স্মৃত্তের সমর্থন নেই। কিংবদন্তীর উপর বিশ্বাস করে যদি এই দত্তজমর্দনের অস্তিত্ব স্বীকার করা যায়, তাহলেও তাঁর সম্ভাব্য আবির্ভাবকাল সন্দেহে স্পষ্ট আভাস পাওয়া যায় না। স্মৃতরাং এই চন্দ্রদ্বীপবাসী দত্তজমর্দন ১৩৩৯-৪০ শকাব্দে সারা বাংলার অধীশ্বর হয়েছিলেন এবং পাণ্ডুয়া, সোনারগাঁও ও চাটগাঁও থেকে এক সঙ্গে মুদ্রা প্রকাশ করেছিলেন ধরে নিলে তা আশাঢ়ে কল্পনার পর্যায়ে পড়বে। আর একটি বিষয় লক্ষ্য করতে হবে। সমস্ত প্রাচীন কিংবদন্তী ও কুলগ্রন্থ অনুসারে দত্তজমর্দন কেবল চন্দ্রদ্বীপেরই রাজা ছিলেন। তিনি যে সারা বাংলাদেশ জয় করেছিলেন, এরকম কোন কথা তাদের মধ্যে বলা হয়নি। স্মৃতরাং মুদ্রার দত্তজমর্দনদেব চন্দ্রদ্বীপের দত্তজমর্দন হতে পারেন না, তিনি রাজা গণেশ ছাড়া আর কেউ নন। চন্দ্রদ্বীপের দত্তজমর্দন সন্দেহে আমাদের ব্যক্তিগত ধারণা এই যে, চন্দ্রদ্বীপে এই নামের একজন রাজা সত্যিই ছিলেন এবং তিনি গণেশ-দত্তজমর্দনের পরবর্তী কালের লোক; গণেশ-দত্তজমর্দনদেবের অনুকরণেই তিনি 'দত্তজমর্দন' নাম নিয়েছিলেন।

### গণেশের দ্বিতীয়বার সিংহাসনে আরোহণ ও পরবর্তী ঘটনাবলী

অতএব সিদ্ধান্ত করা গেল, গণেশ ও দত্তজমর্দনদেব একই লোক। ১৪১০ খ্রীষ্টাব্দেই যিনি বাংলার রাজনৈতিক রঙ্গক্ষেত্রে নায়কের ভূমিকা নিয়ে অবতরণ করেছিলেন, অনিবার্য কারণবশত ১৪১৭ খ্রীষ্টাব্দের আগে তিনি নিজের নামে মুদ্রা বাব করতে পারেন নি। ডঃ নলিনীকান্ত ভট্টশালী দেখিয়েছেন, 'দত্তজমর্দন' নামটি বিশেষভাবে ইঙ্গিতপূর্ণ; এর দ্বারা বিধর্মী প্রতিপক্ষদের দমন করার অভিপ্রায় প্রকাশ পাচ্ছে।

জলালুদ্দীনের অগ্নাগ্র বছরের মুদ্রার তুলনায় ৮১৯ হিজরার মুদ্রা অচিস্তনীয় রকমের কম। ডঃ নলিনীকান্ত ভট্টশালী তাঁর অগ্র বছরের বহু মুদ্রা পেয়েছিলেন, কিন্তু ৮১৯ হিজরার মুদ্রা মাত্র একটি পেয়েছিলেন।

অতএব ৮১২ হিজরাতেই গণেশ জলালুদ্দীনকে অপসারিত করে সিংহাসনে বসেছিলেন এবং পরের বছর থেকে ‘দলুজ্জমর্দনদেব’ উপাধি নিয়ে মৃত্যু বার করেছিলেন, এই সিদ্ধান্ত করা যেতে পারে। দলুজ্জমর্দনদেব ১৩৪০ শকাব্দের প্রথমাংশ অবধি অর্থাৎ ৮২১ হিজরার মাঝামাঝি সময় পর্যন্ত রাজত্ব করেছিলেন। সুতরাং দেখা যাচ্ছে, দ্বিতীয়বার সিংহাসনে বসে গণেশ প্রায় দু’বছর রাজত্ব করেছিলেন।

আমরা দেখে এসেছি, ইব্রাহিম শকাঁর হস্তক্ষেপের ফলে গণেশ সিংহাসন ত্যাগ করতে বাধ্য হয়েছিলেন। প্রশ্ন উঠতে পারে, এখন তাঁর এমন কী সুযোগ ঘটল, যাতে তিনি সিংহাসনে বসলেন? ডঃ নলিনীকান্ত ভট্টশালী অনুমান করেছিলেন যে, ইতিমধ্যে নূর কুৎব্ আলমের মৃত্যু হওয়াতেই গণেশ এই সুযোগ পেয়েছিলেন। বিভিন্ন স্থানে নূর কুৎব্ আলমের মৃত্যুর বিভিন্ন তারিখ পাওয়া যায়।\* বেভারিজ নানা যুক্তি সহকারে দেখাবার চেষ্টা করেছিলেন যে, তার মধ্যে ৮১৮ হিজরা তারিখটিই গ্রহণযোগ্য।† ডঃ ভট্টশালীর অনুমান

এইনব বিভিন্ন তারিখ হচ্ছে ৮০৮, ৮১৩, ৮১৮, ৮২৮, ৮৩৩, ৮৪৮, ৮৫১ ও ৮৬৩ হিজরা (JASB, 1892, Pt. I, pp. 122-124; JASB, 1895, Pt. I, p. 207 এবং JASB, 1902, Pt. I, p. 46 প্রঃ)। ৮৬৩ হিজরা তারিখটি পাওয়া যায় মুলতান নাসিরুদ্দীন মাহমুদ শাহের রাজত্বকালে নিমিত নূর কুৎব্ আলমের দরবার রান্নাঘরের একটি শিলালিপিতে। শিলালিপিতে একজন দরবেশের মৃত্যুর কথা উচ্চাসপূর্ণ ভাষায় লেখা আছে। ডঃ দানী মনে করেন এই দরবেশ দ্বং নূর কুৎব্ আলম। কিন্তু বেভারিজ বহু পূর্বে লিখেছিলেন, “863 is, I think, an impossible date for the death of a man who was a contemporary and fellow student of Sultan Ghiyasuddin and whose father died (after the son was grown up) in 786, or at least in 800.” বেভারিজের মতে শিলালিপিতে উল্লিখিত তারিখ সমাধি-নিমাণের, নূর কুৎব্ আলমের মৃত্যুর নয় (JASB, 1895, Pt. I, pp. 207-208 প্রঃ)। তাবিদ আলীর মতে এটি নূর কুৎবের পৌত্র শেখ জাহিদের মৃত্যুর তারিখ। যাহোক শিলালিপিটি বোধহয় সমসাময়িক নয়। কারণ এতে উল্লিখিত সম্পূর্ণ তারিখটি—২৮শে জিলহিজ্জা, সোমবার, ০৩ হিজরা। কিন্তু মনোমোহন চক্রবর্তী জ্যোতিষ-গণনা করে দেখিয়েছিলেন ৮৬৩ হিজরার ২৮শে জিলহিজ্জা সোমবারে পড়েনি—শুক্রবারে পড়েছিল (JASB, 1909, Pt. I, p. 228 প্রঃ)। সুতরাং এর সাক্ষ্যের খুব একটা মূল্য নেই।

† ইলাহী বংশের ‘খুশিদ-ই-জহান-নামা’তে উল্লিখিত একটি শিলালিপিতে নূর কুৎব্ আলমের মৃত্যুর তারিখ দেওয়া আছে—৭ই জিহাদ, ৮১৮ হিজরা। ব্রিটিশ মিউজিয়াম রক্ষিত ‘সিরাৎ-উল-আসরাফ’-এর এক পৃষ্ঠিতে লেখা আছে—১০ই জিহাদ, ৮১৮ হিজরা।

বেভারিজের সিদ্ধান্তের উপর নির্ভর করছে। তাঁর এই অল্পমান খুবই যুক্তি-যুক্ত। ‘রিয়াজ-উস-সলাতীনে’ লেখা আছে, গণেশের দ্বিতীয়বার সিংহাসনে আরোহণের সময়ে নূর কুৎব জীবিত ছিলেন। কিন্তু গণেশের মৃত্যুর পরে যখন জলালুদ্দীন দ্বিতীয়বার সিংহাসনে বসলেন, তখন যে নূর কুৎব জীবিত ছিলেন, এমন কথা ঐ বইয়ে লেখা নেই। তার বদলে তাতে আমরা দেখি জলালুদ্দীন নূর কুৎবের পৌত্র শেখ জাহিদকে (গণেশ কর্তৃক উৎপীড়িত ও সোনারগাঁওয়ে নির্বাসিত) আনিয়ে সংবধনা করছেন। স্মরণ্য গণেশের দ্বিতীয়বার রাজত্বের সময় যে নূর কুৎব আলমের মৃত্যু হয়েছিল, এই ধারণার সমর্থন ‘রিয়াজ’ থেকেও পাওয়া যাচ্ছে। নূর কুৎব আলমের যে চিঠিটি আগে উদ্ধৃত হয়েছে, সেটি জলালুদ্দীনের প্রথমবার সিংহাসনে আরোহণের কিছু পরেই রচিত। এই চিঠিতে নূর কুৎবের নৈরাশ্য ও ক্ষোভ চরমে পৌঁছেছে। যতদূর মনে হয়, ৮১৮ হিজরার কোন এক সময়ে এই চিঠিটি লেখবার কিছু পরেই নূর কুৎব আলম ভগ্নহৃদয়ে প্রাণত্যাগ করেন। রাজা গণেশও এই শক্তিশালী দরবেশের মৃত্যুতে নিষ্ফটক হন এবং পুত্রকে অপসারিত করে নিজের মস্তকে রাজমুকুট ধারণ করেন। এই সময়ে গণেশের পক্ষে সিংহাসনে বসবার অল্পকূল সুযোগ যে অল্প দিক থেকেও এসেছিল, তার স্পষ্ট আভাস নূর কুৎব আলমের চিঠিতেই পাওয়া যায়; ঐ চিঠির শেষাংশে তিনি বলেছেন, “লক্ষণ যা দেখা যাচ্ছে, তাতে আমাদের কাছে কোন সাহায্য আসবার কিছুমাত্র সম্ভাবনা নেই।” এর থেকেই বোঝা যায় যে, বহিঃশত্রুর আক্রমণের সম্ভাবনা থেকে গণেশ এই সময় সম্পূর্ণ মুক্ত ছিলেন। কীভাবে তিনি এই নিরাপত্তা অর্জন করেছিলেন তা স্পষ্টভাবে জানা যাচ্ছে না, অল্পমানে বলা যায় যে, গণেশ প্রায় দু’বছর জলালুদ্দীনকে সিংহাসনে বসিয়ে রেখে ভিতরে ভিতরে নিজের শক্তি বৃদ্ধি করেছিলেন এবং রাজ্যের সীমানা স্বরক্ষিত করেছিলেন; তাই ইব্রাহিম শর্কী বা আর কোন বহিঃশত্রুর কাছ থেকে তাঁর আর এখন কোন ভয় ছিল না। স্মরণ্য তাঁর সিংহাসনে আরোহণেরও আর কোন বাধা ছিল না। নূর কুৎব আলম পূর্বোক্ত চিঠিখানি লেখবার অল্প পরেই গণেশ সিংহাসনে আরোহণ করেছিলেন বলে মনে হয়।

গণেশের দ্বিতীয়বার সিংহাসনে আরোহণের আনুশঙ্গিক দু’টি ঘটনা ‘রিয়াজ-উস-সলাতীনে’ উল্লিখিত হয়েছে। প্রথমটি হচ্ছে জলালুদ্দীনকে তিনি শুদ্ধি করিয়ে হিন্দু করেছিলেন, দ্বিতীয়টি হচ্ছে তাঁর আদেশে নূর কুৎব

আলমের ছেলে আনোয়ারকে হত্যা করা হয়েছিল। দু'টি ঘটনাই সত্য বলে আমাদের মনে হয়। গণেশ নিজে নিষ্ঠাবান হিন্দু; অবস্থার চাপে পড়ে ছেলেকে মুসলমান হতে দিতে বাধ্য হয়েছিলেন, স্ততরাং অমূল্য স্বেচ্ছা এলে যে তিনি আবার তাকে হিন্দু করবেন, এটি সম্পূর্ণ স্বাভাবিক। উপরন্তু 'তারিখ-ই-ফিরিশ্তা'র বিবৃতিতেও 'রিয়াজ'-এর উক্তির প্রচ্ছন্ন সমর্থন আছে; ফিরিশ্তা বলেছেন, "পিতার মৃত্যুর পরে জিতমল (যহু) অমাত্যদের এবং রাজ্যের শীর্ষস্থানীয় লোকদের আহ্বান করে বললেন যে, 'আমার কাছে ইসলাম ধর্মের সত্য পরিষ্কার এবং এই ধর্ম গ্রহণ করা ভিন্ন আমার আর কোন উপায় নেই'।" এখন আমরা নিশ্চিতভাবে জানি যে, যত বা জিতমল পিতার জীবদ্দশাতেই একবার মুসলমান হয়েছিলেন। স্ততরাং মাঝে যদি তাঁর শুদ্ধি না হয়ে থাকে, তাহলে পিতার মৃত্যুর পরে এই কথা বলার কোন কারণ থাকতে পারে না। 'ফিরিশ্তা' ও 'রিয়াজ' দুই বিবরণীর উক্তি মিলিয়ে দেখে আমাদের মনে হয়, গণেশ জলালুদ্দীনের শুদ্ধি করিয়েছিলেন। শুদ্ধির প্রক্রিয়া সম্বন্ধে 'রিয়াজ'-এ বলা হয়েছে, জলালুদ্দীনকে স্বর্ণনির্মিত কতকগুলি গাভীর মুখ দিয়ে প্রবেশ করিয়ে অধোদ্বার দিয়ে নির্গত করা হয়েছিল এবং পরে স্বর্ণনির্মিত গাভীর অংশগুলি ব্রাহ্মণদের দান করা হয়েছিল। এই বর্ণনা কতদূর সত্য তা বলা যায় না। 'রিয়াজ'-এ বলা হয়েছে শুদ্ধির পরেও ইসলাম ধর্মের প্রতি জলালুদ্দীনের আকর্ষণ কিছুমাত্র শিথিল হয়নি। এই কথা সম্পূর্ণ সত্য।

'রিয়াজ-উস-সলাতীন' ও বুকাননের বিবরণীতে লেখা আছে যে রাজা গণেশ জলালুদ্দীনকে বন্দী করে রেখেছিলেন। এ কথাও সত্য বলে আমাদের মনে হয়। কারণ জলালুদ্দীন একবার পিতার বিরুদ্ধে গিয়েছিলেন। আবার হয়তো যেতে পারেন, এই আশঙ্কায় রাজা গণেশের পক্ষে তাঁকে বন্দী করে রাখা স্বাভাবিক। তাছাড়া যিনি একবার রাজা হবার স্বাদ পেয়েছিলেন, সিংহাসনচ্যুত হয়ে তিনি আবার তা ফিরে পাবার চেষ্টা করবেন, এই আশঙ্কাতেও গণেশের পক্ষে ছেলেকে বন্দী করা স্বাভাবিক। এমনও হতে পারে, জলালুদ্দীন সত্যিই আবার পিতার বিরুদ্ধাচরণ করেছিলেন, তাই তাঁকে বন্দী করা হয়েছিল।

নূর কুৎব্ আলমের ছেলে আনোয়ারকে বধ করার কথাও যে সত্য, এ কথা মনে করার কারণ, আশ্রফ্-সিম্বানীর পূর্বোক্ত একটি চিঠির এক

জায়গায় আছে, “নূর কুৎব্ আলমের ছেলেকে এবং পরিবারকে যদি হুন্সিয়ার বিধর্মীদের গ্রাস থেকে উদ্ধার করা যায়, তাহলে খুবই ভাল কাজ হবে।” নূর কুৎব্ আলমের ছেলের প্রাণ তখনই গণেশের হাতে বিপন্ন হয়েছিল। স্মরণে গণেশ যে স্বযোগ পাবা মাত্র তাঁর প্রাণবশের আদেশ দেবেন, এই ব্যাপার স্বাভাবিক। তবে এই ঘটনা যে গণেশের দ্বিতীয়বার সিংহাসনে আরোহণের পরে ঘটেছিল, সে কথা নিশ্চিত করে বলা যায় না। নূর কুৎব্ আলমের পূর্বোক্ত চিঠি গণেশের দ্বিতীয়বার সিংহাসনে আরোহণের আগেই লেখা। এর মধ্যে যে শোকের উচ্ছ্বাস দেখা যায়, তা ছেলের হত্যাকাণ্ডের দরুণ হতে পারে।

### গণেশের মৃত্যু

১৩৪০ শকাব্দের পব আর দহুজমদীনদেবের মৃত্যু পাওয়া যায় না। ঐ একই বছরে আবার মহেন্দ্রদেব ও জলালুদ্দীনের মৃত্যু পাওয়া যাচ্ছে। স্মরণে ১৩৪০ শকাব্দ বা ৮২১ হিজরা বা ১৪১৮ খ্রীষ্টাব্দের কোন এক সময়ে যে গণেশের মৃত্যু হয়েছিল এবং তারপর প্রথমে মহেন্দ্রদেব ও পরে জলালুদ্দীন সিংহাসনে আরোহণ করেছিলেন, তাতে কোন সন্দেহ নেই।

কীভাবে গণেশের মৃত্যু হল, সে সম্বন্ধে ‘রিয়াজ’-রচয়িতা বলেছেন, “কেউ কেউ বলেন, “তার (গণেশের) ছেলে, যিনি বন্দী ছিলেন, ভৃত্যদের সঙ্গে ষড়যন্ত্র করে পিতাকে হত্যা করেছিলেন।” সমসাময়িক আরবী ঐতিহাসিক ইব্ন-ই-হজরের লেখা ‘ইনবাউ’ল-গুমূ’র থেকে জানা যায় যে, গণেশের পুত্র জলালুদ্দীন গণেশকে আক্রমণ করে বধ করেছিলেন।

### অপ্রামাণিক সূত্রে রাজা গণেশ

রাজা গণেশের ইতিহাস সম্বন্ধে প্রামাণিকভাবে যা জানা যায়, সে সম্বন্ধে আমরা আলোচনা করলাম। ঈশান নাগরের ‘অদ্বৈতপ্রকাশ’, লাউড়িয়া কৃষ্ণদাসের ‘বাল্যলীলাসূত্র’, নিত্যানন্দদাসের ‘প্রেমবিলাস’ প্রভৃতি অপ্রামাণিক গ্রন্থে এবং দুর্গাচরণ সান্যালের ‘বাঙ্গালার সামাজিক ইতিহাস’ নামে গালগল্প-ভরা বইটিতে রাজা গণেশ সম্বন্ধে কতকগুলি অতিরিক্ত “সংবাদ” পাওয়া যায়। তার মধ্যে কয়েকটি নীচে উল্লেখ করছি,

(১) গণেশ বারেন্দ্র জ্ঞেয়ীর ব্রাহ্মণ ছিলেন,

- (২) তাঁর মন্ত্রী নাম ছিল নরসিংহ নাড়িয়াল,
- (৩) তাঁর সঙ্গে সীতোড়ের রাজার নিবিড় বন্ধু ছিল,
- (৪) তাঁর পুত্র যত্ন ইলিয়াস শাহী বংশের রাজকন্যা আশমানতারার প্রেমে পড়ে মুসলমান হয়েছিলেন।

এদের মধ্যে প্রথম তিনটি বিষয়ের পক্ষে কোন প্রমাণ নেই। চতুর্থ বিষয়টি ষোল আনাই মিথ্যা। গণেশের পুত্র কোন নারীর প্রেমে পড়ে মুসলমান হননি, তিনি যে কারণের জন্ত মুসলমান হয়েছিলেন, তা সম্পূর্ণ ভিন্ন; এই বইয়ের ১১২—১২০ পৃষ্ঠায় তা আলোচিত হয়েছে। ‘আশমানতারা’ নামটি নিতান্ত আধুনিক, এই নামে পঞ্চদশ শতাব্দীতে কোন মুসলমান রাজকন্যা থাকতেই পারেন না। ‘আশমানতারা’ প্রকৃতপক্ষে দুর্গাচরণ সান্যালের কল্পনার আশমানের তারা। রাজা গণেশ ও যত্ন সম্বন্ধে দুর্গাচরণ সান্যাল যা লিখেছেন, সমস্তই তাঁর বানানো, তাঁর কোনই ঐতিহাসিক ভিত্তি নেই।

### গণেশের রাজ্যের আয়তন

গণেশের রাজ্যের আয়তন যে অত্যন্ত বিশাল ছিল, তাতে কোন সন্দেহ নেই। উত্তর বঙ্গের পাণ্ডুয়া, উত্তরপূর্ব বঙ্গের সোনারগাঁও এবং দক্ষিণপূর্ব বঙ্গের চট্টগ্রাম থেকে তাঁর মুদ্রা বেবিয়েছিল, এর থেকে বোঝা যায়, উত্তর ও পূর্ববঙ্গের অধিকাংশই তাঁর রাজত্বের অন্তর্ভুক্ত ছিল। এছাড়া মধ্যবঙ্গ, পশ্চিমবঙ্গ ও দক্ষিণবঙ্গের কতকাংশও যে তাঁর রাজত্বের অন্তর্ভুক্ত ছিল, তা আলোচনা করে দেখাচ্ছি।

বিখ্যাত জীব গোস্বামী তাঁর লেখা ‘লঘু বৈষ্ণবতোষণী’র (রচনাকাল ১৪৭৬ খ্রি:) শেষে তাঁর পূর্বপুরুষদের যে পরিচয় দিয়েছেন, তার থেকে জানা যায় যে, রাজা দলুজমর্দন তাঁর বৃদ্ধপ্রপিতামহ, রূপ-সনাতনের প্রপিতামহ পদ্মনাভকে অত্যন্ত শ্রদ্ধা করতেন এবং এই পদ্মনাভ শিখরভূমি (পঞ্চকোট অঞ্চল) পরিত্যাগ করে বাংলাদেশে এসে ভাগীরথীতীরবর্তী “নবহট্টকে” এসে বসতিস্থাপন করেন। জীব গোস্বামী লিখেছেন—

“বিহায় গুণিশেখরঃ শিখরভূমিবাসসম্প্রহাঃ

সুরংসুরতরঙ্গিনীতটনিবাসপর্য্যন্তকঃ ॥

ততো দলুজমর্দনক্ষিতিপূজ্যপাদঃ ক্রমা-

দুবাস নবহট্টকে স কিল পদ্মনাভঃ কৃতী।”



[ রাজা দহুজমর্দন নিত্য ধার পাদপূজা করতেন, সেই গুণিষ্ঠে কৃতী পদ্মনাভ শিখরভূমি বাসের স্পৃহা পরিত্যাগ করে গঙ্গাতীরে বাস করতে উৎসুক হয়ে নবহট্টকে ( নৈহাটিতে ) বসতি করেছিলেন । ]

রূপ-সনাতন স্তলতান হোসেন শাহের ( ১৪৯৩—১৫১২ খ্রীঃ ) সভাসদ ছিলেন। স্তলতাং তাঁদের প্রপিতামহ পদ্মনাভকে পঞ্চদশ শতাব্দীর প্রথম দিকেই পাওয়া যাচ্ছে। অতএব যে দহুজমর্দনের মূদ্রা পাওয়া যাচ্ছে, তিনিই পদ্মনাভের পাদপূজা করতেন, তাতে কোন সন্দেহ নেই।

‘নবহট্টক’ এখনকার ‘নৈহাটি’র পূর্ব-নাম। কিন্তু বাংলা দেশে নৈহাটি নামে দু’টি জায়গা আছে; একটি কাটোয়ার উত্তরে আধুনিক সীতাহাটির কাছে নৈহাটি গ্রাম; অপরটি বর্তমান ২৪ পরগণা জেলার অন্তর্গত কুমারহট্ট-হালিশহরের দক্ষিণে অবস্থিত সুপরিচিত নৈহাটি শহর। এখন প্রশ্ন হচ্ছে কোন্ নৈহাটিতে পদ্মনাভ বসতি করেছিলেন? প্রথম নৈহাটি বর্তমানে ছোট একটি গ্রাম হলেও তার ঐতিহ্য বেশ প্রাচীন। এখানে বল্লালসেনের তাম্রশাসন পাওয়া গিয়েছিল এবং এব অনতিদূরবর্তী বামটপুর গ্রামে কৃষ্ণদাস কবিরাজের নিবাস ছিল। কিন্তু সম্প্রতি ডক্টর স্কুমার সেন একটি ছোট পুঁথিতে সংস্কৃত ভাষায় লেখা একটি রূপ-সনাতন-জীবের স্বতন্ত্র বংশপরিচয় পেয়েছেন। এর রচনাকাল ১৬২০ শক ও ১০০৪ সন ( মল্লাদ ) = ১৬২৮-২৯ খ্রীঃ, পুঁথিটির লিপিকাল ১৬২২ শক ও ১০১৩ সন ( মল্লাদ ) = ১৭০৭-০৮ খ্রীঃ।\* এতে লেখা আছে, “স চ পদ্মনাভ গঙ্গাতীরবাসলুক শিখরদেশং পরিত্যজ্য কুমারহট্ট নামা গ্রামে বাসং চকার।” যদিও এই বংশপরিচয় পরবর্তী কালের লেখা এবং কার লেখা জানা নেই, তাহলেও এর সাক্ষ্যকে অগ্রাহ্য করা চলে না, কারণ এর বিরোধী কোন প্রমাণ নেই। অতএব সিদ্ধান্ত করা যাচ্ছে, পদ্মনাভ যে নবহট্টকে বসতি স্থাপন করেছিলেন, তা বর্তমান ২৪ পরগণা জেলার অন্তর্গত

---

\* বাঙ্গালা সাহিত্যের ইতিহাস, ১ম খণ্ড, ৩য় সং, পূর্বার্ধ, পৃঃ ৩০২-৩০৩। ডঃ সেনের মতে বংশপরিচয়টির রচনাকাল ১৫৩২ শক, কিন্তু ১৫৩২ শক জীব গোপামীর মৃত্যু-শক হিসাবে এতে উল্লিখিত ( পৃঃ ৩০৩ দৃঃ )—রচনাকাল হিসাবে নয়। ডঃ সেন পুঁথির যে কটো প্রকাশ করেছেন ( ৩০৩ পৃঃর আগে ) তাতে ১৬২০ শক ও ১৬২২ শক দুই তারিখই আছে, শেষেরটি অস্পষ্ট ( কটোর ডান দিকের নীচের অংশ দ্রষ্টব্য )। প্রথমটি রচনাকালের তারিখ, শেষেরটি পুঁথির লিপিকালের। ২৬।১।৫৭ তারিখে আমি পুঁথিটি চাক্ষুষ করেছিলাম, তখন শেষ তারিখটি শকে ও সনে স্পষ্ট করে লেখা ছিল।

নৈহাটি। পদ্মনাভ রাজা দহুজমর্দনের বিশেষ অধ্বাভাজন ছিলেন। স্মতরাং তিনি শিখরভূমি ছেড়ে এসে বাংলাদেশের যে অঞ্চলে বসতি স্থাপন করেন, তা যে দহুজমর্দনের রাজ্যের অন্তর্ভুক্ত ছিল, সে বিষয়ে সন্দেহের অবকাশ নেই। অতএব অন্তত নৈহাটি পর্যন্ত ভাগীরথীর পূর্বতীরবর্তী অঞ্চল গণেশের রাজ্যের অন্তর্ভুক্ত ছিল বলে স্থির করা যায়।

দক্ষিণবঙ্গের কতকাংশও যে গণেশের রাজ্যের অন্তর্ভুক্ত ছিল, তার প্রমাণ আছে। ৮২১ হিজরা পর্যন্ত পশ্চিমবঙ্গের সাতগাঁও, উত্তরবঙ্গের পাণ্ডুয়া, পূর্ব-বঙ্গের সোনারগাঁও ও মুয়াজ্জমাবাদ ভিন্ন অল্প কোন জায়গার টাকশাল থেকে জলালুদ্দীন, দহুজমর্দনদেব বা মহেন্দ্রদেবের মুদ্রা বেরোয়নি। কিন্তু ৮২১ হিজরা থেকে ফতেহাবাদ নামে আর একটি জায়গার টাকশাল থেকেও জলালুদ্দীনের মুদ্রা বেরোতে দেখা যাচ্ছে। ফতেহাবাদ ফরিদপুরেরই প্রাচীন নাম। পঞ্চদশ শতাব্দীতে দ্বিতীয় কোন ফতেহাবাদ ছিল বলে জানা যায় না।\* ৮২১ হিজরার বেশীর ভাগ সময়েই দহুজমর্দনদেব ও মহেন্দ্রদেব এবং শেষের দিকে খুব অল্প সময়ের জন্য জলালুদ্দীন রাজত্ব করেছিলেন। স্মতরাং ফতেহাবাদের যে টাকশাল থেকে ৮২১ হিজরার একেবারে শেষের দিকে জলালুদ্দীনের মুদ্রা বেরিয়েছিল, তার প্রতিষ্ঠা নিশ্চয়ই অন্তত ৮২১ হিজরার মাঝামাঝি সময়ে হয়েছিল এবং ঐ সমস্ত অঞ্চল তারও আগে গৌড়-রাজ্যের অধীনে এসেছিল। ৮২১ হিজরার মাঝামাঝি অবধি গণেশ বা দহুজমর্দনদেব ক্ষমতায় অধিষ্ঠিত ছিলেন। স্মতরাং ফতেহাবাদ সমেত দক্ষিণবঙ্গের কতকাংশ যে গণেশের রাজ্যের অন্তর্ভুক্ত ছিল, তাতে কোন সন্দেহ নেই। দক্ষিণবঙ্গের খুলনা জেলায় দহুজমর্দনদেবের মুদ্রা মেলাতে এই সিদ্ধান্ত সমর্থিত হচ্ছে। আর একটি জিনিস দেখতে হবে। বাকলা-চন্দ্রদ্বীপ অঞ্চল ফতেহাবাদের কাছেই। আগে আমরা অনুমান করে এসেছি, গণেশ-দহুজমর্দনের কিঞ্চিৎ পরবর্তী কালে

১. আলোচ্য সময়ের প্রায় ১০০ বছর পরে ষোড়শ শতাব্দীর প্রথম পাদে হোসেন শাহের রাজত্বকালে যুবরাজ নসরৎ শাহ চট্টগ্রাম অঞ্চল জয় করে চট্টগ্রামের অদূরবর্তী একটি শহরের নাম ফতেহাবাদ রাখেন—এই কথা ‘তারিখ-ই-হামিদী’ নামে একটি ফার্সী বইয়ে পাওয়া যায়। অবশ্য ‘তারিখ-ই-হামিদী’ ঊনবিংশ শতাব্দীর দ্বিতীয়ার্ধে রচিত বলে এর উক্তির খুব বেশী মূল্য নেই; কিন্তু চট্টগ্রামের নিকটবর্তী ফতেহাবাদের নামকরণ সম্বন্ধে যে কিংবদন্তী এর মধ্যে লিপিবদ্ধ হয়েছে তার বিরোধী কোন প্রমাণ না পাওয়া পর্যন্ত ঐ নামের ইতিহাস ষোড়শ শতাব্দীর চেয়ে প্রাচীনতর বলে গণ্য করা যায় না।

বাকলা-চন্দ্রদ্বীপ অঞ্চলের রাজা দহুজমর্দন আবির্ভূত হয়েছিলেন। এর থেকেও অনুমান করা যেতে পারে এই অঞ্চল গণেশ দহুজমর্দনের রাজ্যের অন্তর্ভুক্ত ছিল, তাই এখানকার পরবর্তী এক রাজা এই নামটিই গ্রহণ করতে উৎসাহিত হয়েছিলেন।

ভাগীরথীর পশ্চিম দিকের অঞ্চলে গণেশের কোন অধিকার ছিল বলে এখনও কোন প্রমাণ পাওয়া যায়নি। এই অঞ্চলের অন্তর্ভুক্ত সাতগাঁও-তে পঞ্চদশ শতাব্দীর প্রথমে একটি চালু টাকশাল ছিল। সাতগাঁও-এর টাকশালে উৎকীর্ণ দহুজমর্দনদেবের কোন মুদ্রা এ পর্যন্ত পাওয়া যায়নি। এর থেকে মনে হয়, ভাগীরথীর পশ্চিমে গণেশের অধিকার বিস্তৃত হয়নি। পদ্মনাভের বসতিস্থান নবহট্টক যে ভাগীরথীর পশ্চিমতীরবর্তী কাটোয়ার নিকটবর্তী নৈহাটি নয়, তা এর থেকেও বলা যেতে পারে।

আমরা দেখতে পাচ্ছি, প্রায় সারা বাংলাই গণেশের অধীনে ছিল। আগেই দেখানো হয়েছে, ১৪১০ খ্রীষ্টাব্দের অল্প কিছু পরেই গণেশ কাষত বাংলার রাজা হয়ে বসেন এবং ১৪১৮ খ্রীষ্টাব্দের মাঝামাঝি সময় পর্যন্ত তিনি ক্ষমতায় অধিষ্ঠিত ছিলেন। অতএব পঞ্চদশ শতাব্দীর দ্বিতীয় দশকের অধিকাংশ সময়ই তিনি বাংলা শাসন করেছিলেন বলা চলে।

### গণেশের চরিত্র

রাজা গণেশের চরিত্র সম্বন্ধেও সংক্ষেপে আলোচনা করা যেতে পারে। বাংলাদেশে মুসলমানদের একচ্ছত্র আধিপত্যের যুগে যিনি সারা বাংলা অধিকার করে হিন্দু-শাসন প্রতিষ্ঠা করেছিলেন, তিনি যে অসামান্য লোক এবং দুর্জয় ব্যক্তিত্বের অধিকারী ছিলেন, তাতে কোন সন্দেহ নেই। বেভারিজ বলেছেন, “Raja Kūns is the most interesting figure among the kings of Bengal. We feel that this obscure Hindu, who rose to supreme power in Bengal, and who for a time broke the bonds of Islam, must have been a man of vigour and capacity.” অন্যান্য ঐতিহাসিকেরাও গণেশের ব্যক্তিত্ব সম্বন্ধে বিন্দুমুদ্র প্রশংসাবাদী উচ্চারণ করেছেন।

গণেশ একজন জন্মগত প্রতিভাসম্পন্ন কুশাগ্রবৃদ্ধি কূটনীতিজ্ঞ ছিলেন। ইব্রাহিম শকী যখন বাংলাদেশ আক্রমণ করলেন, তখন তিনি প্রতিরোধ

নিফল বুঝে নিজের অধিকার ছেড়ে সরে দাঁড়ালেন, তাঁর পুত্র ধর্মাস্থিত হয়ে বাংলার সিংহাসনে আরোহণ করলেন। কিন্তু ইব্রাহিম চলে গেলেই তিনি আবার আত্মপ্রকাশ করে পুত্রের কাছ থেকে সমস্ত ক্ষমতা কেড়ে নিয়ে পুনঃপ্রতিষ্ঠিত হলেন। এর থেকে তাঁর তীক্ষ্ণ কূটনীতিজ্ঞানের পরিচয় মেলে। ইব্রাহিম শকীর সামরিক শক্তি ও নূর কুৎব্ আলমের নামডাক গণেশের তুলনায় অনেক বেশী ছিল বটে, কিন্তু কূটনৈতিক বুদ্ধিতে যে গণেশ তাঁদের অনেক উপরে, তা এই ব্যাপার থেকেই প্রমাণ হচ্ছে। তাঁদের সমবেত বিরোধিতা সত্ত্বেও তাই গণেশের বিশেষ কোন অধিষ্টি হয় নি। তবে গণেশের কূটনীতিজ্ঞানের প্রশংসা করা সত্ত্বেও আমরা তাঁকে আদর্শ বীর বলব না; সে দিক দিয়ে শিবসিংহকে আদর্শ বীর বলতে পারি। তিনি প্রধানত গণেশের ভুলেই ইব্রাহিমের মত প্রবল প্রতিপক্ষের সঙ্গে যুদ্ধ করে নিজে শোচনীয় পরিণাম বরণ করেছিলেন।

গণেশের ধর্ম-রক্ষণীয় নীতি বিষয়ভাবে আলোচ্য। তিনি নিজে ঈশ্ঠাবান হিন্দু ছিলেন। মুদ্রাতে ‘চণ্ডীচরণপরায়ণশ্রু’ লেখা এবং ব্রাহ্মণ পদ্মনাভের চরণপূজা করা থেকে তা বোঝা যায়। নূর কুৎব্ আলমের চিঠি থেকেও বুঝতে পারা যায় যে, ক্ষমতায় অধিষ্ঠিত থাকার সময় গণেশ সর্বপ্রকারে হিন্দু ধর্ম ও হিন্দু সংস্কৃতির পুনরুদয় ঘটাইচ্ছিলেন।

এই হিন্দু রাজা বাংলার মুসলমান জনসাধারণের প্রতি কীরকম ব্যবহার করতেন, তা জানতে বিশেষ কৌতূহল হয়। তাঁর সমসাময়িক দরবেশ নূর কুৎব্ আলম ও আশ্রফ সিন্ধানী তাঁদের চিঠিতে লিখেছেন তিনি মুসলমানদের উপর অকথ্য নির্যাতন করেছিলেন। গণেশের প্রতিপক্ষ ইব্রাহিম শকীর দেশের লোকের লেখা ‘সঙ্গীতশিরোমণিতে গণেশকে আগুনের সঙ্গে তুলনা করা হয়েছে এবং বলা হয়েছে, এই আগুনে মুসলমানেরা পতঙ্গের মত পুড়ে মরেছিল। কিন্তু মনে রাখতে হবে, এগুলি গণেশের শত্রুপক্ষের উক্তি। গণেশের সঙ্গে এক শ্রেণীর মুসলমানের তীব্র বিরোধ হয়েছিল সন্দেহ নেই, কিন্তু এই বিরোধের জগ্রে সম্ভবত তাঁর প্রতিপক্ষেরাই দায়ী। ‘রিয়াজ-উ-স-সলাতীন’ এবং বুকাননের বিবরণীতে পাওয়া যায় যে, বদর-উল-ইসলাম গণেশকে অপমান করাতেই বিরোধ ঘনীভূত হয়ে উঠেছিল। নূর কুৎব্ আলম ও আশ্রফ সিন্ধানীর চিঠিতে এই সব কথা পাওয়া যায় না। কিন্তু তাঁদের হিন্দুবিদ্বেষ যে কত প্রচণ্ড ছিল তা বোঝা যায় যখন দেখি তাঁরা

তৈমুরলঙ্গকে কাফেরদের দমনকারী এবং মুসলমানদের জাগতিক বলে প্রশংসা করেছেন ; অথচ এঁদের জীবৎকালেই তৈমুরলঙ্গ ভারত আক্রমণ করে নৃশংসতার চূড়ান্ত পরিচয় দিয়ে গিয়েছেন। এই শ্রেণীর হিন্দুবিদ্বেষ্টারা গণেশের প্রাধান্যলাভে রুষ্ট হয়ে প্রথম থেকেই তাঁর বিরোধিতা করেছিলেন, ফলে গণেশও বাধ্য হয়ে তাঁদের দমন করেছিলেন বলে মনে হয়। অবশ্য নূর কুৎব্ আলম যে ভাবে গণেশের অত্যাচার বর্ণনা করেছেন, তাকে সম্পূর্ণ সত্য বলে গ্রহণ করলে ভুল করা হবে। ইব্রাহিম শকীকে উত্তেজিত করার জগ্গাই নূব কুৎব্ আলম—কয়েকজন প্রতিপক্ষের উপরে গণেশ যে দমননীতি প্রয়োগ করেছিলেন তাকে অতিরঞ্জিত বরে এইভাবে দাঁড় করিয়েছেন সন্দেহ নেই। গতরাং গণেশ যে মুসলমানদের উপর অত্যাচার করেছিলেন, তাঁর শত্রুপক্ষের উক্তি থেকেই সেই সিদ্ধান্ত করলে তাঁর উপর অবিচার করা হবে। এই সমস্ত উক্তি থেকে কেবলমাত্র এইটুকু বোঝা যায় যে গণেশ তাঁর বিরুদ্ধবাদীদের মধ্যে কয়েকজনকে শাস্তি দিয়েছিলেন।

‘রিয়াজ-উস-সলাতীন’, বৃন্দাননের ব্যবহৃত পুঁথি এবং মুন্সী তকিয়্যার বয়াজেও গণেশের মুসলমানদের প্রতি অত্যাচারের কথা আছে। এই সমস্ত সূত্রের লেখকরা গণেশের শত্রুপক্ষের উক্তির দ্বারা প্রভাবিত হয়েছিলেন বলে মনে হয়। কারণ এগুলির মধ্যে, বিশেষত ‘রিয়াজ-উস-সলাতীনে’ গণেশের প্রতি একটা বিদ্বেষের ভাব লক্ষ্য করা যায়।

যে সব মুসলমান গণেশের বিরোধিতা করে নি, গণেশ তাঁদের উপর কোন রকম অত্যাচার করেছিলেন বলে মনে হয় না। কারণ গণেশ সহজাত প্রতিভাসম্পন্ন কুশলী রাজনীতিক ছিলেন সন্দেহ নেই। তিনি মুসলমান প্রজাদের প্রতি অহেতুক অত্যাচার করে অযথা সমস্তা সৃষ্টি করবেন বলে মনে হয় না, মানবতার প্রগ্ন ছেড়েই দিলাম। মুসলমানদের প্রতি গণেশের আচরণ সম্বন্ধে ফিরিশ্তা বলেছেন, “যদিও রাজা কান্স মুসলমান ছিলেন না, তাহলেও তিনি মুসলমানদের সঙ্গে এতগামি বন্ধুত্ব ও আন্তরিকতার সম্পর্ক বজায় রেখেছিলেন যে, তাঁর মৃত্যুর পরে কোন কোন মুসলমান তাঁকে মুসলমান বলে ঘোষণা করে ইসলামের প্রথা অনুযায়ী কবর দিতে চেয়ে-ছিলেন।” অবশ্য ফিরিশ্তার অগ্রাশ্র উক্তির মত এই উক্তিও অতিরঞ্জন-দোষে দুষ্ট। কিন্তু এই উক্তির যে একেবারে কোনই ভিত্তি নেই, তা’ও বিনা প্রমাণে বলা চলে না। এই উক্তির মধ্যে অন্তত একটু সত্য আছে

বলেই মনে হয়। সেটুকু এই,—গণেশের কিছু কিছু মুসলমান বন্ধুও ছিলেন, যারা তাঁর সঙ্গে সহযোগিতা করতেন এবং তিনিও তাঁদের সঙ্গে পরিপূর্ণ সদ্ভাব ও সস্ত্রীতি রক্ষা করে চলতেন। অবশু ফিরিশ্তার উক্তি থেকে অনেক সিদ্ধান্ত করেছেন যে গণেশকে হিন্দু ও মুসলমানেরা সমানভাবে ভালবাসতেন এবং গণেশ বাংলার মুসলমান সম্প্রদায়ের পরিপূর্ণ সমর্থন লাভ করে ক্ষমতায় অধিষ্ঠিত হয়েছিলেন। এই ধারণা সত্য বলে আমার মনে হয় না। কারণ ঐ যুগের মুসলমান সম্প্রদায়ের (যে কোন সম্প্রদায়েরই) মধ্যে এতখানি উদারতা আশা করা যায় না। আসল কথা, গণেশ তাঁর বিপুল সামরিক শক্তির বলেই ক্ষমতা অধিকার করেছিলেন এবং তাঁর সাফল্যের প্রধান কারণ তাঁর ব্যক্তিত্ব, যে ব্যক্তিত্ব কোটিতে একজনেরও দেখা যায় কিনা সন্দেহ। এই ব্যক্তিত্বের বলেই তিনি অসম্ভবকে সম্ভব করেছিলেন,—অবিচ্ছিন্ন মুসলিম শাসনের মধ্যে কয়েক বছর বাংলায় হিন্দু রাজত্বের প্রতিষ্ঠা করেছিলেন। এক্ষেত্রে তাঁর বাংলার মুসলমান সম্প্রদায়ের সঙ্গে আপোষ করার দরকার হয় নি। গণেশের হিন্দু উত্তরাধিকারীদের মধ্যে তাঁর ব্যক্তিত্বের কণামাত্রও ছিল না, তাই তাঁর মৃত্যুর অল্প কয়েক মাসের মধ্যেই বাংলায় হিন্দু রাজত্বের অবসান হয়েছিল।

ফিরিশ্তা গণেশকে দক্ষ স্থপতি বলেছেন। তাঁর কথায় গণেশ “মাধ্যম রাজমুকুট ধারণ করে এবং ছত্র প্রভৃতি রাজকীয় প্রতীকচিহ্নে ভূষিত হয়ে পরিপূর্ণ প্রাধান্যের সঙ্গে অত্যন্ত চমৎকারভাবে সাত বছর রাজত্ব করেছিলেন।”

গণেশ সাহিত্য ও বিচার পৃষ্ঠপোষক ছিলেন বলে অনেকে মনে করেন। কিন্তু এ সম্বন্ধে কোন প্রমাণ পাওয়া যায় না। বাংলা রামায়ণের রচয়িতা কৃত্তিবাস তাঁর কাছে সংবর্ধনা পেয়েছিলেন বলে অনেকে অভিমত পোষণ করেন, কিন্তু আমার লেখা ‘কৃত্তিবাস-পরিচয়’ বইয়ে আমি প্রমাণ করার চেষ্টা করেছি, কৃত্তিবাস যে গোড়েশ্বরের সভায় গিয়েছিলেন, তিনি গণেশ নন, ককহুদ্দীন বারবক শাহ।

পাণ্ডুরা এবং গোড়ে যে সমস্ত স্থাপত্যকীর্তি বর্তমান ছিল বা আছে, তাদের মধ্যে কয়েকটি রাজা গণেশ কর্তৃক নিমিত্ত বলে পণ্ডিতেরা অনুমান করেন। এদের মধ্যে সর্বপ্রথমে পাণ্ডুরার একলাখী প্রাসাদের নাম উল্লেখযোগ্য। সৌন্দর্যের দিক দিয়ে এই প্রাসাদটি অতুলনীয়। এর স্থাপত্যকীর্তি থেকে অনুমান করা যায় যে, পঞ্চদশ শতাব্দীর প্রথমদিকে এই প্রাসাদটি তৈরী

হয়েছিল। এসম্বন্ধে আবিদ আলী লিখেছেন, “The architecture of this building is of the usual Indo-Saracenic style, and the period seems to be about that of Jalāluddīn’s reign. Possibly it was built by his father, Rājā Kūns.” (Memoirs of Gaur and Pandua, p. 126 দ্রষ্টব্য)।

প্রায় সাড়ে চারশো বছরের পুরোনো এই প্রাসাদটি এখনও মোটামুটি অক্ষত অবস্থায় রয়েছে। এটি প্রায় আগাগোড়াই ইট দিয়ে তৈরী। এই প্রাসাদটির মাথায় একটিমাত্র বিশাল গোলাকৃতি গম্বুজ আছে। একলাখী প্রাসাদ তৈরী করতে নাকি একলাখ টাকা খরচ হয়েছিল (তখনকার দিনের তুলনায় যা অত্যধিক), তাই এর এরকম নাম। প্রাসাদটি বিরাট এবং অত্যন্ত সুন্দর, এটি সে যুগের স্থাপত্যশিল্পের একটি উজ্জল নিদর্শন। আবিদ আলী এটিকে “handsomest building in the place” বলেছেন। আবিদ আলী মনে করেন রাজা গণেশই এই প্রাসাদ তৈরী করিয়েছিলেন। স্থানীয় প্রবাদও এই মতের পোষকতা করে। প্রাসাদটির মধ্যে হিন্দু ও বৌদ্ধ স্থাপত্যের বহু নিদর্শন আছে; এর প্রধান প্রবেশদ্বারের শীর্ষে দেবতা গণেশের মূর্তি ক্ষোদিত। এই কারণেই মনে হয় হিন্দু রাজা গণেশ এই প্রাসাদটি নির্মাণ করিয়েছিলেন। অবশ্য মুসলমানদের নিমিত্ত যে সব প্রাসাদ বা মসজিদ ভাঙা হিন্দু মন্দিরের উপকরণে তৈরী, সেগুলির দেওয়ালেও কোন কোন সময় হিন্দু দেবমূর্তি থেকে যেত। কিন্তু মুসলমানরা প্রাসাদ-মসজিদ নির্মাণের সময় হিন্দু দেব-মূর্তিগুলিকে হয় ঘসে তুলে দিতেন, না হয় বিকৃত করতেন, নয় তো উল্টো করে বসাতেন। একলাখী প্রাসাদে গণপতির মূর্তিকে ঘেরকম সম্মানে প্রধান প্রবেশদ্বারের উপরে বসানো হয়েছে, তার থেকে মনে হয় প্রাসাদটি হিন্দুরই নিমিত্ত। আবিদ আলী ঠিকই লিখেছেন, “Over the entrance door is a lintel with a Hindu idol carved on it, and round the doorway are other stones on which may be detected partial representations of the human figure : the original carvings must therefore have been of Hindu origin.”

‘রিয়াজ-উল-সলাতীনে’ রয়েছে, রাজা গণেশ একদিন এমন একটি ঘরে বসেছিলেন, যার দরজার উচ্চতা খুব কম; মাথা হেঁট না করে সেই দরজা

দিয়ে ঢোকবার উপায় নেই ; দরবেশ শেখ বদ্-উল্-ইসলাম কাফেরের কাছে মাথা হেঁট করতে রাজী না হওয়ায় ঐ দরজা দিয়ে প্রথমে পা ঢুকিয়ে তারপর ঘর ঢুকেছিলেন। একলাখী প্রাসাদের প্রধান দরজাটি অবিকল এই ধবনের। এই সব থেকে মনে হয় রাজা গণেশই এই প্রাসাদটি তৈরী করিয়েছিলেন। তাই যদি হয়, তাহলে এর থেকে তাঁর আড়ম্বরপ্রিয়তা ও শিল্পানুরাগের পরিচয় পাওয়া যাবে। এই প্রাসাদটির মধ্যে তিনটি সমাধি রয়েছে, ‘রিজ-উন্-সলাতীনে’র মতে এই সমাধি তিনটি সুলতান জলালুদ্দীন মুহম্মদ শাহ এবং তাঁর স্ত্রী ও পুত্রের।

পাণ্ডুর বিখ্যাত আদিনা মসজিদকে রাজা গণেশ তাঁর কাছারী-বাড়ীতে পরিণত করেছিলেন বলে প্রবাদ আছে। ইতিপূর্বে আমরা সিকন্দর শাহ সংক্রান্ত অধ্যায়ে ( পৃ: ৫৪-৫৫ ) এ সম্বন্ধে আলোচনা করেছি এবং দেখিয়েছি যে এই প্রবাদ সত্য হওয়া অসম্ভব নয়।

গোড়ে ‘যতে থানের সমাধি-ভবন’ নামে পরিচিত যে ছোট বাড়ীটি আছে, সেটি সম্ভবত মূল একটি হিন্দু মন্দির ছিল ; কোন হিন্দু রাজা এটি তৈরী করিয়েছিলেন বলে মনে হয়। এসম্বন্ধে আবিদ আলী লিখেছেন, “It seems to the author that the building is of the time of the Hindu Kings (possibly Rājā Kāns) and that it was used for a temple. An arrangement for hanging a chain and bell by an iron hook in the central part of the ceiling is still visible and the building itself lies north to south. There are door openings on three sides only. From all these facts it may be concluded that a Hindu God was worshipped here.” স্মরণীয় যতদূর মনে হয়, মুসলিম যুগের হিন্দু গোড়েশ্বর রাজা গণেশই এই ভবনটি তৈরী করিয়েছিলেন।



## দ্বিতীয় পরিচ্ছেদ রাজা গণেশের বংশ

### মহেন্দ্রদেব কে ?

১৩৪০ শকাব্দের পর আর দহুজমর্দনদেবের মুদ্রা পাওয়া যায়নি। ঐ বছরেই মহেন্দ্রদেব নামে আর একজন রাজার মুদ্রা পাওয়া যাচ্ছে। তাঁর মুদ্রাগুলি দহুজমর্দনদেবেরই মত ; তাদেরও এক পিঠে তাঁর নাম এবং অপব পিঠে ‘চণ্ডীচরণপরায়ণশ্র’ লেখা আছে এবং এইগুলি পাওয়া শু চাটগাঁও-এর টাকশালে তৈরী হয়েছিল।

এর থেকে বোঝা যায়, মহেন্দ্রদেব দহুজমর্দনদেবের উত্তরাধিকারী এবং সম্ভবত ছেলে। আমরা গণেশের একজন ছেলের কথাই জানি, তিনি যহু বা জলালুদ্দীন। মহেন্দ্রদেবের ঠিক পরেই আবার তাঁর মুদ্রা পাওয়া যাচ্ছে।

এর থেকে কেউ কেউ মনে করেছেন, মহেন্দ্রদেব শু জলালুদ্দীন অভিন্ন লোক ; জলালুদ্দীন নতুনভাবে ইসলাম ধর্মে দীক্ষিত হবার আগে কিছুদিন মহেন্দ্রদেব নামে মুদ্রা প্রকাশ করেছেন। কিন্তু এই মত গ্রহণযোগ্য বলে মনে হয় না। কারণ জলালুদ্দীনের ইসলাম ধর্মের প্রতি নিষ্ঠা অত্যন্ত মুসলমানের চেয়ে অনেক বেশী ছিল (এ সম্বন্ধে পরে আলোচনা দ্রষ্টব্য)। তিনি যে কিছু সময়ের জন্য মুদ্রাতে ‘চণ্ডীচরণপরায়ণশ্র’ বলে নিজের পরিচয় দেবেন, এ কথা বিশ্বাস করা যায় না। পিতার মৃত্যুর সঙ্গে সঙ্গেই যে জলালুদ্দীন ইসলাম ধর্মের প্রতি নিষ্ঠার পরিচয় দিয়েছেন, এ সম্বন্ধে ‘ফিরিশ্তা’ ও ‘রিয়াজ’ এক মত। এই কারণে মনে হয়, মহেন্দ্রদেব গণেশের ছেলে ; কিন্তু জলালুদ্দীন নয়, অথবা আর এক ছেলে।\* এখন কোন সূত্র থেকে গণেশের দ্বিতীয় কোন পুত্রের কথা জানা যায় কিনা দেখি। ‘তারিখ-ই-ফিরিশ্তা’য় গণেশের মৃত্যুর পরবর্তী ঘটনার যে বিবরণ দেওয়া আছে, তাতে গণেশের দ্বিতীয় পুত্রের উল্লেখ রয়েছে। শুধু তাই নয়, গণেশের মৃত্যুর পর

\* এইচ এস স্টেপলটন স্বপ্রথম এই মত প্রতিষ্ঠা করেন (J. A. S. B., Vol. XXVI, 1930, N. S., pp. 12-13 দ্রষ্টব্য)। অর্চাণ বহুনাথ সরকারও এই মত সমর্থন করেছেন (History of Bengal, Vol. II, p. 122 দ্রষ্টব্য)।

তার সিংহাসনে আরোহণের স্বপ্নষ্ট ইঙ্গিতও আছে। ‘ফিরিশ্তা’র বিরতিটি নীচে উদ্ধৃত হল,—

“পিতার মৃত্যুর পরে জিৎমল অমাত্যদের এবং রাজ্যের অগ্র সব নীর্বাহনীয় লোকদের আহ্বান কবে বললেন, ‘ইসলাম ধর্মের সত্য আমার কাছে পরিষ্কার, তাকে গ্রহণ করা ভিন্ন আমার কোন উপায় নেই। তোমরা যদি আমাকে মানো এবং আমার সার্বভৌমতা অস্বীকার না কর, তাহলেই আমি এই পবিত্র সিংহাসনে পদার্পণ করব। নয়ত আমার ছোট ভাই রাজা হোঙ্ক, আমাকে ক্ষমা কর।’ সমস্ত রাজপুরুষ তখন একবাক্যে ঘোষণা করলেন, ‘আমরা বাজাকে কেবল জাগতিক ব্যাপারে অনুসরণ করি, (তার) ধর্মের সঙ্গে আমাদের কোন সম্পর্ক নেই।’ তখন জিৎমল লখনৌতির শিক্ষিত ও গণ্যমান্য লোকদের আমন্ত্রণ করে এনে কল্মা উচ্চারণ করলেন এবং জলালুদ্দীন উপাধি নিয়ে সিংহাসনে আরোহণ করলেন।”

‘ফিরিশ্তার’ এই বিরতির মধ্যে অতিরঞ্জন অত্যন্ত স্বপ্নষ্ট। এর মধ্যে জলালুদ্দীনকে অতিমাত্রায় নিঃস্বার্থপরায়ণ করে দেখানো হয়েছে এবং গণেশের অমাত্যদের (যাদের মধ্যে নিশ্চয়ই অনেকে হিন্দু) অতিমাত্রায় উদার ও অসাম্প্রদায়িক মনোভাবসম্পন্ন করে তোলা হয়েছে। ‘ফিরিশ্তা’র এই বিরতির সঙ্গে মহেন্দ্রদেবের মৃদাব সাক্ষা মিলিয়ে নিলে আমাদের এই সিদ্ধান্তটী করতে হয় যে, মহেন্দ্রদেব জলালুদ্দীনের ছোট ভাই। গণেশের মৃত্যুর পরে তিনি সিংহাসনে অভিষিক্ত হয়েছিলেন; কিন্তু জলালুদ্দীন রাজ্যের বহু ক্ষমতাশালী লোককে নিজের দলে ভিড়িয়ে অল্প সময়ের মধ্যেই তাঁকে অপসারিত করে সিংহাসন পুনরধিকার করেন। ‘ফিরিশ্তা’ যে কাহিনীটি লিপিবদ্ধ করেছেন, তা জলালুদ্দীনের তরফের বিরতি। এর মধ্যে ছোট ভাইকে অপসারিত করে জলালুদ্দীনের সিংহাসন পুনরধিকারের ব্যাপারটি একটু ঘুরিয়ে মনোহর ভঙ্গীতে পরিবেশন করা হয়েছে। এর মধ্যে বলতে চাওয়া হয়েছে জলালুদ্দীনের কোন দোষ নেই, তিনি তো ছোট ভাইকে সিংহাসন ছেড়ে দিতেই চেয়েছিলেন, কিন্তু হিন্দু-মুসলমান নির্বিশেষে সমস্ত অমাত্য তাঁকে ছাড়তে রাজী না হওয়ায় তিনি সিংহাসনে বসেছেন ইত্যাদি। মোটের উপর, মহেন্দ্রদেব যে গণেশের দ্বিতীয় পুত্র, সে সম্বন্ধে উপরে বর্ণিত বিষয়গুলি মিলিয়ে দেখলে সন্দেহ থাকে না বলেই মনে হয়।

মহেন্দ্রদেবের কেবলমাত্র ১৩৪০ শকাব্দেরই মৃত্যু পাওয়া গেছে; কিন্তু

১৩৪০ শকাব্দেরই প্রথমাংশে তাঁর পিতা দম্ভজমর্দনদেব বাজত্ব করে গিয়েছেন। এদিকে জলালুদ্দীনেরও ৮২১ হিজরার মুদ্রা পাওয়া যাচ্ছে। ১৩৪০ শকাব্দ = ১৪১৮ খ্রীষ্টাব্দের এপ্রিল থেকে ১৪১৯ খ্রীষ্টাব্দের এপ্রিল এবং ৮২১ হিজরা = ১৪১৮ খ্রীষ্টাব্দের ৮ই ফেব্রুয়ারী থেকে ১৪১৯ খ্রীষ্টাব্দের ২৭শে জাম্মায়া। অতএব দেখা যাচ্ছে, ১৩৪০ শকাব্দের তিন-চতুর্থাংশ শেষ হবার আগেই মহেন্দ্রদেবের রাজত্ব শেষ হয়ে জলালুদ্দীনের রাজত্ব শুরু হয়েছে। মহেন্দ্রদেবের রাজত্বকাল যে কত সংক্ষিপ্ত হয়েছিল, তা এর থেকে বোঝা যায়। ১৪১৮ খ্রীষ্টাব্দের এপ্রিল থেকে ১৪১৯ খ্রীষ্টাব্দের জাম্মায়া—মাত্র এই নয় মাসের মধ্যে দম্ভজমর্দনদেব, মহেন্দ্রদেব ও জলালুদ্দীন—এই তিনজন রাজাটি রাজত্ব করেছিলেন।

### জলালুদ্দীনের দ্বিতীয় দফার রাজত্ব

৮২১ হিজরার শেষের দিকে জলালুদ্দীন সিংহাসন পুনরধিবার করেন এবং ৮৩৬ হিজরা অবধি রাজত্ব করেন।

মুসলমান ঐতিহাসিকরা শাসক হিসাবে জলালুদ্দীনের উচ্ছৃঙ্খলিত প্রশংসা করেছেন। ফিরিশ্তা বলেছেন, “তিনি ক্রায়পরায়ণতার সঙ্গে শাসন করে সেযুগের নওশেরোয়া হ'য়েছিলেন। অপূর্ব দঢ়তা ও শক্তির সঙ্গে সতেরো বছর ধরে বাংলা ও লখনৌতি শাসন করবার পরে তিনি পরলোক গমন করেন।” বখসী নিজামুদ্দীন ‘তবকাৎ-ই-আকবরী’তে বলেছেন, “তাঁর রাজত্বকালে জনসাধারণ সুখী ও সন্তুষ্ট ছিল।” ‘রিয়াজ’-রচয়িতা গোলাম হোসেন বলেছেন, “তিনি যোগ্যভাবে শাসনকার্য সংক্রান্ত ব্যাপার পরিচালনা করতেন তাঁর রাজত্বকালে লোভেরা আরাম এবং স্বাচ্ছন্দ্যের মধ্য দিয়ে দিন কাটাত। কথিত আছে, তাঁর সময়ে পাণ্ডুয়া এত জনাকীর্ণ হয়েছিল যে তা বর্ণনার অতীত।” ‘রিয়াজ-উস-সলাতীনে’ বলা হয়েছে, জলালুদ্দীন বাংলার রাজধানী পাণ্ডুয়া থেকে গোড়ে স্থানান্তরিত করেন।

জলালুদ্দীনের রাজ্যের আয়তন খুবই বিশাল ছিল। ফিরোজাবাদ বা পাণ্ডুয়া, সোনারগাঁও, মুন্সাজ্জমাবাদ, সাতগাঁও, চাটগাঁও, ফতেহাবাদ ও রোটাসপুর থেকে তাঁর মুদ্রা বেরিয়েছিল, এর থেকে বোঝা যায়, উত্তরবঙ্গ, পূর্ববঙ্গ ও পশ্চিমবঙ্গের প্রায় সবটাই, দক্ষিণবঙ্গের এক বৃহৎ অংশ এবং সম্ভবত দক্ষিণ বিহারের কিয়দংশ তাঁর রাজ্যের অন্তর্ভুক্ত ছিল। উক্ত

দানী তাঁর মৃত্যুর সাক্ষ্য বিশ্লেষণ করে অনুমান করেছেন যে, তিনি ত্রিপুরা ও দক্ষিণ বিহারের কয়দংশ অন্তত সাময়িকভাবেও অধিকার করেছিলেন। পরবর্তী আলোচনায় আমরা দেখতে পাব, ১৪৩০ খ্রীষ্টাব্দে আরাকান জলালুদ্দীনের সামন্ত রাজ্যে পরিণত হয়েছিল।

## জলালুদ্দীনের রাজত্বকালে ইব্রাহিম শর্কীর দ্বিতীয়বার বাংলা আক্রমণ

প্রামাণিক সূত্র থেকে জলালুদ্দীনের রাজত্বকালের কয়েকটি মাত্র ঘটনার কথা জানতে পারা যায়। সেগুলির এখানে উল্লেখ করা যেতে পারে। প্রথম ঘটনাটি জানতে পারা যায় চীনের ‘মিং’ রাজবংশের ইতিহাস ‘মিং-শু’ থেকে। ‘মিং-শু’-এর ৩২৬শ অধ্যায়ে জৌনপুরের সঙ্গে চীনের রাজনৈতিক সম্পর্ক বর্ণিত হয়েছে। তার মধ্যে এই কথাগুলি পাওয়া যায়,—

“সসে-ন-পু-আড় (Sse-na-pu-eul—জৌনপুং) বাংলার পশ্চিমে অবস্থিত। একে মধ্যভারতও বলা হয়। প্রাচীন যুগে এখানে বুদ্ধ থাকতেন। যুং লো’র রাজত্বের দশম বর্ষে (১৪১২ খ্রী:) তাঁদের রাজা য়ি-পু-লা (ইব্রাহিম শর্কী)-র কাছে.....একজন দূত পাঠানো হয়। যুং লো’র রাজত্বের অষ্টাদশ বর্ষে (১৪২০ খ্রী:) বাংলার রাজদূত (চীনের সম্রাটকে) জানান যে, তাঁদের (জৌনপুরের) রাজা কয়েকবার বাংলা আক্রমণ করেছেন।..... হৌ-শিয়েনকে তখন (চীন)-সম্রাটের আদেশ দিয়ে পাঠানো হল তাঁকে (জৌনপুরের রাজাকে) বলবার জন্য যে, প্রতিবেশীর প্রতি ভাল ব্যবহার করেই তিনি নিজের সম্পত্তি রক্ষা করতে পারেন। তাঁকে রেশম ও টাকাকড়ি উপহার দেওয়া হল।”

‘মিং-শু’-এর ৩৪০শ অধ্যায়ে এই ঘটনাটির বিবরণ একটু ভিন্ন ভাষায় পাওয়া যায়। এই বিবরণের শেষাংশ নীচে উদ্ধৃত হল,—

“যুং-লো’র রাজত্বের অষ্টাদশ বর্ষের (১৪২০ খ্রী:) নবম মাসে (চীন)-সম্রাট হৌ-শিয়েনকে আদেশ দিলেন, (জৌনপুরে) গিয়ে তাঁদের (জৌনপুর ও বাংলার রাজাদের) শাস্ত করতে। (জৌনপুরের রাজাকে) সোনা এবং টাকাকড়ি উপহার দিয়ে যুদ্ধ বন্ধ করা হল।

১৪২০ খ্রীষ্টাব্দে জলালুদ্দীনই বাংলার রাজা ছিলেন। ঐ বছরেই জৌনপুরের রাজা বাংলা আক্রমণ করেছিলেন। ‘মিং-শু’-এর ৩২৬শ অধ্যায়ে বলা হয়েছে, ইব্রাহিম শর্কী কয়েকবার বাংলা আক্রমণ করেছিলেন; এর

দ্বারা সম্ভবত ১৪১৫ ও ১৪২০ খ্রীষ্টাব্দ, এই দু'বারের আক্রমণের কথাই বোঝাচ্ছে।

তৈমুরের পুত্র শাহরুখ কর্তৃক দক্ষিণ ভারতের রাজ্যগুলিতে প্রেরিত দূত আবদুর রজ্জাকের লেখা বিখ্যাত বই 'মংলা-ই-সদাইনে' (রচনাকাল ১৩৪২ খ্রীঃ) জৌনপুররাজ ইব্রাহিম শকীর বাংলা আক্রমণের কথা পাওয়া যায়, —যদিও আক্রমণের সাল এবং বাংলার রাজার নাম তার মধ্যে মেলে না। আবদুর রজ্জাক লিখেছেন, —

“বাংলা থেকে সম্রাটের (শাহরুখ, রাজত্বকাল ১৪০৪—৪৭ খ্রীঃ) রাজদূতেরা যখন দেশে ফিরে যাচ্ছিলেন, এমন সময় কালিকটে এক দুর্ঘটনা ঘটে। ঐ জায়গার রাজার কাছে সম্রাটের শক্তির কথা পৌঁছেছিল। তিনি বিশ্বস্ত লোকদের কাছে শুনেছিলেন যে, মহামাগ্ন সম্রাটের দরবারে সমস্ত দেশের রাজারা দূত এবং আবেদন-নিবেদন পাঠিয়ে থাকেন। তাঁরা জানেন যে, এইখানে সমস্ত প্রয়োজন মেটে, সমস্ত প্রার্থনা সফল হয় এবং ঐ সময়ে বাংলার রাজা সুলতান ইব্রাহিম জৌনপুরীর জুলুমের বিরুদ্ধে নাগিশ জানিয়ে দরবারে সাহায্য প্রার্থনা করেছিলেন; সম্রাট (শাহরুখ) জনাব শেখ আল-ইসলাম-খন্সোজা-করিমের মারফৎ এই মর্মে একটি ফরমান পাঠান যে, তিনি (ইব্রাহিম) বাংলার ব্যাপারে হস্তক্ষেপ করবেন না, করলে তাঁকে ফলভোগ করতে হবে। জৌনপুরের রাজা এই পবিত্র ফরমানের মর্ম শুনে, বাংলাদেশ থেকে হিংসার হস্ত প্রত্যাহার করে নিলেন।”

‘মংলা-ই-সদাইনে’ ইব্রাহিমের ১৪২০ খ্রীষ্টাব্দের আক্রমণের কথাই বলা হয়েছে বলে আমাদের ধারণা।\* এরকম ধারণার কারণ, ‘মিং-শ’-এ ১৪২০

\* স্টুয়ার্ট তার ‘History of Bengal’-এ (দ্বিতীয় সংস্করণ, ১৯১০, পৃঃ ১২০—১২৩) লিখেছেন যে, এই আক্রমণ জলালুদ্দীনের ছেলে শামসুদ্দীনের রাজত্বকালে ঘটেছিল। কিন্তু তার এরকম ধারণার কারণ তিনি ব্যাখ্যা করেন নি! শামসুদ্দীন আহম্মদ শাহের গুজরাটী রাজত্বকালে ইব্রাহিম বাংলা আক্রমণ করেছিলেন, এরকম কোন প্রমাণ পাওয়া যায় না।

তবে এখানে একটা কথা আছে। স্টুয়ার্টের বইয়ে শামসুদ্দীন আহম্মদ শাহের রাজত্বকাল দেওয়া আছে ৮১২-৮৩০ হিজরা। কিন্তু এখন শিলালিপি ও মুদ্রার প্রমাণ থেকে জানা যাচ্ছে, ৮৩৬ হিজরা অবধি শামসুদ্দীনের পিতা জলালুদ্দীন সিংহাসনে উপবিষ্ট ছিলেন। সুতরাং এমনও হতে পারে যে, স্টুয়ার্ট শামসুদ্দীনের রাজত্বকাল সম্বন্ধে ভুল ধারণার দ্বারা চালিত হয়েই ‘মংলা-ই-সদাইনে’ বর্ণিত ঘটনাকে শামসুদ্দীনের রাজত্বকালে স্থাপন করেছেন। স্টুয়ার্ট হয়ত কোন সূত্র থেকে জানতে পেরেছিলেন, ঐ আক্রমণ ৮১২-৮৩০ হিজরার মধ্যে ঘটেছিল (১৪২০ খ্রীষ্টাব্দ বা ৮২৩ হিজরা যার অন্তর্গত), তাই শামসুদ্দীনের নাম এই ঘটনার সঙ্গে যুক্ত করে দিয়েছেন। ডঃ দানী স্টুয়ার্টের নিশ্চয় উজ্জ্বল সত্য বলে গ্রহণ করেছেন।

খ্রীষ্টাব্দের আক্রমণের যে বর্ণনা পাই, তার সঙ্গে 'মংলা-ই-সদাইনে'র বর্ণনার বেশ মিল আছে। দুই বিবরণীতেই দেখি, বাংলার রাজা ইব্রাহিমের আক্রমণের বিরুদ্ধে বিদেশের সত্ৰাটের কাছে নালিশ জানাচ্ছেন এবং বিদেশী সত্ৰাটের কথাতে ইব্রাহিম আক্রমণ প্রত্যাহার করে নিচ্ছেন। অতএব দুই বিবরণীতে একই ঘটনার কথা বলা হয়েছে বলে সিদ্ধান্ত করা যায়।

কেন ইব্রাহিমের সঙ্গে জলালুদ্দীনের বিরোধ হয়েছিল তা স্পষ্টভাবে জানা যাচ্ছে না। তবে 'মংলা-ই-সদাইনে' দেখছি শাহ্‌রুখ ইব্রাহিমকে আদেশ করেছেন, তিনি যেন বাংলার বাণপারে হস্তক্ষেপ না করেন। এর থেকে মনে হয়, ইব্রাহিম বাংলার কোন আভ্যন্তরীণ বাণপারে হস্তক্ষেপ করেছিলেন এবং জলালুদ্দীন তা বরদাস্ত না করায় বিরোধ বেধে উঠেছিল। ৮১৮ হিজরাতে গণেশের সঙ্গে সংঘর্ষ হবার পর থেকে ইব্রাহিম সম্ভবত বাংলাকে তাঁর সামন্ত-রাজা বলেই মনে করতেন। 'সঙ্গীতশিরোমণি'র "আগোড়াভূজলংরাজ্যমিব-রাহিমভূভূজঃ" ছত্রটিও এই ধারণা জন্মায়। জলালুদ্দীনকে প্রথমবার ইব্রাহিম নিজেই সিংহাসনে বসিয়েছিলেন বলে জলালুদ্দীনকে সামন্ত রাজা মনে করা তাঁর পক্ষে আরও স্বাভাবিক এবং আগেই বলেছি, ইব্রাহিমের কুপায় প্রথম রাজ্যলাভের সময় জলালুদ্দীন সম্ভবত ইব্রাহিমের সামন্ত হিসাবে বাংলা দেশ শাসন করতে সম্মত হয়েছিলেন। এই কারণেই ইব্রাহিম হয়তো বাংলার বাণপারে হস্তক্ষেপ করেছিলেন।

যাহোক্ আমরা দেখছি জলালুদ্দীন ইব্রাহিমের আক্রমণের সময় একই সঙ্গে পারস্যের শাহ্‌রুখ ও চীনের সত্ৰাট য়ু'-লো'র কাছে সাহায্য চেয়েছিলেন এবং পেয়েও ছিলেন। শক্তিশালী বৈদেশিক রাষ্ট্রগুলির সঙ্গে যে তাঁর বন্ধুত্বের সম্পর্ক ছিল, তা এর থেকে প্রমাণ হচ্ছে। এই পররাষ্ট্রনীতি নিঃসন্দেহে জলালুদ্দীনের রাজনৈতিক দূরদর্শিতার পরিচায়ক।

### জলালুদ্দীন ও আরাকানরাজ

আরাকান দেশের ইতিহাস থেকে জলালুদ্দীনের রাজত্বের আর একটি ঘটনার কথা জানা যায়। ফেয়ার এবং হার্ভের সংকলিত বিবরণে এই ঘটনার যে বর্ণনা দেওয়া হয়েছে, \* তার সংক্ষিপ্তসার এই :—

\* Phare : History of Burma, pp. 77-78 ; J. A. S. B., Pt. I, 1844, pp. 44-46 এবং Harvey : History of Burma, p. 139 ভ্রষ্টা।

আরাকান দেশের একজন রাজা ত্রফের রাজার সঙ্গে যুদ্ধ পরাজিত হয়ে নিজের রাজ্য হারান। হারিয়ে তিনি দেশ ছেড়ে পালান এবং বাংলার রাজার কাছে আশ্রয় নেন। বাংলার রাজাকে তিনি শত্রুর সঙ্গে যুদ্ধ সাহায্য করায় বাংলার রাজা তাঁর রাজ্য উদ্ধারের জন্য সাহায্য করেন। প্রথমে একজন মুসলমান সেনাপতিকে ( ফেয়ারের বিবরণীতে এর নাম বলা হয়েছে উলুথং বা ওয়ালি খান ) তাঁর সঙ্গে দেওয়া হয়; কিন্তু সে বিশ্বাসঘাতকতা করে আরাকানরাজের শত্রুর সঙ্গে যোগ দেয় এবং আরাকানরাজকে বন্দী করে। আরাকানরাজ কোনক্রমে পালিয়ে এসে বাংলার রাজাকে সব জানান। তখন বাংলার রাজা বিশ্বস্তর লোকের উপর তাঁর রাজ্য উদ্ধারের ভার দেন এবং এইবার আরাকানরাজের রাজ্য উদ্ধার হয়। কিন্তু এই উপকারের বিনিময়ে তাঁকে বাংলার রাজার সামন্ত হতে হয়। তখন থেকে আরাকানের রাজাদের মুদ্রার উপরে ফার্সী অক্ষরে মুসলমানী নাম লেখার প্রথাও চালু হল।

আরাকানরাজের নাম ফেয়ারের বিবরণীতে পাওয়া যায় Meng-tsau-mwun এবং হার্ভের বিবরণীতে পাওয়া যায় Naramaikbla। এর থেকে বোঝা যায়, তাঁরা ভিন্ন ভিন্ন সূত্র ব্যবহার করেছিলেন। কিন্তু দু'জনেই স্পষ্টভাবে উল্লেখ করেছেন, ১৪৩০ খ্রীষ্টাব্দে আরাকানরাজ হত রাজ্য ফিরে পান। ঐ সময়ে বাংলার রাজা ছিলেন জলালুদ্দীন। \* স্মরণ্য বাংলার যে রাড়া আরাকানরাজকে হতরাজ্য ফিরে পেতে সাহায্য করেছিলেন, তিনি জলালুদ্দীন হিন্ন আর বেউ হতে পারেন না।

আরাকান দেশে প্রচলিত কিংবদন্তীর আভ্যন্তরীণ সাক্ষ্যও এই সিদ্ধান্তের অস্বকূল। এতে বলা হয়েছে, যে বহিঃশত্রুর আক্রমণের সময় আরাকানরাজ

\* ফেয়ার তাঁর 'History of Burma' (London, 1884, p. 78)-তে ভুল করে বলেছেন বাংলার এই রাজার নাম নাজির শাহ। ফেয়ারের ভুল হবার কারণ তাঁর নিজের উক্তির মধ্য দিয়েই উদ্ঘাটিত হয়েছে। তিনি বলেছেন বাংলার ইতিহাস সম্বন্ধে তাঁর সমস্ত জ্ঞান মার্কম্যানের 'History of Bengal' থেকে পাওয়া (History of Burma, p. 77, f.n. দ্রষ্টব্য)। মার্কম্যানের বইয়ে স্টুয়ার্টের History of Bengal-এর অনুসরণে ১০২৬-১৪৫৭ খ্রীষ্টাব্দ নাসিরুদ্দীন মাহমুদ শাহের রাজত্বকাল বলে নির্দিষ্ট করা হয়েছিল। এই ক্ষেত্রে ফেয়ার ১৪৩০ খ্রীষ্টাব্দ নাজির শাহ বা নাসিরুদ্দীন মাহমুদ শাহের রাজত্বকাল ভেবেছিলেন। ডঃ দানী ফেয়ারের এই উক্তিকে বাচাই না করেই সত্য বলে গ্রহণ করেছেন।

বাংলার রাজাকে সাহায্য করেছিলেন, তিনি দিল্লীর রাজা।\* এ সম্বন্ধে ফেরার মন্তব্য করেছেন, “As the Arakanese make sad confusion of all cities and countries in India, this may mean any king between Bengal and Dehli, probably the king of Juanpur. The fugitive (Meng-tsau-mwun) must have reached Thuratan (Bengal) about the year A.D. 1407, when, and for some years after, in consequence of Timur’s invasion, the Dehli sovereign was not in a condition to attack Bengal.” জলালুদ্দীনের রাজত্বকালে ১৪২০ খ্রীষ্টাব্দে ইব্রাহিম শাহী যে আক্রমণ করেছিলেন সম্ভবত তাইতেই আরাকানরাজ জলালুদ্দীনকে সাহায্য করেছিলেন।

### জলালুদ্দীনের পূর্ব-নাম

জলালুদ্দীন যখন হিন্দু ছিলেন, তখন তাঁর কি নাম ছিল, তা নিঃসংশয়ে বলা যায় না। ‘রিয়াজ-উস-সলাতীন’র মতে তাঁর নাম ছিল যহু। বুকাননের বিবরণীতে লেখা আছে তাঁর নাম ছিল Godusen (গহুসেন)। বুকানন মুসলমান রাজাদের নাম ও রাজত্বকালের যে তালিকা পরিশেষে দিয়েছেন (Martin’s Eastern India, Vol II, Book III, Appendix N), তাতে জলালুদ্দীনের পূর্ব নাম দেওয়া হয়েছে Juddoo Sein (যহুসেন)। ঊনবিংশ শতাব্দীর প্রথম দিকে মুন্সী শ্যামপ্রসাদ গোড়ের যে সংক্ষিপ্ত ইতিহাস লিপিবদ্ধ করেছিলেন তাতেও তিনি লিখেছেন যে জলালুদ্দীনের পূর্ব নাম ছিল “যহুসেন”। ‘তারিখ ই-কিরিশাত’র মতে জলালুদ্দীনের পূর্ব নাম জিংমল, স্টুয়ার্টের মতে চেংমল। যহু যহুসেনের সংক্ষিপ্ত রূপ, গহুসেন যহুসেনের বিকৃত রূপ। সেইরকম চেংমল জিংমল এ বিকৃতরূপ। “যহুসেন”ই জলালুদ্দীনের প্রকৃত পূর্ব-নাম বলে মনে হয়। অবশ্য এ সম্বন্ধে নিশ্চিতভাবে কিছু বলা যায় না।

\* ফেরারের সঙ্কলিত আরাকানী কিংবদন্তীর মধ্যে দিল্লীর রাজার সঙ্গে বাংলার রাজার যুদ্ধের এক আঘাটে বর্ণনা দেওয়া হয়েছে; যুদ্ধের ফলাফলও বিকৃত ও অতিরঞ্জিত করা হয়েছে। (J.A.S.B., 1844, Pt. I., pp. 45 ত্রুটিব্য।)



### জালালুদ্দীনের ধর্ম-নিষ্ঠা

‘সদ্বীত-শিরোমণি’র মাক্য বিশ্লেষণ করলে বোঝা যায়, জালালুদ্দীন রাজ্যের লোভে হিন্দুধর্ম ত্যাগ করে মুসলমান হয়েছিলেন। মুসলিম সাধুদের জীবনী-গ্রন্থ ‘মিরাং-উল্-আস্বারে’ জালালুদ্দীন সম্বন্ধে কিছু কিছু ভুল উক্তি থাকলেও এই একটি কথা এতে সঠিকভাবেই লেখা আছে। এতে আছে, “...he became a convert to Islam because of his lust for kingdom.” (ডঃ দানীর অনুবাদ—J. A. S., 1952, p. 138 দ্রঃ)।

কিন্তু জালালুদ্দীনের ইসলাম-ধর্ম গ্রহণের কারণ যা-ই হোক না কেন, ইসলাম ধর্ম গ্রহণের পরে এই ধর্মের তাঁর গভীর নিষ্ঠা জন্মেছিল। তাঁর পিতা সম্ভবত তাঁর শুদ্ধি করিয়েছিলেন, কিন্তু তাতে কোনই ফল হয়নি। পিতার মৃত্যুর পরেই তিনি নিজের ইসলাম ধর্মে বিশ্বাসের কথা উচ্চকণ্ঠে ঘোষণা করেছিলেন। ধর্মনিষ্ঠার ব্যাপাবে তিনি তাঁর পূর্ববর্তী জাত-মুসলমান সুলতানদেরও অতিক্রম করে গিয়েছিলেন। তাঁর আগে প্রায় ২০০ বছর ধরে বাংলায় মুসলমান সুলতানরা তাঁদের মৃত্যুর কল্মা খোদাই কবাতেন না। জালালুদ্দীন কিন্তু তাঁর মৃত্যুর কল্মা খোদাই করে বাংলাদেশে আবার এই প্রথা চালু করেন। তিনি আরাবিকানরাজকে তাঁর স্ত্রী সিংহাসনে পুনরধিষ্ঠিত করার পর থেকে ঐ রাজা ও তাঁর উত্তরাধিকারীদের মৃত্যুর ফাসী অক্ষরে মুসলমানী নাম লেখার প্রথা চালু হয়, এর পিছনেও সম্ভবত জালালুদ্দীনের নির্দেশ ছিল এবং তাঁর ধর্ম-প্রীতিই এর কারণ বলে মনে হয়।

শুধু তাই নয়, আর এক ব্যাপারেও জালালুদ্দীন নতুনত্ব দেখিয়েছিলেন। তাঁর পূর্ববর্তী সুলতানরা সকলেই খলীফার আনুগত্য স্বীকার করতেন এবং কখনও কখনও তাঁদের মৃত্যুর বা শিলালিপিতে নিজেদের ‘খলীফার সহায়ক’ বলে অভিহিত করেছেন। জালালুদ্দীনও প্রথমদিকে তাই করেছেন। কিন্তু জালালুদ্দীন তাঁর শেষ দিককার মূদ্রা ও শিলালিপিতে ‘খলীফ-আল্লাহ্’ উপাধি ধারণ করেছেন অর্থাৎ নিজেকেই খলীফা বা ঈশ্বরের প্রতিনিধি বলে দাবী করেছেন। তাঁর মৃত্যুর পর তাঁর পুত্র আহমদ শাহ্ নাবালকত্বের জন্ত এই উপাধি ধারণ করেন নি, কিন্তু আহমদ শাহের পরবর্তী সুলতানদের মধ্যে অনেকেই এই উপাধি ধারণ করেছিলেন। জালালুদ্দীনের ধর্ম-নিষ্ঠা সম্বন্ধে সম্ভ্রান্তি আরও কতকগুলি তথ্য পাওয়া গিয়েছে। সমসাময়িক আরবী গ্রন্থকার

ইবনু-ই-হজরের (১৩৭২-১৪৪৯ খ্রীঃ) লেখা 'ইন্বাউ'ল-গুম্বু' গ্রন্থ থেকে জানা যায় যে, জলালুদ্দীন ইসলামের উন্নতি-সাধন করেন, ইসলামের বিভিন্ন প্রতিষ্ঠান স্থাপন করেন, তাঁর পিতা যে সমস্ত মসজিদ প্রভৃতি ধ্বংস করেছিলেন, সেগুলি সংস্কার করেন এবং আবু হানিফার সম্প্রদায়ের মতবাদ গ্রহণ করেন। মক্কাধামে তিনি অনেকগুলি ভবন, বিশেষত একটি সুন্দর মাদ্রাসা তৈরী করান। ৮৩২ হিজরায় তিনি মক্কার অধিবাসীদের দান করার জন্য অনেক অর্থ পাঠিয়েছিলেন। পরে জলালুদ্দীন মিশরের রাজা আশরফ অর্থাৎ অল-আশরফ বারসুবায়-এর কাছে উপহার পাঠিয়েছিলেন এবং খলীফার অনুমোদন প্রার্থনা করেছিলেন; খলীফা ৮৩৩ হিজরায় সুইল ও যরগাব (?) নামক দু'জন দূত মারফৎ জলালুদ্দীনকে সম্মান-পরিচ্ছদ পাঠান, জলালুদ্দীন সম্মান-পরিচ্ছদ অঙ্গে ধারণ করেন এবং খলীফাকে অনেক উপহার পাঠান। শেখ আলাউদ্দীন বুখারি নামে একজন প্রবাসী ভারতীয় সাধুকে এবং মিশর ও দামাস্কাসের অনেক লোককেও তিনি উপহার পাঠিয়েছিলেন। (Islamic Culture, 1958, p. 204 দ্রঃ।)

জলালুদ্দীনের ৮৩৪ হিজরার মূদ্রায় সর্বপ্রথম 'খলীফ-আল্লাহ' উপাধি মূদ্রিত দেখা যায়। এর ঠিক আগের বছর তিনি খলীফার কাছ থেকে সম্মান-পরিচ্ছদ লাভ করেছিলেন। সুতরাং তিনি তাঁর মূদ্রায় খলীফার প্রতি আনুগত্য স্বীকার না করে নিজেকে 'আল্লাহর খলীফা' বলে ঘোষণা করলেন কেন? যতদূর মনে হয়, জলালুদ্দীন খলীফার অনুমতি নিয়েই নিজেকে 'আল্লাহর খলীফা' বলে ঘোষণা করেছিলেন; খলীফার জলালুদ্দীনকে সম্মান-পরিচ্ছদ দান আসলে এই ঘোষণা করারই অনুমোদন দান বলে মনে হয়।

এই সমস্ত বিষয় থেকে বোঝা যায়, ইসলাম ধর্ম গ্রহণ করার পরে জলালুদ্দীন মনে প্রাণে একজন নিষ্ঠাবান মুসলমান হয়ে উঠেছিলেন এবং নানা সাধারণ ও অসাধারণ বিষয়ের অনুষ্ঠান করে তিনি তাঁর ধর্ম-প্রীতি চরিতার্থ করেছিলেন।

অবশ্য মিশরের সুলতান এবং দামাস্কাসের খলীফার কাছে উপহার পাঠানোর পিছনে জলালুদ্দীনের আরও দুটি উদ্দেশ্য ছিল বলে মনে হয়। প্রথমত, জলালুদ্দীন কাফেরের সম্মান এবং বাংলার পূর্বতন মুসলিম রাজবংশের সঙ্গে তাঁর কোন সম্পর্ক নেই। এই কারণে বাংলার সিংহাসনে তাঁর অধিকার

এবং তাঁর মর্যাদা সম্বন্ধে সকলে হয়তো একমত ছিলেন না। তাঁর কায়রো ও দামাস্কাসে উপহার পাঠানোর পরোক্ষ উদ্দেশ্য, মুসলিম ছুনিয়ার অধিনায়কদের কাছে নিজের অধিকার ও মর্যাদার স্বীকৃতি লাভ। দ্বিতীয়ত, আগেই আমরা দেখে এসেছি, জলালুদ্দীন সম্ভবত ইব্রাহিম শকীর সামন্ত রাজা হয়ে থাকার সর্তে বাংলার সিংহাসন লাভ করেছিলেন, অথচ তিনি স্বাধীনভাবেই রাজত্ব করতেন এবং ১৪২০ খ্রিষ্টাব্দে ইব্রাহিমের সঙ্গে তাঁর যুদ্ধ হয়েছিল; তাই ইব্রাহিমের বিরুদ্ধে যথাসম্ভব শক্তিশালী হয়ে থাকবার জন্যও তিনি মুসলিম জহানের নেতাদের সঙ্গে এইভাবে সম্পর্ক স্থাপন করেছিলেন বলে মনে হয়।

যাহোক, বাংলার স্বাধীন সুলতানদের মধ্যে জলালুদ্দীন এক বিষয়ে সকলকে অতিক্রম করেছেন। এতগুলি পররাষ্ট্রের অধিনায়কের কাছে আর কেউ দূত পাঠিয়েছিলেন বলে জানা যায় না। তাঁর পূর্ববর্তী সুলতান সিম্বলুদ্দীন আজম শাহ চীন-সম্রাটের কাছে দূত পাঠিয়েছিলেন, পারস্যের কবি হাফেজকে আমন্ত্রণ জানিয়েছিলেন এবং মক্কায় মাদ্রাসা তৈরী করিয়েছিলেন। কিন্তু জলালুদ্দীন চীনসম্রাট যুং-লো, পারস্যের হিরাটে অবস্থানকারী শাহরুখ, মিশরের সুলতান অল আশরফ বায়সবায় এবং দামাস্কাসের খলীফার কাছে দূত পাঠিয়ে তাঁকেও অতিক্রম করেছেন।

### জলালুদ্দীনের হিন্দু সেনাপতি

জলালুদ্দীনের একটি কাছের কথা আমরা সমসাময়িক পণ্ডিত বৃহস্পতি মিশ্রের 'স্মৃতিরত্নহার' গ্রন্থের ভূমিকা থেকে জানতে পারি। বৃহস্পতি লিখেছেন, জলালুদ্দীন মুর্শাবিভিষ্ক-কুলোংপন্ন জগদন্তের পুত্র রায় রাজ্যধরের গুণবাশিতে মুগ্ধ হয়ে তাঁকে সেনাপতির পদে নিযুক্ত করেছিলেন এবং নিয়োগ উপলক্ষে বিরাট আড়ম্বর অনুষ্ঠান করে তাঁকে হাতী, ঘোড়া, সোনা, রূপো, ছাতার সারি প্রভৃতি দান করে তুষ ও শস্যের ধানিতে সংবর্ধনা জানিয়েছিলেন।

সৈন্যধিপতামিভট্টৈসঙ্কবতৃধ্যশঙ্খ-

চ্ছদ্রাবলীলপিতকাক্ষনরূপ্য...

..... দান বহুবৃষণাঞ্চ

জলালুদ্দীননৃপতিমুদিতো গুণোদৈঃ ।

ঘটনাটি আপাতদৃষ্টিতে অসামান্য বলে মনে না হলেও জলালুদ্দীনের রাজত্বকালে হিন্দুদের অবস্থা সম্বন্ধে মূল্যবান আলোকপাত করে। এবার সেই আলোচনাতেই আসা যাচ্ছে।

### হিন্দুদের সম্বন্ধে জলালুদ্দীনের নীতি

কোন হিন্দু মুসলমান হলে সাধারণত যা হয়, জলালুদ্দীনের বেলায়ও তাই হয়েছিল। তাঁর হিন্দুধর্মের প্রতি বিদ্বেষ জন্ম-মুসলমানদের চেয়েও বেশী হয়ে দাঁড়িয়েছিল। পিতার মৃত্যুর পর সিংহাসন অধিকার করেই তিনি অনেক হিন্দুর উপর অত্যাচার করেন, একথা দু'টি বিবরণীতে পাই। ‘রিয়াজ-উস-সলাতীনে’ পাই, “তিনি বহু হিন্দুকে মুসলিম ধর্মে ধর্মান্তরিত করেন এবং যে সমস্ত ব্রাহ্মণ তাঁর শুদ্ধি-অনুষ্ঠানে স্বর্ণানমিত গাভীর অংশ নিয়েছিল, তাদের যন্ত্রণা দিয়ে শেষ পর্যন্ত গোমাংস খেতে বাধ্য করেন।” বুকাননের বিবরণীতে পাই, “সিংহাসন অধিকার করে জলালুদ্দীন হিন্দুদের উপর অত্যাচার করতে শুরু করেন এবং তাদের মুসলমান হতে বাধ্য করেন, ফলে অনেক হিন্দু কবতোয়া নদীর ওপারে কামরূপ দেশে পালিয়ে যায়।” এদের কথা সত্য বলেই মনে হয়। অথচ এই জলালুদ্দীনের সেনাপতির পদ পেলেন রায় রাজাধর, যিনি শুধু হিন্দু নন, নিষ্ঠাবান হিন্দু এবং বৃহস্পতি মিশ্রের উক্তি অনুসারে যিনি ব্রাহ্মণদের দারিদ্র্য দূর করে ও নানারকম যজ্ঞ করে ‘ধর্মপুত্র’ আখ্যা পেয়েছিলেন। আমাদের মনে হয় নিষ্ঠাবান মুসলমান জলালুদ্দীনের পক্ষে এই রকম গুরুত্বপূর্ণ সামরিক পদে হিন্দুর নিয়োগ আসলে বাস্তব অবস্থার কাছে আত্মসমর্পণ। রাজা গণেশের আমলে হিন্দুরা ক্ষমতার যে শীর্ষে পৌছেছিল, আত্যাত্তিক ইসলামধর্মনিষ্ঠা ও হিন্দুদ্বেষ সত্ত্বেও তাদের সেখান থেকে নামিয়ে আনা জলালুদ্দীনের সাধ্য ছিল না। তিনি যখনই স্বযোগ পেয়েছেন, উৎকট সাম্প্রদায়িক গোঁড়ামির পরিচয় দিয়েছেন, কিন্তু সেই সঙ্গে রাজ্যের গুরুত্বপূর্ণ পদে হিন্দুদের নিয়োগ করতেও বাধ্য হয়েছেন। অতএব গণেশের মৃত্যুর পরেও যে বাংলাদেশে হিন্দুদের প্রাধান্য লোপ পায়নি, তা দেখা যাচ্ছে।

জলালুদ্দীনের দু'টি মূর্তি পাওয়া গিয়েছে, যাদের উল্টোপিঠে লক্ষনোত্ত সিংহের ছবি আঁকা। কোনরকম প্রাণীর ছবি আঁকা ইসলাম ধর্মের অনুশাসনের বিরোধী। সুতরাং কোন হিন্দু এই জাতীয় মূর্তির পুরিকল্পনা করেছিলেন এবং এক্ষেত্রে স্থলতানের উপর তাঁর প্রভাব কার্যকরী হয়েছিল বলে অনুমান

করা যায়। \* জলালুদ্দীনের আমলে হিন্দুদের প্রভাব-প্রতিপত্তি সম্বন্ধে এ থেকেও একটা ধারণা করা যায়।

অবশ্য একটা কথা আছে। ত্রিপুরার রাজাদের মুদ্রাতেও এই ছবি থাকত। তার সঙ্গে এই মুদ্রাগুলির কোন সম্বন্ধ আছে বলে কেউ কেউ অস্বীকার করেছেন। ডঃ নলিনীকান্ত ভট্টশালী লিখেছেন—“Reference may be made for similar figures of lion on coins, to those of Hill Tippera...The design on the coins of the neighbouring Hindu state may have suggested the adoption of a similar design on his own coins to the renegade Hindu king, but the dictates of the faith which he adopted soon led to its abandonment.” ডঃ দানী এ সম্বন্ধে বলেন—“The adoption of this new design calls for some better explanation. We know that, the Scythians adopted the coin designs of the Indo-Bactrians when they conquered their territory. The same was the case with the Kushans. Chandra Gupta II, Vikramāditya of the Gupta dynasty, adopted the coins of the Western Kṣātrapas after conquering their territory of Gujarat and Malwa. Can we, likewise, not suppose that some portion of Tripura was conquered by Jalāl-ud-dīn and this type of coinage was issued in order to make it acceptable to the local people? The fact that both the coins, so far discovered, were found in Dacca district, lend support to this suggestion. From the Tripura Rājamala... we learn that at this time insignificant rulers like Mukuṭa-māṇikya and Mahā-māṇikya were on the throne of Tripura. Therefore, there is a strong probability that a portion of

---

\* এই মুদ্রাগুলির মাধ্যমে অস্পষ্টভাবে কিছু লেখা আছে; ডঃ নলিনীকান্ত ভট্টশালীর মতে এ লেখার পাঠ “বিন্ কানস্ শাহ্” (‘কানস শাহের পুত্র’ )। জলালুদ্দীনের অস্ত্র কোন মুদ্রা বা শিলালিপিতে তাঁর বিঘ্নী পিতার নাম পাওয়া যায় না।

Tripura State was conquered by Jalāl-ud-din. But soon after the losses must have been made good by Dharma-māṇikya, the famous successor of Mahā māṇikya. Hence, this type of coin soon went out of vogue.” ডঃ দানীর এই অনুমান অমৌক্তিক বলে মনে হয় না। তবে জলালুদ্দীন যে সাময়িক-ভাবে ত্রিপুরার কিয়দংশ দখল করেছিলেন, এরকম সিদ্ধান্তে হুনিশ্চিতভাবে পৌছোতে হলে আরও জোরালো প্রমাণের দরকার।

### জলালুদ্দীনের মুদ্রা

জলালুদ্দীনের মুদ্রাগুলি থেকে দেখা যায়, পূর্ববর্তী রাজাদের তুলনায় তাঁর রাজত্বকালে টাকশালের সংখ্যা বৃদ্ধি পেয়েছে। তাঁর আমলে নতুন যে সমস্ত জায়গার টাকশালের নাম পাওয়া যায়, তার মধ্যে একটি হল ফতেহাবাদ। আর একটি রোটাঙ্গপুর। এই সব নতুন নতুন জায়গায় টাকশাল খোলা থেকে কেউ কেউ মনে করেছেন, জলালুদ্দীন এই সব জায়গা দখল করে নিজের রাজ্যভুক্ত করেছিলেন। কিন্তু আমরা আগে দেখাবার চেষ্টা করেছি যে, ফতেহাবাদ অন্তত গণেশের সময় থেকে গৌড়রাজ্যের অন্তর্ভুক্ত ছিল। রোটাঙ্গপুরের অবস্থান আজও পর্যন্ত ঠিক করা যায়নি বলে এ সম্বন্ধে কোন সঠিক মত প্রকাশ করা যায় না। তবে এ সম্বন্ধে ডঃ দানী যা লিখেছেন, তা যুক্তিযুক্ত বলে মনে হয়। তিনি লিখেছেন “...what town is meant by Rhotāspur? A near possibility is Rhotās or Rhotāsgarh on the river Son in South Bihar. But South Bihar was, then, under Ibrāhim Shārkī of Jaunpur. If this identification is held, we will have to suppose that this portion of Ibrāhim's dominion was conquered by Jalāl-ud dīn.” হয়তো জলালুদ্দীন এই অঞ্চল অধিকার করতেই ইব্রাহিম শর্কী রুষ্ট হয়ে ১৪২০ খ্রীষ্টাব্দে বাংলা-দেশ আক্রমণ করেছিলেন। আবার এমনও হতে পারে ১৪২০ খ্রীষ্টাব্দের যুদ্ধেই জলালুদ্দীন এই অঞ্চল জয় করেছিলেন।

অবশ্য নতুন টাকশাল খোলাতে রাজ্যের সম্প্রসারণই যে সব ক্ষেত্রে বোঝায় তা নয়, এতে রাজ্যের ঐশ্বর্যবৃদ্ধিই বিশেষভাবে বোঝায়। জলালুদ্দীনের রাজত্বকালে দেশের ঐশ্বর্য যে বৃদ্ধি পেয়েছিল, এই সব নতুন টাকশাল তার প্রমাণ।

### জলালুদ্দীন ও বৃহস্পতি মিশ্র

জলালুদ্দীন সম্বন্ধে আর একটি কথা বহু গবেষক লিখেছেন। তাঁরা বলেন জলালুদ্দীন মহিন্তা-বংশীয় বিখ্যাত পণ্ডিত এবং ‘স্মৃতিরত্নহার’, ‘পদচক্রিকা’ প্রভৃতি গ্রন্থের রচয়িতা বৃহস্পতি মিশ্রকে বিশেষভাবে সংবধিত করেছিলেন এবং ‘রায়মুকুট’ ও ‘পণ্ডিতসার্বভৌম’ উপাধি দিয়েছিলেন। কিন্তু আমরা ককতুদ্দীন বারবক শাহ সংক্রান্ত অধ্যায়ে আলোচনা করে দেখাবার চেষ্টা করব বারবক শাহই বৃহস্পতিকে বিশেষভাবে সংবধন করেছিলেন ও এইসব উপাধি দিয়েছিলেন। কিন্তু বৃহস্পতি যে জলালুদ্দীনের কাছেও কিছু সম্মান পেয়েছিলেন, তাতে সন্দেহ নেই। কারণ বৃহস্পতির পৃষ্ঠপোষক ও শিষ্য ছিলেন জলালুদ্দীনের সেনাপতি রায় রাজাধর এবং বৃহস্পতির প্রথম দিককার বইগুলি—রঘুবংশটীকা, শিশুপালবধটীকা প্রভৃতি রায় রাজাধরের পৃষ্ঠপোষণে লেখা। এই বইগুলিতে বৃহস্পতি নিজের সম্বন্ধে এই শ্লোকটি লিপিবদ্ধ করেছেন,

বিদ্যাসু তাসু বিনয়ী প্রণয়ী গুণেয়ু  
গৌড়াধিপাহুপাচতপ্রচুরপ্রতিষ্ঠঃ ।  
সোহং যথামতি বৃহস্পতিরাতনোমি  
ব্যাখ্যাবৃহস্পতিমলংকৃতিকাব্যালঙ্ঘম্ ॥

যে “গৌড়াধিপ” বৃহস্পতি মিশ্রকে “প্রচুর প্রতিষ্ঠা” দিয়েছিলেন, তিনি নিশ্চয়ই রায় রাজাধরের প্রভু জলালুদ্দীন মুহম্মদ শাহ। কিন্তু হিন্দুধর্মত্যাগী জলালুদ্দীন হিন্দু পণ্ডিত বৃহস্পতিকে প্রতিষ্ঠা দিলেন, এর কারণ কী? কারণ এই, জলালুদ্দীন প্রথম জীবনে যখন হিন্দু ছিলেন, তখন নিশ্চয় সংস্কৃত ভাষার শিক্ষা পেয়েছিলেন এবং ধর্মাস্তরিত হয়েও সংস্কৃত ভাষা ও সাহিত্যের প্রতি অল্পরাগ ছাড়তে পারেননি। তাই সংস্কৃত-পণ্ডিত বৃহস্পতি মিশ্রকে তিনি সমাদর করেছিলেন।

### অত্যাচার তথ্য

বর্তমানে জলালুদ্দীন সম্বন্ধে আর বিশেষ কোন তথ্য জানা যাচ্ছে না। ঢাকা জেলার মান্দ্রায় এক ধ্বংসপ্রাপ্ত মসজিদে এবং রাজশাহী জেলার জাহানাবাদে মিল, সমাধিস্থলে সম্প্রতি দু'টি শিলালিপি আবিষ্কৃত হয়েছে, এ দু'টি

জলালুদ্দীনের রাজত্বকালেই খোদাই হয়েছিল। প্রথমটি একটি মসজিদের শিলালিপি—এর নির্মাতা শিকদার উলুগ খান মুআজ্জম দীনার খান। দ্বিতীয়টি একটি মাদ্রাসা-সংলগ্ন মসজিদের শিলালিপি—এর নির্মাতা মালিক সদর-অল-মিলাং ওয়াদ্দীন সুলতানী। দু'টিতেই জলালুদ্দীনের নাম আছে।\*

রিয়াজ-উস-সলাতীনের মতে জলালুদ্দীন এবং তাঁর স্ত্রী ও পুত্র পাণ্ডয়ার একলাখী প্রাসাদে সমাধিস্থ হন। এই প্রাসাদের মধ্যে তিনটিই সমাধি রয়েছে। এগুলি জলালুদ্দীন এবং তাঁর স্ত্রী ও পুত্রের সমাধি বলে নির্দিষ্ট হয়ে থাকে।

### জলালুদ্দীনের মৃত্যুর সময়

এপর্যন্ত সকলেরই ধারণা ছিল জলালুদ্দীন মুহম্মদ শাহ ৮৩৫ হিজরায় পরলোকগমন করেন, কারণ ঐ বছরের পরে আর তাঁর মুদ্রা পাওয়া যায় নি। কিন্তু এখন সুরনিশ্চিতভাবে জানা যাচ্ছে, তিনি ৮৩৬ হিজরা অবধি জীবিত ছিলেন। জনৈক ব্যক্তি আমাকে বলেছিলেন, তিনি সুলতান জলালুদ্দীন মুহম্মদ শাহের নামাঙ্কিত ৮৩৬ হিজরার কয়েকটি মুদ্রা পেয়েছিলেন। এই মুদ্রাগুলি আমি দেখতে পাইনি, কাজেই এ সম্বন্ধে নিশ্চিতভাবে কিছু বলতে পারলাম না। তবে সম্প্রতি বাজশাহী জেলার জাহানাবাদ গ্রামে জলালুদ্দীনের যে শিলালিপি পাওয়া গিয়েছে, তার তারিখ ৮৩৫ হিজরার ৫ই জমাদী-অল-আউয়ল। ৮৩৫ হিজরার পঞ্চম মাসে যিনি জীবিত ছিলেন, তাঁর ৮৩৬ হিজরার মুদ্রা পাওয়া খুবই সম্ভাব্য ব্যাপার। ইতিপূর্বে ঢাকা জেলার মান্দরা গ্রামে জলালুদ্দীনের যে শিলালিপি পাওয়া গিয়েছিল, তার তারিখ প্রথমে পড়া হয়েছিল ৮৩০ হিজরার ১০ই জমাদী-অল-আউয়ল। কিন্তু এখন বিশেষজ্ঞেরা স্থির করেছেন সালাফের প্রকৃত পাঠ ৮৩০ নয়—৮৩৬ হিজরা (Islamic Culture, 1958, pp. 204-205 প্রঃ)। অতএব জলালুদ্দীন মুহম্মদ শাহ অন্তত ৮৩৬ হিজরার ১০ই জমাদী-অল-আউয়ল বা ১৪৩৩ খ্রিঃর ২রা জাহুয়ারী পর্যন্ত নিঃসন্দেহে জীবিত ছিলেন। ঐ সময়ের অল্পকাল পরেই তিনি পরলোকগমন করেন, কারণ তাঁর পুত্র শামসুদ্দীন আহম্মদ শাহের ৮৩৬ হিজরার মুদ্রা পাওয়া গিয়েছে।

\* এই শিলালিপি দু'টির বিবরণের জগু ডঃ আহমদ হাসান দানী সংকলিত Bibliography of the Muslim Inscriptions of Bengal, (p. 14) এবং মৌলভী শামসুদ্দীন আহমদ সম্পাদিত Inscriptions of Bengal, Vol. IV (pp. 44-48) দ্রষ্টব্য।



ইব্ন-ই-হজরের মতে ৮৩৭ হিঃর রবি-অস্-মানী মাসে জলালুদ্দীনের মৃত্যু হয়। সম্ভবত তিনি '৮৩৬'এর জায়গায় '৮৩৭' লিখেছেন।

জলালুদ্দীন মুহম্মদ শাহের ৮৪০ হিজরার একটি মুদ্রাও নাকি পাওয়া গিয়েছে ( I. M. C. Coin no. 104 )। এই মুদ্রাটি সম্বন্ধে আচার্য যদুনাথ সরকার লিখেছেন, "It was probably posthumus." কিন্তু ৮৪০ হিজরায় শুধু জলালুদ্দীন নন, তাঁর পুত্র শামসুদ্দীন আহম্মদ শাহও সম্ভবত জীবিত ছিলেন না; সুতরাং এই সময়ে জলালুদ্দীনের নামে "posthumus" মুদ্রা বার হওয়া অসম্ভব ব্যাপার।

এই প্রসঙ্গে উল্লেখ করা যেতে পারে, মহেন্দ্রদেবের সব মুদ্রা ১৩৪০ শকাব্দের হলেও দুটি মুদ্রায় তারিখের অঙ্ক অস্পষ্ট। রাখালদাস বন্দ্যোপাধ্যায় বলেন, প্রথমটির তারিখ ১৩৩২ শকাব্দ হতে পারে ( বাংলার ইতিহাস, ২য় ভাগ, ১৩২৪, পৃ: ১৮২ )। স্টেশনটনের মতে অপর মুদ্রাটির তারিখ সম্ভবত ১৩৪১ শকাব্দ ( J. A. S. B, 1930, N.S., p. 8 )। দুটি মুদ্রাই পাণ্ডুগরের টাকশালে উৎকীর্ণ। এর থেকে কেউ কেউ মনে করেছেন মহেন্দ্রদেব ১৩৩২ শকে দলুজমর্দনদেবের রাজত্বকালে একবার বিদ্রোহী হয়েছিলেন এবং ১৩৪১ শক বা ৮২২ হিজরায় জলালুদ্দীনের রাজত্বকালে সাময়িকভাবে জলালুদ্দীনের কাছ থেকে পাণ্ডুয়া অধিকার করে নিয়েছিলেন।

কিন্তু এইসব মুদ্রার উপর কোন গুরুত্ব আরোপ করা অসুচিত। কারণ নেলসন রাইট বলেছেন, "In many cases the execution of the Bengal coins is very poor owing to mistakes made by ignorant or careless engravers, and the difficulty of deciphering them is greatly increased by the frequency of counter-stamps and cuts with a chisel: it is believed that these were made by the money-changers and bankers in order to give an artificial depreciation to coins of a previous year or a previous reign."

মহেন্দ্রদেবের ১৩৩২ ও ১৩৪১ শকাব্দের মুদ্রা এবং জলালুদ্দীনের ৮৪০ হিজরার মুদ্রার সৃষ্টি এইভাবেই হয়েছে, তাতে সন্দেহ নেই। অবশ্য এই সব মুদ্রার তারিখ ঠিকমত পড়া হয়েছে কিনা, তা'ও সন্দেহের বিষয়।

### শামসুদ্দীন আহমদ শাহ

জলালুদ্দীনের মৃত্যুর পর তাঁর ছেলে শামসুদ্দীন আহমদ শাহ রাজা হন। শামসুদ্দীনের কেবলমাত্র ৮৩৬ হিজরার মুদ্রা পাওয়া যাচ্ছে। কোন্‌ সময়ে শামসুদ্দীনের রাজত্ব শেষ হয়েছিল, তা বর্তমানে বলবার উপায় নেই। তবে ইব্ন-ই-হজরের সাক্ষ্য থেকে জানা যায় যে শামসুদ্দীন ৮৩৯ হিজরায় জীবিত ছিলেন (Islamic Culture, 1958, p. 206)। পরবর্তী সুলতান নাসিরুদ্দীন মাহমুদ শাহের ৮৪১ হিজরার মুদ্রা পাওয়া গিয়েছে। এর থেকেই বোঝা যায়, শামসুদ্দীনের রাজত্ব তার আগেই শেষ হয়েছিল এবং ‘খাইন-ই আকবরী’, ‘তবকাৎ-ই আকবরী’, ‘তারিখ ই-ফিরিশ্তা’, ‘রিয়াজ-উস্-সলাতীন’ প্রভৃতিতে যে বলা হয়েছে শামসুদ্দীন ১৬ বা ১৮ বছর রাজত্ব করেছিলেন, সে কথা সত্য হতে পারে না। বুকাননের বিবরণীতে বলা হয়েছে শামসুদ্দীন তিন বছর রাজত্ব করেছিলেন; এই উক্তি যথার্থ হতে পারে। ইব্ন-ই-হজরের সাক্ষ্য ও মুদ্রার সাক্ষ্যের সঙ্গে এর কোন বিরোধ নেই।

আজ অবধি কোন সমসাময়িক বিবরণে শামসুদ্দীন আহমদ শাহ সম্বন্ধে কোন তথ্য পাওয়া যায় নি। পরবর্তী সময়ে রচিত বিবরণীগুলির মধ্যে ‘তারিখ-ই-ফিরিশ্তা’ ও ‘রিয়াজ-উস্-সলাতীন’ ভিন্ন অল্পাংশ বিবরণীতে তাঁর সম্বন্ধে বিশেষ কোন কথা মেলেনা। ‘ফিরিশ্তা’ ও ‘রিয়াজে’র উক্তি পরস্পরবিরোধী এবং বিভ্রান্তিকর। ফিরিশ্তা বলেছেন, “তিনি (শামসুদ্দীন) তাঁর মহান পিতার পদাঙ্ক অনুসরণ করেছিলেন এবং ত্রায়পরায়ণতা ও উদারতার আদর্শ প্রাণপণে রক্ষা করেছিলেন। তাঁর কাছ থেকে উপহার পেয়ে বহু লোক বাধিত হয়েছিল।” কিন্তু ‘রিয়াজে’এ পাওয়া যাচ্ছে, “তিনি (শামসুদ্দীন) অত্যন্ত বদমেজাজী, অত্যাচারী এবং রক্তপিপাসু ছিলেন। বিনা কারণে তিনি রক্তপাত করতেন এবং গর্ভবতী মেয়েদের পেট চিরতেন। অত্যাচার যখন চরম সীমায় পৌঁছোলো এবং উচ্চনীচনির্বিশেষে সকলেই যখন তাঁর নৃশংসতায় শোচনীয়ভাবে পীড়িত হতে লাগল, তখন সাদী খাঁ এবং নাসির খাঁ নামে তাঁর দুই ক্রীতদাস, যারা অমাত্যের পদে অধিষ্ঠিত হয়েছিলেন, ষড়যন্ত্র করে আহমদ শাহকে হত্যা করেন।” শামসুদ্দীন ভাল ছিলেন না মন্দ ছিলেন, সে সম্বন্ধে নতুন কোন নির্ভরযোগ্য সূত্র আবিষ্কৃত না হওয়া পর্যন্ত কিছুই বলা যাবে না। বর্তমান অবস্থায় ‘ফিরিশ্তা’র অতি প্রশংসা এবং

‘রিয়াজ’-এর অতি নিন্দা-এই দুইয়ের মাঝখান থেকে সত্য নিধারণ করা দুরূহ।

সমসাময়িক আরবী ঐতিহাসিক ইব্ন-ই-ইজরের শাস্ত্য থেকে জানা যায় শামসুদ্দীন মাত্র ১৪ বছর বয়সে রাজা হয়েছিলেন (Islamic Culture, 1958, pp. 205-206 দ্রঃ।) এ অবস্থায় শামসুদ্দীন সম্বন্ধে ফিরিশ্তার প্রশংসা ও ‘রিয়াজ’-এর নিন্দা দুই-ই অতিরঞ্জিত বলতে হবে।

‘রিয়াজ’এর নিন্দাসূচক উক্তি সম্বন্ধে ডঃ দানী বলেন, “...this statement of the Riyād was born out of his (or his informant’s) desire to justify the action of the usurpers.....Such aspersion of personal and private character was the only justification for usurpation in the eyes of old historians.” কিন্তু শামসুদ্দীনকে যারা উচ্ছেদ করেছিল, সেই সাদী খাঁ ও নাসির খাঁর পক্ষ সমর্থন ‘রিয়াজ’-এ দেখা যায় না। বরং তাদের হেয় করেই আঁকা হয়েছে ঐ বইয়ে।

শামসুদ্দীনের মৃত্যু কীভাবে হল, সে সম্বন্ধে অন্ত্যাত্ম বিবরণীগুলি নীরব ; কেবল ‘রিয়াজ-উস-সলাতীন’ এবং বুকাননের বিবরণীতে পাওয়া যায় যে, শামসুদ্দীনের দুই ক্রীতদাস সাদী খাঁ ও নাসির খাঁ ষড়যন্ত্র করে তাঁকে হত্যা করেছিল। শামসুদ্দীনের স্বল্পস্থায়ী রাজত্বের কথা স্মরণ রাখলে এই কথা সত্য বলেই মনে হবে। পাণ্ডুয়ার একলাগী প্রাসাদের মধ্যে জলালুদ্দীনের ও শামসুদ্দীনের সমাধিক্ষেত্র বলে পরিচিত যে দুটি সমাধি-ক্ষেত্র রয়েছে, সে সম্বন্ধে আবিদ আলী লিখেছেন, “There are two stone posts at the head of the tombs of Jalāluddīn and Ahmed Shah. The stone on that of the latter is raised a little above the tomb, which shows that the grave belongs to a martyr.” (Memoirs of Gaur and Pandua, p. 126)। স্মরণ্য শামসুদ্দীনকে যে হত্যা করা হয়েছিল, তাতে সন্দেহের অবকাশ নেই বলা চলে। শামসুদ্দীনের পিতা জলালুদ্দীনের যে স্বাভাবিক মৃত্যু হয়েছিল, তাঁর কবর থেকে তা বোঝা যায়।

ঢাকা জেলার মুন্সাজ্জমপুরের শাহ লজ্জর দরগাহ একটি মসজিদে একটি খণ্ডিত শিলালিপি পাওয়া গিয়েছে, এতে তারিখ পাওয়া যায়নি, সমসাময়িক রাজার নামের একাংশ পাওয়া গিয়েছে ; এতে লেখা আছে, “মস্নদ শাহী

আহ্মদ শাহ”। বাংলার সিংহাসনে একমাত্র শামসুদ্দীন আহ্মদ শাহ ভিন্ন অন্য কোন “আহ্মদ শাহ” বসেছিলেন বলে জানা যায় না। সুতরাং এটি তাঁরই শিলালিপি বলে মনে হয়।

পরবর্তী সুলতান নাসিরুদ্দীনের সঙ্গে গণেশের বংশের কোন সংস্রব নেই। শামসুদ্দীনের মৃত্যুর সঙ্গে সঙ্গেই বাংলাদেশে গণেশের বংশের রাজত্ব চিরদিনের মত শেষ হল।

## তৃতীয় অধ্যায়

### মাহমুদ শাহী বংশ

( “পরবর্তী ইলিয়াস শাহী বংশ” )

#### নাসিরুদ্দীন মাহমুদ শাহ

শামসুদ্দীন আহমদ শাহের মৃত্যুর প্রকৃত বৎসরটি যতদিন না সঠিক ভাবে নির্ধারণ করা যাচ্ছে, ততদিন নাসিরুদ্দীন মাহমুদ শাহের সিংহাসনে আরোহণের সময়ও স্থিরভাবে নির্ণয় করা যাবে না। এক সময়ে সকলের ধারণা ছিল নাসিরুদ্দীন ৮৪৬ হিজরায় ( ১৪৪২-৪৩ খ্রীঃ ) সিংহাসনে আরোহণ করেন। কিন্তু নাসিরুদ্দীন যে তার কয়েক বছর আগেই রাজা হয়েছিলেন, তাঁর বহু প্রমাণ আছে। সেগুলি এই :—

(১) ৮৪১ হিজরায় (১৪৩৭-৩৮ খ্রীঃ) উৎকীর্ণ নাসিরুদ্দীন মাহমুদ শাহের একটি মুদ্রা পাওয়া গিয়েছে (Journal of the Numismatic Society of India, Vol. IX, Pt. I, p. 47 দ্রষ্টব্য)।

(২) ৮৪২ হিজরায় (১৪৩৮-৩৯ খ্রীঃ) উৎকীর্ণ নাসিরুদ্দীন মাহমুদ শাহের দুটি মুদ্রা পাওয়া গিয়েছে। এদের মধ্যে একটি চাটগাঁওয়ের টাকশালে এবং অপরটি সম্ভবত ফিরোজাবাদের টাকশালে তৈরী (P.A.S.B., 1893, p. 143 এবং J.A.S.B., 1893, pp. 232-33 দ্রষ্টব্য)। নাসিরুদ্দীন মাহমুদ শাহের ৮৪৩ হিঃর মুদ্রাও পাওয়া গিয়েছে।

(৩) ঢাকা বিশ্ববিদ্যালয়ের পুঁথিশালায় একটি দামবিজয়পত্র রক্ষিত আছে ; এটির তারিখ ২৩৮ পরগণাতি সংবৎ ( ১৪৪০ খ্রীঃ ) ; এতে তৎকালীন রাজা হিসাবে “সুলতান মাহামুদ সাহ গজন”-এর উল্লেখ আছে (Bibliography of the Muslim Inscriptions of Bengal, p. 133)।

সুতরাং নাসিরুদ্দীন যে পঞ্চদশ শতাব্দীর চতুর্থ দশকেই সিংহাসনে আরোহণ করেছিলেন, তাতে কোন সন্দেহ নেই। শামসুদ্দীনের আনুমানিক মৃত্যু-সাল ৮৩৯ হিঃ ( ১৪৩৫-৩৬ খ্রীঃ )। ঐ বছরেই নাসিরুদ্দীন রাজা হয়েছিলেন বলে আপাতত স্থির করা যেতে পারে।

কী করে নাসিরুদ্দীন সিংহাসনে আরোহণ করলেন, সে সম্বন্ধে ‘রিয়াজ-উস-সলাতীন’-এ এই বিবরণ পাওয়া যায়।

“আহমদ শাহের মৃত্যুর ফলে যখন সিংহাসন খালি হল, তখন সাদী খান নাসির খানকে নিজের পথ থেকে সরিয়ে রাজ্যের সর্বময়্য কর্তা হতে চাইলেন। কিন্তু নাসির খান তাঁর মংলব অমুমান করে তাঁর উপরে টেকা দিলেন। তিনি সাদী খানকে হত্যা করলেন এবং সাহস করে নিজেই সিংহাসনে আরোহণ করে আদেশ জারী করতে লাগলেন। আহমদ শাহের অমাত্য এবং সচিবেরা তাঁর কাছে বশুতা স্বীকার না করে তাঁকে বধ করলেন। তাঁর রাজত্বকাল কারও মতে সাতদিন স্থায়ী হয়েছিল, কারও মতে আধ দিন।

“ক্রীতদাস নাসির খান যখন তার দুষ্কার্যের ফলস্বরূপ নিহত হল, অমাত্য এবং সেনানায়কেরা তখন ঐক্যবদ্ধ হয়ে সুলতান শামসুদ্দীন ভাদ্রার (শামসুদ্দীন ইলিয়াস শাহ) এক পৌত্রকে সিংহাসনে বসালেন। এর এই গুরু দায়িত্ব বহনের যোগ্যতা ছিল। এর উপাধি হল নাসির শাহ।”

‘তবকাৎ-ই-আকবরী’ ও ‘তারিখ-ই-ফিরিশ্তা’তে এই বিবরণের সমর্থন আছে; তবে সাদী খান ও নাসির খান যে শামসুদ্দীন আহমদ শাহকে হত্যা করেছিলেন, একথা তাদের মধ্যে বলা হয়নি। ফিরিশ্তার মতে শামসুদ্দীনের স্বাভাবিক মৃত্যুর পরে সাদী খান ও নাসির খানের ক্ষমতা অধিকার, তাদের নিধন প্রাপ্তি এবং শামসুদ্দীন ইলিয়াস শাহের বংশধর নাসির শাহের (নাসিরুদ্দীন মাহমুদ শাহ) সিংহাসন লাভ সংঘটিত হয়েছিল। ‘তবকাৎ’-এ সাদী খানের নাম নেই; এই বইয়ের মতে আহমদ শাহের মৃত্যুর পরে নাসির নামক ক্রীতদাস সিংহাসনে আরোহণ করেছিল এবং আমীর ও মালিকদের হাতে সে নিহত হয়েছিল, তার পরে শামসুদ্দীন ইলিয়াস শাহের পৌত্র নাসিরুদ্দীন রাজা হয়েছিলেন। আধুনিক ঐতিহাসিকেরা এই তিনটি বিবরণীর উক্তিকে সত্য বলেই গ্রহণ করেছেন এবং নাসিরুদ্দীন যে শামসুদ্দীন ইলিয়াস শাহের বংশধর ছিলেন, এ সম্বন্ধে তাঁদের মনে কোন সন্দেহ নেই। তার ফলে তাঁরা নাসিরুদ্দীন মাহমুদ শাহের বংশকে “পরবর্তী ইলিয়াস শাহী বংশ” আখ্যায় অভিহিত করে থাকেন।

কিন্তু বুকাননের বিবরণীতে লেখা আছে, “Ahmed Shah .. reigned three years. He was destroyed by two of his nobles, Sadi Khan and Nasir Khan, the latter of whom was made king, and erected many buildings at Gaur, to which he seems to

have transferred the royal residence. He governed 27 years, and was succeeded by Sultan Barbuck Shah.” অষ্টাশ্র বিবরণীর মতে শামসুদ্দীন আহমদ শাহের হত্যাকারী ( বা তাঁর মৃত্যুর পরে ক্ষমতা-অধিকারী ) নাসির খান এবং নাসিরুদ্দীন মাহমুদ শাহ আলাদা লোক, কিন্তু বুকানন-বিবরণীর মতে তাঁরা একই লোক ( Cambridge History of India-তেও এঁদের একই লোক বলা হয়েছে )। এই অবস্থায় নাসিরুদ্দীন সত্যিই শামসুদ্দীন ইলিয়াস শাহের বংশধর ছিলেন কিনা, সে সন্দেহ সন্দেহ হয়। সন্দেহের আরও একটি কারণ আছে। শামসুদ্দীন ইলিয়াস শাহ ১৩৫৮ খ্রীষ্টাব্দে পরলোক গমন করেন। তাঁরই পৌত্র নাসিরুদ্দীনের পক্ষে ১৪৫২ খ্রীঃ অবধি বেঁচে থাকা অসম্ভব না হলেও অস্বাভাবিক ব্যাপার। এ অবস্থায় ইলিয়াস শাহ ও নাসিরুদ্দীনের সম্পর্ক সন্দেহ অতিনিশ্চিত হওয়া এবং নাসিরুদ্দীনের বংশকে “পরবর্তী ইলিয়াস শাহী বংশ” নাম দেওয়া অঐচ্ছানিক মনোভাবের পরিচায়ক।\* আমার মনে হয়, নাসিরুদ্দীন মাহমুদ শাহের বংশকে তাঁর নাম অনুসারে ‘মাহমুদ শাহী বংশ’ নাম দেওয়া উচিত।

‘তারিখ-ই-ফিরিশ্তা’য় লেখা আছে যে সিংহাসন লাভের আগে নাসিরুদ্দীন মাহমুদ শাহ লোকচক্ষুর অন্তরালে গ্রামাঞ্চলে কৃষিকার্যে নিযুক্ত ছিলেন এবং বাংলার রাজা হবার কথা স্বপ্নেও কোনদিন ভাবতে পারেন নি। রাজা গণেশ, জলালুদ্দীনের মুহম্মদ শাহ ও শামসুদ্দীন আহমদ শাহের রাজত্বকালে ইলিয়াস শাহী বংশের লোকেরা ও তাঁদের সমর্থকেরা ছত্রভঙ্গ হয়ে এদিকে সেদিকে ছড়িয়ে পড়েছিলেন, নাসিরুদ্দীন রাজা হলে তাঁরা আবার একত্র সমবেত হলেন। ফিরিশ্তা আরও লিখেছেন যে নাসিরুদ্দীনের রাজত্বকালে জৌনপুর, দিল্লী ও বাংলার সুলতানদের মধ্যে রেষারেষি দূর হয়ে শান্তি প্রতিষ্ঠিত হয়েছিল।

‘রিয়াজ’-এ নাসিরুদ্দীন সন্দেহে এই কয়েকটি কথা লিপিবদ্ধ রয়েছে,

“নাসির শাহ সমস্ত কাজ তায়পরায়ণতা এবং উদারতার সঙ্গে করতেন।

\* মনোমোহন চক্রবর্তী বহুদিন আগেই এই সত্য উপলব্ধি করেছিলেন। তাই তিনি নাসিরুদ্দীন মাহমুদ শাহের বংশকে “Later Ilyas Shahi Dynasty” না বলে “Mahmudi Dynasty” নামে অভিহিত করেছিলেন (JASB, 1909, p. 205 প্রঃ)।

যার ফলে বৃদ্ধ-যুবা নির্বিশেষে সমস্ত লোকে তৃপ্ত হল এবং আহম্মদ শাহের অত্যাচার-জনিত ক্ষত শুকিয়ে গেল। এই মহান্ রাজা গোড়ের দুর্গ ও প্রাসাদগুলি নির্মাণ করান।”

এই কথাগুলি যে মোটামুটিভাবে সত্য, তাতে কোন সন্দেহ নেই। কারণ স্রষ্টাসক না হলে নাসিরুদ্দৌনের পক্ষে সূদীর্ঘ ২৪।২৫ বছর ধরে অপ্রতিহতভাবে রাজত্ব করা সম্ভব হত বলে মনে হয় না। রজনীকান্ত চক্রবর্তীর মতে গোড়ের বিখ্যাত “সেনানী দরওয়াজা” বা “কোৎওয়ালা দরওয়াজা”র নির্মাতা নাসিরুদ্দৌন মাহমুদ শাহ।

কেউ কেউ অস্বীকার করেন নাসিরুদ্দৌনের রাজত্বকালটা পরিপূর্ণ শান্তিতেই কেটেছিল, কোন যুদ্ধবিগ্রহের মধ্যে তিনি যান নি। এই ধারণা যে সম্পূর্ণ সত্য নয়, তা পরবর্তী আলোচনা থেকে দেখা যাবে।

প্রথমত, উড়িষ্যারাজ কপিলেন্দ্রদেবের এক শিলালিপিতে লেখা আছে যে তিনি গোড়েশ্বরকে পরাস্ত করেছিলেন। কপিলেন্দ্রদেবের অন্ততম সামন্ত কোণ্ডাবিড়ুর গণদেব প্রদত্ত ১৩৭৭ শকের ভাদ্রমাসের ( = ১৪ ৫ খ্রী:) এক শাসন থেকে জানা যায় যে তিনি দুজন “তুরুক্ষ-নৃপতি”কে পরাজিত করেছিলেন। ঐ সময়ে উড়িষ্যার পাশে মাত্র দুজন “তুরুক্ষ” ( মুসলমান ) নৃপতিই ছিলেন—বাহমনীর রাজা এবং বাংলার রাজা। ঐ সময়ে নাসিরুদ্দৌনই বাংলার রাজা ছিলেন। কপিলেন্দ্রদেব তাঁর শিলালিপিতে “গোড়েশ্বর” উপাধি ধারণ করেছেন। সুতরাং নাসিরুদ্দৌনের সঙ্গে তাঁর যুদ্ধ হয়েছিল বলেই মনে হয়।

দ্বিতীয়ত, খুলনা-বশোহর অঞ্চলে ব্যাপক প্রবাদ প্রচলিত আছে যে, খান-জহান নামে বাংলার সুলতানের একজন সেনাপতি এই অঞ্চলে প্রথম মুসলমান রাজত্বের প্রতিষ্ঠা করেন। সম্ভবত এই কথা সত্য এবং বাংলার এই সুলতান নাসিরুদ্দৌন মাহমুদ শাহ। কারণ তাঁর রাজত্বকালে—৮৬৬ হিজরার ২৩শে জিলহিজ্জা তারিখে উৎকীর্ণ এক শিলালিপি বাগেরহাট অঞ্চলে পাওয়া গিয়েছে—এতে খান-জহানের মৃত্যুর উল্লেখ আছে। সুতরাং নাসিরুদ্দৌনের সামরিক অভিযানের এটি একটি নিদর্শন বলে গৃহীত হতে পারে।

তৃতীয়ত, মিথিলার বিখ্যাত কবি ও পণ্ডিত বিদ্যাপতি তাঁর ‘দুর্গাভক্তি-তরঙ্গিনী’ গ্রন্থে তাঁর পৃষ্ঠপোষক রাজা নরসিংহের দ্বিতীয় পুত্র ভৈরবসিংহ সন্মুখে লিখেছেন,



শৌর্য্যাবজিতপঞ্চগৌড়ধরনীনাথোপনম্রীকৃত্য-

হনেকোতু রুদ্রতুরঙ্গমঙ্গতসিতচ্ছত্রাভিরামোদয়ঃ ।

শ্রীমদ্ভৈরবসিংহদেবনৃপতির্গুণানুজ্ঞাজয়-

ত্যাচন্দ্রার্কমখণ্ডকীতিসহিতঃ শ্রীরূপনারায়ণঃ ॥

‘দুর্গাভক্তিতরঙ্গিণী’ ১৪৫০ খ্রীঃর কাছাকাছি সময়ে রচিত হয়েছিল (প্রাচীন বাংলা সাহিত্যের কালক্রম, পৃঃ ৪৬ দ্রষ্টব্য)। এই সময়ের দু’এক বছর এদিক-ওদিক হতে পারে কিন্তু এই বই যে ১৪৬০ খ্রীষ্টাব্দের আগে লেখা হয়েছিল, সে সম্বন্ধে কোন সন্দেহই থাকতে পারে না। ‘দুর্গাভক্তিতরঙ্গিণী’ রচনার আগে ভৈরবসিংহ যে “পঞ্চগৌড়ধরনীনাথ” অর্থাৎ বাংলার রাজাকে “নম্রীকৃত” করেছিলেন, তিনি নাসিরুদ্দীন মাহমুদ শাহ ভিন্ন আর কেউই হতে পারেন না। ‘দুর্গাভক্তিতরঙ্গিণী’ রচনার সময়ে ভৈরবসিংহের বয়স খুব বেশী ছিল না, কারণ তাঁর পিতা ও জ্যেষ্ঠ ভ্রাতা দু’জনেই ঐ সময়ে জীবিত ছিলেন। সুতরাং নাসিরুদ্দীনের সিংহাসনে আরোহণের আগে অর্থাৎ ‘দুর্গাভক্তিতরঙ্গিণী’ রচনার ১৫ বছরেরও বেশী আগে ভৈরবসিংহের কোন গোড়েশ্বরকে “নম্রীকৃত” করবার মত বয়স নিশ্চয়ই হয়নি।

সুতরাং ভৈরবসিংহ কর্তৃক “নম্রীকৃত” গোড়েশ্বর যে নাসিরুদ্দীন, তা জানা গেল। কিন্তু ত্রিহতের এক ক্ষুদ্র ভূস্বামীর পুত্র ভৈরবসিংহ প্রবলপ্রতাপ গোড়েশ্বরকে নম্রীকৃত করেছিলেন, এ ব্যাপার কেমন করে সম্ভব হয়? আমার মনে হয়, নাসিরুদ্দীন মাহমুদ শাহ মিথিলার অঞ্চলবিশেষ নিজের অধিকারভুক্ত করবার চেষ্টা করেছিলেন এবং ভৈরবসিংহ প্রশংসনীয় বীরত্ব দেখিয়ে সেই পচেষ্টা ব্যর্থ করে দিয়েছিলেন। মোটের উপর, ভৈরবসিংহ তথা মিথিলার রাজাদের সঙ্গে যে নাসিরুদ্দীনের যুদ্ধ হয়েছিল, তাতে কোন সন্দেহ নেই। ত্রিহতের পাশে ভাগলপুর ও মুন্সের অঞ্চলে নাসিরুদ্দীনের অধিকার ছিল। এ কথা নাসিরুদ্দীনের এই অঞ্চলে প্রাপ্ত শিলালিপি থেকে জানা যায়। সুতরাং নাসিরুদ্দীনের সঙ্গে ত্রিহতের রাজাদের যুদ্ধ হওয়া খুবই স্বাভাবিক।

পঞ্চদশ শতাব্দীর একেবারে প্রথমে চীনের সঙ্গে বাংলার রাজনৈতিক সম্পর্ক স্থাপিত হয়। ৩৪ বছর ধরে এই সম্পর্ক অব্যাহত থাকবার পর নাসিরুদ্দীনের রাজত্বকালেই তা ছিন্ন হয়। চীনদেশের ইতিহাসগ্রন্থগুলির মধ্যে চীন-বাংলা রাজনৈতিক সংযোগের যে বিবরণ পাওয়া যায়, তা এখানে উল্লেখ করা দরকার মনে করি।

যে সমস্ত চীনা বইতে বাংলার সঙ্গে চীনের সম্পর্কের বিশদ ও ধারাবাহিক ইতিহাস পাওয়া যায়, তার মধ্যে তিনখানি বই বিশেষভাবে উল্লেখযোগ্য। এই তিনখানি বইয়ের নাম ‘শি-য়াং-ছাও-কুং-তিয়েন-লু’, ‘শু-য়-চৌ-ংজ-লু’ এবং ‘মিং-শু’। এই বইগুলির রচনাকাল আলোচ্য সময়ের পরবর্তী হলেও এগুলি সমসাময়িক দলিলপত্র অবলম্বনে লেখা বলে এদের প্রামাণিকতা অবিসংবাদিত। এই তিনখানি বই থেকে যা জানতে পারা যায়, তা নীচে দেওয়া হল।\*

‘শি-য়াং-ছাও-কুং-তিয়েন-লু’ (রচনাকাল ১৫২০ খ্রীঃ—রচয়িতা হোয়াং-শিং-ংসাং)-তে এইটুকু বিবরণ পাওয়া যায়,—

“সম্রাট্ য়ং-লো’র রাজত্বের ষষ্ঠ বর্ষে (১৪০৮ খ্রীঃ) (বাংলার) রাজা জায়-য়া-স্জ-তিং (গি-য়া-স্জ-দ্দীন) চীনদেশে ভেট সমেত এক দূত পাঠান। একজন দূত য়ং-লো’র রাজত্বে নবম বর্ষে (১৪১২ খ্রীঃ) থাই-ং-সাং-এ পৌছোন। পররাষ্ট্র দপ্তরের একজন বাজকর্মচারীকে সেখানে পাঠানো হয় তাঁকে অভ্যর্থনা করবার জন্তে। য়ং-লো’র রাজত্বে দ্বাদশ বর্ষে (১৪১৪ খ্রীঃ) বাংলা থেকে পা-য়ি-চি (বায়াজিদ) নামে একজন মন্ত্রী কি-লিন (জিরাফ) এবং অগ্নাগ্ন উপহার সমেত চীনে আসেন। সম্রাট চেন-থুং-এর রাজত্বের তৃতীয় বর্ষে (১৪৩৮ খ্রীঃ) বাংলা থেকে একই ধরনের উপহার সমেত আর একজন দূত আসেন।”

‘শু-য়-চৌ-ংজ-লু’ (রচনাকাল ১৫৭১ খ্রীঃ—রচয়িতা য়েন-ংসুং-চিয়েন)-এ বলা হয়েছে,—

“য়ং-লো’র রাজত্বের তৃতীয় বর্ষে (১৪০৫ খ্রীঃ) বাংলার রাজা জায়-য়া-স্জ-তিং চীনের রাজসভায় দূত পাঠান। (চীন)-সম্রাটও বাংলার রাজা ও রাণীকে নানারকম রেশমী কাপড় উপহার পাঠাতে আদেশ দেন। য়ং-লোর রাজত্বের ষষ্ঠ বর্ষে (১৪০৮ খ্রীঃ) ঐ দেশের (বাংলার) রাজা আবার দূত পাঠালেন। এই দূত ভেট সমেত থাই-ং-সাং বন্দরে এসে পৌছোলেন। (চীনের) সম্রাট তাঁকে অভ্যর্থনা জানাবার জন্তে পররাষ্ট্র দপ্তরের মন্ত্রীকে

\* এই অংশটি লেখার সময় JRAS, 1895, pp. 529-33এ প্রকাশিত ফিলিপ্সের প্রবন্ধ, T’oung Pao, 1915, pp. 440-444এ প্রকাশিত রকহিলের প্রবন্ধ, VBA, I, pp. 96-134এ প্রকাশিত ডঃ প্রবোধচন্দ্র বাগচীর প্রবন্ধ, এবং প্রবাসী, বৈশাখ, ১৩৫১, পৃঃ ৫৪-৫৭তে প্রকাশিত শ্রীযুক্ত অর্জুনকুমার গঙ্গোপাধ্যায়ের প্রবন্ধ থেকে সাহায্য পেয়েছি।

সেখানে পাঠালেন। য়ুং-লো'র রাজত্বের দ্বাদশ বর্ষে ( ১৪১৪ খ্রীঃ ) বাংলার রাজা পা-য়ি-চি\* নামে তাঁর একজন মন্ত্রীকে চীনে পাঠালেন, জিরাফ এবং অন্যান্য উপহার সঙ্গে দিয়ে। তাইতে আচার-অনুষ্ঠান দপ্তরের মন্ত্রী ( চীন )-সম্রাটকে অভিনন্দন জানানালেন। সম্রাট উত্তরে বললেন, “দেশের শাসনকার্যে তোমরা আমাকে রাজিদিন সাহায্য কর, এতেই দেশের উপকার হচ্ছে। জিরাফ দেশে থাকুক বা না থাকুক, কিছু আসে যায় না।” ( চীন )-সম্রাটও বাংলার রাজাকে ভেট পাঠালেন। বাংলার প্রতিনিধিদলের লোকদেরও পদমর্যাদা অনুসারে নানারকম উপহার দেওয়া হল। য়ুং-লো'র রাজত্বের ত্রয়োদশ বর্ষে ( ১৪১৫ খ্রীঃ ) চীন-সম্রাট হৌ-শিয়েন নামে একজন উচ্চপদস্থ রাজপুরুষকে অনেক লোকজন এবং এক বিরাট নৌবহর ও সৈন্যসামন্ত সমেত বাংলায় পাঠিয়েছিলেন।”

চীনের ‘মিং’ রাজবংশের সরকারী ইতিহাসগ্রন্থ ‘মিং-শু’ ( রচনাকাল ১৭৩৪ খ্রীঃ ) থেকে এই দুই বিবরণীও অতিরিক্ত কিছু তথ্য পাওয়া যায়। ‘মিং-শু’-এর ‘ওয়াই-কুও-চোয়ান’ ( বিদেশ সংক্রান্ত নথীপত্র ) অধ্যায়ে বাংলা সম্বন্ধে যে বিবরণ পাওয়া যায়, তা নীচে উদ্ধৃত হল :—

“য়ুং-লো'র রাজত্বের ষষ্ঠ বর্ষে ( ১৪০৮ ) বাংলার রাজা উপহার সমেত চীনে একজন দূত পাঠান। চীনও প্রতিদানস্বরূপ অনেক উপহার পাঠায়। য়ুং-লো'র রাজত্বের সপ্তম বর্ষে ( ১৪০৯ ) তাঁদের দূত ২৩০ জন রাজকর্মচারী সঙ্গে নিয়ে চীনে এসেছিলেন। ( চীন )-সম্রাট সেই সময় বিদেশের সঙ্গে সংযোগ রক্ষার নীতি গ্রহণ করেছিলেন। কাজেই তিনি বাংলা দেশে অনেক উপহার পাঠালেন। এর পর থেকে তারা ( বাংলার রাজদূতেরা ) প্রতি বছরই (চীনে) আসত।” য়ুং-লো'র রাজত্বের দশম বর্ষে ( ১৪১২ ) বাংলার রাজদূতেরা চীনে পৌঁছোবার পূর্বাঙ্কে সম্রাট তাঁদের অভ্যর্থনার ব্যবস্থা করার

\* ডঃ প্রবোধচন্দ্র বাগচী মনে করেন ‘পা-য়ি-চি’ ‘বায়াজিদ’ নামের অপভ্রংশ। এই মত খুবই যুক্তিযুক্ত। কিন্তু এখানে একটা কথা আছে। ১৪১৪ খ্রীষ্টাব্দে শিহাবুদ্দীন বায়াজিদ শাহ বাংলার হুলতান ছিলেন। ‘বায়াজিদ’ নামে তিনিও অভিহিত হতে পারেন। অতএব তাঁর নামটিই ‘শু-য়ু-চৌ-বজ-লু’তে তাঁর প্রেরিত মন্ত্রীর উপরে ভুলক্রমে আরোপিত হয়েছে, এমনও হতে পারে।

† “প্রতি বছর”ই বাংলার রাজদূতেরা চীনে যেত কিনা, সে সম্বন্ধে সন্দেহের অবকাশ আছে। চীনা বিবরণীগুলিতে বিশেষভাবে যে সালগুলির উল্লেখ করা হয়েছে, সেই সব বছরে যে বাংলা থেকে চীনে রাজদূত গিয়েছিল, তাতে কোন সংশয় নেই।

জগু কয়েকজন মন্ত্রীকে চেন-চিয়াং-এ পাঠালেন। ব্যবস্থা যখন সম্পূর্ণ, এমন সময় বাংলার দূতেরা তাদের রাজার মৃত্যু-সংবাদ নিয়ে পৌঁছোলো। মৃত রাজার শোকাহুঠানে যোগ দেবার জগু চীন থেকে রাজপুরুষদের পাঠানো হল। তাঁর পুত্র সাই-উ-তিং (সৈফুদ্দীন)-কে বাংলার রাজ্যরূপে নিযুক্ত করা হ'ল। য়ং-লো'র রাজত্বের দ্বাদশ বর্ষে ( ১৪১৪ ) নতুন এক রাজা ধনুবাদ জানিয়ে এক লিপি পাঠালেন, সেই সঙ্গে নানারকম উপহার পাঠালেন—তার মধ্যে ছিল জিরাফ, বাংলার বিখ্যাত ঘোড়া এবং সেখানকার নানারকম উৎপন্ন দ্রব্য। চীনের রাজপুরুষেরা এর জগু সম্রাটকে অভিনন্দন জানাবার প্রস্তাব করলেন, কিন্তু সম্রাট এই প্রস্তাব অগ্রাহ্য করলেন। পরের বছর ( ১৪১৫ ) রাজা, রানী এবং রাজপুরুষদের জগু অনেক উপহার সমেত হৌ-শিয়েনকে ঐ দেশে পাঠানো হ'ল। তারপর চেন-থুং এর রাজত্বের তৃতীয় বর্ষে ( ১৪৩৮ ) তারা আর একবার জিরাফ উপহার পাঠায়। সমস্ত রাজপুরুষ এই ঘটনা উপলক্ষে সম্রাটকে অভিনন্দন জানান। পরের বছর ( ১৪৩৯ ) আবার ঐ দেশ থেকে উপহার আসে। তারপর থেকে ঐ দেশের সঙ্গে চীনের সম্পর্ক ছিন্ন হয়।”

কিন্তু ‘মিং-শ্ব’-এর অগু কয়েকটি অধ্যায়ে প্রাসঙ্গিক উল্লেখের মধ্য দিয়ে বাংলার সম্বন্ধে আরও নতুন ও মূল্যবান তথ্য পাওয়া যায়। ‘মিং-শ্ব’, ‘শিং-ছা-গুং-লান’ প্রভৃতি বইগুলিতে বলা হয়েছে এই সময় সুন-না-পু-আড় বা চাও-না-ফু-আড় নামে ভারতের একটি রাজ্যের সঙ্গে চীনের রাজনৈতিক সম্পর্ক ছিল, যে রাজ্যের অন্তর্ভুক্ত ছিল বুদ্ধদেবের সিদ্ধিলাভের স্থানটি। এই সুন-না-পু-আড় বা চাও-না-ফু-আড় হচ্ছে জোনপুৰ রাজ্য ; বুদ্ধদেবের সিদ্ধিলাভের স্থান গরা ঐ সময়ে এই রাজ্যেরই অন্তর্ভুক্ত ছিল। ‘মিং-শ্ব’-এর ৩২৬শ অধ্যায়ে জোনপুরের সঙ্গে চীনের সম্পর্কের যে সংক্ষিপ্ত বিবরণ পাওয়া যায়, তার মধ্যে বাংলা সম্বন্ধে গুরুত্বপূর্ণ তথ্য মেলে। নীচে এই বিবরণটি উদ্ধৃত হল :—

সুন-না-পু-আড়—বাংলার পশ্চিমে অবস্থিত। একে মধ্য ভারতও বলা হয়। প্রাচীন যুগে এখানে বুদ্ধ থাকতেন। য়ং-লো'র রাজত্বের দশম বর্ষে ( ১৪১২ খ্রী: ) (চীনের) একজন রাজদূতকে রাজকীয় সনদ দিয়ে ঐ রাজ্যে পাঠানো হয়। তাদের রাজা য়ি-পুলা ( ইব্রা=ইব্রাহিম শর্কী )-কে সোনালী জন্মির কাজ করা বেশমী কাপড় উপহার দেওয়া হয়। য়ং-লো'র রাজত্বের

অষ্টাদশ বর্ষে ( ১৪২০ খ্রীঃ ) বাংলার রাজদূত ( চীন-সম্রাটকে ) জানান যে, তাদের ( জৌনপুরের ) রাজা কয়েকবার বাংলা আক্রমণ করেছেন। হৌ-শিয়েনকে তখন সম্রাটের আদেশ দিয়ে পাঠানো হল তাঁকে ( জৌনপুররাজকে ) বলবার জন্য যে, প্রতিবেশীর প্রতি ভাল ব্যবহার করেই তিনি নিজের সম্পত্তি ঠাঁচাতে পারেন। তাঁকে রেশম এবং টাকাকড়ি দেওয়া হল। হৌ-শিয়েন তখন বজ্রাসন ( গয়া ) পরিদর্শন করে সেখানে কিছু দান করলেন। এট রাজ্যটি চীন থেকে অনেক দূরে অবস্থিত। তাই এরা চীনে কোন ভেট পাঠাতে পারে নি।”

উপরের বিবরণে হৌ-শিয়েন নামে যে চীনা রাজপুরুষের নাম করা হয়েছে, ‘মিং-শু’-এর ৩৪০শ অধ্যায়ে তাঁর জীবনী পাওয়া যায়। এই জীবনীর মধ্যে এক জায়গায় বাংলা ও জৌনপুর সম্বন্ধে উল্লেখযোগ্য তথ্য মেলে। এই অংশটি নীচে উদ্ধৃত করছি :—

“মিং-লো’র রাজত্বের ত্রয়োদশ বর্ষের ( ১৪১৫ ) সপ্তম মাসে সম্রাট বাংলা এবং অন্যান্য দেশের সঙ্গে সংযোগ স্থাপন করতে ইচ্ছুক হয়ে হৌ-শিয়েনকে এক নৌবহর সমেত পাঠালেন।\* এষ্ট দেশটি ( বাংলা ) হচ্ছে ভাববত্বের পূর্ব দিকে। চীন থেকে এর দূরত্ব খুব বেশী। তাদের রাজা সাই-ফু-তিং

\* হৌ-শিয়েনের দ্বারা ‘শিং-ভা-মিং-লান’ বইয়ে বর্ণিত আছে।

† ‘সাই-ফু-তিং’-এর সঙ্গে বাংলার যে রাজার নামের মিল আছে, তিনি হচ্ছেন সৈফুদ্দীন ( হুম্জা শাহ )। কিন্তু দ্বারার সাক্ষ্য থেকে দেখা যায়, সৈফুদ্দীনের রাজত্বকাল ৮১৩-৮১৫ হিজরা। সুতরাং ১৪১৩ খ্রীষ্টাব্দের পরে সৈফুদ্দীন রাজত্ব করতে পারেন না। অথচ উপরে উদ্ধৃত বিবরণীতে বলা হয়েছে, সাই-ফু-তিং ১৪১৪ খ্রীষ্টাব্দে চীনদেশে ভেট পাঠিয়েছিলেন এবং ১৪২০ খ্রীষ্টাব্দে জৌনপুররাজ বাংলা আক্রমণ করায় চীন-সম্রাটকে খবর দিয়েছিলেন। সুতরাং এই বিবরণীতে বাংলার রাজার নাম নির্দেশে যে ভুল হয়েছে, তাতে কোন সন্দেহ নেই। এষ্ট ভুল কেন হ’ল তাও বোঝা যায়। ‘মিং-শু’-এর অন্তর্ভুক্ত রয়েছে, ১৪১২ খ্রীষ্টাব্দে চীনসম্রাটের প্রতিনিধিরা সৈফুদ্দীনের অভিষেক-উৎসবে যোগ দিতে এসেছিলেন। ১৪১২ খ্রীষ্টাব্দে তাঁর অভিষেক হয়েছিল, ১৪১৪ ও ১৪২০ খ্রীষ্টাব্দে তিনিই বাংলার রাজা ছিলেন, এই সরল বিখ্যাসের বশবর্তী হয়েই হৌ-শিয়েনের জীবনী-লেখক ঐ দুই সালের ঘটনার উল্লেখের সময় ‘সাই-ফু-তিং’ নামটি বসিয়ে দিয়েছেন। নামটি যে তাঁর নিজেরই সংযোজন, তার প্রমাণ হচ্ছে, ‘মিং-শু’-এর ৩২৬শ অধ্যায়ে ১৪২০ খ্রীষ্টাব্দের বাংলা-জৌনপুর সংঘর্ষের যে বিবরণ পাওয়া যায়, তাতে বাংলার রাজার নাম উল্লিখিত হয়নি। উপরের বিবরণীটি বর্ণিত ঘটনার তিনশো বছর পরে লেখা এবং লেখকও বাংলার ইতিহাস সম্বন্ধে সম্পূর্ণ অজ্ঞ ছিলেন ; সুতরাং তাঁর পক্ষে এটুকু ভুল হওয়া স্বাভাবিক।

( চীনেতে ) কি-লিন ( জিরাফ ) এবং অন্যান্য দেশজ সামগ্রী ভেট পাঠিয়েছিলেন।\* সম্রাট এতে খুব খুশী হয়েছিলেন। তিনিও প্রতিদানে অনেক জিনিস পাঠিয়েছিলেন। বাংলায় পশ্চিমে স্বে-না-পু-আড় নামে একটি রাজ্য আছে। রাজ্যটি ভারতবর্ষের ঠিক মাঝখানে অবস্থিত। এই হচ্ছে বুদ্ধের আদি পীঠস্থান। এই দেশের রাজা বাংলা আক্রমণ করেছিলেন। সাই-ফু-তিং তখন চীনসম্রাটকে খবর দেন। যুং-লো'র রাজত্বের অষ্টাদশ বর্ষের ( ১৪২০ খ্রীঃ ) নবম মাসে সম্রাট হৌ-শিয়েনকে আদেশ দেন ( ভারতবর্ষে ) গিয়ে তাঁদের ( বাংলা ও জৌনপুরের রাজার ) মধ্যে শান্তি স্থাপন করতে। ( জৌনপুরের রাজাকে ) সোনাদানা এবং টাকাকড়ি উপহার দিয়ে যুদ্ধ বন্ধ করা হল।”

উদ্ধৃত অংশগুলি থেকে পরিষ্কার বোঝা যাচ্ছে যে, ১৪০৫, ১৪০৮, ১৪০৯, ১৪১১, ১৪১২, ১৪১৪, ১৪২০, ১৪৩৮ ও ১৪৩৯ খ্রীষ্টাব্দে বাংলা থেকে চীনে দূত গিয়েছিল এবং ১৪০৯, ১৪১২ ও ১৪১৫ খ্রীষ্টাব্দে চীন থেকে বাংলায় দূত এসেছিল। বাংলার সুলতান গিয়াসুদ্দীন আজম শাহ স্বতঃপ্রবৃত্ত হয়ে চীনের সঙ্গে রাজনৈতিক সম্পর্ক স্থাপন করেন। গিয়াসুদ্দীনের মৃত্যুর পরে দেশের শাসন-ক্ষমতাব্যবহার বিকারী হন রাজা গণেশ ও তাঁর উত্তরাধিকারীরা। তাঁদের আমলেও চীনের সঙ্গে বাংলার সম্পর্ক অক্ষুণ্ণ থাকে। কিন্তু গণেশের নানা ক্ষমতাহীনতা হবার এবং নাসিরুদ্দীন মাহমুদ শাহের সিংহাসনে আরোহণের অল্পদিন বাদেই এই সম্পর্ক ছিন্ন হয়।

চীনা বিবরণীগুলি থেকে জানা যাচ্ছে যে বাংলার রাজা কয়েকবার চীন-সম্রাটকে জিরাফ পাঠিয়েছিলেন। এই তথ্যটুকু নানাদিক দিয়ে বিশেষ মূল্যবান। জিরাফ আফ্রিকারই জন্তু অথচ বাংলার রাজা চীনসম্রাটকে জিরাফ উপহার পাঠিয়েছিলেন। এর থেকে বোঝা যায়, ঐ সময় স্তদূর আফ্রিকার সঙ্গেও বাংলার সংযোগ ছিল। বাংলার রাজা ১৪১৪ খ্রীষ্টাব্দে চীন-সম্রাটকে যে জিরাফটি উপহার পাঠিয়েছিলেন, তার একটি সমসাময়িক ছবি পাওয়া

\* বাংলার রাজার এই জিরাফ ও অন্যান্য দেশজ সামগ্রী প্রেরণ যে ১৪১৫ খ্রীষ্টাব্দের আগেকার ঘটনা তা বর্ণনার ভাষা থেকেই বোঝা যায়। আসলে এগুলি ১৪১৪ খ্রীষ্টাব্দে প্রেরিত হয়েছিল ( ১৭৭ পৃঃ দ্রষ্টব্য )। পরবর্তী ছত্রে চীন-সম্রাটের যে প্রতিদানে অনেক জিনিস পাঠানোর কথা বলা হয়েছে, সেগুলিই হৌ-শিয়েনের মারফৎ পাঠানো হয়।

গিয়েছে। ছবিটির উপরে একটি কবিতা লেখা আছে, এতে চীন-সম্রাটকে জিরাফ পাওয়ার জন্য অভিনন্দন জানানো হয়েছে। শোন্-তু নামে একজন কবি-শিল্পী এই ছবিটি আঁকেছিলেন ও কবিতাটি লিখেছিলেন। কবিতাটি থেকে জানা যায়, য়ুং-লোর রাজত্বে দ্বাদশ বর্ষের নবম মাসে (অক্টোবর-নভেম্বর, ১৪১৪ খ্রিঃ) জিরাফটি চীনে পৌঁছায় (শ্রীযুক্ত অর্ধেন্দ্রকুমার গঙ্গোপাধ্যায়েব প্রবন্ধ, প্রবাসী, বৈশাখ, ১৩৫১, পৃঃ ৫৪-৫৭ দ্রষ্টব্য)। চীনদেশে বাংলার পাঠানো জিরাফ যে বিরাট উদ্দীপনা ও চাকল্যের সৃষ্টি করেছিল, তা সম্রাটকে এত অভিনন্দন জানানো থেকেই বোঝা যায়। চীনের বিখ্যাত কবিরা বাংলার পাঠানো জিরাফকে নিয়ে অনেক কবিতা লিখেছিলেন। ক্রমশ এই জিরাফকে নিয়ে নানারকম রূপকথার গল্প রটল—একবার রটে গেল, একটি জিরাফ এক বাঘের ছানা প্রসব করেছে; তার আবার গরুর মত ক্ষুর আছে, লেজটিও গরুরই মত। এই গল্পগুলি পড়লে অনাবিল কৌতুকরস উপভোগ করা যায়।

চীন থেকে যে সব প্রতিনিধিরা বাংলায় এসেছিলেন, তাঁরা তাঁদের দেখা বাংলার বিবরণও লিখে রেখে গিয়েছেন। এই প্রত্যক্ষদর্শীর বিবরণগুলি হু'খানি সমসাময়িক বইতে প্রথম সঙ্কলিত হয়, তাদের মধ্যে একখানির নাম 'য়িং-য়া-শ্যাং-লান'; এর রচনাকাল ১৪২৫ থেকে ১৪৩০ খ্রীষ্টাব্দের মধ্যে, লেখকের নাম মা-হোয়ান। দ্বিতীয় বইটির নাম 'শিং-ছা-শ্যাং-লান'; এর রচনাকাল ১৪৩৬ খ্রীষ্টাব্দ, লেখকের নাম ফেই-শিন। আমরা এই বইয়ের অগ্রভাগে এই দুটি বিবরণ সম্পূর্ণ উদ্ধৃত করেছি।

পঞ্চদশ শতাব্দীর প্রথম দিকে চীন এবং বাংলার মধ্যে যে রাজনৈতিক সংযোগ স্থাপিত হয়েছিল, তার ইতিহাস সংক্ষেপে এই। আগেই বলা হয়েছে যে, এই সংযোগের প্রথম সূচনা করেছিলেন বাংলার রাজা গিয়াসুদ্দীন আজম শাহ এবং তাঁর পরবর্তী রাজারা অনেকদিন পর্যন্ত এই নীতি অনুসরণ করেছিলেন। বাংলার রাজার পক্ষে এই বিচক্ষণ পররাষ্ট্র-নীতি অনুসরণ বিশেষ প্রশংসার মনোভাব নেই, তবে বাংলার রাজার এই আচরণ চীন-সম্রাট ও তাঁর প্রজাদের দৃষ্টিতে বাড়াবাড়ি ছিল। কারণ চীনে প্রাচীনকাল থেকে সকলের মধ্যে এই ধারণা প্রচলিত ছিল যে চীন-সম্রাট সমগ্র পৃথিবীর একচ্ছত্র অধিপতি, অগ্র সব রাজারা তাঁর সামন্ত মাত্র। বাংলার রাজার দূত ও উপহার পাঠানোকেও চীনা বইগুলিতে এই দৃষ্টিভঙ্গী দিয়েই দেখা হয়েছে। এই

বইগুলিতে বাংলার রাজার বন্ধু নৃপতির মত চীন-সম্রাটকে উপহার পাঠানো। ব্যাপারকে “ভেট পাঠানো” বলা হয়েছে, বাংলার রাজার কাছে পাঠানো চীন-সম্রাটের চিঠিকে “সার্বভৌম অধিরাজের আদেশালিপি” বলা হয়েছে এবং গিয়াসুদ্দীন আজম শাহের মৃত্যুর পর সৈফুদ্দীন হুম্‌জা শাহের সিংহাসনে আরোহণের উল্লেখ করবার সময়ে বলা হয়েছে যে চীনসম্রাট সৈফুদ্দীনকে বাংলার “রাজ্যরূপে নিযুক্ত” করেছিলেন।

বাংলার সঙ্গে চীনের এই সংযোগ বিচ্ছিন্ন হবার জ্ঞাত চীনই দায়ী। চীনা বিবরণ থেকেই জানা যাচ্ছে, নাসিরুদ্দীন মাহ্‌মুদ শাহ ছবার— ১৫৩৮ ও ১৪৩৯ খ্রীষ্টাব্দে চীন-সম্রাটের কাছে উপহাবসমেত রাজদূত পাঠিয়েছিলেন। একবার তিনি জিরাফও পাঠিয়েছিলেন। স্মরণে রাখা যাচ্ছে, এ বিষয়ে নাসিরুদ্দীন তাঁর পূর্ববর্তী সুলতানদের পদাঙ্ক অনুসরণ করে চলেছিলেন। কিন্তু তাঁর সমসাময়িক চীন-সম্রাট চেন্‌থুং এ বিষয়ে যুং-লোর (১৪০২-২৫ খ্রীঃ) পদাঙ্ক অনুসরণ করেন নি। যুং-লো বিদেশের, বিশেষত এশিয়ার বিভিন্ন দেশের সঙ্গে সংযোগ স্থাপনে বিশেষ উৎসাহী ছিলেন। কিন্তু তাঁর পরবর্তী চীন-সম্রাটদের, বিশেষভাবে চেন্‌থুং-এর সে বিষয়ে বিশেষ উৎসাহ ছিল না। তার প্রমাণ, নাসিরুদ্দীন তাঁকে পরপর দু’বছর, উপহার পাঠালেও তিনি বাংলার রাজাকে কোন উপহার পাঠান নি। বলা বাহুল্য, এই একতরফা উপহার প্রেরণ বেশী দিন চলা সম্ভব ছিল না। ফলে উভয় দেশের সংযোগও ছিন্ন হয়ে যায়।

নাসিরুদ্দীন মাহ্‌মুদ শাহের যে সমস্ত মুদ্রা এ পর্যন্ত পাওয়া গিয়েছে, সেগুলি ফতেহাবাদ ও মাহ্‌মুদাবাদের টাকশালে তৈরী। ফতেহাবাদ বর্তমান ফরিদপুর অঞ্চলের সঙ্গে অভিন্ন। কিন্তু মাহ্‌মুদাবাদের অবস্থান আজও পর্যন্ত চূড়ান্তভাবে নির্ণীত হয়নি। আজ পর্যন্ত এই সব জায়গায় তাঁর শিলালিপি আবিষ্কৃত হয়েছে—বালিয়াঘাটা (জঙ্গীপুর), গোঁড়, সাতগাঁও, হজবং পাণ্ডুয়া, নসওয়ালাগলী (ঢাকা), ভাগলপুর, মুঙ্গের, ঘঘরা (ময়মনসিংহ) ও কিওয়ারজোর (ময়মনসিংহ)। স্মরণে রাখা পশ্চিমবঙ্গ, পূর্ববঙ্গ ও উত্তরবঙ্গের অধিকাংশ এবং বিহারের কতকাংশ নাসিরুদ্দীনের রাজ্যের অন্তর্ভুক্ত ছিল, তাতে সন্দেহ নেই। এ ছাড়া নরিগু (ঢাকা), ত্রিবেণী ও বাগেরহাটে তিনটি শিলালিপি পাওয়া গিয়েছে, এগুলি নাসিরুদ্দীনেরই রাজত্বকালে উৎকীর্ণ হলেও এদের মতো রাজা হিসাবে তাঁর নাম উল্লিখিত হয় নি। ত্রিবেণীর



শিলালিপির তারিখ ৮৬০ হিজরা এবং এতে তাঁর পুত্র বারবক শাহের নাম আছে। এর কারণ সম্বন্ধে আমরা বারবক শাহ সংক্রান্ত অধ্যায়ে আলোচনা করব।

নাসিরুদ্দীন ৮৬৩ হিজরা অবধি নিশ্চয়ই জীবিত ছিলেন, কারণ ঐ বছর অবধি তাঁর মৃত্যু পাওয়া গিয়েছে। পাণ্ডুয়ায় হজরৎ নূর কুৎব আলমের দরগার রান্নাঘরে উৎকীর্ণ এক শিলালিপিতে লেখা আছে, নাসিরুদ্দীন মাহমুদ শাহ ৮৬৩ হিজরার ২৮শে জিলহিজ্জা তারিখে (৪ঠা নভেম্বর, ১৪৫৮ খ্রিঃ) রাজা ছিলেন। সম্ভবত ৮৬৪ হিজরার গোড়ার দিকে তাঁর মৃত্যু হয়।

বিভিন্ন শিলালিপিতে নাসিরুদ্দীন মাহমুদ শাহের যে সমস্ত কর্মচারীর নাম পাওয়া যায়, নীচে তা উল্লিখিত হল।

- (১) খান জহান। (২) সরফরাজ খান, খান মজলিশ।  
(৩) তরুবিয়ৎ খান। (৪) লতিফ খান। (৫) খওয়াজা জহান।  
(৬) হিলাৎ, বান্দা-ই-দরগাহ্। (৭) কদর খান।

### রুকনুদ্দীন বারবক শাহ

রুকনুদ্দীন বারবক শাহ নাসিরুদ্দীন মাহমুদ শাহের পুত্র ও উত্তরাধিকারী। ইনি বাংলার অন্ততম খ্রিষ্ট স্তলতান তো বটেই, সর্বদেশের ও সর্বশালের নব-পতিদের মধ্যে তাঁর একটি বিশিষ্ট স্থান আছে বললেও অত্যাক্তি হবে না। অথচ এঁর সম্বন্ধে এতাদূর্ন আমাদের বিশেষ কিছুই জানা ছিল না। পরবর্তী কালে লেখা ফার্সী বিবরণীগুলিতে বারবক শাহ সম্বন্ধে যে বিবরণী আছে, তা নিতান্তই অকিঞ্চিৎকর এবং আদৌ নির্ভরযোগ্য নয়। একটি সমসাময়িক ফার্সী গ্রন্থ (ইব্রাহিম কায়ুম ফারুকী রচিত ‘শরফ-নামা’) ও কয়েকটি শিলালিপি থেকে তাঁর সম্বন্ধে সামান্য কিছু সংবাদ পাওয়া যায়। এ ছাড়া সংস্কৃত ও বাংলা ভাষায় লেখা কয়েকটি গ্রন্থে বারবক শাহ সম্বন্ধে কিছু তথ্য লিপিবদ্ধ আছে। এই বইগুলির মধ্যে কয়েকটি তাঁর সমসাময়িক। এদের সাক্ষ্যই সবচেয়ে মূল্যবান। কারণ বারবক শাহ যে কত বড় ছিলেন, তাঁর স্পষ্ট আভাস কেবল মাত্র এদের মধ্য থেকেই পাওয়া যায়।

বারবক শাহ একুশ বছর বা তারও বেশী সময় রাজত্ব করেন। ৮৬৩ থেকে ৮৭৮ হিঃ পর্যন্ত তাঁর মৃত্যু পাওয়া যায়। এই কারণে ঐতিহাসিকেরা ঐ সময়ই

তঁার রাজত্বকাল বলে নির্দিষ্ট করেছেন। History of Bengal (D.U., Vol. II)-তেও ঐ তারিখই দেওয়া হয়েছে। কিন্তু আসলে বারবক শাহ ৮৬৩ হির কিছু আগে থাকতেই রাজত্ব করছিলেন এবং ৮৭৮ হির কয়েক বছর পরেও রাজত্ব করেছিলেন বলে আমরা প্রমাণ পেয়েছি। বারবক শাহের ৮৬২ হিজরায় উৎকীর্ণ চারটি মুদ্রা পাওয়া গিয়েছে (JASP, Vol. IV, 1959, pp. 169-172 দ্রঃ); তা' ছাড়া ত্রিবেণীতে বারবক শাহের নামাঙ্কিত একটি শিলালিপি পাওয়া গিয়েছে, তার তারিখ ৮৬০ হিঃ; ঐ সময় যে "আয়বিচারক, উদার-প্রকৃতি, বিদ্বান এবং আদর্শচরিত্র মালিক বারবক শাহ" রাজত্ব করছিলেন, তা' শিলালিপিটিতে স্পষ্ট উল্লিখিত হয়েছে। অথচ বারবক শাহের পিতা নাসিরুদ্দীন মাহমুদ শাহ তখনও জীবিত ছিলেন। তঁার ৮৬৩ হিঃ অবধি মুদ্রা ও শিলালিপি পাওয়া যায়।

এদিকে সমসাময়িক স্মৃতিগ্রন্থকার বিশারদের একটি বচনে দেখছি, বারবক শাহ ১৩২৭ শকাব্দ বা ৮৮০ হিজরাতেও সিংহাসনে অধিষ্ঠিত ছিলেন। বচনটি হরিদাসেব শ্রীদ্ধবিবেকে ধৃত হয়েছে। নীচে সেটি উদ্ধৃত হল। ১৩২৭ শকাবে যে দুটি মলমাস ও একটি ক্ষয়মাস ছিল—এই জ্যোতিষিক তথ্য এতে লিপিবদ্ধ হয়েছে এবং এটি সম্পূর্ণ সত্য;

“তথা গোড়প্রৌঢ়পরিবৃঢ়ে বারবকে রাজ্যং শাসতি সপ্তনবতাদিকত্রয়োদশশতীমিতশকাৎ চান্দ্রাশ্বিনসংক্রান্তিঃ কৃত্বা প্রতিপত্তেব সংচর্য্য রবেরমাব-স্রায়াং কুন্তসংক্রমে প্রতিপদি মীনসংক্রান্তাবেকশ্মিন্বে দ্বয়োঃ সংক্রান্তিশূন্যং দৃষ্টমিতি বিশারদেনোক্তং।” (বান্ধালীর সারস্বত অবদান, পৃঃ ৪২)

অথচ বারবক শাহের পুত্র শামসুদ্দীন যুসুফ শাহের নামাঙ্কিত একটি শিলালিপির তারিখ ৮৭২ হিঃ। তাহলে দেখা যাচ্ছে, বারবক শাহ অন্তত ৮৬০-৮৬৩ হিঃ অবধি তঁার পিতার সঙ্গে এবং অন্তত ৮৭২-৮৮০ হিঃ অবধি তঁার পুত্রের সঙ্গে যুক্তভাবে রাজত্ব করেছিলেন।

তা'হলে প্রশ্ন উঠবে, বারবক শাহ কি তঁার পিতার রাজত্বের শেষ দিকে পিতার বিরুদ্ধে বিদ্রোহ ঘোষণা করে নিজে রাজা হয়েছিলেন এবং তঁার নিজের রাজত্বের শেষ দিকেও কি তঁার পুত্র যুসুফ শাহ বিদ্রোহী হয়েছিলেন? আমাদের মনে হয়, তা নয়। সম্ভবত নাসিরুদ্দীন মাহমুদ শাহের বংশে এই নতুন নিয়ম চালু হয়েছিল যে রাজার পুত্র যুবরাজপদে অভিষিক্ত হবার সমস্ত থেকে পিতার সঙ্গে যৌথভাবে রাজত্ব করবেন এবং ঐ সময় থেকেই পিতার মত

তঁারও নামে মুদ্রা, শিলালিপি প্রভৃতি উৎকীর্ণ হবে।\* হোসেন শাহী বংশেও এই নিয়ম প্রচলিত ছিল, হোসেন শাহের জীবিতকালেই তঁার পুত্র নসরৎ শাহের নামাঙ্কিত মুদ্রা প্রকাশিত হয়েছিল। রাজার মৃত্যুর পর যাতে তঁার পুত্রদের মধ্যে সিংহাসন নিয়ে সংঘর্ষ না ঘটে, সেই জন্তই সম্ভবত এই ব্যবস্থা হয়েছিল।

‘মাসির-ই-রহিমী’, ‘তবকাৎ-ই-আকবরী’, ‘তারিখ-ই-ফিরিশ্তা’, ‘রিয়াজ-উস-সলাতীন’ প্রভৃতি ইতিহাস-গ্রন্থে বারবক শাহ সম্বন্ধে কোন উল্লেখযোগ্য বিবরণ পাওয়া যায় না, তাদের মধ্যে দু’ একটা মামুলী প্রশংসাসূচক কথা ভিন্ন আর বিশেষ কিছু লেখা নেই। পরে প্রসঙ্গক্রমে এগুলির উক্তি উদ্ধৃত করব। আপাতত আমরা অগ্রান্ত্র সূত্র অবলম্বনে বারবক শাহের ইতিহাসটি পুনরুদ্ধারের চেষ্টা করব।

বাংলাদেশে দু’জায়গায়—রংপুর জেলার কাঁটাহুয়ার এবং হুগলী জেলার মান্দারনে ইসমাইল গাজী নামে একজন মুসলমান বীরের সমাধি আছে। কাঁটাহুয়ারের সমাধি-ক্ষেত্রে একজন ফকিরের কাছে ‘রিসালৎ-ই-শুহাদা’ নামে একটি ফার্সী ভাষায় লেখা বই আছে। এই বইতে ইসমাইল গাজী সম্বন্ধে অনেক কথা লিপিবদ্ধ আছে। এতে বলা হয়েছে, ইসমাইল বারবক শাহের অগ্রতম সেনাপতি ছিলেন এবং সুলতানের আজায় ৭৮ (৮৭৮) হিজরায় প্রাণদণ্ডে দণ্ডিত হয়েছিলেন। ‘রিসালৎ-ই-শুহাদা’ শাহজাহানের রাজত্বকালে ১৬৩৩ খ্রীষ্টাব্দে রচিত হয়েছিল (JASB, 1874, Pt. I, p. 217)। এতে ইব্রাহিম সম্বন্ধে যা’ লেখা আছে, তার সংক্ষিপ্তসার এই :—

ইসমাইল গাজী কোরেশ-বংশীয় আরব, মক্কাতে তঁার জন্ম হয়। যৌবন থেকেই তিনি ধর্মগতপ্রাণ। একদল সঙ্গী নিয়ে তিনি আরব থেকে রওনা হয়ে পারস্যের ভিতর দিয়ে ভারতবর্ষে আসেন এবং সুলতান বারবকের রাজধানী লখনৌতিতে এসে উপস্থিত হন। এঁর রাজ্যের মধ্যে ছুটিয়া-পটিয়া নামে একটি খরশ্রোতা নদী ছিল। এই নদীতে বর্ষাকালে প্রবল বন্যা হয়ে বহু লোকের

\* ইতিপূর্বে শামসুদ্দীন ফিরোজ শাহের (রাজত্বকাল ৭০১-৭২২ হিঃ) কয়েকজন পুত্র পিতার জীবদ্দশায় নিজেদের নামে মুদ্রা প্রকাশ করেছিলেন, তার কারণ তঁরা পিতার রাজ্যের বিভিন্ন অঞ্চলে শাসনকর্তা নিযুক্ত হয়েছিলেন। গিয়াসুদ্দীন আজম শাহ তঁার পিতা সিকন্দর শাহের রাজত্বের শেষ দিকে নিজের নামে মুদ্রা প্রকাশ করেছিলেন, তার কারণ তিনি ঐ সময়ে পিতার বিরুদ্ধে বিদ্রোহ ঘোষণা করেছিলেন।

জীবন ও সম্পত্তি ন করত। স্থলতান অনেক চেষ্টা করেও এই নদীকে বাধতে পারেন নি। অবশেষে একদিন জনসাধারণের মধ্যে আদেশ জারী করা হল, তারা কোন একদিন নদীর ধারে জমায়েৎ হয়ে নদীতে মাটি ফেলবে, স্থলতান নিজে এক বুড়ি মাটি ফেলবেন। একথা শুনে ইসমাইল স্থলতানকে বললেন তিনদিন সময় পেলে তিনি এর প্রতিকারের উপায় নির্দেশ করতে পারবেন। রাজা তাতে রাজী হলেন এবং ইসমাইলের কাছ থেকে তাঁর বিস্তৃত পরিচয় জেনে নিলেন।

তিন দিন ধরে চিন্তা করে এবং জ্ঞানী লোকদের সঙ্গে পরামর্শ করে ইসমাইল ছুটিয়া-পটিয়া নদীর উপর এক সেতু নির্মাণের একটি পরিকল্পনা তৈরী করলেন। তাঁর পরিকল্পনা অনুযায়ী এমন একটি মজবুত সেতু তৈরী করা সম্ভব হল, যার উপর দিয়ে হাতী-ঘোড়াও চলে যেতে পারত। এতে খুব খুশী হয়ে রাজা ইসমাইলকে সম্মানিত করলেন এবং তাঁর উপর আরও কঠিন কাজের দায়িত্ব গ্রহণ করলেন।

এর কয়েক বছর বাদে মান্দারনের রাজা গজপতি বাংলার স্থলতানের বিরুদ্ধে বিদ্রোহ ঘোষণা করলেন। তাঁর বিরুদ্ধে প্রেরিত সৈন্যবাহিনী যখন পরাজিত হল, তখন ইসমাইলকে এ কাজের ভার দেওয়া হল। গজপতি পিতল দিয়ে এক দুর্ভেগু দুর্গ তৈরী করেছিলেন। গজপতি যখন শুনলেন ইসমাইল নামে একজন ফকির ১২০ জন জ্ঞানী লোককে সঙ্গে নিয়ে তাঁকে আক্রমণ করতে এসেছে, তখন তিনি হাসলেন। কিন্তু তাঁর রানী “ভগবানের সৈনিক” ইসমাইলের সঙ্গে যুদ্ধ করতে তাঁকে নিষেধ করলেন। রাজা কিন্তু যুদ্ধ করলেন এবং কয়েক ঘণ্টার মধ্যেই তিনি সম্পূর্ণরূপে পরাজিত ও বন্দী হলেন এবং তাঁর মাথা কাটা গেল। ইসমাইল স্থলতানের কাছে তখন আরও বেশী সম্মান পেলেন।

এর কয়েক বছর বাদে ইসমাইলের উপর কামরুপের রাজা কামেশ্বরের বিরুদ্ধে অভিযানে নেতৃত্ব করার ভার পড়ল। এর আগে বারবার এই রাজা বাংলার স্থলতানের সৈন্যবাহিনীকে পরাজিত করেছিলেন। ইসমাইল এবং তাঁর সঙ্গীরা এই রাজার বিরুদ্ধে যুদ্ধে যথেষ্ট বীরত্ব দেখালেন, কিন্তু এই রাজা ছিলেন তাঁর সময়ের একজন শ্রেষ্ঠ বীর এবং উৎকৃষ্ট সামরিক প্রতিভার অধিকারী। সন্তোষের রণক্ষেত্রে দুই পক্ষের মধ্যে যুদ্ধ হ’ল এবং তাতে বাংলার স্থলতানের সৈন্যবাহিনীর সম্পূর্ণ পরাজয় ঘটল। এই পক্ষে ইসমাইল, তাঁর ভাইপো

মুহম্মদ শাহ এবং বারোজন পাইক ভিন্ন আর সকলেই নিহত হলেন। বারোপাইকা-তে ইসমাইলদের দুর্গ ছিল। মুহম্মদ শাহকে এই দুর্গের রক্ষা-ভার দিয়ে ইব্রাহিম দু'ভন সৈন্য নিয়ে জলা-মকাম নামক জায়গায় গিয়ে প্রার্থনা করতে লাগলেন। এখানে শুধুই জল। ইসমাইল ভগবানের কাছে প্রার্থনা করে উপাসনার ভগ্ন একটু ডাঙা চাইলেন। আকাশবাণী হল “একটু ঢাল মাটিতে ভতি করে ফেলে দাও, ডাঙা তৈরী হবে।” হ'লও তাই। ইসমাইল তখন রাজার কাছে এক দূত পাঠিয়ে তাঁকে আত্মসমর্পণ করতে বললেন। রাজা সদর্পে এই প্রস্তাব প্রত্যাখ্যান করলেন। তখন আবার যুদ্ধ বাধল, কিন্তু যুদ্ধের মীমাংসা হবার আগেই রাত্রি এসে গেল। রাত্রির অন্ধকারের স্বযোগ নিয়ে ইসমাইল ঘোড়ায় চড়ে রাজার প্রাসাদের মধ্যে প্রবেশ করলেন এবং তাঁর শোবার ঘরে গিয়ে উদ্ভূত হলেন। সেখানে রাজা-রানী আলিঙ্গনাবদ্ধ হয়ে ঘুমোচ্ছিলেন, ইসমাইল তাঁদের বধ করার স্বযোগ পেয়েও করলেন না, তার বদলে তাঁদের চুলে চুলে বৈধে দিয়ে এবং ছুজনের বৃকের উপরে একখানি খোলা তলোয়ার রেখে দিয়ে সেখান থেকে চলে এলেন। পরের দিন সকালে ঘুম থেকে উঠে এই ব্যাপার দেখে রাজা-রানী অবাক। গোড়ায় তাঁরা ভাবলেন দুই কোন প্রেতাত্মা এ কাজ করেছে, কিন্তু পরে ঘোড়ার মল এবং খুরের ছাপ প্রাসাদের মধ্যে দেখে তাঁরা বুঝলেন এ কাজ মানুষ্যেরই। রাজা অনেক অনুসন্ধান ও জিজ্ঞাসাবাদ করেও এ ব্যাপারের কিনারা করতে পারলেন না। এদিকে সেদিন রাত্রেও সেই একই ব্যাপার। তার পরদিন রাত্রেও তাই। রাজা তখন বুঝলেন এ কাজ করেছেন শাহ ইসমাইল গাজী, তিনি ছাড়া আর কারও পক্ষে এ কাজ সম্ভব নয়। রাজা তখন ইসমাইলের কাছে গিয়ে বশুতা স্বীকার করলেন এবং ইসলাম ধর্মে দীক্ষা গ্রহণ করলেন। ইসমাইল তাঁর এই স্বেচ্ছামূলক আত্মসমর্পণের পুরস্কারস্বরূপ তাঁকে “বড়া লড়াইয়া” উপাধি দিলেন এবং বাংলার স্বল্পতানের কাছে খবর পাঠালেন। স্বল্পতান এ খবর শুনে আত্মহারা হলেন এবং ইসমাইলকে নানারকম রত্ন বসানো ঘোড়া, তলোয়ার ও কটিবন্ধন প্রভৃতি উপহার দিয়ে সম্মানিত করলেন।

এর কিছুদিন পরে ঘোড়াঘাটের হিন্দু সেনাধ্যক্ষ ভান্দসী রায় ইসমাইলের কাছে রাজ্যের সীমান্তে একটি দুর্গ তৈরী করার প্রার্থনা জানালেন। এই অত্মরোধ মঞ্জুর করা হল। কিন্তু ভান্দসী রায় তাঁর উপকারী ইসমাইলের উপক

ঈর্ষাপরায়ণ হয়ে তাঁর সর্বনাশ সাধনের চেষ্টা করতে লাগলেন। তিনি সুলতানের কাছে এই মিথ্যা অভিযোগ করলেন যে ইসমাইল কামরুপের রাজার সঙ্গে যোট বেঁধে এক স্বাধীন রাজত্ব প্রতিষ্ঠা করার চেষ্টায় আছেন। সুলতান এই হিন্দুর চক্রান্তে ইসমাইলকে শেষ পর্যন্ত অবিশ্বাস করলেন ও তাঁর উপর অত্যন্ত অসন্তুষ্ট হয়ে তাঁর বিরুদ্ধে এক সৈন্যবাহিনী পাঠালেন।

ইসমাইল অশেষ বীরত্ব দেখিয়ে সুলতানের সৈন্যবাহিনীকে বহুবার প্রতিহত করলেন, কিন্তু যখন তাঁর সঙ্গীরা সকলেই নিহত হল, তখন তিনি নিজে বেঁচে থাকতে অনিচ্ছুক হয়ে আত্মসমর্পণ করলেন।

সুলতানের আদেশে ১৪ই শাবান, ৭৮ (৮৭৮) হিজরি ( ৪ঠা জাম্মারী, ১৪৭৪ খ্রীঃ ) তারিখে তাঁর মাথা কেটে ফেলা হল। মৃত্যুকালে তাঁর সঙ্গীদের তিনি দূরে পাঠিয়ে দিলেন, কেবল শেখ মুহম্মদ নামে একজন বিশ্বস্ত ভৃত্য তাঁকে ছাড়তে রাজী হ'ল না। ইব্রাহিমের কাটা মাথা যখন সুলতানের কাছে এল, তখন তিনি আসল ব্যাপার জানতে পেরেছেন। তিনি আদেশ দিলেন রাজাদের জগ্ন নিদ্দিষ্ট সমাধিক্ষেত্রে যেন ইসমাইলকে সমাধিস্থ করা হয়। কিন্তু ইসমাইল তাঁকে সশরীরে দেখা দিয়ে বললেন তাঁর কাটা মাথাকে যেন কাঁটাদুয়ারেই কবর দেওয়া হয়।

ইসমাইলের সমস্ত সম্পত্তি বাজেয়াপ্ত করা হ'ল এবং মান্দারণ ও ঘোড়াঘাটে রক্ষিত তাঁর সমস্ত অস্থাবর সম্পত্তি সুলতানের দরবারে পাঠানো হ'ল। যারা এইসব জিনিস নিয়ে যাচ্ছিল, তাদের সামনে ইসমাইল আবির্ভূত হলেন। এতে তার! অত্যন্ত ভয় পেয়ে তাঁকে সব সম্পত্তি ফিবিয়ে দিতে চাইল। কিন্তু ইসমাইল তাদের বললেন ভগবানের দয়াই তাঁর কাছে যথেষ্ট। এই সব বাহকেরা সুলতানের দরবারে যাবার পথে যেখানে যেখানে থামছিল, সেখানে সেখানে একটি করে দরগা উঠল। অবশেষে তাঁর মাথা কাঁটাদুয়ারে এবং তাঁর দেহ মান্দারণে সমাধিস্থ করা হল। দুটি জায়গাই বিখ্যাত তীর্থস্থানে পরিণত হল। স্বয়ং বারবক শাহ এবং তাঁর বেগম মান্দারণ ও কাঁটাদুয়ারে আগমন করে সমাধিক্ষেত্রে বহুমূল্যবান অনেক অর্ঘ্য দিয়েছিলেন।

‘রিসালৎ-ই-শুহাদা’র এই বিবরণীতে অনেক অতিপ্রাকৃত উপাদান আছে এবং এটি বারবক শাহের রাজত্বকালের দেড়শো বছরেরও বেশী পরে লেখা। স্মরণ্য তাঁর উক্তির উপর কোন গুরুত্ব আরোপ করার আগে তাকে যাচাই কবে নেওয়া দরকার। অলৌকিক ঘটনাগুলি বাদ দিলে এই বিবরণীর উক্ত

যে মোটামুটি ভাবে ঠিক, তা মনে করা চলে। কারণ এতে বলা হয়েছে ইসমাইল বারবক শাহের সেনাপতি ছিলেন এবং (৮) ৭৮ হিজরায় প্রাণদণ্ডে দণ্ডিত হয়েছিলেন। ঐ সময়ে বারবক শাহ সত্যিই বাংলার সুলতান ছিলেন। দ্বিতীয়ত, এতে বলা হয়েছে গজপতি নামে একজন রাজার কাছ থেকে ইসমাইল মান্দারগ দুর্গ জয় করেছিলেন; ঐ সময় উড়িষ্যায় গজপতি-বংশীয় কপিলেন্দ্রদেব রাজত্ব করছিলেন, তাঁর শিলালিপি থেকে জানা যায় মান্দারগ অঞ্চল পর্যন্ত তাঁর অধিকার বিস্তৃত ছিল। কিন্তু গজপতি একজন স্থানীয় রাজা মাত্র ছিলেন এবং তাঁকে পরাজিত ও বন্দী করে ইসমাইল মান্দারগ দুর্গ অধিকার করেছিলেন, ইত্যাদি উক্তি অতিরঞ্জিত। আসল ব্যাপার সম্ভবত এই যে, মান্দারগ দুর্গ ঐ সময়ে কপিলেন্দ্রদেবের অধিকারে ছিল; তাঁর অধীনস্থ শাসনকর্তাকে পরাজিত ও বন্দী করে ইসমাইল মান্দারগ দুর্গ জয় করেছিলেন।

‘রিসালৎ-ই-শুহাদা’র মতে ইসমাইলের সঙ্গে কামরুপরাজ কামেশ্বরের যুদ্ধ হয়েছিল। কিন্তু কামরুপে ঐ সময় কামেশ্বর নামে কোন রাজা ছিলেন না। সম্ভবত ‘রিসালৎ-ই-শুহাদা’র “ত্রিহত”-এর জায়গায় ভ্রমবশত কামরুপ লেখা হয়েছে। ত্রিহতে ঐ সময় কামেশ্বর নামে কোন রাজা না থাকলেও কামেশ্বর-বংশীয় নাজারা সেখানে তখন রাজত্ব করছিলেন। তাঁদের মধ্যে অন্তত একজন—ভৈরবাসিংহের সঙ্গে বারবক শাহের সত্যিই সংঘর্ষ হয়েছিল। অবশ্য এমনও হতে পারে কামরুপের রাজার সঙ্গেই ইসমাইলের যুদ্ধ হয়েছিল, ‘রিসালৎ’-এ রাজার নাম ভুল লেখা হয়েছে; “কামেশ্বর” “কামতেশ্বর” (কামতাব রাজা)-এরও বিকৃতি হতে পারে; সে সময় কামরুপ ও কামতাব একই রাজার অধীনে ছিল। ‘রিসালৎ-ই-শুহাদা’র রাজা কামেশ্বরের জয় লাভ করেও ইসমাইলের গুণপনায় অভিভূত হয়ে নতি স্বীকার ও ইসলামধর্ম গ্রহণের যে কথা লেখা হয়েছে, তার মধ্যে অতিরঞ্জনের ছাপ স্পষ্ট। সম্ভবত এর ভিতরে রাজার জয়লাভের ঘটনাটুকুই সত্য, ইসমাইলের পরাজয়ের মানি ঢাকবাব জগা বাকীটুকু ইসমাইলের ভক্তরা পরে রচনা করেছেন।

ইসমাইলের প্রভাব-প্রতিপত্তি ও জনপ্রিয়তায় ঈর্ষান্বিত হয়ে ঘোড়াঘাটের হিন্দু শাসনকর্তা ভান্দনী রায় তাঁর নামে বারবক শাহের কাছে মিথ্যা নালিশ করেছিলেন এবং সেই অভিযোগের উপর নির্ভর করে বারবক ইসমাইলের প্রাণদণ্ড দিয়েছিলেন, এ কথা সত্য বলে মনে হয় না। বারবক শাহের মত

একজন শ্রেষ্ঠ সুলতান উপযুক্ত তদন্ত না করে একজন হিন্দু কর্মচারীর উদ্ধানিতে ইসমাইলের মত একজন বীর সেনাপতির প্রাণদণ্ড দিয়েছিলেন, এরকম ব্যাপার সম্ভবপর বলে মনে হয় না। ‘রিসালৎ-ই-শুহাদা’র লেখক ইসমাইলের অন্ধ ভক্ত, তাই এক্ষেত্রে তাঁর উক্তির উপর নির্ভর করা চলে না। সম্ভবত ইসমাইল সত্যিই “কামরুপের” রাজার সঙ্গে ঘোট বেঁধে স্বাধীন রাজ্য প্রতিষ্ঠার পরিকল্পনা করেছিলেন। তাই বারবক তাঁকে প্রাণদণ্ডে দণ্ডিত করেছিলেন।

যাহোক, ইসমাইল তাঁর মৃত্যুর পরে যে মর্যাদা ও সম্মান অর্জন করেছেন, তা’ সত্যিই অসামান্য। মুসলমানেরা তাঁকে শুধু গাজী আখ্যা দেন নি, পীর বলে পূজা করেছেন। কালক্রমে পীর ইসমাইল হিন্দু জনসাধারণের মনেও শ্রদ্ধার আসন লাভ করেছেন। কাঁটাতুয়ার ও মান্দারণে ইসমাইলেব সমাধি শুধু মুসলমানের নয়, হিন্দুরও তীর্থস্থানে পরিণত হয়েছিল। এই দুই সমাধি আজ পর্যন্ত বর্তমান আছে। মধ্যযুগের বহু মঙ্গলকাব্যের দিক্‌বন্দনা পালায় কবিরী বিভিন্ন দেবদেবী ও পীরের সঙ্গে পীর ইসমাইলেরও বন্দনা করেছেন। ইসমাইল গাজীর কাহিনী নিয়ে বহু কবি কাব্য রচনা করেছেন, তাঁদের মধ্যে একজন গোরক্ষবিজয়-রচয়িতা শেখ ফয়জুল্লাহ। শেখ ফয়জুল্লাহ তাঁর ‘সত্যপীরের পাঁচালী’র ভূমিকায় লিখেছেন—

খোঁটাদুরের পীর ইসমাইল গাজী।

গাজীর বিজয়ে সেহ মোক হইল রাজী॥

ইসমাইলের অধিনায়কত্বে বারবকের সৈন্যবাহিনী যে সমস্ত যুদ্ধাভিযান করেছিল, তার কিয়ৎপরিমাণে অতিরঞ্জিত বর্ণনাপেলায় ‘রিসালৎ-ই-শুহাদা’য়। কিন্তু বারবক ত্রিহতেরও কতকাংশ জয় করেছিলেন। এর বিস্তৃত বিবরণ পাই মুন্না তকিয়ার ব্যাঙ্গে। এই সূত্রটির পরিচয় আমবা আগেই দিয়েছি। মুন্না তকিয়া এ সম্বন্ধে যা লিখেছেন, তার বঙ্গানুবাদ নীচে দেওয়া হ’ল।

“সুলতান কিরোজ শাহ তোগলক (বাংলার) সুলতান শামসুদ্দীন হাজী ইলিয়াসকে তাঁর অধীনে এনেছিলেন এবং ত্রিহত নিজের অধিকারভুক্ত করেছিলেন। কিন্তু ১২১ বছর পরে, অর্থাৎ ৮৭৫ সালে (১৪৭৪) বাংলার সুলতান রুকনুদ্দীন বারবক শাহ তাঁর সৈন্যবাহিনীতে বহু আফগান—যারা সংখ্যায় পঞ্চপালের চেয়েও বেশী—সংগ্রহ করে ত্রিহত রাজ্য আক্রমণ করেছিলেন। ঐ রাজ্য (জোনপুরের) সুলতান হোসেন শাহ শকীর অধিকারভুক্ত ছিল। অনেক যুদ্ধের পরে তিনি (বারবক শাহ) সম্পূর্ণভাবে জয়ী হলেন।



ফলে হাজীপুর দুর্গ এবং তাঁর সন্নিহিত অঞ্চলগুলি, যে পর্যন্ত হাজী ইলিয়াসের রাজ্যের অন্তর্ভুক্ত ছিল, সবই তাঁর অধিকারে এল। এর সঙ্গে উত্তরে বৃদ্ধি গওক নদী পর্যন্ত তাঁর রাজ্যের সীমা বিস্তৃত হল। এই অংশ ত্রিহুতের জমিদারের হাতে ছিল (অর্থাৎ ত্রিহুতের জমিদার বারবক শাহের অধীনে করদ ভূস্বামী হিসাবে এই অংশ শাসন করতে লাগলেন)। এখানে তিনি (বারবক শাহ) কেন্দার রায়কে রাজস্ব আদায় ও সীমান্ত রক্ষার জন্য তাঁর নায়েব নিযুক্ত করলেন, কিন্তু জমিদারের পুত্র ভরতসিংহ তাঁকে উচ্ছেদ কবে নিজে প্রভু হয়ে বসল। সুলতান বারবক শাহ এই খবর শোনবামাত্র জমিদারকে শাস্তি দেবার জন্য ব্যস্ত হয়ে উঠলেন। কিন্তু (ত্রিহুতের) রাজা তাঁর কাছে বশুতা স্বীকার করলেন এবং সুলতানকে আলুগতোর প্রতিশ্রুতি দিলেন।”

এই বিবরণ থেকে কয়েকটি অত্যন্ত মূল্যবান সংবাদ পাওয়া যাচ্ছে। এই সময়ে ত্রিহুতের রাজনৈতিক অবস্থা যে কী ছিল, এ পর্যন্ত তা সঠিক ভাবে জানা যায় নি। চতুর্দশ শতাব্দীর মাঝামাঝি সময়ে বাংলার সুলতান শামসুদ্দীন ইলিয়াস শাহ ত্রিহুত জয় কবেছিলেন। কিন্তু দিল্লির সুলতান ফিরোজ শাহ তোগলক তাঁর কাছ থেকে ঐ অঞ্চল জয় করে নেন। তোগলক বংশের প্রাপ্তপত্তি হ্রাস পেলে তাঁদের সাম্রাজ্যের অধিকাংশই পরহস্তগত হয়ে যায়। এই সময় জৌনপুরের সুলতানেরা প্রবল হয়ে ওঠেন এবং তাঁরাই ত্রিহুত অধিকার করেন। ইব্রাহিম শাহ শর্কীর আমলে ত্রিহুতে জৌনপুরের অধিকার সুপ্রতিষ্ঠিত হয় এবং অনেকদিন তা অক্ষুণ্ণ থাকে।\* কিন্তু শর্কী বংশের শেষ সুলতান হোসেন শাহের অক্ষমতার জন্য তাঁর আমলে জৌনপুর সাম্রাজ্য ভেঙে থান্ থান্ হয়ে যায়। ফলে ত্রিহুত রাজ্যেরও অধিকারী পরিবর্তন ঘটে। বিহারের ভাগলপুর ও মুন্সের প্রভৃতি অঞ্চলে বাংলার সুলতান নাসিরুদ্দীন মাহমুদ শাহের শিলালিপি পাওয়া গিয়েছে। স্তত্রাং পঞ্চদশ শতাব্দীর দ্বিতীয়ার্ধে ত্রিহুত বাংলার সুলতানদের অধিকারে ছিল বলে কোন কোন ঐতিহাসিক অনুমান

---

\* ‘তারিখ-ই-মবারক-শাহী’ থেকে জানা যায় যে, স্বাধীন জৌনপুর সাম্রাজ্যের প্রতিষ্ঠাতা মালিক সারওয়ারই চতুর্দশ শতকের শেষ দশকে ত্রিহুত জয় করে তাকে জৌনপুর সাম্রাজ্যের অন্তর্ভুক্ত করেছিলেন। কিন্তু প্রথম দিকে ত্রিহুতের উপর জৌনপুরের অধিকার খুব সূদৃঢ় ছিল না। ইব্রাহিম শর্কী জৌনপুরের সুলতান হয়ে দু'বার ত্রিহুতে অভিযান করে বিজোহী রাজাদের পরাস্ত করেন। তার ফলে তাঁরই রাজত্বকালে ত্রিহুতে জৌনপুরের অধিকার সুপ্রতিষ্ঠিত হয়।

করেছিলেন। এই অনুমান যে সত্য, মুন্না তকিয়্যার বয়াজ থেকে তার প্রমাণ পাওয়া গেল। কিন্তু এখানে প্রশ্ন উঠতে পারে, মুন্না তকিয়্যার উক্তি যে অভ্রান্ত, তারই বা প্রমাণ কী? হারও প্রমাণ আছে। মিখিলা বা ত্রিহতের রাজা ভৈরবসিংহের রাজত্বকালে বিখ্যাত স্মার্ত গ্রন্থকার বর্ধমান উপাধ্যায় তাঁর ‘দণ্ডবিবেক’ লেখেন। ভৈরবসিংহের পিতা নরসিংহের ১৪৫৩ খ্রীষ্টাব্দে উৎকীর্ণ শিলালিপি পাওয়া গিয়েছে। ভৈরবসিংহ স্বয়ং ১৪৭৩-৭৪ খ্রীষ্টাব্দে সিংহাসনে আরোহণ করেন, কারণ তাঁর কতকগুলি মুদ্রা পাওয়া গিয়েছে, যেগুলিতে স্পষ্টই লেখা আছে যে ভৈরবসিংহের রাজত্বের ১৬ শ বর্ষে ও ১৪১১ শকাব্দে (১৪৮২-২০ খ্রীঃ) সেগুলি উৎকীর্ণ হয়েছিল। সুতরাং ভৈরবসিংহ বারবক শাহের সমসাময়িক। ‘দণ্ডবিবেকের’ সূচনায় ভৈরবসিংহের একটি প্রশস্তি আছে। তার একটি শ্লোক এট,

যঃ শ্রীভসেনমপনাতসমস্তসেন-

মাত্মীয় মৈনিকমিবাত্মমতে নিযুক্তে।

গৌড়েশ্বরপ্রতিশরীরমতিপ্রতাপঃ (২)

কেদারবায়মবগচ্ছতি দারতুল্যম্ ॥

( ছাপা বইয়ে ‘শ্রীভসেন’-এর জায়গায় ‘শ্রীকুসেন’ পাঠ মেলে )

এই শ্লোকের শেষ দুই ছন্দে বলা হয়েছে যে রাজা ভৈরবসিংহ গৌড়েশ্বরের প্রতিশরীর অতিপ্রতাপ কেদারবায়কে স্ত্রীলোকের মত দেখেন।

৩মনোমোহন চক্রবর্তী ‘প্রতিশরীর’-এর অর্থ করেছিলেন ‘প্রতিনিধি’ (JASB, 1915, p. 527 দ্রঃ)। এই অর্থ যে ঠিক, তাতে কোন সন্দেহ নেই। মিখিলাতে যে এই সময় তৎকালীন গৌড়েশ্বর বারবক শাহের কেদারবায় নামে একজন প্রতিনিধি ছিলেন, সে কথা মুন্না তকিয়্যার বয়াজে লেখা আছে, ‘দণ্ডবিবেকে’ এরই সমর্থন পাওয়া গেল। উপরে উদ্ধৃত শ্লোকে যে ‘ভসেন’-এর উল্লেখ আছে, তিনি বোধ হয় ভসেন শাহ শকী। যা হোক, ‘দণ্ডবিবেক’র মত প্রামাণ্য সূত্রের দ্বারা সমর্থিত হওয়ায় এবং বারবক শাহের রাজত্বকালের একটি বছর (৮৭৫ হিঃ) সঠিকভাবে উল্লিখিত হওয়ায় এ বিষয়ে মুন্না তকিয়্যার বয়াজের উক্তিকে সঠিক বলেই গ্রহণ করতে হবে।

সুতরাং বারবক শাহ মিখিলা বা ত্রিহত অধিকার করেছিলেন বলে জানা যাচ্ছে।

কেবলমাত্র যুদ্ধবিগ্রহে সাফল্যলাভ ও রাজ্যজয়ই বারবক শাহের একমাত্র কীর্তি নয়। তাঁর শ্রেষ্ঠত্ব কোন্‌খানে, সেই বিষয়ই এবার আলোচনা করা হবে।

বারবক শাহ নিজে ছিলেন মহাপণ্ডিত। তাঁর বিভিন্ন শিলালিপিতে তাঁর নাম এবং বিভিন্ন রাজকীয় উপাধির সঙ্গে আরও ছুটি উপাধি যুক্ত দেখা যায়,— অল-ফাজিল এবং অল-কামিল। এ সম্বন্ধে অধ্যাপক আহমদ হাসান দানী বলেন, “The titles al-Fāḍil and al-Kāmil suggest that he attained the highest academic qualifications.”

কিন্তু বারবক শাহ শুধুমাত্র নিজে পাণ্ডিত্য অর্জন করে সন্তুষ্ট ছিলেন না, তিনি অগণ্য পণ্ডিতদের পৃষ্ঠপোষণ করতেন। শুধু পণ্ডিত নয়, কবিরাও তাঁর পৃষ্ঠপোষণ লাভ করতেন। আর শুধু মাত্র মুসলমান কবি-পণ্ডিত নয়, হিন্দু কবি-পণ্ডিতদের উপরও তিনি মুক্তহস্তে দাক্ষিণ্যবর্ষণ করতেন। তাঁর পৃষ্ঠপোষিত কবি-পণ্ডিতদের মধ্যে এমন কয়েকজন রয়েছেন, শত শত বৎসরের ব্যবধানেও যাদের খ্যাতি ও জনপ্রিয়তা অম্লান রয়েছে। এঁদের নাম নীচে দেওয়া হল।

### (ক) বিশারদ

বারবক শাহের রাজত্বকাল সম্বন্ধে আলোচনা প্রসঙ্গে আমরা এক বিশারদের একটি বচন উদ্ধৃত করেছি। বচনটি যেভাবে “তথা গোড়প্রৌঢ়পরিবৃঢ়ে বারবকে রাজ্যং শাসতি” দিয়ে শুরু হয়েছে, তার থেকে মনে হয়, বিশারদ বারবক শাহের সাক্ষাৎ পৃষ্ঠপোষণ লাভ করেছিলেন; ৮ দীনেশচন্দ্র ভট্টাচার্যের মতে এই বিশারদ বিখ্যাত নৈয়ায়িক ও বৈদান্তিক বাহুদেব সার্বভৌমের পিতা। এই মত সম্পূর্ণ যুক্তিসঙ্গত।

### (খ) রায়মুকুট

রায়মুকুট উপাধিধারী বৃহস্পতি মিশ্র বাংলার একজন সর্বকালের শ্রেষ্ঠ পণ্ডিত ও গ্রন্থকার। তাঁর লেখা অমরকোষের টীকা ‘পদচন্দ্রিকা’ অত্যন্ত বিখ্যাত। এছাড়া তিনি গীতগোবিন্দ, কুমারসম্ভব, রঘুবংশ, মেঘদূত ও শিশু-পালবধের উপরও টীকা লিখেছিলেন। তাঁর লেখা স্মৃতিগ্রন্থ ‘স্মৃতিরত্নহার’ “বাক্সালায় ব্রাহ্মণ্য ধর্মের ইতিহাসে একখানি অমূল্য রত্ন।” বৃহস্পতির

কৌলিক পদবী ছিল মহিস্তাপনীয়। তাঁর বিরাট পাণ্ডিত্যের জন্য তিনি জীবনের বিভিন্ন সময়ে মিশ্র, আচার্য, কবিচক্রবর্তী, পণ্ডিতচূড়ামণি, মহাচার্য, রাজপণ্ডিত, পণ্ডিতসার্বভৌম এবং রায়মুকুট—এতগুলি উপাধি লাভ করেন। কুমারসম্ভবটীকা, রঘুবংশটীকা ও শিশুপালবধটীকার রচনাতে বৃহস্পতি গোড়েশ্বরের কাছে তাঁর প্রচুর প্রতিষ্ঠা লাভের কথা বলেছেন। ‘স্বতিরত্নহারে’র ভূমিকায় তিনি লিখেছেন রায় রাজ্যধর উপাধিধারী একজন সম্ভ্রাত রাজপুরুষের কাছে তিনি আচার্য এবং কবিচক্রবর্তী উপাধি পেয়েছিলেন। তার ‘পদচল্লিকা’র ভূমিকা থেকে জানা যায় যে, গোড়াধিপের কাছে তিনি “পণ্ডিত-সার্বভৌম” উপাধি লাভ করেছিলেন এবং কোন একজন “নৃপ” তাঁকে উজ্জয়নগর হার, ছাতিমান ছুটি কুণ্ডল, রত্নখচিত দশ আঙুলের আংটি দিয়ে হাতের পিঠে চড়িয়ে কনকস্নান<sup>\*</sup> অর্থাৎ স্বর্ণ-কলসেব জলে স্নান করিয়ে ছাতা ও ঘোড়া সমেত শোভাময় “রায়মুকুট” উপাধি দান করেছিলেন।

কিছুদিন আগে পর্যন্ত সকলের ধারণা ছিল, রাজা গণেশের পুত্র জলালুদ্দীন মুহম্মদ শাহী একমাত্র গোড়েশ্বর, যিনি বৃহস্পতিকে পৃষ্ঠপোষক ও উপাধিদান করেছিলেন। এরকম ধারণার কারণ,

(১) ‘স্বতিরত্নহারে’র ভূমিকায় বৃহস্পতি লিখেছেন তাঁর অত্যন্ত পৃষ্ঠপোষক রায় রাজ্যধর “জলালদীন” (জলালুদ্দীন) নৃপতির সেনাধিপতি ছিলেন।

\* ‘পদচল্লিকা’র ভূমিকা থেকে প্রাসঙ্গিক অংশ আমরা নীচে উদ্ধৃত করলাম।

জ্যোতিষমণিপুঞ্জমঞ্জলরচং তারং অলংকুণ্ডলে ।

রত্নোষস্ক্রিষ্টা দশাঙ্গুলিজ্যঃ শোচিৎস্বতীকাম্বিকাঃ ॥

যঃ প্রাপ্য দ্বিরদোপবিষ্টকনকস্নানৈরবিন্দনং পা-

ল্লত্ৰৈতস্তুরগৈশ্চ রায়মুকুটোভিখ্যামভিখ্যাবতীম্ ॥

পুণ্যং পণ্ডিতসার্বভৌমপদবীং গোড়াবনীবাসবাহু

বঃ প্রাপ্তঃ প্রথিতো বৃহস্পতিরিতি স্মালোকবাচস্পতিঃ ॥

কেষ্যস্তামরনির্মিতস্ত বিবিধবাখ্যানদীক্ষাঙ্করঃ

সানন্দং পদচল্লিকাং স কুরুতে টীকামিমাং কীর্তয়ে ॥

† এর থেকে বোঝা যায় হিন্দুদের অনেক আচার-অনুষ্ঠান বাংলার মুসলমান নৃপতিরা গ্রহণ করেছিলেন। “কনকস্নান” বিশুদ্ধ হিন্দু অনুষ্ঠান। উড়িষ্যার ‘মাহলা পাঞ্জী’তে লেখা আছে যে উৎকলরাজ প্রতাপরুদ্র গৌবিন্দ ভোই বিজাধরকে কনকস্নান করিয়ে পাণ্ডুর পদে অধিষ্ঠিত করেছিলেন।

(২) ‘পদচন্দ্রিকা’র প্রথমাংশে এই অঙ্কদ্বয়টি পাওয়া যায়।

“ইদানীং চ শকাব্দা: ১৩৫৩ দ্বাত্রিংশদাব্দাধিকপঞ্চবর্ষোত্তরচতুঃসহস্রবর্ষাণ  
কলিসন্ধ্যায়া ভূতানি ৪৫২২।”

১৩৫৩ শকাব্দ ( = ১৫৩১-৩২ খ্রীঃ ) জলালুদ্দীন মুহম্মদ শাহের রাজত্বের  
অন্তর্গত।

কুমারসম্ভবটীকা, রঘুবংশটীকা, ও শিশুপালবধটীকা প্রভৃতি বৃহস্পতির প্রথম  
জীবনের গ্রন্থগুলিতে যে গোড়াধিপের উল্লেখ আছে, তিনি জলালুদ্দীনের সঙ্গে  
অভিন্ন হতে পারেন। বৃহস্পতির ‘পদচন্দ্রিকা’র প্রথমাংশ জলালুদ্দীনের  
বাজত্বকালেই লেখা হয়। কিন্তু ‘পদচন্দ্রিকা’ সম্পূর্ণ হয়েছিল অনেক পরে—  
১৩৯৬ শকাব্দে। তদনুশেখর ভট্টাচার্য একটি পুঁথিতে ‘পদচন্দ্রিকা’র এই  
বচনসমাপ্তি-কালবাচক শ্লোকটি আবিষ্কার করেছিলেন,

সেনানীবদনগ্রহাগ্নিবিধুভিঃ শাকে মিতে হায়নে  
শুক্রে মাস্তিসিতে দিনাবিপতিথৌ সৌরেক্লি মধ্যান্দিনে।

সদ্যঃ সংশয়সঞ্চয়াপচয়ক্লদ্ব্যাত্যাবিণেষোজ্জ্বল।

পর্যাপ্তা পদচন্দ্রিকাভবদ্বয়ং সংরক্ষণীয়া বৃধৈঃ ॥

বৃহস্পতির প্রথম দিককার বইগুলিতে তাঁর বিভিন্ন উপাধি উল্লিখিত।  
হয়েছে—কিন্তু ‘পণ্ডিতসার্বভৌম’ ও ‘রায়মুকুট’ উপাধির ঘৃণাকরেও উল্লেখ  
নেই। স্তবরাং অনিবার্যভাবেই এই সিদ্ধান্ত আসে যে, ঐ বইগুলি লেখার  
পরে ও ‘পদচন্দ্রিকা’ সম্পূর্ণ হবার কিছু আগে তিনি ঐ উপাধি ছুটি পান।  
১৪৭৪ খ্রীষ্টাব্দে যখন বারবক শাহ বাংলার সুলতান ছিলেন, তখন তিনিই যে  
বৃহস্পতিকে ঐ ছুটি উপাধি দিয়েছিলেন, তাতে কোন সন্দেহ নেই। এসম্বন্ধে  
পরিশিষ্টে আবও বিস্তৃতভাবে আলোচনা করেছি।

(গ) আলাধর বসু

আলাধর বসুর শ্রীকৃষ্ণবিজয় বাংলা সাহিত্যের অমর গ্রন্থ। তিনি “গুণরাজ  
খান” নামেই বেশী পরিচিত। তিনি নিজে বলেছেন গোড়েখর তাঁকে এই উপাধি  
দিয়েছিলেন—“গোড়েখর দিলা নাম গুণরাজ খান।” অনেকের ধারণা এই  
গোড়েখর আলাউদ্দীন হোসেন শাহ। কিন্তু শ্রীকৃষ্ণবিজয়ের প্রাচীনতম পুঁথিতে  
( লিপিকাল ১৪৮৪ খ্রীঃ ) তার এই রচনাকালবাচক শ্লোকটি পাওয়া যায়,

তেরশ পঁচানই শকে গ্রন্থ আরম্ভণ।

চতুর্দশ দুই শকে হৈল সমাপন ॥

১৪৭৩-৭৪ খ্রীষ্টাব্দে শ্রীকৃষ্ণবিজয়ের রচনা শুরু হয় এবং ১৪৮০-৮১ খ্রীষ্টাব্দে শেষ হয়। আলাউদ্দীন হোসেন শাহ ১৪২৩ খ্রীষ্টাব্দে সিংহাসনে আরোহণ করেন। শ্রীকৃষ্ণবিজয়ের রচনাকাল তো বটেই, পুঁথির লিপিকালও তার পূর্ববর্তী। সুতরাং হোসেন শাহ মালাধর বস্ত্র পৃষ্ঠপোষক হতে পারেন না।

অনেকে বলেন শাহমুদ্দীন সমুফ শাহ মালাধবকে “গুণরাজ খান” উপাধি দিয়েছিলেন। কিন্তু শ্রীকৃষ্ণবিজয় কাব্যের আরম্ভই যখন ১৪৭৩ খ্রীষ্টাব্দে, তখন তার বেশ কিছুকাল আগে মালাধব এই উপাধি পেয়েছিলেন সন্দেহ নেই। কাব্যের শুরু থেকেই “গুণরাজ খান” ভূমিতা পাওয়া যায়। অতএব যুসুফ শাহ নয়, বারবক শাহই মালাধরের পৃষ্ঠপোষক। তিনিই তাঁকে “গুণরাজ খান” উপাধি দান করেছিলেন। শ্রীকৃষ্ণবিজয়ের রচনা আরম্ভের কয়েক বছর পরেও বারবক শাহ জীবিত ছিলেন।

### (ঘ) কৃতিবাস

এইবার আমাদের সবচেয়ে বিস্ময়কর সিদ্ধান্ত পাঠকদের কাছে উপস্থিত করছি। বাংলার বান্দ্রীক কৃতিবাসের আত্মকাহিনী ধারাই পড়েছেন, তাঁরাই জানেন তিনি এক গোড়েশ্বরের সভায় গিয়েছিলেন এবং তাঁর কাছে বিপুল সংবর্ণনা লাভ করেছিলেন। এই গোড়েশ্বর যে কে, তাই নিয়ে আজ ৭০ বছর ধরে পণ্ডিতদের মধ্যে বিতর্ক চলে আসছে। কৃতিবাস গোড়েশ্বরের নাম করেন নি, কিন্তু তাঁর কয়েকজন সভাসদের নাম করেছেন; তাঁরা সকলেই হিন্দু। এর থেকে পণ্ডিতেরা মনে করেছিলেন এই গোড়েশ্বরও হিন্দু এবং তিনি রাজা গণেশ ভিন্ন আর কেউ নন। আমার “প্রাচীন বাংলা সাহিত্যের কালক্রম” গ্রন্থে আমি সর্বপ্রথম বলি যে এই রাজা মুসলমান এবং কৃতিবাস গণেশের রাজত্বকালের অনেক পরে—১৪৬০ থেকে ১৪২০ খ্রীষ্টাব্দের মধ্যে জর্ডমান ছিলেন। সেই সিদ্ধান্তেই এখনও অবিচল আছি। উপরন্তু এই গোড়েশ্বরের নামটিও স্থির করতে পেরেছি। ইনি আর কেউই নন, এতক্ষণ তার সম্বন্ধে আলোচনা করছি, সেই রুকনুদ্দীন বারবক শাহ। প্রমাণগুলি এক এক করে উপস্থাপিত করছি।

প্রথম প্রমাণ, ফ্রবানন্দের ‘মহাবংশাবলী’তে পাওয়া যায়, কৃতিবাসের পিতৃব্য মনিরুদ্দের সুষেণ নামে এক প্রপৌত্র ছিলেন। কৃতিবাসের সম্পর্কিত পৌত্র

এই স্বৰ্ণেণ \* যে হরিদাসের ফুলিয়া ত্যাগ করে নীলাচল যাত্রার সময় জীবিত ছিলেন, সেকথা জয়ানন্দের চৈতন্যমঞ্জল থেকে জানা যায়। জয়ানন্দ লিখেছেন,

শ্রীঃ শ্রীহরিদাস চলিলা উৎকল ।

ফুল্যার স্বীপুরুষ কান্দে হয়্যা চঞ্চল ॥

হরিদাসপ্রিয় বড় স্বৰ্ণেণ পণ্ডিত ।

মুরাবি হৃদয়ানন্দ সংসারে বিদিত ॥

ভূর্গাবর মনোহর মহা কুলীন । †

তাহার নন্দন স্বৰ্ণেণ পণ্ডিত প্রবীণ ॥

( এসিয়াটিক সোসাইটির G-5398-6-c.4 নং পুঁথি থেকে উদ্ধৃত । )

আনুমানিক ১৫১৬ খ্রীষ্টাব্দে হরিদাস ফুলিয়া ত্যাগ করে নীলাচলে যান। ঐ সময়ে স্বৰ্ণেণ পণ্ডিত জীবিত ছিলেন। পিতামহের সঙ্গে পৌত্রের সময়ের স্বাভাবিক ব্যবধান ৫০ বছর। এই হিসাবে ১৪৬৬ খ্রীষ্টাব্দে আমরা কৃতিবাসকে জীবিত পাই। তখন বারবক শাহ বাংলার সুলতান ছিলেন।

কিন্তু কৃতিবাস যে বারবক শাহের সভায় গিয়েছিলেন, তা বলার স্বপক্ষে এব চাইতেও ভাল প্রমাণ আছে। আত্মকাহিনীতে কৃতিবাস গৌড়েশ্বরের সভাসদদের এই তালিকা দিয়েছেন,

রাজার ডাহিনে আছে পাত্র জগতানন্দ ।


তাহার পাছে বঙ্গা আছেন ব্রাহ্মণ সুনন্দ ॥

বামেতে কেদার থাঁ ডাহিনে নারায়ণ ।

পাশ্র্বমিড়ে বঙ্গা রাজা পরিহাসে মন ॥

\* বংশলতা.

মুরারি



† এখানে বিশেষ লক্ষণীয়, জয়ানন্দ স্বৰ্ণেণ পণ্ডিতের বংশের চারজন লোকের নাম করেছেন। এঁদের মধ্যে মুরারি, ভূর্গাবর ও মনোহরের নাম পাশে বংশলতায় উল্লেখ। হৃদয়ানন্দের নাম অত্ৰ কোন স্মৃতি পাওয়া যায় না।

গঙ্কর রাই বসি আছে গঙ্কর-অবতার ।  
 রাজসভাপূজিত তিহেঁ গোরব আপার ॥  
 তিন পাত্র দাণ্ডাইয়া আছে রাজপাশে ।  
 পাত্রমিত্রে বশ্য রাজা করে পরিহাসে ॥  
 ডাহিনে কেদার রাই বামেতে তরগী ।  
 সুন্দর শ্রীবংশ আদি ধর্ম্মাধিকারিণী ॥  
 মুকুন্দ রাজাব পণ্ডিত প্রধান সুন্দর ।  
 জগদানন্দ রাই মহাপাত্রের কোণ্ডব ॥

এই তালিকায় কেদার রাই ও নারায়ণের নাম পাওয়া যাচ্ছে। ১৪৬০ থেকে ১৪৯০ খ্রীষ্টাব্দের মধ্যে বাংলার স্থলতানের এই নামের দুজন Officer-এর সন্ধান পাওয়া যাচ্ছে। নারায়ণ বা নারায়ণদাস ছিলেন গোড়েশ্বরের চিকিৎসক, ভরত মল্লিক তাঁর 'চন্দ্রপ্রভা'তে বলেছেন নারায়ণের "অন্তরঙ্গ" উপাধি ছিল, বাংলার রাজাদের চিকিৎসকরাই এই উপাধি লাভ করতেন। ষোড়শ শতাব্দীর চৈতন্যচরিতকার চূড়ামণিদাস তাঁর 'গোরাঙ্গবিজয়ে' নারায়ণদাসকে "রাজবৈজ্ঞ" বলেছেন। নারায়ণদাসের পুত্র মুকুন্দ আলাউদ্দীন হোসেন শাহের চিকিৎসক ছিলেন। হোসেন শাহের অধীনস্থ চট্টগ্রাম অঞ্চলের শাসক পরাগল খানের পিতা রাস্তি খান বারবক শাহের কর্মচারী ছিলেন। সেই নজীরে আমরা বলতে পারি, মুকুন্দের পিতা নারায়ণও সম্ভবত বারবক শাহেরই চিকিৎসক ছিলেন।

তারপর কেদার রাই। কেদার রাই যে বারবক শাহেরই কর্মচারী ছিলেন, সে কথা মুন্সী তকিয়্যার বয়াজ থেকে স্পষ্টভাবে জানা যাচ্ছে। মুন্সী তকিয়্যা লিখেছেন ত্রিহত জয় করে সেখানে বারবক শাহ "কেদার রাইকে" তাঁর নায়েব (ফার্সী ভাষায় নায়েব শব্দের মূল অর্থ প্রতিনিধি) নিযুক্ত করলেন এবং রাজস্ব আদায় ও সীমান্ত রক্ষার ভার দিলেন।

"কেদার রাই"-এর নাম বর্ধমান উপাধ্যায়ের 'দণ্ডবিবেকে'ও উল্লিখিত হয়েছে। বর্ধমান উপাধ্যায় লিখেছেন যে, তাঁর পৃষ্ঠপোষক (বারবক শাহের সমসাময়িক) রাজা ভৈরবসিংহ

গোড়েশ্বরপ্রতিশরীরমতিপ্রতাপঃ (২)

কেদাররায়মবগচ্ছতি দারতুল্যম ॥



কুন্তিবাস বে বারবক শাহের সমসাময়িক ছিলেন, তা উপরে দেখানো হয়েছে। তাঁর সঙ্গে মুন্না তকিয়া ও বর্ধমানের উক্তিকে মিলিয়ে নিলে এবং বারবক শাহের বিজ্ঞা ও সাহিত্যের পৃষ্ঠপোষণের কথা স্মরণ রাখলে—কুন্তিবাস বে বারবক শাহেরই সভাতে গিয়েছিলেন ও তাঁরই কাছে সংবর্ধনা লাভ করেছিলেন, তাতে কোন সন্দেহ থাকে না। বারবক শাহের বিজ্ঞাৎসাহিত্য ও সাহিত্যাহুয়োগের খবর পেয়েই কুন্তিবাস সাতটি শ্লোক নিয়ে তাঁর সভায় গিয়েছিলেন বলে মনে হয়।

কুন্তিবাস রাজার সভাসদদের মধ্যে গন্ধর্ব রায়েরও নাম করেছেন। কায়স্থদের কুলপঞ্জীতে এক “গন্ধর্ব খান”—এর নাম পাওয়া যায়, ইনি মালাধর বহুর জ্ঞাতি এবং বাংলার সুলতানের “ধনাধ্যক্ষ” ছিলেন বলে প্রকাশ। মালাধর বহু যখন বারবক শাহের কাছে পৃষ্ঠপোষণ লাভ করেছিলেন, তখন তাঁর এই জ্ঞাতিও বারবক শাহের সমসাময়িক ছিলেন ও তাঁরই কর্মচারী ছিলেন বলে মনে হয়। একেই সম্ভবত কুন্তিবাস “গন্ধর্ব রায়” বলেছেন।

এই সমস্ত বিষয় থেকেই বোঝা যায়, কুন্তিবাস বারবক শাহের সভাতেই গিয়েছিলেন।

বারবক শাহ বে সমস্ত মুসলমান কবি ও পণ্ডিতদের পৃষ্ঠপোষণ করেছিলেন, তাঁদের সম্বন্ধে এতদিন কোন তথ্য পাওয়া যায়নি। সম্প্রতি ইব্রাহিম কায়ুম ফারুকী নামে বারবক শাহের সমসাময়িক একজন পণ্ডিত কৃত একটি ফার্সী ভাষার শব্দকোষ আবিষ্কৃত হয়েছে। এর নাম ‘ফরক-ই-ইব্রাহিমী’, কিন্তু এটি ‘শব্দকনামা’ নামেই বিশেষভাবে পরিচিত। এই বইয়ে ইব্রাহিম কায়ুম ফারুকী সুলতান বারবক শাহ সম্বন্ধে এই প্রশস্তি লিপিবদ্ধ করেছেন,

“আবুল-মুজাফফর বারবক শাহ শাহ-ই-আলাম (পৃথিবীপতি) হোন এবং তিনি তা’ই। জমশিদের রাজ্য তাঁর অধীনে থাকুক এবং তা’ আছে। .....বিনি প্রার্থীকে বহু ঘোড়া দিয়েছেন। যারা পায়ে হেঁটে যায়, তারা হাজার হাজার ঘোড়া দানস্বরূপ পেয়েছে। এই মহান আবুল মুজাফফর, ইনি অজগ্ৰহের সাগর, যার সবচেয়ে সামান্য ও সাধারণ উপহার একটি ঘোড়া।”

এই প্রশস্তি থেকে পরিষ্কার বোঝা যায় ইব্রাহিম কায়ুম ফারুকী বারবক শাহের পৃষ্ঠপোষণ লাভ করেছিলেন এবং তাঁর কাছে তিনি (অস্তুত কয়েকটি) ঘোড়া উপহার পেয়েছিলেন। বারবক শাহ বে একজন শ্রেষ্ঠ দাতা ছিলেন, তা’ও এর থেকে বোঝা যায়। তিনি প্রার্থীদের বিশেষভাবে ঘোড়া দান

করতেন। কুতুবাস তাঁর আত্মকাহিনীতে লিখেছেন, তাঁর সম্পর্কিত পিতৃবা-  
নিশাপতি গোড়েশ্বরের কাছে একটি ঘোড়া উপহার পেয়েছিলেন। এই  
গোড়েশ্বর নিচয়ই বারবক শাহ। কুতুবাস যে বারবক শাহের সমসাময়িক  
ছিলেন, এটি তাঁর আর একটি প্রমাণ।\* ইব্রাহিম কায়ুম ফারুকী ‘শব্দ-নামা’তে  
তাঁর সমসাময়িক আরও কয়েকজন কবি ও পণ্ডিতের নাম করেছেন। নীচে  
এঁদের একটি তালিকা দেওয়া হল।

(১) আমীর জৈয়দুদ্দীন হারাওয়ারী। এঁকে ফারুকী বলেছেন “রাজকবি”  
(“মালেকুশ শোয়ারা” )।

(২) আমীর শহাবুদ্দীন হকীম কিরমানী। এঁকে ফারুকী “চিকিৎসকদের  
(বা জ্ঞানীদের) গর্ব” (“ইফতেখারুল হোকামা”) আখ্যায় অভিহিত  
করেছেন। ইনিও কবি ছিলেন এবং ‘ফরঙ্গ-ই-আমীর শহাবুদ্দীন হকীম  
কিরমানী’ নামে একখানি ফার্সী শব্দকোষ রচনা করেছিলেন।

(৩) মনশুর শিরাজী। ইনি ফার্সী ভাষার কবিতা রচনা করতেন।

(৪) মালিক যুসুফ বিন হামিদ। ইনি কবি ছিলেন।

(৫) সৈয়দ জলাল। ইনিও কবি ছিলেন।

(৬) সৈয়দ মুহম্মদ রুক্ন। ইনিও কবি ছিলেন।

(৭) সৈয়দ হাসান। ইনিও কবি ছিলেন।

এঁদের মধ্যে “রাজকবি” আখ্যায় অভিহিত আমীর জৈয়দুদ্দীন হারাওয়ারী  
বারবক শাহের সভাকবি ছিলেন বলেই মনে হয়। অন্তর্দেহও বিজ্ঞোৎসাহী  
ও কাব্যামোদী সুলতান বারবক শাহের সঙ্গে যোগাযোগ থাকা  
অসম্ভব নয়।

\* ডঃ হাবীবুল্লাহ এক চিঠিতে আমাকে লিখেছিলেন যে গোড়া দেওয়া যদি বারবক শাহের রোগ-  
বিশেষ হয়, তা’হলে কুতুবাসকেও তিনি ঘোড়া দিলেন না কেন? তাঁর প্রশ্নের উত্তর কুতুবাসের  
আত্মকাহিনীর মধ্যেই রয়েছে; আত্মকাহিনীতে লেখা আছে যে কুতুবাসকে চল্লিশটি করে পাটের  
পাছড়া দেওয়ার পরে “রাজা গোড়েশ্বর বলে কিবা দিব দান।” কুতুবাস তখন দান গ্রহণ করতে  
অস্বীকৃত হয়ে বলেন, “কার কিছু নাকি লই করি পরিহার।” কুতুবাস যখন রাজার কাছে কোন  
দান দেবেন, তখন তাঁর কাছ থেকে তাঁর ঘোড়া পাবার কোন প্রশ্ন ওঠে না। তিনি রাজার কাছ  
থেকে বৎসমান্ন মূল্যের “পাটের পাছড়া” নিয়েছিলেন; কিন্তু “পাটের পাছড়া” দান নয়, সম্মান-  
অভিজ্ঞান, কুতুবাসের কবিত্বের স্বীকৃতির প্রতীক। বিশ্বভারতীর সমাবর্তনে কোন বিনিমি ওপী  
ব্যক্তিকে “দেশিকোত্তম” উপাধি দেওয়ার সদর যে উত্তরীয় দেওয়া হয়, এই “পাটের পাছড়া” তারই  
সমপরিভূক্ত।

(ইব্রাহিম কাশ্মির ফারুকীর “শব্দকোষ”র পুঁথি টাকার আলীয়াহ্ মাদ্রাসাহ্ লাইব্রেরীতে আছে। এর বিবরণ করাচী থেকে প্রকাশিত ‘উদু’ নামক পত্রিকায় ১৯৫২ খ্রিঃ অক্টোবর মাসের সংখ্যায় প্রথম প্রকাশিত হয়। পরে ডঃ আবদুল করিম তাঁর Social History of the Muslims in Bengal বইয়ে এর কয়েকটি তথ্যের উল্লেখ করেছেন। এই বই থেকেই আমার উপরের বিবরণ সংকলিত হয়েছে।)

আশা করি, বারবক শাহের অসামান্যতা এবং বাংলার ইতিহাসে তাঁর বিশিষ্ট স্থান এখন সকলেই উপলব্ধি করবেন। বাংলার পণ্ডিত ও কবিদের পৃষ্ঠপোষণ করে, উৎসাহ দিয়ে তিনি সর্বকালের বাঙালীর অন্ধা ও কৃতজ্ঞতা অর্জন করেছেন। প্রাচীন বাংলা সাহিত্যের হুঁজন শ্রেষ্ঠ কবি—কুন্তিবাস ও মালাধর বসু তাঁর পৃষ্ঠপোষণ লাভ করেছিলেন, এটি একটি বিরাট উল্লেখযোগ্য ব্যাপার। আরও একটি বিষয় এখানে উল্লেখ করা দরকার মনে করি। প্রচলিত বাংলা সাহিত্যের ইতিহাসগ্রন্থগুলিতে লেখা আছে, পঞ্চদশ শতাব্দীতে গোড় দরবার কর্তৃক বাংলা সাহিত্যের পৃষ্ঠপোষণ শুরু হয় এবং বিভিন্ন সুলতান এই সময়ে বিভিন্ন কবি ও সাহিত্যিককে সংবোধিত করেছিলেন। কিন্তু আসলে পণ্ডিত বা কবিদের পৃষ্ঠপোষণের সবটুকুই প্রায় বারবক শাহ একা করেছেন। তাঁর আগে জলালুদ্দীনের কাছে বৃহস্পতি মিশ্রের প্রতিষ্ঠালাভ ভিন্ন গোড়ের কাছে কবি-পণ্ডিতের পৃষ্ঠপোষণ লাভের আর কোন উদাহরণ পাই না; তাঁর পরবর্তী সুলতানদের মধ্যেও হোসেন শাহ ও তাঁর বংশধরদের রাজত্বকালের দুই একটি নিদর্শন (?) ছাড়া অল্প কোন সুলতানের এই বিষয়ে সক্রিয়তার কোন উদাহরণ পাই না। হোসেন শাহ এবং তাঁর বংশধররাও এ ব্যাপারে বারবক শাহের কাছে একান্তই নিম্ন।

হিন্দু কবি-পণ্ডিতদের পৃষ্ঠপোষণ থেকে বারবক শাহকে অসাম্প্রদায়িক মনোভাবসম্পন্ন মনে করলে ভুল হবে না। প্রকৃতপক্ষে তাঁর মত অসাম্প্রদায়িক মনোভাবসম্পন্ন নরপতি বাংলার ইতিহাসে তো বটেই, ভারতবর্ষের ইতিহাসেও দুর্লভ। তিনি যেমন প্রচলিত রীতি অনুযায়ী ফার্সী ভাষায় নিজের মুদ্রা প্রকাশ করেছেন, তেমনি হিন্দুদের ভাষা সংস্কৃতও মুদ্রা প্রকাশ করেছেন। অধ্যাপক সৈয়দ হাসান আসকারির কাছে একবার রুকনুদ্দীন বারবক শাহের ছয়টি নতুন মুদ্রা পরীক্ষার জন্য এসেছিল, তাদের মধ্যে একটির ভাষা আগাগোড়াই সংস্কৃত।

কিন্তু বারবক শাহের উদার অসাম্প্রদায়িক মনোভাবের সবচেয়ে বড় নিদর্শন দেওয়া এখনও বাকী রয়েছে। তিনি হিন্দুদের তাঁর রাজ্যের উচ্চ রাজপদে নিযুক্ত করতেন। এই পদগুলির মধ্যে অনেকগুলি অত্যন্ত গুরুত্বপূর্ণ। যে সমস্ত হিন্দুকে তিনি বিভিন্ন পদে নিয়োগ করেছিলেন, নীচে তাঁদের একটি তালিকা দেওয়া হল।

### (১) অনন্ত সেন

ইনি বারবক শাহের চিকিৎসক। এঁর পুত্র শিবদাস সেন চরকের শ্রব্য-গুণের বিখ্যাত টীকাকার। শ্রব্যগুণের টীকায় শিবদাস সেন স্পষ্টই বলেছেন, তাঁর পিতা অনন্ত সেন বারবক শাহের কাছে “অম্বরজ” অর্থাৎ খাস চিকিৎসকের পদবী লাভ করেন,

ষোঃস্মরজপদবীং হুরবাপাং, চ্ছত্রমপ্যতুলকীর্তিমবাণ।

গৌড়ভূমিপতিবার্ককশাঃ, তংস্মতস্ত কৃতিনঃ কৃতিরেবা ॥

### (২) কেদার রায়

মুন্না তকিয়ার বয়াজ, বধমান উপাধায়ের দণ্ডবিবেক ও কৃতিবাসের আশ্বকাহিনীতে এঁর নাম পাওয়া যায়।

ইনি বারবক শাহের একজন বিশিষ্ট সভাসদ ছিলেন। কৃতিবাস যখন গোড়েশ্বরের সভায় যান, তখন অল্প সভাসদের সঙ্গে এঁকেও সভায় বসে থাকতে দেখেছিলেন। বারবক শাহ এঁকে ত্রিছতে তাঁর প্রতিনিধি (প্রতিশরীর) বা নায়েব নিযুক্ত করে পাঠান এবং রাজস্ব আদায়ের ভার অর্পণ করেন। কৃতিবাস বোধহয় তার আগেই গোড়-রাজসভায় গিয়েছিলেন।

### (৩) ভান্সদী রায়

‘রিসালৎ-ই-শুহাদা’ অনুসারে ইনি বারবক শাহের রাজ্যের সীমান্তে, কাঁটাতার থেকে কয়েক কোশ দক্ষিণ-পশ্চিমে করতোয়া নদীর তীরে ঘোড়াঘাট অঞ্চলে দুর্গের অধ্যক্ষ ছিলেন; ইনিই ইসলামাইলের বিরুদ্ধে বারবক শাহের কাছে অভিযোগ করেন, যার ফলে ইসলামাইলের প্রাণদণ্ড হয়। বারবক যে হিন্দু ভান্সদী রায়ের অভিযোগ অনুসারে বিচার করে মুসলমান ইসলামাইলকে প্রাণদণ্ডে দণ্ডিত করেছিলেন, এর থেকে তাঁর অসাম্প্রদায়িক মনোভাবের পরিচয় পাওয়া যায়।

## (৪) বিশ্বাস রায়

ইনি রায়মুকুট বৃহস্পতি মিশ্রের পুত্র। রায়মুকুটের 'পদচন্দ্রিকা'র সূচনায় তাঁর পুত্রদের সম্বন্ধে এই বর্ণনা পাওয়া যায়,

যৎপুত্রো নৃপমস্ত্রিমৌলিমণয়ো বিশ্বাসরায়াদয়ঃ

খাতা দিগ্ভ্রমিনামপীহ জয়িনো লোকে কবীন্দ্রাশ্চ যে।

ব্রহ্মাণ্ডমরপাদপাদিসহিতং যেহুতুল্যাপুরুষং

তত্তদগ্রন্থবিশেষবিনির্মিতকৃতঃ কৃৎস্নেষু শাস্ত্রেষু তে ॥

(যাঁর বিশ্বাস রায় প্রভৃতি পুত্রেরা রাজার মন্ত্রীদের মধ্যে মুকুটমণি, দিগ্-বিজয়ী পণ্ডিত ও কবি হিসাবে যারা পৃথিবীতে বিখ্যাত, যারা ব্রহ্মাণ্ড, কল্পতরু ও তুল্যাপুরুষ দান অল্পষ্ঠান করেছেন এবং নানা শাস্ত্রের বিভিন্ন গ্রন্থ রচনা করিয়েছেন।)

বিশ্বাস রায় রাজার অন্যতম মুখ্যমন্ত্রী ছিলেন বলে এই শ্লোক থেকে জানা যায়। বিশ্বাস রায়ের ভ্রাতারাও যে রাজার মন্ত্রীদের মধ্যে মুখ্য ছিলেন, তা'ও এই শ্লোকটিতে বলা হয়েছে। কিন্তু তাঁদের নাম বা বিস্তৃত পরিচয় জানা যায় না। বাহোঙ্ক, 'পদচন্দ্রিকা' ১৪৭৪ খ্রীষ্টাব্দে সম্পূর্ণ হয়। সুতরাং বিশ্বাস রায় ও তাঁর ভ্রাতারা যে তৎকালীন গোড়েশ্বর বারবক শাহেরই মন্ত্রী ছিলেন, তাতে কোন সন্দেহ নেই।

শ্লোকটিতে আরও বলা হয়েছে, বিশ্বাস রায় ও তাঁর ভ্রাতারা পণ্ডিতদের দিয়ে নানা শাস্ত্রের বিভিন্ন গ্রন্থ রচনা করিয়েছিলেন। এইরকম একজন পণ্ডিতের নাম জানা গিয়েছে। ইনি মহাভারতের বিখ্যাত টীকাকার অজু'ন মিশ্র। অজু'ন মিশ্র তাঁর 'মোক্ষধর্মার্থদীপিকা'তে বলেছেন, তিনি গোড়েশ্বরের মহামন্ত্রী বিশ্বাস রায়ের অল্পজ্ঞা পেয়ে গ্রন্থ রচনা করেছেন,

গোড়েশ্বরমহামন্ত্রীশ্রীম বিশ্বাসরায়তঃ।

লঙ্কাতুঞ্জন লিখিতা মোক্ষধর্মার্থদীপিকা ॥

এখানে প্রশ্ন উঠতে পারে, এই বিশ্বাস রায়ই যে রায়মুকুটের পুত্র বিশ্বাস রায়, তাঁর প্রমাণ কী? তারও প্রমাণ আছে। অজু'ন মিশ্রের আর একজন পৃষ্ঠপোষকের নাম সত্য খান। সত্য খান উপাধিধারী একজন বিশিষ্ট ব্যক্তি বারবক শাহের রাজত্বকালেই বর্তমান ছিলেন, এ'র কথা এখনই আমরা বলব। সুতরাং অজু'ন মিশ্রের পৃষ্ঠপোষক বিশ্বাস রায়ও বারবক শাহেরই সমসাময়িক

এবং তাঁরই মহারাজী। সুতরাং তিনি রায়মুন্সের পুত্র ভিন্ন আর কেউ হতে পারেন না।

### (৫) সত্য খান বা শুভরাজ খান

এঁর প্রকৃত নাম কুলধর, জাতিতে ইমি স্ববর্ণাশ্রিত। এঁর আজ্ঞায় গোবর্ধন নামে একজন ব্রাহ্মণ ১৩২৫ শকাব্দ বা ১৪৭৩-৭৪ খ্রীষ্টাব্দে ‘পুরাণসর্বস্ব’ নামে একটি গ্রন্থ সংকলন করেছিলেন। এই গ্রন্থের ভূমিকায় গোবর্ধন বলেছেন, কুলধর গোড়েশ্বরের কাছে প্রথমে সত্য খান এবং পরে শুভরাজ খান উপাধি লাভ করেন,

শ্রীমদ্ গোড়মহীমহীপতিপতিপ্রাপ্তপ্রসাদোদয়ঃ

পুণ্যং প্রাক্তনকর্মণোহতিপদবী শ্রীসত্যখানানুজিতা।

পশ্চাৎ শ্রীশুভরাজখানপদবী লক্ষা ধরামণ্ডলে

জয়ানন্দধুরধরঃ কুলধরো ধীরো গভীরো শুভৈঃ ॥

( মধ্যযুগের বাংলা ও বাঙালী, স্ক্রুয়ার মেন, পৃ: ১৬-১৭ ভ্রষ্টব্য। )

গোড়েশ্বর কর্তৃক বারবার এই উপাধি দান থেকে মনে হয়, কুলধর তৎকালীন গোড়েশ্বর বারবক শাহের অধীনে একজন উচ্চপদস্থ কর্মচারী ছিলেন।

এখানে একটি বিষয় বিশেষভাবে লক্ষ্যণীয়। বারবক শাহ নিজেকে যেমন বিজ্ঞা ও সাহিত্যের পৃষ্ঠপোষক ছিলেন, তেমনি তাঁর মন্ত্রী ও কর্মচারীদের মধ্যে কেউ কেউ বিজ্ঞা ও সাহিত্যের পৃষ্ঠপোষক করতেন। বিশ্বাস রায় ও তাঁর ভ্রাতারা এবং শুভরাজ খান এর দৃষ্টান্ত। এক্ষেত্রে সম্ভবত তাঁদের উপর সুলতানের প্রভাবই কার্যকরী হয়েছিল।

### (৬) নারায়ণদাস

ইনিও পঞ্চদশ শতাব্দীর একজন বিশিষ্ট চিকিৎসক। এঁর এক পুত্র মুহম্মদ হোসেন শাহের চিকিৎসক হন। মুহম্মদের কনিষ্ঠ ভ্রাতা নরহরি সরকার এবং পুত্র রঘুনন্দন। মুহম্মদ, নরহরি ও রঘুনন্দন তিনজনেই চৈতন্যদেবের পার্শ্বক ছিলেন এবং তাঁদের মধ্যে শেষোক্ত দুজন বাংলার বৈষ্ণব-মহলে বিশেষ সম্মান ও প্রতিষ্ঠা অর্জন করেন। বিখ্যাত ভরত মল্লিক বলেছেন, নারায়ণদাস “সুন্দরঙ্গ” পদবী অর্জন করেছিলেন। আগেকার দিনে গোড়েশ্বরের

চিকিৎসকরাই “অন্তরঙ্গ” উপাধি পেতেন। চৈতন্যচরিতকার চূড়ামণিদাস নারায়ণদাসকে “রাজবৈজ্ঞ” বলেছেন। নারায়ণদাস যে বারবক শাহের সমসাময়িক ছিলেন, তা আমরা আগেই দেখিয়েছি। কুন্তিবাস তাঁকে গোড়েখরের সভায় বসে থাকতে দেখেছিলেন। সুতরাং তিনি বারবক শাহেরই “অন্তরঙ্গ” ছিলেন।

এখানে একটা কথা আছে। অনন্ত সেনও বারবক শাহের “অন্তরঙ্গ” ছিলেন। সেইজন্য নারায়ণ ঐ পদে অধিষ্ঠিত থাকতে পারেন না, এমন কথা কেউ কেউ বলতে পারেন। কিন্তু বারবক শাহের মত একজন প্রবল প্রভাপান্বিত গোড়েখরের দু'জন “অন্তরঙ্গ” বা পাস চিকিৎসক থাকা মোটেই অসম্ভব ব্যাপার নয়। তাছাড়া প্রথমে একজন এবং পরে একজন ঐ পদে নিযুক্ত হতে পারেন।

(৭)-(১৪) জগদানন্দ রায়, সুনন্দ, কেদার খাঁ, গজদ্বার রায়, তরলী, সুন্দর, শ্রীবংশ ও মুকুন্দ

এই নামগুলি কেবলমাত্র কুন্তিবাসের আত্মকাহিনীতে পাওয়া যায়। এঁদের সঙ্গে পূর্বোক্তিত কেদার রায় ও নারায়ণের নামও রয়েছে। এইসব সভাসদেরা সকলেই হিন্দু বলে রাজা নিজেও হিন্দু, এই ধারণা অনেক গবেষক করেছিলেন। কিন্তু এখন আমরা দেখতে পাচ্ছি, এই রাজা বারবক শাহ ভিন্ন আর কেউ নয়। বারবক শাহ যে হিন্দুদের প্রতি কতখানি অতুল মনোভাব-সম্পন্ন ছিলেন, তার পরিচয় এতক্ষণ আলোচনার পরে সকলেই পেয়েছেন। কেদার রায় ও ভান্দনী রায়কে তিনি তো রাজ্যের সীমান্ত অঞ্চলে তাঁর প্রতিনিধি নিযুক্ত করতেও দ্বিধাবোধ করেন নি। তাঁর চিকিৎসার ভারও তিনি হিন্দুদের উপরেই অর্পণ করেছিলেন। সুতরাং তাঁর সভা যে হিন্দু সভাসদে পরিপূর্ণ হবে, তাতে বিস্ময়ের কারণ কিছু নেই। অবশ্য কুন্তিবাস যাদের নাম করেছেন, মাত্র সেই ক'জনই যে গোড়েখরের সভায় ছিলেন না, তা বলাই বাহুল্য। আরও লোক যে ছিল, তা'ও তিনি বলেছেন। তাদের মধ্য থেকে তিনি বাছা বাছা মাত্র আট নয় জনের নাম করেছেন। এঁদের মধ্যে “কেদার খাঁ” হিন্দু না মুসলমান, তা নিশ্চয় করে বলা যায় না। কেদার খাঁ = Qadar khan হতে কোন বাধা নেই। বারবক শাহের পিতা নাসিরুদ্দীন মাহমুদ শাহের ময়মনসিংহের কিওয়াজোরে প্রাপ্ত ৮৬৩ হিজরার জিবদ মাসের

এক শিলালিপিতে Qadar Khan নামে তাঁর এক পদস্থ কর্মচারীর নাম পাওয়া যায়। তিনিই ইনি হতে পারেন।

কুত্বিবাসের উক্তি থেকে জানা যায়—এই সব সভাসদের মধ্যে জগদানন্দ রায় রাজার মহাপাত্র ছিলেন। রূপ গোস্বামী তাঁর ‘পতাবলী’তে এক জগদানন্দ রায়ের একটি পদ উদ্ধৃত করেছেন। ‘পতাবলী’তে গোড়রাজসভার বহু অমাত্য ও কর্মচারীর লেখা পদ আছে। এই কারণে মনে হয়, এই জগদানন্দ রায়ই ‘পতাবলী’তে দ্রুত ঐ পদটির লেখক। মুকুন্দ জগদানন্দ রায়ের পুত্র, তিনি ছিলেন রাজার পণ্ডিত। ‘পতাবলী’তে মুকুন্দ ভট্টাচার্যের তিনটি পদ মেলে, ইনিই বোধ হয় তিনি। মুসলমান রাজা বারবক শাহেরও যে সভাপণ্ডিত ছিল, তাতে এখন আর কারো নিশ্চয়ই বিশ্বাস লাগবে না, কারণ বারবক শাহের পাণ্ডিত্য, বিজ্ঞানসাহিত্য এবং সংস্কৃত ভাষায় অহুরাগের বহু নিদর্শন আমরা এ পর্যন্ত পেয়েছি। বারবকের পৃষ্ঠপোষিত বৃহস্পতি মিশ্রেরও অত্যন্ত উপাদি ছিল “রাজপণ্ডিত”। সুনন্দ জাতিতে ব্রাহ্মণ ছিলেন, তাঁর পদ কী ছিল তা কুত্বিবাস বলেন নি। তরণীর পদ সম্বন্ধেও তিনি নীরব। গন্ধর্ব রায় সম্ভবত কুলগ্রন্থে বর্ণিত “গৌড়েশ্বরের ধনাধ্যক্ষ” বলে অভিহিত গন্ধর্ব খানের সঙ্গে অভিন্ন। গন্ধর্ব রায়কে কুত্বিবাস “গন্ধর্ব অবতার” বলেছেন, এর থেকে মনে হয়—গন্ধর্ব রায় অত্যন্ত সুপুরুষ ও সজীববিজ্ঞান পারদর্শী ছিলেন। সুনন্দ ও ত্রীবংশ ছিলেন ধর্মাদিকারিণী অর্থাৎ বিচার-বিভাগীয় কর্মচারী। কেদার খাঁ কী পদ অধিকার করেছিলেন তা জানা যায় না, তবে গৌড়েশ্বর কুত্বিবাসের স্নোক্ত স্তনে প্রীত হলে তিনিই কবির মাথায় চন্দনের ছড়া ঢেলেছিলেন।

বারবক শাহের বিভিন্ন শিলালিপি থেকে তাঁর এইসব মুসলমান কর্মচারীর নাম পাওয়া যায় :—

(১) ইকরার খান—এঁর নাম প্রথম পাওয়া যাচ্ছে দ্বিবেণী শিলালিপিতে ; তাতে এঁকে বলা হয়েছে “জামদার গৈর মহলী, সর-এ-লস্কর ওয় ওয়াজীর’অবদুল্ সাফা মংখবাদ ওয় শহর লাওবলা”। অতঃপর এঁর নাম পাই প্রথম মহীসন্তোষ শিলালিপিতে। তৃতীয়বার এঁর নাম পাচ্ছি দ্বিতীয় মহীসন্তোষ শিলালিপিতে। চতুর্থবার নাম নয়, শুধু উপাধিটুকু তৃতীয় মহীসন্তোষ শিলালিপিতে পাওয়া যায়।

(২) আজমল খান—দ্বিবেণী শিলালিপিতে এঁর নাম পাওয়া যায় পূর্বোক্ত ইকরার খানের “সর-এ-খেল” হিসাবে।



(৩) **মল্লিক খান**—দ্বিতীয় মহীশূর্য্য শিলালিপিতে এর নাম মেলে। এর পরিচয়রূপ তাতে বলা হয়েছে “জকদার ওয় শিকদার মু'আমলাং জোর বারোর ওয় মহল্লিহা-এ দৌগর”।

(৪) **খান জহান**—গোড় শহরে এক শিলালিপিতে এর নাম পাওয়া যায়। এর থেকে জানা যায় যে, এই খান জহান ৮৭০ হিজরা বা ১৪৬৫-৬৬ খ্রিষ্টাব্দে একটি ফটক তৈরী করিয়েছিলেন। প্রসঙ্গত উল্লেখযোগ্য, বিভিন্ন স্থর থেকে আমরা তিনজন খান জহানের উল্লেখ পাই, এরা তিনজনে একই সময়ে বর্তমান ছিলেন। প্রথম খান জহানের নাম পাওয়া যায় বাগেরহাটে প্রাপ্ত ৮৬৩ হিজরার এক শিলালিপিতে, এতে তাঁর মৃত্যুর উল্লেখ আছে। বারবক শাহের সমসাময়িক এই খান জহান দ্বিতীয় খান জহান। তৃতীয় খান জহানের নাম ‘তারিখ-ই-ফরিশ্তা’ ও ‘রিয়াজ-উল-মলাতীনে’ পাওয়া যায়। এই দুই বইয়ের মতে এই খান জহান ছিলেন জালালুদ্দীন ফতেহ শাহের উজীর। ফরিশ্তার মতে এই খান জহান নপুংসক ছিলেন। দ্বিতীয় ও তৃতীয় খান জহান এক ব্যক্তি হওয়া অসম্ভব নয়। প্রসঙ্গত উল্লেখযোগ্য, গিয়াসুদ্দীন আজম শাহের ভ্রাতৃ উজীরেরও নাম “খান-ই-জহান” ছিল বলে কোন কোন স্থজে পাওয়া যায়।

(৫) **রাশ্তি খান**—চট্টগ্রামের হাটহাজারী থানার অন্তর্গত জোবরা গ্রামের এক মসজিদের শিলালিপিতে এর নাম আছে। এর থেকে জানা যায় যে, সুলতান রুকনুদ্দীন বারবক শাহের রাজত্বকালে ৮৭৮ হিজরার ২৫শে রমজান তারিখে “রজলিস আলা” রাশ্তি খান এই মসজিদ তৈরী করিয়েছিলেন। প্রাচীন বাংলা সাহিত্যে নানা জায়গায় এই রাশ্তি খানের নাম পাওয়া যায়। কবীজ পরমেশ্বর তাঁর মহাভারতে তাঁর পৃষ্ঠপোষক পরাগল খান সন্ধকে বলেছেন, “রাশ্তি খান তনয় বহল গুণনিধি”। পরাগল খান আলাউদ্দীন হোসেন শাহের রাজত্বকালে চট্টগ্রাম অঞ্চলের শাসনকর্তা ছিলেন। সুতরাং তাঁর পিতা রাশ্তি খান বারবক শাহের আমলে চট্টগ্রামে খুব উচ্চপদে অধিষ্ঠিত ছিলেন বলে মনে হয়। রাশ্তি খান কী পদে অধিষ্ঠিত ছিলেন, তা জানা যায় তাঁর অধস্তন অষ্টম পুরুষ মুহম্মদ খানের লেখা “রজুল হোসেন” কাব্য থেকে। এই কাব্যে মুহম্মদ খান তাঁর বিদ্বত বংশপরিচয় দিয়েছেন এবং লিখেছেন যে রাশ্তি খান “চাট্টগ্রাম বেশপতি” ছিলেন। সুতরাং রাশ্তি খান এবং তাঁর পুত্র পরাগল খান উভয়েই চট্টগ্রামের শাসনকর্তা ছিলেন। রাশ্তি খানের

বংশধররা বহুদিন পর্যন্ত চট্টগ্রাম অঞ্চল শাসন করেছিলেন। এ সম্বন্ধে পরে বিস্তৃতভাবে আলোচনা করা হবে।

### (৬) অজলকা (?) খান

এঁর নাম মেলে বার্মা শিলালিপিতে। তাতে এঁর পিতার নাম পাওয়া যায় বখ্‌শিশ্‌ খান এবং তাঁকে “চাখা খাস”-এর “সর-ই-গুমাশ্‌তাহ্‌” বলা হয়েছে। এই “চাখা খাস” সম্ভবত ঢাকা শহরের সঙ্গে অভিন্ন।

### (৭) মর্রাবৎ খান

### (৮) আলরক খান

### (৯) খুলীজ খান

### (১০) উজ্জেল (র) খান

### (১১) মজলিস আজম

### (১২) খান মজলিস আলী

শেষের দুটি নাম সম্ভবত উপাধিমাত্র।

এছাড়া ‘তারিখ-ই-ফিরিশতা’র লেখা রয়েছে, বারবক শাহ এদেশে ৮০,০০০ হাব্‌লী আয়দানী করেছিলেন এবং তাদের প্রাদেশিক শাসনকর্তা, মন্ত্রী, অমাত্য প্রভৃতি রাজ্যের বিভিন্ন গুরুত্বপূর্ণ পদে নিয়োগ করেছিলেন। গুজরাট ও দাক্ষিণাত্যের রাজারাও এই ব্যাপারে বারবক শাহের পদাঙ্ক অনুসরণ করেন। সমালোচকেরা ফিরিশ্তার উক্তির উপর নির্ভর করে বারবক শাহের বিরূপ সমালোচনা করেছেন। রাখালদাস বন্দ্যোপাধ্যায় লিখেছেন, “ওমরাহ্‌ দ্বিগের ক্ষমতা খর্ব করবার জন্য হুলতান রুকন্-উদ্দীন বারবক শাহ, আফ্রিকা হইতে হাব্‌লী খোজা আনয়ন করিয়া তাহাদিগকে প্রাসাদ রক্ষায় নিযুক্ত করিয়াছিলেন।” কিন্তু বারবক শাহ যে অমাত্যদের ক্ষমতা খর্ব করবার জন্য হাব্‌লী ক্রীতদাসদের আনিয়াছিলেন, একথা কোন সূত্রেই পাওয়া যায় না। বরঞ্চ বারবক শাহের যে বহু সম্ভ্রান্ত হিন্দু ও মুসলমান অমাত্য ছিলেন, এবং রাজসভার তাঁদের যে বিশেষ প্রতিপত্তি ছিল, সে কথা আমরা বিভিন্ন সূত্র থেকে জানতে পারি। এসম্বন্ধে আগেই আলোচনা করা হয়েছে। বারবক শাহ যে কিছু হাব্‌লীকে গুরুত্বপূর্ণ পদে নিয়োগ করেছিলেন, তাতে সন্দেহের কারণ নেই। কারণ পঞ্চদশ শতাব্দীর নবম দশকে হাব্‌লীরা এত প্রতিপত্তি লাভ করেছিলেন যে তাঁরা বাংলার সিংহাসন অবধি দখল করেছিলেন; হুতরাং আর অন্তত দুই দশক আগে তাঁদের ক্ষমতা লাভের সূচনা হয়েছিল বলেই মনে হয়।

বারবক শাহ হাবশীদের শারীরিক পটুতার জন্ত তাদেরই উপযুক্ত বিভিন্ন পদে তাদের নিয়োগ করেছিলেন বলে মনে হয়, হিন্দু ও মুসলমান অমাত্যদের প্রাধান্য কমানোর উদ্দেশ্য ছিল না। এই সব হাবশীরা যে ক্রমশ সর্বশক্তিমান হয়ে উঠেছিল, এর জন্ত বারবক শাহের পরবর্তী সুলতানেরাই দায়ী। তাছাড়া সমস্ত হাবশীই যে দুরাশ্রয়ী ছিল, তা'ও নয়। এদের মধ্যে মালিক আন্দিলের (যিনি পরবর্তীকালে সৈফুদ্দীন ফিরোজ শাহ নামে বাংলার সুলতান হয়েছিলেন) মত সং ও প্রভুভক্ত লোকও ছিলেন। সুতরাং হাবশীদের নিয়োগকে বারবক শাহের অদূরদর্শিতার দৃষ্টান্ত বলে যে মনে করা হয়ে থাকে, তা ঠিক নয়। বারবক শাহের রাজত্বাবসানের ১১১২ বছর বাদে যা ঘটেছিল, তা'র জন্ত সেই সময়ের সুলতানই দায়ী। বারবক শাহ আসলে জাতিধর্মনিবিশেষে বিভিন্ন কাজে দক্ষ লোক নিযুক্ত করতেন। হিন্দুর তাঁর মন্ত্রী, অমাত্য, সভাপণ্ডিত, চিকিৎসক প্রভৃতি পদে নিযুক্ত হতেন। মুন্সী তকিয়ার বয়াজ লেখা আছে, ত্রিহত অভিযানের সময় তিনি বহু আফগান সৈন্য সংগ্রহ করেছিলেন। এই রকম তিনি যোগ্য হাবশীদের বিভিন্ন পদে নিয়োগ করেছিলেন।

বারবক শাহের মুদ্রাগুলি বারবকবাদ, ফিরোজবাদ (পাণ্ডুয়া), মুজাফফরবাদ প্রভৃতি জায়গার টাকশাল থেকে বেরিয়েছিল। এদের মধ্যে মুজাফফরবাদ সম্ভবত পাণ্ডুয়ার নিকটে অবস্থিত ছিল। 'আইন-ই-আকবরী'র সাক্ষ্য থেকে জানা যায় যে, বারবকবাদ উত্তর বঙ্গে অবস্থিত ছিল। বারবক শাহের অনেক মুদ্রায় শুধু মাত্র "দার-উজ্জ-জরব" (টাকশাল) এবং "খজানাহ্" উৎকীর্ণ হবার স্থান হিসাবে উল্লিখিত হয়েছে। অনেক মুদ্রায় টাকশালের নাম সন্দেহজনকভাবে পড়া হয়েছে 'সাতগাঁও' ও 'জন্নতাবাদ'। শেবোক্ত নাম বিশেষভাবে সন্দেহজনক এই কারণে যে, ১৫৩৮ খ্রীষ্টাব্দে হুমায়ুন গোড় নগরীর নাম 'জন্নতাবাদ' রেখেছিলেন, পঞ্চদশ শতাব্দীতে বাংলার কোন 'জন্নতাবাদ'-এর অস্তিত্ব সম্বন্ধে প্রমাণ পাওয়া যায় না। তাঁর বহু শিলালিপি এপর্যন্ত পাওয়া গিয়েছে। এগুলি এই সমস্ত স্থানে আবিস্কৃত হয়েছে :—

জিবেলী (হুগলী), বার্না (বীরভূম), গোড়, মহীসন্তোষ (দিনাজপুর), হাটখোলা (শ্রীহট্ট), দেওতলা (মালদহ), পেরিল (ঢাকা), মীর্জাগঞ্জ (বাখরগঞ্জ), গুরাই (ময়মনসিংহ) বসিরহাট (২৪ পরগণা), জোবরা

(চট্টগ্রাম)। মহীসেন্দ্রাবের একটি শিলালিপিতে জোর ও বারোর-এর শিকদার নসরৎ খানের উল্লেখ পাওয়া যায়। এর মধ্যে বারোর বর্তমান পূর্ণিয়া জেলার অন্তর্গত, এর আধুনিক নাম বাকুর।

এর থেকে বোঝা যাবে, বারবক শাহের রাজ্যের আয়তন কত বিশাল ছিল। উত্তরবঙ্গ, পূর্ববঙ্গ, দক্ষিণবঙ্গ ও পশ্চিমবঙ্গের অধিকাংশ এবং বিহারের কতকাংশ তাঁর রাজ্যের অন্তর্ভুক্ত ছিল। মুন্সী তাকিয়্যার বয়াজে লেখা আছে যে বারবক শাহ ত্রিছতের বৃড়িগওক নদী পর্যন্ত অঞ্চল অধিকার করেছিলেন। তার মধ্যে হাজীপুর এবং তার পার্শ্ববর্তী অঞ্চলগুলি তাঁর খাস শাসনে এসেছিল, বাকী অংশ ত্রিছতের জমিদারকে শাসন করতে দেওয়া হয়, কর দেবার সর্তে। এই ত্রিছত অধিকার থেকে মনে হয়, নাসিরুদ্দীন মাহ্‌মুদ শাহ কর্তৃক অধিকৃত ভাগলপুর ও মুন্সের অঞ্চলে বারবক শাহের অধিকার অটুটই ছিল। ‘রিসালৎ-ই-শুহাদা’র উক্তি বিশ্বাস করলে (এক্ষেত্রে অবিশ্বাস করার কোন কারণ নেই) বলতে হবে, বারবক শাহের রাজ্যের উত্তর-পূর্ব সীমান্ত ছিল ঘোড়াঘাট।

আরাকান দেশের ইতিহাসে লেখা আছে যে পঞ্চদশ শতাব্দীর তৃতীয় পাদে আরাকানের রাজারা বাংলাদেশের কিছু অংশ জয় করেছিলেন। ১৪৩০ খ্রীষ্টাব্দে আরাকানরাজ মেং-সোআ-ম্‌উন যখন বাংলার সুলতান জলালুদ্দীন মুহম্মদ শাহের সাহায্যে নিজের রাজ্য ফিরে পান, তখন তিনি বাংলার রাজার সামন্তে পরিণত হন। কিন্তু তাঁর ভ্রাতা ও পরবর্তী রাজা মেং-খরি ( ১৪৩৪-৪২ খ্রিঃ ) শুধু যে বাংলার রাজার অধীনতা স্বীকার করেননি, তাই নয়—তিনি রামু পর্যন্ত বাংলার অন্তর্ভুক্ত অঞ্চল অধিকার করে নিয়েছিলেন। এই ‘রামু’ সম্ভবত বর্তমান চট্টগ্রাম জেলার দক্ষিণপ্রান্তে অবস্থিত ‘রামু’ গ্রামের সঙ্গে অভিন্ন। সপ্তদশ শতাব্দীর তৃতীয় পাদে শিহাবুদ্দীন তালিশ লিখেছেন যে রামু ( রামু ) একটি বন্দর ; চট্টগ্রাম থেকে সেখানে যেতে চারদিন লাগে এবং এই বন্দরটি চট্টগ্রাম ও আরাকানের মধ্যপথে অবস্থিত ( Studies in 'Mughal India, Sarkar, p. 150 দ্রষ্টব্য )। মেং-খরির পুত্র ও পরবর্তী রাজা বসোআহ্পু (১৪৫২-৮২ খ্রিঃ) চট্টগ্রাম শহর অধিকার করেন বলে আরাকানের ইতিহাসে লেখা আছে ( Phayre, History of Burma, p. 78 এবং JASB, 1945, p. 35 দ্রষ্টব্য। ) ফেরারের মতে বসোআহ্পুর চট্টগ্রাম অধিকার বারবক শাহের রাজত্বকালেই ঘটেছিল।

কিন্তু যদি এই সমস্ত কথা সত্যও হয় তাহলেও বারবক শাহ ৮৭৮ হিজরা

বা ১৪৭৩ খ্রীষ্টাব্দের মধ্যে যে চট্টগ্রাম অঞ্চল পুনরধিকার করে নিয়েছিলেন, তাতে কোন সন্দেহ নেই, কারণ রাস্তা খান কর্তৃক নির্মিত চট্টগ্রামের জোবরা গ্রামের মসজিদের শিলালিপি থেকে জানা যায় যে ৮৭৮ হিজরার ২৫শে রমজান তারিখে রুকনুদ্দীন বারবক শাহই ঐ অঞ্চলের অধীশ্বর ছিলেন।

এখন রুকনুদ্দীন বারবক শাহের চরিত্রের কয়েকটি বিশিষ্ট দিক সম্বন্ধে আলোচনা করে আমরা তাঁর প্রসঙ্গ শেষ করব।

বারবক শাহের অসম্প্রদায়িক মনোভাবের কয়েকটি নিদর্শন আমরা ইতিপূর্বেই দিয়েছি। তাঁর অসাম্প্রদায়িক মনোভাবের আর একটি প্রমাণ এই যে অপরাধীকে শাস্তি দেবার সময় তিনি মুসলমানদের প্রতি পক্ষপাত দেখাননি। এমন কি মুসলমান সাধু ও ধর্মগুরুরাও কোন অগ্রাঘ আচরণ করলে তিনি তাঁদের কঠোর শাস্তি দিতে কুণ্ঠিত হতেন না। আমরা আগেই দেখে এসেছি, দরবেশ-সেনাপতি ইসমাইল গাজীকে তিনি প্রাণদণ্ডে দণ্ডিত করেছিলেন। আরও একজন দরবেশ তাঁর হাতে অম্লরূপ শাস্তি লাভ করেছিলেন বলে মনে হয়। আকবর ও জাহাঙ্গীরের রাজত্বকালে রচিত সুফী দরবেশদের জীবনীগ্রন্থ ‘অখবার অল-অখিয়ার’-এ (রচয়িতা শেখ আবদুল হক দেহলবী) এই কাহিনীটি পাওয়া যায়।

শেখ পিয়ারার শিষ্য শাহ জলাল দকীনী একজন মস্তবড় দরবেশ ছিলেন। তিনি বাংলাদেশে আসেন। এখানে এসে তিনি রাজার মত সিংহাসনে উপবেশন করতেন। জনসাধারণের উপর তিনি বিপুল প্রভাব বিস্তার করেছিলেন। তাঁর প্রভাব-প্রতিপত্তি দেখে গোড়ের সুলতানের সন্দেহ হল এবং তিনি তাঁকে প্রাণদণ্ডে দণ্ডিত করলেন। সুলতানের আদেশে রাজকীয় সৈন্যবাহিনী গিয়ে শাহ জলাল দকীনী এবং তাঁর অম্লগামীদের মাথা কেটে ফেলল।

এর পরে কিছু অলৌকিক ব্যাপারের উল্লেখ আছে। অপেক্ষাকৃত আধুনিক কালে রচিত ‘খজীনৎ অল-আশফিয়া’ (রচয়িতা গোলাম সারোয়ার) নামে আর একটি সুফী গ্রন্থেও এই কাহিনী পাওয়া যায়। এতে বলা হয়েছে শাহ জলাল দকীনী ৮৮১ হিজরায় নিহত হয়েছিলেন।

এখন প্রশ্ন হচ্ছে, কোন সুলতান শাহ জলাল দকীনীকে বধ করেছিলেন (অবশ্য যদি এই দুই বইয়ের বিবরণ সত্য হয়)? মৃত্যুর সাক্ষ্য অম্লযায়ী ৮৮১ হিজরায় (১৪৭৬-৭৭ খ্রি:) শাহরুদ্দীন মুহম্মদ শাহ বাংলার সুলতান ছিলেন। কিন্তু

ককবুদ্দীন বারবক শাহ যে ১৪৭৬ খ্রীষ্টাব্দে জীবিত ও সিংহাসনে অধিষ্ঠিত ছিলেন, তার প্রমাণ আছে। যুসুফ শাহ ধর্মগতপ্রাণ নিষ্ঠাবান মুসলমান ছিলেন বলে বহু প্রমাণ পাওয়া যায়। এসম্বন্ধে পরে আলোচনা ক্রষ্টব্য। সুতরাং যুসুফ শাহ শাহ জলালের মত একজন প্রতিপত্তিশালী ও মুসলমানদের বিশেষ প্রজ্ঞাভাজন দরবেশের প্রাণবধ করতে পারেন বলে বিশ্বাস করা যায় না। এই কারণে মনে হয়, তাঁর পিতা বারবক শাহই শাহ জলালকে প্রাণদণ্ডে দণ্ডিত করেছিলেন। বারবক শাহ কর্তৃক ইসমাইল গাজীর প্রাণদণ্ড বিধানের উদাহরণ যখন রয়েছে, তখন এ কাজও তাঁরই বলে মনে হয়।

দরবেশদের এই প্রাণদণ্ড বিধান থেকে বারবক শাহের শুধু অসাম্প্রদায়িক মনোভাবের পরিচয় পাওয়া যায় না, তাঁর দৃঢ়তা ও শাসনদক্ষতারও পরিচয় পাওয়া যায়। তাঁর আগে অনেক ধর্মপ্রাণ সুলতানের রাজত্বকালে দরবেশরা অত্যধিক প্রাধান্য লাভ করেছিলেন, এমন কি তাঁরা দেশের শাসনব্যাপারেও প্রভাব বিস্তার করেছিলেন। বারবক শাহ তাঁদের কর্তৃত্ব করতে দেননি, উপরন্তু তাঁরা দণ্ডাই হলে দণ্ড দিতে ইতস্তত করেননি।

বারবক শাহ একজন প্রকৃত সৌন্দর্যসিক ছিলেন। তাঁর এমন অনেক মুদ্রা পাওয়া গিয়েছে, সেগুলির গঠন অত্যন্ত সুন্দর ও শিল্পোচিত। গোড় নগরে যে রাজপ্রাসাদে বারবক শাহ বাস করতেন, সেটি তাঁর সৌন্দর্যসিকতার আর একটি নিদর্শন। এই প্রাসাদটি এখন আর বর্তমান নেই, কিন্তু এর একটি শিলালিপি অক্ষত অবস্থায় পাওয়া গিয়েছে। এই শিলালিপিটি আরবী কবিতায় লেখা। এটি বর্তমানে পেন্সিল্ভানিয়া বিশ্ববিদ্যালয়ের বাতুম্বরে আছে। মিশিগান বিশ্ববিদ্যালয় থেকে প্রকাশিত ১৯৪০ সালের *Ars Islamica* নামক পত্রিকায় (pp. 141-147) এর পূর্ণ বিবরণ বার হয়েছিল। এই শিলালিপিতে বারবক শাহের প্রাসাদের একটি সংক্ষিপ্ত অথচ চমৎকার বিবরণ পাওয়া যায়, সেটি আমরা বাংলায় অনুবাদ করে দিলাম।

তাঁর (বারবক শাহের) আবাস বাগানের মত, শান্ত এবং আনন্দদায়ক,  
তা আনন্দ সঞ্চার করে এবং দুঃখ বিদূরিত করে।

এর নীচ দিয়ে একটি জলধারা বয়ে যায়,

স্বর্গের নিরঞ্জন কণা মনে করিয়ে দিয়ে,

এর বুধ্‌বুধলি মুক্তার মত, তারা-ফুলিয়ে দেয় দারিদ্র্য ও বেহনা।

তার তোরণ আশ্রয় দান করে, আত্মাকে সুগন্ধ ওষধির মত ( অর্থাৎ  
আত্মাকে সুগন্ধ ওষধির সুবাস দান করার মত )

বন্ধুদের। শত্রুদের কাছে এ ( প্রাসাদ ) নিষিদ্ধ এবং সূদূর।

একটি অনির্বচনীয় তোরণ, তৃপ্তিদায়ক ও স্মৃতিজনক। যাকে বলা হয়  
মধ্য-তোরণ, বিশেষ প্রবেশপথ হিসাবে এটি নিম্নিত

আটশো একাত্তর সালে ( হিজরায় )।

জীবন, আশা এবং বিশ্বাসের আবাস।

সুতরাং শিলালিপিটি ৮৭১ হিজরায় প্রাসাদটির মধ্য-তোরণ নির্মাণের  
সময় উৎকীর্ণ হয়েছিল। *Ars Isamica* পত্রিকায় প্রকাশিত বিবরণ থেকে  
জানা যায়, শিলালিপিটির শিলা এবং লিপি দুইই অত্যন্ত সুন্দর ( “magni-  
ficent” )। এর থেকেও বারবক শাহের সৌন্দর্যরসিকতার নিদর্শন পাওয়া  
যায়।

গৌড়ের ‘দাখিল দরওয়াজা’ নামে পরিচিত বিরাট ও সুন্দর তোরণটি  
বারবক শাহই নির্মাণ করিয়েছিলেন বলে প্রসিদ্ধি আছে।

ককতুদীন বারবক শাহ কোন্ সময়ে পরলোক গমন করেছিলেন তা বলা  
কঠিন। এর আগে ( বর্তমান গ্রন্থ, পৃ: ১৮৩ ) স্মার্ত গ্রন্থকার বিশারদের যে বচন  
উদ্ধৃত করেছি, তার থেকে জানা যায় যে তিনি ১৩২৭ শকাব্দের মীন-সংক্রান্তি  
অর্থাৎ ১৪৭৬ খ্রীষ্টাব্দের মার্চ মাসের শেষ দিক পর্যন্ত জীবিত ছিলেন। সম্ভবত  
এর কিছুদিন পরে তিনি পরলোকগমন করেন।

বাংলাদেশের এই অসাধারণ নরপতি সম্বন্ধে যে সমস্ত তথ্য পাওয়া যায়,  
সেগুলি আমরা সংক্ষেপে লিপিবদ্ধ করলাম। বারবক শাহ—ঘাঁর রাজ্যের  
আয়তন ছিল সুবিশাল, যিনি নানা রাজ্য জয় করেছিলেন, যিনি নিজে বিদ্বান  
ছিলেন, বিদ্বান ও সাহিত্যিকদের যিনি পৃষ্ঠপোষক করতেন, ঘাঁর মনোভাব  
ছিল উদার ও অসাম্প্রদায়িক এবং যিনি ছিলেন একজন সত্যকার সৌন্দর্যরসিক—  
তার সম্বন্ধে যে আমরা বিশেষ কিছু জানিনা, এ অত্যন্ত দুঃখ ও লজ্জার বিষয়।  
বারবক শাহের মত একাধারে এতগুলি বৈশিষ্ট্যের সমাবেশ বাংলার আর  
কোন রাজার মধ্যেই দেখা যায়নি। পেন্সিল্ভানিয়া বিশ্ববিদ্যালয়ে রক্ষিত  
বারবক শাহের পূর্বোক্ত শিলালিপিতে আরবী কবিতায় তাঁর যে প্রশংসা  
রয়েছে ( *Ars Islamica*, 1940, pp. 142-143 দ্রষ্টব্য ), তার মধ্যে বিশেষ  
অতিরঞ্জন নেই। প্রশংসিটি আমরা নীচে বাংলায় অঙ্কিত করে দিলাম।

আশা করি, আমাদের এই দীর্ঘ আলোচনার পরে এই প্রশস্তি সুলতানের প্রসাদপুষ্ট একজন কর্মচারীর চাটুবাণ্য বলে বোধ হবে না।

শাহ সুলতান ককন্ উদ্-দুনিয়া ওয়াদ্-দীন

আমাদের সুলতান বারবক শাহ, জ্ঞানী এবং মহীয়ান,

তঁার পুত্র,—যাঁর খ্যাতি দেশে দেশে বিস্তৃত হয়েছে—

সুলতান মাহমুদ শাহ, জায়পরায়ণ এবং ভদ্র।

দুই ইরাকে কি এমন মহানন্দন সুলতান আছেন

বারবক শাহের মত ? সিরিয়া এবং অল-ইয়েমেনেও কি আছেন ?

না। বিধাতার সমগ্র রাজ্যে আর কেউই নেই,

যিনি মহাশ্বে তঁার সমান। তঁার সময়ে তিনি অদ্বিতীয় এবং অতুলনীয়।

### শামসুদ্দীন যুসুফ শাহ

পরবর্তী রাজার নাম শামসুদ্দীন যুসুফ শাহ। ইনি ককমুদ্দীন বারবক শাহের পুত্র। আমরা আগেই দেখে এসেছি, অন্তত ৮৮১ হিজরা পর্যন্ত কয়েক বছর যুসুফ শাহ বারবক শাহের সঙ্গে যুক্তভাবে রাজত্ব করেছিলেন। যুসুফ শাহের ৮৮৫ হিঃ পর্যন্ত মুদ্রা ও শিলালিপি পাওয়া যায়। ৮৮৬ হিঃ থেকে সুলতান জলালুদ্দীন ফতেহ্ শাহের মুদ্রা ও শিলালিপি শুরু হয়েছে। সুতরাং যুসুফ শাহ যে ৮৮৫ বা ৮৮৬ হিঃ পর্যন্ত রাজত্ব করেছিলেন, তাতে কোন সন্দেহ নেই।

বুকাননের বিবরণীতে যুসুফ শাহকে “a very learned prince” বলা হয়েছে। ফার্সী ভাষায় লেখা ইতিহাস-গ্রন্থগুলির মধ্যে কয়েকটিতে যুসুফ শাহকে উচ্চশিক্ষিত, ধর্মপ্রাণ এবং শাসনক্ষম বলে প্রশংসা করা হয়েছে। ‘তবকাৎ-ই-আকবরী’র ভাষায় “তিনি ছিলেন ধৈর্যশীল, প্রজাহিতৈষী এবং ধর্মনিষ্ঠ বাদশাহ।” কিন্তু কোন বইয়েই তঁার সম্বন্ধে বিস্তৃত বিবরণ পাওয়া যায় না। কেবলমাত্র ‘তারিখ-ই-ফিরিশ্তা’র কয়েকটি কথা পাওয়া যায়। ফিরিশ্তা লিখেছেন, “তিনি ছিলেন বিদ্বান, ধার্মিক এবং কৌশলী নরপতি। তিনি ভাল কাজ করতে আদেশ দিতেন এবং মন্দ কাজ নিষিদ্ধ করতেন। তঁার আয়ত্রে কেউ প্রকাজে মতপান করতে বা তঁার আদেশ অমান্য করতে সাহস পেত না। মাঝে মাঝে তিনি প্রধান প্রধান আলিমদের তঁার সভায়



ভেকে বলতেন, ‘তোমরা ধর্মসংক্রান্ত বিষয়ের নিষ্পত্তি করতে গিয়ে কারও পক্ষ অবলম্বন করবে না ; করলে তোমাদের সঙ্গে আমার ভাল সম্পর্ক থাকবে না এবং আমি তোমাদের শাস্তি দেব।’ তিনি নিজে বহু শাস্ত্রে সুপণ্ডিত ছিলেন, তাই যে সমস্ত মামলায় কাজীরা ব্যর্থ হত, তাদের অধিকাংশেরই তিনি নিজে নিষ্পত্তি করতেন।”

কিরিশ্চীর বিরূতি সত্য হলে বলতে হবে যুসুফ শাহ ছিলেন সচ্চরিত্র, আদর্শবাদী, গ্রায়নিষ্ঠ ও সুদক্ষ নরপতি। উপরন্তু তিনি ছিলেন ধর্মগতপ্রাণ মুসলমান। এই শেষোক্ত বিষয়টি সম্বন্ধে আবও প্রমাণ পাওয়া যায়। তাঁর ও তাঁর অধীনস্থ কর্মচারীদের আদেশে তাঁর রাজত্বকালে কয়েকটি বিশিষ্ট মসজিদ নির্মিত হয়েছিল ; এদের মধ্যে উল্লেখযোগ্য মালদহের সাকোমোহন মসজিদ এবং গোড়ের ‘কদমরসুল’ মসজিদ, দরাসবাড়ী জামী মসজিদ ও তাঁতীপাড়া মসজিদ। ক্রেটন ও কানিংহামের মতে গোড়ের লোটন মসজিদ নামে চমৎকার মসজিদটি এবং চামকাটি মসজিদ শামসুদ্দীন যুসুফ শাহই নির্মাণ করিয়েছিলেন। যুসুফ শাহের শিলালিপিগুলি পথালোচনা করলে দেখা যায় যে, তিনি “জিল্-আল্লাহ্ ফি অল্-আলামিন্” প্রভৃতি প্রাচীনতর এবং বহুদিন-অব্যবহৃত উপাধি আবার ধারণ করেছেন (Bibliography of the Muslim Inscriptions of Bengal, p.87 ভট্টব্য)। এই সমস্ত বিষয় থেকে অনায়াসেই সিদ্ধান্ত করা যায় যে যুসুফ শাহ একজন নিষ্ঠাবান মুসলমান ছিলেন। তিনি তাঁর পিতার মত অসাশ্রদায়িক মনোভাবসম্পন্ন তো ছিলেনই না, উপরন্তু সে যুগের অনেক নিষ্ঠাবান মুসলমানের মত পরধর্ম-বিদ্বেষী ছিলেন, সে বিষয়ে কোন সন্দেহ নেই। এ সম্বন্ধে প্রত্যক্ষ প্রমাণও আছে। বর্তমান হুগলী জেলার অন্তর্গত পাণ্ডুরায় তাঁর রাজত্বকালে হিন্দুর মন্দির ভেঙে মসজিদ তৈরী করা হয়েছিল ; নারায়ণ ও সূর্যের মন্দিরকে মসজিদ ও মিনারে পরিণত করা হয়েছিল। একটি ব্রহ্মশিলা-নির্মিত বিরাট সূর্যমূর্তির পিছন দিকে শিলালিপি খোদাই করা রয়েছে যে, ‘খলীফে আল্লাহ’ সুলতান শামসুদ্দীন যুসুফ শাহের রাজত্বকালে ৮৮২ হিজরার ১লা মহরম ( ১৫ই এপ্রিল, ১৪৭৭ খ্রিঃ) তারিখে একটি মসজিদ নির্মিত হয়েছিল। এই মসজিদই সম্ভবত বর্তমানে ‘বাইশ দরওয়াজা’ নামে পরিচিত ; এই মসজিদে হিন্দু মন্দিরের বহু শিলাস্তম্ভ ও অন্যান্য ধ্বংসাবশেষ দেখতে পাওয়া যায়।

জৈহুদ্দীন নামে একজন মুসলমান কবির লেখা ‘রসুলবিজয়’ নামে একখানি

বাংলা কাব্য পাওয়া গিয়েছে।\* এর ভণিতায় কবি জনৈক রাজা “ইছপ খান” বা “যুসুফ খান”—এর উল্লেখ করেছেন এবং লিখেছেন,

দানে ধর্ম্যে হরিন্দ্ৰ মাস্ত শুরু সম ইল্ল রাজরত্ন মহিমা প্রধান।

ত্রিযুত ইছপ খান আরতি কারণ জান বিরচিলুম পাঞ্চালি সন্ধান।

কেউ কেউ মনে করেন এই “যুসুফ খান” সুলতান শামসুদ্দীন যুসুফ শাহ এবং ‘রসুলবিজয়’-রচয়িতা জৈহুদ্দীন—ইব্রাহিম কায়ুম ফারুকীর ‘শব্দফা’র উল্লিখিত “মালেকুশ শোয়ারা” ( “রাজকবি” ) আমীর জৈহুদ্দীন হারাওয়ী। কিন্তু এই মত সত্য হতে পারে না। কারণ “মালেকুশ শোয়ারা” জৈহুদ্দীনের “হারাওয়ী” বিশেষণ থেকে বোঝা যায়, তিনি পারস্যের হিরাটের লোক। পঞ্চাশতের ‘রসুলবিজয়’ খাঁটি বাঙালী কবির লেখা এবং এই কাব্যে হিন্দু সংস্কৃতির প্রভাবের যথেষ্ট নিদর্শন পাওয়া যায়। ‘রসুলবিজয়’ কাব্যের ভাষা বিচার করেও নিঃসংশয়ে বলা যেতে পারে যে, এই কাব্য পঞ্চদশ শতাব্দীর রচনা হতে পারে না। জনাব এ. টি. এম. কল্লল আমিনের মতে ‘রসুলবিজয়’ ষোড়শ শতাব্দীর শেষার্ধের রচনা এবং কবির পৃষ্ঠপোষক “ইছপ খান” গোড়েখর তাজ খান কররানীর ( ১৫৬৪-৬৫ ) পুত্র যুসুফ খান ( মাসিক মোহাম্মদী, প্রাদর্শ, ১৩৭১, পৃ: ৭১০ ত্র: )।

যুসুফ শাহের একটি ভিন্ন অগ্র কোন মূদ্রায় কোন স্থানের নাম পাওয়া যায় না, এগুলি সবই “খজানাহ্” ( কোষাগার ) থেকে মুদ্রিত হয়েছিল। একটি মূদ্রা সম্ভবত সোনারগাঁও-য়ের টাকশালে তৈরী হয়েছিল—এতে স্থানের নামটি খুব অস্পষ্টভাবে লেখা আছে। এইসব জায়গায় তাঁর শিলালিপি পাওয়া গিয়েছে—গোড়, জাহানাবাদ (রাজশাহী), ত্রিহট্ট, ছোট পাণ্ডুয়া (হুগলী), হজরৎ পাণ্ডুয়া ( মালদহ ), ঢাকা। এর মধ্যে ছোট পাণ্ডুয়ার শিলালিপিটি থেকে মনে হয়, তাঁর আমলে পশ্চিম বঙ্গে মুসলিম অধিকার আর একটু প্রসারিত হয়েছিল। অস্ত্রাশ্রু শিলালিপি থেকে বোঝা যায়, উত্তর ও পূর্ববঙ্গের এক বৃহৎ অঞ্চল তাঁর রাজ্যের অন্তর্ভুক্ত ছিল। রাখালদাস বন্দ্যোপাধ্যায় তাঁর ‘বাংলার ইতিহাস’ দ্বিতীয় ভাগে ( পৃ: ২১৫ ) লিখেছেন যে শামসুদ্দীন যুসুফ শাহের “রাজ্যকালে ত্রিহট্ট মুসলমানগণ কর্তৃক বিজিত হইয়াছিল।” কিন্তু প্রকৃতপক্ষে চতুর্দশ শতাব্দীর প্রথম পাদে শামসুদ্দীন ফিরোজ শাহের রাজত্বকালে মুসলমানরা

\* অধ্যাপক আহমদ শরীফ কর্তৃক সম্পাদিত হয়ে ‘সাহিত্য পত্রিকা’র সপ্তম বর্ষ দ্বিতীয় সংখ্যায় প্রকাশিত হয়েছে।

প্রথম খ্রীষ্ট জয় করেন (History of Bengal, D. U., Vol. II, pp. 78-80 দ্র: )।

বিভিন্ন শিলালিপি থেকে যুক্তফ শাহের এই সব কর্মচারীর নাম পাওয়া গিয়েছে :—

- (১) মিশাদ খান
- (২) সূফী খান
- (৩) মজলিস আলা
- (৪) মজলিস আজম
- (৫) বহুলভী অল-অশরু ওয়াজ্জমান

শেষোক্ত তিনজনের নাম পাওয়া যায় না, কেবল উপাধিটুকু উল্লিখিত হয়েছে। “মজলিস আলা” পূর্বোল্লিখিত বারবক্ শাহের কর্মচারী মজলিস আলা রাস্তি খানের সঙ্গে অভিন্ন হতে পারেন।

### জলালুদ্দীন ফতেহ্ শাহ

‘তবকাৎ-ই-আকবরী’, ‘মাসির-ই-রহিমী’, ‘তারিখ-ই-ফিরিশ্তা’, ‘রিয়াজ-উস্-সলাতীন’ এবং স্টুয়ার্টের History of Bengal-এর মতে শামসুদ্দীন যুক্তফ শাহের মৃত্যুর পর সিকন্দর শাহ নামে একজন রাজপুত্র সিংহাসনে আরোহণ করেন। কিন্তু অল্পকালের মধ্যেই তিনি সিংহাসনচ্যুত হন এবং ফতেহ্ শাহ নামে আর একজন রাজপুত্র রাজা হন। সিকন্দর শাহের সিংহাসনচ্যুতির কারণ সম্বন্ধে কোন কোন বই নীরব; ‘রিয়াজে’র মতে সিকন্দরের মস্তিষ্ক বিকৃতির দরুণ এবং তবকাৎ, ফিরিশ্তা ও স্টুয়ার্টের মতে সিকন্দর শাহ রাজা হবার পক্ষে অল্পযুক্ত প্রমাণিত হওয়ায় তাঁকে সিংহাসনচ্যুত করা হয়েছিল। কিন্তু সিকন্দর শাহের রাজত্বকাল সম্বন্ধে বিভিন্ন সূত্রের মধ্যে মতানৈক্য দেখা যায়। ফিরিশ্তার মতে সিকন্দর শাহ যেদিন সিংহাসনে অধিষ্ঠিত হন, সেই দিনই সিংহাসনচ্যুত হন। ‘রিয়াজ-উস্-সলাতীনে’ লেখা আছে, “তিনি কিঞ্চিৎ উন্মাদ-রোগগ্রস্ত ছিলেন। একত্র অমাত্যেরা তাঁকে রাজ্যের গুরুভার বহনে অক্ষম বিবেচনা করে সেই দিনই ( অর্থাৎ সিংহাসনে আরোহণের দিন ) তাঁকে পদচ্যুত করে...ফতেহ্ শাহকে তাঁর স্থলাভিষিক্ত করেন।” কিন্তু একথা অবিশ্বাস্য বলে মনে হয়। কারণ অমাত্যেরা নিশ্চয়ই সিকন্দরকে আগে থেকে

জানতেন। স্ত্রতরাং আগে তাঁর উন্নততার কোন খবর পেলেন না। সিংহাসনে অভিষেকের পরমুহূর্তেই সে কথা জানলেন, এ ব্যাপার কেমন করে সম্ভব হয়? ‘আইন-ই-আকবরী’র মতে সিকন্দর শাহের রাজত্বকাল আধ দিন, ‘তবকাৎ-ই-আকবরী’র মতে আড়াই দিন এবং স্টুয়ার্টের মতে ছ’ মাস। স্টুয়ার্টের উক্তিই এক্ষেত্রে সত্য বলে মনে হয়। কারণ যে যুবককে স্ত্রু এবং শাসনক্ষম জেনে অমাত্যেরা সিংহাসনে বসিয়েছিলেন, তার অক্ষমতা আবিষ্কৃত হতে কিছু সময় অন্তত অতিবাহিত হয়েছিল বলেই ধরতে হয়।

স্টুয়ার্টের উক্তিকে সত্য ধরার আর একটি কারণ, সিকন্দর শাহের সঙ্গে পরবর্তী সুলতান ফতেহ্ শাহের সম্পর্ক সম্বন্ধে একমাত্র তিনিই কতকটা খাটি খবর দিয়েছেন। কয়েকটি গ্রন্থের মতে ফতেহ্ শাহ শামসুদ্দীন যুসুফ শাহের পুত্র। কিন্তু একথা ভুল। ফতেহ্ শাহের বহু মুদ্রা ও শিলালিপি পাওয়া গিয়েছে, তাঁর থেকে জানা যায় ফতেহ্ শাহ নাসিরুদ্দীন মাহমুদ শাহের পুত্র। সিকন্দর শাহের সঙ্গে যুসুফ শাহের সম্পর্ক সম্বন্ধে অধিকাংশ বিবরণীতেই কিছু লেখা নেই; স্টুয়ার্ট সিকন্দরকে “a youth of the royal family” বলেছেন; ‘রিয়াজ’-এর মতে তিনি যুসুফ শাহের পুত্র এবং এই কথাই যথার্থ বলে মনে হয়। স্টুয়ার্ট ফতেহ্ শাহকে সিকন্দর শাহের “uncle” বলেছেন। স্ত্রতরাং স্টুয়ার্টের উক্তিই সত্যের কাছ ঘেঁসে গিয়েছে। অবশ্য ফতেহ্ শাহ যুসুফ শাহের খুল্লতাত! সিকন্দর যুসুফের পুত্র হলে ফতেহ্ শাহ সিকন্দরের খুল্লপিতামহ বা “great uncle” হন। কিন্তু ইংরেজরা সাধাবণত “great uncle”-কেও “uncle” বলেই অভিহিত করে।

যাহোক, এই সিকন্দর শাহের অস্তিত্ব সম্বন্ধে পরবর্তী কালেরচিত গ্রন্থগুলির উক্তি ছাড়া আর কোন প্রমাণ নেই। তাঁর কোন মুদ্রা বা শিলালিপি বা এমন কোন নিদর্শন পাওয়া যায় নি, যার থেকে বলা যেতে পারে যে তিনি কিছু সময়ের জন্য রাজত্ব করেছিলেন। বুকাননের বিবরণীতে সিকন্দরের নামই নেই, সেখানে ফতেহ্ শাহকেই যুসুফ শাহের পরবর্তী সুলতান বলা হয়েছে। এ অবস্থায় সিকন্দর শাহ বলে একজন লোক সত্যিই যুসুফ শাহ ও ফতেহ্ শাহের মাঝখানে সিংহাসনে বসেছিলেন, এ সম্বন্ধে একেবারে নিঃসংশয় হওয়া যায় না। তবে, যুসুফ শাহের কোন মুদ্রা বা শিলালিপি ৮৮৫ হিঃর পরবর্তী নয় এবং ফতেহ্ শাহের কোন মুদ্রা বা শিলালিপি ৮৮৬ হিঃর পূর্ববর্তী নয়। এই কারণে মনে হয়, এদের মাঝখানে আর একজন রাজা—সিকন্দর শাহ—সত্যিই সিংহাসনে

বসেছিলেন এবং তিনি ৮৮৫ হিঃর শেষ দিকে ও ৮৮৬ হিঃর গোড়ার দিকে রাজত্ব করেছিলেন।

সিকন্দর শাহের প্রসঙ্গের এইখানেই ইতি করে এখন তাঁর পরবর্তী স্থলতান বলে অভিহিত কতেহ্ শাহের সম্বন্ধে আলোচনায় অগ্রসর হওয়া যাক। এঁর বহু মুদ্রা ও শিলালিপি পাওয়া গিয়েছে, তাদের থেকে দেখা যায় এঁর পুরো নাম জলালুদ্দীন আবুল মুজ্জাফফর কতেহ্ শাহ। এঁর মুদ্রা ও শিলালিপির আরম্ভ ৮৮৬ হিজরায় ও শেষ ৮৯২ হিজরায়। এঁর অধিকাংশ মুদ্রাতেই এঁর রাজকীয় নামের পরে “হোসেন শাহী” কথাটি উল্লিখিত হয়েছে। এর থেকে বোঝা যায় এঁর দ্বিতীয় নাম বা জনপ্রিয় নাম ছিল ‘হোসেন শাহ’। এসম্বন্ধে ডঃ হবীবুল্লাহ বলেন, “Most of his coins bear, after the regnal titles, the words ‘Husain Shāhi’, which like the ‘Badr Shāhi’ of Ghiyasuddin Mahmud Shah of the Husaini dynasty, must refer to his popular name.” (HB II, p. 136)

‘তবকাৎ-ই-আকবরী’তে লেখা আছে যে কতেহ্ শাহ বিজ্ঞ এবং বুদ্ধিমান ছিলেন। প্রাচীন রাজা ও সম্রাটদের প্রথা বিচক্ষণভাবে অনুসরণ করে তিনি প্রত্যেক লোককে তার অবস্থা ও মর্যাদার অল্পরূপ সুষোগ-সুবিধা দিতেন। তাঁর সময়ে বাংলার লোকদের সামনে সুখ ও ভোগের দরজা খোলা ছিল। ‘রিয়াজ-উল-সলাতীন’েও এই কথা আছে। ‘রিয়াজ’-এ অধিকন্তু লেখা আছে, “প্রজাদের সম্পর্কে তিনি উদার নীতি অনুসরণ করে চলতেন।”

আগে যে ইব্রাহিম কায়ুম ফারুকী রচিত ‘শব্দক্‌নামা’র উল্লেখ করেছি, তার মধ্যে একটি কবিতায় জনৈক জলালুদ্দীনের প্রশংসা করা হয়েছে দেখতে পাই। ডঃ আবদুল করিমের Social History of the Muslims in Bengal বইয়ের ১২১ পৃষ্ঠায় এই কবিতাটি উদ্ধৃত হয়েছে, নীচে তার বাংলা অনুবাদ দিলাম। (শ্রীযুক্ত কিশোরীমোহন মৈত্রের সাহায্যে এই অনুবাদ করা হয়েছে।)

“কী চমৎকার! স্বর্গলোকই তোমার অভ্যুদয় প্রাসাদের চূড়া। এর ফটককে যথার্থই বলা যায়, ‘জন্নৎ অল-মাওরা’ (চিরন্তন স্বর্গ)। বাকেলের হাত থেকে যেমন হরিণ পালিয়ে গিয়েছিল, \* তেমনি তোমার শত্রুর হাত

\* শ্রীযুক্ত কিশোরীমোহন মৈত্র আমার বলেছেন যে এখানে একটি প্রচলিত গল্পের ইঙ্গিত দেওয়া হয়েছে। গল্পটি এই। বাকেল নামে একটা বোকা লোক একটা হরিণ কিনে দড়ি দিয়ে বেঁধে

থেকে সৌভাগ্য চলে যাচ্ছে। ওয়ামক যেমন আজরার অঞ্চল ধারণ করেছিলেন, তেমনি তোমার উচ্চ মর্যাদা স্বর্গকে স্পর্শ করছে। স্বর্গের দেবদূতেরা! এবং আমি—আমরা প্রতি মুহূর্তে বলছি যে তুমি মহিমাম্বিত (your majesty) জলাল উদ্-দীন ওয়াদ-দুনিয়া ( ধর্মের ও বিশ্বের গৌরব )।”

এখন প্রশ্ন হচ্ছে, এই জলাল উদ্-দীন কে? উঃ এম বি বলোথের মতে ইনি দরবেশ শাহ জলাল দকীনী। কিন্তু শাহ জলাল দকীনী গোড়ের সুলতানদের অপ্রীতিভাজন ছিলেন, এবং সুলতানের আদেশে তাঁর মাথা কাটা যায়। সুতরাং গোড়ের সুলতানের প্রসাদপুষ্ট ইব্রাহিম কায়ুম ফারুকী তাঁর প্রশস্তি কীর্তন করতে ও “তোমার শত্রুর হাত থেকে সৌভাগ্য চলে যাচ্ছে” বলতে পারেন বলে মনে হয় না। প্রশস্তিটি পড়লে বোধ হয় এটি কোন রাজার উদ্দেশ্যে নিবেদিত। এই কারণে মনে হয়, এর মধ্যে উল্লিখিত জলালুদ্দীন সুলতান জলালুদ্দীন ফতেহ্ শাহ ভিন্ন আর কেউ নন। কিন্তু ‘শবুফ্-নামা’র একটি কবিতায় সমসাময়িক সুলতান হিসাবে বারবক শাহের প্রশস্তি আছে ( বর্তমান গ্রন্থ, পৃ: ১২৮ দ্রষ্টব্য ) বলে তাঁর পরবর্তী আর একজন সুলতানের প্রশস্তি তার মধ্যে থাকা সম্ভব নয় বলে কেউ কেউ মনে করতে পারেন। কিন্তু ‘শবুফ্-নামা’র মত শব্দকোষ-গ্রন্থ সংকলন করতে অনেক সময় লাগবার কথা। এর অন্তর্ভুক্ত বারবক শাহের নামাঙ্কিত কবিতাটি নিম্নেই তাঁর রাজত্বকালে রচিত হয়েছিল, কিন্তু সমস্ত বইখানাই যে বারবক শাহের রাজত্বকালে রচিত হয়েছিল, এমন কথা মনে করার কোন কারণ নেই। এটাই বেশী সম্ভব যে ইব্রাহিম কায়ুম ফারুকী বারবক শাহের রাজত্বকালে তাঁর নামে কবিতা লিখেছেন; এবং জলালুদ্দীন ফতেহ্ শাহের রাজত্বকালে তাঁর নামেও কবিতা লিখেছেন; ‘শবুফ্-নামা’ তার পরে সম্পূর্ণ হয় এবং দুটি কবিতাই তার মধ্যে স্থান পায়। সুতরাং ফারুকী যে জলালুদ্দীন ফতেহ্ শাহেরই প্রশস্তি কীর্তন করেছেন, তাতে সন্দেহের অবকাশ নেই বলা চলে।

কয়েকটি বাংলা গ্রন্থে জলালুদ্দীন ফতেহ্ শাহের রাজত্বকালের কোন

টানতে টানতে গিয়ে আসছিল। রাস্তায় একজন লোক জিজ্ঞাসা করল, “কত টাকায় কিনলে?” সে এক হাতের পাঁচটা আঙুল দেখিয়ে জানাল পাঁচ টাকায়। তখন ঐ লোকটি আবার জিজ্ঞাসা করল, “কত টাকায় বিক্রী করবে?” বাকল ছুঁ হাতের দশটা আঙুল দেখিয়ে জানাল দশ টাকায়। এদিকে তার হাত থেকে ছাড়া পেয়ে হরিণটা ছুটে পালিয়ে গেল।

কোন ঘটনা সন্ধে কিছু কিছু সংবাদ পাওয়া যায়। এখন সে কথায় আসছি।

ফতেহাবাদ “মুল্লকে”র অন্তর্ভুক্ত ফুলশ্রী গ্রাম (বর্তমান বাথরগঞ্জ জেলার অন্তর্গত) নিবাসী বিজয়গুপ্তের বিখ্যাত মনসামঙ্গল কাব্য জলালুদ্দীন ফতেহ শাহের রাজত্বকালেই রচিত হয়েছিল। এই কাব্যের অধিকাংশ পুঁথিতেই এই রচনাকালসূচক শ্লোকটি পাওয়া যায়,

ঋতু শৃঙ্গ বেদ শশী পরিমিত শক।

সুলতান হোসেন সাহা নৃপতি-তিলক ॥

“ঋতু শৃঙ্গ বেদ শশী” অর্থাৎ ১৪০৬ শক অর্থাৎ ১৪৮৪-৮৫ খ্রীষ্টাব্দে এই কাব্য লেখা হয়েছিল। এই শ্লোকের দ্বিতীয় ছত্রের “সুলতান হোসেন সাহা” বলতে সকলেই আলাউদ্দীন হোসেন শাহকে বোঝেন। কিন্তু আলাউদ্দীন হোসেন শাহের রাজত্বকাল ১৪২৩-১৫১২ খ্রীঃ। এত কারণে কেউ কেউ এই রচনাকাল-সূচক শ্লোকটিকে জাল বলেন আবার কেউ কেউ “ঋতু শৃঙ্গ বেদ শশী”র জায়গায় “ঋতু শশী বেদ শশী” পাঠ কল্পনা করে আলাউদ্দীন হোসেন শাহের রাজত্বকালের সঙ্গে কোনরকমে খাপ খাওয়াবার চেষ্টা করেন। কিন্তু “ঋতু শশী বেদ শশী” পাঠ কোন পুঁথিতেই আমরা পাইনি। অনেকে বলেন, একটি পুঁথিতে নাকি এই পাঠ পাওয়া গিয়েছিল; কিন্তু কেউ সে পুঁথির দর্শন পাননি।\* যাহোক, “ঋতু শৃঙ্গ বেদ শশী”র জায়গায় “ঋতু শশী বেদ শশী” পাঠ ধরার কোন প্রয়োজন নেই, শ্লোকটিকে জাল বলারও কোন কারণ নেই। “ঋতু শৃঙ্গ বেদ শশী”ই প্রকৃত পাঠ। এই শকেই বিজয়গুপ্তের মনসামঙ্গল রচিত হয়েছিল। ১৪৮৪-৮৫ খ্রীষ্টাব্দে জলালুদ্দীন ফতেহ শাহ বাংলার সুলতান ছিলেন; তাঁর নামাস্তর বা জনপ্রিয় নাম যে হোসেন শাহ ছিল তা আমরা আগেই দেখে এসেছি। অতএব “সুলতান হোসেন সাহা” বলতে বিজয়গুপ্ত তাঁকেই বুঝিয়েছেন, সে সন্ধে কোন সন্দেহ নেই।

“ঋতু শৃঙ্গ বেদ শশী”র জায়গায় “ঋতু শশী বেদ শশী” পাঠ ধরা যে কতখানি অসমর্থক, তা অল্প দিক থেকে বিচার করলেও বোঝা যায়।

\* জয়কুমার দাসগুপ্ত সম্পাদিত ও কলকাতা বিশ্ববিদ্যালয় প্রকাশিত (১৯৬২) সংস্করণে যে ভিনটি পুঁথি ব্যবহৃত হয়েছিল, তার একটিতে নাকি “ঋতু...শী বেদ শশী পাঠ আছে, অন্য দুটি পুঁথিতে “ঋতু শৃঙ্গ বেদ শশী” আছে (ঐ সংস্করণ, পৃ: ৮)। সম্পাদক যাকে “শী” মনে করেছেন, তা “শৃঙ্গ”-ই, সে বিষয়ে সংশয়ের অবকাশ নেই।

আলাউদ্দীন হোসেন শাহ ১৪২৩ খ্রীঃর নভেম্বর থেকে ১৪২৪ খ্রীঃর জুলাইয়ের মধ্যে কোন এক সময়ে সিংহাসনে বসেন। “ঋতু শলী বেদ শলী” অর্থাৎ ১৪১৬ শক বা ১৪২৪-২৫ খ্রীষ্টাব্দে বিজয়গুপ্ত কাব্য রচনা করেছিলেন বলে স্বীকার করতে হয় যে বিজয়গুপ্ত আলাউদ্দীন হোসেন শাহের সিংহাসনে আরোহণের কয়েক মাসের মধ্যেই কাব্য রচনা করেন। কিন্তু আলাউদ্দীন হোসেন শাহ সিংহাসনে আরোহণের কয়েক মাসের মধ্যেই হুম্মুর বরিশাল অঞ্চলের কবির রচনায় “নূপতি-তিলক” আখ্যায় উল্লিখিত হতে পারেন বলে বিশ্বাস করা যায় না।

“সুলতান হোসেন সাহা”র নাম উল্লেখের পরে বিজয়গুপ্ত তাঁর সম্বন্ধে এই প্রশংসোক্তি লিপিবদ্ধ করেছেন,

সংগ্রামে অর্জুন রাজা প্রভাতের রবি।

নিজ বাহুবলে রাজা শামিল পৃথিবী ॥

রাজাব পালনে প্রজা সুখ ভুঞ্জে নিত।

সম্রাট সিংহাসনে-অধিষ্ঠিত রাজার সম্বন্ধে কেউ এই জাতীয় প্রশংসা করতে পারেন বলে মনে হয় না, অন্তত কয়েক বছর ধরে যিনি সিংহাসনে অধিষ্ঠিত রয়েছেন, তাঁর সম্বন্ধেই এই রকম প্রশংসা করা চলে।

অতএব এ বিষয়ে কোন সন্দেহই নেই যে বিজয়গুপ্ত ১৪৮৪-৮৫ খ্রীষ্টাব্দে তাঁর মনসামঙ্গল কাব্য রচনা করেছিলেন এবং তিনি যে “সুলতান হোসেন সাহা নূপতি-তিলক”-এর উল্লেখ করেছেন, তিনি জলালুদ্দীন ফতেহ্ শাহ।

বিজয়গুপ্ত জলালুদ্দীন ফতেহ্ শাহ সম্বন্ধে বলেছেন, “রাজার পালনে প্রজা সুখ ভুঞ্জে নিত।” “তবকাং-ই-আকবরী”তেও ঠিক এই কথা লেখা আছে। তাতে আছে, “তাঁর (জলালুদ্দীন ফতেহ্ শাহের) সময়ে লোকদের সামনে ভোগ ও সুখের দরজা খোলা ছিল।” “রিয়াজ-উস-সলাতীন”েও এই কথা লেখা আছে। সুতরাং জলালুদ্দীন ফতেহ্ শাহ যে স্বশাসক ছিলেন, তাতে কোন সন্দেহ নেই।

কিন্তু বিজয়গুপ্তের মনসামঙ্গলেরই হাসন-হোসেন পালায় হিন্দুদের প্রতি মুসলমানদের অত্যাচারের যে বর্ণনা পাই, তার থেকে মনে হয় যে জলালুদ্দীন ফতেহ্ শাহের রাজত্বকালে হিন্দু-প্রজাদের মধ্যে অসন্তোষের যথেষ্ট কারণ ছিল। অবশ্য প্রশ্ন উঠতে পারে এই পালাটি এখন যেভাবে পাওয়া যাচ্ছে তা বিজয়গুপ্তের নিজের লেখা কিনা এবং এর মধ্যে যে অত্যাচারের বর্ণনা দেওয়া



হয়েছে, তাকে বিজয়গুপ্তের সমসাময়িক পরিস্থিতির প্রতিকলন বলে গ্রহণ করা যায় কিনা। কিন্তু সমগ্র পালাটির বর্ণনা এত সরল ও জীবন্ত যে এটি বিজয়গুপ্তের নিজের লেখা বলেই মনে হয় এবং তিনি এর মধ্যে নিজের চাক্ষুষ অভিজ্ঞতাই লিপিবদ্ধ করেছেন বলে বোধ হয়। যা হোক, বিজয়গুপ্তের মনসামঙ্গলে যা লেখা আছে, তা উদ্ধৃত করছি,

দক্ষিণে হোসেনহাটী গ্রামের নিকট ।  
 তথায় ঘরন বসে দুই বেটা শঠ ॥  
 হাসন হোসেন তারা দুই ভাইর নাম ।  
 দুইজনে করে তারা বিপরীত কাম ॥  
 কাজিয়ালী করে তারা জানে বিপরীত ।  
 তাদের সম্মুখে নাহি হিন্দুয়ালি রীত ॥  
 এক বেটা হালদার তার নাম ঢুলা ।  
 বড় অহঙ্কারে করে হোসেনের শালা ॥  
 সর্বরক্ষণ হোসেনের আগে আগে আসে ।  
 তার ভয়ে হিন্দু সব পলায় তরাসে ॥  
 যাহার মাথায় দেখে তুলসীর পাত ।  
 হাতে গলে বান্ধি নেয় কাজির সাক্ষাৎ ॥  
 বৃক্ষতলে থুইয়া মারে বজ্র কিল ।  
 পাথরের প্রমাণ ঘেন ঝড়ে পড়ে শিল ॥  
 পরেরে মারিতে কিবা পরের লাগে ব্যথা ।  
 চোপড় চাপড় মারে দেয় ঘাড়কাতা ॥  
 যে যে ব্রাহ্মণের পৈতা দেখে তারা কান্ধে ।  
 পেয়াদা বেটা লাগ পাইলে তার গলায় বান্ধে ॥  
 ব্রাহ্মণ পাইলে লাগ পরম কৌতুকে ।  
 কার পৈতা ছিঁড়ি ফেলে থুথু দেয় মুখে ॥  
 ব্রাহ্মণ স্ত্রজন তথায় বসে অতিশয় ।  
 গৃহঘর তোলায় না দুর্জনের ভয় ॥

এই রাজ্যের তকাই নামে একজন মোল্লা একদিন বনের রথ্য দিয়ে যাচ্ছে, এমন সময় প্রবল ঝড়বৃষ্টি এসে। তকাই একটি কুটির দেখতে পেয়ে তার মধ্যে ঢুকল। ঢুকে দেখল একদল রাখাল বালক সেখানে ঢাক ঢোল মৃদঙ্গ বাজিয়ে

মনসার ঘট পূজা করছে। তাই দেখে ঐ মোল্লা রাগে ক্রিষ্ট হয়ে “খোদা খোদা বলি যায় ঘট ভাঙ্গিবার।” কিন্তু তা সে পারল না, তার বদলে মার খেয়ে ও অশেষ লাহুনা সহ করে অবশেষে নাকে খৎ দিয়ে ক্ষমা চেয়ে ফিরে আসতে হল। মোল্লা হাসন-হোসেনের কাছে কিছু বলবে না বলে শপথ করেছিল। কিন্তু শপথ ভঙ্গ করে সে তাদের সমস্ত ব্যাপার জানাল। এই খবর

শুনিয়া কুপিল কাজি চারিদিকে চায় ॥

হারামজাদা হিন্দুর হয় এতবড় প্রাণ।

আমার গ্রামেতে বেটা করে হিন্দুমান ॥

গোটে গোটে ধরিব গিয়া যতেক ছেমরা।

এড়া কটী খাওয়াইয়া করিব জাতিমারা ॥

ওস্তাদ মোল্লা মোর অপমান ( আপন জন ? ) হয়।

তাহারে এমন করে প্রাণে নাহি ভয় ॥

সাজ সাজ বলিয়া কটকে পড়ে সাড়া।

ছোট বড় সাজিয়া আসিল হোসেন পাড়া ॥

যতেক যবন আছে হোসেনের পাড়া।

নগর হইতে পুরুষ আসিল মাথা মুড়া ॥

দুই ভাই অনেক সশস্ত্র মুসলমানকে একসঙ্গে জড়ো করে রাখালদের কুঁড়ে-ঘরের উপর চড়াও হল। কাজীদের মা ছিল হিন্দুর মেয়ে, ভূতপূর্ব কাজী তাকে জোর করে বিবাহ করেছিল। সে তার ছেলেদের বারণ করল, কিন্তু তারা শুনল না। কাজীদের আদেশে সৈয়দেরা “ঘর ভাঙ্গিয়া ফেলে সমুদ্রের জলে” এবং “কোদালে কাটিয়া ফেলে ঘর ভিটার মাটি”। তাছাড়া “মাটির গঠন ঘট কনকের চূড়া। দ্বারূপ যবনে ঘট করিলেক গুঁড়া ॥”

রাখালরা ভয়ে বনের মধ্যে লুকিয়েছিল। কিন্তু কাজীর লোকেরা বন তোলপাড় করে তাদের কয়েকজনকে গ্রেপ্তার করল। তাদের “কাজি বলে আয়ে বেটা ভূতের গোলাম। পীর থাকিতে কেন ভূতেরে সেলাম ॥”

এর আগে কয়েকজন গবেষক বিজয়গুপ্তের মনসাবজলের রচনাকাল সম্বন্ধে প্রচলিত ধারণার বশবর্তী হয়ে এই ঘটনাকে আলাউদ্দীন হোসেন শাহের রাজত্বকালে হিন্দুদের প্রতি মুসলমানদের অত্যাচারের একটি নিদর্শন বলে গ্রহণ করেছিলেন। কিন্তু বিজয়গুপ্তের মনসাবজল যখন জালালুদ্দীন ফতেহ শাহের রাজত্বকালেই রচিত হয়েছিল, তখন এই ঘটনাকে তাঁরই রাজত্বকালে

হিন্দুদের প্রতি মুসলমানদের দুর্ব্যবহারের একটি চিত্র বলে গ্রহণ করা উচিত। জলালুদ্দীন ফতেহ্ শাহের আমলে মুসলমান কাজীদের উৎকট ধর্ষণশক্ততা ও হিন্দু-বিষেবের নিদর্শন অল্প সূত্র থেকেও পাওয়া যায়। একটু বাদেই সে সম্বন্ধে আলোচনা করব।

জলালুদ্দীন ফতেহ্ শাহের রাজত্বকালের একটি বিশিষ্ট ঘটনা শ্রীচৈতন্যদেবের জন্ম। অবশ্য বলা বাহুল্য, এই ঘটনার অসামান্যত্ব কেউই তখন উপলব্ধি করতে পারেননি। শ্রীচৈতন্যদেব ১৪৮৬ খ্রীষ্টাব্দের ১৮ই ফেব্রুয়ারী তারিখে জন্মগ্রহণ করেন।

শ্রীচৈতন্যদেবের বিশিষ্ট ভক্ত যখন হরিদাস তাঁর অনেক আগেই জন্মগ্রহণ করেছিলেন। মুসলমান হয়েও তিনি কৃষ্ণ নাম করতেন, এই “অপরাধে” তাঁকে মুসলিম রাজশক্তির হাতে নিষ্ঠুর নিযাতন সহ্য করতে হয়। ‘চৈতন্যভাগবতের’ আদিখণ্ডের একাদশ অধ্যায় থেকে এই ঘটনার বিবরণ উদ্ধৃত করছি,

ফুলিয়ারে রহিলেন প্রভু হরিদাস ॥  
 গঙ্গাস্নান করি নিরবধি হরিনাম ॥  
 উচ্চ করিয়া লইয়া বুলেন সর্বস্থান ॥  
 কাজী-গিয়া মূলকের অধিপতি স্থানে ॥  
 কহিলেন তাহান সকল বিবরণে ॥  
 “যখন হইয়া করে হিন্দুর আচার ॥  
 ভালমতে তারে আনি করহ বিচার” ॥  
 পাণীব বচন শুনি সেই পাপমতি ॥  
 ধরি আনাইল তারে অতি শীঘ্রগতি ॥  
 কৃষ্ণের প্রসাদে হরিদাস মহাশয় ॥  
 যবনের কি দায় কালেরো নাহি ভয় ॥  
 কৃষ্ণ কৃষ্ণ বলিতে চলিল সেইক্ষণে ॥  
 মূলক-পতির দ্বারে দিলা দরশনে ॥

অতি মনোহর তেজ দেখিয়া তাহান ॥  
 পরম-গৌরবে দিল বসিবারে স্থান ॥  
 আপনে জিজ্ঞাসে তানে মূলকের পতি ॥  
 “কেনে ভাই! তোমার বিরূপ দেখি মতি ॥

কত ভাগ্যে দেখ তুমি হৈরাছ যবন ।  
 তবে কেনে হিন্দুর আচারে দেহ মন ॥  
 আমরা হিন্দুরে দেখি নাই বাই ভাত ।  
 তাহা তুমি ছোড় হই মহাবংশজাত ॥  
 জাতি-ধর্ম লজ্জি কর অশ্রু ব্যবহার ।  
 পরলোকে কেমনে বা পাইবে নিস্তার ॥  
 না জানিঞা যে কিছু করিলা অনাচার ।  
 সে পাপ ঘুচাই করি কলিমা-উচ্চার ॥  
 তুমি মায়ামোহিতের বাক্য হরিদাস ।  
 “অহো বিষ্ণু-মায়ী” বলি কৈল মহাহাস ॥  
 বলিতে লাগিলা তারে মধুর উত্তর ।  
 “শুন বাপ ! সভারই একই ঈশ্বর ॥

তুমিঞা সন্তোষ হৈল সকল যবন ।  
 হরিদাস ঠাকুরের স্বসত্য-বচন ॥  
 তবে এক পাণী কাজী মূলকপতিরে ।  
 বলিতে লাগিলা “শান্তি করহ ইহারে ॥  
 এই দুট আরো দুট করিব অনেক ।  
 যবনকুলের অমহিমা আনিবেক ॥  
 এতেক উহার শান্তি কর ভালমতে ।  
 নহে বা আপন শাস্ত্র বলুক মুখেতে ॥”  
 পুন বোলে মূলকের পতি “আরে ভাই ।  
 আপনার শাস্ত্র বোল তবে চিন্তা নাই ॥  
 অস্ত্রধা করিবা শান্তি সব কাজীগণে ।  
 বলিবাও পাছে আর লঘু হইবা কেনে ॥”  
 হরিদাস বোলেন “যে করান ঈশ্বরে ।  
 তাহা বই আর কেহো করিতে না পারে ॥  
 অপরাধ-অত্মরূপ দার যেই বল ।  
 ঈশ্বরে সে করে ইহা জানিহ সকল ॥

থণ্ড থণ্ড করি দেহ যদি যায় প্রাণ ।  
 ততো আমি বদনে না ছাড়ি হরিনাম ॥”  
 শুনিঞা তাহান বাক্য মূলকের পতি ।  
 জিজ্ঞাসিল “এবে কি করিবা ইহা প্রতি ॥”  
 কাজী বোলে “বাইশ বাজারে নিঞা মারি  
 প্রাণ লহ, আর কিছু বিচার না করি ॥  
 বাইশ বাজারে মারিলেই যদি জীয়ে ।  
 তবে জানি জানী সব সাঁচা কথা কহে ॥”

বাজারে বাজারে সব বেড়ি ছুটগণে ।  
 মারয়ে নিজীব করি মহা-ক্রোধ মনে ॥

কিন্তু বাইশ বাজারে প্রহার করা সত্ত্বেও হরিদাসের প্রাণ বার হল না, অবশেষে যবনদের অহুসে তিহা মৃতের মত হয়ে পড়ে রইলেন। মূলক-পতি তাঁকে কবর দিতে বললেন, কিন্তু কাজী তাঁর পরলোকের পথ রুদ্ধ করার জন্ত তাঁকে নদীতে ফেল দিতে বললেন। হরিদাস প্রথমে যোগবলে অনড় অটল হয়ে রইলেন, পরে যোগবল সংবরণ করে নিয়ে মুসলমানদের কাঁধে উঠলেন। তাঁকে গঙ্গায় ফেলে দেবার পরে তিনি আবার জীবিত হয়ে তীরে উঠে এসে কৃষ্ণনাম করলেন। তাই দেখে মূলকপতি এসে তাঁর কাছে ক্ষমা প্রার্থনা করে তাঁকে বললেন আর কেউ তাঁর কৃষ্ণনামে বিঘ্ন সৃষ্টি করবে না।

এই সব ব্যাপার কতখানি সত্য তা বলা যায় না। এর মধ্যে অনেকখানি অতিরঞ্জন আছে বলেই মনে হয়। তবে যোগবিদ্যার বলে আধুনিক কালেও কোন কোন যোগী হরিদাসের অহুরূপ কার্য অহুষ্ঠান করে দেখিয়েছেন বলে শোনা যায়।

বাহোক, হরিদাস ঠাকুরের নিষাতনের এই কাহিনী সকলেই জানেন। কিন্তু এই ঘটনা কোন সময়ে ঘটেছিল, সে সম্বন্ধে বোধ হয় কারোই সঠিক ধারণা নেই। সকলেই মনে করেন, এই সময়ে বাংলার সুলতান ছিলেন আলাউদ্দীন হোসেন শাহ। কিন্তু ‘চৈতন্যভাগবতে’ বৃন্দাবনদাস স্পষ্টাক্ষরে লিখেছেন যে ‘চৈতন্যদেবের জন্মের অব্যবহিত আগে হরিদাস নির্ধাতিত হয়েছিলেন। ‘চৈতন্যভাগবত’র মধ্যখণ্ড দশম অধ্যায়ে দেখি ‘চৈতন্যদেব হরিদাসকে বলছেন,

পাপিষ্ঠ যবনে তোমা বড় দিল দুখ ।  
 তাহা শ্রুতিরিতে মোর বিদরয়ে বুক ॥  
 সুন সুন হরিদাস তোমারে যখনে ।  
 নগরে নগরে মারি বেড়ায় যবনে ।  
 দেখিয়া তোমার দুঃখ চক্র ধরি করে ।  
 নাছিলু বৈকুণ্ঠ হৈতে সভা কাটিবারে ॥  
 প্রাণান্ত করিয়া তোমা মারে যে সকল ।  
 তুমি মনে চিন্ত তাহা সভার কুশল ॥  
 আপনে মারণ খাও তাহা নাহি লেখ ।  
 তখনেহ তা সভারে মনে ভাল দেখ ॥  
 তুমি ভাল চিন্তিলে না করোঁ মুক্তি বল ।  
 তোলেঁ চক্র তোমা লাগি সে হয় বিফল ॥  
 কাটিতে না পারেঁ তোঁর সঙ্কল লাগিয়া ।  
 তোঁর পৃষ্ঠে পড়েঁ তোঁর মারণ দেখিয়া ॥  
 তোঁহোর মারণ নিজ অঙ্গে করি লঙ্ঘ ।  
 এই তার চিহ্ন আছে মিছা নাহি কঙ্ঘ ॥  
 যেবা গোণ ছিল মোর প্রকাশ করিতে ।  
 শীঘ্র আইলুঁ তোঁর দুঃখ না পারেঁ সহিতে ॥

এই ছত্রগুলির মধ্যে চৈতন্তদেবকে দিয়ে যে সমস্ত কথা বলানো হয়েছে, তাকে ভক্তেরা অক্ষরে অক্ষরে সত্য বলে মনে করলে আমাদের কোন আপত্তি নেই। কিন্তু ঐতিহাসিক এর মধ্য থেকে এটো সত্যই আবিষ্কার করবেন যে মুসলমানদের হাতে হরিদাসের নির্মম নির্ধাতনের সময় চৈতন্তদেবের জন্ম হয় নি; তার সামান্য পরেই তিনি জন্মগ্রহণ করেন।

[ গিরিজাশঙ্কর রায়চৌধুরী তাঁর ‘শ্রীচৈতন্তদেব ও তাহার পার্শ্বদগণ’ বইয়ের ৪৭ পৃষ্ঠায় লিখেছেন, “তখন (হরিদাসের নির্ধাতনের সময়) তিনি (চৈতন্তদেব) বৈকুণ্ঠে ছিলেন না। নবদ্বীপে টোলে ছাত্রদের ব্যাকরণ পড়াইতেছিলেন।” গিরিজাবাবুর এরকম ধারণার কারণ, চৈতন্তভাগবত আদিখণ্ডের একাদশ অধ্যায় অর্থাৎ ‘শ্রীহরিদাসমহিমাবর্ণন’ শীর্ষক অধ্যায়ের গোড়ার দিকে আছে, “হেন মতে বৈকুণ্ঠনারক নবদ্বীপে। গৃহস্থ হইয়া পড়ায়েন বিশ্রুপে ॥” কিন্তু বুদ্ধাবনদাস স্পষ্টাক্ষরে লিখেছেন, “হেনকালে

তথাই আইলা হরিদাস। শুদ্ধ বিফুভক্তি যার বিগ্রহে প্রকাশ ॥” এই বলে বৃন্দাবনদাস হরিদাসের পূর্ব-প্রসঙ্গ বর্ণনা করেছেন। অর্থাৎ হরিদাস যখন নবদ্বীপে প্রথম এসেছিলেন, সেই সময়েই চৈতন্তদেব নবদ্বীপের টোলে চাক্রদেব পড়াছিলেন। মুসলমানদের হাতে হরিদাসের নির্ধাতন অনেক আপেকার কথা। তখন যে চৈতন্তদেবের জন্ম হয়নি, তা উপরে দেখানো হয়েছে।]

সুতরাং চৈতন্তদেবের জন্মের সময়ে এবং তারও ৫৬ বছর আগে থেকে যিনি বাংলার স্বলতান ছিলেন, সেই জলালুদ্দীন ফতেহ্ শাহের রাজত্বকালেই এই ব্যাপার সংঘটিত হয়েছিল, তাতে কোন সন্দেহ নেই।

এখন প্রশ্ন হচ্ছে, ‘চৈতন্তভাগবতে’ হরিদাস ঠাকুরের প্রসঙ্গে বারবার যে ‘মলুক-পতি’র উল্লেখ করা হয়েছে, তিনি কে? প্রথমে আমাদের দেখা দরকার ‘মলুক’ শব্দের অর্থ কী? ‘মলুক’ শব্দের দ্বারা সেযুগে সমগ্র দেশ বোঝাত না, দেশের একটা বিশেষ অঞ্চল বোঝাত। সমসাময়িক কবি বিজয় গুপ্ত লিখেছেন “মলুক ফতেয়াবাদ বাঙ্গরোড়া তকসিম।” বৃন্দাবনদাস ‘চৈতন্তভাগবতে’র অন্ত্যখণ্ডের ৫ম অধ্যায়ে লিখেছেন, “এইমতে সপ্তগ্রামে আব্দুয়া মলুকে। বিহরেন নিত্যানন্দস্বরূপ কৌতুকে ॥” (“সপ্তগ্রাম’ ও ‘আব্দুয়া’ দুটি ভিন্ন ভিন্ন ‘মলুক’।) কৃষ্ণদাস কবিরাজ ‘চৈতন্তচরিতামৃতের’ অন্ত্যলীলার ষষ্ঠ পরিচ্ছেদে লিখেছেন, “হেনকালে মলুকের এক স্নেহ অধিকারী। সপ্তগ্রাম মলুকের সে হয় চৌধুরী ॥ হিরণ্যদাস মলুক নিল মোকতা করিয়া।” ইত্যাদি। সুতরাং বৃন্দাবনদাস ‘মলুক-পতি’ অর্থে আঞ্চলিক শাসন-কর্তা বুঝিয়েছেন সন্দেহ নেই। হরিদাসের ব্যাপারে এই মলুক-পতির ভূমিকাটি একটু বিচিত্র ধরনের। হরিদাসকে হিন্দুর আচার বর্জন করতে ও কলিমা উচ্চারণ করতে উপদেশ দিয়ে তিনি যে সব কথা বলেছিলেন, তাতে তাঁর হিন্দু-বিদ্বেষ ও ইসলামধর্মে নিষ্ঠা প্রকাশ পেয়েছে বটে, কিন্তু সমস্ত ব্যাপারটাকেই তাঁকে কাজীদের ভুলনায় অনেকখানি উদার মনোভাব অবলম্বন করতে দেখতে পাই। শেষ পর্যন্ত তিনি হরিদাসের অপাখিব মহিমা স্বীকার করে নিয়ে তাঁকে ইচ্ছামত ধর্মচরণের স্বাধীনতাও দিয়েছেন।

আসল কথা—কাজীরা সচরাচর যেমন হত, জলালুদ্দীন ফতেহ্ শাহের কাজীরাও ছিল সেই প্রকৃতির। তারা ইসলাম ধর্মের আইনকানুন বাস্তব ক্ষেত্রে প্রয়োগের জন্য উন্মূহ হয়ে থাকত এবং ধর্ম নিয়ে গৌড়াধির পরাকাষ্ঠা দেখাত। হরিদাস মুসলমান হয়েও হিন্দুর মত আচরণ ও হরিদাস করায়, এ

ব্যাপারকে তারা কুমার অযোগ্য অপরাধ বলেই মনে করেছিল। (হরিদাস জয়-মুসলমান ছিলেন কিনা তা বিতর্কের বিষয়। জয়ানন্দের চৈতন্যমঙ্গলে লেখা আছে যে হরিদাস আসলে হিন্দুর সম্ভান এবং তাঁর পিতামাতার নাম যথাক্রমে মনোহর ও উজ্জ্বলা। অবশ্য প্রাচীনতম চৈতন্যচরিতকর মুরারি গুপ্ত তাঁর ‘শ্রীকৃষ্ণচৈতন্যচরিতামৃতম্’ গ্রন্থে লিখেছেন যে হরিদাস “ধ্বনকুলে” জন্মগ্রহণ করেছিলেন।)

কিন্তু ‘মলুক-পতি’ এইসব কাজীদের মত উগ্র সাম্প্রদায়িক-মনোভাবসম্পন্ন ছিলেন না। যদিও তিনি কাজীর নির্বন্ধে হরিদাসের মত পরিবর্তনের চেষ্টা করেছেন এবং সেই চেষ্টা করতে গিয়ে হিন্দুদের বিরুদ্ধে কয়েকটি কথা বলেছেন, কিন্তু হরিদাসের সঙ্গে ব্যবহারে তিনি উদ্রতা রক্ষা করেছেন ও উদার মনোভাব দেখিয়েছেন। হরিদাসকে যে নিষ্ঠুর শাস্তি দেওয়া হল, তা কাজীদেরই কথায়, তাঁর নিজের ইচ্ছায় নয়। হরিদাস যখন মৃতবৎ প্রাণীকৃত হলেন, তখন মলুক-পতি তাঁকে কোন অসম্মান দেখাননি, ইসলামের রীতি অনুযায়ী কবর দিতেই বলেছেন, কাজীরাই তার বিরুদ্ধাচরণ করল। ‘মলুক-পতি’র উদার মনোভাবের চরম দৃষ্টান্ত দেখা যায় হরিদাসের মহিমা স্বীকার ও ধর্মাচরণের স্বেচ্ছা দানের মধ্যে।

কোন কোন চৈতন্যচরিতগ্রন্থে চৈতন্যদেবের জন্মের উল্লেখ প্রসঙ্গে তৎকালীন গোড়েশ্বর সম্বন্ধে ছ’ একটি কথা লিপিবদ্ধ হয়েছে। যেমন জয়ানন্দের ‘চৈতন্য-মঙ্গলে’ লেখা আছে চৈতন্যদেবের জন্মের অব্যবহিত আগে নবদ্বীপে এই ঘটনা ঘটেছিল,

আচমিতে নবদ্বীপে হৈল রাজভয় ।  
ব্রাহ্মণ ধরিঞা রাজা জাতি প্রাণ লয় ॥  
নবদ্বীপে শঙ্খধ্বনি শুনে যার ঘরে ।  
ধন প্রাণ লয়ে তার জাতি নাশ করে ॥  
কপালে তিলক দেখে যজ্ঞসূত্র কাছে ।  
ঘর ঘর লোটে তার সেই পাশে বাছে ॥  
দেউলে বেহরা ভাজে উপাড়ে তুলসী ।  
প্রাণভয়ে হিন্ন নহে নবদ্বীপবাসী ॥  
গঙ্গানান বিরোধিল হাট ঘাট বত ।  
অশ্বখ পনস বৃক কাটে শত শত ॥



পিরল্যা গ্রামেতে বৈসে যতেক যবন ।  
 উচ্চর করিল নবদ্বীপের ব্রাহ্মণ ॥  
 ব্রাহ্মণে যবনে বান যুগে যুগে আছে ।  
 বিষম পিরল্যা গ্রাম নবদ্বীপের কাছে ॥  
 গোড়েশ্বর বিজ্ঞমানে দিল মিথ্যাবাদ ।  
 “নবদ্বীপ বিপ্র তোমার করিল প্রমাদ ॥  
 ‘গোড়ে ব্রাহ্মণ রাজ্য হব’ হেন আছে ।  
 নিশ্চিন্তে না থাকিও প্রমাদ হব পাছে ॥  
 নবদ্বীপে ব্রাহ্মণ অবস্থা হব রাজ্য ।  
 গন্ধর্বে লিখন আছে ধনুর্ময় প্রজা ॥”  
 এই মিথ্যা কথা রাজ্যার মনেতে লাগিল ।  
 নদীয়া উচ্চর কর রাজ্য আজ্ঞা দিল ॥  
 বিশারদস্বত সার্বভৌম ভট্টাচার্য্য ।  
 সবংশে উৎকল গেলা ছাড়ি গোড় রাজ্য ॥  
 উৎকলে প্রতাপরুদ্র ধনুর্ময় রাজ্য ।  
 রত্নসিংহাসনে সার্বভৌমে কৈল পূজা ॥  
 তার ভ্রাতা বিজ্ঞাবাচম্পতি গোড়ে বসি ।  
 বিশারদ নিবাস করিল বারানসী ॥  
 বিজ্ঞাবিরিকি বিজ্ঞারণ্য নবদ্বীপে ।  
 ভট্টাচার্য্যশিরোমণি সভার সমীপে ॥  
 নদীয়া উচ্চর হেন শুনি গোড়েশ্বর ।  
 রাত্রিকালে স্বপ্ন দেখে মহা ঘোরতর ॥  
 কালী ঋগ-খণ্ড-খণ্ডধারিণী দিগম্বরী ।  
 মুণ্ডমালা গলে কাট কাট শব্দ করি ॥  
 ধর্ম্মি রাজ্যার কেশে বুকে মারে শেল ।  
 কর্ণরঞ্জে নাসারঞ্জে ঢালে তপ্ত তেল ॥  
 “আজি তোমার গজায় পেলিমু গোড়পাট ।  
 সবংশে কাটিমু তোমার হস্তী ঘোড়া ঠাট ॥”  
 গোড়েশ্বর বলিল “মাতা মোর দেহে থাক ।  
 নবদ্বীপে বসাইব আজি প্রাণ রাখ ॥”

নাকে খত ছিল রাজা তবে কালী ছাড়ে ।  
 মুছাঁ গেল গোড়েক্স ধরণীতলে পড়ে ॥  
 প্রভাতে কহিল স্বপ্ন রাজবিশ্বাসে ।  
 শুনিয়া আশ্চর্য স্বপ্ন সর্বলোক জ্ঞাসে ॥  
 গোড়েক্সের আজ্ঞা “নবদ্বীপ স্থখে বস ॥  
 রাজকর নাহি সর্বলোক চাষ চষ ॥  
 আজি হৈতে হাট ঘাট বিরোধ যে করে ।  
 রাজকর দণ্ডী হয়ে জিশুল সে পরে ॥  
 দেউল দেহরা ভাজে অস্থখ যে কাটে ।  
 জিশুলে চড়াহ তাকে নবদ্বীপের হাটে ॥  
 বৈজ্ঞ ব্রাহ্মণ জত নবদ্বীপে বসে ।  
 নানা মহোৎসব কর মনের হরিষে ॥  
 নাট গীত বাজ বাজু প্রতি ঘরে ঘরে ।  
 কলসে পতাকা উড়ু মন্দির উপরে ॥  
 পুষ্পের বাজার পড়ু গন্ধের উভার ।  
 শঙ্খ ঘণ্টা বাজুক বস্ত্র জয় জয়কার ॥  
 পূর্বে জেমত ছিল নবদ্বীপ রাজধানী ।  
 তার শতগুণ অধিক জেনে শুনি ॥  
 নবদ্বীপ সীমাএ যখন যদি দেখে ।  
 আপন ইৎসাএ মার প্রাণে পাছে রাখ ॥  
 দেবপূজা কর স্থখে যজ্ঞ হোম দান ।  
 হাট ঘাট মানা নাহি কর গঙ্গান্নান ॥  
 নবদ্বীপে প্রজ্ঞাএ কি মোর অধিকার ।  
 সত্য সত্য বলি আমি সংসারের সার ॥”  
 রাজার আজ্ঞাএ নবদ্বীপ পুন সৃষ্টি ।  
 শরৎকালে রাজ্যশেষে হৈল পুষ্পবৃষ্টি ॥  
 মহা মহাজন যে ছাড়িঞা ছিল গ্রাম ।  
 নবদ্বীপে আইলা সম্ভে পূর্ণ হৈল কাম ॥

জয়ানন্দের এই বিবরণের প্রত্যক্ষ সমর্থন অন্ত কোন সূত্রে থেকে পাওয়া যায়  
 না বটে, তবে বুদ্ধাবনদাসের ‘চৈতন্যভাগবতে’ এর পরোক্ষ সমর্থন মেলে ।

‘চৈতন্তভাগবত’ আদিখণ্ডের দ্বিতীয় অধ্যায়ে বৃন্দাবনদাস লিখেছেন যে চৈতন্তদেবের জন্মের কিছু আগে

চারি ভাই স্রীবাস মিলিয়া নিজঘরে ।  
 নিশা হৈলে হরিনাম গায় উচ্চৈঃস্বরে ॥  
 শুনিয়া পাষণ্ডী বোলে “হইল প্রমাদ ।  
 এ ব্রাহ্মণ করিবেক গ্রামের উৎসাদ ॥  
 মহাতীত নরপতি যখন ইছার ।  
 এ আখ্যান শুনিলে প্রমাদ নদীয়ার ॥

শেষ দুই ছত্র থেকে বোধ হয় হিন্দু ধর্মের প্রতি গনবদ্বীপের হিন্দুদের প্রতি তৎকালীন সুলতান জলালুদ্দীন ফতেহ শাহের পূর্ব-ব্যবহার সুবিধাজনক ছিল না এবং তার কথা মনে রেখেই “পাষণ্ডী” রা এই কথা বলেছে। এই জন্ত মনে হয়, জয়ানন্দের বিবরণ মূলত সত্য এবং জয়ানন্দ-বর্ণিত ঘটনার কথা মনে করেই “পাষণ্ডী”রা এই উক্তি করেছিল।

জয়ানন্দ লিখেছেন যে পিরল্যা গ্রামের মুসলমানরা গোড়েশ্বরের কাছে বলেছিল,

‘গোড়ে ব্রাহ্মণ রাজা হব’ হেন আছে।

অর্থাৎ গোড়ে ব্রাহ্মণ রাজা হবে বলে প্রবাদ আছে। এই প্রবাদ যে তখন সত্যিই ব্যাপকভাবে প্রচলিত ছিল, তা বৃন্দাবনদাসের ‘চৈতন্তভাগবত’ের একাধিক অংশ থেকে জানতে পারি। চৈতন্তভাগবতের আদিখণ্ডের দ্বিতীয় অধ্যায়ে বৃন্দাবনদাস লিখেছেন যে সন্তোজাত চৈতন্তদেবের রূপ এবং লগ্নে “মহারাজ-লক্ষণ” দেখে তাঁর মাতামহ নীলাশ্বর চক্রবর্তী বলেছিলেন,

‘বিপ্ররাজা গোড়ে হইবেক’ হেন আছে।

বিপ্র বোলে ‘সেই বা জানিব তা পাছে’ ॥

আবার বৃন্দাবনদাস আদিখণ্ডের অষ্টম অধ্যায়ে লিখেছেন যে যুবক অধ্যাপক চৈতন্তদেব যখন শিষ্যদের সঙ্গে গঙ্গাতীরে বসেছিলেন, সেই সময় তাঁর অনিন্দ্য স্মরণ মূর্তি দেখে

কেহো বোলে ‘বিপ্র রাজা হইবেক গোড়ে ।

সেই এই, হেন বুলি কখনো না নড়ে’ ॥

বৃন্দাবনদাসের চৈতন্তভাগবতের আর একটি অংশ থেকে জয়ানন্দের বিবরণের

স্পষ্টতর সমর্থন পাওয়া যায় বলে আমরা মনে করি। এখন সে লব্ধকে আলোচনা করছি।

গঙ্গাদাস পণ্ডিত ছিলেন চৈতন্যদেবের শিষ্যগুরু এবং নবরীপের বিশিষ্ট পণ্ডিতদের অন্ততম। 'চৈতন্যভাগবত' মধ্যখণ্ডের নবম অধ্যায়ে লেখা আছে যে গঙ্গাদাস পণ্ডিত একবার রাজভয়ে দেশ ( সম্ভবত নবরীপ ) ছেড়ে পালিয়েছিলেন। 'চৈতন্যভাগবত'র মতে নবরীপলীলার সময় মহাপ্রভু যখন জীবাস পণ্ডিতের গৃহে ঐশ্বর্য ভাব প্রকাশ করেছিলেন, সেই সময়ই তিনি গঙ্গাদাস পণ্ডিতকে এই অতীত কথা শ্রবণ করিয়ে দিয়েছিলেন। 'চৈতন্যভাগবত'র উক্তি আমরা নীচে উদ্ধৃত করছি,

গঙ্গাদাসে দেখি বোলে, তোর মনে জাগে।

রাজ-ভয়ে পলাইস্ যবে নিশাভাগে ॥

সর্ব-পরিকর সনে আসি থেয়াঘাটে।

কোথায় নাহিক নৌকা পড়িলা সঙ্কটে ॥

রাত্রি শেষ হৈল তুমি নৌকা না পাইয়া।

কান্দিতে লাগিলা অতি দুঃখিত হইয়া ॥

মোর আগে যবনে স্পর্শিবে পরিবার।

গাঙ্গে প্রবেশিতে মন হইল তোমার ॥

তবে আমি নৌকা নিয়া থেয়ারির রূপে।

গঙ্গায় বাহিয়া যাই তোমার সমীপে ॥

তবে নৌকা দেখি তুমি সন্তোষ হইলা।

অতিশয় প্রীত করি কহিতে লাগিলা ॥

আরে ভাই আমারে রাখহ এইবার।

জাতি প্রাণ ধন দেহ সকলি তোমার ॥

রক্ষা কর পরিকর সঙ্গে কর পার।

এক তুকা এক ষোড় বস্ত্র সে তোমার ॥

তবে তোমা সঙ্গে পরিকর করি পার।

তবে নিজ বৈকুণ্ঠে গেলাও আরবার ॥

উদ্ধৃত অংশে বলা হয়েছে যে চৈতন্যদেব সে সময় বৈকুণ্ঠে ছিলেন এবং গঙ্গাদাস পণ্ডিতের বিপদের সময় তিনি বৈকুণ্ঠ থেকে নেমে এসে মাঝির মূর্তি ধরে গঙ্গাদাসকে নির্বিঘ্নে গঙ্গা পার করিয়ে দিয়ে বৈকুণ্ঠে ফিরে গিয়েছিলেন।

সুতরাং গঙ্গাদাসের রাজত্বয়ে দেশত্যাগ চৈতন্যদেবের জন্মের আগে ঘটেছিল সন্দেহ নেই ( বলা বাহুল্য, আসলে সাধারণ একজন মাঝিই গঙ্গাদাসকে গঙ্গা পার করিয়ে দিয়েছিল )। যে সময় জলালুদ্দীন ফতেহ শাহের আদেশে নবদ্বীপের ব্রাহ্মণদের উপর ব্যাপকভাবে এই ধরনের অত্যাচার করা হয়েছিল বলে জয়ানন্দের চৈতন্যমঙ্গলে লেখা আছে, তার সঙ্গে এই ঘটনার সময় প্রায় মিলে যায়। জয়ানন্দ গোড়েশ্বরের যে অত্যাচারের বর্ণনা দিয়েছেন, বৃন্দাবনদাস তারই একটি অংশ উপরে উদ্ধৃত বিবরণের মধ্যে উপস্থাপিত করেছেন বলে মনে হয়।

সুতরাং জয়ানন্দের উল্লিখিত বিবরণ মোটামুটিভাবে সত্য বলেই মনে হয়। অবশ্য বলা বাহুল্য, ঐ বর্ণনা আক্ষরিকভাবে সত্য হতে পারে না। কারণ কোন মুসলমান গোড়েশ্বর নবদ্বীপের হিন্দুদের ঢালাও হুকুম দিতে পারেন না যে, নবদ্বীপ সীমাএ যবন যদি দেখ।

আপন ইংসাএ ( ইচ্ছায় ) মার প্রাণে পাছে রাখ ॥

এর মধ্যে উল্লিখিত আরও কোন কোন বিষয়ের যথার্থ্য সন্দেহে প্রবৃত্তি উঠতে পারে। এতে বলা হয়েছে এই সঙ্কটের সময়েই (বাহুদেব) সার্বভৌম বাংলাদেশ ছেড়ে উৎকলে চলে যান এবং উৎকলরাজ প্রতাপরুদ্র তাঁকে বরণ করে নেন। কিন্তু এই ঘটনা ঘটেছিল চৈতন্যদেবের জন্মের আগে আর উৎকলরাজ প্রতাপরুদ্র চৈতন্যদেবের জন্মের ১১ বছর পরে, ১৪৯৭ খ্রীষ্টাব্দে সিংহাসনে আরোহণ করেন। অবশ্য সার্বভৌমের উৎকলে গমনের সঙ্গে সঙ্গেই প্রতাপরুদ্রের কাছে সংবর্ধনালাভ ঘটেছিল, একথা বলা জয়ানন্দের অভিপ্রেত না-ও হতে পারে। এছাড়া কোন কোন কোন পণ্ডিত প্রবৃত্তি তুলেছেন যে, সার্বভৌমের উপর যদি রাজরোষ গিয়ে পড়ল, তাহলে তাঁর ভাই তার থেকে অব্যাহতি পেলেন কেমন করে? সার্বভৌম উড়িষ্যায় চলে যাবার পরও তাঁর ভাই বিজ্ঞাবাচম্পতি বাংলাদেশেই থেকে গিয়েছিলেন। জয়ানন্দ নিজেই লিখেছেন, “তার ভ্রাতা বিজ্ঞাবাচম্পতি গোড়ে বসি”।\* এ সন্দেহে আরও বহু প্রমাণ আছে। সুতরাং

\* এর অর্থ এ’ ও হতে পারে যে—‘বিজ্ঞাবাচম্পতি গোড় নগরে বাস করছিলেন।’ ভক্তিরত্নাকরের মতে বিজ্ঞাবাচম্পতি গোড় নগরের সংলগ্ন রামকলি গ্রামে মাঝে মাঝে বাস করতেন। জয়ানন্দের বিবরণ থেকে দেখা যায় যে, গোড়েশ্বর নবদ্বীপের ব্রাহ্মণদের উপরেই কষ্ট হয়ে তাঁদের “জাতি প্রাণ” নিতে আদেশ দিয়েছিলেন। গোড় নগরের ব্রাহ্মণদের উপর তাঁর কষ্ট হওয়ার কোন উল্লেখ দেখা যায় না। বিজ্ঞাবাচম্পতি গোড় নগরে থাকার জন্তই হয়তো রাজরোষ থেকে অব্যাহতি পেরে-ছিলেন।

আলোচ্য বিবরণে উল্লিখিত সার্বভৌমের রাজত্বের দেশত্যাগের প্রসঙ্গটির ঐতিহাসিকতা সন্দেহের অতীত নয়। গোড়েখরকে কালী দেবী স্বপ্নে দেখা দিয়ে ভয় দেখিয়েছিলেন এবং গোড়েখর ভীত হয়ে অত্যাচার বন্ধ করেছিলেন— এই কথা কবিকল্পনা ছাড়া আর কিছুই নয়। কিন্তু এ সমস্ত বিষয় বাদ দিলে যেটুকু থাকে, তা বাস্তব ভিত্তির উপরেই প্রতিষ্ঠিত বলে মনে হয়। নব্বীপের ব্রাহ্মণদের উপর মুসলমানদের যে ধরনের অত্যাচারের কথা জয়ানন্দ লিখেছেন, জলালুদ্দীন ফতেহ্ শাহের রাজত্বকালে রচিত বিজয়গুপ্তের মনসামঙ্গলের হাসন-হোসেন পালাতেও সেই ধরনের অত্যাচারের বর্ণনা পাওয়া যায়। গোড়ে ব্রাহ্মণ রাজা হবে বলে লোকে বলাবলি করছে, এ খবর গোড়ের স্থলতানের কানে নিশ্চয়ই উঠেছিল। চৈতন্যদেবের জন্মের কিছু আগেই নব্বীপ বাংলা তথা ভারতের অগ্রতম প্রেষ্ঠ বিজ্ঞাপীঠ হিসাবে গড়ে ওঠে এবং এখানকার ব্রাহ্মণেরা সব দিক দিয়েই সমৃদ্ধি অর্জন করেন। বাইরের থেকেও অনেক ব্রাহ্মণ নব্বীপে আসতে থাকেন। এই সব ব্যাপার দেখে গোড়েখরের বিচলিত হওয়া এবং এতগুলি ঐশ্বর্যবান ব্রাহ্মণ এক জায়গায় মিলে হয়তো গোড়ে ব্রাহ্মণ রাজা হওয়ার প্রবাদ সার্থক করে তোলার জন্ত তাঁর বিরুদ্ধে ষড়যন্ত্র করছে ভাবা খুব স্বাভাবিক। এর কয়েক দশক আগে বাংলাদেশে রাজা গণেশের অভ্যুত্থান হয়েছিল। দ্বিতীয় কোন হিন্দু অভ্যুত্থানের আশঙ্কায় পরবর্তী গোড়েখররা নিশ্চয়ই সন্ত্রস্ত হয়ে থাকতেন। সুতরাং এক শ্রেণীর মুসলমানের উত্থানিতে তৎকালীন গোড়েখর জলালুদ্দীন ফতেহ্ শাহ নব্বীপের ব্রাহ্মণদের উপর অত্যাচার করেছিলেন এবং পরে নিজের ভুল বুঝতে পেরে অত্যাচার বন্ধ করে নব্বীপের ক্ষতিপূরণ করেছিলেন, একথা সত্য বলেই আমি মনে করি।

জয়ানন্দের 'চৈতন্যমঙ্গল' ( সাহিত্য-পরিষদ-সংস্করণ, নদীয়া খণ্ড, পৃ: ১২ ) লেখা আছে যে চৈতন্যদেব যখন শিশু, তখন একবার ছেলেধরা রাজার দূতেরা তাঁকে ধরতে এসেছিল, কিন্তু তাদের প্রচেষ্টা ব্যর্থ হয়। উপরন্তু সর্পাঘাতে এইসব রাজদূতের মৃত্যু হয়। জয়ানন্দ লিখেছেন,

রাজি দিনে গোরচন্দ্র নদীয়া নগরে।

বালকীড়া করি বুলে সভার মন্দিরে ॥

ছালিআ ধরা রাজার দূত দেখি আচরিতে।

পথে দিশা না পাইঞা কান্দিতে কান্দিতে ॥

অন্ধকূপে পড়িঞা রহিলা দূতের ঘরে ।

চাহিঞা বুলে দূত সব প্রতি ঘরে ঘরে ॥

উদ্দেশ পাইঞা দূত ধরিয়া আনিল ।

কূপে হৈতে মহাসর্প দূতেরে খাইল ॥

সর্পাঘাতে রাজদূত মইল রাজপথে ।

ঘরে আসি হাসে নাচে গৌর জগন্নাথে ॥

এই ঘটনা যদি সত্যই ঘটে থাকে, তাহলে চৈতন্যদেবের দেড় থেকে সাত বছর বয়সের মধ্যে অর্থাৎ ১৪৮৭ থেকে ১৪৯৩ খ্রীষ্টাব্দের মধ্যে ঘটেছিল। ঐ কয় বছরের মধ্যে অনেকজন রাজা পর পর সিংহাসনে বসেছিলেন। সুতরাং কোন্ রাজার দূত শিশু গৌরাজকে চুরি করতে এসেছিল, তা বলার বর্তমানে কোন উপায় নেই। কিন্তু রাজদূতেরা একটি অবোধ শিশুকে কেন হরণ করতে আসবে, তার কোন ব্যাখ্যা জয়ানন্দ দেন নি। কোন ধর্মোন্মাদ সুলতান কি তখন হিন্দু বালকদের অপহরণ করিয়ে মুসলমান করছিলেন? অবশ্য এই শিশু-হরণের পিছনে আরও একটি কারণ থাকতে পারে। পতুগীজ পর্যটক বারবোসা ১৫১৪ খ্রীষ্টাব্দে বাংলাদেশে ভ্রমণ করেছিলেন। তিনি লিখেছেন যে, সে সময় একদল লোক—“পৌত্তলিক” (হিন্দু) বালকদের অপহরণ করে “মুরিশ” (মুসলমান) বণিকদের কাছে বিক্রয় করত, তারপর সেইসব হতভাগ্য বালকদের খোজা করা হত। জয়ানন্দের এই বিবরণ পড়ে মনে হয়, সে সময় কোন কোন সুলতানও হিন্দু বালকদের অপহরণ করিয়ে খোজা বানাতেন, ভবিষ্যতে নিজের কাজে তাদের লাগাবার জন্তে। অবশ্য জয়ানন্দের উক্তির বাখ্যাৎ সন্দেহ কোন প্রমাণ নেই। অঙ্কুর (সা. প. সং., উত্তর খণ্ড, পৃ: ১৪৭) জয়ানন্দ লিখেছেন,

রাজার মাছুষ আসি ধরি লৈঞা জাএ ।

হরি বোলাইঞা প্রভু তাহারে কান্দাএ ॥

এখানে আবার তিনি একটু ভিন্ন রকমের কথা বললেন; শিশু নিমাই শুধু ছেলেধরা রাজদূতদের প্রচেষ্টা ব্যর্থ করেন নি, তাদের হরি বলিয়ে কাঁদিয়েছিলেন। বলা বাহুল্য, এই উক্তি আরো অবিশ্বাস্য।

ইতিপূর্বে আমরা ‘চৈতন্যভাগবত’ের কয়েকটি বিবরণের উল্লেখ করেছি। এগুলি থেকে জলালুদ্দীন ফতেহ শাহের রাজত্বকালে দেশের, বিশেষত হিন্দু সম্প্রদায়ের কীরকম অবস্থা ছিল, সে সম্বন্ধে খানিকটা আভাস পাওয়া যায়।

বুন্দাবনদাসের চৈতন্তভাগবত থেকে জলালুদ্দীন ফতে শাহের রাজস্বকালের আরও কয়েকটি ঘটনার কথা জানা যায়। আদিখণ্ডের তৃতীয় অধ্যায়ে বুন্দাবনদাস গৌরাজের নামকরণের এই বর্ণনা লিপিবদ্ধ করেছেন,

বোলেন বিদ্বান সব করিয়া বিচার ।  
 “এক নাম যোগ্য হয় রাখিতে ইহার ॥  
 এ শিশু জন্মিলে মাত্র সর্ব দেশে দেশে ।  
 দুর্ভিক্ষ ঘুচিল বৃষ্টি পাইল ঝরকে ॥  
 জগৎ হইল সুখ ইহান জনমে ।  
 পূর্বে যেন পৃথিবী ধরিল না রায়ণে ॥  
 অতএব ইহান শ্রীবিশ্বস্তর নাম ।”

এখানে গৌরাজের ‘বিশ্বস্তর’ নাম হওয়ার যে কারণ লিপিবদ্ধ হয়েছে, তা অবিশ্বাস করার কোন হেতু নেই। স্মরণ্য চৈতন্তদেবের জন্মের ঠিক আগের বছর অর্থাৎ ১৪৮৫ খ্রীষ্টাব্দে যে জলালুদ্দীন ফতেহ শাহের রাজ্যে দুর্ভিক্ষ হয়েছিল, সেই তথ্য এখানে পাচ্ছি।

হরিদাস ঠাকুর মুসলমান রাজকর্মচারীদের হাতে নির্ধাতিত হবার পর যখন ফুলিয়ায় ফিরে গিয়ে সংকীর্তন শুরু করেছিলেন, তখন সেখানকার ব্রাহ্মণেরাও তাতে যোগ দিয়েছিলেন। তাই দেখে “শাষণ্ড” লোকেরা এই কথা বলেছিল বলে বুন্দাবনদাস আদিখণ্ড ১১শ অধ্যায়ে লিখেছেন,

“এ বামনগুলা রাজ্য করিবেক নাশ ।”

কেহো বোলে “যদি ধানে কিছু মূল্য চড়ে ।

তবে এগুলো ধরি কলাইমু ঘাড়ে ॥”

এর থেকে বোঝা যায়, সে সময় লোকে সর্বদা দুর্ভিক্ষের ভয়ে তটস্থ হতে থাকত। ১৪৮৫ খ্রীষ্টাব্দের দুর্ভিক্ষই সম্ভবত তাদের মনে এই আতঙ্কের সৃষ্টি করেছিল।

‘চৈতন্তভাগবত’ আদিখণ্ডের একাদশ অধ্যায়েই বুন্দাবনদাস লিখেছেন যে ‘মুলুক-পতি’র আদেশে যখন হরিদাসকে বন্দিশালায় প্রেরণ করা হয়, তখন অনেক বড় বড় লোক কারাগারে আবদ্ধ ছিলেন এবং হরিদাস তাদের মধ্যে আসছেন শুনে তাঁরা খুব খুশী হয়েছিলেন,



বড় বড় লোক যত আছে বন্দি-ঘরে ।

তার। সব দৃষ্ট হৈলা শুনিয়া অন্তরে ॥

এইসব “বড় বড় লোক”রা যে হিন্দু ছিলেন ও রাজা-জমিদারের পর্ষদভুক্ত ছিলেন, তা এর অব্যবহিত পরবর্তী অংশ থেকে জানা যায়। বৃন্দাবনদাস লিখেছেন যে হরিদাস এষ্ট সমস্ত বন্দীদের আশীর্বাদ করার সময় বললেন,

“এবে নিত্য কৃষ্ণনাম কৃষ্ণের চিন্তন ।

সভে মিলি করিতে আছহ অমুক্ষণ ॥

এবে হিংসা নাহি—নাহি প্রজার পীড়ন ।

কৃষ্ণ বলি কাকুর্বাদে করহ চিন্তন ॥

আর বার গিয়া বিষয়েতে প্রবত্তিলে ।

সভে ইহা পাসরিবে গেলে দুষ্ট-মেলে ॥”

এর থেকে বোঝা যায়, জলালুদ্দীন ফতেহ্ শাহের রাজত্বকালে অনেক ধনী হিন্দু ভূস্বামীকে কোন কোন সময় কারাগারে আবদ্ধ করে রাখা হত। কিন্তু কেন? অষ্টাদশ শতাব্দীতে মুশিদকুলী খাঁ হিন্দু জমিদারদের খাজনা বাকী পড়লে তাঁদের কারাগারে আবদ্ধ করতেন এবং নানারকম দুর্ব্যবহার করতেন। জলালুদ্দীন ফতেহ্ শাহের এই আচরণের পিছনেও কি অমুক্ষণ কারণ বর্তমান ছিল? না এটা নিছক হিন্দু-বিদ্বেষের ফল? বর্তমানে এইসব প্রশ্নের সঠিক উত্তর দেওয়া যাবে না।

জলালুদ্দীন ফতেহ্ শাহের রাজত্বকালের যে সমস্ত ঘটনার কথা জানা যায়, সেগুলি আমরা উল্লেখ করলাম। এদের থেকে রাজা হিসাবে তিনি কীরকম ছিলেন সে সম্বন্ধে একটা মোটামুটি ধারণা করা যায়। হিন্দু প্রজাদের উপর তিনি অন্তত কয়েকবার অত্যাচার করেছেন এবং তাঁর পূর্ববর্তী সুলতান শামসুদ্দীন মুহম্মদ শাহের মত তিনিও হিন্দু-বিদ্বেষ হতে মুক্ত হতে পারেননি। ককতুদ্দীন বারবক শাহ যে উদার অসাম্প্রদায়িক নীতি গ্রহণ করেছিলেন, তা এই দু'জন সুলতান অমুসরণ করেননি। সেই হিসাবে জলালুদ্দীন ফতেহ্ শাহকে প্রশংসা করা যায় না। তাঁর রাজত্বকালে রাজ্যে দুর্ভিক্ষ হয়েছিল, এটাও তাঁর পক্ষে অগোরবের বিষয়। কিন্তু মোটের উপর জলালুদ্দীন ফতেহ্ শাহ সুশাসক ছিলেন এবং শাসনদক্ষতার পরিচয় দিয়ে ও নানা জনহিতকর কাজ করে জনসাধারণের মনে রেখাপাত করেছিলেন, সমসাময়িক কবি বিজয় গুপ্তের উক্তি এবং ‘তবকাত-ই-আকবরী’ ও ‘রিয়াজ-উস-সলাতীনে’র বিবরণ পড়ে এই

কথাই মনে হয়। জলালুদ্দীন ফতেহ্ শাহের অধীনস্থ কর্মচারী এবং আঞ্চলিক শাসনকর্তাদের মধ্যে যে উৎকট সাম্প্রদায়িকতাবাদীরা প্রাধান্য লাভ করেছিল, —বিজয় গুপ্ত, বৃন্দাবনদাস এবং জয়ানন্দের বিবরণ পড়লে তা পরিষ্কার বোঝা যায়। অবশ্য এঁদের মধ্যেও যে ভয় এবং উদার প্রকৃতির লোকের অভাব ছিল না, হরিদাস ঠাকুরের প্রসঙ্গে উল্লিখিত ‘মূলুক-পতি’ই তার দৃষ্টান্ত।

যাহোক, এবিষয়ে কোনই সন্দেহ নেই যে, জলালুদ্দীন ফতেহ্ শাহ জবরদস্ত প্রকৃতির রাজা ছিলেন। বৃন্দাবনদাস যে তাঁকে “মহাতীত্র নরপতি” বলেছেন, তা অযথার্থ নয়। কেউ অস্ত্রায় করলেই তিনি কঠোর হাতে তাকে শাস্তি দিতেন এবং এই কঠোর আচরণের ফলেই তাঁকে অকালে রাজ্য ও প্রাণ দুইই হারাতে হয়। নীচে তাঁর সেই করুণ পরিণতির বিবরণ লিপিবদ্ধ হল। এই বিবরণ পড়লে মনে হয়, জলালুদ্দীন ফতেহ্ শাহের চরিত্রে বলিষ্ঠতা ছিল, কিন্তু তিনি কৌশলী ছিলেন না। তাই দুবিনীত কর্মচারীদের তিনি বেশে রাখতে পারেন নি।

এই সময়ে হাবশীদের প্রতিপত্তি খুবই বেড়েছিল। রাজধানী, রাজপ্রাসাদ —সবত্রই তারা মারাত্মক রকমের প্রতাপশালী হয়ে উঠেছিল। তারা অনেক সময় রাজার আদেশও মানত না। ফিরিশ্তা লিখেছেন, ফতেহ্ শাহ খোজা ও হাবশী ক্রীতদাসদের সংশোধন করেছিলেন। তাদের মধ্যে যারা স্নেহভাবের আদেশ অমান্য করত, ফতেহ্ শাহ তাদের উপরে কঠোর হাতে “গায়ের চাবুক” প্রয়োগ করতেন। এইভাবে তিনি বারবক শাহ ও যুসুফ শাহের আমলে হাবশীরা যে প্রতিপত্তি লাভ করেছিল, তা খানিকটা কমালেন। যাদের তিনি শাস্তি দিতেন, তারা খওয়াজা সেরা (প্রাসাদের প্রধান খোজা) এবং প্রাসাদ-রক্ষী পাইকদের সর্দার বারবকের সঙ্গে মিলে রাজার বিরুদ্ধে দল পাকাত। বারবকেরই হাতে রাজপ্রাসাদের সব চাবি ছিল।

এর পরের ঘটনা সম্বন্ধে ‘তবকাৎ-ই-আকবরী’, ‘মাসির-ই-রহিমী’, ‘তারিখ-ই-ফিরিশ্তা’, ‘রিয়াজ-উস-সলাতীন’—সব গ্রন্থই একমত। নীচে ‘তবকাৎ-ই-আকবরী’র বর্ণনা উদ্ধৃত হল।

“বাংলাদেশে একটি প্রথা ছিল এই যে প্রতি রাজ্রিতে পাঁচ হাজার পাইক (রাজাকে) পাহারা দিত। অতি প্রত্যাঘে বাদশাহ বেরিয়ে এসে মুহূর্তকাল সিংহাসনে বসে তাদের অভিবাচন গ্রহণ করতেন এবং চলে যাবার অঙ্গুমতি

দিতেন। তখন আর একদল পাইক হাজিরা দিতে আসত। একদিন ফতেহ্ শাহের প্রধান খোজা পাইকদের টাকা দিয়ে হাত করল এবং (তার ফলে) তারা সুলতানকে হত্যা করল। পরের দিন প্রত্যুষে ঐ খোজা নিজেই সিংহাসনে বসে পাইকদের অভিবাদন গ্রহণ করল।”

অগ্ৰান্ত বইগুলিতেও এই কথাই লেখা আছে। পূর্বোক্ত খওয়াজা সেরা বারবকই জলালুদ্দীন ফতেহ্ শাহকে হত্যা করে রাজা হয়ে বসে। ফিরিশ্তা লিখেছেন যে এই সময় ফতেহ্ শাহের উজীর খোজা খান জহান এবং আমীর-উল-উমারা (প্রধান অমাত্য) মালিক আনিল রাজধানীতে ছিলেন না, তাঁরা সীমান্ত অঞ্চলের রায়দের (হিন্দু জমিদারদের) শাস্তি দেবার জন্য প্রেরিত হয়েছিলেন; তারই ফলে খওয়াজা সেরা সুলতানকে হত্যা করতে পেরেছিল।

জলালুদ্দীন ফতেহ্ শাহের রাজ্যের আয়তন বেশ বিশাল ছিল। শাসনকর্তা হিসাবে তাঁর দক্ষতা এর থেকে খানিকটা বোঝা যায়। তাঁর যে সময় মূজা এপর্বন্ত আবিষ্কৃত হয়েছে, তাদের অধিকাংশের মধ্যে “কোষাগার” ও “টাকশাল” ভিন্ন আর কোন নির্মাণস্থানের উল্লেখ নেই, কেবল কয়েকটি মূদ্রায় ফতেহাবাদ এবং একটি মূদ্রায় মুহম্মদাবাদের নাম পাওয়া যায়। আজ পর্যন্ত এইসব জায়গায় তাঁর শিলালিপি পাওয়া গিয়েছে:—

খোন্দকারতলা (ঢাকা), ধামরাই (ঢাকা), দেবীকোট (দিনাজপুর), রামপাল (ঢাকা), মগরাপাড়া (ঢাকা), গোড়, মেহদীপুর (মালদহ), সাতগাঁও (হুগলী)।

জলালুদ্দীন ফতেহ্ শাহের সমসাময়িক কবি বিজয় গুপ্ত তাঁর দেশের চতুঃসীমার এই বর্ণনা দিয়েছেন,

মুহুক ফতেহাবাদ বান্দরোড়া তকসিম ॥

পশ্চিমে ঘাঘর নদী পুবে ঘণ্টেশ্বর।

মধ্যে ফুলশ্রী গ্রাম পণ্ডিতনগর ॥

এই অঞ্চল জলালুদ্দীন ফতেহ্ শাহের রাজ্যভূক্ত ছিল। ফতেহাবাদের টাকশালে জলালুদ্দীন ফতেহ্ শাহের মূদ্রা উৎকীর্ণ হয়েছিল, এ কথাও এই প্রসঙ্গে স্মরণীয়। স্বত্তরাং উত্তর, পূর্ব, পশ্চিম ও দক্ষিণ বহুদূর এক বিস্তীর্ণ অঞ্চল জলালুদ্দীন ফতেহ্ শাহের রাজ্যের অন্তর্ভুক্ত ছিল দেখা যাচ্ছে।

বিভিন্ন শিলালিপি থেকে জলালুদ্দীন ফতেহ্ শাহের এইসব কর্মচারীর নাম পাওয়া যায় :—

- (১) সৈয়দ দস্তুর
- (২) দৌলত খান
- (৩) মজলিস নূর
- (৪) মালিক কাফুর
- (৫) আব্দুল শের

জলালুদ্দীন ফতেহ্ শাহের মৃত্যুর সঙ্গে সঙ্গে বাংলাদেশে মাহমুদ শাহী বংশের রাজত্ব শেষ হল। অনেকের মতে পরবর্তী রাজা দ্বিতীয় নাসিরুদ্দীন মাহমুদ শাহও এই বংশের লোক, কিন্তু তিনি শুধু নামেই রাজা ছিলেন। বাংলাদেশের ইতিহাসে মাহমুদ শাহীর বংশের নাম উজ্জল অক্ষরেই লেখা থাকবে। এই বংশের রাজারা ইলিয়াস শাহী বংশোদ্ভব কিনা জানি না, তবে পূর্ববর্তী ইলিয়াস শাহী সুলতানদের সঙ্গে এঁদের সব বিষয়েই স্বাতন্ত্র্য দেখা যায়। আগেকার ইলিয়াস শাহী সুলতানরা বাংলাদেশকে মনে-প্রাণে স্বদেশ বলে গ্রহণ করেছিলেন কিনা সন্দেহ। কিন্তু এই বংশের রাজারা বাঙালী বলেই গণ্য হবেন। কারণ যে সময় রাজা গণেশ ও তাঁর বংশধরেরা ইলিয়াস শাহী বংশকে ক্ষমতাচ্যুত করে বাংলাদেশ শাসন করছিলেন, সে সময় এই বংশের প্রতিষ্ঠাতা নাসিরুদ্দীন মাহমুদ শাহ বাংলার জনসাধারণের মধ্যেই আশ্রয় নিয়েছিলেন এবং একটি বিবরণীর মতে বাংলার নিভৃত পল্লীতে কৃষিকার্য করে জীবিকানির্বাহ করছিলেন। সিংহাসন অধিকার করে এই বংশের রাজারা শাসনকার্যে সহযোগিতা করার জগু এই দেশেরই লোকদের আহ্বান করলেন—সম্প্রদায়-নিবিশেষে। এই বংশেরই একজন রাজা বিদ্যা ও সাহিত্যের পৃষ্ঠপোষকের আদর্শ স্থাপন করলেন—বিধমী পণ্ডিতেরাও তাঁর আশুকুল্য থেকে বঞ্চিত হল না। এই বংশের চারজন রাজাই (সিকন্দর শাহকে হিসাবের মধ্যে ধরছি না)—নাসিরুদ্দীন মাহমুদ শাহ, রুকনুদ্দীন বায়বক শাহ, শামসুদ্দীন মুহম্মদ শাহ ও জলালুদ্দীন ফতেহ্ শাহ—অত্যন্ত সুযোগ্য রাজা ছিলেন। শেষ দু'জন রাজা সময় সময় হিন্দুদের উপর অত্যাচার করেছিলেন, কিন্তু মোটের উপর এঁরা সুশাসক হিসাবেই সুনাম অর্জন করেছিলেন। আমার বিশ্বাস, যদি কোনদিন এই রাজবংশের বিদ্রুত ইতিহাস পাওয়া যায়, তাহলে অনেক গৌরবময় ও মনোহর ঘটনা বিশ্বস্তির অন্তরাল থেকে আত্মপ্রকাশ করবে।

## চতুর্থ অধ্যায়

### হাব্শী রাজত্ব

### অবতরণিকা

বাংলার হাব্শী সুলতানদের রাজত্ব সম্বন্ধে প্রায় সকলেরই মনে অত্যন্ত বিরূপ ধারণা আছে। এ সম্বন্ধে স্পষ্ট তথ্য হয় তো অনেকেরই জানা নেই, কিন্তু হাব্শী আমল যে অরাজকতা ও নৃশংসতায় পরিপূর্ণ এবং হাব্শী রাজারা যে নিতান্ত অযোগ্য, স্বৈচ্ছাচারী ও নিষ্ঠুর ছিলেন, সে সম্বন্ধে কি পেশাদার ঐতিহাসিক, কি অগ্রাগ্র শিক্ত লোক, কারও মধ্যে দ্বিমত দেখা যায় না।

অনেক আধুনিক ঐতিহাসিক সমস্ত তথ্য এবং প্রমাণ খুঁটিয়ে বিশ্লেষণ না করে নিতান্ত কতকগুলি গালগল্পের উপর নির্ভর করে হাব্শীদের রাজত্ব সংক্রান্ত অধ্যায়টি লিপিবদ্ধ করেছেন এবং তার উপর নিজেদের উত্তপ্ত দ্বিধাবাদী বর্ণন করে সাধারণ পাঠকদের বিভ্রান্ত করেছেন।

প্রথমে কুশাসনের প্রশ্নটি বিচার করা যাক। আধুনিক ঐতিহাসিকেরা “হাব্শী রাজা” হিসাবে চারজন রাজার নাম উল্লেখ করেন। এঁরা সকলে মিলে মোট ছ’ বছর রাজত্ব করেছিলেন। এর মধ্যে তিন বছর রাজত্ব করেন সৈফুদ্দীন ফিরোজ শাহ—যিনি বাংলা দেশের শ্রেষ্ঠ সুলতানদের অন্যতম, ঐতিহাসিকেরা যঁার মহত্ত্ব, যোগ্যতা, বদান্যতা প্রভৃতি গুণের উচ্ছ্বসিত প্রশংসা করেছেন। এক বছর রাজত্ব করেন নাসিরুদ্দীন মাহমুদ শাহ। ইনি হাব্শী ছিলেন কিনা তা বিতর্কের বিষয় এবং এঁর রাজত্বকালেও কোন কুশাসন হয়েছিল বলে কোথাও লেখা নেই। কুশাসনের যা কিছু অভিযোগ তা অপর দু’জন রাজার সম্বন্ধেই সীমাবদ্ধ—এঁরা হলেন চারজনের মধ্যে প্রথম রাজা “সুলতান শাহজাদা” এবং শেষ রাজা শামসুদ্দীন মুজাফফর শাহ। কিন্তু এঁদের সম্বন্ধে পরবর্তীকালের বইগুলিতে যা লেখা আছে, তা যে সবটা সত্য নয়, তা পরে দেখাচ্ছি। আর একটা কথা মনে রাখতে হবে, এই দু’জন “কুশাসক” সুলতানের মিলিত রাজত্বকাল দু’বছরও নয়। আর এঁদের মধ্যে প্রথমজন যে হাব্শী ছিলেন, তা বলার অল্পকূলে কোন দ্বিধা নেই। এ সম্বন্ধে পরে আলোচনা দ্রষ্টব্য।

আধুনিক যুগের কোন কোন ঐতিহাসিক হাব্শী সুলতানদের সমালোচনা করতে গিয়ে এমন কতকগুলি কথা লিখেছেন, যা নিতান্তই বিবেচ্য-প্রণোদিত উক্তি এবং যুক্তি-বিচারের ধোপে ঢেকে না। যেমন, রাখালদাস বন্দোপাধ্যায় লিখেছেন, “আহমদ শাহকে হত্যা করিয়া ক্রীতদাস নাসির খাঁ যখন তাহার কলুষিত পাদস্পর্শে পবিত্র গোড়-সিংহাসন কলঙ্কিত করিয়াছিল, তখন গোড়রাষ্ট্রের আভিজাত্যাভিমানী ওমরাহগণ ও আহমদ শাহের প্রভুভক্ত সেনানিগণ, সেই দিবসই তাহার রক্তে গোড়-সিংহাসনের কলঙ্কালিমা ধোত করিয়াছিলেন। কিন্তু মাহমুদ শাহের হত্যার অর্ধশতাব্দী পরে ইলিয়াস শাহের বংশের শেষ সুলতান জলাল-উদ্দীন ফতে শাহ অপর একজন ক্রীতদাস কর্তৃক নিহত হইলে, গোড়রাজ্যে কেহ তাহার বিরুদ্ধে হস্তোত্তোলন করিতে ভরসা করেন নাই। ইহার একমাত্র কারণ এই হইতে পারে যে, হাব্শী ক্রীতদাসগণ পরাক্রমশালী হইয়া উঠিলে, হিন্দু ও মুসলমান ওমরাহ্ এবং সেনাপতিগণ ক্ষমতাহীন হইয়া পড়িয়াছিলেন, এবং রাজানুগ্রহাভাবে তাঁহারা ক্রমশঃ রাজপ্রাসাদ অথবা রাজধানী হইতে দূরে সরিয়া যাইতে বাধ্য হইয়াছিলেন।” রাখালদাসের এই উক্তি সম্বন্ধে কয়েকটি কথা বলবার আছে—(১) আহমদ শাহের হত্যাকারী নাসির খাঁ ওমরাহের হাতে (রাখালদাসবাবুর “সেই দিবসই” কথাটি একেবারে ভুল) প্রাণ হারিয়েছিলেন না নাসিরুদ্দীন মাহমুদ শাহ নাম নিয়ে ২৪২৫ বছর রাজত্ব করেছিলেন, তা সঠিকভাবে বলা যায় না। (২) জলালুদ্দীন ফতেহ শাহের হত্যাকারীর বিরুদ্ধে কেউ হাত তুলতে সাহস পায় নি, এ কথা মোটেই সত্য নয়; ফতেহ শাহের অধাত্য মালিক আন্দিল কয়েকমাসের মধ্যেই এই হত্যাকারীকে বধ করেছিলেন। (৩) রাখালদাসবাবু বারবার “ক্রীতদাস” শব্দটির উপরে এত জোর দিচ্ছেন কেন? অতীতে যে ক্রীতদাস ছিল, সেও যে একদিন সুলতান হয়ে যোগ্যতার সঙ্গে রাজ্য শাসন করতে পারে, তা কুতুবুদ্দীন আইবক, ইলতুতমিশ এবং বলবনের দৃষ্টান্ত থেকেই তো দেখতে পাওয়া যায়। জোনপুরের শর্কী বংশের প্রতিষ্ঠাতারাও সম্ভবত প্রথম জীবনে ক্রীতদাস ছিলেন। (৪) এই নতুন ক্ষমতাধিকারীরা হাব্শী বলেই যে অযোগ্য হবেন, তা মনে করার কী কারণ আছে? হাব্শীদের মধ্যেও তো মালিক আন্দিলের মত মহাহুভব লোক এবং আরও অনেক প্রভুভক্ত লোক ছিলেন।

যা হোক, এখন প্রশ্ন হচ্ছে হাব্শী সুলতান বলতে কাদের বুঝব? জলালুদ্দীন কতেহ্ শাহের পরে এই চারজন রাজা সিংহাসনে আরোহণ করেছিলেন বলে ইতিহাসগ্রন্থগুলিতে লেখা আছে :—

- (১) বারবক বা খওয়াজা সেরা বা “সুলতান শাহজাদা”।
- (২) ফিরোজ শাহ।
- (৩) মাহমুদ শাহ।
- (৪) মুজাফফর শাহ।

আধুনিক ঐতিহাসিকেরা এই চারজন সুলতানকেই “বাংলার হাব্শী সুলতান” আখ্যায় অভিহিত করে থাকেন। এঁদের মধ্যে দ্বিতীয় ও চতুর্থ সুলতান নিঃসন্দেহে হাব্শী ছিলেন। প্রথম ও তৃতীয় জন যে হাব্শী ছিলেন, তা জোর করে বলা যায় না। এই চারজন সুলতানের মধ্যে শেষ তিনজনের মুদ্রা ও শিলালিপি পাওয়া যায়, প্রথম জনের কিছুই পাওয়া যায় না। যাহোক, এখন এঁদের সম্বন্ধে আলোচনায় আগ্রসর হওয়া যাক।

### বারবক বা সুলতান শাহজাদা

বারবক সম্বন্ধে ‘তবকাৎ-ই-আকবরী’, ‘মাসির-ই-রহিমী’, ‘তারিখ-ই-ফিরিশ্তা’ এবং ‘রিয়াজ-উস-সলাতীন’-এ অনেকখানি বিবরণ পাওয়া যায়। ‘মাসির’-এর বিবরণ সংক্ষিপ্ত, নীচে আমরা তা উদ্ধৃত করলাম।

“খওয়াজা সেরা বারবক শাহ বিশ্বাসঘাতকতা করে প্রভুকে হত্যা করে রাজা হয়। যেখানেই সে নপুংসক দেখত, তাঁদের দলভুক্ত করত। তার শক্তি দিন দিন বাড়তে লাগল। অবশেষে সমস্ত আমীরেরা একত্র মিলিত হলেন এবং নায়েকদের (‘মাসির’-এ ‘পাইক’ অর্থে ‘নায়েক’ শব্দ ব্যবহৃত হয়েছে) ঘুস দিয়ে তাকে (বারবককে) হত্যা করলেন।”

‘তবকাৎ-ই-আকবরী’তেও এই কথা আছে, কেবল আমীররা নায়েক বা পাইকদের ঘুস দিয়ে বারবককে হত্যা করেছিলেন, একথা লেখা নেই; সেখানে শুধু বলা হয়েছে আমীরেরা একত্র হয়ে বারবককে বধ করেছিলেন। সুতরাং জলালুদ্দীন কতেহ্ শাহের আমীরেরা তাঁর হত্যাকারীর বিরুদ্ধে আঙুল তোলেননি, রাখালদাসবাবুর এই অভিযোগ অমূলক।

‘তারিখ-ই-ফিরিশ্তা’য় বারবক সম্বন্ধে একটি বিস্তৃত কাহিনী পাওয়া যায়। তার সংক্ষিপ্তসার নীচে দেওয়া হল।

রাজাকে বধ করে খোজা (বারবক) সুলতান শাহজাদা উপাধি নিল এবং চারদিক থেকে খোজাদের, নীচ প্রকৃতির লোকদের এবং বেপারোয়া ভাগ্যাধেবীদের এনে জড়ো করল। রাজ্যের প্রধান আমীর ও রাজপুরুষেরা কিন্তু এই অভ্য্র নীচ লোকটাকে বিতাড়িত করতে মনস্ত করলেন। এঁদের মধ্যে একজন ছিলেন প্রধান আমীর হাব্শী মালিক আন্দিল, ইনি এই সময়ে সীমান্তে ছিলেন। ইনি সুলতান শাহজাদাকে শাস্তি দেবার এবং নিরাপদে রাজধানীতে পৌঁছোবার উপায় সম্বন্ধে চিন্তা করছিলেন। এমন সময় খোজা তাঁকে ডেকে পাঠালো; তার উদ্দেশ্য, মালিক আন্দিলকে বন্দী করে বধ করা। মালিক আন্দিল কিন্তু একে সৌভাগ্য বলেই মনে করলেন, কারণ এতে নিজের উদ্দেশ্য গোপন রাখা যাবে। তিনি রাজধানীর দিকে অগ্রসর হলেন। রাজধানীতে পৌঁছে তিনি দেখলেন তাঁর নিজের পক্ষের লোকরাই দলে ভারী। তার ফলে খোজা মালিক আন্দিলের প্রাণবধের চেষ্টা করতে সাহস পেল না।

একদিন সে দরবার আহ্বান করল। তার ডাইনে ও বাঁয়ে ১২,০০০ সৈন্য তাকে ঘিরে ছিল। তার প্রশস্ত দরবার-কক্ষ সুসজ্জিত ছিল এবং সেখানে চূড়ান্ত জাঁকজমক ও পরিপূর্ণ শৃঙ্খলা বিরাজ করছিল। সে প্রথমে মালিক আন্দিলকে তার কাছে ডেকে বিরাট অমুগ্রহ প্রদর্শন করে বলল, “আমি ভূতপূর্ব রাজা ও তাঁর সঙ্গীদের নিহত করে তাঁর সিংহাসন অধিকার করেছি। এ সম্বন্ধে তোমার মত কী?” মালিক আন্দিল একটি শ্লোক বললেন, “রাজা যা করেন, তাই খুব মনোরম।” সুলতান শাহজাদা একথা শুনে খুব খুশী হয়ে তাঁকে সম্মান-পরিচ্ছদ দান করল এবং রত্নখচিত একটি তরবারি, অনেকগুলি ঘোড়া ও একটি হাতী উপহার দিল। তারপর মালিক আন্দিলের সামনে কোরান রেখে তাঁকে এই শপথ করতে বলল যে তিনি তাকে বধ করবেন না। মালিক আন্দিল শপথ করলেন যে সুলতান শাহজাদা যখন সিংহাসনে আরোহণ করেছেন, তখন যতক্ষণ তিনি এই আসনে অধিষ্ঠিত থাকবেন, তিনি তাঁর ক্ষতি করবেন না। সুলতান শাহজাদা যাদের বধ করেছিল, তাদের মধ্যে অনেকে ছিল তাঁর আত্মীয়। এই কারণে মালিক আন্দিল প্রতিশোধ গ্রহণের সঙ্কল্প করলেন এবং এই উদ্দেশ্যে খোজার ব্যক্তিগত ভৃত্যদের হস্তগত করে তাদের আশ্রয় অর্জন করলেন।

একদিন রাজ্যে মালিক আন্দিল খোজার হায়েমে প্রবেশ করলেন।



এবং দেখলেন সে মৃত্যুপানের পর ঘুমোচ্ছে। সে তখন সিংহাসনের উপরেই শুয়েছিল, তাই মালিক আন্দিল নিজের শপথের কথা স্মরণ করে তাকে আঘাত করতে পারলেন না। কিন্তু সেই মুহূর্তেই খোজা পাশ ফিরতে গিয়ে সিংহাসন থেকে পড়ে গেল। মালিক আন্দিল এখন শপথ থেকে মুক্ত হয়ে তলোয়ার বার করলেন এবং সুলতান শাহজাদাকে তলোয়ার দিয়ে আঘাত করলেন। সেই আঘাতে তার খুব সামান্য লাগল, কিন্তু সে জেগে উঠল। জেগে সে তার সামনে একটা খোলা তলোয়ার দেখে নিরস্ত্র অবস্থাতেই মালিক আন্দিলের উপরে ঝাঁপিয়ে পড়ল। সে বেশী বলবান ছিল, তাই মালিক আন্দিলকে মাটিতে ফেলে দিতে পারল। এদিকে ধস্তাধস্তির ফলে ঘরের আলো নিভে গিয়েছিল। খোজা মালিক আন্দিলের গলা টিপে ধরেছিল এবং তিনি নীচে থেকে তার চুল টেনে ধরেছিলেন। মালিক আন্দিল তাঁবু দলের লোকদেব সাহায্যের জন্ত ডাকতে লাগলেন। তুর্কী যুগ্মশ খান বাইরে দাঁড়িয়েছিলেন। তিনি ভেতরে ঢুকে দেখলেন দুজনেই একসঙ্গে মাটিতে রয়েছে, এ অবস্থায় কী করা উচিত ভেবে তিনি ইতস্তত করতে লাগলেন। মালিক আন্দিল তাঁকে বললেন, “আমি ওর চুল ধরে রয়েছে। ওর শরীর এত চওড়া আর ভারী যে আমার উপরে ও চালের মত রয়েছে। ওর শরীরে তলোয়ার চালালে আমার লাগবে না।” যুগ্মশ খান তখন খোজাকে তিন চারবার আঘাত করলেন, খোজা মৃতের ভান করে পড়ে রইল। তাকে মৃত মনে করে মালিক আন্দিল ও যুগ্মশ খান ঘর থেকে বেরিয়ে গেলেন। তওয়াচী বাণী অর্থাৎ প্রাসাদের বাতিন্দারদের সর্দার তাঁদের জিজ্ঞাসা করল কী হয়েছে। তাঁরা উত্তর দিলেন নিমকহারাম নিহত হয়েছে। হাব্বী তওয়াচী বাণী বারবকের (সুলতান শাহজাদা) শোবার ঘরে গিয়ে আলো জালল। বারবক মালিক আন্দিল ঢুকেছেন ভেবে আশ্চর্যগোপন করল। তওয়াচী বাণী এমন ভান করতে লাগল যেন সে নিজে আহত হয়েছে এবং টেচামেচি করে সে বলতে লাগল যে ষড়যন্ত্রকারীর দল তার প্রভুকে বধ করেছে। বারবক তাকে নিজের বন্ধু ও শুভাখী মনে করে বলল, “শাস্ত হও। আমি বঁচে আছি। তারপর জিজ্ঞাসা করল, “আন্দিল কোথায়? এই বলে সে তওয়াচী বাণীকে বলল মালিক আন্দিলকে মেরে তাঁর মাথা পাঠিয়ে দিতে। তওয়াচী বাণী তখন অস্ত্র নিয়ে বলল, “আমি তাকে বধ করতে যাচ্ছি।” এই বলে সে মালিক আন্দিলের কাছে

গিয়ে সব কথা জানিয়ে দিল। মালিক আন্দিল তখন তওয়াচী বাশীর সঙ্গে আবার সেই ঘরে ফিরে এলেন এবং ছোরা দিয়ে বারবককে শেষ করলেন। তারপর তার মৃতদেহ সেইখানে ফেলে রেখে তিনি সেই ঘরে তালা দিয়ে বেরিয়ে এলেন।

‘রিয়াজ-উস-সলাতীনে’ও এই কাহিনীটিই লিপিবদ্ধ হয়েছে। এখানে বিশেষ উল্লেখযোগ্য—‘রিয়াজ’-এর সুলতান শাহজাদা, হাব্‌শী সুলতানগণ এবং আলাউদ্দীন হোসেন শাহ সংক্রান্ত অধ্যায়গুলির অধিকাংশ উপকরণই ফিরিশ্তা থেকে নেওয়া। যাহোক, ‘রিয়াজ’-এ সুলতান শাহজাদার কাহিনী যেভাবে পাওয়া যায়, তার মধ্যে দু’-একটি অতিরিক্ত খুঁটিনাটি বিষয় উল্লিখিত হয়েছে। ‘রিয়াজে’র বিবরণের অনুবাদ নীচে দেওয়া হল।

নপুংসক বারবক ‘সুলতান শাহজাদা’ উপাধি নিয়ে সিংহাসনে বসে সব জায়গা থেকে খোজাদের জড়ো করতে লাগল এবং নিকৃষ্ট লোকদের উপরে অত্যাচার বর্ষণ করে তাদের দলে টানতে লাগল। এইভাবে সে নিজের শক্তি ও মর্যাদা বাড়াবার চেষ্টা করছিল। কেবলমাত্র নিজের লোক দিয়ে শাসনকার্য চালাবার উদ্দেশ্যে সে উচ্চদস্তখ্ত এবং প্রতিপত্তিশালী অমাত্যদের উচ্ছেদ করার মতলব করল। এঁদের মধ্যে প্রধান অমাত্য মালিক আন্দিল হাব্‌শী অমৃতম। মালিক আন্দিল এই সময় রাজ্যের সীমান্তে ছিলেন। এই নপুংসকের মতলব বুঝতে পেরে তিনি তাকে বধ করার এবং নিজের সুযোগ্য পুত্রকে\* সিংহাসনে বসাবার পরিকল্পনা ফাঁদলেন। এই সময়ে হতভাগ্য নপুংসক মালিক আন্দিলকে ফাঁদে ফেলে কারারুদ্ধ করার জন্ত তাঁকে ডেকে পাঠাল। এষ্ট আহ্বানের অন্তর্নিহিত উদ্দেশ্য বুঝতে পেরে মালিক আন্দিল অনেক লোক সঙ্গে নিয়ে নপুংসকের সঙ্গে দেখা করতে গেলেন। তিনি দরবারে প্রবেশ ও নির্গয়ের সময় খুব সতর্কতা অবলম্বন করলেন, ফলে নপুংসকের তাঁকে খতম করার আশা সফল হল না। অবশেষে একদিন নপুংসক এক প্রমোদ-অনুষ্ঠানের আয়োজন করল। সেখানে সে মালিক আন্দিলের প্রতি খুব অন্তরঙ্গতা দেখিয়ে তাঁকে কোরান দিয়ে বলল, “কোরান ছুঁয়ে শপথ কর তুমি আমার ক্ষতি করবে না।” মালিক আন্দিল

\* এই “সুযোগ্য পুত্র” সম্বন্ধে ‘রিয়াজ’-এ আর কিছু লেখা নেই, অল্প কোন পুত্রও এঁর উল্লেখ পাওয়া যায়নি। বারবককে বধ করে মালিক আন্দিল তাঁর কোন পুত্রকে সিংহাসনে বসাননি, নিজেই সিংহাসনে বসেছিলেন।

কোরান ছুয়ে শপথ করলেন, “যতক্ষণ আপনি সিংহাসনে অধিষ্ঠিত থাকবেন, আমি আপনার কোন ক্ষতি করব না।” সব লোকেই ঐ দু'রাত্মা নপুংসককে বধ করার মতলব করছিল, মালিক আন্দিলও তাই করছিলেন। তিনি প্রভু-হত্যার প্রতিশোধ নিতে সঙ্কল্পবদ্ধ হলেন। এই উদ্দেশ্যে তিনি ভৃত্যদের সঙ্গে যড়যন্ত্র করতে লাগলেন ও স্বযোগের প্রতীক্ষায় রইলেন। এক রাত্রিতে ঐ দু'বৃত্ত অত্যধিক পরিমাণে মদ খেয়ে মাতাল হয়ে সিংহাসনের উপরে ঘুমিয়ে পড়েছিল। মালিক আন্দিল তখন তাকে বধ করার উদ্দেশ্য নিয়ে ভৃত্যদের সাহায্যে অন্তঃপুরে প্রবেশ করলেন। কিন্তু তিনি যখন দেখলেন সে সিংহাসনের উপরেই ঘুমিয়ে রয়েছে, তখন নিজের শপথের কথা মনে করে তিনি ইতস্তত করতে লাগলেন। এমন সময় অকস্মাৎ ভাগ্যচক্রে নপুংসক মদের কোঁকে সিংহাসন থেকে গড়িয়ে পড়ে গেল। মালিক আন্দিল এই ব্যাপারে আনন্দিত হয়ে তাকে তলোয়ার দিয়ে আঘাত করলেন। কিন্তু এই আঘাতে তার প্রাণবধ সম্ভব হল না। সুলতান শাহজাদা জেগে উঠে নিজেকে একটা খাপ-খোলা তলোয়ারের সম্মুখীন দেখে মালিক আন্দিলের উপরে ঝাঁপিয়ে পড়ল। গায়ে বেলী জোর থাকার জন্ত সে ধস্তাধস্তিতে জয়ী হয়ে মালিক আন্দিলকে চিং করে ফেলে তাঁর বুকের উপরে চড়ে বসল। মালিক আন্দিল নপুংসকের চুল খুব শক্ত করে ধরেছিলেন, কিছুতেই ছাড়েননি। তিনি চীৎকার করে যুগ্মাশ খানকে ডাকতে লাগলেন—তাড়াতাড়ি আসবার জন্ত। তুর্কী যুগ্মাশ খান ঘরের বাইরে দাঁড়িয়েছিলেন, তিনি একদল হাবশীকে নিয়ে তক্ষণি ভিতরে ঢুকলেন এবং মালিক আন্দিল নপুংসকের দেহের নীচে চাপা পড়ে আছেন দেখে তলোয়ার নিয়ে আক্রমণ করতে ইতস্তত করতে লাগলেন। এদিকে এই দু'জনের ধস্তাধস্তির ফলে ঘরের সব বাতিগুলি এদিক-সেদিকে ছিটকে পড়ে নিভে গিয়েছিল, ফলে সারা ঘরই অন্ধকার। মালিক আন্দিল যুগ্মাশ খানকে টেঁচিয়ে বললেন, “আমি খোজাটার চুল ধরে আছি। ওর বিরাট শরীর আমাকে ঢালের মত আড়াল করে আছে। তলোয়ার দিয়ে ওকে মারতে ইতস্তত কোরো না। ও তলোয়ার আমার শরীরে লাগবে না। আর যদি লাগেই, তা হলেও কোন ক্ষতি নেই। প্রভুর হত্যার প্রতিশোধ নেবার জন্ত আমার মত শত সহস্র লোক প্রাণ দিতে পারে।” যুগ্মাশ খান তখন আশ্বে আশ্বে সুলতান শাহজাদার শিঠি এবং কাঁধে তলোয়ার দিয়ে কয়েকটি আঘাত করলেন, সে তখন মরার ভান

করে পড়ে রইল। তখন মালিক আন্দিল উঠে যুগ্মাশ খান এবং হাব্শীদের সঙ্গে বেরিয়ে গেলেন এবং তওয়াচী বাশী অতঃপর সুলতান শাহজাদার ঘরে ঢুকে আলো জ্বালল। সুলতান শাহজাদা তাকে মালিক আন্দিল ভেবে আলো জ্বালার আগেই একটা কুঠরীর মধ্যে ঢুকে পড়েছিল। তওয়াচী বাশীও সেই কুঠরীতে ঢোকাতে সুলতান শাহজাদা আবার মরার ভান করে পড়ে রইল। তখন তওয়াচী বাশী চৈচিয়ে বলল, “হায় কী দুর্ভাগ্য। বিজ্রোহীরা আমার প্রভুকে মেরে ফেলে রাজ্য ধ্বংস করেছে।” সুলতান শাহজাদা তখন তাকে তার বিশ্বস্ত ভৃত্য মনে করে চৈচিয়ে বলল, “দেখ। আমি বৈচে আছি। শাস্ত হও।” তারপর জিজ্ঞাসা করল মালিক আন্দিল কোথায়। তওয়াচী বলল, “সে রাজাকে বধ করেছে ভেবে শাস্ত মনে বাড়ী ফিবে গেছে।” সুলতান শাহজাদা তাকে বলল, “যাও, অমাত্যদের ডাক। তাদের বল মালিক আন্দিলকে মেরে তার মাথা কেটে নিয়ে আসতে। ফটকে পাহারা বসাত্ত, পাহারাদারদের সশস্ত্র হয়ে সাবধানে থাকতে বল।” হাব্শী তওয়াচী বলল, “আচ্ছা, আমি সব গোলমাল চুকিয়ে দেবার ব্যবস্থা করছি।” এই বলে সে বেরিয়ে এসে তক্ষণি সব কথা মালিক আন্দিলকে জানাল। মালিক আন্দিল তখন আবার ভিতবে ঢুকে ছোরা দিয়ে মেরে নপুংসকের জীবন শেষ করলেন এবং তার মৃতদেহ সেই কুঠরীতে ফেলে রেখে তালা দিয়ে বেরিয়ে এলেন।

এই কাহিনীর সঙ্গে ‘তবকাৎ-ই-আকবরী’ ও ‘মাসির-ই-রহিমী’তে প্রদত্ত কাহিনীর মিল আছে। তবে সেখানে কাহিনী সংক্ষিপ্ত আর এখানে পল্লবিত। রাখালদাস বন্দ্যোপাধ্যায় ও ডঃ হবীবুল্লাহ এই কাহিনীকে সত্য বলেই গ্রহণ করেছেন। কাহিনীটি খুবই চিত্তাকর্ষক সন্দেহ নেই, কিন্তু এর মধ্যে বেশ খানিকটা অস্বাভাবিকতার ছাপ আছে। “সিংহাসনে অধিষ্ঠিত থাক।”—এই কথাটির মারপ্যাচের উপরেই কাহিনীটি প্রতিষ্ঠিত। মালিক আন্দিলের পক্ষে এই রকম স্বার্থমূলক শপথ গ্রহণ করা বিচিত্র নয়, কিন্তু সুলতান শাহজাদা যদি সত্যিই তাতে বিশ্বাস করে থাকে, তাহলে বলতে হবে তার মত নির্বোধ খুব কমই জন্মায়।

যাহোক, সুলতান শাহজাদার প্রসঙ্গে দুটি বিষয় খুব সাবধানে লক্ষ্য করতে হবে। প্রথমত, আলোচ্য সময়ের অনেক পরে রচিত ‘তবকাৎ-ই-আকবরী’, ‘মাসির-ই-রহিমী’, ‘তারিখ-ই-ফিরিশ্তা’, ‘রিয়াজ-উল-সলাতীন’, বুকাননের বিবরণী প্রভৃতি সূত্রের উক্তি ভিন্ন সুলতান শাহজাদার ঐতিহাসিকতার কোন

প্রমাণ এখনও পাওয়া যায়নি। এ পর্যন্ত তার রাজত্বকালের কোন মুদ্রা বা শিলালিপি আবিষ্কৃত হয়নি।

দ্বিতীয়ত, আধুনিক ঐতিহাসিকরা সকলেই লিখেছেন যে সুলতান শাহজাদা জাতিতে হাব্শী ছিল। কিন্তু এই মতের কোনই ভিত্তি নেই। ‘তবকাৎ-ই-আকবরী’ থেকে শুরু করে ‘রিয়াজ-উস-সলাতীন’ পর্যন্ত কোন বইয়েই একথা লেখা নেই যে সুলতান শাহজাদা হাব্শী ছিল। বুকাননের বিবরণী বা স্টুয়ার্টের History of Bengal-এও এরকম কোন কথা লেখা নেই। উপরন্তু ফিরিশ্তার মতে সুলতান শাহজাদা ছিল বাঙালী। ‘তারিখ-ই-ফিরিশ্তা’য় তাকে “সুলতান শাহজাদা বঙ্গালী” বলেই উল্লেখ করা হয়েছে।

এই দ্বিতীয় বিষয়টি অত্যন্ত গুরুত্বপূর্ণ। কারণ সুলতান শাহজাদাকে হাব্শী বলে ধরে নিয়েই আধুনিক ঐতিহাসিকেরা সিদ্ধান্ত করেছেন যে হাব্শীরা বিশ্বাসঘাতকতা করে নাসিরুদ্দীন মাহমুদ শাহের বংশকে উচ্ছেদ করে বাংলাদেশে রাজা হয়ে বসেছিল। কিন্তু প্রাচীন ইতিহাসগ্রন্থগুলির সাক্ষ্য এই সিদ্ধান্তের সম্পূর্ণ বিরুদ্ধে যায়। ‘তারিখ-ই-ফিরিশ্তা’ ও ‘রিয়াজ-উস-সলাতীনে’ স্পষ্টই লেখা আছে যে হাব্শীরা ফতেহ শাহের হত্যাকারীর নিকরুই দলবদ্ধ হয়েছিল এবং মালিক আনিল তাদের নেতৃত্ব করেছিলেন। তৎপরাচী বাণীও হাব্শী ছিল, সেও এই দলের সঙ্গেই যোগদান করেছিল। সুলতান ফতেহ শাহের হাব্শী কর্মচারী ও ভূতোরা প্রভুহোহী বা প্রভুহস্তানয়, বরং তারাই আদর্শ প্রভুভক্তির পরিচয় দিয়েছিল বলতে হয়। ‘রিয়াজ’-এর মতে মালিক আনিল যুগ্মশ পানকে বলেছিলেন, “প্রভুর হত্যার প্রতিশোধ নেবার জন্য আমার মত শত সহস্র লোক প্রাণ দিতে পারে।”

“সুলতান শাহজাদা”র রাজত্বকাল সম্বন্ধে ‘রিয়াজ-উস-সলাতীনে’ তিনটি মত উল্লিখিত হয়েছে—একটি মতে সে ছ’ মাস রাজত্ব করেছিল, একটি মতে আট মাস, আর একটি মতে আড়াই মাস। ‘তারিখ-ই-ফিরিশ্তা’তে দুটি মত উল্লিখিত হয়েছে—আট মাস এবং আড়াই মাস। ‘তবকাৎ-ই-আকবরী’ ও ‘মাসির-ই-রহিমী’তে বলা হয়েছে যে সে আড়াই মাস রাজত্ব করেছিল। এই কথাই ঠিক বলে মনে হয়। “সুলতান শাহজাদা”র উপর গোড়া থেকেই সকলে অপ্রসন্ন হয়ে উঠেছিলেন। সুলতান ছ’ মাস বা আট মাস রাজত্ব করা তার পক্ষে সম্ভব বলে মনে হয় না। ৮৯২ হিজরার ৪ঠা মহরর

তারিখে উৎকীর্ণ জলালুদ্দীন ফতেহ্ শাহের একটি শিলালিপি পাওয়া গিয়েছে। সৈফুদ্দীন ফিরোজ শাহেরও ৮২২ হিজরার মুদ্রা পাওয়া গিয়েছে। সুতরাং ঐ বছরে (৮২২ হিঃ) খুব সামান্য সময় “সুলতান শাহজাদা”র পক্ষে রাজত্ব করা সম্ভব এবং সে সময় ছ’মাস বা আট মাস ধরা মুসলিম। এতদিন সে রাজত্ব করলে তার কিছু মুদ্রা না পাওয়ার কোন কারণ দেখা যায় না। অতএব “সুলতান শাহজাদা”র রাজত্বকাল আড়াই মাস স্থায়ী হয়েছিল মনে করাই যুক্তিসঙ্গত।

ফিরিশ্তা ও ‘রিয়াজে’ লেখা আছে, “সুলতান শাহজাদার প্রভুহত্যা করে রাজ্যলাভের পরে কয়েক বছর বাংলাদেশে এই প্রথা চালু হল যে, যে-ই রাজাকে হত্যা করবে, সে-ই সিংহাসনে আরোহণ করবে।” বাবরের আশ্রয়কারীতেও অনেকটা এই ধরনের কথা আছে। বাবর লিখেছেন, “বাংলা রাজ্যে একটি বিশ্ময়কর প্রথা এই যে উত্তরাধিকার প্রথা অনুসারে সিংহাসন-লাভ সেখানে বিরল। রাজার পদ স্থায়ী। ...যে কোন লোক যদি রাজাকে হত্যা করে নিজে সিংহাসনে বসে, তাহলে সে-ই রাজা হয়। আমীর, উজীর, সৈন্য এবং কৃষকেরা তক্ষণি তার কাছে নত হয়ে বশতা স্বীকার করে এবং তাকে পূর্ববর্তী রাজার স্থলাভিষিক্ত আইনসম্মত রাজা বলে স্বীকার করে। বাঙালীরা বলে, ‘আমরা সিংহাসনের প্রতি অনুগত; যে কেউ সিংহাসন অধিকার করে, তাকেই আমরা মানি’।”

### সৈফুদ্দীন ফিরোজ শাহ

‘তারিখ-ই-ফিরিশ্তা’ ও ‘রিয়াজ-উস-সলাতীন’র মতে মালিক আন্দিল “সুলতান শাহজাদা”-কে বধ করে ফিরোজ শাহ নাম নিয়ে রাজা হন। অগ্নাগ্র বইতে ফিরোজ শাহের পূর্ব-পরিচয় সম্বন্ধে কিছু লেখা নেই। ফিরিশ্তা ও ‘রিয়াজ’-এ ফিরোজ শাহের সিংহাসন লাভ সম্বন্ধে একই কথা লেখা হয়েছে। এই দুই বইয়ের মতে মালিক আন্দিল “সুলতান শাহজাদা”কে বধ করে বাইরে এসে জলালুদ্দীন ফতেহ্ শাহের উজীর খান জহানকে ডেকে পাঠালেন। খান জহান এলে তাঁকে তিনি সমস্ত খুলে বললেন। অতঃপর রাজা নির্বাচনের জগ্ন অমাত্যদের পরিষৎ আহ্বান করা হল। ফতেহ্ শাহের পুত্রের বয়স মাত্র দু’বছর, সুতরাং তাঁকে সিংহাসনে অধিষ্ঠিত করা সম্বন্ধে অমাত্যদের বিধা দেখা দিল। তার ফলে সমস্ত অমাত্যেরা একমত হয়ে পরদিন সকালে ফতেহ্ শাহের বিধবা রানীর কাছে গেলেন। গিয়ে তাঁর কাছে আগের রাজার ঘটনা

বর্ণনা করে বললেন, “রাজপুত্র শিশু। স্ততরাং যতদিন না তাঁর বয়স হচ্ছে, ততদিন শাসনকার্য চালাবার জন্ত কাউকে আপনি নিযুক্ত করুন।” রানী তাঁদের উদ্বিগ্ন অন্তরভব করে কী বলতে হবে বুঝলেন। তিনি বললেন, “ঈশ্বরের কাছে আমি শপথ করেছিলাম যিনি ফতেহ্ শাহের হত্যাকারীকে বধ করবেন, তাঁকেই রাজত্ব ছেড়ে দেব।” মালিক আন্দিল প্রথমে রাজত্বের ভার গ্রহণ করতে রাজী হননি, কিন্তু যখন দরবারে সমবেত সমস্ত অমাত্যেরাই তাঁকে চাইল, তখন তিনি সিংহাসনে আরোহণ করলেন।

এই কাহিনী যদি সত্য হয়, তাহলে মালিক আন্দিল যে কত মহাভাব ও স্বাধীন্য ছিলেন, তা বোঝা যাবে। কিন্তু দিনাজপুর জেলার বিরল গ্রামে সৈফুদ্দীন ফিরোজ শাহের এক শিলালিপি পাওয়া যায়। এই শিলালিপির তারিখ সম্বন্ধে কোন কোন পণ্ডিতের মত গ্রহণ করলে বলতে হয় ইনি সুলতান শামসুদ্দীন যুসুফ শাহ বা জলালুদ্দীন ফতেহ্ শাহের রাজত্বকালে রাজ্যের উত্তরাংশে নিজেকে রাজা বলে ঘোষণা করেছিলেন। সেক্ষেত্রে উপরের কাহিনী মিথ্যা বলতে হয়। কিন্তু বিরল গ্রামের শিলালিপির তারিখ সঠিকভাবে পড়া যায়নি। মৌলবী সৈফুদ্দীনের মতে এর তারিখ ৮৮০ হিজরা; তখন শামসুদ্দীন যুসুফ শাহ বাংলার সুলতান। ডঃ নলিনীকান্ত ভট্টশালীর মতে এই শিলালিপির তারিখ ৮৮২ হিজরা, যে সময় জলালুদ্দীন ফতেহ্ শাহ বাংলার সুলতান ছিলেন। কিন্তু এই সব পাঠ কাল্পনিক।\* এদের উপর নির্ভর করে, ফিরোজ যুসুফ শাহ বা ফতেহ্ শাহের বিরুদ্ধে বিদ্রোহ করেছিলেন বলা মোটেই ঠিক হবে না। এ বিষয়ে কোনই সন্দেহ নেই যে, শিলালিপিটি ফিরোজ শাহের নিজস্ব রাজত্বকালেই (অর্থাৎ ৮৯২-৮৯৫ হিজরার মধ্যেই) উৎকীর্ণ হয়েছিল, খোদাইয়ের দোষে তারিখটি অস্পষ্ট থেকে গিয়েছে এবং তার ফলে গবেষকরা বিভ্রান্ত হচ্ছেন।

ফিরোজ শাহ সম্বন্ধে ‘তবকাৎ-ই-আকবরী’ এবং ‘মাসির-ই-রহিমী’তে লেখা আছে, “তিনি দয়ালু এবং মহৎ প্রকৃতির রাজা ছিলেন।” ‘তারিখ-ই-ফিরিশ তা’তেও তাঁর সম্বন্ধে প্রশংসা আছে। এ সম্বন্ধে ‘রিয়াজ-উস-সলাতীনে’

\* ডঃ আবদুল করিম এই শিলালিপিটি সম্বন্ধে লিখেছেন, “Our own examination of this inscription shows that the reading is more conjectural than otherwise, the date is illegible yielding no satisfactory reading.” (Corpus of the Muslim Coins of Bengal, pp. 146—147)

অপেক্ষাকৃত বিস্তৃত বিবরণ পাওয়া যায়। এই বিবরণ আমরা অহুবাদ করে দিচ্ছি।

হাব্‌শী মালিক আন্দিল সৌভাগ্যক্রমে বাংলার সার্বভৌম নৃপতি হয়ে ফিরোজ শাহ উপাধি ধারণ করলেন এবং রাজধানী গোড়ে নিজেকে স্থপতিষ্ঠিত করলেন। তিনি ছিলেন গ্রাম্যপরাধ ও উদার, এবং তাঁর কাজগুলি ছিল মহৎ। তিনি প্রজাদের শান্তি এবং স্বাচ্ছন্দ্য বিধান করেছিলেন। যখন তিনি অমাত্য ছিলেন সেই সময় থেকেই তিনি মহৎ এবং বীরত্বপূর্ণ অনেক কাজ করেছিলেন। তাঁর সৈন্তেরা ও প্রজারা তাঁকে ভয় করত এবং তাঁর বিরুদ্ধে যেত না। উদারতা এবং মহত্বের দিক দিয়ে তাঁর তুলনা হয় না। তাঁর আগের রাজারা অনেক কষ্ট করে যেসব ধনদৌলত সঞ্চয় করেছিলেন, সেগুলি তিনি অল্প সময়ের মধ্যেই গরীবদের দান করে দিলেন। কথিত আছে একবার তিনি এক দিনেই গরীবদের এক লাখ টাকা দান করেছিলেন। তাঁর সচিবেরা এই মুক্তহস্ত দান পছন্দ করে নি। নিজেদের মধ্যে তারা বলাবলি করতে লাগল, “এই হাব্‌শী বিনা কষ্টে ও পরিশ্রমে যে টাকার মালিক হয়েছেন তার মূল্য বুঝতে পারছেন না। যাতে পারেন, সেরকম কোন উপায় আমাদের বার করতে হবে। তাহলে ইনি আর এরকম যথেষ্টভাবে মুক্ত হস্তে দান করতে পারবেন না।” এই ঠিক করে তারা এক লাখ টাকা একটা ঘরের মেঝেতে রেখে দিল, যাতে রাজা নিজের চোখে তা দেখে তার মূল্য বুঝে তার উপর গুরুত্ব আরোপ করতে পারেন (অর্থাৎ রাজা বুঝতে পারবেন এক লাখ টাকার পরিমাণ কত বিরাট, ফলে কথায় কথায় তিনি লাখ টাকা দান করতে পারবেন না)। রাজা যখন এই টাকা দেখলেন, তখন তিনি জিজ্ঞাসা করলেন, “টাকাগুলো এখানে পড়ে আছে কেন?” সচিবেরা বলল, “এত টাকাই আপনি গরীবদের দিতে বলেছেন।” রাজা বললেন, “এত কম টাকায় কী করে কুলোবে? এর সঙ্গে আর এক লাখ টাকা যোগ কর।” সচিবেরা এতে অপ্রস্তুত হয়ে সব টাকা ভিখারীদের বন্টন করে দিলেন।

এই গল্পটি কতদূর সত্য তা জানি না, তবে অত্যন্ত মধুর। গল্পটি সত্য হলে বলতে হবে দানের দিক দিয়ে সৈফুদ্দীন ফিরোজ শাহ বাংলার সুলতানদের মধ্যে শ্রেষ্ঠ ছিলেন। গল্পটি যদি অক্ষরে অক্ষরে সত্য না-ও হয়, তাহলেও ফিরোজ শাহ যে মহৎ ও দানবীর ছিলেন, তা এর থেকে বোঝা যায়। কারণ সম্পূর্ণ বিনা কারণে কারও নামে এরকম গল্প রটে না।



সৈফুদ্দীন ফিরোজ শাহ সম্বন্ধে ‘রিয়াজ-উস-সলাতীনে’ লেখা আছে, “তিনি গোড় শহরে একটি মসজিদ, একটি মিনার এবং একটি জলাধার তৈরী করিয়েছিলেন। এর মধ্যে মিনারটি এবং তার সংলগ্ন জলাধারটি এখনও বর্তমান। এই মিনারটি “ফিরোজ মিনার” নামে পরিচিত। মুনশী শামপ্রসাদের বিবরণ থেকে জানা যায় যে উনবিংশ শতাব্দীর প্রথমে এটি “ফিরোজ শাহের লাট” নামে অভিহিত হত। এই মিনারে নির্মাতার নাম লেখা নেই, কিন্তু মেজর ফ্রাঙ্কলিন উনবিংশ শতাব্দীর প্রথমে গুয়ামালতীতে একটি শিলালিপির এক টুকরো পেয়েছিলেন, মুনশী শামপ্রসাদের বিবরণে এই খণ্ডিত শিলালিপিটি উদ্ধৃত হয়েছে (Dani, Muslim Architecture in Bengal, Appendix, p. 12 প্রঃ), তাতে সৈফুদ্দীন নামক জনেক রাজার নাম উপাধিসমেত লেখা রয়েছে, \* আর কিছু নেই।

মেজর ফ্রাঙ্কলিন ও মুনশী শামপ্রসাদের মতে এই শিলালিপিটি ফিরোজ মিনারের দরজার সংলগ্ন ছিল। কানিংহাম এটি ফিরোজ মিনারের মূল শিলালিপি বলে স্বীকার করে নিয়েও মনে করেছিলেন শিলালিপিতে উল্লিখিত “সৈফুদ্দীন” আসলে সৈফুদ্দীন হুমুজা শাহ (৮১৩-৮১৫ হিঃ) এবং ইনিই মিনারটি তৈরী করিয়েছিলেন। কিন্তু ফিরোজ মিনারের স্থাপত্যরীতি থেকে মনে হয়, এই মিনার পঞ্চদশ শতাব্দীর শেষ দিকে নির্মিত হয়েছিল, গোড়ার দিকে নয়। “সৈফুদ্দীন” এবং “ফিরোজ” এই দুই নাম একটিমাত্র স্থলতানেরই ছিল, তিনি আনাদের আলোচ্য সৈফুদ্দীন ফিরোজ শাহ। স্মরণ্য তিনিই এই মিনারটি তৈরী করিয়েছিলেন। জনৈক গবেষক এসম্বন্ধে সংশয় প্রকাশ করে লিখেছেন, “...the precarious nature of his position and the short tenure of his power are strong arguments against this view.” কিন্তু ‘রিয়াজ’-এ স্পষ্টই লেখা আছে যে গোড়ের মিনার ফিরোজ শাহের তৈরী। ফিরোজ শাহ তিন বছরেরও বেশী রাজত্ব করেছিলেন, এই ধরনের মিনারের নির্মাণ এক বছরের মধ্যেই শেষ হওয়া সম্ভব। ফিরোজ শাহ যে সঙ্কটপূর্ণ অবস্থার মধ্যে রাজত্ব করেছিলেন, একথা কোথাও লেখা নেই। বরং ইতিহাস-গ্রন্থগুলিতে একথাই লেখা আছে যে অমাত্যদের সর্বসম্মতিক্রমেই তিনি রাজা হয়েছিলেন।

\* এতে লেখা আছে, “অল-মুইয়ুদ্দুনীয়া ওআদীন অল-মুজাহিদ ফি সিবিলাল্লাহ, খলিকহুং ওআ-রহমান অল-মুলতান বে-অল হজ্জহুং ওআ অল-বুরহান সৈফুদ্দীন ওআদুনীয়া।”

কিরোজ মিনার কীভাবে তৈরী হয়েছিল, সে সম্বন্ধে একটি কিংবদন্তী আছে। সেটি এই।

প্রথমে একজন রাজমিস্ত্রী এই মিনারটি তৈরী করে। তৈরী শেষ হয়েচে শুনে সুলতান এটি দেখতে গেলেন এবং চূড়ার উপরে উঠলেন। রাজমিস্ত্রী তখন তাঁর সামনে এসে গর্ব করে বলল, “এর চেয়েও অনেক উঁচু মিনার আমি তৈরী করতে পারতাম।

সুলতান—“তাহলে তা’ই করলে না কেন?”

রাজমিস্ত্রী—“আমার কাছে অত মালমশলা ছিল না।”

সুলতান—“ছিল না তো আমার কাছে চাইলে না কেন?”

রাজমিস্ত্রী এর কোন উত্তরই দিতে পারল না। সুলতান তখন ক্রোধে আগুন হয়ে আদেশ দিলেন রাজমিস্ত্রীকে মিনারের চূড়া থেকে ফেলে দিতে। মৃত্যুর মধ্যে তাঁর আদেশ পালিত হল। এইভাবে রাজমিস্ত্রী তার প্রাণ হারাল। এদিকে সুলতান চূড়া থেকে নেমে এসে তাঁর প্রিয় ভৃত্য হিজাকে আদেশ দিলেন তক্ষণি মোরগাঁওয়ে যেতে। হিজা তক্ষণি মোরগাঁওয়ের দিকে রওনা হল, কিন্তু কেন যেতে হবে তা সে কিছুই বুঝতে পারল না। রাজা তখন এত রেগে রয়েছেন যে রাজাকে কিছু জিজ্ঞাসা করতেও তার সাহস হল না। মোরগাঁওয়ে পৌঁছে হিজা গভীরভাবে চিন্তা করতে লাগল কী কাজের জন্ত তাকে এখানে পাঠানো হতে পারে। কিন্তু অনেক ভেবেও কোন কুল-কিনারা না পেয়ে সে বিরক্ত হয়ে এদিক-সেদিক ঘুরতে লাগল। ঘুরতে ঘুরতে তার সঙ্গে সনাতন নামে একজন ব্রাহ্মণ যুবকের দেখা হয়ে গেল। হিজা তখন ভাবল এর সঙ্গে একটু পরামর্শ করে দেখা যাক যদি কোন সুরাহা হয়। এই ভেবে সে সনাতনকে তার সমস্তার কথা খুলে বলল। সনাতন তখন হিজাকে জিজ্ঞাসা করল মিনার থেকে তার রঙনা হবার অব্যবহিত আগে কী কী ঘটনা ঘটেছিল। হিজা সবই গোড়া থেকে বলল। সব শুনে সনাতন বলল, “তাহলে সুলতান তোমাকে নিশ্চয়ই পাঠিয়েছেন মোরগাঁও থেকে ভাল ভাল রাজমিস্ত্রী নিয়ে যেতে।” মোরগাঁওয়ে এই সময় অনেক সুদক্ষ রাজমিস্ত্রী বাস করত। হিজা সনাতনের কথা শুনে ভাবল এ’ই বোধ হয় ঠিক বলেছে। এই ভেবে সে মোরগাঁও থেকে কয়েকজন খুব ভাল রাজমিস্ত্রী সংগ্রহ করে তাদের সুলতানের কাছে নিয়ে গেল। এদিকে সুলতানের মেজাজ ততক্ষণে ঠাণ্ডা হয়ে গেছে। তিনি তখন ভাবছিলেন, “তাই তো।

হিজাকে কী করতে হবে তা না বলেই মোরগাঁওয়ে পাঠালাম।” এমন সময়ে হিজা তাঁর সামনে মোরগাঁওয়ের রাজমিস্ত্রীদের নিয়ে এসে হাজির। সুলতান তো অবাক! হিজা তাঁর মনের কথা কী করে জানাল? হিজাকে তিনি জিজ্ঞাসা করাতে হিজা তাঁকে সমস্ত খুলে বলল এবং তীক্ষ্ণবুদ্ধি সনাতনের পরামর্শেই যে তার পক্ষে একাজ করা সম্ভব হয়েছে, তা-ও জানাল। সুলতান একথা শুনে সনাতনের খুব প্রাণংসা করলেন এবং সনাতনকে ডাকিয়ে এনে তাকে রাজদরবারে একটি খুব উঁচু পদে নিয়োগ করলেন। হিজা যেসব রাজমিস্ত্রীদের এনেছিল, তাদের সাহায্যে সুলতান ফিরোজ মিনারের উচ্চতা আরও অনেকখানি বাড়ালেন।

এই গল্পটি মালদহ জেলা এবং সম্মিলিত অঞ্চলের লোকদের মধ্যে বহুল-প্রচলিত। এখনও পর্যন্ত ভাল করে না বুঝিয়ে কেউ কোন হুকুম করলে ঐ অঞ্চলের লোকে বলে, “এর যে দেখছি হিজা তুই মোরগাঁয়ে যা।”

ঐ কিংবদন্তীটির প্রথমাংশ (রাজমিস্ত্রীকে মিনারের চূড়া থেকে ফেলে দেওয়া অবধি) আজ থেকে দেড়শো বছর আগে মুন্সী শ্রীমপ্রসাদ লিপিবদ্ধ করেছিলেন (Dani, Muslim Architecture in Bengal, Appendix, p. 11 প্রঃ)। তাঁর মতে ঐ রাজমিস্ত্রীর নাম ‘পীরু’; প্রাণহানির পরে মিনারের পাশেই তাকে কবর দেওয়া হয়। সম্পূর্ণ কিংবদন্তীটি প্রথমে রজনীকান্ত চক্রবর্তী প্রকাশ করেন তাঁর ‘গৌড়ের ইতিহাস’ ২য় খণ্ডে (১৯০৯)। পরে এটি আবিদ আলী লিপিবদ্ধ করেছেন Momoirs of Gaur and Pandua বইয়ে।

এই কিংবদন্তীর সবটা না হোক কতকটা সত্য বলেই মনে হয়। আলাউদ্দীন হোসেন শাহের অন্ততম মন্ত্রী ছিলেন ‘সাকর মল্লিক’ সনাতন। ফিরোজ শাহের রাজত্বাবসানের মাত্র চার বছর বাদে হোসেন শাহের রাজত্ব শুরু হয়। এটা খুবই সম্ভব যে সনাতন হোসেন শাহের সিংহাসনে আরোহণেরও কয়েক বছর আগে থেকে গোড়-দরবারে চাকরী করতেন। সুতরাং সৈফুদ্দীন ফিরোজ শাহের ভৃত্যের সঙ্গে সনাতনের মোরগাঁওয়ে সাক্ষাৎ এবং সৈফুদ্দীন কর্তৃক সনাতনকে উচ্চপদে নিয়োগ খুবই সম্ভাব্য ব্যাপার এবং বলা বাহুল্য মোরগাঁও গ্রামের সনাতন এবং রূপের অগ্রজ সনাতন অভিন্ন হবার শতকরা ৯৯ ভাগ সম্ভাবনা।

উপরে উল্লিখিত কিংবদন্তী থেকেও সুলতান ফিরোজ শাহের চরিত্রের

খানিকটা আভাস পাওয়া যায়। নিজের রচিত শিল্প-কীর্তির উন্নতিবিধানে তাঁর আগ্রহ, ক্রোধে বিধিবিগ্জ্ঞানশূন্য হওয়া এবং ক্রোধ শাস্ত হলে স্বাভাবিক হওয়া—এগুলি তাঁর বিভিন্ন বৈশিষ্ট্য ও দুর্বলতার পরিচায়ক। অবশ্য রাজমিস্ত্রীকে মিনারের চূড়া থেকে ফেলে দিয়ে বধ করা নিষ্ঠুরতা ভিন্ন আর কিছুই নয়। কিন্তু রাজমিস্ত্রী যে বাচালতা ও বেয়াদবীর পরিচয় দিয়েছিল, তা সে যুগের কোন সার্বভৌম নৃপতিই বরদাস্ত করতেন না। সেদিক দিয়ে ফিরোজ শাহের কাজ অস্তায় হলেও অস্বাভাবিক হয়নি, অবশ্য যদি এই রাজমিস্ত্রী-বধ ব্যাপারটা আদৌ ঐতিহাসিক হয়।

আজ অবধি এই সব জায়গায় মৈফুদ্দীন ফিরোজ শাহের শিলালিপি পাওয়া গিয়েছে :—

বিরল ( দিনাজপুর ), গুয়ামালতী ( মালদহ ), কালনা ( বর্ধমান ), কাটরা ( মালদহ ), গড় জরীপা ( ময়মনসিংহ ), গোড়া। তাঁর মুদ্রাগুলির অধিকাংশের মধ্যেই “কোবাগার” ভিন্ন কোন স্থানের নাম নেই, কতকগুলি মুহম্মদাবাদ ও কতেহাবাদের ( ফরিদপুর ) টাকশালে তৈরী হয়েছিল বলে লেখা আছে। সুতরাং ফিরোজ শাহ উত্তর, পূর্ব, দক্ষিণ ও পশ্চিম বঙ্গের এক বিস্তীর্ণ অঞ্চলে রাজত্ব করতেন।

ময়মনসিংহের অন্তর্গত গড় জরীপা নামক স্থানে মৈফুদ্দীন ফিরোজ শাহের যে শিলালিপি পাওয়া গিয়েছে, তার তারিখ এবং শিলালিপি স্থাপনের উদ্দেশ্য অক্ষর সম্পর্কে খাকার পড়া যায়নি। কেদারনাথ মজুমদার তাঁর ময়মনসিংহের ইতিহাসে ( পৃ: ৩৬-৩৭ ) লিখেছেন যে ঐ শিলালিপি মজলিস খাঁ হুমায়ুন নামে জনৈক বীরের সমাধি-স্তম্ভের শিলালিপি এবং ঐ মজলিস খাঁ হুমায়ুন ফিরোজ শাহের সেনাপতি ছিলেন। তাঁর মতে ‘গড় জরীপা’র পূর্ব নাম ‘গড় দলীপা’, ফিরোজ শাহের রাজত্বকালে এখানে দলীপ সামন্ত নামে জনৈক স্বাধীন রাজা রাজত্ব করতেন; মজলিস খাঁ হুমায়ুন তাঁকে পরাজিত করে এই অঞ্চল অধিকার করেন। এই সমস্ত উক্তির স্বপক্ষে কোন প্রমাণ পাওয়া যায় না। কেদারনাথ মজুমদার লিখেছেন, “ইহাই ময়মনসিংহে মুসলমান প্রবেশের প্রথম স্বত্বপাত।” এই উক্তি সম্পূর্ণ ভুল। কয়েক বছর আগে ময়মনসিংহ জেলার অন্তর্গত গুরাই গ্রামে রুকনুদ্দীন বারবক শাহের এক শিলালিপি পাওয়া গিয়েছে। তার তারিখ ২৪শে রমজান, ৮৭১ হিজরা। চতুর্দশ শতাব্দীর

প্রথম দিকে শামসুদ্দীন ফিরোজ শাহের রাজত্বকালেও ময়মনসিংহে মুসলমানদের অধিকার ছিল বলে প্রমাণ পাওয়া যায়।

বিভিন্ন শিলালিপি থেকে সুলতান সৈফুদ্দীন ফিরোজ শাহের এই সব কর্মচারীর নাম পাওয়া যায়,

- (১) কীরী (কিরাৎ) খান
- (২) মুখলিশ খান
- (৩) জাকর খান
- (৪) সাজিদ

ফিরোজ শাহের মৃত্যু সম্বন্ধে 'রিয়াজ-উস-সলাতীনে' দুটি বিভিন্ন মতের উল্লেখ করা হয়েছে। তাতে লেখা আছে, "তিন বছর রাজত্ব করে মালিক আব্দিল অহুহ হয়ে পড়েন এবং মৃত্যুর ঝটিকায় তাঁর জীবনের দীপ নির্বাপিত হয়। কিন্তু অধিকতর সত্য বিবরণ এই যে ফিরোজ শাহও পাইকদের হাতে নিহত হন।" 'মাসির-ই-রহিমী'তে লেখা আছে, "কোন কোন লোকের মতে তিনি নায়েক (পাইক)-দের হাতে প্রাণ হারিয়েছিলেন।" 'তবকাৎ-ই-আকবরী'তেও এই কথা আছে।

ইতিহাসগ্রন্থগুলিতে লেখা আছে ফিরোজ শাহ তিন বছর রাজত্ব করেন। সৈফুদ্দীন ফিরোজ শাহের ৮২২ ও ৮২৩ হিজরার মুদ্রা এবং ৮২৪ ও ৮২৫ হিজরার শিলালিপি (বিবল গ্রামের শিলালিপি বাদ দিলে) পাওয়া গিয়েছে। সুতরাং তাঁর রাজত্বকাল ৮২২-৮২৫ হিজরা। তিন বছরেরও বেশী তাঁর রাজত্ব স্থায়ী হয়েছিল। "সুলতান শাহজাদা"কে রাজা হিসাবে ঠিক ধরা যায় না, তাছাড়া "সুলতান শাহজাদা"কে হাব্শী বলার কোন কারণ নেই, এমন কি তার ঐতিহাসিকতাও সন্দেহের অতীত নয়। সুতরাং সৈফুদ্দীন ফিরোজ শাহই বাংলার প্রথম হাব্শী সুলতান। দানের দিক দিয়ে তিনি অতুলনীয় ছিলেন। তাঁর শিল্পকীর্তি ফিরোজ মিনার বিশেষভাবে উল্লেখযোগ্য। তাঁর রাজ্যের আয়তন ছিল অবিশাল। সুতরাং তিনি যে বাংলার শ্রেষ্ঠ সুলতানদের অগ্রতম, তাতে কোন সন্দেহ নেই। বাংলাদেশে হাব্শী রাজত্বের প্রতিষ্ঠার সঙ্গে সঙ্গেই যে এদেশে সম্রাট ও বিশৃঙ্খলা সৃষ্টি হয় নি, তা এখন বোধ হয় সকলেই বুঝতে পারবেন। বাংলার প্রথম হাব্শী রাজা যোগ্যতার সঙ্গে এক বিস্তীর্ণ অঞ্চল শাসন করে গিয়েছেন। হাব্শীদের মোট রাজত্বকালের অধিকাংশও বেশী সৈফুদ্দীন ফিরোজ শাহের রাজত্বকাল। সুতরাং ফিরোজ শাহের পরবর্তী

রাজারা বা-ই করে থাকুন না কেন, বাংলার হাব্বী রাজত্বের অধিকাংশই বেশ ভালভাবে কেটেছিল বলে স্বীকার করতে হয়।

রাখালদাস বন্দ্যোপাধ্যায় সৈফুদ্দীন ফিরোজ শাহের নাম উল্লেখের সময় তাঁকে প্রায়ই “ফতে শাহের ক্রীতদাস” বলেছেন। কিন্তু ফিরোজ যে জলালুদ্দীন ফতেহ শাহের ক্রীতদাস ছিলেন, তার কোন প্রমাণই নেই।

### নাসিরুদ্দীন মাহমুদ শাহ (২য়)

সৈফুদ্দীন ফিরোজ শাহের পরবর্তী স্থলতানের নাম নাসিরুদ্দীন মাহমুদ শাহ। সমস্ত ইতিহাস-গ্রন্থে এর নাম পাওয়া যায়। এই নামে ইতিপূর্বে আর একজন স্থলতান ছিলেন বলে একে দ্বিতীয় নাসিরুদ্দীন মাহমুদ শাহ বলা উচিত। ‘তবকাং-ই-আকবরী’, ‘তারিখ-ই-ফিরিশ্তা’ ও ‘রিয়াজ-উস-সলাতী’-নের মতে ইনি সৈফুদ্দীন ফিরোজ শাহের জ্যেষ্ঠ পুত্র। কিন্তু ‘তারিখ-ই-ফিরিশ্তা’ ও ‘রিয়াজ-উস-সলাতী’-নে আবার এও লেখা হয়েছে যে হাজী মুহম্মদ কন্দাহারী নামে একজন ঐতিহাসিকের মতে এই মাহমুদ শাহ জলালুদ্দীন ফতেহ শাহের পুত্র, ফিরোজ শাহের মৃত্যুর পরে একে সিংহাসনে বসানো হয়।

সুতরাং এই নাসিরুদ্দীন মাহমুদ শাহের প্রকৃত পরিচয় সন্দেহে একটা রহস্য রয়েছে। রহস্য আরও ঘনীভূত হয় নাসিরুদ্দীন মাহমুদ শাহের শিলালিপি থেকে। বর্ধমান জেলার কালনার কাছে এক মসজিদে এর একটি শিলালিপি পাওয়া গিয়েছে; এর তারিখ ৮২৫ হিজরা; এতে স্থলতানের নাম এইভাবে লেখা রয়েছে,

“অস্-স্থলতান ইবন্ অস্-স্থলতান্ নাসির উদ্-দুনিয়া ওয়াদ্দীন আবু (ল মুজাহিদ) মাহমুদ শাহ বাদশাহ গাজী।”

এতে বলা হয়েছে স্থলতান নাসিরুদ্দীন মাহমুদ শাহ স্থলতানের পুত্র, কিন্তু তাঁর পিতার নাম বলা হল না। জলালুদ্দীন ফতেহ শাহ ও সৈফুদ্দীন ফিরোজ শাহ উভয়েরই পুত্র নিজেকে “স্থলতানের পুত্র” বলে পরিচয় দিতে পারেন। সুতরাং আমরা যে ভিষিয়ে সেই ভিষিরেই রয়ে গেলাম।

রাখালদাস বন্দ্যোপাধ্যায় মনে করেছিলেন মুহম্মদ কন্দাহারীর উক্তিই ঠিক এবং এই মাহমুদ শাহ জলালুদ্দীন ফতেহ শাহেরই পুত্র। অপর মতকে তিনি এই বলে নস্যাৎ করে দিয়েছেন,

“রিয়াজ-উল-সালাতীন্ অহুসারে নাসির-উদ্দীন মহম্মদ শাহ, সৈফ-উদ্দীন ফিরোজ শাহের জ্যেষ্ঠ পুত্র। যে সকল হাব্শী ক্রীতদাস ভারতবর্ষে আনীত হইত, তাহারা সকলেই নপুংসক। মুসলমান ঐতিহাসিক গোলাম হোসেন্ কি জন্ত নপুংসকের পুত্রপ্রাপ্তির কথা লিপিবদ্ধ করিয়া গিয়াছেন, তাহা বুঝিতে পারা যায় না।”

কিন্তু রাখালদাস লক্ষ্য করেননি যে শুধু গোলাম হোসেন্ মহম্মদ শাহকে ফিরোজ শাহের পুত্র বলেন, বখ্শী নিজামুদ্দীনও এই কথা বলেছেন তাঁর ‘তবকাৎ-ই-আকবরী’তে। বখ্শী নিজামুদ্দীন ষোড়শ শতাব্দীর লোক। মুহম্মদ কন্দাহারীও তাই। সুতরাং কন্দাহারীর উক্তির তুলনায় নিজামুদ্দীনের উক্তির মূল্য কোন অংশে কম নয়, বরং একদিক দ্বিগুণ বেশী; কারণ কন্দাহারীর বই এখন আর পাওয়া যায় না, কিন্তু নিজামুদ্দীনের বই পাওয়া যায়।

আশ্চর্যের বিষয়, রাখালদাস মনে করেছেন যে সৈফুদ্দীন ফিরোজ শাহ নপুংসক ছিলেন। এদেশে যে সব হাব্শী আসত, তাদের সম্বন্ধে রাখালদাসের তুলনায় ‘তবকাৎ-ই-আকবরী’-লেখকের ধারণা নিশ্চয়ই অনেক পরিষ্কার ছিল; কারণ তিনি আলোচ্য সময়ের মাত্র একশো বছর পরে (১৫২০ খ্রীষ্টাব্দে) এই বই লিখেছেন এবং তাঁর সময়ও ভারতবর্ষে অনেক হাব্শী ছিল; এদেশে আগত সব হাব্শীই যদি নপুংসক হত, তাহলে তিনি ফিরোজ শাহের পুত্রপ্রাপ্তির মত অসম্ভব কথা লিপিবদ্ধ করতেন না। সুতরাং ফিরোজ শাহকে নপুংসক মনে করার অল্পকূলে কোন যুক্তি নেই। রাখালদাস ফিরোজ শাহকে যে “ক্রীতদাস” বলেছেন, এরও অল্পকূলে যে কোন প্রমাণ নেই, তা আগেই বলা হয়েছে।

আর একটি বিষয় দেখতে হবে। ‘তারিখ-ই-ফিরিশ্তা’ ও ‘রিয়াজ-উল-সালাতীনে’ “জলতান শাহজাদা”র সঙ্গে মালিক আন্দিল বা ফিরোজ শাহের সম্বন্ধের যে বিস্তৃত বর্ণনা দেওয়া হয়েছে, তাদের মধ্যে কেবলমাত্র “জলতান শাহজাদা”কেই বারবার নপুংসক বলা হয়েছে, মালিক আন্দিলও যে নপুংসক, সে কথা ঘূণাকরেও বলা হয়নি। বরং তিনি যে নপুংসককে বধ করে খুব বড় একটা কাজ করছেন, সেই কথাটাই জোর দিয়ে বলা হয়েছে। ‘তারিখ-ই-ফিরিশ্তা’র লেখা আছে যে জলালুদ্দীন ফতেহ শাহ নিহত হবার সময়ে তাঁর উজীর খোজা খান জহান এবং প্রধান অমাত্য মালিক আন্দিল হাব্শী রাজ্যের সীমান্তে ছিলেন। মালিক আন্দিল যে খোজা ছিলেন, তা ফিরিশ্তা বলেননি, কেবল খান জহানকেই তিনি খোজা বলেছেন। সুতরাং সৈফুদ্দীন ফিরোজ শাহ যে

নগুসক ছিলেন না, তাতে কোন সন্দেহ নেই। প্রকৃতপক্ষে বাংলার অন্ততম শ্রেষ্ঠ স্থলতান, ফিরোজ মিনারের নির্মাতা, দানবীর ফিরোজ শাহকে নগুসক মনে করা নিতান্তই অসঙ্গত কর্না।

কিন্তু আমাদের মূল প্রশ্নের আলোচনা এখনও বাকী রয়েছে; অর্থাৎ দ্বিতীয় নাসিরুদ্দীন মাহমুদ শাহ কার ছেলে। নিম্নলিখিত বিষয়গুলি থেকে মনে হয় যে এসম্বন্ধে ‘তবকাৎ-ই-আকবরী’র উক্তিই ঠিক এবং নাসিরুদ্দীন মাহমুদ শাহ সৈফুদ্দীন ফিরোজ শাহের পুত্র।

(১) মুহম্মদ কন্দাহারীর উক্তি অনুসারে নাসিরুদ্দীন মাহমুদ শাহ জলালুদ্দীন ফতেহ শাহের পুত্র। জলালুদ্দীন ফতেহ শাহের পিতার নামও নাসিরুদ্দীন মাহমুদ শাহ। তা’হলে পিতামহ ও পৌত্রের অবিকল একই নাম হয়। কিন্তু বাংলাদেশের স্থলতানদের মধ্যে এমন একটি দৃষ্টান্তও পাওয়া যায় না, যেখানে পিতামহ ও পৌত্রের নাম একেবারে অভিন্ন।\*

(২) এই দ্বিতীয় নাসিরুদ্দীন মাহমুদ শাহের শিলালিপিতে তাঁকে “স্থলতানের পুত্র স্থলতান” ( অস্-স্থলতান ইব্ন অস্-স্থলতান ) বলা হয়েছে, কিন্তু তাঁর পিতামহও যে স্থলতান, তা বলা হয়নি। তিনি জলালুদ্দীন ফতেহ শাহের পুত্র ও প্রথম নাসিরুদ্দীন মাহমুদ শাহের পৌত্র হলে তাঁর শিলালিপিতে “অস্-স্থলতান্ ইব্ন অস্-স্থলতান ইব্ন অস্-স্থলতান” ( অর্থাৎ স্থলতানের পুত্র স্থলতান, তত্ত পুত্র স্থলতান ) লেখা থাকত। তা না থাকতে মনে হয়, তাঁর পিতামহ স্থলতান ছিলেন না, কেবল পিতাই স্থলতান ছিলেন এবং তিনি সৈফুদ্দীন ফিরোজ শাহের পুত্র।

(৩) দ্বিতীয় নাসিরুদ্দীন মাহমুদ শাহ জলালুদ্দীন ফতেহ শাহের পুত্র হলে ফতেহ শাহের মৃত্যুর সঙ্গে সঙ্গেই তিনি সিংহাসনে অধিষ্ঠিত হলেন না কেন? অপর পক্ষ ফিরিশ্তা ও ‘রিয়াজে’র উক্তি উদ্ধৃত করে বলবেন যে সে সময় তিনি শিশু ছিলেন বলে সিংহাসন পাননি। ফিরিশ্তা ও গোলাম হোসেন লিখেছেন, ফতেহ শাহের মৃত্যুর সময় তাঁর পুত্রের বয়স মাত্র ছ’ বছর

\* ব্রজবান লিখেছিলেন প্রথম নাসিরুদ্দীন মাহমুদ শাহের “কুনিরাহ” ছিল “আবুল মুজাহ্‌র” এবং দ্বিতীয় নাসিরুদ্দীন মাহমুদ শাহের “কুনিরাহ” ছিল “আবুল মুজাহ্‌হিন”; এঁদের নাম সম্পূর্ণ অভিন্ন নয়, হুন্ডার এঁদের মধ্যে পিতামহ-পৌত্র সম্পর্ক থাকতে বাধা নেই (JASB, 1872, Pt. II, p. 288 &c.)। কিন্তু প্রথম নাসিরুদ্দীন মাহমুদ শাহের “আবুল মুজাহ্‌র” ও “আবুল মুজাহ্‌হিন” উভয় “কুনিরাহ”ই ছিল বলে এরাও পাওয়া যায়। হুন্ডার ব্রজবানের মত সম্পূর্ণ ভিত্তিহীন।



ছিল বলে অমাত্যেরা তাকে রাজা না করে ফিরোজ শাহকে রাজা করেন । এই কথা ঠিক হলে বলতে হবে ফিরোজ শাহের মৃত্যুর সময়েও ফতেহ্ শাহের পুত্র শিশুই ছিলেন, কারণ ফিরোজ শাহ ৩৪ বছর রাজত্ব করেন এবং তাঁর মৃত্যুকালে ফতেহ্ শাহের পুত্রের বয়স ৫৬ বছরের বেশী হয় না । সুতরাং অমাত্যেরা যদি আগে শিশুকে সিংহাসনে বসাতে রাজী না হয়ে থাকেন, তাকে এখনও তাঁদের রাজী হবার কোন কারণ দেখা যায় না ।

দ্বিতীয় নাসিরুদ্দীন মাহমুদ শাহের কোন মূদ্রা পাওয়া যায় নি । যে সমস্ত মূদ্রা এঁর উপর আরোপিত হয়েছিল, সেগুলি প্রথম নাসিরুদ্দীন মাহমুদ শাহের মূদ্রা বলে প্রমাণিত হয়েছে । এর তিনটি শিলালিপি পাওয়া গিয়েছে, একটি ৮২৫ হিজরায় ও দুটি ৮২৬ হিজরায় উৎকীর্ণ । সুতরাং এক বছর বা তার কিছু বেশী সময় ইনি রাজত্ব করেছিলেন বলে মনে হয় । এই সমস্ত জায়গায় এঁর শিলালিপি পাওয়া গিয়েছে :—

কালনা ( বর্ধমান ), পাণ্ডুয়া ( মালদহ ) এবং চুনাখালি ( মুর্শিদাবাদ ) ।

সুতরাং উত্তর ও পশ্চিম বঙ্গের এক বিস্তীর্ণ অঞ্চলে এঁর রাজত্ব ছিল দেখা যাচ্ছে । ইনি হাব্শী হোন বা না হোন, এর পরামর্শদাতারা সকলেই হাব্শী ছিলেন । বাংলাদেশে হাব্শী-কর্তৃত্ব যে এঁর রাজত্বকালেও সূদৃঢ় ছিল, এঁর রাজ্যের এই বিস্তৃত আয়তনই তার প্রমাণ ।

ফিরিশতা ও 'রিয়াজ'-এর মতে এঁর রাজত্বকালে হাব্শ-খান নামে একজন হাব্শী ক্রীতদাস রাজকোষ এবং শাসনব্যবস্থার সর্বময় কর্তা হয়ে ওঠে । মুহম্মদ কন্দাহারীর মতে ( ফিরিশতা ও গোলাম হোসেন কর্তৃক উল্লিখিত ) সুলতান ফিরোজ শাহের জীবদ্দশায় তাঁর আদেশে হাব্শ-খান মাহমুদ শাহকে শিক্ষা দেবার জন্য নিযুক্ত হয়েছিলেন । যাহোক, এই তিনজন লেখকই বলেন, ফিরোজ শাহের মৃত্যুর পরে মাহমুদ শাহ রাজা হন বটে, কিন্তু হাব্শ-খানই রাজ্যের সমস্ত ক্রমতা করায়ত্ত করেন, কলে মাহমুদ শাহ তাঁর হাতের পুতুলে পরিণত হন । এইভাবে কিছুদিন কাটবার পর ( কন্দাহারীর মতে হাব্শ-খান তখন নিজে রাজা হবার মতলব জাঁটছিলেন ) যদি বদর নামে আর একজন হাব্শী বেপারোয়া হয়ে উঠে হাব্শ-খানকে হত্যা করে এবং নিজেই শাসনব্যবস্থার কর্তা হয়ে বসে । কিছুদিন বাদে পাইকদের সর্দারের সঙ্গে বড়বন্দ করে সে একদিন রাজ্যে মাহমুদ শাহকে হত্যা করে এবং পরদিন সকালে অমাত্যদের সম্মিলিতভাবে সে মৃত্যুকর শাহ নাম নিয়ে সিংহাসনে বসে ।

এই বিবরণের প্রথমাংশ কোন সমসাময়িক বিবরণ দ্বারা সমর্থিত না হলেও সম্পূর্ণ স্বাভাবিক ও বিশ্বাস্য। শেষাংশ সম্পূর্ণ সত্য, কারণ বাবর তাঁর আত্ম-জীবনীতে লিখেছেন, “নসরৎ শাহের পিতার ( অর্থাৎ হোসেন শাহের ) রাজ্য-লাভের আগে একজন হাব্শী রাজাকে হত্যা করে কিছুদিন বাংলাদেশ শাসন করেছিল।”

বিভিন্ন শিলালিপি থেকে দ্বিতীয় নাসিরুদ্দীন মাহমুদ শাহের এই সমস্ত কর্মচারীর নাম পাওয়া গিয়েছে :—

( ১ ) দৌলৎ খান

( ২ ) মজলিস খান

### শাহমুহম্মদীন মুজাফফর শাহ

শাহমুহম্মদীন মুজাফফর শাহ সম্বন্ধে ‘তবকাৎ-ই-আকবরী’, ‘মাসির-ই-রহিমী’, ‘তারিখ-ই-ফিরিশ্তা’ ও ‘রিয়াজ-উস-সলাতীনে’র বিবরণ প্রায় একই রকম। চারটি বইয়েই মোটামুটিভাবে এই সব কথা লেখা রয়েছে—

গায়ের জোরে মুজাফফর শাহ রাজা হবার পরে পৃথিবীতে অন্ধকার নেমে এল। মুজাফফর শাহ ছিলেন উদ্ধত, নৃশংস ও রক্তপিপাসু প্রকৃতির। রাজা হয়ে তিনি বহু শিক্ষিত, ধার্মিক ও সম্মান্য লোককে হত্যা করেন এবং হিন্দু রাজাদের সমালয়ে প্রেরণ করেন। অবশেষে তাঁর অত্যাচার যখন চরমে পৌছোলো, তখন সকলেই তাঁর বিরুদ্ধে দাঁড়াল। তাঁর মন্ত্রী সৈয়দ হোসেন বিরুদ্ধবাদীদের নেতৃত্ব গ্রহণ করলেন এবং মুজাফফর শাহকে বধ করে নিজে রাজা হলেন।

বাবরের আত্মকাহিনী থেকে মুজাফফর শাহ সম্বন্ধে এইটুকু মাত্র জানা যায়,

(১) মুজাফফর শাহ জাতিতে হাব্শী ছিলেন।

(২) তিনি পূর্ববর্তী রাজাকে হত্যা করে রাজা হয়েছিলেন।

(৩) আলাউদ্দীন হোসেন শাহ মুজাফফর শাহকে হত্যা করে রাজালাভ করেছিলেন।

মুজাফফর শাহের নৃশংসতা, অত্যাচার ও কুশাসন সম্বন্ধে বাবর কিছু লেখেননি। এসম্বন্ধে পূর্বোক্তিত চারখানি বইতে যা লেখা আছে, তা সম্পূর্ণ সত্য কিনা বলা যায় না। ‘তারিখ-ই-ফিরিশ্তা’ ও ‘রিয়াজ-উস-সলাতীনে’র মতে মুজাফফর শাহ তাঁর উজীর সৈয়দ হোসেনের পরামর্শে

সৈয়দের বেতন হ্রাস করেন। এই ব্যাপার এবং মুজাফফর শাহের দুর্ব্যবহার ও রাজত্ব সংগ্রহের জন্ত প্রজাদের উপর নৃশংস অত্যাচার অমাত্যদের অধিকাংশকেই বিরক্ত করে তোলে। তাঁরা তখন সম্মুখ হয়ে তাঁর বিরুদ্ধে দণ্ডায়মান হন। এই সৈয়দ হোসেনই তখন তাঁদের নেতৃত্ব করেন। এসব কথা সত্য কিনা তা বলা শক্ত, তবে মুজাফফর শাহ যে জনপ্রিয় রাজা ছিলেন না, তাতে কোন সন্দেহ নেই। তার প্রমাণ, তিনি বাংলাদেশের একটা বড় অঞ্চলে নিজের অধিকার হারিয়েছিলেন। আজ অবধি এইসব জায়গায় তাঁর শিলালিপি পাওয়া গিয়েছে :—

গঙ্গারামপুর ( দিনাজপুর ), নবাবগঞ্জ ( মালদহ ), হজরৎ পাওয়া ( মালদহ ), চম্পানগর ( ভাগলপুর )।

তাঁর মুদ্রায় “কোষাগার” ও “টাকশাল” ছাড়া দু'টি মাত্র নির্মাণস্থানের উল্লেখ পাঠি—বারবকাবাদ ও ফতেহাবাদ। বারবকাবাদ উত্তরবঙ্গে অবস্থিত। মোগল সম্রাটদের আমলে বর্তমান মালদহ, রাজশাহী, দিনাজপুর ও বগুড়ার কিয়দংশ নিয়ে সরকার বারবকাবাদ গঠিত হয়েছিল। ফতেহাবাদ দক্ষিণবঙ্গে—ফরিদপুর অঞ্চলে অবস্থিত।

এর থেকে দেখা যায়, প্রায় সমগ্র উত্তরবঙ্গে মুজাফফর শাহের অধিকার ছিল, উপরন্তু উত্তরবঙ্গের সংলগ্ন বিহারের কিছু অঞ্চল তাঁর রাজ্যের অন্তর্ভুক্ত হয়েছিল। দক্ষিণবঙ্গেরও কিছু অংশ তাঁর রাজ্যভূক্ত ছিল। কিন্তু পূর্ববঙ্গ ও পশ্চিমবঙ্গে যে তাঁর কোন অধিকার ছিল, এমন কোন প্রমাণ পাই না। সম্ভবত এই সব অঞ্চল তাঁর কর্তৃত্ব স্বীকার করেনি।

তবে যে অঞ্চলে মুজাফফর শাহের রাজত্ব ছিল বলে নিঃসন্দেহভাবে জানা যায়, তার আয়তনও খুব কম নয়। মুজাফফর শাহের ৮২৬ হিজরার মুদ্রা এবং ৮২৬ থেকে ৮২৮ হিজরার শিলালিপি পাওয়া যায়। তিনি যতখানি অত্যাচারী ছিলেন বলে চিত্রিত হয়েছেন, সত্যিই যদি তিনি ততখানি অত্যাচারী হতেন, তাহলে এতবড় অঞ্চলে এতদিন ধরে নিজের অধিকার বজায় রাখতে পারতেন বলে মনে হয় না। এই কারণে মনে হয়, মুজাফফর শাহ যতটুকু পূর্বোল্লিখিত ইতিহাসগ্রন্থগুলির বিবরণে খানিকটা অতিরঞ্জন আছে। মুজাফফর শাহকে উচ্ছেদ করে যিনি রাজা হয়েছিলেন, সেই হোসেন শাহের প্রচারের ফলেই সম্ভবত মুজাফফর শাহের চরিত্র অত্যধিক পরিমাণে কালিমালিঙ্গ হয়েছে।

বিভিন্ন শিলালিপি থেকে শামসুদ্দীন মুজাফফর শাহের এই সব কর্মচারীর নাম পাওয়া যায় :—

(১) মুভাবর খান কার কর্মান

(২) মজলিস উলুগ খুশীদ

পূর্বোল্লিখিত ইতিহাসগ্রন্থগুলির মতে মুজাফফর শাহ সৈয়দ হোসেনকে উজীরের পদে নিয়োগ করেছিলেন। এই নিয়োগের ফলে রাজ্যের ভাল হয়েছিল, কিন্তু মুজাফফর শাহের সর্বনাশ হয়েছিল। এ সম্বন্ধে পরবর্তী অধ্যায়ে আলোচনা করব।

কীভাবে মুজাফফর শাহ নিহত হয়েছিলেন, সে সম্বন্ধে ষোড়শ শতাব্দীর দু'জন লেখকের মধ্যে মতদ্বৈধ দেখা যায়। হাজী মুহম্মদ কন্দাহারীর মতে (‘তারিখ-ই-ফিরিশ্তা’ ও ‘রিয়াজ-উস-সলাতীনে’ উল্লিখিত) মুজাফফর শাহের সঙ্গে তাঁর বিরুদ্ধবাদীদের প্রচণ্ড যুদ্ধ হয়েছিল। ১,২০,০০০ লোক এই যুদ্ধে নিহত হবার পরে মুজাফফর শাহ পরাস্ত ও নিহত হন এবং বিরুদ্ধবাদীদের নেতা সৈয়দ হোসেন রাজা হন। সম্ভবত কন্দাহারীর বর্ণনা অবলম্বনেই ফিরিশ্তা ও গোলাম হোসেন এই যুদ্ধের অনতিসংক্ষিপ্ত বর্ণনা লিপিবদ্ধ করেছেন। পরবর্তী অধ্যায়ে আমরা এটি বিশ্লেষণ করব। ফিরিশ্তা ও ‘রিয়াজে’ লেখা আছে এই যুদ্ধে যে সমস্ত লোক বন্দী হত, তাদের মুজাফফর শাহের সামনে নিয়ে আসা হত এবং মুজাফফর নাকি স্বহস্তে তাদের বধ করতেন।

বখ্শী নিজামুদ্দীন কিন্তু ‘তবকাৎ-ই-আকবরী’তে অগ্নি কথা লিখেছেন। তাঁর মতে জনসাধারণ যখন মুজাফফর শাহের উপর বিরক্ত হয়ে উঠল, তখন সৈয়দ হোসেন তাদের মনোভাব বুঝতে পারলেন এবং ঘুস দিয়ে পাইকদের সর্দারকে হাত করে ১৩ জন লোক সঙ্গে নিয়ে মুজাফফর শাহের অন্তঃপুরে ঢুকে তাঁকে হত্যা করলেন। ‘মাসির-ই-রহিমী’তেও এই কথা লেখা আছে, তবে তাতে বলা হয়েছে হোসেন ১৫ জন লোক সঙ্গে নিয়ে মুজাফফরের অন্তঃপুরে ঢুকেছিলেন।

সম্ভবত এই বইগুলির কথাই সত্য, কারণ বাবর তাঁর আত্মকাহিনীতে লিখেছেন, “সুলতান আলাউদ্দীন সেই হাব্শীকে (মুজাফফর শাহকে) হত্যা করে রাজ্যশাস্তি করেছিলেন।” আলাউদ্দীন (সৈয়দ হোসেন) মুজাফফর শাহকে যুদ্ধে নিহত করলে বাবর তাকে “হত্যা করা” বলতেন কিনা সন্দেহ।

মুজাফফর শাহ সত্ত্বত ধর্মপ্রাণ মুসলমান ছিলেন। তাঁরই রাজত্বকালে ও সত্ত্বত তাঁরই যত্নে পাণ্ডুয়ায় নূর কুৎব আলমের সমাধি-ভবনটি পুনর্নির্মিত হয়। গোড়ের কাছে গজারামপুরে মোলানা আতার দরগায় তিনি একটি মসজিদ তৈরী করান। নূর কুৎব আলমের সমাধি-ভবনের শিলালিপিতে তাঁর উল্লিখিত প্রশংসা আছে। অথচ সব ইতিহাসগ্রন্থেই লেখা আছে তিনি ধার্মিক লোকদের হত্যা করতেন !

৮২২ হিজরায় বাংলা দেশে হাব্শী-রাজত্ব শুরু হয়। ৮২৮ হিজরায় মুজাফফর শাহের মৃত্যুর সঙ্গে সঙ্গেই তা শেষ হল। পরবর্তী সুলতান আল্লাউদ্দীন হোসেন শাহ সিংহাসনে আরোহণ করে হাব্শীদের বাংলা দেশ থেকে বিতাড়িত করেন। রুকনুদ্দীন বারবক শাহের রাজত্বকালে যারা এদেশের শাসনব্যবস্থায় প্রথম গুরুত্বপূর্ণ অংশ গ্রহণ করার স্বযোগ পায়, ত্রিশ বছরের মধ্যেই তাদের ক্ষমতার শীর্ষে আরোহণ ও তার ঠিক পরেই সমলবলে বিদায়গ্রহণ—দুইই নাটকীয় ব্যাপার। এই হাব্শীদের মধ্যে সকলেই যে খারাপ লোক ছিল না, তা আমরা ইতিপূর্বে আলোচনা করে দেখিয়েছি। এখানে তার পুনরুজ্জীবন না করে আর একটি বিষয়ের দিকে সকলের দৃষ্টি আকর্ষণ করব। অনেকেই লিখেছেন যে হাব্শীদের দৌরাওয়ার ফলে ১৪৮৭ থেকে ১৪৯৩ খ্রীষ্টাব্দের মধ্যে বাংলাদেশে পরপর অনেকগুলি রাজা নিতান্ত অল্প সময় রাজত্ব করার পরে নিহত হন। কিন্তু আসলে এই ব্যাপারের জন্তে হাব্শীদের চেয়ে পাইকরাই বেশী দায়ী। বিভিন্ন রাজার আততায়ীরা ( তারা সকলেই হাব্শী নয় ) এই পাইকদের সঙ্গে ষড়যন্ত্র করেই রাজাদের হত্যা করেছে। বলা বাহুল্য, পাইকেরা হাব্শী নয়, তারা এদেশেরই লোক। জলালুদ্দীন ফতেহ শাহকে হত্যা করে যে দুরাশ্রয় গোড়ের সিংহাসন অধিকার করে, সেই সুলতান শাহজাদা ফিরিশতার মতে পাইকদের সর্দার ও বাঙালী ছিল।

রজনীকান্ত চক্রবর্তী তাঁর 'গোড়ের ইতিহাস' দ্বিতীয় খণ্ডে লিখেছেন যে বাংলার হাব্শীদের মধ্যে এই কজন প্রধান ছিলেন :—

কাফুর, কোয়ারানকুল, ফিরুজ, ফিরুজা, আলমাস, ইয়াকুৎ, হাব্শ খাঁ, আম্লিল এবং সিদ্দিকবদর।

এঁদের মধ্যে কাফুর, হাব্শ খান, আম্লিল এবং সিদ্দিকবদরের নাম অজ্ঞাত সূত্রে পাওয়া যায়। কাফুর ঐতিহাসিক ব্যক্তি, কারণ ঢাকা জেলার রামপালের

এক মসজিদের শিলালিপি থেকে জানা যায় যে, সুলতান জলানুদ্দীন ফতেহ্ শাহের রাজত্বকালে ৮৮৮ হিজরার রজব মাসে মালিক কানুর ঐ মসজিদ তৈরী করিয়েছিলেন। হাব্শ খানের নাম 'তারিখ-ই-ফরিশ্তা' ও 'রিয়াজ-উন্-সলাতীন'-এ পাওয়া যায়, এই দুই বইয়ের মতে ইনি দ্বিতীয় নাসিরুদ্দীন মাহমুদ শাহের রাজত্বকালের প্রথম দিকে রাজ্যের সর্বসর্বা ছিলেন। মালিক আন্দিল ও সিদ্দিকদর যথাক্রমে সৈফুদ্দীন ফিরোজ শাহ ও শামসুদ্দীন মুজাফফর শাহ নাম নিয়ে বাংলার সুলতান হন বলে বিভিন্ন ইতিহাসগ্রন্থে লেখা আছে। রজনীকান্ত চক্রবর্তী অণু যে সমস্ত হাব্শীর নাম করেছেন, তাঁদের ঐতিহাসিকতা সম্বন্ধে কোন প্রমাণ পাওয়া যায় না।

## আলাউদ্দীন হোসেন শাহ

### অবতরণিকা

মোগল-পূর্ববর্তী যুগে বাংলাদেশে যে সমস্ত স্বাধীন সুলতানের আবির্ভাব হয়েছিল, তাঁদের মধ্যে আলাউদ্দীন হোসেন শাহই সবচেয়ে বিখ্যাত। তাঁদের ভিতর একমাত্র তাঁর নামই জনতার স্মৃতিতে আজও অম্লান। অল্প সুলতানদের নাম বেঁচে আছে শুধু ইতিহাসের পাতায়, ইতিহাসরসিক ভিন্ন তাঁদের খবর বিশেষ কেউ রাখেন না। কিন্তু হোসেন শাহের নাম সাধারণ লোকের কাছেও পরিচিত। বাংলাদেশ ও তার আশপাশের বিভিন্ন অঞ্চলে হোসেন শাহ সম্বন্ধে যে কত কাহিনী প্রচলিত আছে, তার সীমা নেই। রকম্যান লিখেছেন, "The name of Husain Shah, the good, is still remembered from the frontiers of Orissa to the Brahmaputra."

আলাউদ্দীন হোসেন শাহের এই খ্যাতির প্রধান কারণ তিনি ছিলেন একজন শ্রেষ্ঠ নরপতি। এ ছাড়া এর আরও কয়েকটি কারণ আছে। সেগুলি এই,

(ক) আলাউদ্দীন হোসেন শাহের রাজ্যের আয়তন ছিল অত্যন্ত বিরাট, পূর্ববর্তী সুলতানদের রাজ্যের তুলনায় অনেক বেশী। এই কারণে তাঁর খ্যাতির প্রসার-ক্ষেত্র স্বভাবতই বিস্তীর্ণ হয়েছে।

(খ) আলাউদ্দীন হোসেন শাহের যত ঐতিহাসিক স্মৃতিচিহ্ন আছে, এত বাংলার আর কোন সুলতানের নেই। এ পর্বন্ত তাঁর অজস্র শিলালিপি আবিষ্কৃত হয়েছে, এখনও হচ্ছে। সমসাময়িক বা ঊষৎ-পরবর্তী যুগে রচিত বহু গ্রন্থেই তাঁর নাম পাওয়া যায়। তাঁর সম্বন্ধে কিছু কিছু বিবরণও তাদের মধ্যে মেলে।

(গ) আলাউদ্দীন হোসেন শাহ ছিলেন চৈতন্তদেবের সমসাময়িক বঙ্গাধিপ। চৈতন্তদেবের নবদ্বীপলীলা তাঁর রাজত্বকালেই অমুষ্ঠিত হয়েছিল। এইজন্য চৈতন্তদেবের প্রসঙ্গের সঙ্গে তাঁর নামটিও যুক্ত হয়ে বাঙালীর স্মৃতিতে স্থায়ী আসন লাভ করেছে।

কিন্তু অত্যন্ত দুঃখের বিষয়, বাংলা দেশের কৃপণা ইতিহাস-লক্ষী এত বিখ্যাত একজন নরপতিকেও তাঁর প্রসাদ থেকে বঞ্চিত রেখেছেন। অল্প সুলতানদের মত আলাউদ্দীন হোসেন শাহেরও প্রামাণিক আত্মপুর্বিক ইতিহাস পাওয়া যায় না। তার কল হয়েছে এই যে, আগেকার লোকে যেমন হোসেন শাহের ইতিহাস বলতে জানত কয়েকটি গালগল্প, তেমনি এখনকার যুগের লোকেদের, এমন কি গবেষকদের মনেও হোসেন শাহ সম্বন্ধে নিতান্ত অস্পষ্ট একটা ধারণা রয়েছে, যার মধ্যে সত্যের চাইতে কল্পনার পরিমাণই বেশী। বাংলার সংস্কৃতি, সাহিত্য, ইতিহাস সংক্রান্ত আলোচনায় আলাউদ্দীন হোসেন শাহের প্রসঙ্গ প্রায়ই এসে পড়ে। সেক্ষেত্রে এরা এই সব অস্পষ্ট ধারণারই বারবার পুনরাবৃত্তি করেন।

সেইজন্য আজ আলাউদ্দীন হোসেন শাহের প্রকৃত ইতিহাস উদ্ধার করা ও সর্বসাধারণের সামনে তাকে তুলে ধরার প্রয়োজনীয়তা খুব বেশী হয়ে পড়েছে। নানা ভেজালের মধ্য থেকে আসল তথ্যকে উদ্ধার করা অত্যন্ত কঠিন কাজ হলেও আমাদের সেই চেষ্টাই করতে হবে।

আরবী, ফার্সী, বাংলা, সংস্কৃত, উড়িয়া, অসমীয়া, অবধী, পভুগীজ প্রভৃতি বিভিন্ন ভাষায় লেখা নানা সূত্রে আলাউদ্দীন হোসেন শাহ সম্বন্ধে বিচ্ছিন্ন সংবাদ পাওয়া যায়। হোসেন শাহের শিলালিপিগুলি সবই আরবী ভাষায় লেখা। ফার্সী গ্রন্থগুলির মধ্যে ‘তবকাৎ-ই-আকবরী’, ‘আইন-ই আকবরী’, ‘মাসির-ই-রহমী’, ‘তারিখ-ই-ফিরিশ্তা’, এবং ‘রিয়াজ-উন্-সলাতীন’ উল্লেখযোগ্য। এদের ভিতরে একমাত্র ‘রিয়াজ-উন্-সলাতীনে’ই হোসেন শাহ সম্বন্ধে কতকটা বিস্তৃত ও ধারাবাহিক বিবরণ পাওয়া যায়। অর্বাচীন হলেও এই বিবরণীর গুরুত্ব আছে, কারণ এর কতকংশ নির্ভরযোগ্য প্রমাণের দ্বারা সমর্থিত, স্মরণ্য অস্ত্রাণ্ড অংশকেও বিরুদ্ধ প্রমাণ না পাওয়া পর্যন্ত উড়িয়ে দেওয়া যায় না। হু’একটি সমসাময়িক ফার্সী গ্রন্থে ও ফার্সী পুঁথির পুঁথিকায় হোসেন শাহের নাম উল্লিখিত হয়েছে। বাংলা বইগুলির মধ্যে ‘চৈতন্যভাগবত’, ‘চৈতন্যমঙ্গল’, ‘চৈতন্যচরিতামৃত’ প্রভৃতি চৈতন্যজীবনীগ্রন্থে এবং কবীন্দ্র পরমেশ্বর ও শ্রীকর নন্দী রচিত মহাভারতে হোসেন শাহ সম্বন্ধে অল্পস্বল্প তথ্য মেলে, অল্প কয়েকখানি গ্রন্থে হোসেন শাহের নাম মাত্র পাওয়া যায়। কয়েকটি সংস্কৃত গ্রন্থ ও লিপি থেকে অল্প সংবাদ পাওয়া যায়। উড়িয়ার ‘মাদলা পাণ্ডী’, আসামের ‘বুড়ী’ এবং ত্রিপুরার ‘রাজমালা’য় হোসেন



শাহের সঙ্গে ঐসব দেশের যুদ্ধের বর্ণনা পাওয়া যায়, এইসব সূত্র খুব মূল্যবান হলেও এদের মধ্যে দু'টি ত্রুটি রয়েছে ; এগুলি সময়সাময়িক নয় এবং এদের বর্ণনা একদেশদর্শিতা-দোষে দুষ্ট। অবশী ভাষায় লেখা কুংবনের 'মৃগাবতী'তে হোসেন শাহের নাম মেলে, কিন্তু তিনি কোন্ হোসেন শাহ, সে সম্বন্ধে পণ্ডিতদের মধ্যে মতভেদ আছে। আলাউদ্দীন হোসেন শাহের রাজত্বকালে পতুগীজরা প্রথম বাংলাদেশে পদার্পণ করেন। এই সময়ের কয়েকজন পতুগীজ ভাগ্যাহেষী বা পর্যটকের লেখা ভ্রমণবৃত্তান্তে এবং কয়েকজন পতুগীজ ইতিহাসিকের লেখা গ্রন্থে—যেমন জোঁআঁ-দে-বারোসের<sup>১</sup> *Da Asia*-য়, গ্যাসপার কোরীআর<sup>২</sup> *Lendas da India*-য় এবং ফরিয়া-ই-সুজার<sup>৩</sup> *Asia Portuguesa*-য় বাংলার রাজা সম্বন্ধে সংশ্লিষ্ট কয়েকটি কথা লিপিবদ্ধ আছে। মোটামুটিভাবে এই সমস্ত সূত্রের সাক্ষ্যের উপর নির্ভর করেই আমরা এই বিস্তৃত নরপতির ইতিহাস পুনর্গঠন করার চেষ্টা করব।

এখন আলোচনায় অগ্রসর হওয়া যাক।

## পূর্ব-ইতিহাস

আলাউদ্দীন হোসেন শাহ সৈয়দ বংশে জন্মগ্রহণ করেছিলেন। একথা তাঁর মুদ্রা ও শিলালিপিতে এবং সমস্ত প্রামাণিক সূত্রে পাওয়া যায়। তাঁর মুদ্রা ও শিলালিপি থেকে জানা যায়, তাঁর পিতার নাম সৈয়দ আশরফ অল-হোসেনী। কিন্তু তাঁর সিংহাসন লাভের আগেকার ইতিহাস সম্বন্ধে খুব বেশী সংবাদ পাওয়া যায় না। স্টুয়ার্টের মতে হোসেন আরবের মরুভূমি থেকে বাংলায় এসেছিলেন। রিয়াজ-রচয়িতা কোন এক ক্ষুদ্র পুস্তিকায় পেয়েছিলেন—হোসেন শাহ তাঁর পিতা আশরফ অল-হোসেনী ও ভ্রাতা যুসুফের সঙ্গে সুদূর তুর্কীস্তানের তারমুজ শহর থেকে বাংলায় এসে রাঢ়ের কাঁদপুর মৌজায় বসতি স্থাপন করেন ; সেখানকার কাজী তাঁদের দুই ভাইকে

১ ইনি দিসবনের *India House*-এর কার্যাব্যক্ষ ও গোমস্তা ছিলেন। এঁর বইয়ের রচনাকাল বোড়িশ শতাব্দীর মধ্যভাগ।

২ ইনি প্রাচ্যে পতুগীজ অধিকৃত অঞ্চলগুলির শাসনকর্তা আলবুকার্কের সেক্রেটারী ছিলেন এবং ১৫১৪ খ্রীষ্টাব্দে ভারতবর্ষে আসেন। এঁর বইয়ের রচনাকাল বোড়িশ শতাব্দীর প্রথম ভাগ।

৩ এঁর জীবনকাল ১৫৮১-১৬৪২ খ্রীঃ। এঁর বইয়ের প্রথম খণ্ড ১৬১৬ খ্রীষ্টাব্দে প্রকাশিত হয়।

শিকা দেন এবং তাঁর উচ্চ বংশমর্যাদার কথা জেনে তাঁর সঙ্গে নিজের কস্তার বিবাহ দেন। রাঢ়ের চাঁদপুর (নামান্তর চাঁদপাড়া) এবং তার আশ-পাশের বিভিন্ন গ্রামে হোসেন শাহের রাজত্বকালের প্রথম দিকের বহু শিলালিপি পাওয়া যায়। চাঁদপুর অঞ্চলের সঙ্গে তাঁর যোগাযোগ সম্বন্ধে ঐ অঞ্চলে ব্যাপক কিংবদন্তী প্রচলিত আছে। একটি বহুলপ্রচলিত কিংবদন্তী এই। বাল্যকালে সৈয়দ হোসেন চাঁদপুরের এক ব্রাহ্মণের বাড়ীতে রাখালের কাজ করতেন; বাংলার সুলতান হয়ে তিনি ঐ ব্রাহ্মণকে মাত্র এক আনা খাজনায় চাঁদপুর গ্রামখানি ভোগ করার অধিকার দেন। তার ফলে গ্রামটি আজও পর্যন্ত একানী চাঁদপুর বা একানী চাঁদপাড়া নামে পরিচিত। কিন্তু কিছুদিন পরে তাঁর বেগম ঐ ব্রাহ্মণের জাতি নষ্ট করার জন্ত তাঁকে পীড়াপীড়ি করতে থাকেন। তার ফলে ব্রাহ্মণ গরুর মাংস খেতে ও মুসলমান হতে বাধ্য হন। ‘রিয়াজ-উস-সলাতীনে’ উল্লিখিত ক্ষুদ্র পুস্তিকার বিবরণ, বাহমণী রাজ্যের প্রতিষ্ঠাতা হাসানের প্রথম জীবন সংক্রান্ত একটি সুপ্রচলিত কাহিনী এবং নীচে উল্লিখিত স্ববুদ্ধি রায়ের কাহিনীকে জোড়াতালি দিয়ে মিলিয়ে এই কিংবদন্তীর সৃষ্টি করা হয়েছে। এই জাতীয় কিংবদন্তী কখনই সম্পূর্ণ বিশ্বাসযোগ্য নয়। কিন্তু চাঁদপুর অঞ্চলের সঙ্গে হোসেন শাহের যে প্রথম জীবনে সম্পর্ক ছিল, সে সম্বন্ধে কোন সন্দেহ নেই।

ঐক্যদাস কবিরাজ তাঁর ‘চৈতন্যচরিতামৃত’ মধ্যলীলা ২৫শ পরিচ্ছেদে আলাউদ্দীন হোসেন শাহের পূর্বজীবন সম্বন্ধে একটি কাহিনী লিপিবদ্ধ করেছেন। কাহিনীটি এই। রাজা হবার অনেক আগে সৈয়দ হোসেন “গোড়-অধিকারী” (বাংলার রাজধানী গোড়ের ভারপ্রাপ্ত শাসনকর্তা—District Magistrate জাতীয়) স্ববুদ্ধি রায়ের অধীনে চাকরী করতেন। স্ববুদ্ধি রায় তাঁকে এক দীঘি কাটানোর কাজে নিয়োগ করেন এবং তাঁর কাজে ত্রুটি হওয়ায় তাঁকে চাবুক মারেন। পরে সৈয়দ হোসেন সুলতান হয়ে স্ববুদ্ধি রায়ের পদমর্যাদা অনেক বাড়িয়ে দেন। কিন্তু তাঁর স্ত্রী একদিন তাঁর দেহে চাবুকের দাগ আবিষ্কার করে স্ববুদ্ধি রায়ের চাবুক মারার কথা জানতে পারেন এবং স্ববুদ্ধি রায়ের প্রাণবধ করার জন্ত হোসেন শাহকে অনুরোধ করেন। সুলতান তাতে সম্মত না হওয়ায় তাঁর স্ত্রী স্ববুদ্ধি রায়ের জাতি নষ্ট করতে বলেন। হোসেন শাহ তাতেও প্রথমে অনিচ্ছা প্রকাশ করেছিলেন, কিন্তু স্ত্রীর নির্বন্ধাতিশয্যে অবশেষে তিনি স্ববুদ্ধি রায়ের মুখে তাঁর করোয়ার

(বধনার) জল দেওয়ার এবং এইভাবে তিনি সুবুদ্ধি রায়ের জাতি নাক্ষ করেন। কৃষ্ণদাস কবিরাজের উক্তি অবিকল উদ্ধৃত করছি,

পূর্বে যবে সুবুদ্ধি রায় ছিল গোড় অধিকারী।

হসন খাঁ সৈয়দ করে তাঁহার চাকরী ॥

দীঘি খোদাইতে তারে মনসাব কৈল।

ছিদ্র পাঞা রায় তারে চাবুক মারিল ॥

পাছে যবে হসন খাঁ গোড়ের রাজা হৈল।

সুবুদ্ধি রায়েরে তেঁহো বহ বাটাইল ॥

তাঁর জ্বী তাঁর অঙ্গে দেখে মারণের চিহ্নে।

সুবুদ্ধি রায়ের মারিবারে কহে রাজস্থানে ॥

রাজা কহে আমার পোষ্টা রায় হয় পিতা।

তাহারে মারিব আমি ভাল নহে কথা ॥

জ্বী কহে জাতি লহ যদি প্রাণে না মারিবে।

রাজা কহে জাতি নিলে ইহো নাহি জীব ॥

জ্বী মারিতে চাহে রাজা সঙ্কটে পড়িল।

করোয়ার পানি তার মুখে দেয়াইল ॥

কৃষ্ণদাস কবিরাজ প্রায় ১৫৩০ খ্রীষ্টাব্দে জন্মগ্রহণ করেন, প্রায় ১৫৫৫ খ্রীষ্টাব্দে বৃন্দাবনে যান এবং ১৬১২ খ্রীষ্টাব্দে 'চৈতন্যচরিতামৃত' গ্রন্থ সম্পূর্ণ করেন। কিন্তু তা সত্ত্বেও আলাউদ্দীন হোসেন শাহ সশস্ত্রে তাঁর প্রদত্ত এই বিবরণ মূল্যবান। কারণ কৃষ্ণদাস দীর্ঘকাল সনাতন ও রূপের সঙ্গ লাভ করেছিলেন। সনাতা ও রূপ দুজনেই হোসেন শাহের অমাত্য ছিলেন, সুলতানের সঙ্গে তাঁদের সম্পর্ক ছিল অত্যন্ত ঘনিষ্ঠ; সুবুদ্ধি রায়ের সঙ্গেও তাঁদের অন্তরঙ্গ পরিচয় ছিল ('চৈতন্যচরিতামৃত', মধ্যলীলা, ২৫শ পরিচ্ছেদ, ১৫২-১৬৫ সংখ্যক শ্লোক দ্রষ্টব্য)। কৃষ্ণদাস তাঁদেরই কাছে শুনে হোসেন শাহের প্রসঙ্গ লিপিবদ্ধ করছেন বলে মনে হয়। তাই তাঁর প্রদত্ত বিবরণের গুরুত্ব অবি-সংবাদিত। তাছাড়া যে সুবুদ্ধি রায় এই কাহিনীর নায়ক, তিনিও শেষ জীবনে বৃন্দাবনেই বাস করতেন। কৃষ্ণদাসের পক্ষে বৃন্দাবনে প্রথম এসে তাঁর সাক্ষাৎ লাভ করা ও তাঁরই কাছে এই কাহিনী শোনা কিছুমাত্র অসম্ভব নয়। আর যখন সুবুদ্ধি রায়ের সাক্ষাৎ যদি তিনি না-ও পেয়ে থাকেন, তাহলেও সুবুদ্ধি রায়ের সঙ্গে ঘনিষ্ঠভাবে পরিচিত বহু লোকের সাক্ষাৎ তিনি বৃন্দাবনে

পেয়েছিলেন সন্দেহ নেই। এই সব দিক দিয়ে বিচার করলে, কৃষ্ণদাস কবিরাজের এই বিবরণ বথার্থ বলেই গ্রহণ করা যেতে পারে।

ফিরিশতার মতে আলাউদ্দীন অর্থাৎ হোসেন শাহের পূর্ব-নাম ছিল “সৈয়দ শরীফ মকী”। এর থেকে ‘রিয়াজ’-রচয়িতা গোলাম হোসেন অনুমান করেছিলেন যে হোসেন শাহের পিতা মক্তার শরীফ ছিলেন। কিন্তু ফিরিশতার উক্তি বা গোলাম হোসেনের অনুমানের স্বপক্ষে কোন প্রমাণ নেই। কৃষ্ণদাস কবিরাজ স্পষ্টই লিখেছেন যে হোসেন শাহের পূর্ব-নাম ছিল “হুসন ( হোসেন ) খাঁ সৈয়দ”।

এখন এই প্রসঙ্গে আর একটি বিবরণীর বিচার করা দরকার। পতুগীজ ইতিহাসিক জোআঁ-দে-বারোস তাঁর ‘দা এশিয়া’ গ্রন্থে লিখেছেন যে পতুগীজদের চট্টগ্রামে আগমনের একশো বছর আগে কোন এক সম্রাটবংশীয় আরব বণিক অদন ( এডেন ) থেকে ২০০ জন লোক সঙ্গে নিয়ে বাংলায় আসেন। রাজ্যের অবস্থা দেখে তিনি এই রাজ্য জয়ের পরিকল্পনা করতে থাকেন। নিজের উদ্দেশ্য গোপন করে তিনি ব্যবসায়ী বলে নিজের পরিচয় দেন এবং এই অঞ্চলায় দেশ থেকে আরও ৩০০ জন আরবকে আনিয়াে নিজের দল ভারী করেন। তখন মন্দারিজরা (?) ঐ স্থানের শাসনকর্তা ছিল। তাদের প্রভাবে তিনি বাংলার রাজার সঙ্গে পরিচিত হতে সমর্থ হন। ঐ সময়ে গৌড় ছিল বাংলার রাজধানী। ঐ আরব বণিক বাংলার রাজাকে তাঁর বংশগত শত্রু উড়িষ্যার রাজাকে দমন করতে সাহায্য করেন। এই সাহায্যের জন্য তিনি রাজার দেহরক্ষি-দলের অধ্যক্ষের পদে উন্নীত হন। কিছুদিন পরেই বাংলার রাজাকে বধ করে তিনি নিজে সিংহাসনে আরোহণ করেন। ( JASB, 1873, Pt. I, p. 217 প্রটব্য )

অনেকের মতে এই কাহিনীতে আলাউদ্দীন হোসেন শাহের কথাই বলা হয়েছে, অর্থাৎ ঐ আরব বণিক হোসেন শাহ। কিন্তু এই মত স্বীকার

\* ঢাকা বিশ্ববিদ্যালয়ের কর্মী জনাব রুহুল আমিন আমাকে এক চিঠিতে লিখেছেন যে মন্দারী বা মন্দারী নামে পরিচিত মুকী মতাবলম্বী মুসলমানরা এক সময়ে দক্ষিণ-পূর্ব বঙ্গের মাহ-মুদাখাদ অঞ্চলের শাসনকর্তা ছিলেন। এই অঞ্চলের “মন্দারীটোলা” নামে একটি মৌজা এদেরই দ্বারা বহন করত। জনাব আমিনের মতে জোআঁ-দে-বারোস “মন্দারিজ” বলতে মন্দারীদের বুঝিয়েছেন। তিনি আরও মনে করেন যে জোআঁ-দে-বারোস বর্ণিত এই কাহিনীর একটা ইতিহাসিক ভিত্তি আছে, “তবে সেই আরব বণিক আলাউদ্দীন হোসেন শাহ নন।”

করা যায় না। কারণ প্রথমত, জোঁতা-দে-বারোস লিখেছেন যে এই ঘটনা পতুগীজেরা চট্টগ্রামে আসার একশো বছর আগে ঘটেছিল, আর হোসেন শাহ চট্টগ্রামে পতুগীজদের প্রথম আসার সময়েই (১৫১৭ খ্রিঃ) সিংহাসনে উপবিষ্ট ছিলেন। তাঁর পুত্র গিয়াহুদ্দীন মাহমুদ শাহের রাজত্বকালে পতুগীজেরা চট্টগ্রামে কুঠি ও গুদগৃহ স্থাপন করে। দ্বিতীয়ত, হোসেন শাহের পূর্ববর্তী রাজা মুজাফফর শাহের রাজত্বকাল মাত্র দু'বছরের মত। এই অল্প সময়ের মধ্যে তিনি উড়িষ্যার রাজাকে দমন করেছিলেন বলে প্রমাণ পাওয়া যায় না। উড়িষ্যারাজ তাঁর বংশগত শত্রুও নন। তৃতীয়ত, জোঁতা-দে-বারোসের বিবরণী হোসেন শাহ সম্বন্ধে প্রযুক্ত ও অসঙ্গত বলে স্বীকার করলে কৃষ্ণদাস কবিরাজের উক্তির সঙ্গে তার বিরোধ ঘটে। হোসেন শাহের সম্বন্ধে কৃষ্ণদাস কবিরাজের উক্তি বেশী প্রামাণিক, কারণ কৃষ্ণদাস হোসেন শাহের কয়েকজন বিশিষ্ট অমাত্যের অন্তরঙ্গ সান্নিধ্য লাভ করেছিলেন; তাছাড়া কৃষ্ণদাস কবিরাজ ষোড়শ শতাব্দীর প্রথম দিকে বাংলাদেশে জন্মগ্রহণ করেছিলেন এবং যৌবনকাল অবধি তিনি এদেশেই ছিলেন। কৃষ্ণদাস কবিরাজ লিখেছেন যে হোসেন শাহ সিংহাসনে আরোহণের আগে সাধারণ ব্যক্তি ছিলেন এবং গোড়-শহরের ভারপ্রাপ্ত শাসনকর্তা স্ববুদ্ধি রায়ের অধীনে তিনি সামান্য চাকরী করতেন। কৃষ্ণদাস কবিরাজের বিবরণ থেকে স্পষ্ট বোঝা যায় যে, সিংহাসনে আরোহণের বছরদিন আগে থাকতেই হোসেন বাংলাদেশে ছিলেন। সম্ভ্রান্তবংশীয় আরব বণিক হোসেন শাহের লোকজন নিয়ে এদেশে আসা, ব্যবসায়ী বলে নিজের পরিচয় দিয়ে রাজ্যজয়ের চেষ্টা করা, মন্সারিজ(?)দের সাহায্যে বাংলাদেশের রাজার সঙ্গে পরিচিত হওয়া এবং কিছুদিনের মধ্যেই বাংলার সিংহাসন অধিকার করা—প্রভৃতি বিষয়ের সঙ্গে কৃষ্ণদাস কবিরাজের উক্তির কোন সারঞ্জমই করা যায় না। অথচ কৃষ্ণদাস কবিরাজের সাক্ষ্যকে উড়িয়ে দেবার কোন উপায়ই নেই।

জোঁতা-দে-বারোস যে আরব বণিকের কথা বলেছেন, তাঁর ঐতিহাসিকতা সম্বন্ধেও নিঃসন্দেহ হওয়া যায় না। জোঁতা-দে-বারোস হোসেন শাহের পূর্ববর্তী কোন গোড়-সুলতানের সিংহাসন লাভ সম্বন্ধে একটি (সম্ভবত কাল্পনিক) জনশ্রুতি শুনে সেটিকে এইভাবে লিপিবদ্ধ করেছেন। জোঁতা-দে-বারোস কোনদিন বাংলাদেশে আসেন নি, সুতরাং তাঁর সংগ্রহ করা এই জনশ্রুতির

বিশেষ কোন মূল্য নেই এবং হোসেন শাহের সঙ্গে এই জনশ্রুতির কোনই সম্পর্ক নেই।

সুতরাং হোসেন শাহ যে আসলে কোথাকার লোক ছিলেন, সে বিষয়ে নিশ্চিতভাবে কোন সিদ্ধান্ত করার উপায় দেখা যাচ্ছে না। তবে তিনি যে বাইরে থেকেই এসেছিলেন, একথা বলার অর্পক্ষে কোনই প্রমাণ নেই। এমনও হতে পারে, তিনি বাংলাদেশেরই লোক ছিলেন। ফ্রান্সিস বুকানন রংপুর জেলার যে বিবরণ দিয়েছেন, তাতে তিনি লিখেছেন যে হোসেন রংপুরের বোদা বিভাগের দেবনগর গ্রামে জন্মগ্রহণ করেন (Martin's Eastern India, Vol. III, p. 448 দ্রষ্টব্য)। রামপ্রাণ গুপ্ত লিখেছেন, “তঁাহার (হোসেনের) মাতা হিন্দু ছিলেন, এরূপ জনপ্রবাদও বিরল নহে।” (রিয়াজ-উল-সলাতীন, বাংলা অম্লবাদ, পৃ: ১২৩, পাদটীকা)

হোসেন শাহ আরব বা তুর্কীস্তান থেকে বাংলায় এসেছিলেন বলে আমার মনে হয় না। তাঁর গাত্রবর্ণ সন্ধ্যা প্রাচীন বাংলা সাহিত্য থেকে যে আভাস পাই, তাতে তাঁকে ঐসব অঞ্চলের লোক বলে মনে হয় না। ‘চৈতন্যচরিতামৃত’ের মধ্যলীলা ১৫শ পরিচ্ছেদে লেখা আছে যে একদিন “শেখ রাজা” হোসেন শাহের চিকিৎসক মুকুন্দ যখন তাঁর চিকিৎসা করছিলেন, তখন রাজার মাথার উপরে একজন ভৃত্য ময়ূরপুচ্ছের পাখা ধরলে মুকুন্দ কৃষ্ণকে স্মরণ করে প্রেমাবেশে মুহিত হয়ে পড়েন। এর থেকে ডঃ জুহুমার সেন অনুমান করেছেন, “হোসেন শাহার রঙ খুব কালো ছিল। তাই মাথার উপরে ময়ূরপুচ্ছের পাখা ধরিতেই মুকুন্দের কৃষ্ণস্মৃতিজনিত ভাববিহ্বলতা আসিয়াছিল।” কবীন্দ্র পরমেশ্বর তাঁর মহাভারতে হোসেন শাহ সন্ধ্যা লিখেছেন,

নৃপতি হোসেন শাহ হএ মহামতি।

পঞ্চম গোড়িত বার পরম সখ্যাতি ॥

অদ্বৈতশ্রেয়স্পতি মহিমা অপার।

কলিকালে হৈব (হৈল ?) যেন কৃষ্ণ অবতার ॥

এই প্রশস্তিতে কবি হোসেন শাহকে কৃষ্ণ অবতারের সঙ্গে তুলনা করেছেন, এর থেকেও মনে হয়, হোসেন শাহের গায়ের রং কালো ছিল। কিন্তু আরব বা তুর্কীস্তানের লোকেরা কালো হয় না, ফরশা হয়।

এই সমস্ত বিষয় থেকে আমাদের মনে হয়, হোসেন শাহ আরব বা তুর্কীস্তান বা বাইরের অল্প কোন অঞ্চল থেকে এদেশে আসেন নি। তিনি আসলে ছিলেন বাংলাদেশেরই সম্ভান এবং অল্প বহু বাঙালীর মত তাঁরও গাঢ়চর্ম ছিল কৃষ্ণবর্ণ। অবশ্য এটা আমাদের অসুমান মাত্র। কিন্তু এর বিপক্ষেও কোন প্রমাণ নেই। এখানে বিশেষ উল্লেখযোগ্য, বাবর তাঁর আত্মকাহিনীতে তাঁর সমসাময়িক বাংলার রাজা এবং হোসেন শাহের পুত্র নসরৎ শাহকে “নসরৎ শাহ বঙ্গালী” নামে অভিহিত করেছেন। এতদিন পর্যন্ত গবেষকরা হোসেন শাহ ও নসরৎ শাহ অবাঙালী ছিলেন এই বদ্ধমূল ধারণার বশবর্তী হয়ে বাবর “বঙ্গালী” অর্থে ‘বাংলাদেশের রাজা’ বুঝিয়েছেন বলে মনে করেছিলেন। কিন্তু এখন পুর্নোন্নিখিত বিষয়গুলি থেকে মনে হয় বাবরের উক্তিকে আক্ষরিক অর্থেই গ্রহণ করা উচিত। হোসেন শাহ ও নসরৎ শাহ সত্যি সত্যিই “বঙ্গালী” ছিলেন না, একথা মনে করবার কোন কারণ নেই।

এখানে প্রশ্ন উঠতে পারে হোসেন শাহ যদি বাঙালীই ছিলেন, তাহলে তিনি আরব বা তুর্কীস্তান বা বাইরের আর কোন অঞ্চল থেকে এসেছিলেন, এরকম প্রবাদ রটল কেন? তাঁর কারণ সম্বন্ধে আমার যা মনে হয়, তা সংক্ষেপে বলছি। হোসেন শাহ সৈয়দবংশীয় ছিলেন। সৈয়দরা হজরৎ মুহম্মদের বংশধর বলে পরিচিত। সুতরাং যিনিই সৈয়দ হবেন, তিনিই আরব বা আশপাশের কোন অঞ্চল থেকে আসবেন, পরবর্তী কালের লোকের মনে এই ধারণা গড়ে উঠেছিল। কিন্তু সৈয়দ বংশের লোকরা অন্ততপক্ষে ত্রয়োদশ শতাব্দী থেকে বাংলায় আসা শুরু করেছিলেন। তাঁরা এদেশের মেয়ে বিবাহ করতেন এবং নিজেদের ছেলে-মেয়েদের এদেশের মেয়ে ও ছেলেদের সঙ্গে বিবাহ দিতেন। তাঁদের বংশধররা দুই শতাব্দীর মধ্যে সম্পূর্ণভাবে এদেশের লোক হয়ে গিয়েছিলেন। পঞ্চদশ শতাব্দীর শেষ পাদে রচিত বিজয় গুপ্তের মনসামঙ্গল ও বিপ্রদাসের মনসামঙ্গলের হাসন-হোসেন পালা পড়লে বোঝা যায়, ঐ সময়ে বাংলা দেশে বহু সৈয়দ বাস করতেন। হোসেন শাহও বোধহয় এই রকমই একজন সৈয়দ। তাঁর পূর্বজীবন-সংক্রান্ত তথ্য এই ধারণারই অল্পকূল। যে সমস্ত সৈয়দ দু' এক পুরুষের মধ্যে বাইরে থেকে বাংলায় এসেছিলেন, তাঁদের খাতির এদেশে স্বতন্ত্র ধরনের ছিল বলে মনে হয়। হোসেন এই শ্রেণীভুক্ত হলে তাঁকে “কাফের” স্ৰবুদ্দি রায়ের অধীনে সামান্য চাকরী করা, দীর্ঘ কাটা এবং স্ৰবুদ্দি রায়ের কাছে চাবুক খাওয়ার হীনতা স্বীকার করতে

হত বলে বোধ হয় না। সেই জন্তে আমার মনে হয়, হোসেন শাহ বাইরে থেকে বাংলায় আসেন নি, তিনি বাঙালীই ছিলেন। এদেশের লোক হওয়ার ফলেই বোধহয় তাঁর পক্ষে হাবশী মুজাক্কফর শাহের বিরুদ্ধে দল গঠন করা এবং তাঁকে উচ্ছেদ করা সম্ভব হয়েছিল।

যাহোক, হোসেন শাহের পূর্ব-পরিচয় ও প্রথম জীবন সম্বন্ধে এই তিনটি তথ্য নিশ্চিতভাবে জানা যায়,

(১) তিনি সৈয়দ বংশে জন্মগ্রহণ করেছিলেন এবং তাঁর পিতার নাম সৈয়দ আশরাফ আল-হোসেনী।

(২) রাতের চাঁদপুর অঞ্চলে তাঁর প্রথম জীবনের কিছু সময় কেটেছিল।

(৩) তিনি গোড়ের শাসনকর্তা বা “অধিকারী” সুবুদ্দি রায়ের অধীনে কিছুদিন চাকরী করেছিলেন। সুবুদ্দি রায় তাঁকে দীঘি কাটাবার ভার দিয়েছিলেন এবং তাঁর কাজে গাফিলতি হওয়ায় সুবুদ্দি রায় তাঁকে চাবুক মেরেছিলেন।

হোসেন শাহের পিতা ভিন্ন আর কোন পূর্বপুরুষের নাম এ পর্যন্ত জানা যায় নি। ফ্রান্সিস বুকাননের মতে হোসেন শাহের পিতামহের নাম ছিল সুলতান ইব্রাহিম; তিনি বাংলার সুলতান ছিলেন, গণেশের পুত্র জলালুদ্দীন তাঁকে যুদ্ধে পরাজিত ও নিহত করে তাঁর রাজ্য কেড়ে নেন; অতঃপর ইব্রাহিমের পন্নিবার কামতাপুর রাজ্যে আশ্রয় গ্রহণ করে; এর ৭৬ বছর পরে তাঁর পৌত্র হোসেন আবার পূর্বপুরুষের রাজ্য পুনরুদ্ধার করেন। (Martin's Eastern India, Vol. III, p. 448 ত্রঃ)। কিন্তু এই সব কথা সম্পূর্ণ অমূলক। প্রথমত, যে সুলতান ইব্রাহিমের সঙ্গে জলালুদ্দীনের সংঘর্ষ বেধেছিল, তিনি বাংলার সুলতান নন, জৌনপুরের সুলতান এবং তিনি সৈয়দবংশীয় নন। দ্বিতীয়ত, এই সুলতান ইব্রাহিম জলালুদ্দীনের সঙ্গে পরাজিত ও নিহত হন নি, তিনি জলালুদ্দীনের সঙ্গে সংঘর্ষের, এমন কি জলালুদ্দীনের মৃত্যুর পরেও জীবিত ও সিংহাসনে অধিষ্ঠিত ছিলেন। তৃতীয়ত, চতুর্দশ শতাব্দীর শেষ দিকে বা পঞ্চদশ শতাব্দীর প্রথম দিকে (হোসেন শাহের পিতামহের সম্ভাব্য সময়) বাংলার সুলতানদের মধ্যে কারও নামই ইব্রাহিম ছিল বলে জানা যায় না। অতএব সুলতান ইব্রাহিম নামক কোন ব্যক্তি হোসেন শাহের পিতামহ ছিলেন না, সে বিষয়ে কোন সন্দেহ নেই।



### সিংহাসন লাভের আগে

সিংহাসন অধিকারের আগে যে সৈয়দ হোসেন শেখ হাবশী সুলতান মুজাফফর শাহের উজীর ছিলেন, একথা বিভিন্ন ফার্সী বিবরণীতে পাওয়া যায়। এই উক্তিকে সত্য বলেই যেনে নেওয়া যেতে পারে, কারণ যার তার পক্ষে অল্প সময়ের মধ্যে বাংলার সিংহাসন অধিকার করা এবং সর্বসাধারণের কাছে, বিশেষত শক্তিশালী অমাত্যদের কাছে রাজা হিসাবে স্বীকৃতি লাভ করা সম্ভব নয়। 'ফিরিশ্তা' ও 'রিয়াজ'-এ লেখা আছে সৈয়দ হোসেনের পরামর্শেই মুজাফফর শাহ সৈয়দদের বেতন কমিয়ে দিয়ে রাজকোষে প্রদৃত্ত অর্থ সঞ্চয় করতে সমর্থ হন। এইভাবে হোসেন অর্থলোভী মুজাফফরের সন্তোষ ও আস্থা অর্জন করেন। এই দুই বইয়ে এও লেখা হয়েছে যে, রাজস্ব সংগ্রহের জন্তু মুজাফফর শাহ প্রজাদের উপর ঘোরতর অত্যাচার করেন। এ কাজও তিনি সৈয়দ হোসেনের পরামর্শে করেছিলেন কিনা, তা স্পষ্টভাবে বোঝা যায় না। মুজাফফর শাহকে সকলের বিরাগভাজন করে নিজের ক্ষমতা-লাভের পথ প্রশস্ত করবার জন্তু এরকম পরামর্শ দেওয়া হোসেনের পক্ষে অসম্ভব নয়। হোসেন ছিলেন কুশাগ্রবুদ্ধি রাজনীতিক আর মুজাফফর শাহ সম্ভবত ছিলেন স্বল্পবুদ্ধি ও অনভিজ্ঞ প্রকৃতির লোক।

'তবকাৎ-ই-আকবরী', 'মাসির-ই-রহিমী', 'তারিখ-ই-ফিরিশ্তা' ও 'রিয়াজ-উল-সলাতীন'-এ মুজাফফর শাহকে ঘোরতর অত্যাচারী রূপে চিত্রিত করা হয়েছে। কিন্তু তাঁর অত্যাচারের যে বিবরণ এই সমস্ত বইয়ে দেওয়া হয়েছে, তার সবটাই সত্য কিনা বলা শক্ত। এইসব বইতে মুজাফফর শাহকে যে এই রকম একজন ঘৃণিত অত্যাচারী বলে বর্ণনা করা হয়েছে, এর মূলে হয় তো রয়েছে হোসেন শাহ ও তাঁর পক্ষের লোকদের প্রচার। সর্বদেশ ও সর্বকালের ইতিহাসে দেখা যায়, যিনি কোন রাজাকে উচ্ছেদ করে সিংহাসন অবরোধন করেন, তিনি পূর্ববর্তী রাজার বিরুদ্ধে কলঙ্ক রটান এবং কালক্রমে তা'ই ইতিহাসে স্থান পায়। ইংলণ্ডের ইতিহাসে তৃতীয় রিচার্ডের বেলায় এরকম হয়েছে। অবশ্য মুজাফফর শাহও তাঁর প্রভুকে বধ করে রাজা হয়েছিলেন। সুতরাং তিনি যে মহাপুরুষ প্রকৃতির লোক ছিলেন না, তা বলাই বাহুল্য। আমাদের বক্তব্য এই যে তাঁকে যতটা অত্যাচারী বলে বর্ণনা করা হয়েছে, তার সবটাই বোধহয় সত্য নয়। 'তারিখ-ফিরিশ্তা' ও 'রিয়াজ-উল-সলাতীন'-এর মতে হোসেন যে সময় মুজাফফর শাহের উজীর ছিলেন, তখনই

সকলের মনে মুজাফফর শাহ সম্বন্ধে বিরূপ মনোভাব জাগিয়ে তোলার জন্য প্রচার চালাতেন। এই দুই বইয়ের মতে উজীর থাকার সময় হোসেন জনসাধারণের সঙ্গে সময় ব্যবহার করতেন এবং তাঁদের কাছে নিজেদের খুব ভাল লোক বলে প্রতিপন্ন করবার চেষ্টা করতেন। তিনি নাকি তাদের বলতেন ( ফিরিশ্তার ভাষায় ) “মুজাফফর শাহ অত্যন্ত নীচ ও রূপণ প্রকৃতির লোক। যদিও আমি তাঁকে সৈন্যদের প্রতি উদার ব্যবহার করতে পরামর্শ দিই, তাতে ফল হয় না। সব সময়ে তিনি ধন সঞ্চয়ে ব্যস্ত।” অথবা ( রিয়াজের ভাষায় ) “মুজাফফর শাহ অত্যন্ত নিষ্ঠুর, তাঁর ব্যবহার কর্কশ। যদিও আমি তাঁকে সৈন্য ও অমাত্যদের সুখস্বচ্ছন্দ্য বিধান করতে ও মন্দ কাজ থেকে বিরত থাকতে পরামর্শ দিই, তাতে কোনই ফল হয় না। তাঁর খোঁক খালি অর্থসংগ্রহের দিকে।” এই জাতীয় কথা যদি তিনি সত্যই বলে থাকেন, তাহলে তাঁর সততা ও সরলতা সম্বন্ধে সকলেরই সন্দেহ জাগতে বাধ্য। একদিকে সৈন্যদের বেতন কমানোর জন্য মুজাফফর শাহকে পরামর্শ দেওয়া, অপরদিকে বিশেষভাবে সৈন্য ও অমাত্যদের কথা উল্লেখ করে সাধারণের কাছে এই সব উক্তি করা—এর থেকে সহজেই বোঝা যায় যে হোসেন কতবড় কূটনীতিজ্ঞ ছিলেন। এই সব বিবরণ সম্পূর্ণ সত্য হোক বা না হোক, মন্ত্রী থাকার সময় হোসেন যে তাঁর প্রভুর বিরুদ্ধে গভীর বড়বড় লিপ্ত ছিলেন, তাঁকে সকলের বিরাগভাজন করে তোলার জন্য সব সময় প্রচার করতেন এবং সৈন্য ও অমাত্যদের দলে টানবার চেষ্টা করতেন, তাতে সন্দেহের অবকাশ নাই। বলা বাহুল্য, তাঁর এই আচরণ বিশেষ প্রশংসনীয় নয়। অবশ্য প্রভুহস্তা মুজাফফর শাহের বিরুদ্ধে হোসেনের এই বড়বড় “শঠে শঠাং সমাচরয়েং” নীতির অঙ্গসরণ বলেই স্বমার্হ। ফিরিশ্তার মতে আমীরেরা তাঁকে সদয় ও বন্ধুত্বাপন্ন বলে মনে করে নিজেদের নেতৃত্বে বরণ করেন। ফিরিশ্তা ও গোলাম হোসেন প্রধানত মুহম্মদ বন্দাহারীর উক্তির উপর নির্ভর করে লিখেছেন যে মুজাফফর শাহের অত্যাচারের ফলে পরিণামে অধিকাংশ অমাত্যই তাঁকে পরিত্যাগ করেন এবং হোসেনের নেতৃত্বে তাঁরা মুজাফফর শাহের সঙ্গে যুদ্ধ করে তাঁকে পরাজিত ও নিহত করেন। কিন্তু ‘ফিরিশ্তা’ ও ‘রিয়াজ’-এই লেখা আছে যে হাজারী মুহম্মদ বন্দাহারীর মতে দীর্ঘ চার মাস ধরে দুই পক্ষের মধ্যে যুদ্ধ চলেছিল এবং বহু লোক হতাহত হয়েছিল, শেষ যুদ্ধে এক লক্ষ কুড়ি হাজার লোক নিহত হয়েছিল।

হুতরাং মুজাক্কর শাহের পক্ষেও যে বিরাট সংখ্যক লোক ছিল, তা বোঝা যায়।

‘তবকাৎ-ই-আকবরী’তে হোসেনের প্রভুত্বা ব্যাপারটিকে যেভাবে বর্ণনা করা হয়েছে, তার মধ্যে গৌরবজনক কিছু নেই। এতে বলা হয়েছে হোসেন পাইকদের সর্দারকে ঘুস দিয়ে হাত করে কয়েকজন অল্পচর সঙ্গে নিয়ে মুজাক্কর শাহের অন্তঃপুরে ঢুকে তাঁকে হত্যা করেন। ‘মাসির-ই-রহিমী’তেও এই কথা লেখা আছে।

‘তারিখ-ই-ফিরিশ্তা’ ও ‘রিয়াজ-উস-সলাতীন’ লেখা আছে যে মুজাক্কর শাহের মৃত্যুর পরে প্রধান অমাত্যেরা নতুন রাজা নির্বাচনের জন্ত পরিশ্রম আহ্বান করেন। সেখানে সকলে সমবেত হন। তাঁরা হোসেনকেই রাজা হিসাবে নির্বাচন করেন। একথায় অবিশ্বাস করার কিছু নেই। বাংলার ইতিহাসে হিন্দু-বৌদ্ধযুগে রাজবংশের সম্মান না হয়েও অমাত্যদের দ্বারা নির্বাচিত হয়ে সিংহাসন লাভ করেছিলেন পালবংশের প্রতিষ্ঠাতা গোপালদেব। মুসলিম যুগে এই সম্মান লাভ করেছিলেন সৈয়দুল্লাহ ফিরোজ শাহ এবং আলাউদ্দীন হোসেন শাহ। কিন্তু ফিরিশ্তা ও ‘রিয়াজ’ের কথা বিশ্বাস করলে বলতে হয়, অমাত্যেরা স্বতঃপ্রণোদিত হয়ে হোসেনকে রাজা হিসাবে নির্বাচন করেন নি, তিনি তাঁদের গোড় নগরীর মাটির উপরের সমস্ত ধ্বংসাবশেষ লোভ দেখালে তবেই তাঁরা তাঁকে রাজপদে অভিষিক্ত করতে রাজী হয়েছিলেন।

সিংহাসনে আরোহণের সময় যে হোসেন শাহ প্রবীণ বয়সে উপনীত হয়েছিলেন, তাতে কোন সন্দেহ নেই। কারণ এর মাত্র দু’ বছর পরে ১৪২৫ খ্রীষ্টাব্দে যখন সিকন্দর শাহ লোদী হোসেন শাহের রাজ্য আক্রমণ করেছিলেন, তখন হোসেন শাহের যে সৈন্যবাহিনী তাঁকে বাধা দেবার জন্ত প্রেরিত হয়েছিল, তার নেতৃত্ব করেছিলেন হোসেন শাহের অন্ততম পুত্র দানিয়েল। দানিয়েল ঐ সময়ে সৈন্যবাহিনী পরিচালনা করার মত বয়সে উপনীত হয়েছিলেন, এর থেকে তাঁর পিতা হোসেন শাহের বয়সও সহজেই অনুমান করা যায়।

### সিংহাসনে আরোহণের তারিখ

আলাউদ্দীন হোসেন শাহ যে ৮২২ হিজরার সিংহাসনে আরোহণ করেছিলেন, তাতে কোন সন্দেহ নেই, কারণ ৮২২ হিঃ থেকে তাঁর মৃত্যু ও শিলালিপি পাওয়া যায়। ৮২২ হিজরা ১৪২৩ খ্রীষ্টাব্দের ১২ই অক্টোবর থেকে

স্বরূপ হয়েছিল। কিন্তু আলাউদ্দীন হোসেন শাহের পূর্ববর্তী সুলতান মুজাফফর শাহের পাওয়া শিলালিপির তারিখ ১৭ই রমজান, ৮২৮ হিজরা বা ২রা জুলাই, ১৪২০ খ্রীষ্টাব্দ। মুজাফফর শাহের ৮২২ হিজরার মুদ্রা পাওয়া গিয়েছে। সুতরাং মুজাফফর শাহ যে ১৪২০ খ্রীঃর ১২ই অক্টোবরের পরেও কিছু সময় রাজত্ব করেছিলেন, তাতে কোন সন্দেহ নেই। হোসেন শাহের প্রথম শিলালিপির তারিখ ১০ই জিব্বদ, ৮২৯ হিজরা বা ১৩ই আগস্ট, ১৪২৪ খ্রীঃ। ঐ তারিখের অন্তত একমাস আগে হোসেন শাহ সিংহাসনে বসেছিলেন সন্দেহ নেই। সুতরাং ১৪২০ খ্রীঃর নভেম্বর থেকে স্বরূপ করে ১৪২৪ খ্রীঃর জুলাই—এই নয় মাসের মধ্যে কোন এক সময়ে হোসেন শাহমুজাফফর শাহকে বধ করে সিংহাসনে আরোহণ করেন বলে সিদ্ধান্ত করা যায়।

এখানে বিশেষ উল্লেখযোগ্য, সপ্তদশ শতাব্দীর দ্বিতীয়ার্ধের আগে রচিত সমস্ত ইতিহাসগ্রন্থে এই নৃপতি শুধুমাত্র ‘আলাউদ্দীন’ নামে উল্লিখিত হয়েছেন, পক্ষান্তরে বাংলা সাহিত্য ও বাংলা দেশের বিভিন্ন কিংবদন্তীতে ইনি কেবলমাত্র ‘হোসেন শাহ’ নামে উল্লিখিত হয়েছেন। ১৬৬২-৬৩ খ্রীষ্টাব্দে রচিত শিহাবুদ্দীন তালিশের ‘কতিয়াহ্-ই-ইব্রিয়াহ্’ বই এবং তার কিছু পরে রচিত মীর্জা মুহম্মদ কাজিমের ‘আলমগীরনামা’ বইয়ে ‘হোসেন শাহ’ নাম পাওয়া যায়। ‘রিয়াজ-উস-সলাতীনে’র লেখক শিলালিপির সাক্ষ্য উদ্ধৃত করে প্রমাণ করেন যে এই রাজার ‘হোসেন শাহ’ নাম ছিল। মুদ্রা ও শিলালিপিতে দেখা যায়, এই রাজার পূর্ণ রাজকীয় নাম ‘আলা-উদ্-দুনিয়া ওয়া-দ-দীন আবুল-মুজাফফর হোসেন শাহ’।

### সিংহাসন লাভের পরে

সিংহাসন লাভের পরে হোসেন শাহের প্রথম লক্ষ্য হল নিজেকে স্বপ্রতিষ্ঠিত করা, প্রজাদের আস্থা অর্জন করা, দেশে শান্তি ও শৃঙ্খলা পুনঃস্থাপন করা এবং ভালভাবে দেশ শাসন করা। এ কাজ কঠিন হলেও তাঁর মত প্রবীণ, অভিজ্ঞ এবং রাজনীতিকুশল নরপতির পক্ষে অসাধ্য নয়। মুজাফফর শাহের উজীর থাকবার সময়ই তিনি শাসনদক্ষতার জন্ত বশ ও জনপ্রিয়তা অর্জন করেছিলেন। রাজ্যের বা কিছু ভালো, তার জন্ত কৃতিত্ব তাঁরই এবং বা কিছু খারাপ, তার জন্ত দায়ী মুজাফফর শাহ—সকলের মনে তিনি এরকম ধারণা জন্মিয়ে দিতে সক্ষম হয়েছিলেন—‘কিরিশ্তা’ ও ‘রিয়াজ’-এর বর্ণনা পড়ে এই কথাই মনে হয়।

সুতরাং তাঁর উপর প্রথম থেকেই প্রজাদের আস্থা ছিল। সুলতান হিসাবে তিনি অধিকতর শাসনদক্ষতা দেখাবেন এই বিশ্বাসে দেশের জনসাধারণ তাঁকে সাগ্রহে স্বাগত জানিয়েছিল বলে মনে হয়।

‘তারিখ-ই-ফিরিশ্তা’ ও ‘রিয়াজ-উল-সলাতীনে’ হোসেন শাহের সিংহাসনে আরোহণ ও তার অব্যবহিত পরবর্তী কার্যকলাপের যে বিবরণ পাওয়া যায়, তার সারমর্ম নীচে দেওয়া হল।

যেদিন মুজাফফর শাহ নিহত হলেন, সেদিন অমাত্যেরা রাজা নির্বাচনের জন্য একটি পরিষৎ আহ্বান করলেন এবং সৈয়দ হোসেনের নির্বাচন সম্বন্ধে অসুস্থ মনোভাব প্রদর্শন করে বললেন, “আমরা যদি আপনাকে রাজা হিসাবে নির্বাচন করি, তাহলে আপনি আমাদের সঙ্গে কী ব্যবহার করবেন?” হোসেন বললেন, “আপনাদের সব ইচ্ছা আমি পূরণ করব। গোড় শহরে মাটির উপরে যা কিছু পাওয়া যাবে, সঙ্গে সঙ্গে তা আমি আপনাদের দেব; কিন্তু মাটির নীচে যা আছে, সব আমি নিজে নেব।” তখন সমস্ত সম্ভ্রান্ত ও সাধারণ লোক এই প্রলোভনজনক প্রস্তাবে রাজী হয়ে ধনের লোভে তাঁর বশতা স্বীকার করলেন এবং ঐশ্বর্য ও সমৃদ্ধির দিক দিয়ে যা এই সময় কার্যরোকেও অতিক্রম করেছিল, সেই গোড় নগরী লুণ্ঠ করতে লাগলেন। গোড়ের সিংহাসনে আরোহণ করার কয়েক দিন পরে হোসেন শাহ তাঁদের লুণ্ঠ বন্ধ করতে বললেন। কিন্তু তাঁরা বন্ধ না করাতে তিনি বারো হাজার লুণ্ঠনকারীকে বধ করলেন। তখন অস্ত্রেরা লুণ্ঠ বন্ধ করল। কিন্তু গোড়ের মাটির নীচের সম্পত্তি নিজে লুণ্ঠ করে নিতে তিনি ছাড়লেন না। তিনি অসুস্থকান করে তের শো সোনার থালা সমেত বহু গুপ্তধন পেলেন। তখনকার দিনে বাংলার ধনী লোকেরা সোনার থালায় খেতেন এবং উৎসবের দিনে যিনি যত বেশী সোনার থালা বার করতেন, তিনিই বেশী মর্যাদা লাভ করতেন। গোড়ের এই জাতীয় বহু ধনী ব্যক্তির এতগুলি সোনার থালা এখন হোসেন শাহ হস্তগত করলেন।

এই সব বিবরণ পড়লে মনে হয় হোসেন শাহ নানা রকম জুর কুটনীতি, হীন চাতুরী এবং বিশ্বাসঘাতকতা ও প্রতিশ্রুতিভঙ্গের মধ্য দিয়ে রাজা হয়েছিলেন ও নিজেকে প্রতিষ্ঠিত করেছিলেন।

‘তবকাৎ-ই-আকবরী’, ‘তারিখ-ই-ফিরিশ্তা’ এবং ‘রিয়াজ-উল-সলাতীনে’ লেখা আছে যে হোসেন রাজা হয়ে অল্প সময়ের মধ্যেই রাজ্যে পরিপূর্ণ শান্তি ও শৃঙ্খলা প্রতিষ্ঠা করেন। পাইকরা বহু রাজাকে হত্যা করেছিল। পাইকদের

উপরে প্রাসাদ-রক্ষার ভার না রেখে তিনি অস্ত্র রক্ষি-দল নিযুক্ত করলেন এবং পাইকদের দল একেবারে ভেঙে দিলেন। এর আগে হাব্শীদের মধ্যে অনেকেরই নানারকম হুবুভতার পরিচয় দিয়েছিল এবং রাজত্বে ও রাজহত্যা করার জন্য কুখ্যাতি অর্জন করেছিল। ফিরিশ্তা ও 'রিবাজে'র মতে হোসেন শাহ সমস্ত হাব্শীকে চাকরী থেকে বরখাস্ত এবং তাঁর রাজ্য থেকে নির্বাসিত করলেন। তারা জৌনপুর রাজ্য বা উত্তর ভারতের কোথাও স্থান না পেয়ে গুজরাট ও দক্ষিণ ভারতে চলে গেল। তাদের বদলে হোসেন শাহ সৈয়দ, মোগল ও আফগানদের উচ্চপদে নিয়োগ করলেন।

এই সব বিবরণের খুঁটিনাটিগুলি সত্য হওয়াই সম্ভব। মূল বিষয়টি অর্থাৎ হোসেন শাহের সিংহাসনে আরোহণের অল্প কালের মধ্যেই রাজ্যে শান্তি ও শৃঙ্খলা প্রতিষ্ঠার কথাটি যে বহুলাংশে সত্য, সে সম্বন্ধে প্রমাণ আছে। তার কথা একটু পরেই বলছি। তার আগে একটি মতের বিচার করা দরকার। জনৈক গবেষক\* লিখেছেন, "Even the earliest part of Husain Shah's reign seems to have made an impression upon the minds of his subjects and captured their imagination to a great extent. Bijoy Gupta, a contemporary of Alauddin Husain Shah, who composed in 1494-95 the epic of snake-cult popularly known as Manasā-Mangal, has spoken very much highly of the achievements of the Sultan. (IHQ, Vol. XXXII, pp. 58-59)। এই প্রসঙ্গে তিনি বিজয় গুপ্তের মনসামঙ্গল থেকে এই ক'টি ছত্র উদ্ধৃত করেছেন,

হুসতান হোসেন সাহা নৃপতি-তিলক ।

সংগ্রামে অর্জুন রাজা প্রভাতের রবি ।

নিজ বাহুবলে রাজা শাসিল পৃথিবী ॥

রাজার পালনে প্রজা সুখ ভুঞ্জে নিত ।

মুন্স্ক কতেরাবাহ বাজরোড়া তকসিম ।

পশ্চিমে ঘাঘর নদী পূবে খণ্ডেশ্বর (ঘণ্টেশ্বর) ।

মধ্যে ফুল্লি গ্রাম পণ্ডিত নগর ॥

\* অধ্যাপক বোম্বাইয়ের ইন্ডিয়ান উনাইভার্সিটি।

চারি বেদধারী তথা ব্রাহ্মণ সকল ।  
 বৈষ্ণবজাতি বসে নিজ শাস্ত্রেতে কুশল ॥  
 কায়স্থ জাতি বসে তথা লিখনের সুর ।  
 অগ্রজাতি বসে নিজ শাস্ত্রে সূচত্বর ॥  
 স্থানগুণে যেই জন্মে সেই গুণময় ।  
 হেন ফুল্লগ্রী গ্রামে বসতি বিজয় ॥

এই বর্ণনায় হোসেন শাহের সংক্ষিপ্ত প্রশস্তি এবং বিজয়গুপ্তের মাতৃভূমির সংক্ষিপ্ত বর্ণনা মাত্র পাওয়া যায় ; কিন্তু আশ্চর্যের বিষয়, পূর্বোক্ত গবেষক লিখেছেন, "This brief description of the Hindu society tells us much about the peace and prosperity enjoyed by the Hindus under Husain Shah whose reign was marked by a spirit of tolerance and liberalism." তাছাড়া আমরা আগেই দেখাবার চেষ্টা করেছি যে এই হোসেন শাহ আলাউদ্দীন হোসেন শাহ নন, জলালুদ্দীন ফতেহ শাহ। সুতরাং বিজয় গুপ্তের এই উক্তি আলোচ্য প্রসঙ্গে আমাদের কোন কাজেই লাগবে না।

যা হোক, হোসেন শাহের সিংহাসনে আরোহণের অব্যবহিত পরে দেশে শান্তি-শৃঙ্খলার প্রতিষ্ঠা সম্বন্ধে যে প্রমাণ আছে, তার উল্লেখ করছি। ১৪১৬ শকাব্দের বৈশাখ বা ১৪২৪ খ্রীষ্টাব্দের এপ্রিল মাসে চৈতন্যদেবের অন্ততম বালা-গুরু বিষ্ণু পণ্ডিতের পুত্র মহাদেব আচার্যসিংহ ভবভূতির 'মালতীমাধব' নাটকের এক টীকা রচনা করেন। এই টীকার শেষে দু'টি শ্লোক আছে। শ্লোক দু'টি নীচে উদ্ধৃত হল।

অস্তি ক্রীমজিলীশবার্ষিক ইতি ত্যাতো গুণানাং নিধি-  
 জাতো রাম ইব ক্ৰিতৌ কলিযুগে সত্যাবতারেচ্ছয়া ।  
 তস্মিন্ গোড়মহীমহেজ্জসচিবজ্ঞেগীশিরোভূষণে  
 যোগক্ষেম (ম) মুক্ষণং কৃতধিয়ান্ নির্ব্যাজমাত্মহতি ॥  
 শাকে বোড়শসাগরেন্দ্রগণিতে গীর্কণকল্লোলিনী-  
 তীরে ধীরগণাম্পদে পুরি নবদীপাভিধায়ান্ বাধাৎ ।  
 বৈশাখে ভবভূতিধীরভণিতৌ শুদ্ধার্থসন্দীপনীম্  
 আচার্যো মতিমানিমানিহ মহাদেবঃ কৃতী টিপনীম্ ॥

( বাঙ্গালীর সারস্বত অবদান, দীনেশচন্দ্র ভট্টাচার্য, পৃঃ ১০০ )

[মিজিলীশ বারবক নামে খ্যাত গুণের নিধি আছেন, কলিযুগে সত্যাবতারের ইচ্ছায় রামের মত তিনি পৃথিবীতে জন্মগ্রহণ করেছেন; সেই গোড়রাজের সচিবদের শিরোভূষণ অকপটে অহঙ্কণ কৃতধী ব্যক্তিদের যোগক্ষেপ নির্বাহ করছেন। ১৪১৬ শাকে গীর্বাণকল্লোলিনীতীরে (অর্থাৎ গঙ্গাতীরে) ধীরগণের আবাসস্থল নবদ্বীপ নামক পুরে বৈশাখ মাসে ধীর ভবভূতির কথা অল্পসারে এই আচার্য্য মতিমান মহাদেব কৃত ‘গুজার্ধসন্দীপনী’ টিপ্পনী এখানে সমাপ্ত হল।]

১৪২৪ খ্রীষ্টাব্দের এপ্রিল মাসে অর্থাৎ হোসেন শাহের সিংহাসনারোহণের মাস কয়েক পরে নবদ্বীপের পণ্ডিত মহাদেব আচার্য্যসিংহ ‘গোড়মহীমহেন্দ্র’ অর্থাৎ হোসেন শাহের ‘সচিবশ্রেণীশিরোভূষণ’ মজিলীশ বারবকের এই প্রশস্তি রচনা করেছেন। এই মজিলীশ বারবক সম্ভবত নবদ্বীপ অঞ্চলের শাসনকর্তা ছিলেন। মহাদেব মজিলীশ বারবককে রাম ও কলিযুগাবতার বলে প্রশস্তি করেছেন এবং বলেছেন তিনি অকপটে কৃতধী ব্যক্তিদের যোগক্ষেপ সর্বদা নির্বাহ করছিলেন। এর থেকে বোঝা যায় ঐ সময় নবদ্বীপ অঞ্চলে পরিপূর্ণ শান্তি বিরাজ করছিল। তা না হলে নবদ্বীপের একজন পণ্ডিতের লেখার এরকম পরিপূর্ণ সন্তোষ প্রকাশ পেত না।

### সিকন্দর লোদীর সঙ্গে হোসেন শাহের সংঘর্ষ

স্বদীর্ঘ ছাব্বিশ বছর রাজত্বের মধ্যে হোসেন শাহ বহু বহিঃশক্তির সঙ্গে যুদ্ধ করেছেন—কতকগুলির উদ্দেশ্য রাজ্যভ্রম, কতকগুলি আত্মরক্ষামূলক। কয়েকটি ক্ষেত্রে আবার যুদ্ধের পূর্ণ প্রস্তুতি সত্ত্বেও শেষ পর্যন্ত যুদ্ধ হয় নি।

হোসেন শাহের রাজ্যাভিষেকের দু'বছর বাদে দিল্লীর সিকন্দর লোদীর সঙ্গে তাঁর সংঘর্ষ বাধে। সুলতান ফিরোজ শাহ তোগলকের সঙ্গে ইলিয়াস শাহের পুত্র সিকন্দর শাহের যুদ্ধের প্রায় ১৩৭ বছর পরে এই প্রথম আবার দ্বিতীয় সুলতানের সঙ্গে বাংলার সুলতানের সংঘর্ষ হল। ‘মন্তুখব-উৎ-তওয়ারিখ্’, ‘তবকাৎ-ই-আকবরী’, ‘মখজান-ই-আফগানী’ প্রভৃতি ইতিহাসগ্রন্থে এই সংঘর্ষের যে বর্ণনা পাওয়া যায়, তা সংক্ষেপে এই :—

জৌনপুরের সুলতান হোসেন শাহ শকাব্দ ৮৮৪ হিজরা বা ১৪৭৯ খ্রীষ্টাব্দে বহুলোল লোদীর সঙ্গে যুদ্ধে পরাজিত ও দ্বন্দ্বরাজ্য হয়ে বিহারে আশ্রয় নিয়েছিলেন। বহুলোলের মৃত্যুর পর সিকন্দর লোদী বখন দিল্লীর সুলতান হন,



তখন পাটনার শাসনকর্তা দিল্লীর বিরুদ্ধে বিদ্রোহ করেন। ২০০ হিজরা বা ১৪২৪ খ্রীষ্টাব্দে বিদ্রোহ দমন করতে সিকন্দর লোদী পাটনায় আসেন, এই অভিযানে তাঁর বহু ঘোড়া মারা পড়ে। এই খবর পেয়ে হোসেন শাহ শকী সিকন্দরের বিরুদ্ধে যুদ্ধযাত্রা করেন এবং কাশী পর্যন্ত তাঁর পিছু পিছু ধাওয়া করেন। কাশীতে দুই পক্ষের মধ্যে যুদ্ধ হয়; তাতে পরাজিত হয়ে হোসেন শাহ শকী পালিয়ে আসেন, সিকন্দরও তাঁর পিছু পিছু ধাওয়া করে আসেন। বাংলার সুলতান আলাউদ্দীন হোসেন শাহ তখন হোসেন শাহ শকীকে আশ্রয় দেন এবং ভাগলপুরের কাছে কহলগাঁওতে তাঁর থাকবার ব্যবস্থা করে দেন। হোসেন শাহ শকী আলাউদ্দীন হোসেন শাহের আশ্রয় ছিলেন, আলাউদ্দীনের পোত্ৰী ওনসরৎ শাহের কন্ঠার সঙ্গে হোসেন শাহ শকীর পুত্র জলালুদ্দীন শকীর বিবাহ হয়েছিল। হোসেন শাহ শকীকে আশ্রয় দেওয়ার জন্য সিকন্দর লোদী বাংলার সুলতানের উপর ক্রুদ্ধ হয়ে তাঁর বিরুদ্ধে যুদ্ধযাত্রা করেন। ২০১ হিজরা বা ১৪২৫ খ্রীষ্টাব্দে সিকন্দরের সৈন্যদল কুৎলুগপুর থেকে মাহমুদ খান লোদী ও মবারক খান সুহানির নেতৃত্বে যাত্রা করল। হোসেন শাহও তাঁকে বাধা দেবার জন্য তাঁর পুত্র দানিয়েলের নেতৃত্বে এক সৈন্যবাহিনী পাঠালেন। বিহারের বাঢ় নামক জায়গায় দুই পক্ষ পরস্পরের সম্মুখীন হয়। কিন্তু যুদ্ধ হয় না। কিছুদিন পরে সিকন্দর লোদী হোসেন শাহের সঙ্গে সন্ধি স্থাপন করে অস্থানে ফিরে যান। নিয়ামতুল্লাহর ‘মখজান-ই-আফগানী’ এবং অন্ত কোন কোন ইতিহাসগ্রন্থ থেকে জানা যায় যে, সন্ধির সময় হোসেন শাহ প্রতিশ্রুতি দেন সিকন্দর শাহের শত্রুদের তিনি ভবিষ্যতে আর তাঁর রাজ্যে আশ্রয় দেবেন না। বদাওনী ‘মস্তখব-উৎ-তওয়ারিখে’ লিখেছেন, “দুই পক্ষ নিজের নিজের রাজ্য নিয়ে সন্তুষ্ট থাকলেন।” এছাড়া এই সন্ধি সন্ধকে আর বিশেষ কিছু জানা যায় না। এই সন্ধির পরেও যে বিহার ও ত্রিহতে হোসেন শাহের অধিকার অক্ষুণ্ণ ছিল, তার প্রমাণ আছে। এইভাবে দিল্লীর পরাক্রান্ত সম্রাট সিকন্দর লোদী হোসেন শাহকে দমন করতে এসে সন্ধিস্থাপন করে ফিরে গেলেন, হোসেন শাহের প্রাধান্যও বিন্দুমাত্র খর্ব হল না। এই ব্যাপার যে হোসেন শাহের পক্ষে বিশেষ গৌরবের, তাতে কোন সন্দেহ নেই। তবে এই সন্ধির পরেও যে সিকন্দর শাহের সঙ্গে তাঁর পরিপূর্ণ মৈত্রীর সম্পর্ক স্থাপিত হয় নি, তার প্রমাণ আছে। এসম্বন্ধে পরে আলোচনা প্রযোজ্য।

## হোসেন শাহের কামতাপুর-কামরূপ অভিযান

আলাউদ্দীন হোসেন শাহ সিংহাসনে আরোহণের অব্যবহিত পরেই রাজ্য-বিস্তারে মন দেন এবং এজ্ঞা তাঁকে বহু যুদ্ধ করতে হয়। এখন এইসব যুদ্ধ সম্বন্ধে আলোচনা করা হবে। সিংহাসনে আরোহণের এক বছরের মধ্যেই আলাউদ্দীন হোসেন শাহ উত্তর বঙ্গের কামতাপুর রাজ্যের বিরুদ্ধে অভিযান করেন। এই অভিযানের কথা নানা সূত্রে লেখা আছে। হোসেন শাহ যে এই অভিযানে সাফল্য লাভ করেন, এসম্বন্ধে সব সূত্রেই একমত। কামতাপুর রাজ্য আধুনিক কুচবিহার অঞ্চলে অবস্থিত ছিল। সপ্তদশ শতাব্দীতে রচিত ‘বহারিস্তান-ই-গায়বী’তে লেখা আছে যে এই রাজ্যের পূর্ব-সীমা ছিল বনস (মনসা) নদী এবং অপর সীমা করতোয়া নদী। হোসেন শাহের সময়ে এই রাজ্যের রাজা খুব প্রতাপশালী হয়ে উঠেছিলেন। উত্তরবঙ্গের এক বিরাট অঞ্চল এবং আসামের কামরূপ অঞ্চলের তিনি একচ্ছত্র অধিপতি ছিলেন। হোসেন শাহ তাঁকে যুদ্ধে পরাজিত করে তাঁর রাজ্য নিজের অধিকারে আনেন।

হোসেন শাহ যে তাঁর রাজত্বের প্রথম বছরেই কামতাপুর-কামরূপ রাজ্য আক্রমণ করেছিলেন, তাতে কোন সন্দেহ নেই, কারণ ঐ বছর অর্থাৎ ৮২২ হিজরায় ( ১৪২৩-২৪ খ্রি: ) উৎকীর্ণ তাঁর অনেকগুলি মুদ্রাতে তাঁর নামের সঙ্গে “কামরু-কামতা-জাজনগর-উড়িশা-বিজয়ী” উপাধি যুক্ত দেখা যায় (Catalogue of Coins, Indian Museum, Calcutta, Vol II. p. 173, Coin no. 175 : Supplement to the Provincial Coin Cabinet, Shillong, p. 150, Coin no ১, p.152, Coin no ২; Catalogue of Indian coins, British Museum, p. 148, Coin no. 123 প্রভৃতি এবং JNSI, Vol. XIX, Pt. I, 1957, p. 56 প্রভৃতি)। পরবর্তী বছরগুলিতে উৎকীর্ণ তাঁর বহু মুদ্রাতেও এই উপাধি উল্লিখিত হয়েছে। তাঁর বহু শিলালিপিতেও এই উপাধির উল্লেখ দেখা যায়, তার মধ্যে সর্বপ্রাচীন শিলালিপিটির তারিখ ১লা রমজান, ২০৭ হিজরা ( ১০ই মার্চ, ১৫০২ খ্রি: )

বহিঃহোসেন শাহের ৮২২ হিঃ বা ১৪২৩-২৪ খ্রিঃর মুদ্রাতেই তাঁকে “কামরু ( কামরূপ )-কামতা বিজয়ী” বলা হয়েছে, তাহলেও ঐ বছরেই তাঁর কামরূপ-কামতা বিজয় সম্পূর্ণ হয়েছিল বলে মনে করার কোন কারণ নেই। আগেকার দিনে রাজারা কোন দেশের সঙ্গে যুদ্ধ করলেই সঙ্গে সঙ্গে সেই দেশ জয় করার

দাবী জানাতেন। দৃষ্টান্তস্বরূপ বলা যায়, ৮২২ হিজরাতেই হোসেন শাহ উড়িষ্যা বিজয়ের দাবী জানিয়েছেন, কিন্তু অন্তত ১৫১৫ খ্রীষ্টাব্দ পর্যন্ত যে উড়িষ্যার সঙ্গে তাঁর যুদ্ধ চলেছিল, তার প্রমাণ আছে ; এই যুদ্ধে তিনি উড়িষ্যা জয় করা দূরে থাক, কোন উল্লেখযোগ্য সাফল্যই অর্জন করতে পারেন নি। সুতরাং হোসেন শাহের কামরূপ-কামতা বিজয় কবে সম্পূর্ণ হয়েছিল, তা বর্তমানে বলার কোন উপায় নেই। স্থানীয় কিংবদন্তীর মতে ১৪২০ শকাব্দ বা ১৪২৮-২৯ খ্রীষ্টাব্দে হোসেন শাহ কামরূপ-কামতা রাজ্য জয় করেছিলেন এবং ঐ রাজ্যের রাজধানী কামতাপুর শহর বারো বছর ধরে হোসেন শাহের সৈন্যবাহিনীকে প্রতিরোধ করার পর আত্মসমর্পণ করে। কিন্তু এই সব কিংবদন্তী একেবারেই বিশ্বাস করা যায় না। ১৪২৮-২৯ খ্রীষ্টাব্দের মাত্র পাঁচ বছর আগে হোসেন শাহ সিংহাসনে আরোহণ করেছিলেন। সুতরাং বারো বছর ধরে কামতাপুর অবরোধ করে ঐ শহর অধিকার করার পরে ১৪২৮-২৯ খ্রীষ্টাব্দে সম্পূর্ণভাবে কামরূপ-কামতা রাজ্য জয় করতে তিনি পারেন না।

বিভিন্ন সূত্রে হোসেন শাহের কামরূপ-কামতা জয়েব বিভিন্ন চিত্র পাওয়া যায়। ‘রিয়াজ-উস-সলাতীনে’ লেখা আছে, “তিনি কামরূপ, কামতা ও অগ্রাণ্ড অঞ্চল পর্যন্ত সমগ্র দেশ জয় করলেন। ঐ সব অঞ্চল আগে রূপনারায়ণ, মল কুঁওয়ার, গস লখন, লছমী নারায়ণ এবং অগ্রাণ্ড শক্তিশালী রাজার অধীনে ছিল। বিজিত দেশগুলি থেকে তিনি অনেক ধন সংগ্রহ করলেন।” কিন্তু কোচবিহার অঞ্চলে প্রচলিত প্রবাদগুলি বিশ্বাস করলে বলতে হয় যে, হোসেন শাহ বিশ্বাসঘাতকতার সাহায্যে কামতা রাজ্য জয় করেছিলেন। এগুলিতে যে বিবরণ পাওয়া যায়, তা সংক্ষেপে এই। ঐ সময় কামতাপুরের রাজা ছিলেন খেন বংশীয় নীলাধর। তাঁর এক মন্ত্রীর পুত্র রানীর প্রতি অবৈধ আসক্তি প্রকাশ করায় রাজা তাঁকে বধ করেন এবং ঐ মন্ত্রীকে নিমজ্ঞণ করে তাঁর পুত্রের মাংস খাওয়ান। মন্ত্রী তখন পাপমুক্ত হবার জন্য গঙ্গানান্নের অছিলা করে গোড়ে এসে হোসেন শাহের আশ্রয় নেন এবং তাঁকে কামতাপুর রাজ্য সংক্রান্ত সব খবর জানিয়ে দেন। হোসেন শাহ তখন কামতাপুর আক্রমণ করেন, কিন্তু নীলাধর তাঁর সমস্ত আক্রমণ প্রতিহত করেন। অবশেষে হোসেন শাহ মিথ্যা করে নীলাধরকে বলে পাঠান যে তিনি চলে যেতে চান, কিন্তু বাবার আগে তাঁর বেগম নীলাধরের রানীর সঙ্গে দেখা করতে চান। নীলাধর তাতে রাজী হলে হোসেন শাহের শিবির থেকে তাঁর রাজধানী

ভিতরে পালকি যায়, তাতে নারীর ছদ্মবেশে সৈন্ত ছিল; তারা কামড়াপুর নগর অধিকার করে। বুকাননের বিবরণীতে লেখা আছে, "He (Husain Shah) is said to have conquered Kamrup, that is the country to the east of the upper part of the Korotoya, and to have killed its king, Harup Narayan, son of Malkongyar, son of Sada Lokymon."

উপরে উল্লিখিত তিনটি বিবরণীর কোনটিই সম্পূর্ণ সত্য বলে মনে হয় না। তিনটি বিবরণে কামরূপের রাজার নাম সন্দেহেই ঐক্য নেই। 'রিয়াজে' যে সব রাজার নাম উল্লিখিত হয়েছে, কামরূপ-কামতায় এইসব নামের কোন রাজা ছিলেন বলে জানা যায় না। অবশ্য 'রিয়াজে' হোসেন শাহের কামরূপ-কামতা ভিন্ন অগ্রাঙ্গ অঞ্চল জয় করারও উল্লেখ আছে। ত্রিহতে হোসেন শাহের সময়ে 'রূপনারায়ণ' বিরূপ ধারী রামভদ্রসিংহ ও 'কংসনারায়ণ' বিরূপ ধারী লক্ষ্মীনাথ নামক নৃপতিরা ছিলেন বলে জানা যায়। হোসেন শাহ ত্রিহতের অন্তত কিছু অংশ অধিকার করেছিলেন বলেই মনে হয়, কারণ ত্রিহতের সন্নিহিত ভাগলপুর, মুন্সের, পাটনা ও সারণ জেলার বিভিন্ন অঞ্চলে তাঁর শিলালিপি পাওয়া গিয়েছে। ত্রিহতের সন্নিহিত (পাটনার ওপারে অবস্থিত) হাজীপুর যে তাঁর রাজ্যের অন্তর্ভুক্ত ছিল তা 'চৈতন্যচরিতামৃত' মধ্যালা ২০শ পরিচ্ছেদ থেকে জানা যায়। সুতরাং 'রিয়াজে'র উক্তিতে কিছু সত্য আছে বলেই মনে হয়। কিন্তু হোসেন শাহের কামরূপ-কামতা বিজয় সন্দেহে 'রিয়াজে' কোন আলোক পাওয়া যায় না এবং মল কুঁওয়ার ও গঙ্গা লখন প্রভৃতি রাজাদের অস্তিত্ব সন্দেহে প্রমাণ মেলে না। কোচবিহার অঞ্চলের প্রবাদে বর্ণিত হোসেন শাহের নীলাধরকে প্রতারণিত করার কাহিনী সত্য হলে নীলাধরের নিবুদ্ভিতা সম্ভবের সীমা অতিক্রম করে যায়। বুকাননের বিবরণীতে কামরূপের রাজা ও তাঁর পূর্বপুরুষদের যে সব নাম দেওয়া হয়েছে, সেরকম অর্থহীন নাম কারও থাকতে পারে বলে ভাবা যায় না।\* যা হোক, হোসেন শাহ যে কামতা-কামরূপ জয় করেছিলেন, সে সন্দেহে সব সূত্রই একমত। সুতরাং সে বিষয়ে কোন সন্দেহ নেই। কীভাবে তিনি জয় করেছিলেন, তা

\* বোধ হয় 'রিয়াজ-উদ্-সলাতিনে' উল্লিখিত রাজাদের নামগুলিই বুকাননের বিবরণীতে বিকৃত আকারে লিপিবদ্ধ হয়েছে এবং 'মল কুঁওয়ার' Malkongyar-এ ও 'রূপনারায়ণ' Harup Narayan-এ পরিণত হয়েছে।

আরও ভাল সূত্র আবিষ্কৃত না হওয়া পর্যন্ত নিশ্চিতভাবে জানবার কোন উপায় নেই। মুন্সী জামপ্রসাদ লিখেছেন যে হোসেন শাহ কামতা (“কামচে”) রাজ্য থেকে “কুচমর্দন” নামে একটি কামান এনেছিলেন। ‘আসাম বুরঞ্জী’র কথা বিশ্বাস করলে বলতে হয় যে কোচ রাজা বিশ্বসিংহ হোসেন শাহের কাছ থেকে কামতা রাজ্য জয় করে নেন। ‘বুরঞ্জী’র মতে আটগাঁওয়ের মুসলমান শাসনকর্তা “তুরক কোতয়াল” বিশ্বসিংহের সঙ্গে যুদ্ধে পরাজিত ও নিহত হন। আমানতউল্লাহ আহমদের মতে ১৫১৩ খ্রীঃ পরে কামতা রাজ্য থেকে মুসলমানরা বিতাড়িত হয় (কোচবিহারের ইতিহাস, ১ম খণ্ড, পৃঃ ৮৮ দ্রষ্টব্য)। কিন্তু এই সব মত কতদূর সত্য তা বলা যায় না, কারণ হোসেন শাহের ২২৪ হিজরা বা ১৫১৮-১৯ খ্রীষ্টাব্দের মৃত্যুতেও তাঁর “কামরূপ ও কামতা বিজয়ী” উপাধি উল্লিখিত হয়েছে। তা’ ছাড়া হোসেন শাহের পুত্র নসরৎ শাহের রাজত্বকালেও কামরূপের হাজো বাংলার সুলতানের অধিকারে ছিল এবং সেখান থেকে মুসলমানরা আসামে অভিযান করেছিল বলে অসমীয়া বুরঞ্জীগুলিতে উল্লিখিত হয়েছে।

### হোসেন শাহের আসাম-অভিযান

ঐ সময়ে কামরূপের পূর্ব ও দক্ষিণে প্রাচীন আসাম বা অহোম রাজ্য অবস্থিত ছিল। এই রাজ্য নিতান্ত দুর্ভেদ্য ছিল। এখানকার লোকেরা বাইরের কোন লোককে তাদের দেশে প্রবেশ করতে দিত না। নিজেরা আসামে উৎপন্ন জব্যের বিনিময়ে বাইরের জিনিস সংগ্রহ করে আনবার জন্য এক আঁধার মাত্র বাইরে যেত। রাজ্যটি দুর্গম পার্বত্য অঞ্চলে পরিপূর্ণ হওয়ার জন্য এবং এখানে বর্ষা প্রকোপ খুব বেশী হওয়ার জন্য এখানকার রাজাদের দেশরক্ষার জন্য বিশেষ বেগ পেতে হত না। হোসেন শাহ এই অজ্ঞেয় অহোম রাজ্য জয় করার চেষ্টা করেছিলেন, কিন্তু তাঁকে ব্যর্থতা বরণ করতে হয়। এসময়ে সব সূত্রই একমত। গোলাম হোসেন ‘রিয়াজ-উস-সলাতীনে’ লিখেছেন, “আসামের রাজা তাঁকে বাধা দিতে না পেয়ে দেশ (সমতল অঞ্চল) ছেড়ে পাহাড়ে পালিয়ে যান। রাজা (হোসেন শাহ) তখন এক বিরাট সৈন্যবাহিনী সমেত তাঁর পুত্রকে বিজিত দেশ সম্বন্ধে করণীয় ব্যবস্থাদি সম্পূর্ণ করবার জন্য রেখে বিজয়গৌরবে বাংলাদেশে প্রত্যাবর্তন করেন। রাজার প্রত্যাবর্তনের পরে তাঁরা বিজিত দেশে শান্তি সংস্থাপন ও আশ্বাসের

ব্যবস্থা করতে ব্রতী হন। কিন্তু বর্ষাকাল সমাগত হলে জলপ্রাবনে রাজ্যচাট বন্ধ হয়ে গেল। (আসামের) রাজা তখন অল্পচরবর্গ সমেত পাহাড় থেকে নেমে বিপক্ষ সৈন্যকে বেটন করে যুদ্ধ করতে লাগলেন এবং তাদের রসদ সংগ্রহের পথ বন্ধ করে দিলেন। অল্প সময়ের মধ্যে সকলকেই তিনি বধ করলেন।”

অসমীয়া বুরঞ্জীগুলিতে এ সম্বন্ধে যা লেখা আছে, তার সারমর্ম এই। সুহৃদ মুন্দের রাজত্বকালে সর্বপ্রথম মুসলমানরা আসামে অভিযান করে। এই সময়ে বাংলার রাজা “খুনফং” বা “খুং” (হসন) আসাম আক্রমণ করেন। ২০,০০০ পদাতিক ও অশ্বারোহী সৈন্য এবং অসংখ্য রণতরী এই অভিযানে যোগদান করে। বাংলার সৈন্যবাহিনীর নেতৃত্ব করেন জনৈক “বড় উজীর” এবং জনৈক “বিং মালিক” বা “মিং মানিক”। প্রথম প্রথম মুসলমানরা সহজেই বিজয়ী হয়। তারা প্রায় বিনা বাধায় ব্রহ্মপুত্র নদ ধরে বর্তমান দরং জেলার পূর্ব সীমা পর্যন্ত উপাস্থত হয় এবং অনতিবিলম্বে বুড়াই নদীর তীর অবধি পৌছায়। তখন আসামের রাজা মুসলমানদের প্রচণ্ড বাধা দেন। তেমেনি (ত্রিমোহনী ?)-তে দুই পক্ষের মধ্যে নৌযুদ্ধ হয়। তাতে মুসলমানরা প্রথম প্রথম জয়লাভ করলেও শেষ পর্যন্ত তাদের গোচনীয় পরাজয় হয়। “বড় উজীর” কোনক্রমে পালিয়ে প্রাণ বাঁচান।

এরপর কিছুদিন যুদ্ধ বন্ধ থাকে। আসাম-রাজ দেশরক্ষার ব্যবস্থা পাকা করেন এবং সিংরী, সালা ও ভৈরালী নদীর মোহানায় প্রধান প্রধান অসমীয়া সেনাধ্যক্ষের নেতৃত্বে সৈন্যদের ঘাটি বসানো হয়।

এরপর আবার “বিং মালিক বা “মিং মানিক” এবং “বড় উজীরের” নেতৃত্বে বাংলার সৈন্যবাহিনী আসাম আক্রমণ করে। স্থলপথে এবং জলপথে অগ্রসর হয়ে তারা সিংরী পর্যন্ত পৌছায় এবং সেখানকার ঘাটি আক্রমণ করে। এই ঘাটি বরপাত্র গোহাইনের রক্ষণাধীন ছিল। অনেকক্ষণ ধরে রক্তক্ষয়ী যুদ্ধের পরে অসমীয়া বাহিনীর সেনাপতি শত্রুবাহিনীকে পরাস্ত করেন। “বিং মালিক” বা “মিং মালিক” ও বাংলার বহু সৈন্য যুদ্ধে নিহত হয় এবং অনেকে বন্দী হয়। “বড় উজীর” অল্প সংখ্যক অল্পচর সমেত পালিয়ে প্রাণ বাঁচান। অসমীয়া বাহিনী পলাতকদের বর্তমান নওগাঁ জেলার অন্তর্গত খগরিজন পর্যন্ত তাড়া করে নিয়ে ধান এবং সেধান থেকে অনেক লুণ্ঠের মাল নিয়ে জয়গৌরবে ফিরে আসেন। (Ahom Buranji from Khunlung and Khunlai: Purani Assam Buranji, p. 57 ব্রটব্য)।

গেটের বতে বাংলার সৈন্তবাহিনীর এই আসাম অভিযান ১৫২৭ খ্রীষ্টাব্দে ঘটেছিল (History of Assam, pp. 90-91, f. n. দ্রষ্টব্য) কিন্তু তা হতে পায়ে না, কারণ হোসেন শাহ ১৫২৭ খ্রীষ্টাব্দে জীবিত ছিলেন না। গেটের এই অল্পমানের যে কোন ভিত্তি নেই, তা সূধীন্দ্রনাথ ভট্টাচার্য্য দেখিয়েছেন (Mughal North-East Frontier Policy. pp. 85-86, f. n. দ্রষ্টব্য)।

অসমীয়া বুরঞ্জীগুলির উক্তি বিশ্লেষণ করে আমাদের ধারণা হয়েছে যে ষোড়শ শতাব্দীর প্রথম দিকের ঘটনা সম্বন্ধে এদের খুঁটিনাটি বিবরণ সর্বাত্মক নির্ভরযোগ্য নয়। বহু অমূলক কথা এদের মধ্যে লিপিবদ্ধ হয়েছে। যেমন একটি অসমীয়া বুরঞ্জীতে (Assam Buranji, edited by S. K. Bhuyan, 1945) লেখা আছে যে কামতার রাজার সঙ্গে গোড়েখরের (শ্রীহট্টের একটি অঞ্চলকে আগে 'গোড়' বলা হত, ইনি সেখানকার রাজা হলে এই কাহিনী অংশত সত্য হতে পারে) কন্যা স্তম্ভধি গরম কুমারীর বিবাহ হয়েছিল, পুরোহিতপুত্রের সঙ্গে অবৈধ প্রণয়ের জন্ত কামতারাজ রানীকে প্রাসাদ থেকে বহিষ্কৃত করেন। রানী তখন তাঁর পিতা গোড়েখরকে জানান এবং গোড়েখর কামতারাজ্য আক্রমণ করেন। কামতারাজ অহোমরাজ স্বর্গদেও সূহ্মক্ষণাডহিজিয়া রাজা (১৪২৭-১৫৩২ খ্রিঃ)-র শরণাপন্ন হন। দীর্ঘকাল কামতারাজ ও অহোমরাজের সঙ্গে গোড়েখরের সেনাপতি তুরবকের যুদ্ধ হয় এবং শেষ পর্যন্ত তুরবক পরাজিত হয়ে অহোমরাজের সঙ্গে নিজের মেয়ের বিবাহ দেন।

১৬৬২-৬৩ খ্রীষ্টাব্দে ইব্ন মুহম্মদ ওয়ালী বা শিহাবুদ্দীন তালিশ নামে মোগল সরকারের একজন কর্মচারী ফতিয়াহ-ই-ইব্রিয়াহ বা তারিখ-ফতে-ই-আশাম নামে একখানি বই লেখেন। বইটিতে মীরজুমলার আসাম অভিযানের বিস্তৃত ও ধারাবাহিক বর্ণনা পাওয়া যায়। এই বইএর এক জায়গায় প্রসঙ্গক্রমে হোসেন শাহের আসাম অভিযান সম্বন্ধে কয়েকটি কথা লিপিবদ্ধ হয়েছে। তার সারসর্ম্ম এই। বাংলার রাজা হোসেন শাহ ২৪,০০০ পদাতিক ও অশ্বরোহী সৈন্ত এবং অসংখ্য জাহাজ নিয়ে আসাম আক্রমণ করেন। আসামের রাজা তখন পার্বত্য অঞ্চলে আশ্রয় নিলেন। হোসেন তখন দেশ (সমতল অঞ্চল) অধিকার করে তাঁর পুত্রকে এক শক্তিশালী সৈন্তবাহিনীর সঙ্গে সেখানে রেখে ফিরে গেলেন। কিন্তু যখন বর্ষা নামল, আসামের রাজা তখন পার্বত্য অঞ্চল থেকে সমতলভূমিতে নেমে এলেন এবং নিজের প্রজাদের সহায়তায় হোসেন শাহের পুত্রকে বধ করলেন ও তাঁর সৈন্তবাহিনীকে

অন্যভাবে রেখে দিলেন। তারপর ক্রমে ক্রমে তাদের সবাইকে বধ বা বন্দী করলেন ( JASB, 1872, Pt. I, p. 79 দ্রষ্টব্য )। ‘আলমগীরনামা’তেও হুবহু এই বিবরণ আছে। এই বিবরণ ‘রিয়াজ-উল্-সলাতীনে’র বিবরণকেই সমর্থন করছে।

হুতরাং হোসেন শাহের আসাম-অভিযানের শোচনীয় ব্যর্থতা সম্বন্ধে কোন সন্দেহই আর নেই। আসাম অভিযানে হোসেন শাহের যে পুত্র নিহত হয়েছিলেন, ঐ অঞ্চলে প্রচলিত কিংবদন্তীগুলিতে তিনি “দুলাল গাজী” নামে উল্লিখিত হন। “দুলাল” সম্ভবতঃ “দানিয়েল” নামের বিকৃতি। হোসেন শাহের যে দানিয়েল নামে এক পুত্র ছিল, তা আমরা আগেই দেখে এসেছি। হালিরাম ঢেকিয়াল ফুকনের মতে দুলাল গাজী হোসেন শাহের জামাতা।

এখন প্রশ্ন এই, হোসেন শাহ কোন সময়ে আসামে অভিযান করেছিলেন? ত্রিপুরার ‘রাজমালা’র মতে হোসেন শাহ ১৪৩৬ শকাব্দ বা ১৫১৪-১৫ খ্রীষ্টাব্দে বলেছিলেন, “উড়িয়া আসাম কোচ জিনিয়া লইল।” এর থেকে মনে হয়, হোসেন শাহ ১৫১৪-১৫ খ্রীঃ অব্দ আগেই আসামে অভিযান করে প্রাথমিক সাফল্য লাভ করেছিলেন এবং এর কিছুদিন বাদে আসামে তাঁর বাহিনীর বিপর্যয় ঘটে।

আসামের “হোসেন শাহী পরগণা” নামে পরিচিত একটি অঞ্চল এখনও হোসেন শাহের স্মৃতি বহন করছে।

### উড়িয়ার সঙ্গে হোসেন শাহের যুদ্ধ

হোসেন শাহ যে সমস্ত দেশের সঙ্গে যুদ্ধে প্রবৃত্ত হয়েছিলেন, তার মধ্যে উড়িষ্যাও অগ্ৰতম। ‘রিয়াজ-উল্-সলাতীনে’ লেখা আছে, “আশপাশের সমস্ত রাজাকে বশীকৃত করে এবং উড়িষ্যা পর্যন্ত জয় করে তিনি কয় আদার করেছিলেন।” এখন হোসেন শাহের সঙ্গে উড়িষ্যার রাজার যুদ্ধ সম্বন্ধে প্রকৃত তথ্য উদ্ধারের চেষ্টা করা যাক।

‘রিয়াজ’-এর মতে হোসেন শাহ উড়িষ্যা জয় করেছিলেন। হোসেন শাহের মুদ্রা এবং শিলালিপিতেও দাবী করা হয়েছে যে তিনি উড়িষ্যা জয় করেছিলেন। আমরা আগেই বলেছি যে হোসেন শাহের অনেকগুলি মুদ্রার তাঁর নামের সঙ্গে “অল-কতেহ’ অল-কামর ও অ কামতে ও অ জাজনগর ও অ ওরিসে” (“কামর-কামতা-জাজনগর-উড়িষ্যা বিজয়ী”) উপাধি যুক্ত হয়েছে এবং এই জাতীয়



মুদ্রাগুলির মধ্যে যেগুলি সবচেয়ে প্রাচীন, সেগুলি ৮২২ হিজরা বা ১৪২৩-২৪ খ্রীষ্টাব্দে উৎকীর্ণ হয়েছিল।

এই মুদ্রাগুলি ছাড়া হোসেন শাহের রাজত্বকালের একটি শিলালিপিতেও এই কথা দেখতে পাওয়া যায়। ২১৮ হিজরা বা ১৫১২-১৩ খ্রীষ্টাব্দে উৎকীর্ণ খ্রীষ্টের শাহ জালাল দরগাহ এই শিলালিপিতে লেখা আছে,

“আটটি ‘কাম্‌হার’ বিজয়ী রুক্ন খান, যিনি নগরসমূহের উজীর এবং সেনাধ্যক্ষ থাকাকালীন কামরু, কামতা, জাজনগর ও উড়িষ্যা বিজয়ের সময়ে বাদশাহের অধীনস্থ সৈন্যবাহিনীতে যোগ দিয়ে বিভিন্ন স্থানে যুদ্ধ করেছেন।” (JASB, 1922, p. 413 ত্রুটিব্য)

শিলালিপিটিতে হোসেন শাহের নাম নেই, কিন্তু এর তারিখ থেকে স্পষ্ট বোঝা যায় যে, এতে যে বাদশাহের উল্লেখ করা হয়েছে, তিনি আলাউদ্দীন হোসেন শাহ ভিন্ন আর কেউই নন।

এই সমস্ত মুদ্রা ও শিলালিপি সাক্ষ্য থেকে আপাতদৃষ্টিতে মনে হয়, হোসেন শাহ উড়িষ্যা জয় করেছিলেন; ১৪২৩-২৪ খ্রীষ্টাব্দে অর্থাৎ রাজত্বের প্রথম বছরে তিনি উড়িষ্যা আক্রমণ করেন এবং ঐ বছরেই এই বিজয় সম্পূর্ণ হয়েছিল। কিন্তু অস্ত্রাস্ত্র স্ত্রের সাক্ষ্য বিশ্লেষণ করলে এই ধারণা দূরীভূত হয়। ১৪২৫-২৪ খ্রীষ্টাব্দে উড়িষ্যার সঙ্গে হোসেন শাহের যুদ্ধ শুরু হয় বটে, কিন্তু ঐ বছরেই তা শেষ হয়নি, তারও পরে দীর্ঘকাল ধরে এই যুদ্ধ চলেছিল। ষোড়শ শতাব্দীতে রচিত চৈতন্য-চরিত গ্রন্থগুলিতে উড়িষ্যার সঙ্গে হোসেন শাহের যুদ্ধ সম্বন্ধে কিছু কিছু উল্লেখযোগ্য তথ্য পাওয়া যায়। প্রথমে এদের সাক্ষ্য উদ্ধৃত করব।

চৈতন্যভাগবত অন্ত্যখণ্ডের চতুর্থ অধ্যায়ে বৃন্দাবনদাস হোসেন শাহের উড়িষ্যা-অভিযানের কথা এইভাবে উল্লেখ করেছেন,

যে হোসেন সাহা সর্ব উড়িয়ার দেশে।

দেবমূর্তি ভাঙ্গিলেক দেউল বিশেষে ॥

... ..

অভাবেই রাজা মহা কালযবন।

মহাতমোত্তমবুদ্ধি জয়ে ঘনেনন ॥

ওড় দেশে কোটি কোটি প্রতিমা প্রাসাদ।

ভাঙ্গিলেক কত কত করিল প্রমাদ ॥

চৈতন্যদেব যখন সন্ন্যাসগ্রহণের পর বাংলা থেকে নীলাচলে বান, (আহুয়ারী, ১৫১০ খ্রীঃ), তখন বাংলা ও উড়িষ্যার মধ্যে যুদ্ধ চলছিল এবং ছত্রভোগে দুই রাজ্যের সীমানা পার হবার সময় বাংলার সীমান্তরক্ষী রামচন্দ্র খান চৈতন্যদেবকে সাহায্য করেছিলেন বলে বুদ্ধাবনন্দাস জানিয়েছেন। ‘চৈতন্যভাগবত’ অন্ত্যখণ্ডের দ্বিতীয় অধ্যায়ে মহাপ্রভুর প্রতি রামচন্দ্র খানের উক্তি এইভাবে লিপিবদ্ধ হয়েছে,

সভে প্রভু হইয়াছে বিষম সময় ।  
সে দেশে এ দেশে কেহো পথ নাহি বয় ॥  
রাজারা ত্রিশূল পুঁতিয়াছে স্থানে স্থানে ।  
পথিক পাইলে জ্ঞাপ্ত বলি লয় প্রাণে ॥  
কোন দিক দিয়া বা পাঠাউ লুকাইয়া ।  
তাহাতে ডরাউ প্রভু শুন মন দিয়া ॥  
মুঞি সে লঙ্কর এথা মোর সব ভার ।  
নাগালি পাইলে আগে সংশয় আমার ॥  
তথাপিও যেতে কেনে প্রভু মোর নয় ।  
যে তোমাব আজ্ঞা তাগা করিমু নিশ্চয় ॥

এর দু'বছর বাদে ( ১৫১২ খ্রীঃ ) যখন মহাপ্রভু দক্ষিণ ভারত ভ্রমণ ক'রে নীলাচলে প্রত্যাবর্তন করেন, তখন বাংলার সঙ্গে উড়িষ্যার যুদ্ধ প্রায় শেষ হয়ে গিয়েছিল। কবিকর্ণপুরের ‘শ্রীচৈতন্যোচক্রোদয়’ নাটকের অষ্টম অঙ্কে দেখি, দক্ষিণ ভারত থেকে নীলাচলে প্রত্যাবর্তন করে চৈতন্যদেব মুকুন্দকে প্রসন্ন করলেন নিত্যানন্দ কোথায়। মুকুন্দ বললেন যে তিনি বাংলায় গেছেন এবং বলে গেছেন মহাপ্রভু দক্ষিণ ভারত থেকে ফিরে এলে অবৈতপ্রসন্ন সন্ন্যস্ত ভক্তকে নিয়ে আবার নীলাচলে আসবেন। তাই শুনে গোপীনাথ আচার্য বললেন, “সম্প্রতি বৈরাজ্যাদিকমপি নাস্তি। পহাশ্চ স্বগমঃ। গুণ্ডিচাধাত্রা চ নেকীয়সী। তলাগমন-সামগ্রী সর্বৈবাস্তি।” (সম্প্রতি দুই রাজ্যের রাজ্য নিয়ে বিবাদ নেই। পথও স্বগম। গুণ্ডিচাধাত্রাও নিকট। তাঁদের আগমনের সমস্ত কারণই বর্তমান। )

১৫১৪ খ্রীষ্টাব্দের সেপ্টেম্বর মাসে মহাপ্রভু নীলাচল থেকে বাংলার বান। কবিকর্ণপুর ও বুদ্ধাবনন্দ কবিবাজ তাঁর উৎকল-গৌড় সীমান্ত অভিযানের যে বর্ণনা দিয়েছেন, তার থেকে দেখা যায় যে ঐ সময়ে দুই দেশের মধ্যে যুদ্ধ

কার্যত হচ্ছিল না এবং সন্ধিও আসন্ন হয়ে উঠেছিল। কিন্তু উড়িষ্যা থেকে বাংলায় প্রবেশের কোন কোন পথ তখনও বন্ধ ছিল। কোন কোন পথ খোলা ছিল বটে; কিন্তু সেসব পথ দিয়ে যারা বাংলায় যেত, তাদের অনেক সময় বাংলার সীমান্তরক্ষীদের হাতে অত্যাচার সহ্য করতে হত। এজন্য মহাপ্রভুকে উড়িষ্যার সীমান্তবর্তী অঞ্চলে কিছু সময় অপেক্ষা করতে হয়েছিল। কবিকর্ণপুরের 'শ্রীচৈতন্যচন্দ্রোদয়' নাটকের নবম অঙ্কে দেখি, একজন লোক উৎকলরাজ প্রতাপরুদ্রের কাছে মহাপ্রভুর উৎকল-গোড় সীমান্ত অতিক্রমের এই বর্ণনা দিচ্ছে,

“ইতো দেবাধিকারং যাবৎ তাবত্তব প্রভাবেনৈব নিকাহিতবজ্জ সৌকর্য্য।  
অচংক্রমণেনৈব সর্ব্বৈ গতবন্তঃ। গোড়সীম্নি প্রবেষ্টুং ত্রয়ঃ পন্থানঃ। দ্বয়ং রুদং  
একস্ত জলদুর্গঃ তমেবোদ্दिष्ट চলিতে সতি তৎসীমাধিকারী তুরুক্ষোহরুক্ষোষকারঃ  
ইব সর্ব্বেষাং মর্ম্মহা মহমত্তপো দুর্ব্বৃত্তচক্রচূড়ামণিঃ। ইতো দেশাদ্ য়ে গচ্ছন্তি  
তেষাং দুর্গতিঃ ক্রিয়তে ইতি শ্রদ্ধা সর্ব্বেষামেব ভয়মুৎপন্নং মহাপ্রভাবে কোহপি ন  
শ্রাবয়তি। অশ্মৎ সীমাধিকারিণোক্তম্। অত্র কিয়ান্ বিলম্বঃ ক্রিয়তাং  
যাবন্ময়াহনেন সহ সন্ধিঃ সঙ্কীয়তে।”

[ এখান থেকে দেবাধিকার (মহারাজের অধিকার) যে পর্যন্ত, আপনাব পথের সমস্ত বিষয় নিরুত্ত হওয়াতে সকলে অনায়াসেই বিনা ভ্রমণে গিয়েছিল। গোড়দেশের সীমায় প্রবেশ করবার তিনটি পথ ছিল, তাদের মধ্যে দু'টি রুদ্ধ। একটি জলপথ, কিন্তু সেই জলপথেই (চৈতন্যদেব) প্রস্থান করছিলেন। সেই সীমার অধিকারী মহামত্তপ এবং হৃদয়জাত ব্রণের মত সকলের মর্ম্মপীড়ক দুর্ব্বৃত্তদের চূড়ামণি এক তুরুক্ষ (মুসলমান) ব্যক্তি আছে, সে এই দেশ থেকে যারা যায় সকলের দুর্গতি করে থাকে। একথা শুনে সকলেই ভয় পেলেন, কিন্তু মহাপ্রভুকে কিছুই শোনালেন না। আমাদের সীমাধিকারী বললেন, “যে পর্যন্ত এর সঙ্গে সন্ধি না হয় সে পর্যন্ত (মহাপ্রভু) এখানেই থাকুন।” ]

কৃষ্ণদাস কবিরাজ ‘চৈতন্যচরিতামৃত’ের মধ্যলীলা ষোড়শ অধ্যায়ে কবিকর্ণপুরেরই অম্লরূপ বিবরণ লিপিবদ্ধ করেছেন। মহাপ্রভু উৎকল-গোড় সীমান্তে উপনীত হবার পরে তাঁর প্রতি উড়িষ্যার সীমাধিকারীর উক্তি কৃষ্ণদাস কবিরাজ এইভাবে লিপিবদ্ধ করেছেন,

মত্তপ যবন রাজার আগে অধিকার।

তার ভয়ে পথে কেহ নায়ে চলিবার ॥

পিছলদা পর্যন্ত সব তার অধিকার ।  
তার ভয়ে নদী কেহ হৈতে নারে পার ।  
দিন কথো রহ সন্ধি করি তার সনে ।  
তবে স্থখে নৌকাতে করাইব গমনে ॥

এই নদী যে মল্লেশ্বর নদ, তা কবিকর্ণপুর ও কৃষ্ণদাস কবিরাজ দুজনেই বলেছেন। বাংলার “যবন” সীমাধিকারী হঠাৎ চৈতন্যদেবের প্রতি ভক্তিভাব প্রদর্শন করল এবং কৃষ্ণদাস কবিরাজের ভাষায় চৈতন্যদেবকে

মল্লেশ্বর দুষ্টনদ পার করাইল ।  
পিছলদা পর্যন্ত সেই যবন আইল ॥

কৃষ্ণদাস কবিরাজ বাংলার মুসলমান সীমাধিকারীকেই “মগপ যবন রাজা” বলেছেন, হোসেন শাহকে নয়। মল্লেশ্বর নদ থেকে সুরু করে পিছলদা পর্যন্ত এই মুসলমান সীমাধিকারীর কর্তৃত্বাধীন ছিল।

কবিকর্ণপুর ও কৃষ্ণদাস কবিরাজের এইসব উক্তি থেকে বোঝা যায়, অন্তত ১৫১২ খ্রি: থেকে ১৫১৪ খ্রি: পর্যন্ত বাংলা ও উড়িষ্যার মধ্যে যুদ্ধ বন্ধ ছিল এবং ১৫১৪ খ্রীষ্টাব্দের সেপ্টেম্বর মাসে উভয় রাজ্যের মধ্যে সন্ধি আসন্ন হয়ে উঠেছিল। ঐ সময় সত্যিই যে দুই রাজ্যের মধ্যে যুদ্ধ হচ্ছিল না, তা সমসাময়িক পত্নীগীজ পর্যটক দুয়ার্তে বারবোসার ভ্রমণ-বিবরণী থেকে জানা যায়। বারবোসা ১৫১৪ খ্রীষ্টাব্দে বাংলা ও উড়িষ্যায় ভ্রমণ করেন। তিনি উড়িষ্যার বর্ণনা দেবার সময় লিখেছেন, উড়িষ্যার রাজার এলাকার পরেই, “...commences the kingdom of Bengal, with which he ( the king of Orissa ) is sometimes at war.” বারবোসার ভাষা থেকে বোঝা যায়, ঠিক ঐ সময়ে বাংলা ও উড়িষ্যার মধ্যে যুদ্ধ হচ্ছিল না।

কিন্তু ১৫১৫ খ্রীষ্টাব্দে আবার নতুন করে দুই দেশের মধ্যে যুদ্ধ বাধে। আগেই বলা হয়েছে, ১৫১৪ খ্রীষ্টাব্দের সেপ্টেম্বর মাসে মহাপ্রভু বাংলায় আসেন। ১৫১৫ খ্রীষ্টাব্দের জুন মাস পর্যন্ত তিনি বাংলায় ছিলেন। এই সময়ের মধ্যেই এক সময় তিনি গোড়ের কাছে রামকেলি গ্রামে যান। রামকেলি গ্রামে হোসেন শাহের মন্ত্রী সনাতন তাঁর সঙ্গে দেখা করলেন এবং সেই থেকেই তিনি তাঁর একান্ত ভক্ত হয়ে পড়লেন। ‘চৈতন্যচরিতামৃত’ মধ্যলীলা ১২শ অধ্যায়ের নিয়োক্ত উক্তি থেকে বোঝা যায় যে, চৈতন্যদেব বাংলা থেকে চলে যাবার

কিছুদিন পরে হোসেন শাহ নিজেই সৈন্তবাহিনী নিয়ে উড়িষ্যায় যুদ্ধ করতে যান,

হেন কালে গেল রাজা উড়িয়া মারিতে ।

সনাতনে কহে তুমি চল মোর সাথে ॥

তেহৌ কহে যাষে তুমি দেবতায় দুঃখ দিতে ।

মোর শক্তি নাহি তোমার সঙ্গে যাইতে ॥

কৃষ্ণদাস কবিরাজ সনাতনের ঘনিষ্ঠ সান্নিধ্য লাভ করেছিলেন। স্তব্বাং সনাতন যে ব্যাপারের সঙ্গে জড়িত, সে সম্বন্ধে তাঁর উক্তির প্রামাণিকতা অবিসংবাদিত। তাঁর উক্তি থেকে পরিষ্কার বোঝা যায়, ১৫১৫ খ্রীষ্টাব্দের জুন মাসের কিছু পরে বাংলার সঙ্গে উড়িষ্যার যুদ্ধ আবার নতুন করে বাধল, যে যুদ্ধ ইতিপূর্বে শেষ হয়ে এসেছিল।

আর একটি চৈতন্যচরিতগ্রন্থ—জয়ানন্দের ‘চৈতন্যমঙ্গলে’ এবিষয়ে কিছু নতুন সংবাদ পাওয়া যায়। এই বইয়ের মতে উড়িষ্যার রাজা প্রতাপরুদ্র বাংলাদেশ আক্রমণের সঙ্কল্প করেছিলেন, কিন্তু চৈতন্যদেব বাংলার স্থলতানের প্রচণ্ড শক্তির কথা বলে তাঁকে নিরস্ত করেন। জয়ানন্দের ‘চৈতন্যমঙ্গলে’র ‘বিজয়খণ্ডে’ হরিদাস ঠাকুরের নীলাচল গমন বর্ণনার ঠিক পরেই এই প্রসঙ্গটি উল্লিখিত হয়েছে। আমরা এই বইয়ের একটি প্রাচীন পুঁথি থেকে এই অংশটি উদ্ধৃত করছি।

( চৈতন্যদেব ) এইমতে আছেন বৎসর দুই চারি ।

গোড়ে উৎকলে পড়িল মহা সারি ॥

প্রতাপরুদ্র গোড় জিনিতে করে আশা ।

শুনিঞা গোড়েন্দ্র তারে করেন উপহাসা ॥

চৈতন্যদেবের রাজা আজ্ঞা মাগিল ।

প্রভু বলে প্রতাপরুদ্র কুবুদ্ধি লাগিল ॥

কালঘবন রাজা পঞ্চগোড়েশ্বর ।

সিংহশাৰ্দুলে দেখ কতক আস্তর ॥

উড়দেশ উচ্ছন্ন ক( ি )রবেক যবনে ।

জগন্নাথ নীলাচল ছাড়িবেন এতদিনে ॥

লজ্জা পাবে প্রতাপরুদ্র আমার বাক্য ধর ।

গোড়মুখে শয়ন ভোজন পাছে কর ॥

কাঞ্চ( ি )দেশ বিজয়া জিনিলেক নানা রাজ্য ।

গৌড় জিনিবে হেন না দেখী সে কার্য্য ॥

গৌড়েশ্বর অবশ্য আসিবে নীলাচলে ।

তুমি ছাড়িবে প্রলয় হইব উৎকলে ॥

প্রভু নিবারণেন শুনিঞা প্রতাপরুদ্র ।

বিজয়ানগর গেল করিবারে যুদ্ধ ॥

( এশিয়াটিক সোসাইটির G-5398-6-c.4নং পুঁথি, ১৩৬ক পত্র )

জয়ানন্দের এই বিবরণে অবিশ্বাস্য কিছুই নেই। কারণ যদিও চৈতন্যদেব নীলাচলে বাস করবার সময় সংসারধর্ম ত্যাগ করেছিলেন, তাঁর বাস্তব বুদ্ধি ও বিচক্ষণতা কোন সময়েই তিনি বিসর্জন দেননি। ‘চৈতন্যভাগবত’ ও ‘চৈতন্যচরিতামৃত’ তাঁর নীলাচল-বাসের যে বর্ণনা পাই, তাতে দেখি ভক্তদের সঙ্গে কথা বলা থেকে শুরু করে নানা বিষয়েই তিনি সব সময় পরিণত বাস্তববোধের পরিচয় দিয়েছেন। হোসেন শাহের ব্যক্তিত্ব ও শক্তি সম্বন্ধে চৈতন্যদেবের খুব স্পষ্ট ধারণা ছিল। ‘চৈতন্যচরিতামৃত’ মধ্যলীলা ১৫শ পরিচ্ছেদে দেখি চৈতন্যদেব হোসেন শাহকে “মহাবিদগ্ধ রাজা” বলছেন। সুতরাং প্রতাপরুদ্র হোসেন শাহের রাজ্য আক্রমণ করতে চাইলে চৈতন্যদেব তাঁর পরম ভক্ত প্রতাপরুদ্রকে হোসেন শাহের পরাক্রমের কথা বলে সতর্ক করে দেবেন, এ ব্যাপার খুবই স্বাভাবিক। প্রতাপরুদ্রের মজল-চিন্তার চেয়ে জগন্নাথ-মন্দিরের নিরাপত্তার ভাবনা চৈতন্যদেবের মনে আরও বেশী করে জাগা স্বাভাবিক এবং তা যে জেগেছিল, উপরে উদ্ধৃত অংশে তারই পরিচয় পাওয়া যায়। সুতরাং জয়ানন্দের এই বিবরণ মধ্যম বলেই মনে হয়। উদ্ধৃত অংশের শেষ ছত্রে বলা হয়েছে বাংলাদেশ আক্রমণে বিরত হয়ে প্রতাপরুদ্র “বিজয়ানগর গেল করিবারে যুদ্ধ”। চৈতন্যদেবের নীলাচলে আগমনের পরে অন্তত ১৫১৫-১৬ খ্রীষ্টাব্দ পর্যন্ত যে প্রতাপরুদ্র বিজয়নগরের রাজা কৃষ্ণদেব রায়ের সঙ্গে যুদ্ধ করেছিলেন, তার প্রমাণ আছে (The Gajapati Kings of Orissa by Prabhat Mukherjee, pp. 81-82 দ্রষ্টব্য)। এই সমস্ত বিষয় থেকে মনে হয়, জয়ানন্দের ‘চৈতন্যমঙ্গল’র পূর্বেকৃত বিবরণ মূলত সত্য।

এই প্রসঙ্গে বিশেষভাবে দ্রষ্টব্য যে প্রতাপরুদ্রের বিজয়নগরে যুদ্ধ করতে যাবার পিছনে চৈতন্যদেবের কোন হাত ছিল না, তিনি যে প্রতাপরুদ্রকে বিজয়নগর আক্রমণ করতে বলেছিলেন, এমন কোন কথা উদ্ধৃত অংশে নেই। অথচ নগেন্দ্রনাথ বসু তাঁর সম্পাদিত জয়ানন্দের ‘চৈতন্যমঙ্গল’র ভূমিকায়

(পৃ: ১৩০) এই অংশটি যেভাবে উদ্ধৃত করেছেন\*, তার থেকে মনে হয় চৈতন্যদেবই প্রতাপরুদ্রকে বিজয়নগরে অভিধান করতে বলেছিলেন; কারণ নগেন্দ্রনাথের উদ্ধৃত অংশে চৈতন্যদেবের উক্তির অন্তর্গত একটি চরণের এই পাঠ দেখা যায়,

কাঞ্চীদেশ জিনি কর নানা রাজ্য।

এই চরণটিকে অবলম্বন করে এপর্যন্ত বহু আলোচনা ও বিতর্ক হয়েছে। চৈতন্যদেব প্রতাপরুদ্রকে বাংলাদেশ আক্রমণ করতে না বলে হিন্দুরাজ্য কাঞ্চী আক্রমণ করতে বলেছিলেন, একথা যারা বিশ্বাস করেছেন তাঁরা চৈতন্যদেবের উপর দোষারোপ করেছেন; যারা বিশ্বাস করেননি, তাঁরা একথা লেখার জ্ঞান জয়ানন্দের উপর দোষারোপ করেছেন। কিন্তু আমাদের ব্যবহৃত প্রাচীন পুথিতে চরণটির এই পাঠ পাওয়া যায় না। তাতে আছে,

কাঞ্চ (ী) দেশ বিজয়া জিনিলেক নানা রাজ্য।

সুতরাং নগেন্দ্রনাথের দেওয়া পাঠ একেবারেই ভ্রান্ত। অথচ এরই উপর নির্ভর করে চৈতন্যদেব বা জয়ানন্দের উপর এতদিন দোষারোপ করা হয়েছে। চৈতন্যদেবের পক্ষে প্রতাপরুদ্রকে “কাঞ্চীদেশ বিজয়া জিনিলেক নানা রাজ্য” বলা মোটেই অসম্ভব বা অস্বাভাবিক নয়।

চৈতন্যচরিতগ্রন্থগুলির সাক্ষ্য আমরা বিশ্লেষণ করলাম। এখন এসম্বন্ধে উড়িষ্যায় যে সমস্ত সূত্র পাওয়া গিয়েছে, তাদের সাক্ষ্য বিচার করব।

এদের মধ্যে সর্বপ্রথমে উল্লেখযোগ্য জগন্নাথমন্দিরের ‘মাদলা পাজী’। মনোমোহন চক্রবর্তী প্রথম আলোচ্য বিষয় সম্বন্ধে ‘মাদলা পাজী’র সাক্ষ্যের উল্লেখ করেন (JASB, 1900, Pt. I, p. 186 দ্রষ্টব্য)। তিনি কিন্তু একটি ভুল করেছিলেন। তিনি লিখেছিলেন যে ‘মাদলা পাজী’তে উল্লিখিত উড়িষ্যা-অভিযানে বাংলার সৈন্যবাহিনীর নেতৃত্ব করেছিলেন ইসমাইল

\* নগেন্দ্রনাথ বহু জয়ানন্দের ‘চৈতন্যমঙ্গল’র ভূমিকার যদিও ‘বিজয়খণ্ড’ থেকে আলোচ্য অংশটি উদ্ধৃত করেছেন, বইয়ের মধ্যে কিন্তু এই অংশটি ছাপা হয়নি। ডঃ বিমানবিহারী মজুমদার (শ্রীচৈতন্যচরিতের উপাদান, ২য় সং, পৃ: ২৪৮-এ) লিখেছেন, “মুক্তি গ্রন্থের ১৩৯ পৃষ্ঠা হইতে ১৪০ পৃষ্ঠার মুক্তি বিজয়খণ্ডের মধ্যে এই পংক্তিগুলি পাওয়া গেল না। কুলজীশাক্সের অনেক জালপুঁথি দেখিয়া বহু মহাশয় যেমন ভ্রান্ত হইয়াছিলেন, আলোচ্য গ্রন্থের বেলাতেও কি তাহার পুনরাবৃত্তি ঘটয়াছিল?” কিন্তু এই পংক্তিগুলি নগেন্দ্রবাবুর স্বকপোলকল্পিত নয়, কারণ এশিয়াটিক সোসাইটির পুঁথিতে এগুলি ‘বিজয়খণ্ডে’ যথাযথভাবেই পাওয়া যায়। সম্ভবত নগেন্দ্রনাথের অসাবধানতার দরুন জয়ানন্দের ‘চৈতন্যমঙ্গল’ ছাপবার সময় এই অংশটি বাদ পড়ে গিয়েছিল।

গাজী। কিন্তু ‘রিসালৎ-ই-উহাদা’ নামক ফার্সী গ্রন্থে পরিষ্কার লেখা আছে যে ইসমাইল গাজী বারবক শাহের সমসাময়িক ছিলেন এবং তাঁরই আদেশে (৮) ৭৮ হিজরায় প্রাণদণ্ডে দণ্ডিত হয়েছিলেন। আলাউদ্দীন হোসেন শাহের রাজত্বকালে যে ইসমাইল গাজী জীবিত ছিলেন না, তার আর একটি প্রমাণ হচ্ছে এই যে, হুগলী জেলার মান্দারণ ও রংপুর জেলার কাঁটাছুরারে ইসমাইল গাজীর যে দুটি সমাধি আছে, দুটিতেই আলাউদ্দীন হোসেন শাহের শিলালিপি পাওয়া যায়; মান্দারণের শিলালিপির তারিখ ২০০ হিজরা বা ১৪২৪-২৫ খ্রীঃ—হোসেন শাহের রাজত্বের দ্বিতীয় বছর। এই সব প্রমাণ থেকে বোঝা যায় যে ‘মাদলা পাজী’তে বর্ণিত হোসেন শাহের ১৫০২ খ্রীষ্টাব্দে উড়িষ্যা-আক্রমণে ইসমাইল গাজীর নেতৃত্ব করার কথা মনোমোহন চক্রবর্তীর কল্পনা ভিন্ন আর কিছুই নয়। ‘মাদলা পাজী’তে ইসমাইল গাজীর নামগন্ধও নেই। তাতে স্বয়ং হোসেন শাহের উড়িষ্যা-অভিযানে সৈন্যবাহিনীর নেতৃত্ব করার কথা আছে। ‘মাদলা পাজী’র প্রতাপরুদ্র সংক্রান্ত বিবরণে (‘মাদলা পাজী’, প্রাচী সংস্করণ, পৃঃ ৫২-৫৩ দ্রষ্টব্য) গোড়ের স্থলতানের উড়িষ্যা-আক্রমণ সম্বন্ধে এই লেখা আছে,

“এ রাজ্য ১৭ অঙ্কে গউড়নগর মুগল বাহিলে। কটক নিকটে সে টারা পকাইলে। কটক রথিআ হোইথিলে ভোই বিজাধর। সে যাইং ধইলে সারঙ্গগড় (পাঠান্তর—এ সজ্জালি ন পারি শারঙ্গগড় রহিলে)। পরমেশ্বরঙ্ক চকা ছড়াই চাপরে বসাই চড়াইগুহা পর্বতে বিজে করাইলে। শ্রীপুরুষোত্তমে আসি গোড় পাতিশা অমুরা স্বরথান প্রবেশ হোইলে। বড় দেউলে যেতে পিতুলামান থিলে সবুকাহিং খুণ কলে। দখিণ কটকাইরে যে রজা যাইথিলে সেঠারে রজা বারতা পাইলে। বড় ক্রোধ করি মাসক বাট দশ দিনে অইলে। বারতা পাই অলাপতি স্বরথান শ্রীপুরুষোত্তমরু ভাঙ্গিলা। রজা তাহাক পছে লাগি কটকে ন রহি গঙ্গা পরিষন্তে অলাপতি স্বরথানকু গোড়াই চউমুহিঠারে রহি বহত যুব কলে। এঠাকু ভাঙ্গি স্বরথান মন্দারুণী রহিলে। মন্দারুণী ছড়াই রজাএ আবোনি রহিলে। গোবিন্দ বিজাধর যাই স্বরথানকু যাই পেষিলে। রজাকু সে দোরেহা হোইলে। স্বরথানকু ঘেনি বাছাড় অইলে। মন্দারুণী গড়-ঠাইং বহত যুব রহি কলে। রাজা বারু লাগি হোইং হাথী দণ্ড ঘেনি বহত গোল যুব কলে। গোবিন্দ ভোই বিজাধর যুবরে রজাকু ভঙ্গাইলে।



হাখীদও ঘেনি রাজা ভাঙ্গি অইলে। সেঠারে তাক্ লোক পঠিআইলে। আস্ত উক্তাক্ কাহাক্ করিচ পচার বোইলে, এহা শুনি গোবিন্দ ভোই বিত্‌ধর রাজাক্ আসি দরশন কলে। বহত স্কৃত তাহাক্ রাজা কলে। কনক স্নাহান করাইলে, বিত্‌ধর পদরে রাজা তাহাক্ শাটি দেলে, পাত্র কলে। তাহাক্ মূলে রাজা রাজ্যভার দেলে। সেহিঠারে সুরথান তাক্ রাজ্যারে রহিলে ( পাঠাস্তর—সেঠাক্ সুরথান তাক্ রাজ্যাক্ গলে )।”

[ এই রাজার ( প্রতাপরুদ্রের ) মতের অঙ্কে গোড়নগর থেকে মোগল আক্রমণ করে। কটকের কাছে তারা তাঁবু গাড়ল। কটক রক্ষা করছিলেন ভোই বিত্‌ধর। তিনি সারঙ্গগড়ে গিয়ে আশ্রয় নিলেন (পাঠাস্তর অল্পসারে—তিনি আটকাতে না পেরে শারঙ্গগড়ে আশ্রয় নিলেন)। তিনি পরমেশ্বরকে ( জগন্নাথকে ) আস্তানা থেকে ( পুরীর মন্দির থেকে ) নিয়ে দোলায় বসিয়ে চড়াইগুহা পর্বতে রাখলেন। গোড়ের পাংশা আমীর সুলতান শ্রীপুরুষোত্তমে এসে প্রবেশ করলেন। বড় মন্দিরে যত মূর্তি ছিল, সবগুলিই তিনি নষ্ট করলেন। রাজা দক্ষিণে অভিযানে গিয়েছিলেন। সেখানে রাজা খবর পেলেন। বড় ক্রোধ করে তিনি এক মাসের পথ দশ দিনে এলেন। খবর পেয়ে অলাপতি ( আলাউদ্দীন ) সুলতান শ্রীপুরুষোত্তম থেকে পালালেন। রাজা তখন শিছু পিছু ধাওয়া করে কটকে না থেকে গঙ্গা পর্যন্ত অলাপতি সুলতানকে তাড়া করে চউমুহির কাছে অনেক যুদ্ধ করলেন। এখান থেকে পালিয়ে সুলতান মান্দারণে রইলেন। রাজা ( তাঁকে ) মান্দারণ থেকে তাড়িয়ে ( মান্দারণ দুর্গ ) অবরোধ করে রইলেন। গোবিন্দ বিত্‌ধর গিয়ে সুলতানের সঙ্গে যোগ দিলেন। রাজার প্রতি তিনি বিশ্বাসঘাতক হলেন, সুলতানকে নিয়ে ফিরে এলেন। মান্দারণ দুর্গে ( তাঁরা ) খুব যুদ্ধ করলেন। রাজা জয়লাভের জন্ত হাতী এবং সৈন্তবাহিনী নিয়ে খুব দারুণ যুদ্ধ করলেন। গোবিন্দ বিত্‌ধর যুদ্ধে রাজাকে তাড়ালেন। হাতী এবং সৈন্তবাহিনী নিয়ে রাজা পালিয়ে এলেন। সেখানে তাঁকে ( গোবিন্দ বিত্‌ধরকে ) লোক পাঠালেন। “আমাকে সরিয়ে কাকে ( রাজা ) করছ” প্রশ্ন করলেন। তা শুনে গোবিন্দ ভোই বিত্‌ধর রাজাকে এসে দর্শন দিলেন। রাজা তাঁকে অনেক সমাদর করলেন, কনকস্নান করালেন। রাজা তাঁকে বিত্‌ধর-পদে অধিষ্ঠিত করলেন, পাত্র করলেন। তাঁরই উপর রাজা রাজ্যভার

দিলেন। সেইখানে সুলতান তার রাজ্যে রইলেন (পাঠান্তর অনুসারে—সেখান থেকে সুলতান তাঁর রাজ্যে গেলেন)।]

প্রতাপরুদ্রের রাজত্বের ১৭শ অঙ্ক\* ১৫০২ খ্রীষ্টাব্দের সেপ্টেম্বর মাসে শুরু হয় এবং ১৫১০ খ্রীষ্টাব্দের সেপ্টেম্বর মাসে শেষ হয়। ১৫১০ খ্রীষ্টাব্দের জানুয়ারী মাসে চৈতন্যদেব নীলাচলে যান। ঐ সময়ে বর্তমান ২৪ পরগণা জেলার অন্তর্গত এবং কলকাতার ২৫ মাইল দক্ষিণ-পশ্চিমে অবস্থিত ছত্রভোগ ছিল বাংলা-উড়িষ্যার সীমানায় বাংলার শেষ ঘাঁটি। ১৫০২ খ্রীঃ সেপ্টেম্বর থেকে ১৫১০ খ্রীঃ জানুয়ারী—মাত্র এই কয় মাসের মধ্যে বাংলার সুলতানের পুরী অবধি অধিকার, সেখান থেকে উড়িষ্যার রাজার কাছে তাড়া খেয়ে মান্দারণ অবধি পশ্চাদপসরণ এবং আবার মান্দারণ থেকে ছত্রভোগ অবধি অধিকার নিশ্চয়ই ঘটেনি। ১৫১০ খ্রীঃ জানুয়ারী থেকে এপ্রিল পর্যন্ত সময়ের মধ্যেও ঘটেনি, কারণ চৈতন্যদেব ঐ সময়ে নীলাচলে ছিলেন, এর মধ্যে নীলাচল মুসলমানদের হাতে যাওয়ার মত এত বিরাট একটা ঘটনা ঘটে গেলে চৈতন্য-চরিতগ্রন্থগুলিতে নিশ্চয়ই তার উল্লেখ থাকত। ১৫১০ খ্রীঃ এপ্রিল মাসে চৈতন্যদেব দক্ষিণ ভারত অভিমুখে যাত্রা করেন এবং তার দু'বছর বাদে নীলাচলে ফেরেন। সুতরাং 'মাদলা পাঞ্জী'র বিবরণে বাংলার সুলতানের যে উড়িষ্যা-অভিযানের কথা আছে, তা যদি সত্যই ঘটে থাকে, তাহলে ১৫১০ খ্রীঃ এপ্রিল থেকে সেপ্টেম্বর মাসের মধ্যে ঘটেছিল সন্দেহ নেই।

কিন্তু 'মাদলা পাঞ্জী'র উল্লিখিত বিবরণকে ছবছ সত্য বলে গ্রহণ করতে অস্বীকার আছে। আলোচ্য যুগের ঘটনা সম্পর্কে 'মাদলা পাঞ্জী'র উক্তির প্রামাণিকতা সম্বন্ধে শ্রীযুক্ত প্রভাত মুখোপাধ্যায় লিখেছেন, "...the dates of the events of this period are wrongly given in the Mādala Pāñjī in most cases...There are indications that the Mādala Pāñjī was compiled shortly after the Mughal conquest of Orissa...The temple priests depended on traditional accounts, true stories and stray records of temple

---

\*১৭শ অঙ্ক মানে ১৭শ বর্ষ নয়। বর্ষ-গণনার সঙ্গে অঙ্ক-গণনার পার্থক্য এই যে অঙ্ক-গণনার সময় কতকগুলি সংখ্যাকে "অশুভ" বলে বাদ দেওয়া হয়। এই সংখ্যাগুলি হচ্ছে—১, যে সব সংখ্যার শেষে ৬ আছে এবং ১০ ছাড়া অষ্ট যে সব সংখ্যা শূন্য দিয়ে শেষ হয়। "অঙ্ক"র বছর জ্ঞাপনাসের সূত্রা দ্বাবশী় তিথি থেকে শুরু হয়।

administration when they compiled the *Mādala Pāñji*. (The Gajapati Kings of Orissa, pp. 7-8) স্মৃতাং আলোচ্য বিষয় সম্বন্ধে ‘মাদলা পাঞ্জী’র বিবরণকে সর্বাংশে সত্য বলে গ্রহণ করা দুঃসহ।

যাহোক ‘মাদলা পাঞ্জী’তে খুব স্পষ্টভাবে লেখা হয়েছে যে “গৌড় পাতিসা অমুরা স্বরথান” অর্থাৎ “গৌড় পাংশা আমীর সুলতান” স্বয়ং গৌড় বাহিনীর নেতৃত্ব করেছিলেন। সুলতানের নাম বলা হয়েছে “অলাপতি” অর্থাৎ আলাউদ্দীন।\* এখানেও ‘মাদলা পাঞ্জী’ নির্ভুল। কিন্তু এই সুলতানকে “মোগল” বলা ‘মাদলা পাঞ্জী’র একটি প্রকাণ্ড ভুল এবং তার আধুনিকতা ও নাতি-প্রামাণিকতার অগ্রতম প্রমাণ। কিন্তু এই যুদ্ধ সম্বন্ধে ‘মাদলা পাঞ্জী’র সাক্ষ্যকে একেবারে উড়িয়ে দেওয়া যায় না। প্রতাপরুদ্রের বেলিচেরুলা তাম্রশাসন এবং ‘কটকরাজবংশাবলী’ থেকে ‘মাদলা পাঞ্জী’র বিবরণের সমর্থন পাওয়া যায়।

‘মাদলা পাঞ্জী’র বিবরণের আর একটি নতুন বিষয় হল গোবিন্দ বিজ্ঞাধরের প্রতাপরুদ্রের সঙ্গে বিশ্বাসঘাতকতা করে হোসেন শাহের দলে যোগদানের প্রসঙ্গ। গোবিন্দ বিজ্ঞাধর ঐতিহাসিক ব্যক্তি। ষোড়শ শতাব্দীর পঞ্চম দশকে তিনি উড়িষ্যার রাজা হয়েছিলেন। এরকম একজন প্রভাবশালী ব্যক্তির বিশ্বাস-ঘাতকতার ফলেই প্রতাপরুদ্রের প্রথমে পরাজয় ঘটেছিল এবং তাঁকে ফিরে পেয়ে তিনি পরে জয়যুক্ত হলেন, একথা সম্পূর্ণ বিশ্বাসযোগ্য।

মোটের উপর, আলোচ্য বিষয় সম্পর্কে ‘মাদলা পাঞ্জী’র উক্তি সম্পূর্ণ নির্ভরযোগ্য না হলেও তার মধ্যে যে কিছু কিছু সত্যের উপাদান রয়েছে, তাতে কোন সন্দেহ নেই।

যা হোক, নাতিপ্রামাণিক ‘মাদলা পাঞ্জী’ ছাড়া উড়িষ্যার আলোচ্য বিষয় সম্বন্ধে অত্র কিছু কিছু স্মৃতিও পাওয়া যায়। প্রতাপরুদ্রের কয়েকটি শিলালিপি ও শাসনে এসম্বন্ধে উল্লেখ আছে। বর্তমান অন্ধ্র রাজ্যের অন্তর্গত গুন্টুর জেলার ইজুপুলপহু গ্রামের চেম্বা কেশব মন্দিরে প্রতাপরুদ্রের এক শিলালিপি পাওয়া যায়। (South Indian Inscriptions, Vol. X, No. 732 দ্রষ্টব্য।) এটি ১৪২২ শকাব্দের কার্তিক মাসে চন্দ্রগ্রহণের দিন অর্থাৎ ৫ই নভেম্বর, ১৫০০ খ্রীষ্টাব্দে উৎকীর্ণ হয়েছিল। এতে লেখা আছে,

\* কবীন্দ্র পরমেশ্বরের মহাভারতের কোন কোন পুঁথিতে আলাউদ্দীন হোসেন শাহকে “অলাপদীন” বলা হয়েছে।

সমুদ্র গোড়েন্দ্র কদন কথিতা-

শেষবিজয় প্রতাপশ্রীকৃত্রো জয়তি

সমরে শত্রুনিকরান্ ॥

এর অর্থ :—সমুদ্র গোড়রাজের কদনের দ্বারা যার শেষ বিজয় কাথিত  
হয়েছিল সেই প্রতাপশ্রীকৃত্র সমরে শত্রুবর্গকে জয় করেন । এখানে প্রতাপকৃত্রের  
কাছে গোড়ের রাজা পরাজিত হয়েছিলেন বলে দাবী করা হয়েছে ।

[ ঐ একই তারিখে অর্থাৎ ১৫০০ খ্রীঃর ৫ই নভেম্বরে উৎকীর্ণ প্রতাপকৃত্রের  
অনন্তবরম্ শাসনে ( Andhra Patrika Annual, 1929, pp. 175-176  
দ্রষ্টব্য ) লেখা আছে যে প্রতাপকৃত্র অঙ্গরাজকে বিতাড়িত করে পার্বত্য অঞ্চলে  
আশ্রয় নিতে বাধ্য করেছিলেন । অঙ্গরাজ্য বলতে আগেকার দিনে ভাগলপুর  
সমেত পূর্ব বিহারের এক বিস্তীর্ণ অঞ্চলকে বোঝাত । ১৫০০ খ্রীষ্টাব্দে এই  
অঞ্চলের অনেকাংশ হোসেন শাহের রাজ্যের অন্তর্ভুক্ত ছিল । কিন্তু বেহেতু  
অনন্তবরম্ শাসনে অঙ্গরাজের পার্বত্য অঞ্চলে আশ্রয় গ্রহণের উল্লেখ আছে,  
সেইজন্য মনে হয়, এখানে ‘অঙ্গরাজ’ অর্থে হোসেন শাহকে বোঝানো হয়নি,  
অন্ত কোন রাজাকে বোঝানো হয়েছে ; সম্ভবত ইনি ঝাড়খণ্ডের পার্বত্য  
অঞ্চলের রাজা । ]

নেল্লোর জেলার বেলিচেরুলা গ্রামে প্রতাপকৃত্রের তিনটি তাম্রশাসন পাওয়া  
গিয়েছে ; এগুলি আসলে একই শাসনের তিনটি অংশ ; প্রতাপকৃত্র এক  
ব্রাহ্মণকে বেলিচেরুলা গ্রাম দান করেছিলেন, এদের মধ্যে সেই কথাই বলা  
হয়েছে ( Epigraphica Indica, January, 1950, pp. 206-208 দ্রষ্টব্য ) ।  
এদের তারিখ শুদি কাতিক ৩ শুক্রবার “কর-রাম-অন্ধি-শীতাংস্ত” (১৪৩২) শকাব্দ,  
“প্রমোদান্ত” বর্ষ । এই তারিখ ইংরেজী কোন্ তারিখের সমান, তা নিয়ে কিছু  
মতভেদ আছে ( Epigraphica Indica, 1950, p. 206 দ্রঃ ), তবে ১৫১০  
খ্রীঃর সেপ্টেম্বর থেকে ১৫১১ খ্রীঃর অক্টোবরের মধ্যে কোন এক সময়ে এই  
তারিখ পড়বে । এই তাম্রশাসনগুলির মধ্যে দ্বিতীয়টিতে প্রতাপকৃত্র সম্বন্ধে  
লেখা আছে,

রৌদ্রঃ স গোড়-রাজস্ত বনানি জিত্বা

প্রভাগ্রহীন্ রাজ্যম্-অধিজ্য ধর্ম্য মন্ত্রেভ

কুন্তো সমরেহু যন্ত

দৃষ্টা পলাষা স্বপুরু প্রবেশ ভয়াকুলো গোড়-  
 পতিঃ কদাপি বিকী কুচৌ নেকিতুম্ ঈহতে স্ব  
 স ভূপতিস্বহারাজো রাজেন্দ্র-পর-  
 মেস্বরঃ শ্রীমদ্রাজাধিরাজেন্দ্র-পঞ্চগোড়াধিনায়কঃ।

এই শিলালিপিতে বলা হয়েছে যে প্রতাপরুদ্র গোড়ের রাজাকে বলপূর্বক পরাজিত করে নিজের হুতরাজ্য পুনরুদ্ধার করেছিলেন এবং তাঁর পশ্চাদ্ধাবন করেছিলেন, তার ফলে ভয়াকুল গোড়পতি নিজের পুরে ( দুর্গে ) প্রবেশ করে আত্মরক্ষা করেন। এই শিলালিপির উক্তি ‘মাদলা পাজীর উক্তিকে সমর্থন করছে। এই শিলালিপির আর একটি বৈশিষ্ট্য, প্রতাপরুদ্র এতে নিজেকে “পঞ্চগোড়াধিনায়ক” বলেছেন।

এইসব শিলালিপিও শাসনের শাস্ত্য থেকে আমরা বুঝতে পারছি যে ১৫০০ খ্রীঃ নভেম্বর মাসের আগেই হোসেন শাহের সঙ্গে প্রতাপরুদ্রের সংঘর্ষ শুরু হয়েছিল এবং ১৫০০ থেকে ১৫১০-১১ খ্রীঃ পর্যন্ত প্রতাপরুদ্র গোড়ের রাজার সঙ্গে যুদ্ধে জয়লাভের দাবী করেছেন।

সমসাময়িক উড়িষ্যা লেখকদের রচিত কয়েকটি গ্রন্থ থেকেও এসম্বন্ধে কিছু সংবাদ পাওয়া যায়। স্বয়ং প্রতাপরুদ্র ‘সরস্বতীবীলাসম্’ নামে একটি স্মৃতিগ্রন্থ রচনা করেছিলেন, তার অন্ততম পুষ্পিকায় তিনি “শরণাগত-জয়মুনাপুরাধীশ্বর-হুসনশাহস্বরজ্ঞাশরণরক্ষণ” বলে নিজের পরিচয় দিয়েছেন।\* স্মৃতির দৃষ্টান্ত দেখা যাচ্ছে, প্রতাপরুদ্র এখানে শুধুমাত্র হোসেন শাহকে পরাজিত করার গৌরব দাবী করেন নি, নিজেকে হোসেন শাহের রক্ষাকর্তা বলে ঘোষণা করেছেন।

কিন্তু প্রতাপরুদ্রের এই অদ্ভুত ঘোষণা করার অর্থ কী? এক অর্থ এই হতে পারে যে হোসেন শাহ কোন এক সময়ে প্রতাপরুদ্রের সঙ্গে যুদ্ধে স্তব্ধ হয়ে পড়েন না পেরে সন্ধি করতে বাধ্য হন, তাই প্রতাপরুদ্র নিজেকে হোসেন শাহের রক্ষাকর্তা বলে আত্মপ্রশাদ অনুভব করেছেন। কিন্তু এই জাতীয় সন্ধি যদি হয়েও থাকে, তা প্রতাপরুদ্র ও হোসেন শাহের যুদ্ধের শেষ ফলাফল নয়। ‘সরস্বতীবীলাসম্’র রচনাকালের দিকে লক্ষ্য রাখলেই একথা বোঝা যাবে। কোণারীড়ুর ব্রাহ্মণ লোভ লক্ষ্মীধর প্রতাপরুদ্রের সভাকাব ছিলেন।

বিজয়নগরের রাজা কৃষ্ণদেব রায় প্রতাপরুদ্রের কাছ থেকে কোণ্‌বীড় জয় করার পরে লোল্ল লক্ষ্মীধর প্রতাপরুদ্রকে ত্যাগ করে কৃষ্ণদেব রায়ের সভাকবি হন। কৃষ্ণদেব রায়ের পৃষ্ঠপোষকতা লাভ করে লোল্ল লক্ষ্মীধর শব্বরের ‘সৌন্দর্যলহরী’র যে টীকা রচনা করেন, তার শেষে তিনি লিখেছেন যে তিনিই প্রতাপরুদ্রদেবের (“বীররুদ্রগজপতি”) আজ্ঞায় ‘সরস্বতীবিলাসম্’ রচনা করেন। এই দাবী সত্য হোক বা না হোক, ‘সরস্বতীবিলাসম্’ যে কৃষ্ণদেব রায় কর্তৃক কোণ্‌বীড় জয় করার আগে রচিত, তা এর থেকে স্পষ্ট বোঝা যায়। কৃষ্ণদেব রায়ের মঙ্গলগিরি শিলালিপি থেকে জানা যায় যে ১৫১৫ খ্রীষ্টাব্দের ২৩শে জুন তারিখে তিনি কোণ্‌বীড় জয় করেন ( The Gajapati Kings of Orissa, by Prabhat Mukherjee, p. 79 )। তাহলে ‘সরস্বতীবিলাসম্’ নিশ্চয়ই তার আগে রচিত। কিন্তু ১৫১৫ খ্রীষ্টাব্দের জুন মাসের পরেও যে হোসেন শাহ উড়িষ্যার সঙ্গে যুদ্ধ করেছিলেন, তা আমরা ‘চৈতন্যচরিতামৃতে’র উক্তি উদ্ধৃত করে আগেই দেখিয়েছি।

প্রতাপরুদ্রের দীক্ষা-গুরু জীবদেবাচার্য কাবডিগুম্ব রচিত ‘ভক্তিভাগবত-মহাকাব্যম্’ থেকেও প্রতাপরুদ্র ও হোসেন শাহের যুদ্ধ সর্বদা কিছু সংবাদ পাওয়া যায়। ৩২ সর্গে বিভক্ত এই মহাকাব্যটির শেষে এক সুদীর্ঘ প্রশস্তি রয়েছে, তার মধ্যে কবি নিজের ও উড়িষ্যার রাজাদের বংশপরিচয় দিয়েছেন। আমরা নীচে এই প্রশস্তির ২৬শ থেকে ৩২শ সংখ্যক শ্লোক উদ্ধৃত করছি,

স্বর্লোকভোগরসিকে পুরুষোত্তমে  
তস্তান্বজঃ হরতরুর্ভাব বীররুদ্রঃ ।  
ভর্তাবৎসমুচিতো ধরণেনবীনঃ  
সৌন্দর্যসপ্তদশবৎসরমংস্রকেতুঃ ॥ ২৬  
সন্তোহভিষেকসলিলৈঃ কৃতমৌলিরেব  
সংখ্যে বিজিত্য রণজিহ্মগোড়রাজম্ ।  
নন্তাং নিবাপসলিলেন স বিষ্ণুপত্ন্যাং  
প্রাতর্পর্যংপৃথুশাঃ পিতরং ত্রিপক্ষে ॥ ২৭  
যো বৈরিপক্ষপন্নিতক্ষণদক্ষদীর্ঘ-  
দোর্দগ্ধপালিতমহীবলয়ো নরেন্দ্রঃ ।  
অদ্বৈতবাদপরিভুক্তরাস্তরাশ্রা  
দ্বৈতং তনোতি বহুদেবস্বতাবতারে ॥ ২৮

গোপালমৃতিকচিরা নবহেমমুদ্রা  
 যন্নামবর্ণলিখনান্নভাসমানাঃ ।  
 সর্বাসু দিগ্ধু বিহরন্তি যদীয়ভূক্তি-  
 মুক্তাশ্চ কণ্ঠকুহরে স্থধিয়াং লুঠন্তি ॥ ২০  
 তস্তাভবদ্ গুরুরসৌ কবিরাজরাজঃ  
 শ্রীমল্লিলোচননৃপালগুরোস্তনুজঃ ।  
 শ্রীজীবদেবকবিডিগুণপণ্ডিতেন্দ্রো  
 রত্নাবতীশিশুরনারতকৃষ্ণভক্তঃ ॥ ৩০  
 শ্রীকৃষ্ণদেবনৃপতাবথ বেক্ষটাদ্রৌ  
 কর্ণাটদেশাবজয়েন বসত্যাদারে ।  
 তেনাস্ত শীঘ্রকবিনা জগদীশ্বরস্ত  
 কাব্যং নিবদ্ধমিদমুজ্জলভক্তিসিদ্ধম্ ॥ ৩১  
 অঙ্কেহস্ত সপ্তদশকে নৃপতেঃ সপঞ্চ-  
 ত্রিংশাদচূষিতবয়াঃ কবিভিড়িমোয়হম্ ।  
 গোদাবরীপরিসরে নিবসন্নকাষীন্  
 মাসেন তত্র মকরণে মহাপ্রবন্ধম্ ॥

( JAS, Vol. IV, 1962, pp. 26-27 থেকে উদ্ধৃত )

এর ভাবাহুবাদ নীচে দেওয়া হল :—

পুরুষোত্তম অর্গলোকে গেলে তাঁর পুত্র বীররুদ্র কল্পতরু হলেন ; তাঁর বয়স ছিল ( ঐ সময়ে ) সপ্তদশ বৎসর\*, ( তাঁর ) সৌন্দর্য মীনকেতুর ( মদনের ) মত, তিনি পৃথিবীর উপযুক্ত প্রভু হলেন ॥ ২৬ ॥ তাঁর কেশ যখন সত্ত্ব অভিষেকের সলিলে সিক্ত, তখনই তিনি রণজয়ী গোড়রাজকে পরাজিত করলেন এবং পিতার মৃত্যুর তিন পক্ষের মধ্যই বিষ্ণুপদীর ( গঙ্গা ) নদীর জলে পিতার তর্পণ করলেন ॥ ২৭ ॥ ( সেই ) রাজা তাঁর দীর্ঘ বাহু দিয়ে তাঁর শত্রুদের দমন করেছিলেন এবং পৃথিবীকে পালন করেছিলেন, অদ্বৈতবাদে তাঁর অন্তরাত্মা পরিশুদ্ধ হয়েছিল, কিন্তু বহুদেবস্বতের অবতার হওয়ায় ( অর্থাৎ চৈতন্যদেবের আবির্ভাব হওয়ায় ) তিনি দ্বৈতবাদ প্রচার করেছিলেন ॥ ২৮ ॥ যার নাম লেখা গোপালের মূর্তি আঁকা স্বর্ণমুদ্রা সর্বত্র স্পষ্টচারিত এবং যার বাণীসমূহ মুক্তার

\* এর থেকে বোঝা যায় যে, প্রতাপরুদ্র ১৪৮০ খ্রীষ্টাব্দে জন্মগ্রহণ করেছিলেন, কারণ তিনি ১৪৯৭ খ্রীষ্টাব্দে সিংহাসনে আরোহণ করেন ।

মত স্বধীদেয় কণ্ঠে লুপ্তিত হয় ॥ ২৯ ॥ তাঁর গুরু, গুরুদেয়ও রাজার তুল্য  
ত্রিলোচনের পুত্র, স্বভাবলীল গর্ভজাত, কৃষ্ণভক্ত কবিরাজরাজ পণ্ডিতেন্দ্র  
শ্রীজীবদেব কবিভিণ্ডিম ॥ ৩০ ॥ রাজা রুদ্রদেব যখন কর্ণাট-বিজয় উপলক্ষে  
বেঙ্কটাজিতে বাস করছিলেন, সেই সময়ে শীঘ্রকবি ( জীবদেব কবিভিণ্ডিম )  
জগদীশ্বরের এই ভক্তিসমুজ্জ্বল কাব্য রচনা করেন ॥ ৩১ ॥ রাজার সপ্তদশ অঙ্কে,  
পঁয়ত্রিশ বর্ষ বয়সে প্রবেশকালে এই কবিভিণ্ডিম গোদাবরীতীরে অবস্থান  
করে মকর ( মাঘ ) মাসে এই মহাপ্রবন্ধ রচনা করলেন ॥ ৩২ ॥

প্রতাপরুদ্রের দীক্ষাগুরু জীবদেবাচার্য কবিভিণ্ডিম প্রতাপরুদ্রের রাজত্বের  
সপ্তদশ অঙ্কে অর্থাৎ ১৫০২-১০ খ্রীষ্টাব্দে এই কথাগুলি লিখেছিলেন। স্মরণ্য  
এদের ঐতিহাসিক মূল্য অনস্বীকার্য। জীবদেবাচার্যের উক্তি থেকে আমরা  
জানতে পারি যে প্রতাপরুদ্র তাঁর অভিষেকের অব্যবহিত পরেই বাংলার  
স্বলতানের সঙ্গে যুদ্ধে প্রবৃত্ত হন। জীবদেবাচার্য এই যুদ্ধে প্রতাপরুদ্রের জয়-  
লাভের এবং পিতার মৃত্যুর তিন পক্ষের ( ছয় সপ্তাহের ) মধ্যেই গঙ্গাতীরবর্তী  
অঞ্চল পর্যন্ত অধিকারের দাবী করেছেন। এই দাবী কতদূর সত্য তা বলা  
যায় না, কিন্তু প্রতাপরুদ্র ও হোসেন শাহের প্রথম সংঘর্ষের সময় সম্বন্ধে  
এই প্রত্যক্ষদর্শী লেখকের সাক্ষ্য যে সম্পূর্ণ প্রামাণিক, সে বিষয়ে কোন সন্দেহ  
নেই। প্রতাপরুদ্র ১৪১৭ খ্রীষ্টাব্দের এপ্রিল থেকে সেপ্টেম্বর মাসের মধ্যে  
সিংহাসনে আরোহণ করেন (The Gajapati Kings of Orissa, Prabhat  
Mukherjee, pp. 58-59 দ্রষ্টব্য)। স্মরণ্য হোসেন শাহ ও প্রতাপরুদ্রের  
প্রথম সংঘর্ষ যে ১৪২৭ খ্রীষ্টাব্দে ঘটেছিল, তাতে কোন সন্দেহ নেই। কিন্তু  
হোসেন শাহের ৮২২ হিজরা বা ১৪২৩-২৪ খ্রীষ্টাব্দের “কামরু-কামতা-  
জাজনগর-উড়িঙ্গা-বিজয়ী” উপাধিযুক্ত মুদ্রা থেকে বোঝা যায় যে, তারও আগে  
অর্থাৎ প্রতাপরুদ্রের পিতা পুরুষোত্তমের রাজত্বকালে বাংলার সঙ্গে উড়িঙ্গার  
সংঘর্ষ হ্রুৎ হয়েছিল। তবে ১৪২৩-২৪ খ্রীঃ থেকে ১৪২৭ খ্রীঃ, এই কয়  
বছরের যুদ্ধের বিবরণ বা ফলাফল সম্বন্ধে কোন সংবাদ কোথাও পাওয়া  
যায় না।

এরপর আমরা উড়িঙ্গার আর একটিমাত্র সূত্রের উল্লেখ করব। এটি হচ্ছে  
অর্বাচীন ‘কটকরাজবংশাবলী’ (Further Sources of Vijaynagar  
History, no. 94)। এতে লেখা আছে যে প্রতাপরুদ্রের রাজত্বের “সপ্তমবর্ষে  
মুগল নামক সেনা আগত্য কটকনিকটে স্থিতাঃ। কটকরক্ষকেনানন্তসামন্তরায়-



ভিধেন কটকচুর্গ ত্যক্ত্ব সারঙ্গগড়নায়কচুর্গে স্থিতম্। ত্রিজগন্নাথপ্রতিমাচতুষ্টয়ম্  
নোকায়ান্ স্থাপয়িত্বা চিলকাভিধজলমধ্যে চজায়ি (চড়ায়ি) গুহানামকপর্বতে  
স্থাপিতবান্। মুগলাভিধঘবনমুখ্যেন অমুরা (অমুরা) হুরহাহুনামকেন  
ত্রীপুত্রবোক্তমক্কেত্র আগত্য মন্দিরমধ্যে প্রতিমাদিকং ভগ্নং কৃতম্। অনন্তরং  
দক্ষিণদিক্স্থিত্যর্থম্ গভেন রাজ্যে শ্রদ্ধা ঘবনাদিকং গছোমুখীকৃত্বা গঙ্গাতীরপর্বন্তম্  
নীতঃ।” ‘মাদলা পাঞ্জী’র বিবরণের সঙ্গে এই বিবরণের মিল আছে। সম্ভবত  
‘মাদলা পাঞ্জী’ থেকে এই বিবরণ নেওয়া। তবে ‘মাদলা পাঞ্জী’তে লেখা আছে  
যে প্রতাপরুদ্রের সপ্তদশ অঙ্কে গোড়ের স্থলতান উড়িষ্যা আক্রমণ করেছিলেন  
আর এতে বলা হয়েছে প্রতাপরুদ্রের রাজত্বের সপ্তম বর্ষে এই ঘটনা ঘটেছিল।  
এই ‘কটকরাজবংশাবলী’তেও বাংলার স্থলতানকে ভুল করে মোগল বলা  
হয়েছে।

আলাউদ্দীন হোসেন শাহের সঙ্গে উড়িষ্যার রাজার যুদ্ধ সম্বন্ধে বিভিন্ন  
সূত্রে যে সমস্ত সংবাদ পাওয়া যায়, সেগুলি উল্লেখ ও বিশ্লেষণ করলাম।  
এই যুদ্ধ যে ১৪৯৩-৯৪ খ্রীষ্টাব্দ থেকে অন্তত ১৫১৫ খ্রীষ্টাব্দ পর্যন্ত চলেছিল, তাতে  
কোন সন্দেহ নেই। মাঝে অন্তত ১৫১২ খ্রীঃ থেকে ১৫১৪ খ্রীঃ পর্যন্ত এই যুদ্ধ  
বন্ধ ছিল। ১৫১৪ খ্রীষ্টাব্দে যুদ্ধ প্রায় শেষ হয়ে এসেছিল এবং সন্ধি আসন্ন হয়ে  
উঠেছিল। কিন্তু তার অব্যবহিত পরেই আবার হোসেন শাহ নতুন করে  
উড়িষ্যা আক্রমণ করেন। তিনি স্বয়ং এই অভিযান পরিচালনা করেন। এরপর  
আর হোসেন শাহের সঙ্গে উড়িষ্যার কোন যুদ্ধ হয়েছিল বলে প্রমাণ পাওয়া  
যায় না।

এই দীর্ঘকালব্যাপী যুদ্ধে হোসেন শাহ এবং উড়িষ্যারাজ প্রতাপরুদ্র—  
দু’জনেই জয়ের দাবী করেছেন। কিন্তু কেউই চূড়ান্ত জয় লাভ করতে  
পেরেছিলেন বলে মনে হয় না। এঁদের মধ্যে কেউ অপরের রাজ্যের কোন  
অঞ্চল স্থায়ীভাবে অধিকার করতে পেরেছিলেন বলেও জানা যায় না। আজ  
পর্যন্ত বাংলাদেশে প্রতাপরুদ্রের বা উড়িষ্যার হোসেন শাহের কোন শিলালিপি  
পাওয়া যায়নি। তবে ১৫১০ থেকে ১৫১৫ খ্রীষ্টাব্দের মধ্যে হোসেন শাহ যে  
উড়িষ্যার দিকে তাঁর রাজ্যের সীমা খানিকদূর প্রসারিত করতে পেরেছিলেন,  
তার প্রমাণ আছে। ‘চৈতন্যভাগবত’র সাক্ষ্য থেকে দেখি, ১৫১০ খ্রীষ্টাব্দে  
হোসেন শাহের রাজ্যের শেষ সীমা ছত্রভোগ, তারপর উড়িষ্যার এলাকা দখল  
হচ্ছে। কিন্তু কবিবর্গের ‘চৈতন্যভাগবত’ নাটক ও কবিতার কবিরাজের

‘চৈতন্যচরিতামৃত’ থেকে দেখি. ১৫১৪ খ্রীষ্টাব্দে ছত্রভোগের কিছুদিন ৪০ মাইল দক্ষিণে অবস্থিত মল্লেশ্বর নদ বাংলা ও উড়িষ্যার সীমারেখা। তবে এই সীমানা-প্রসারণ নতুন রাজ্য জয় না হত রাজ্যের পুনরুদ্ধার, তা বলা যেমন কঠিন, তেমনি শেষ পর্যন্ত উভয় রাজ্যের মধ্যে কৌ সীমারেখা দাঁড়িয়েছিল, তাও বলা শক্ত। যতদূর মনে হয়, উভয় রাজ্যের এই যুদ্ধ শেষ পর্যন্ত অমীমাংসিতই থেকে গিয়েছিল। কিন্তু ত্রিপুরার ‘রাজমালা’য় হোসেন শাহের মূখে এই উক্তি দেওয়া হয়েছে,

উড়িয়া আসাম কোচ জিনিয়া লইল।

ত্রিপুর না জিনি মোর মন দুঃখ হইল ॥

এর থেকে বোঝা যায়, ত্রিপুরার লোকেরা মনে করতেন যে উড়িষ্যার বিরুদ্ধে যুদ্ধে হোসেন শাহ জয়লাভ করেছিলেন। হোসেন শাহের লোকদের প্রচারের ফলেই হয়তো ত্রিপুরাবাসীর মনে এই ধারণা জন্মেছিল।

হোসেন শাহের সঙ্গে উড়িষ্যারাজের দীর্ঘকালব্যাপী যুদ্ধের ফলে বাংলা থেকে উড়িষ্যায় যাওয়া যে কত বিপদসঙ্কুল হয়েছিল, তা বৃন্দাবনদাসের ‘চৈতন্যভাগবত’ থেকে জানা যায়। ‘চৈতন্যভাগবত’ অন্ত্যখণ্ডের দ্বিতীয় অধ্যায়ে দেখি ভক্তেরা মহাপ্রভুকে উড়িষ্যা অভিমুখে অবিলম্বে রওনা হতে নিষেধ করে বলছে,

তথাপিহ হইয়াছে দুর্ঘট সময়।

সে রাজ্যে এখন কেহো পথ নাহি বয়

দুই রাজ্য হইয়াছে অনন্ত বিবাদ।

মহাযুদ্ধ স্থানে স্থানে পরম প্রমাদ ॥

এবং রামচন্দ্র খান মহাপ্রভুকে বলছে,

রাজার। ত্রিশূল পুতিয়াছে স্থানে স্থানে।

পথিক পাইলে ‘জানু’ বলি লয় প্রাণে ॥

এই যুদ্ধের সময় বাংলা-উড়িষ্যার সীমান্ত অঞ্চল যে কতখানি অরাজক হয়ে উঠেছিল, চৈতন্যভাগবত থেকে তারও পরিচয় পাই। এর অন্ত্যখণ্ডের দ্বিতীয় অধ্যায়ে লেখা আছে যে চৈতন্যদেব ও তাঁর দলবল যখন নৌকায় করে সীমান্তবর্তী নদী পার হচ্ছিলেন, তখন নাবিক তাঁদের বলেছিল,

নিরন্তর এ পানীতে ডাকাইত কিয়।

পাইলেই ধন প্রাণ দুই নাশ করে ॥

এতক যাবত উড়িষ্যার দেশ পাই।

তাবত নীরব হও সকল গোসাঞি ॥

কবিকর্ণপুরের 'শ্রীচৈতন্যচন্দ্রোদয়' নাটকের বষ্ট অঙ্কে ঠিক এই সময়ের সম্বন্ধেই বলা হয়েছে "ইদানীং গোড়াধিপতে ধ্বনভূপালস্ত গজপতিনা সহ বিরোধে গমনাগমনমেব ন বর্ততে।"

কিন্তু মহাপ্রভু নীলাচলে বাস করার পরে বাংলার ভক্তেরা প্রতি বছর রথযাত্রার সময় তাঁকে দর্শন করবার জন্য নীলাচলে যেতেন। ১৫১৩ থেকে ১৫৩৩ খ্রীষ্টাব্দ অবধি অধিকাংশ বছরই ভক্তেরা গিয়েছেন। তাঁদের পথে কোন বিপদ হয়েছিল বলে কোন সূত্র থেকে জানা যায় না। ইতিপূর্বে আমরা আলোচনা করে দেখিয়েছি যে ১৫১২ থেকে ১৫১৪ খ্রীষ্টাব্দ পর্যন্ত বাংলা-উড়িষ্যার যুদ্ধ বন্ধ ছিল। এই কারণেই প্রথম দু' বছর অর্থাৎ ১৫১৩-১৪ খ্রীষ্টাব্দে ভক্তদের উড়িষ্যায় যাওয়ার অসুবিধা হয় নি। কবিকর্ণপুরও তাঁর নাটকের অষ্টম অঙ্কে সে কথা বলেছেন। কিন্তু ১৫১৫ খ্রীষ্টাব্দে হোসেন শাহ নতুন করে উড়িষ্যা আক্রমণ করেন। ঐ বছরে যে মহাপ্রভুর বাঙালী ভক্তদের নীলাচলে যাওয়া বন্ধ ছিল, তা 'চৈতন্যচরিতামৃত'ের মধ্যলীলা ১৬শ অধ্যায় থেকে জানা যায়। ঐ অধ্যায়ে দেখি, মহাপ্রভু বাংলাদেশ থেকে নীলাচলে প্রত্যাবর্তনের সময় বাংলার ভক্তদের বলছেন,

সভা সহিত ইহা মোর হইল মিলন।

এ বৎসর নীলাদ্রি কেহ না করিহ গমন ॥

আমাদের মনে হয় ঐ বছরে নতুন করে বাংলার সঙ্গে উড়িষ্যার যুদ্ধ বাধার কারণেই মহাপ্রভু ভক্তদের নীলাচলে যেতে নিষেধ করেছিলেন। কিন্তু পরের বছর থেকে বাংলার ভক্তেরা আবার রথযাত্রার সময় নীলাচলে যেতে শুরু করেন এবং ১৫৩৩ খ্রীষ্টাব্দে মহাপ্রভুর তিরোধান হওয়া পর্যন্ত তাঁরা মাত্র এক বছর ছাড়া আর সব কয় বছরই গিয়েছেন। (এক বছর বন্ধ ছিল—চৈতন্যচরিতামৃত, অন্ত্যলীলা, ১৬শ পরিচ্ছেদ, ৩২-৪১শ শ্লোক দ্রষ্টব্য।) এর থেকে মনে হয়, ১৫১৫ খ্রীষ্টাব্দের যুদ্ধই উড়িষ্যার সঙ্গে হোসেন শাহের শেষ যুদ্ধ; এর পর দুই দেশের মধ্যে শান্তি স্থাপিত হয় এবং অন্তত ১৫৩৩ খ্রীষ্টাব্দ পর্যন্ত এই শান্তি অক্ষুণ্ণ ছিল।

('মাংলা পাণ্ডী'তে এক "মলিকা পাতিসা"র সঙ্গে প্রতাপরুদ্রের যুদ্ধ ও সন্ধির কথা লেখা আছে। 'কটকরাজবংশাবলী'তেও এই কথা আছে, তাতে ঐ

রাজাকে “মল্লিকাশ্বিতাধিপ” বলা হয়েছে। ইনি কিন্তু হোসেন শাহ নন, ইনি গোলকুণ্ডার সুলতান কুংব-উল্-মুলক্, তেলেগু শিলালিপিতে ইনি ‘কুতমন মলিক’ নামে উল্লিখিত হয়েছেন। ইনি ষোড়শ শতাব্দীর তৃতীয় দশকে প্রতাপরুদ্রের রাজ্যের দক্ষিণদিকের অনেকখানি অংশ জয় করেন এবং মল্ক-পুরমে অল্পতম ঘাঁটি স্থাপন করেন। ‘মাদলা পাজী’তেও লেখা আছে রাজমহেন্দ্রীতে এই রাজার সঙ্গে প্রতাপরুদ্রের যুদ্ধ হয়েছিল।)

### ত্রিপুরার সঙ্গে হোসেন শাহের যুদ্ধ

হোসেন শাহের সঙ্গে ত্রিপুরারাজ ধনুর্মাণিক্যেরও সংঘর্ষ হয়েছিল। ত্রিপুরার রাজাদের ইতিবৃত্ত ‘রাজমালা’র মতে ধনুর্মাণিক্যই প্রথম গোড়-রাজ্য আক্রমণ করেন এবং সাফল্যলাভ করেন; তাঁর বারবার সাফল্যের কথা শুনেই ১৪৩৬ শকাব্দ বা ১৫১৪-১৫ খ্রীষ্টাব্দে হোসেন শাহ বলেন,

উড়িয়া আসাম কোচ জিনিয়া লইল।

ত্রিপুর না জিনি মোর মন দুঃখ হইল॥

সম্ভবত আসাম অভিযানে হোসেন শাহের প্রাথমিক জয়টুকুই এর আগে ঘটেছিল, পরবর্তী পরাজয় তখনও ঘটেনি। ‘রাজমালা’তে হোসেন শাহ ও ধনুর্মাণিক্যের সংঘর্ষ সম্বন্ধে অনেক কথা লেখা আছে। তবে এখানে একটি কথা বলা দরকার। মুদ্রিত ‘রাজমালা’র সবটাই প্রাচীন বা অকৃত্রিম নয়। মহারাজা কাশীচন্দ্রমাণিক্যের ( ১৮২৬-৩০ খ্রীঃ ) রাজত্বকালে দুর্গামণি উজীর প্রাচীন রাজমালাকে নিজের ইচ্ছামত “সংশোধন” করে যে রূপ দিয়েছিলেন, সেইটাই মুদ্রিত গ্রন্থের আদর্শ। প্রাচীন রাজমালার প্রথম খণ্ড পঞ্চদশ শতাব্দীর দ্বিতীয়ার্ধে ত্রিপুরারাজ ধর্মমাণিক্যের রাজত্বকালে, দ্বিতীয় খণ্ড ষোড়শ শতাব্দীর দ্বিতীয়ার্ধে অমরমাণিক্যের রাজত্বকালে, তৃতীয় খণ্ড সপ্তদশ শতাব্দীর মাঝামাঝি সময়ে গোবিন্দমাণিক্যের রাজত্বকালে এবং চতুর্থ খণ্ড অষ্টাদশ শতাব্দীর দ্বিতীয়ার্ধে কৃষ্ণমাণিক্যের রাজত্বকালে রচিত হয়েছিল। বঙ্গীয় সাহিত্য পরিষদে ‘রাজমালা’র একটি পুরোনো পুঁথি ( নং ২২৫৯ ) আছে।\*

\* এই পুঁথির লিপিকরের নাম পুঁথির ৪২-খ ও ৫৫-খ পৃষ্ঠায় দেওয়া আছে—‘রামনারায়ণ দেব’। এই রামনারায়ণ দেবই “সন ১২০৬ তারিখ ১৮ই বৈশাখ”—এ অর্থাৎ ১৭২৯ খ্রীষ্টাব্দে ‘সন’ অক্ষকে বলাই না ধরে ত্রিপুরার ধরলে ১৮০২ খ্রীঃ হয়) ‘চম্পকবিজয়’ নামে একটি ঐতিহাসিক কাব্যের পুঁথির নকল সম্পূর্ণ করেছিলেন ( ইতিহাসপ্রাপ্ত বাংলা কবিতা, হুগ্গেস বাল্যোপাধ্যায়, পৃঃ ১৯ )। ‘রাজমালা’র আলোচ্য পুঁথি এর করেক বছর আগে বা পরে লিপিকৃত হয়েছিল সম্ভবতঃ সেই।

উজীরের 'রাজমালা' সংশোধনের আগেই এটি লিপিকৃত হয়েছিল। হুতরাং এই পুঁথির পাঠ অধিকতর নির্ভরযোগ্য। এই পুঁথিতে যে পাঠ পাওয়া যায়, তার সঙ্গে মুদ্রিত রাজমালার পাঠের অনেক জায়গাতেই অনৈক্য দেখা যায়। 'রাজমালা'র দ্বিতীয় খণ্ডে ধর্ম্মানুক্যের বঙ্গাভিযান ও বাংলার সৈন্তবাহিনীর ত্রিপুরা-ভিযান সম্বন্ধে যা লেখা আছে, তা এই পুঁথির ১৮-২২শ পত্র থেকে উদ্ধৃত করছি,

কালক্রম মহারাজা বলবন্ত হৈল ।  
 বঙ্গ অধিপতি হৈব মনে ইহা কৈল ॥  
 গঙ্গামণ্ডল পাটীকারা মেহেরকুল নাম ।  
 কৈলাসহর বেজোরা আদি ভাঙ্গুগাছ গ্রাম ॥  
 বিষ্ণুজুড়ি লাক্সলা জিনিল অমুক্রমে ।  
 জিনিল ইসব দেশ আপনা বিক্রমে ॥  
 বরদাখাত আছিল গোড়ের অধিকারে ।  
 নিজ বাহুবলে রাজা জিনিল তাহারে ॥  
 প্রতাপরায় নামে তার জমিদার ছিল ।  
 গোড়তে নামিলে সেই আইসে নিজদল ॥  
 এহিরাপে নানা দেশ জিনিল সকল ।  
 নিজ ছত্র তলে তাতে নামিলে খণ্ডল ॥  
 তবে রাজা সৈন্ত দিয়া বৈসাইল থানা ।  
 লঙ্কর করিল রাজা নিজ একজন্য ॥  
 আমল করিয়া যদি সর্বসৈন্ত আইল ।  
 খণ্ডলর লোকে তবে লঙ্কর ধরিল ॥  
 গোড়রাজ্যে লৈয়া চলে বান্দিয়া তাহারে ।  
 কতদিনে দিল নিয়া গোড় অধিকারে ॥  
 হস্তিতে মারিতে আজ্ঞা করে গোড়েশ্বরে ।  
 তাহাকে মারিতে নিছে বান্দিয়া জিজিরে ॥  
 লঙ্করে জানিল তবে মরণ নিশ্চয় ।  
 একজনের হাত হতে খড়্গ কাড়ি লয় ॥  
 মারেন বিংশতি জন বিক্রম করিয়া ।  
 মাহতে টুয়াইল হস্তী অক্লশ মারিয়া ॥

হস্ত হস্ত খড়্গ কাটে মারে তরবার ।  
 ভক্ত দিল সেই গজ্ঞে করিয়া চিৎকার ॥  
 তবে মহা মত্ত গজ দিল টুয়াইয়া ।  
 দস্তেতে মারিল চোট বিক্রম করিয়া ॥  
 ধন্থ ধন্থ বলি তাকে কহে সর্বলোকে ।  
 এমত বিক্রম লোক পর্বতেত থাকে ॥  
 আর চোট মারিতে খড়্গ ভাঙ্গি গেল ।  
 পড়িয়া হস্তীর হাতে পরাণ তেজিল ॥  
 ই কথা শুনিয়া পরে বলে গোড়েশ্বর ।  
 আপনার কর্ম দোষে সেখানে মরিল ॥  
 শ্রীধনুমানিক্য রাজা ই কথা শুনিল ।  
 অগ্নিসম হইয়া ক্রোধে জ্বলিতে লাগিল ॥  
 রাইকছাগ সেনাপতি পাঠাইয়া দিল ।  
 খণ্ডলের লোকে তবে আসিয়া মিলিল ॥  
 খণ্ডল দেশেতে ছিল দ্বাদশ বসিক ।  
 রাজার সাক্ষাতে নিল করিয়া বসিক ॥  
 একদিন বলে রাজা বসিকের স্থানে ।  
 কালি তোমি সব আইস আমা বিত্তমানে ॥  
 সংকেত শিখাইল রাজা সব ত্রিপুরাকে ।  
 মারিতে কহিল রাজা সবে একে একে ॥  
 মিত্রতা করিতে আমি বলিব তখনে ।  
 তোমরা তারার শির কাটীবা তখনে ॥  
 আমিহ কাটীব তবে প্রধান বসিক ।  
 আগে বসাইব যান্ত্র করিয়া অধিক ॥  
 ইসব মন্ত্রণা শুনি রাজ্যৈসন্তোষে ।  
 সুসজ্জ হইয়া আইল আপনার মনে ॥  
 বসিক সকল আইল রাজা ভেটীবারে ।  
 সঙ্গে দুই হাজার সেনা লৈয়া ধনুঃশরে ॥  
 বসিয়াছে মহারাজা সিংহাসনপরে ।  
 বসিক সকল দিয়া বৈসাইল উপরে ॥

এক এক ত্রিপুরেত এক বঙ্গজন ।  
 পংক্তিক্রমে দাঁড়াইল বন্ধুতা কারণ ।  
 রাজ্যঅজ্ঞা অহুসারে দাঁড়াইল গিয়া ।  
 ইসারাতে কৈল সেলামবাজি দিয়া ॥  
 প্রণাম করিতে বসিক মস্তক নামায় ।  
 সেইকালে মারণের সময় যে পাএ ॥  
 প্রধানকে নরপতি আগে দিল কাটা ।  
 পরেতে ত্রিপুরে কাটে যার যেই বাঁটা ॥  
 এহি মতে নাশ কৈল খণ্ডলের প্রজা ।  
 সসৈন্য খণ্ডল দেশে গেল মহারাজা ॥  
 লুটীয়া কাড়িয়া সব নির্দন করিল ।  
 তবে সে খণ্ডল দেশ আপন। হইল ॥  
 দেশে আইসে ধর্মরাজ ধর্ম্য করে নিষ্ঠা ।  
 মঠ দিয়া ধন্যসাগর করিল প্রতিষ্ঠা ॥

\* \* \* \*

শ্রীধন্যমানিক্য রাজা চাটীগ্রাম চলে ।  
 চৌদ্দস পাচত্তিস শকে নিজ বাহুবলে ॥  
 চাটীগ্রাম বিজই বলি মোহর মারিল ।  
 গোড়েখরের সৈন্য সব ভঙ্গ দিয়া গেল ॥  
 হোসন শাহা গৌড়পতি ই কথা শুনিয়া  
 গৌরাই মল্লিক ভেজে বহু সৈন্য দিয়া ॥  
 দ্বাদশ বাদলা দিল মল্লিকের সাতে ।  
 বহুল কটক দিল নিজে ছিল জতে ॥  
 বহু তর তরি বর গোমতি কারণ ।  
 গজ বাজী বহু সাজ করিবারে রণ ॥  
 সাহেক মেহেরকুল আসিলেক বল ।  
 গজ কাছে বড় নাচে পাইয়া রক্তস্থল ॥  
 কোটকাটে চোট মারে হইল আনন্দ ।  
 রাজার প্রজার মাখে হৈল নিরানন্দ ॥

শরে মারে ধারে করে পড়ে রাজসেনা ।  
 চলে বলে দলে করে চণ্ডীগড় থানা ।  
 পাছে পাছে কাছে কাছে গেল গোড় সেনা ।  
 গোড়াই ভোড়াই হৈল না মারিয়া থানা ॥  
 ছিলে খোজা দিলে বোজা বান্দিতে গোমতী ।  
 কাটে মাটি পরিপাটী যত্ন পাইতে অতি ॥  
 মনে করে চাকু ধরে যুক্তি কৈলে সারা ।  
 ছিলে যদি দিলে বিধি মরিবে ত্রিপুরা ॥  
 তিনদিন মতিহীন রাখিল গোমতী ।  
 চারদিনে ভাঙ্গিয়া চলয়ে বেগবতী ॥  
 পাঠান স্থান নহে চাবুক লইয়া ।  
 বারে বারে মারে ধরে কর্কশ বলিয়া ॥  
 গুরু রোষে ভর সোষে পাঠান বর্ষর ।  
 রক্তে নদী ভাঙ্গে বিধি কাঁপে ধরধর ॥  
 এত শুনি নৃপমণি হইয়া বিস্ময় ।  
 মারে ধরে মনে করে শরীরে না সয় ॥  
 রাখে প্রজা ভাকে রাজা গুরু পুরোহিত ।  
 অরি তরে অবিচারে ( অভিচারে ) কার্য্য কর হিত ॥  
 পরে তরে অবিচারে করিতে লাগিল ।  
 গুরু স্মৃতে বিধিমতে কর্ম্ম আরম্ভিল ॥  
 সপ্তদিবা গুপ্ত কিবা মণ্ডপে রহিল ।  
 যজ্ঞশেষে কুণ্ডদেশে চণ্ডাল কাটিল ॥  
 রায় ধরে করে করে চণ্ডালের মাথা ।  
 মলিক হলিক যথা গাড়ে নিয়া তথা ॥  
 শরীরীতে বর্ষরে যে পাহে মহাভয় ।  
 নাশিল আসিল রাজসৈন্য এহি কয় ॥  
 রব উঠে সব লুটে গোরাই ভাঙ্গিল ।  
 ছাড়ি কাজ বড় লাজ দূরে তলাসিল ॥



কাপুরুষ না পৌরুষ তারে কেহ করে ।  
 সুনীয়া সুনীয়া গোড়পতি নিলে তারে ॥  
 কহিল সরির জেন ( ? ) কেন তিরস্কার  
 হইল কহিল তার চক্ষের খাঁখার ॥

\* \* \* \*

পুনরপি ধনুমাণিক্য মহারাজা ।  
 চাটীগ্রাম লইবারে পাঠাইলে প্রজা ॥  
 মাঝে কাটনে ভজ দিল গোড় সেনা ।  
 রসাজমর্দন নারায়ণকে বৈসাইল থানা  
 সাহু নারায়ণ ২ ০ ০  
 রসাজ নিকটে জাইয়া পুঙ্করণি দিল ॥  
 রসাজ মারিতে গীয়াছিল সেনাপতি ।  
 সেই হতে রসাজমর্দন নাম খ্যাতি ॥  
 রাইকছাগ রাইকছম দুই সেনাপতি ।  
 তাহাকে ভেজিলে তথা ত্রিপুরের পতি ॥  
 চৌদ্দস ছত্তিস শকে চাটীগ্রামে গেল ।  
 সুনীয়া হোসন শাহা বড় ক্রোধ হৈল ॥  
 উড়িয়া আসাম কোচ জিনিয়া লইল ।  
 ত্রিপুর না জিনি মোর মন দুঃখ হইল ॥  
 ই বলিয়া হৈতন খারে তৈনাথ ( ? ) করিল ।  
 করবে খান পাঠানেরে তার সঙ্গে দিল ॥  
 রাজ্যমাটী জিনিবারে হৈতন খাঁ চলিল ।  
 গোড়পতি বহু সৈন্য তার সঙ্গে দিল ॥  
 একশত হস্তী পঞ্চসহস্র ঘোটক ।  
 লৈক্ষ পদাতি চলে অসংখ্য কটক ॥  
 দ্বাদশ বাদলা চলে হৈতন খাঁর সাথে ।  
 বিদায় করিল দিব্য সিরপায়া ( শিরজ্ঞান ? ) মাথে ॥  
 চলিলেক হৈতন খাঁ মহী কম্পমান ।  
 কতদিনে উত্তরিল দেশ সন্নিধান ॥

সরালি দেশেতে সে বাঁকল। পথ পাইল ।  
 কৈলাগড়ে উত্তরিয়া বিশালগড়ে আইল ॥  
 জামির থানি গড়েতে জিপুরা রহে যবে ।  
 প্রভাতে পাঠান গেল। সেই গড়ে তবে ॥  
 খড়্গরায় আদি করি আছিল জিপুর ।  
 করিয়া অনেক যুদ্ধ মারিল প্রচুর ॥  
 মারিলেক সেই গড় হৈতন থা পাঠান ।  
 ছয়কড়িয়া গড়ে গেল রাজা বিত্তমান ॥  
 গগন থা নামে ছিল রাজসেনাপতি ।  
 মহা ঘোরতর যুদ্ধ কৈল মহামতি ॥  
 আগুপরভেদ কিছু না করে বিচার ।  
 এহিমতে ঘোর যুদ্ধ হৈল অপার ॥  
 তিনপ্রহর পরে যুদ্ধে গগন থা ভাগীল ।  
 হৈতন থার সৈন্য মধ্যে জয়শব্দ হৈল ॥  
 যশপুর ছাড়ি রাজা রাজ্যমাটি আইল ।  
 হৈতন থা সেই পথে তথাতে আসিল ॥  
 গঙ্গানগরেত গিয়া ডোমঘাটীর পথে ।  
 গড় ধরি হৈতন থান রহিল তথাতে ॥  
 এক মহা দিঘি দিল আপনার কাছে ।  
 না খাইল গোমতীর জল বিষ মাখি দিছে ॥  
 সেই হেতু তুড়ুক দিঘি দেশেতে প্রচার ।  
 ত্রিদেবমাণক্যে তাহা করিলে প্রচার ॥  
 তবে মহারাজা রহে ছনগঙ্গার পারে ।  
 আর জত সেনাপতি রহে থরে থরে ॥  
 ছনগঙ্গাত্রিবেগেতে দেবদার নাম ।  
 তার কত বাক নামাএ মাছিছা উপাম ॥  
 রাজা আইল গড়পরে চাইতে শত্রুবল ।  
 দোখিলেক মহরস ( মহারাজ ? ) উচ্চ এক স্থল ॥  
 নিচের বীকেতে গোড়কটক রাহছে ।  
 উচ্চেতে জিপুরার গড় নির্মাণ করিছে ॥

বসিলেক নরপতি বৃক্ষ ছায়াতলে ।  
 ক্রোধ হইয়া বলে রাজা ডাইন সকলে ॥  
 আমার দেশের লোক খাইতে ভাল পার ।  
 হৈতন খারে এবে কেনে তোমরা না মার ॥  
 নৃপতির বাক্য শুনি বলাংস ( বলাংশ ? ) তে থণে ।  
 প্রণাম করিয়া কহে রাজা বিচুমানে ॥  
 মঙ্গলবারেতে আমি শুষিব গোমতী ।  
 সপ্তদিন এহিমতে রাখিব সম্প্রতি ॥  
 বলাংস কথাত্তে নৃপতি তুষ্ট হৈল ।  
 দুইকুলা বাহুগে বান্দিয়া উড়িল ॥  
 দুইশত উচ্চ হৈল পথের কিনারা ।  
 উড়িয়া পড়িল মধ্যে নদী হৈল চরা ॥  
 উজানে চলিল ভাটী ভাটী হইল চর ।  
 দেখিয়া গোড়ের সৈন্ত তুষ্ট হৈল বড় ॥  
 হোসন সাহার ভাগ্যে নদী হইল চর ।  
 চরে জাইয়া মরা ( মোরা ) সবে করি বাস ঘর ॥  
 নদীতীরে পাথরের প্রতিমা করিয়া ।  
 হিন্দু সবে পূজা করে পুষ্পাঞ্জলি দিয়া ॥  
 মাছিছা বলি সেই স্থান কহে সর্বলোকে ।  
 রাগে রঞ্জে গোড় সেনা নিদ্রা যায়ে অ্থে ॥  
 সাড় বান্দি আঞ্জীতে সাড় বান্দিব বিস্তর ।  
 তিন তিন পুতলা দিল সাড়ের উপর ॥  
 দুই দুই লুকা ( উকা ) দিল পুতলার হাতে ।  
 হাজারে হাজারে লুকা পুতলার হাতে ॥  
 জল হতে বলাংস উঠিল তখনে ।  
 মহাশব্দ করি শ্রোত উঠিল গগনে ॥  
 হাজারে হাজারে সাড় আসিতে লাগিল ।  
 সহস্রে সহস্রে লোক তখনে দেখিল ॥  
 গোড়পতির সৈন্ত সব অ্থে নিদ্রা যায়ে ।  
 সেইকালে নদী বেগে সকল ডুবায়ে ॥

হস্তি ঘোড়া উট আদি ভাসিল বেগেতে ।  
 নির্কল মহুস্ত্রে পারে তাতে কি করিতে ॥  
 জলিছে আলোকা সব পুতলা হস্তেতে ।  
 তা দেখি বলিল ত্রিপুর আসিল মারিতে ॥  
 গোড়সেনা নিকটে আছিল এক বন ।  
 সেই কালে তাতে অগ্নি দিল একজন ॥  
 নানামতে শব্দ তথা বনেরে করিল ।  
 ত্রিপুর আসিল বলি ভয় ভয় দিল ॥  
 সর্বসৈন্য প্রলয় করিল নদীশোভে ।  
 পিতাএ পুত্র না জিজ্ঞাসে ভাঞ্জে এহি মতে ॥  
 হৈতন থা করবে থা সহিতে না পারে ;  
 তবেহ বাজিল শেষে ঘোটক উপরে ॥  
 কাটাতে কাটাতে চলে ত্রিপুরার সেনা ।  
 এক রাজি মধ্যে তবে লৈল চারি থানা ॥  
 বহু অশ্ব গজ পরে পাইল সেইখানে ।  
 হৈতন থা কটক সঙ্গে ছিল সেই স্থানে ॥  
 ছন্নকড়িয়ার ঘাটে বাইয়া সত্য করি কয় ।  
 এত সৈন্য আসি আমি হৈল পরাজয় ।  
 এহার অধিক সৈন্য যে জনে পাইব ।  
 সে জন নির্ভুঙ্কর এদেশে আসিবা ॥  
 এহা হতে অল্প সৈন্য যাহার নিকটে ।  
 সত্য সত্য বলি আসি না পড় সঙ্কটে ॥  
 যে সব পাঠান জাতি যে মোর বান্ধব ।  
 সৈন্য হীনে যেই আইসে সে প্রাণী গর্দভ ॥  
 ই বলিয়া হৈতন থা গোড়ে চলি গেল ।  
 গোড়েশ্বরে নিষ্টর বহু তাহারে বলিল ॥

এই দীর্ঘ বিবরণ থেকে ত্রিপুরার রাজা ও বাংলার রাজার সংঘর্ষের যে ইতিহাস পাওয়া যায়, তাকে তিনটি পর্ধ্যয়ে ভাগ করা চলে ।

প্রথম পর্ধ্যয়ের সূচনা হয় ত্রিপুরারাজ ধনুমাণিক্যের বাংলা-অভিযানের কথা দিয়ে । ধনুমাণিক্য বাংলার সুলতানের অধীন গজামণ্ডল, পাটীকারা, মেহেরুল,

কৈলাসহর, বেজোরা, ভানুগাছ, বিষ্ণুজুড়ি, লাকলা প্রভৃতি অঞ্চল জয় করেন এবং বরদাখাতের জমিদার প্রতাপ রায় বাংলার স্থলতানের পক্ষ ছেড়ে ত্রিপুরারাজের পক্ষে যোগদান করেন। ধনুমাণিক্য খণ্ডল পর্যন্ত জয় করেন এবং অধিকৃত অঞ্চলে একজন লস্কর বা শাসনকর্তা নিযুক্ত করে সসৈন্তে প্রত্যাবর্তন করেন। কিন্তু খণ্ডলের লোকে সেই লস্করকে বন্দী করে গোড়ে পাঠায়। গোড়েখর তাকে হাতীর পায়ের তলায় ফেলে বধ করতে আদেশ দেন। লস্কর একা অশেষ বীরত্বের সঙ্গে লড়াই করে অবশেষে হাতীর পায়ের তলায় প্রাণ দেয়। ধনুমাণিক্য তখন তাঁর সেনাপতি রাইকছাগকে খণ্ডলে পাঠান। খণ্ডলে বারোজন বাসক ছিল, তাদের সঙ্গে কপট বন্ধুত্ব দেখিয়ে তাদের ত্রিপুরারাজের সামনে নিমন্ত্রণ করে আনা হয়। তাদের কবলের মধ্যে পেয়ে ত্রিপুরারাজ বিশ্বাসঘাতকতা করেন এবং তাঁর লোকদের সাহায্যে তাদের সবাইকে বধ করেন। বাসকরা নিহত হলে ত্রিপুরারাজ নিকটক হয়ে খণ্ডল দেশ অধিকার করেন এবং যথেষ্টভাবে ঐ দেশ লুণ্ঠন করেন।

দ্বিতীয় পযায় সূর্য হয় ১৪৩৫ শকে (১৫১৩-১৪ খ্রীঃ) ত্রিপুরারাজের চট্টগ্রাম আক্রমণ ও অধিকারের মধ্য দিয়ে। ধনুমাণিক্য চট্টগ্রাম অধিকার করে বিজয়ের স্মারক-স্বরূপ স্বর্ণমুদ্রা বার করেন। বাংলার স্থলতান হোসেন শাহ একথা শুনে গৌরাই মল্লিক নামক একজন সেনাপাতিকে বাংলার বারোটি অঞ্চল থেকে সংগৃহীত বিপুল সৈন্যবাহিনী সঙ্গে দিয়ে পাঠান। গৌরাই মল্লিক (স্পষ্টত বাংলার ছত অঞ্চলগুলি পুনর্দিকার করে এবং দক্ষিণ থেকে অগ্রসর হইবে) ত্রিপুরার মেহেরকুল অঞ্চল পর্যন্ত অধিকার করেন (মেহেরকুল গোমতী নদীর খানিকটা দক্ষিণে অবস্থিত)। ত্রিপুরারাজের সৈন্তেরা তখন চণ্ডীগড় দুর্গে আশ্রয় নেয় (চণ্ডীগড় গোমতী নদীর দক্ষিণ তীরে অবস্থিত)। গৌরাই মল্লিক এই দুর্গ জয় করতে অসমর্থ হলেন। তখন তিনি চণ্ডীগড় দুর্গের পাশ কাটিয়ে সামান্য অগ্রসর হয়ে (‘‘পাছে পাছে কাছে কাছে গেল গোড় সেনা’’) গোমতী নদীর উপরের দিক দখল করলেন। অবশেষে ছিলে নামক একজন খোজার বুদ্ধিতে গৌরাই মল্লিক বাধ দিয়ে গোমতী নদীর জল অবরুদ্ধ করলেন এবং তিনদিন বাদে সেই জল ছেড়ে দিলেন। তার ফলে জল নদীর পাড় ভেঙে দেশ ভাসিয়ে ফেলে ত্রিপুরার বিপর্যয় ঘটল। ত্রিপুরারাজ এই বিপদ থেকে মুক্তি পাবার জন্য পুরোহিতকে দিয়ে অভিচার অহুষ্ঠান করালেন। এই অভিচার অহুষ্ঠানে এক চণ্ডালকে বলি দিয়ে তার

মাথা গোরাই মল্লিকের ঘাঁটিতে পুঁতে আসা হল। তার ফলে সেই রাত্রে গোরাই মল্লিকের বাহিনী অযথা—ত্রিপুরার সৈন্তেরা আসছে মনে করে ভীষণ ভয় পেয়ে গেল এবং সেনাপতিসমতে সমস্ত বাহিনী সেই অঞ্চল ছেড়ে পালিয়ে গেল। হোসেন শাহ গোরাই মল্লিককে ডাকিয়ে এনে তিরস্কার করলেন।

তৃতীয় পর্যায় শুরু হয় ধন্তমাণিক্যের চট্টগ্রাম পুনরধিকার-প্রচেষ্টার মধ্য দিয়ে। তাঁর সেনাপতি “রসাক্ষমর্দন” নারায়ণ বাংলার রামু প্রভৃতি অঞ্চল জয় করলেন এবং ঘাঁটি আগলতে লাগলেন। ১৪৩৬ শকে ( ১৫১৪-১৫ খ্রিঃ ) ধন্তমাণিক্যের রাইকছাগ এবং রাইকছয় নামে দু’জন সেনাপতি চট্টগ্রাম জয় করলেন। এ খবর শুনে হোসেন শাহ ক্রুদ্ধ হয়ে হৈতন খাঁ নামক একজন সেনাপতিকে বিপুল সৈন্তবাহিনী দিয়ে ও করবে খাঁ নামে একজন পাঠানকে তাঁর সঙ্গে সহকারীরূপে দিয়ে পাঠালেন। হৈতন খাঁ সাফল্যের সঙ্গে অগ্রসর হতে লাগলেন। ত্রিপুরার সরালি, কৈলাগড়, বিশালগড় প্রভৃতি হৈতন খাঁ জয় করলেন। ত্রিপুরার সৈন্তেরা জামির খাঁনি গড়ে ছিল, তার অধ্যক্ষ খজা রায় অনেক যুদ্ধ করলেন, কিন্তু শেষ পর্যন্ত হৈতন খাঁ গড় জয় করলেন। তারপরে তিনি ছয়কড়িয়া গড় আক্রমণ করলেন। এই গড়ে ত্রিপুরার রাজা ছিলেন। এই গড়ের সেনাপতি গগন খাঁ বিপুল বিক্রমে যুদ্ধ করে তিন প্রহর পরে রণে ভঙ্গ দিলেন। এই গড়ও হৈতন খাঁ জয় করতে রাজা যশপুর ছেড়ে রাজ্যমাটি চলে গেলেন। হৈতন খাঁ তাঁর পিছু পিছু ধাওয়া করে গঙ্গানগরে গেলেন এবং ডোমঘাটীর পথে এক দুর্গ জয় করে সেখানে অবস্থান করতে লাগলেন। গোমতীর জলে বিষ মিশিয়ে দেওয়া হয়েছিল বলে হৈতন খাঁ নিজেদের ব্যবহারের জন্য একটি নতুন দাঁঘ কাটালেন, সেটি “তুড়ুক দাঁঘ” নামে পরিচিত হল। ধন্তমাণিক্য তাঁর সেনাপতিদের নিয়ে ছনগঙ্গা নদীর ওপারে অবস্থান করছিলেন। ঐ নদীর অনেকগুলি বাক। উপরের দিকের দেবদার বাকে ত্রিপুরার দুর্গ এবং তার কিছু দূরে নীচের মাছিছা বাকে বাংলার সৈন্তেরা ছিল। ধন্তমাণিক্য শত্রুবল পর্যবেক্ষণ করে ডাইনীদেব ডেকে বললেন কেন তারা শত্রুদের ধ্বংস করছে না। ডাইনীরা বলল তারা মলবার গোমতী শোষণ করবে এবং সাতদিন এইভাবে রাখবে। অতঃপর ডাইনীরা নদীর জল শোষণ করে তাতে চড়া বার করে দিল। এখানে ‘রাজমালা’র বর্ণনায় নানা অলৌকিক উপাধান প্রবেশ করেছে। যতদূর

মনে হয়, ত্রিপুরারাজের লোকেরা স্বাভাবিকভাবে গোমতীর জল বাধ দিচ্ছে আটকে রেখেছিল। অতঃপর ত্রিপুরার লোকেরা গোমতীতে বহু ভেলা ভাসাল, প্রতি ভেলায় তিনটি করে পুতুল এবং প্রতি পুতুলের হাতে দুটি করে উক্কি বা জলস্ত মশাল ছিল। গোমতীর জলও ছেড়ে দেওয়া হল। তখন সমস্ত ভেলা বাংলার সৈন্তেরা যেখানে ছিল, সেইদিকে আসতে লাগল, ভেলার উপরে পুতুলগুলির হাতে আগুন জলছিল, তাই দেখে বাংলার সৈন্তেরা ভাবল ত্রিপুরার সৈন্তেরা আসছে। এদিকে নদীর অর্গলমুক্ত জলধারা তাদের হাতী, ঘোড়া, উট সমস্ত ভাসিয়ে নিয়ে গেল। তাছাড়া বাংলার সৈন্তবাহিনীর ঘাঁটির কাছে একটি বন ছিল, ত্রিপুরা-রাজ্যের একজন লোক তাতে আগুন ধরিয়ে দিল। এই সমস্ত অপ্রত্যাশিত বিপদের ফলে বাংলার সৈন্তবাহিনী বিপর্যস্ত হয়ে গেল। হৈতন খাঁ ও করবে খাঁ এই বিপর্যয় রোধ করতে না পেরে ঘোড়ায় চড়ে পালালেন। ত্রিপুরার সৈন্তবাহিনী তাঁদের পিছনে ধাওয়া করে তাঁদের বহু সৈন্তকে বধ করল এবং এক রাতেই তাঁদের চারটি ঘাঁটি জয় করে বহু হাতী-ঘোড়া অধিকার করল। অবশেষে ছয়কড়িয়ার ঘাঁটিতে পৌঁছে হৈতন খাঁ কম সৈন্ত নিয়ে আসার জন্তু ক্ষোভ প্রকাশ করলেন। হৈতন খাঁ গোড়ে ফিরে গেলে গোড়েশ্বর তাঁকে অনেক নিষ্ঠুর বাক্য বললেন।

এখন প্রশ্ন এই যে, 'রাজমালা'র এই বিবরণ কতটুকু বিশ্বাসযোগ্য? এর মধ্যে এই খবর পাওয়া যায় যে প্রথম পর্ধ্যয়ে ধনুমানিকাই জয়যুক্ত হন এবং তিনি খণ্ডল পর্বন্ত বাংলাদেশের এক বিস্তীর্ণ অঞ্চল অধিকার করে নেন। দ্বিতীয় পর্ধ্যয়ে ধনুমানিক্য চট্টগ্রাম পর্বন্ত জয় করেন, কিন্তু প্রতিপক্ষের আক্রমণে তাঁকে পূর্বাধিকৃত সমস্ত অঞ্চল হারাতে হয় এবং গোড়েশ্বরের সেনাপতি গৌরাই মল্লিক গোমতী নদীর তীরবর্তী অঞ্চল পর্বন্ত উপনীত হন। অবশেষে অভিচার অল্পটানের দ্বারা ত্রিপুরারাজ বাংলার সৈন্তদের বিতাড়িত করেন। তৃতীয় পর্ধ্যয়ে ধনুমানিক্য আবার পূর্বাধিকৃত অঞ্চলগুলি অধিকার করেন। কিন্তু এইবারও, গোড়েশ্বরের সেনাপতি হৈতন খাঁ তাঁকে বিতাড়িত করে পিছু পিছু তাড়া করে যান এবং গোমতী নদীর তীরবর্তী মাছিছা পর্বন্ত অঞ্চল অধিকার করেন। এইবার ডাইনীদেব সাহায্য নিয়ে এবং বাংলার সৈন্তদের বোকা বানিয়ে ধনুমানিক্য তাদের বিতাড়িত করেন। কিন্তু লক্ষ্য করতে হবে যে ত্রিপুরারাজ এই সময় মাত্র ছয়কড়িয়া পর্বন্ত অঞ্চল পুনরধিকার করতে পেরেছিলেন।

ধনুমানিক্য অভিচারের দ্বারা গৌরাই মল্লিককে এবং ডাইনীদেব সাহায্যে

হৈতন থাঁকে বিভাডিত করেছিলেন বলে আমি বিশ্বাস করি না। এ সমস্ত আলৌকিক কাণ্ড ঐতিহাসিক তথ্য হিসাবে গ্রাহ্য হতে পারে না। এগুলিকে অবিশ্বাস করে উল্লিখিত বিবরণের বাকী অংশকে সত্য বলে গ্রহণ করলে এই সিদ্ধান্তেই আসতে হয় যে গোরাই মল্লিক ধনুর্মাণিক্যের কাছে পরাজয়বরণ করেন নি ; তিনি গোমতী নদীর তীর পর্যন্ত অঞ্চল অধিকার করেন এবং গোমতী নদীর জল প্রথমে রুদ্ধ ও পরে মুক্ত করে ত্রিপুরারাজের ভাগ্যবিপর্যয় ঘটান। হৈতন থাঁও সম্পূর্ণ পরাজয় বরণ করেননি, কিন্তু এইবার ত্রিপুরা-রাজ প্রথমে গোমতীর জল রুদ্ধ ও পরে মুক্ত করে তাঁকে খানিকটা বিপদে ফেলেছিলেন।

গোমতী নদীকে দুই পক্ষ এইভাবে শত্রুদের অস্থবিধায় ফেলার জ্ঞান ব্যবহার করেছে—এতে অস্বাভাবিক বা অবিশ্বাস্য কিছু নেই। প্রথমবার গোমতী গোড়েখরের সেনাপতির আয়ত্তে ছিল, দ্বিতীয়বার ত্রিপুরারাজের। এরও কারণ খুব স্পষ্ট। প্রথমবার গোরাই মল্লিক মেহেরকুলের পথে অগ্রসর হয়ে চণ্ডীগড় দুর্গের পাশ কাটিয়ে গিয়ে (‘রাজমালা’য় লেখা আছে ‘চণ্ডীগড়’ দুর্গের “পাছে পাছে কাছে কাছে গেল গোড় সেনা”) গোমতী নদীর উপর দিক দখল করেছিলেন, ত্রিপুরারাজের সৈন্তেরা নীচের দিকে থাকায় নদীতে বাঁধ দিয়ে পবে বাঁধ খুলে তাদের ডোবাতে অস্থবিধা হয় নি। দ্বিতীয়বার কিন্তু হৈতন থাঁ কৈলাগড়, বিশালগড়, জামিরখানি গড়, ছয়কড়িয়া গড় ও গজানগরের পথ দিয়ে গিয়ে গোমতী নদীর নীচের দিক দখল করেছিলেন, উপরের অংশ ছিল ধনুর্মাণিক্যের দখলে। তাই এবার ধনুর্মাণিক্যের পক্ষে হৈতন থাঁর বিপর্যয় সাধনের জ্ঞান গোমতী নদীকে ব্যবহার করা সম্ভব হয়েছিল।

আর একটা কথা। ‘রাজমালা’র মুদ্রিত সংস্করণে ধনুর্মাণিক্য-হোসেন শাহের সংঘর্ষের বিবরণ যেভাবে লিপিবদ্ধ হয়েছে, তার থেকে ধারণা হয় যে গোরাই মল্লিক ও হৈতন থাঁ দুজনেরই আক্রমণের সময় ত্রিপুরারাজ গোমতী নদীতে বাঁধ দিয়ে ও বাঁধ খুলে শত্রুপক্ষের বিপর্যয় ঘটিয়েছিলেন। কিন্তু তা যে ঠিক নয়, উপরের উদ্ধৃতি ও আলোচনা থেকে তা স্পষ্টই বোঝা বাবে। ঐ ভ্রান্ত ধারণার উপর নির্ভর করে বিভিন্ন গবেষক যে সমস্ত জল্পনা-কল্পনা করেছেন, সেগুলি সব্বশেষেও আলোচনার স্বতই কোন প্রয়োজন নেই।

আলৌকিক অংশ বাধ দিলে রাজমালা-বর্ণিত হোসেন শাহ-ধনুর্মাণিক্য সংঘর্ষের বিবরণ মূলত সত্য বলেই মনে হয়। স্তব্ধতাং ব্যাপারটা দাঁড়াচ্ছে এই



যে, ধনুমানিক্য একবার বাংলার চট্টগ্রাম পর্যন্ত দখল করলেন, কিন্তু তারপরেই বাংলার সেনাপতি তাঁকে বিভাড়িত করে তাঁরই রাজ্যের গোমতী-তীরবর্তী অঞ্চল পর্যন্ত জয় করে নিলেন। এর কিছুদিন পরে আবার ধনুমানিক্য চট্টগ্রাম অবধি জয় করলেন, কিন্তু এবারও বাংলার সেনাপতি তাঁকে ঠেলে নিয়ে গিয়ে গোমতী নদী পর্যন্ত অঞ্চল অধিকার করলেন এবং তার পরে খানিকটা পিছু হটে ছয়কড়িয়ায় এসে ঘাঁটি গাড়লেন। স্ততরাং ত্রিপুরার ছয়কড়িয়া পর্যন্ত অঞ্চল যে শেষ অবধি হোসেন শাহেরই অধিকারে ছিল, সে সম্বন্ধে ‘রাজমালা’র মধ্যে স্বীকারোক্তি পাওয়া যাচ্ছে। ধনুমানিক্য ১৪৩৫ শকাদে চট্টগ্রাম জয় করেছিলেন, ‘রাজমালা’র এই উক্তি সত্য; কারণ ধনুমানিক্যের ১৪৩৫ শকাদে উৎকীর্ণ এবং ‘চাটিগ্রামজয়ি’ উপাধি সংবলিত কতকগুলি মুদ্রা পাওয়া গিয়েছে (সি. প. প, ১৩৫৪, পৃ: ২৬ দ্রষ্টব্য)।

কিন্তু ‘রাজমালা’র হোসেন শাহ-ধনুমানিক্যের সংঘর্ষের সম্পূর্ণ বিবরণ দেওয়া হয়নি। অত্যাগত সূত্রের সাক্ষ্য বিশ্লেষণ করলে তা বোঝা যাবে।

প্রথমত, ‘রাজমালা’র বিবরণ অনুযায়ী ১৪৩৫ শকাদ বা ১৫১৩-১৪ খ্রীষ্টাব্দের আগে ধনুমানিক্য বাংলাদেশে অভিযান করে খণ্ডল পর্যন্ত অধিকার করে নেন। এর আগে বাংলার স্বতন্ত্রতাবাদের সঙ্গে ত্রিপুরারাজ্যের কোন বিরোধ-ই ছিল বলে ‘রাজমালা’য় লেখা নেই। এরপর ‘রাজমালা’য় লেখা হয়েছে ১৪৩৫ শক বা ১৫১৩-১৪ খ্রীষ্টাব্দে ধনুমানিক্য চট্টগ্রাম জয় করার পরে হোসেন শাহ প্রথম ত্রিপুরা আক্রমণ করেন। কিন্তু হোসেন শাহ যে ১৫১৩ খ্রীষ্টাব্দের মধ্যেই ত্রিপুরার অন্তত একাংশ অধিকার করেছিলেন, তার প্রমাণ আছে। সোনার-গাঁও অঞ্চলের একটি মসজিদে ৯১৯ হিজিরার ২রা রবী-উস-সানি বা ৭ই জুন, ১৫১৩ খ্রীষ্টাব্দে সম্পূর্ণ একটি শিলালিপি পাওয়া গিয়েছে। এতে তৎকালীন রাজা হিসাবে হোসেন শাহের নাম আছে এবং এর নির্ধাতা খণ্ডয়াস খান ত্রিপুরা রাজ্যের “সর-এ-লস্কর” ও মুয়াজ্জমাবাদের “উজীর” বলে নিজের পরিচয় দিয়েছেন। এর থেকে বোঝা যায়, ঐ তারিখের বেশ কিছুদিন আগেই হোসেন শাহের সৈন্যবাহিনী ত্রিপুরায় অভিযান করে তার খানিকটা অংশ অধিকার করে। সম্ভবত ধনুমানিক্যের ১৪৩৫ শকাদে আগে খণ্ডল অবধি জয় এবং ১৪৩৫ শকে চট্টগ্রাম অধিকার—এর মাঝখানে হোসেন শাহের এই ত্রিপুরা আক্রমণ ও তার অংশবিশেষ অধিকার ঘটেছিল। হোসেন শাহের অধীনস্থ চট্টগ্রামের শাসনকর্তা পরাগল খান এবং তাঁর পুত্র দুটি খান

( প্রকৃত নাম নসরৎ খান ) যে দু'টি মহাভারত লিখিয়েছিলেন, তাদের মধ্যে উল্লিখিত হয়েছে যে হোসেন শাহের কাছে ত্রিপুরারাজ পরাস্ত হয়েছিলেন । পরাগল খানের আজ্ঞায় লিখিত কবীজ্ঞ পরমেশ্বরের মহাভারতে লেখা রয়েছে,

হুলতান হোসেন সাহা পঞ্চগৌড়নাথ ।

ত্রিপুরার দ্বার সমপিল যার হাথ ॥

আর ছুটি খানের আজ্ঞায় লেখানো শ্রীকর নন্দীর মহাভারতে রয়েছে,

তান এক সেনাপতি লস্কর ছুটি খান ।

ত্রিপুরা গড়েত গিয়া করিল সন্নিধান ॥

... ..

ত্রিপুর নৃপতি যার ডরে এড়ে দেশ ।

পর্বত গহ্বরে গিয়া করিল প্রবেশ ॥

গজবাজী কর দিয়া করিল সম্মান ।

মহাবনমধ্যে তার পুরীর নির্মাণ ॥

অত্মাপি অভয় না দিল মহামতি ।\*

তথাপি ( অত্মাপি ? ) আতঙ্কে বৈসে ত্রিপুর নৃপতি ॥\*

এই দুই কবির বিবরণ, বিশেষ ভাবে শ্রীকর নন্দীর বিবরণে বিশ্বাস করলে বলতে হয় যে ছুটি খানের নেতৃত্বে হোসেন শাহের সৈন্যবাহিনী ত্রিপুরারাজকে সম্পূর্ণভাবে পরাজিত করে রাজ্যের এক বৃহৎ অধিকার করেছিল । কিন্তু 'রাজমালা'য় ত্রিপুরারাজের এত শোচনীয় কোন পরাজয়ের উল্লেখ নেই এবং তাতে ছুটি খানের নামও নেই । 'রাজমালা'র মতে হোসেন শাহের সঙ্গে ধনুমাণিক্যের শেষ সংঘর্ষ ১৪৩৬ শকাব্দ বা ১৫১৪-১৫ খ্রীষ্টাব্দে ঘটেছিল । কবীন্দ্রের মহাভারত ১৫০০ খ্রীঃর কিছু পরে এবং শ্রীকর নন্দীর মহাভারত তারও কয়েক বছর পরে রচিত হয় ( প্রাচীন বাংলা সাহিত্যের কালক্রম, পৃঃ ১২৬ দ্রঃ ) । ছুটি খানের ত্রিপুরা-অভিযান সম্বন্ধে শ্রীকর নন্দীর বিবরণ সত্য হলে বলতে হবে যে 'রাজমালা'য় বর্ণিত যুদ্ধগুলি বাদেও ছুটি খানের

\* এই দুই ছত্রের পাঠান্তর.

যতপি অভয় দিল খান মহামতি ।

তথাপি আতঙ্কে বৈসে ত্রিপুর নৃপতি ॥

এই পাঠ ঠিক হলে বলতে হবে, শ্রীকর নন্দীর মহাভারত রচনার সময়ে বাংলার হুলতান ও ত্রিপুরার রাজার মধ্যে সন্ধি স্থাপিত হয়েছিল ।

সেনাপতিত্বে বাংলার সৈন্তবাহিনী ত্রিপুরায় আর একবার অভিযান করেছিল, এবং ধন্তমাণিক্যকে পরাজিত করে ঐ রাজ্যের বৃহদংশ অধিকার করেছিল।

অবশ্য এখানে একটা কথা আছে। শ্রীকর নন্দীর মহাভারত হোসেন শাহের আমলে রচিত হয়েছিল, না তাঁর পুত্র নসরৎ শাহের রাজত্বকালে রচিত হয়েছিল, তা সঠিকভাবে বলা যায় না। শ্রীকর নন্দীর মহাভারতের কোন কোন পুঁথিতে তৎকালীন রাজার নাম এইভাবে উল্লিখিত হয়েছে,

নসরৎ শাহ তাত অতি মহারাজা।

বামবৎ নিত্য পালে সব প্রজা ॥

নৃপতি হসেন শাহ হএ ক্ষতিপতি।

সামদানদণ্ডভেদে পালে বসুমতী ॥

আবার কোন কোন পুঁথিতে আছে,

নসরৎ শাহ নাম অতি মহারাজা।

পুত্রসম রক্ষা করে সকল পরজা ॥

নৃপতি হসেন শাহ তনয় স্তমতি।

সামদানদণ্ডভেদে পালে বসুমতী ॥

আমার মনে হয়, শ্রীকর নন্দীর মহাভারত রচনার সময় হোসেন শাহই বাংলার সুলতান ছিলেন, তখন শ্রীকর নন্দী প্রথম প্রশস্তিটি লিখেছিলেন। পরে হোসেন শাহ যখন পরলোকগমন করেন এবং নসরৎ শাহ রাজা হন, তখন তিনি সেটি পরিবর্তিত করে দ্বিতীয় প্রশস্তিতে দাঁড় করান।\* এই অনুমান যদি সত্য হয়, তাহলে শ্রীকর নন্দীর “ত্রিপুরা-জয়” নিশ্চয়ই হোসেন শাহের রাজত্বকালে অঙ্কিত হয়েছিল। কিন্তু যদি শ্রীকর নন্দীর মহাভারত নসরৎ শাহের রাজত্বকালেই রচিত হয়ে থাকে, তাহলে প্রশ্ন উঠবে—ছুটি খান কার রাজত্বকালে “ত্রিপুরা-জয়” করেছিলেন, হোসেন শাহ না নসরৎ শাহ? হোসেন শাহের রাজত্বকালেই করার সম্ভাবনা অবশ্য বেশী, কারণ হোসেন শাহের

\* সে যুগে কবিদের মধ্যে এই রীতি ব্যাপকভাবে প্রচলিত ছিল। সপ্তদশ শতাব্দীর বিখ্যাত গ্রন্থকার জগন্নাথ পণ্ডিত শাহজাহানের জ্যেষ্ঠ পুত্র দারাগুজার প্রশস্তি করে ‘জগদানন্দরঞ্জন’ নামে একটি কাব্য লেখেন। দারার মৃত্যুর পরে জগন্নাথ ঐ কাব্যটিকে ‘প্রাণানন্দরঞ্জন’ নাম দিয়ে কোচবিহারের মহারাজা প্রাণনারায়ণের প্রশস্তিতে দাঁড় করান এবং দারার জাহাঙ্গীর প্রাণনারায়ণের নাম বসান।

আমলেই বাংলার সঙ্গে ত্রিপুরার সংঘর্ষের সংবাদ পাওয়া যায়। কিন্তু নসরৎ শাহের রাজত্বকালেও যে বাংলার সঙ্গে ত্রিপুরার যুদ্ধ চলেছিল, তার প্রমাণ আছে। সে সম্বন্ধে আমরা পরে যথাস্থানে আলোচনা করব।

যা হোক, ছুটি খানের “ত্রিপুরা-জয়” সম্বন্ধে শ্রীকর নন্দী যা লিখেছেন, তা আক্ষরিকভাবে সত্য বলে আমাদের মনে হয় না। আমাদের মনে হয়, হোসেন শাহ ত্রিপুরায় যে সব অভিযান প্রেরণ করেছিলেন, তাদের কোন একটিতে অগ্রাগ্র সেনাপতিদের সঙ্গে ছুটি খানও ছিলেন এবং ঐ অভিযানে তিনি কতকটা বীরত্বের পরিচয় দিয়েছিলেন; এইটুকুই সত্য ঘটনা, শ্রীকর নন্দী একেই অতিরঞ্জিত করে পুৰোধিত বিবরণ রচনা করেছেন।

### আরাকানের সঙ্গে হোসেন শাহের সংঘর্ষ

‘রাজমালা’য় লেখা আছে, ত্রিপুরারাজ ধনুমানিক্য দু’বার চট্টগ্রাম জয় করেছিলেন—একবার ১৫১৩-১৪ খ্রীষ্টাব্দে, আর একবার ১৫১৪-১৫ খ্রীষ্টাব্দে; কিন্তু দু’বারই চট্টগ্রামে ত্রিপুরারাজের অধিকার খুব স্বল্পকাল স্থায়ী হয়েছিল। পতুগীজ বর্ণিক জোআঁ-দে-সিলভেরা ১৫১৮ খ্রীষ্টাব্দে চট্টগ্রাম বন্দরে এসে দেখেছিলেন ঐ শহর বাংলার রাজার অধিকারভুক্ত; একথা জোআঁ-দে-বারোস-এর Da Asia এবং অগ্রাগ্র পতুগীজ গ্রন্থ থেকে জানা যায়। স্থানীয় প্রবাদ, আরাকান দেশের ইতিহাস এবং ‘রাজমালা’র সাক্ষ্য বিশ্লেষণ করলে বোঝা যায় যে, চট্টগ্রামের অধিকার নিয়ে গোড়, ত্রিপুরা ও আরাকানের রাজাদের মধ্যে প্রায়ই যুদ্ধ হত। চট্টগ্রাম অঞ্চলে এই মর্মে প্রবাদ প্রচলিত আছে যে মগেরা হোসেন শাহের রাজত্বকালে চট্টগ্রাম অধিকার করেছিল। ঐ সময় হোসেন শাহের পুত্র নসরৎ শাহের নেতৃত্বে বাংলার সৈন্যবাহিনী মগদের বিতাড়িত করে চট্টগ্রাম অধিকার করে—মৌলভী হামিদ্দুল্লাহ খান তাঁর ‘তারিখ-ই-হামিদী’ (১৮৭১) বইয়ে এই কথা লিখেছেন। কিন্তু আশ্চর্যের বিষয়, চট্টগ্রামবাসী সমসাময়িক কবি কবীন্দ্র পরমেশ্বরের মহাভারতে এবিষয়ে কোন কিছু লেখা নেই। এতে পরাগল খান সম্বন্ধে এই কথাগুলি লেখা আছে,

নৃপতি হুসেন শাহ গোড়ের জৈনর।

তান এক সেনাপতি হওন্ত লঙ্কর।

লঙ্কর পরাগল খান মহামতি।

জব্ব্ব বসন পাটিল অধ বায়ুগতি।

লক্ষরী বিষয় পাই আইবস্ত চলিয়া।

চাটিগ্রামে চলি আইল হরষিত হৈয়া ॥

পুরপোত্রে রাজ্য করে খান মহামতি।

পুরাণ শুনন্ত নিতি হরষিত যতি ॥

এতে শুধুমাত্র বলা হয়েছে, বাংলার সুলতান হোসেন শাহ পরাগল খানকে চট্টগ্রাম অঞ্চলের শাসনকর্তা নিযুক্ত করে পাঠিয়েছিলেন; হোসেন শাহ যে শত্রুর কাছ থেকে চট্টগ্রাম জয় করেছিলেন, এরকম কথার কোন ইঙ্গিত কবীজ্ঞ পরমেশ্বর বা শ্রীকর নন্দী কোথাও দেন নি। তাছাড়া ১৩২৭ থেকে ১৫১৮ খ্রীষ্টাব্দ পর্যন্ত সময়ের মধ্যে চট্টগ্রাম যে অধিকাংশ সময় বাংলার রাজার অধিকারে ছিল, এ কথা সমসাময়িক শিলালিপি, সাহিত্য ও বিদেশীদের ভ্রমণ-বিবরণী থেকে জানা যায়। ৮০০ হিজরা বা ১৩২৭ খ্রীষ্টাব্দে বিহারের দরবেশ মুজাফফর শাম্‌স্ বুল্খি যখন চট্টগ্রাম বন্দর থেকে জাহাজে চড়ে মক্কা অভিমুখে রওনা হন, তখন চট্টগ্রাম বাংলার সুলতান গিয়াসুদ্দীন আজম শাহের রাজ্যের অন্তর্ভুক্ত ছিল, একথা গিয়াসুদ্দীনকে লেখা মুজাফফর শাম্‌স্ বুল্খির চিঠি থেকে জানা যায়। (Proceedings of the 19th Session of Indian History Congress, 1959, pp. 217-220 দ্রষ্টব্য।) ১৪০২, ১৪১২ ও ১৪১৫ খ্রীষ্টাব্দে চীন থেকে তিন দল রাজপ্রতিনিধি বাংলার তৎকালীন রাজধানী পাণ্ডুয়ায় এসেছিলেন। প্রথম দুই দলের সফরের বর্ণনা দিয়েছেন এই দুই দলের সদস্য মা-হোয়ান তাঁর 'সিং-য়া-শুং-লান'এ এবং তৃতীয় দলের সফরের বর্ণনা দিয়েছেন ফেই-শিন তাঁর 'শিং-ছা-শুং-লান'এ। দুজনেরই লেখা থেকে জানা যায় যে চট্টগ্রাম ঐ সময় বাংলার রাজার অধিকারে ছিল এবং চীনা রাজপ্রতিনিধিরা এই বন্দরেই প্রথম অবতরণ করেছিলেন। ১৪১৭ ও ১৪১৮ খ্রীষ্টাব্দেও চট্টগ্রাম গৌড়ের রাজার অধিকারে ছিল, কারণ ১৩৩২ ও ১৩৪০ শকাব্দে দল্লজমর্দনদেব ও মহেশ্বরের মুদ্রা 'চাটিগ্রামে'র টাকশাল থেকে উৎকীর্ণ হয়েছিল। সুলতান জালালুদ্দীন মুহম্মদ শাহের (১৪১৫-১৬, ১৪১৮-৩৩ খ্রি:) অনেক মুদ্রাও চট্টগ্রামের টাকশালে তৈরী। অবশ্য আরাকানী কিংবদন্তী অনুসারে আরাকানরাজ মেং-খরি (১৪৩৪-৫২ খ্রি:) চট্টগ্রামের 'রাম্' নামক অঞ্চল জয় করেছিলেন এবং তাঁর পুত্র ও পরবর্তী রাজা বনোআহু (১৪৫২-৮২ খ্রি:) চট্টগ্রাম শহর জয় করেছিলেন। একথা যদি সত্য হয়, তাহলে বলতে হবে চট্টগ্রামে আরাকান-বাজের অধিকার দীর্ঘস্থায়ী হয় নি। কারণ রাস্তি খান কর্তৃক নিষিদ্ধ চট্টগ্রামের

একটি মসজিদের ৮৭৮ হিজরার ২৫শে রমজান তারিখের শিলালিপি থেকে জানা যায়, চট্টগ্রাম ১৪৭৪ খ্রীষ্টাব্দে রুকনুদ্দীন বারবক শাহের শাসনাধীন ছিল। ১৫১৮ খ্রীষ্টাব্দে চট্টগ্রামে বাংলার রাজার অধিকার সম্বন্ধে তো জোঁতা-দে-সিলভেরার সাক্ষ্য আছে।

ডঃ হবিবুল্লাহ্ লিখেছেন, “According to Rajmala, the Arakanese king took advantage of Husain’s pre-occupation with Tipperah and occupied Chittagong.” (History of Bengal, D. U., Vol. II, pp. 149-50) কিন্তু ‘রাজমালা’র ধনুমাণিক্যখণ্ডে ঠিক এই কথা পাওয়া যায় না, তাতে লেখা আছে,

পুনরপি ধনুমাণিক্য মহারাজা ।  
চাটীগ্রাম লইবারে পাঠাইলে প্রজা ॥  
মারণে কাটনে ভঙ্গ দিল গোড় সেনা ।  
রসান্ধমর্দন নারায়ণকে বৈসাইল থানা ॥  
রাসু আদি ছত্রসীক মারিয়া লইল ।  
রসান্ধ নিকটে জাইয়া পুষ্করনি দিল ॥  
রসান্ধ মারিতে গীয়াছিল সেনাপতি ।  
সেই হতে রসান্ধমর্দন নাম খ্যাতি ॥

উপরে উদ্ধৃত পাঠ সাহিত্য-পরিষদের পুঁথির। মূদ্রিত গ্রন্থে অংশটির পাঠ এই,  
গোড়াই মল্লিক ভঙ্গ দিল যুদ্ধ হৈতে ।  
ত্রিধনুমাণিক্য চলে চাটীগ্রাম লৈতে ॥  
চাটীগ্রাম হতে ভঙ্গ দিল গোড় সেনা ।  
রসান্ধমর্দন নারায়ণকে বসাইল থানা ॥  
রাসু ছত্রসিক রাজা আমল করিল ।  
রসান্ধ জিনিয়া কিল্লা পুষ্করী খনিল ॥  
নিজ রসান্ধ লৈতে নারে সেনাপতি ।  
রসান্ধমর্দন নারায়ণ তার হৈল খ্যাতি ॥

কোন পাঠেই আরাকান বা রসান্ধের রাজার চট্টগ্রাম অধিকারের কথা পাওয়া যায় না। আলোচ্য অংশে শুধু বলা হয়েছে, ত্রিপুরারাজের জনৈক সেনাপতি রসান্ধ আক্রমণ করে রসান্ধমর্দন উপাধি পেয়েছিলেন। বাহোব্, উদ্ধৃত অংশে ত্রিপুরারাজের সেনাপতি কর্তৃক রাসু (রাসু) অধিকারের কথা আছে। ইতি-

পূর্বে আমরা দেখে এসেছি যে আরাকানী কিংবদন্তীর মতে আরাকানরাজ মেং-থরি ( ১৪৩৪-৫২ খ্রীঃ ) বাংলার রাজার অধিকারভূক্ত রাহু অঞ্চল জয় করেছিলেন। এখন 'রাজমালা'র মতে ত্রিপুরার রাজা এই অঞ্চল জয় করলেন। আসলে এই অঞ্চলটি ছিল তিন রাজ্যের সীমান্তে অবস্থিত, তাই এটি এক এক সময় এক এক রাজ্যের অধিকারভূক্ত হত। হোসেন শাহের আক্রমণে ধনু-মাণিক্যের পশ্চাদপসরণের সময় আরাকান-রাজ চট্টগ্রাম অধিকার করুন বা না করুন, এই জাতীয় সীমান্তবর্তী কিছু অঞ্চল অধিকার করেছিলেন, তাতে সন্দেহের অবকাশ নাই।

দীনেশচন্দ্র ভট্টাচার্য ১৩৫৬ বঙ্গাব্দের 'সাহিত্য-পরিষৎ-পত্রিকা'য় প্রকাশিত (পৃঃ ১৬-৩২) এক প্রবন্ধে প্রমাণ করবার চেষ্টা করেছেন যে "রামের অভিষেক" রচয়িতা কবি ভবানীনাথের পৃষ্ঠপোষক রাজা জয়চন্দ (১) চক্রশালা নামক স্থানের রাজা ছিলেন ও (২) তিনি জাতিতে মগ ছিলেন এবং ১৪৮২ থেকে ১৫১৩ খ্রীঃ পর্যন্ত চট্টগ্রাম তাঁর অধিকারে ছিল। দীনেশবাবুর প্রথম সিদ্ধান্তের যথার্থ্য সম্বন্ধে কোন সন্দেহ না থাকলেও দ্বিতীয় সিদ্ধান্তের বিশেষ কোন ভিত্তি নেই। জয়চন্দ যে জাতিতে মগ ছিলেন, স্বাধীন রাজা ছিলেন, এবং ঠিক ঐ সময়েই বর্তমান ছিলেন, তা জোর করে বলবার মত কোন কারণ নেই।

প্রত্যক্ষ প্রমাণ না থাকলেও, আরাকানের মগদের সাময়িকভাবে চট্টগ্রাম অধিকারের প্রবাদ সত্য বলে মনে হয়। কারণ জোঁতা-দে-বারোস-এর Da Asia গ্রন্থে লেখা আছে যে, ১৫১৮ খ্রীষ্টাব্দে যখন পর্তুগীজ বণিক জোঁতা-দে-সিলভেরা চট্টগ্রাম বন্দরে অবতরণ করতে না পেরে আরাকান অভিযুখে রওনা হন, তখন আরাকানের রাজা বাংলার রাজার প্রজা ছিলেন। এই মূল্যবান তথ্যটি পূর্বোক্ত প্রবাদের সমর্থন জোগাচ্ছে। ইতিপূর্বে আরাকানরাজ মেং-সোআ-মুউন্ ১৪৩০ খ্রীষ্টাব্দে বাংলার হুলতান জলালুদ্দীন মুহম্মদ শাহের অধীনতা স্বীকার করে তাঁর সামন্ত হয়েছিলেন বটে, কিন্তু তাঁর পরবর্তী রাজারা বাংলার অধীনতা অস্বীকার করেন, উপরন্তু বাংলাদেশে অভিযান চালিয়ে তার অংশবিশেষ অধিকার পর্যন্ত করেন। এ অবস্থায় ১৫১৮ খ্রীষ্টাব্দে যখন আরাকানরাজ আবার বাংলার হুলতানের সামন্তে পরিণত হয়েছিলেন বলে জানা যাচ্ছে, তখন মাঝে কোন এক সময় যে বাংলার রাজার সঙ্গে যুদ্ধে আরাকানরাজের পরাজয় ঘটেছিল, তাতে কোন সন্দেহ নেই। এর থেকে মনে হয়, এইভাবে ঘটনাস্থলি স্বাধীনকমে সংঘটিত হয়েছিল—আরাকানরাজের চট্টগ্রাম অধিকার, তাঁকে উচ্ছেদের

জয় হোসেন শাহের সৈন্তবাহিনী প্রেরণ, তাদের হাতে আরাকানরাজের উচ্ছেদ এবং যুদ্ধে পরাজয় স্বীকার করে তাঁর বাংলার রাজার সামন্তে পরিণত হওয়া। ১৫১৮ খ্রীষ্টাব্দের আগেই এই ব্যাপারগুলি ঘটেছিল।

### ত্রিছত ও বিহারে হোসেন শাহের অভিযান

ইতিপূর্বে আমরা হোসেন শাহের কামতাপুর-কামরূপ অভিযান সম্বন্ধে আলোচনা করার সময়ে দেখাবার চেষ্টা করেছি যে হোসেন শাহ ত্রিছতের অন্তত কতকাংশ জয় করেছিলেন। কিন্তু কীভাবে এবং কবে জয় করেছিলেন, বর্তমানে তা বলবার কোন উপায় নেই।

বিহারে হোসেন শাহের রাজ্য অনেক দূর পশ্চিম বিস্তৃত হয়েছিল। অবশ্য বিহারের মুন্সের ও ভাগলপুর জেলায় তাঁর পূর্ববর্তী সুলতানদের মধ্যে কারও কারও শিলালিপি পাওয়া গিয়েছে। কিন্তু হোসেন শাহের শিলালিপি পাটনা জেলায়, এমন কি বিহারের পশ্চিম প্রান্তের সারণ জেলাতেও পাওয়া গিয়েছে। বর্তমান বিহার প্রদেশের অধিকাংশই হোসেন শাহের রাজ্যভুক্ত হয়েছিল, সে বিষয়ে কোন সন্দেহ নেই।

কেমন করে হোসেন শাহ বিহারের এই সমস্ত অঞ্চল জয় করলেন, তার কোন বিস্তৃত বিবরণ পাওয়া যায় না।

২০১ হিজরা বা ১৪২৫ খ্রীষ্টাব্দে দিল্লীর সুলতান সিকন্দর শাহের সঙ্গে হোসেন শাহের সন্ধি স্থাপিত হয়। সিকন্দর শাহের দলের লোকদের মতে ঐ বছরের মধ্যেই সিকন্দর শাহের বিহার (অর্থাৎ বর্তমান বিহার শরীফ ও তৎসম্বন্ধিত অঞ্চল) জয় সম্পূর্ণ হয়েছিল, কারণ বিহার শরীফের দায়রা মহল্লায় ফজলুল্লাহর কবরের উত্তর দিকের দেওয়ালের শিলালিপি থেকে জানা যায় যে, সিকন্দরের বিহার জয়ের পর তাঁর অধীনস্থ শাসনকর্তা দরিয়ান খান মুহানির শাসনকালে হাজী খান ২০১ হিজরায় পূর্বদিকের ফটক নির্মাণ করান (JBRS, 1955, p. 363)। এখানে বিহার বলতে ‘বিহার শরীফ’কে বোঝানো হয়েছে, সমগ্র বিহার অঞ্চলকে বোঝানো হয় নি। আধুনিক বিহার প্রদেশের অন্তর্ভুক্ত অনেকগুলি অংশ হোসেন শাহের অধিকারে ছিল। হোসেন শাহের মুন্সেরে শিলালিপি পাওয়া গিয়েছে, তার তারিখ ২০৩ হিঃ। পাটনা জেলার বোনহরা, নওয়াদা ও মচ্ছিহাটায় হোসেন শাহের শিলালিপি পাওয়া গিয়েছে; তাদের তারিখ যথাক্রমে ২০৮, ২১৬ ও ২১৬ হিজরা। সারণ



জেলার ইসমাইলপুর, চেরান্দ ও নরহন গ্রামেও হোসেন শাহের শিলালিপি পাওয়া গিয়েছে, ইসমাইলপুর ও চেরান্দের শিলালিপির তারিখ যথাক্রমে ২০৬ ও ২০২ হিজরা। 'ঐচতত্ত্বচরিতামৃত' মধ্যলীলা ২০শ পরিচ্ছেদ থেকে জানা যায় যে মুজাফফরপুর জেলার হাজীপুর হোসেন শাহের রাজ্যের অন্তর্ভুক্ত ছিল।

সিকন্দর শাহের সঙ্গে হোসেন শাহের সন্ধি স্থাপিত হওয়া সত্ত্বেও দু'জনের মধ্যে যে পরিপূর্ণ প্রীতির সম্বন্ধ স্থাপিত হয় নি, তার প্রমাণ আছে। সন্ধির সময় হোসেন শাহ প্রাতঃশ্রুতি দিয়েছিলেন যে, সিকন্দর শাহের শত্রুদের তিনি ভবিষ্যতে আশ্রয় দেবেন না। কিন্তু এই প্রতিশ্রুতি শেষ পর্যন্ত পালিত হয়নি। সিকন্দর শাহ তাঁর অগ্রতম অমাত্য "সারণের নায়েব (প্রতিনিধি)" হোসেন খান ফর্মুলির প্রাধিক্ত্য বৃদ্ধি পেতে দেখে এবং তাঁকে বাংলার সুলতানের সঙ্গে ঘনিষ্ঠতা করতে দেখে ক্রুদ্ধ হয়ে ১১৫ হিজরায় অর্থাৎ ১৫০২ খ্রীষ্টাব্দে হাজী সারং-এর নেতৃত্বে একদল সৈন্য পাঠান। হোসেন খান ফর্মুলি বিপদ বুঝে বাংলার সুলতান আলাউদ্দীন হোসেন শাহের আশ্রয় গ্রহণ করেন। (JBRs, 1955, pp. 365-366)। ১১৫ হিঃ অবধি হোসেন খান ফর্মুলি সারণে সিকন্দর শাহের প্রতিনিধি ছিলেন। কিন্তু ১০২ হিজরাতে সারণের চেরান্দে হোসেন শাহের শিলালিপি পাওয়া যাচ্ছে। এর থেকে মনে হয়, ষোড়শ শতাব্দীর প্রথম দশকে সারণের এক অংশে হোসেন শাহের এবং অপর অংশে সিকন্দর শাহের অধিকার ছিল।

বিহার শরীফের পূর্বোক্ত শিলালিপিতে যে দরিয়া খান মুহানির নাম পাওয়া যায়, তিনি ১৫২২ খ্রীঃ পর্যন্ত "বিহারের" শাসনকর্তা ছিলেন। সমসাময়িক ঐতিহাসিক শেখ রিজকুল্লাহ্ (১৪৯১-১৫৪১ খ্রীঃ) তাঁর 'ওয়ারিকিয়া-ই-মুস্তাকী' গ্রন্থে লিখেছেন যে সিকন্দর শাহের মৃত্যুর (১৫১৭ খ্রীঃ) পর বাংলার সুলতান ও উড়িষ্যার রাজা যখন শত্রুতা করতে শুরু করলেন, তখন দরিয়া খান মুহানি তেজের সঙ্গে বলেছিলেন, "সুলতান মারা গিয়েছেন তো কী হয়েছে? আমি এখনও বেঁচে আছি। সুলতান যখন অনেক দূরে তাঁর রাজধানীতে থাকতেন, তখন আমিই সবসময় এখানে থাকতাম। যাও, একদিকে বাংলার আর একদিকে উড়িষ্যার দ্বার বন্ধ কর। কারও যদি সাহস থাকে, সে এদিকে আহুক।" (JBRs, 1955, p. 367)। সিকন্দর শাহের মৃত্যুর পরে আলাউদ্দীন হোসেন শাহ যে প্রকাশ্যভাবেই দিল্লীর রাজশক্তির বিরুদ্ধে শত্রুতা

শুরু করেছিলেন, এই মূল্যবান সংবাদ এখানে পাচ্ছি। দরিয়া খান মুহানির আফালন সত্ত্বেও বিহারে হোসেন শাহের রাজ্যবিস্তার বিশেষ বাধাপ্রাপ্ত হয়েছিল বলে মনে হয় না।

### হোসেন শাহের সামরিক কীর্তির সার-সংকলন

আলাউদ্দীন হোসেন শাহ অষ্টাশ্র রাজ্যের সঙ্গে যে সমস্ত সংঘর্ষ ও যুদ্ধবিগ্রহে জড়িত হয়েছিলেন, তাদের সম্বন্ধে আমরা এতক্ষণ আলোচনা করলাম।

এই আলোচনার ফলে যে তথ্যগুলি পাওয়া গেল, নীচে সংক্ষেপে সেগুলি উল্লেখ করছি।

১৪২৫ খ্রীষ্টাব্দে দিল্লীর সুলতান সিকন্দর লোদীর সঙ্গে হোসেন শাহের সংঘর্ষ হয়। বিহারের বাঢ় নামক জায়গায় দুই সুলতানের সৈন্য পরস্পরের সম্মুখীন হয়। কিন্তু শেষ পর্যন্ত দুই পক্ষ যুদ্ধ না করে সন্ধি স্থাপন করে।

১৪২৩-২৪ খ্রীষ্টাব্দে হোসেন শাহ কামতাপুর-কামরূপ রাজ্য আক্রমণ করেন এবং কিছুদিনের মধ্যেই সেখানকার রাজাকে যুদ্ধে সম্পূর্ণভাবে পরাজিত করে ঐ রাজ্য অধিকার করেন।

এর কিছু পরে এবং ১৫১৪-১৫ খ্রীষ্টাব্দের আগে হোসেন শাহ আসাম বা অহোম রাজ্য আক্রমণ করে তার সমতল অঞ্চল অধিকার করেন। ঐ রাজ্যের রাজা তখন পার্বত্য অঞ্চলে আশ্রয় নেন এবং বর্ষাকাল আগত হলে প্রত্যা-আক্রমণ করে হোসেন শাহের লোকদের বিধ্বস্ত করে নিজের হৃত অঞ্চলগুলি পুনরধিকার করেন।

১৪২৩-২৪ খ্রীষ্টাব্দ থেকে শুরু করে অন্তত ১৫১৫ খ্রীষ্টাব্দ পর্যন্ত উড়িষ্যার রাজার সঙ্গে হোসেন শাহের যুদ্ধ চলে। মাঝে কোন কোন সময় এই যুদ্ধ বন্ধ ছিল এবং ১৫১৪ খ্রীষ্টাব্দে সন্ধি আসন্ন হয়ে উঠেছিল, কিন্তু ১৫১৫ খ্রীষ্টাব্দে আবার নতুন করে যুদ্ধ বাধে। এই যুদ্ধের বিভিন্ন পর্যায়ে কোন কোন সময় উভয় রাজা অষ্টাশ্র রাজ্যের অঞ্চলবিশেষ অধিকার করেন, কিন্তু কারও অধিকারই স্থায়ী হয়নি। উভয় রাজাই এই যুদ্ধে জয়ের দাবী করেন, কিন্তু মোটের উপর এই যুদ্ধ অমীমাংসিত থেকে গিয়েছিল বলে মনে হয়। ১৫১৫ খ্রীষ্টাব্দেই এই যুদ্ধের অবসান হয়েছিল বলে বোধ হয়।

১৫১৩ খ্রীষ্টাব্দেরও আগে কোন এক সময়ে ত্রিপুরার রাজা ধর্মমাণিক্যের

সঙ্গে হোসেন শাহের যুদ্ধ শুরু হয় এবং ১৫১৪-১৫ খ্রীষ্টাব্দ বা তারও পর পর্যন্ত এই যুদ্ধ চলে। এই যুদ্ধেও দুই রাজাই কোন কোন সময় অল্প রাজ্যের অংশ-বিশেষ অধিকার করেন বটে, কিন্তু এইসব অধিকার বেশীদিন স্থায়ী হয়নি। শেষ পর্যন্ত ত্রিপুরা রাজ্যের কিছু অংশ হোসেন শাহের রাজ্যের অন্তর্ভুক্ত হয়। কিন্তু ত্রিপুরার সঙ্গে যুদ্ধ চলতে থাকে, হোসেন শাহের রাজত্ব শেষ হবার পরেও এই যুদ্ধ চলেছিল।

সম্ভবত ১৫১৪ থেকে ১৫১৮ খ্রীষ্টাব্দের মধ্যে কোন এক সময় আরাকানের রাজা চট্টগ্রাম অধিকার করেন; হোসেন শাহের সৈন্যবাহিনী ১৫১৮ খ্রীষ্টাব্দের আগেই চট্টগ্রাম পুনরধিকার করে এবং আরাকানরাজ যুদ্ধে পরাজিত হয়ে হোসেন শাহের সামন্তে পরিণত হন।

এছাড়া হোসেন শাহ সম্ভবত ত্রিহতেরও কতকাংশ জয় করেছিলেন। হোসেন শাহ বিহারের অধিকাংশই নিজের রাজ্যভুক্ত করেন। এইসব অঞ্চলের কিছু কিছু অংশ আগে সিকন্দর লোদীর রাজ্যভুক্ত ছিল। সিকন্দর লোদীর সঙ্গে সন্ধি স্থাপিত হওয়ার পরেও তাঁর সঙ্গে হোসেন শাহের পরিপূর্ণ প্রীতির সম্বন্ধ স্থাপিত হয় নি। ১৫১৭ খ্রীষ্টাব্দে সিকন্দর লোদীর মৃত্যুর পরে তিনি প্রকাণ্ডই দিল্লীর রাজশক্তির বিরুদ্ধে শত্রুতা শুরু করেন।

### বাংলার পতুগীজদের আগমন

পতুগীজ ঐতিহাসিক জোঁয়া-দে-বারোস-এর “Da Asia” গ্রন্থে (রচনাকাল ষোড়শ শতকের মধ্যভাগ) এবং অত্যাগ্র পতুগীজ গ্রন্থে বাংলাদেশে পতুগীজদের প্রথম আগমন সম্বন্ধে বিস্তৃত ও প্রামাণিক বিবরণ পাওয়া যায়। এই বিবরণ থেকে জানা যায় যে, হোসেন শাহের রাজত্বকালেই বাংলাদেশে পতুগীজরা প্রথম পদার্পণ করে। বাংলাতেই বা বলি কেন, ভারতের প্রথম পতুগীজ আগন্তুক ডাঙ্কো-দা-গামা যে বছর (১৪৯৮ খ্রীষ্টাব্দে) কালিকট বন্দরে অবতরণ করেন, তখনও হোসেন শাহই বাংলার সুলতান ছিলেন। যাহোক, জোঁয়া-দে-বারোস-এর বিবরণ থেকে জানা যায় যে, দীর্ঘকাল ধরে পতুগীজরা বাংলাদেশে তাদের বাণিজ্য শুরু করতে পারেনি। মাঝে মাঝে দু'একজন পতুগীজ বণিক বাংলার সমুদ্রোপকূলে এসে অল্পস্বল্প জিনিষ কেনাবেচা বা এদেশের কুটিরশিল্পীদের সঙ্গে পণ্যদ্রব্য বিনিময় করে চলে যেত। প্রাচ্যে পতুগীজ অধিকারভুক্ত অঞ্চলগুলির শাসনকর্তা আলবুকার্ক ১৫১৩ খ্রীষ্টাব্দে পতুগীজদের

রাজা মনোএল্কে এক চিঠি লিখে জানান যে বাংলাদেশের লোকেরা পতু'গীজদের কাছে জিনিস কিনতে চায়। ১৫১৭ খ্রীষ্টাব্দে আলবুকার্ক ফার্নান্দেস-দা-আল্ফ্রেই নামে একজন পতু'গীজকে চারটি জাহাজ দিয়ে বাংলায় বাণিজ্য শুরু করতে এবং আরব বণিকদের একচেটিয়া ব্যবসায়ের মূলোচ্ছেদ করতে বলেন। কিন্তু মাঝসমুদ্রে অগ্নিকাণ্ডে প্রধান জাহাজটি নষ্ট হওয়ার জন্ত ফার্নান্দেস পর্বন্ত বাংলাদেশে এসে পৌছোতে পাবেননি। অবশ্য জোআ-কোএলহো নামে তাঁর একজন বার্তাবহ চট্টগ্রামে এসেছিলেন। ১৫১৮ খ্রীষ্টাব্দে আলবুকার্কের স্থলাভিষিক্ত পতু'গীজ শাসনকর্তা লোপো-সোরস-দে-আল-বার্গারিমা—জোআ-দে-সিলভেরা নামে আর একজন পতু'গীজকে বাংলাদেশে পাঠান সেই একই উদ্দেশ্য সাধনের জন্ত। সিলভেরা প্রথমে আরাকান নদীর মোহানায় পৌছে তারপর চট্টগ্রাম বন্দরে এসে পৌছোন। জোআ-কোএলহো আগে থেকেই সেখানে এসেছিলেন। সিলভেরা পতু'গালের রাজার পক্ষ থেকে বাংলার রাজাকে প্রদত্তা জানিয়ে একটি চিঠি পাঠান এবং বাণিজ্য কবার অমুমতি চান। সেই সঙ্গে তিনি একটি কুঠি নির্মাণেরও অনুমতি চান, যেখানে পতু'গীজ বণিকবা সমুদ্রযাত্রার সময় বিশ্রাম নিতে পারবে এবং ভারতবর্ষের অন্যান্য অংশেও সঙ্গে পণ্যদ্রব্য আদানপ্রদান করতে পারবে। কিন্তু বাংলার রাজা তাঁর এই আবেদনের কোন উত্তর পাঠাবার আগেই সিলভেরার সঙ্গে চট্টগ্রামের শাসনকর্তার সংঘর্ষ বেবে গেল। এব আগে একবার সিলভেরা গ্রোমাল নামে একজন মুসলমানের দুটি জাহাজ দখল করেছিলেন। এই গ্রোমাল ছিল চট্টগ্রামের শাসনকর্তার আত্মীয়। চট্টগ্রামের শাসনকর্তা এই ব্যাপার জানতে পেয়ে পতু'গীজদের তাড়াবাব জন্ত যুদ্ধের আয়োজন করতে লাগলেন। তাঁর ধারণা হল সিলভেরা জলদস্যু। এদিকে পতু'গীজদের খাবার ফুরিয়ে যাওয়ার সিলভেরা চলে বোঝাই একটা নৌকা দখল করে নিলেন। চট্টগ্রামের শাসনকর্তা তখন ডাঙা থেকে কামান ছাগলেন। পতু'গীজরাও চট্টগ্রাম বন্দর অবরোধ করে বাংলাদেশের সমস্ত সামুদ্রিক বাণিজ্য বিপন্ন কবে দিল। কিন্তু চট্টগ্রামের শাসনকর্তা তখন কয়েকটি জাহাজের জন্ত প্রতীক্ষা করছিলেন, তিনি বৈগতিক দেখে পতু'গীজদের সঙ্গে সন্ধি করতে চাইলেন, কোএলহোর সঙ্গে তাঁর ভাল সম্পর্ক ছিল, তাঁর মধ্যস্থতায় সাময়িকভাবে একটা সন্ধি হল, প্রত্যাশিত জাহাজগুলি বন্দরে এসে পৌছোবামাত্র তিনি সিলভেরার উপর আক্রমণ শুরু করলেন। বাংলাদেশের মাটিতে নামতে না পেরে

সিলভেরা শেষ পর্যন্ত নিরাশ হয়ে আরাকানের দিকে গেলেন। কোএলহো চীনে চলে গেলেন। আরাকানের রাজা এই সময় বাংলার স্বলতানের প্রজা ছিলেন। তাঁর রাজধানী আরাকান চট্টগ্রাম থেকে ৩৫ লীগ দূরে অবস্থিত ছিল। আরাকানের রাজাব সঙ্গে সিলভেরাব কথাবার্তা চলল। আরাকান-রাজ জানালেন তান পতু'গীজদের সঙ্গে বন্ধুত্ব করতে ইচ্ছুক। সিলভেরা কিন্তু জানতে পারলেন যে তিনি আরাকানে অবতরণ করলেই তাঁকে বিশ্বাসঘাতকতা হবে বন্দী করা হবে। নিবাশ হয়ে তিনি সিংহলে ফিরে গেলেন।

১৫১৪ খ্রিষ্টাব্দে দুয়ার্তে-বাববোসা নামে একজন পতু'গীজ বাংলাদেশে ভ্রমণ করেন। ইনি বিখ্যাত পতু'গীজ নাবক মাগেলানের জ্যেষ্ঠ। তিনি এদেশের একটি বিবরণ লিখে গিয়েছেন। সেটি আমরা পবে যথাস্থানে উদ্ধৃত করব।

### হোসেন শাহের রাজধানী

হোসেন শাহের রাজধানী কোথায় ছিল, সে সম্বন্ধে 'রিয়াজ-উল-সলাতীনে' লেখা আছে, "স্বলতান আলাউদ্দীন হোসেন শাহ তাঁর রাজধানী গোড় নগরীর সংলগ্ন একডালায় স্থানান্তরিত করেন। হোসেন শাহ ছাড়া বাংলার আর কোন রাজা পাণ্ডুয়া ও গোড় ভিন্ন অন্য কোন স্থানে রাজধানী স্থাপন করেন নি।" হোসেন শাহের রাজধানী যে একডালায় ছিল, সেকথা হোসেন শাহের মৃত্যুর ৭১ বছর পরে রচিত 'তবকাৎ-ই-আকবরী'তেও লেখা আছে। সম্ভ্রুতি এ সম্বন্ধে সমসাময়িক প্রমাণ আবিষ্কৃত হয়েছে। ১১১ হিজরার ২রা জমাদী-অল-আউয়ল অর্থাৎ ১৫০৫ খ্রিষ্টাব্দের ১লা অক্টোবর তারিখে মুহম্মদ আব্দুলজ্জাদান বখ্শ নামে এক ব্যক্তি বিশিষ্ট ঐন্সামিক গ্রন্থ 'শাহীহ্-অল-বখারী'র তিন খণ্ডের পুঁথি নকল সম্পূর্ণ করেছিলেন। এই তিন খণ্ডের পুঁথি বর্তমানে বাকীপুর ওরিয়েন্টাল পাবলিক লাইব্রেরীতে আছে; সর্বশেষ খণ্ডের পুঁথিটির পুস্পিকা থেকে জানা যায় যে, পুঁথিগুলি আলাউদ্দীন হোসেন শাহের রাজকীয় কোথাগারের জন্ত নকল করা হয়েছিল বাংলার রাজধানী একডালায় ("The...colophon says that all these three copies were written for the Royal Treasury of Alauddin Hussain Shah bin Sayyid Ashraf al-Husaini, the king of Bengal... Dated Yakdalah, the capital of Bengal, A. H. 911."— Catalogue of the Arabic and Persian Manuscripts in the Oriental Public Library at Bankipore, Vol. V, pp. 18-20)।

সুতরাং হোসেন শাহের রাজধানী যে একডালায় ছিল, তা জানা গেল। এর আগে চতুর্দশ শতাব্দীতে শামসুদ্দীন ইলিয়াস শাহ ও তাঁর পুত্র সিকন্দর শাহ একডালার দুর্ভেদ্য দুর্গে আশ্রয় নিয়ে দিল্লীখর কিরোজ শাহ তোগলকের আক্রমণ প্রতিহত কবেছিলেন বলে জিয়াউদ্দীন বাবিন, শাম্‌স্‌-ই-সিয়াজ্‌-ই-আফিফ প্রভৃতি সমসাময়িক লেখকরা এবং অন্তর্ভুক্ত ইতিহাসিকরা লিখেছেন। কিন্তু এই একডালা কোথায় ছিল, তা এখনও পর্যন্ত স্থিতিভাবে নিরূপণ করা যায়নি। রেনেল এবং বেভারিজের মতে বর্তমান ঢাকা জেলার অন্তর্ভুক্ত একডালা গ্রামই এই একডালা। ওয়েস্টমেকটের মতে একডালা বর্তমানে মালদহ জেলার অন্তর্ভুক্ত। অক্ষয়কুমার মৈত্রেয়ের মতে মালদহ জেলার দমদমা নামক স্থানই প্রাচীনকালে একডালা নামে পরিচিত ছিল। বঙ্গনৌকাস্ত চক্রবর্তীর মতে এই একডালা পাণ্ডুয়ার খুব নিকটে অবস্থিত ছিল। আবিদ আলীর মতে এই একডালা পাণ্ডুয়ার আট মাইল পশ্চিমে অবস্থিত মুর্চা গ্রাম। স্টেপলটন ও নীরদভূষণ রায়ের মতে এই একডালা ঘোড়াঘাটেব ১৫ মাইল পশ্চিমে এবং পাণ্ডুয়ার ২০ মাইল উত্তরে অবস্থিত বর্তমান দিনাজপুর জেলাব অন্তর্গত একডালা গ্রাম। রামপ্রাণ গুপ্ত লিখেছেন, “কেহ বা মালদহের কেহ বা দিনাজপুরের ‘জগদলকেই’ এই একডালা অহুমান করেন।”

আলাউদ্দীন হোসেন শাহের রাজধানী যে একডালায় ছিল, একথা নিশ্চিত-রূপে জানবার পর একডালার অবস্থান নির্ণয় করা এখন খুব সহজ হয়ে পড়েছে। এ সম্বন্ধে ‘চৈতন্যভাগবত’ ও ‘চৈতন্যচরিতামৃতের’ সাক্ষ্য খুব মূল্যবান। ‘চৈতন্যভাগবতের’ অন্ত্যখণ্ডের চতুর্থ অধ্যায়ে স্পষ্ট লেখা আছে যে গৌড়ের নিকটবর্তী রামকেলি গ্রামের খুব কাছেই হোসেন শাহেব রাজধানী ছিল। এই অধ্যায়ে বৃন্দাবনদাস লিখেছেন,

গৌড়ের নিকটে গঙ্গাভীরে এক গ্রাম।

ব্রাহ্মণসমাজ তার ‘রামকেলি’ নাম।

দিন চারি পাঁচ প্রভু সেই পুণ্যস্থানে।

আসিয়া রহিলা যেন কেহো নাহি জানে।

রামকেলি গ্রামের কাছেই যে হোসেন শাহের রাজধানী, সে কথা বৃন্দাবনদাস এর পর বলেছেন,

নিকটে যবন রাজা পরম দুর্বার।

তথাপিহ চিন্তে ভর না অয়ে কাহার।

'চৈতন্যচরিতামৃত' মধ্যলীলা প্রথম পরিচ্ছেদে লেখা আছে যে হোসেন শাহ কেশব ছত্রী ও দ্বীর খাসকে চৈতন্যদেব সম্বন্ধে জিজ্ঞাসাবাদ করার পরে রূপ-সনাতন দুই ভাই লুকিয়ে গভীর রাত্রে রামকেলি গ্রামে গিয়ে চৈতন্যদেবের সঙ্গে দেখা করেছিলেন,

ঘরে আসি দুই ভাই যুক্তি করিয়া ।

প্রভু দেখিবারে চলে বেশ লুকাইয়া ॥

অর্দ্ধরাত্রো দুই ভাই আসিলা প্রভুস্থানে ।

এ বিষয়ে কৃষ্ণদাস কবিরাজের সাক্ষ্য খুব মূল্যবান, কারণ তিনি দীর্ঘকাল রূপ-সনাতনের ঘনিষ্ঠ সাক্ষ্য লাভ করেছিলেন। তাঁর উক্তি থেকে আমরা জানতে পারছি যে রূপ-সনাতন তাঁদের নিবাসস্থল অর্থাৎ হোসেন শাহের রাজধানী থেকে এক রাত্রে মধ্যেই গোপনে রামকেলি গ্রামে গিয়ে চৈতন্যদেবের সঙ্গে দেখা করে ফিরে এসেছিলেন। এর থেকেও বোঝা যায় হোসেন শাহের রাজধানী একডালা রামকেলির একেবারে কাছাকাছি তথা গোড়েরও খুব কাছে অবস্থিত ছিল। রামকেলি গ্রাম গোড় শহরের পশ্চিম উপকণ্ঠে অবস্থিত ছিল।

এই প্রসঙ্গে আর একটি কথা বলা দরকার। 'ভক্তিরত্নাকর'র প্রথম তরঙ্গে লেখা আছে যে রূপ-সনাতন রামকেলি গ্রামে বাস করতেন,

গোড়ে রামকেলি গ্রামে করিলেন বাস ।

ঐশ্বৰ্যের সীমা অতি অদ্ভুত বিলাস ॥

... ..

রামকেলি গ্রামে সে সকল বিপ্র লৈয়া ।

ব্যবহার কার্য সব সাথে হর্ষ হৈয়া ॥

কিন্তু 'চৈতন্যচরিতামৃত' মধ্যলীলার ১৯শ অধ্যায়ে লেখা আছে,

ত্রিরূপ-সনাতন রামকেলি গ্রামে ।

প্রভুকে মিলিয়া গেল আপন ভবনে ॥

এখানে স্পষ্ট বলা হয়েছে যে রূপ-সনাতন রামকেলি গ্রামে চৈতন্যদেবের সঙ্গে দেখা করে নিজের ভবনে ফিরে গেলেন। এর থেকে মনে হয়, তাঁদের ভবন রামকেলি গ্রামে ছিল না, অথবা কোন জায়গায় ছিল। রূপ-সনাতন শুধু হোসেন শাহের মন্ত্রী ছিলেন না, প্রাইভেট সেক্রেটারীর পর্যায়ভুক্ত ছিলেন। তাঁদের বেশীর ভাগ সময়েই রাজার কাছে কাছে থাকতে হত। সুতরাং তাঁদের

বাসভবন রাজধানীর বাইরে হতে পারে না। আর যদি তর্কের খাতিরে ধরে নেওয়া যায় যে রূপ-সনাতন রামকেলি গ্রামেই বাস করতেন, তাহলেও বলতে হবে হোসেন শাহের রাজধানী রামকেলির খুব কাছে অবস্থিত ছিল, তা না হলে রূপ-সনাতনের পক্ষে সদাসর্বদা রামকেলি থেকে সুলতানের কাছে যাওয়া সম্ভব হত না।

জিয়াউদ্দীন বারনির মতে একডালা পাণ্ডুর নিকটবর্তী একটি মৌজা। ফিরিশতার মতে একডালা গঙ্গা থেকে সাত ক্রোশ দূরে অবস্থিত। কিন্তু এই দু'জন লেখকের মধ্যে কেউই কখনও বাংলাদেশে আসেন নি। 'রিয়াজ-উস-সলাতীনে'র লেখকের মতে একডালা গোড়ের পাশেই অবস্থিত ছিল এবং 'চৈতন্যভাগবত' ও 'চৈতন্যচরিতামৃত'ের সাক্ষ্য থেকে এই উক্তিই সঠিক বলে প্রমাণিত হচ্ছে। 'রিয়াজ'-রচয়িতা মালদহেরই লোক, সুতরাং তিনি অষ্টাদশ শতাব্দীতে গ্রন্থ রচনা কবলেও এ বিষয়ে তাঁর সাক্ষ্য বিশেষ গুরুত্বপূর্ণ। একডালার অবস্থিতি সম্বন্ধে আজকের দিনের তুলনায় তখন অনেক বেশী তথ্য-প্রমাণ ছিল সন্দেহ নেই। গোড় পাণ্ডুয়া থেকে মাত্র ২০ মাইল দূর, সুতরাং একডালা সম্বন্ধে জিয়াউদ্দীন বারনির উক্তিও একেবারে ভুল নয়। জিয়াউদ্দীন বারনিরই সমসাময়িক কোন অজ্ঞাত ব্যক্তি কর্তৃক রচিত 'সিরাৎ-ই-ফিরোজ-শাহী' গ্রন্থে লেখা আছে যে একডালা গঙ্গার তীরে অবস্থিত এবং গঙ্গার শাখা দ্বারা পরিবেষ্টিত ছিল। এই বর্ণনা গোড় সম্বন্ধেই প্রযোজ্য।

এখন কথা হচ্ছে, হোসেন শাহ তাঁর রাজধানী গোড় থেকে একডালার স্থানান্তরিত করলেন কেন? রজনীকান্ত চক্রবর্তীর মতে ব্যক্তিগত নিরাপত্তার জ্ঞান তিনি এরকম করেছিলেন। এই কথাই ঠিক বলে মনে হয়। এর আগে উপযুপরি কয়েকজন সুলতান যেভাবে আততায়ীদের হাতে প্রাণ হারিয়েছিলেন, সেই কথা মনে করেই সম্ভবত হোসেন শাহ একডালায় তাঁর রাজধানী স্থানান্তরিত করেছিলেন। খুব সম্ভব তিনি একডালার দুর্ভেদ্য দুর্গেই বাস করতেন। তা'ছাড়া হোসেন শাহের সিংহাসনে আরোহণের সময় কয়েকদিন অবিশ্রান্ত লুণ্ঠের ফলে রাজধানী গোড় নিশ্চয়ই শ্রীহীন হয়ে পড়েছিল। তার ফলেও হয়তো হোসেন শাহ অন্য জায়গায় তাঁর রাজধানী স্থাপন করার প্রয়োজন বোধ করেছিলেন।

'রিয়াজ-উস-সলাতীনে' লেখা আছে যে গোড়ের একনাথা নামে জায়গায় হোসেন শাহের সমাধি ছিল। উনবিংশ শতাব্দীর প্রথমদিকে কেটন ও



উইলিয়ম ক্রাকলিন এবং মাকের দিকে মুনসী ইলাহী বখ্শ এই সমাধি দেখেছিলেন। এই সমাধি যে জায়গায় ছিল, সে জায়গাটি এখন বাঙলা-কোট নামে পরিচিত, এটি বাইশ-গজী দেওয়ান বা পুরোনো রাজপ্রাসাদের ভগ্নাবশেষের প্রায় এক ফার্স্‌ উত্তর-পূর্বে অবস্থিত। হোসেন শাহের সমাধি-ভূমির এই অবস্থান থেকেও মনে হয় যে হোসেন শাহের রাজধানী গোড়ের কাছে ছিল, কারণ মৃত রাজাকে তাঁর রাজধানী থেকে অনেক দূরে নিয়ে এসে কবর দেওয়ার প্রথা সে যুগে প্রায় ছিলই না বলা চলে।

### হোসেন শাহ ও শ্রীচৈতন্য

মধ্যযুগের বাংলার সবচেয়ে বিখ্যাত নরপতি হোসেন শাহ এবং বাংলার শ্রেষ্ঠ মহাপুরুষ শ্রীচৈতন্য পরস্পরের সমসাময়িক। এই যোগাযোগ সত্যিই আশ্চর্য। ইতিহাসে সাধারণত দেখা যায়, কোন মহাপুরুষের নামের জোরে তাঁর সমসাময়িক রাজাও বিখ্যাত হয়ে পড়েন। বুদ্ধদেবের সমসাময়িক না হলে রাজা বিদ্যাসারকে আজ কে চিনত? কিন্তু হোসেন শাহের বেলায় এক ব্যতিক্রম ঘটেছে। তিনি শুধুমাত্র তাঁর সমসাময়িক মহাপুরুষ শ্রীচৈতন্যের জন্তু বিখ্যাত নন, নিজগুণেই তিনি বড়, তাই ব্রহ্মপুত্র থেকে উড়িষ্যা পর্যন্ত সর্বত্র তাঁর স্মৃতি জনসাধারণের মনের মধ্যে আজও বেঁচে আছে।

হোসেন শাহ তাঁর সমসাময়িক এই মহামানবকে কী দৃষ্টিতে দেখেছিলেন, তা জানতে আগ্রহ হওয়া স্বাভাবিক। তিনি যে শ্রীচৈতন্যদেবের নাম জানতে পেরেছিলেন, সে কথা বৃন্দাবনদাস, কবিকর্ণপুর, জয়ানন্দ, চূড়ামণিদাস ও কৃষ্ণদাস কবিরাজ প্রভৃতি বহু চরিতকার উল্লেখ করেছেন, কাজেই তাতে সন্দেহের কোন অবকাশ নেই। এক চূড়ামণিদাস ভিন্ন অন্য সব চরিতকারই লিখেছেন যে নীলাচল থেকে গোড়ে আগমনের সময় যখন চৈতন্যদেব বৃন্দাবনে যাওয়ার সঙ্কল্প নিয়ে গোড়ের অনতিদূরে অবস্থিত রামকলি গ্রাম পর্যন্ত এসেছিলেন, তখন হোসেন শাহ শ্রীচৈতন্যদেবের কথা শোনেন। অবশ্য এ-সম্বন্ধে বিভিন্ন বইএর বর্ণনার মধ্যে একটু পার্থক্য আছে। চূড়ামণিদাসের মতে চৈতন্যদেবের সন্ন্যাস গ্রহণের আগেই তাঁর প্রতি হোসেন শাহের দৃষ্টি আকর্ষিত হয়েছিল। যাহোক, এখন আমরা আলোচ্য বিষয় সম্বন্ধে বিভিন্ন গ্রন্থের উক্তি বিচার করে সত্য নির্ধারণের চেষ্টা করব।

বৃন্দাবনদাসের 'চৈতন্যভাগবতে' (রচনাকাল ১৫৩৮ খ্রীঃ থেকে ১৫৫০ খ্রীঃ)

মধ্যে) সর্বপ্রথম আমরা আলোচ্য প্রসঙ্গের উল্লেখ পাচ্ছি। বৃন্দাবনদাস বেশ বিস্তৃতভাবেই বিষয়টির বর্ণনা দিয়েছেন।

‘চৈতন্যভাগবত’ের অন্ত্যখণ্ডের চতুর্থ অধ্যায়ে বৃন্দাবনদাস লিখেছেন যে চৈতন্যদেব যখন বামকেলি গ্রামে গিয়ে ভক্তদের সঙ্গে হবিগুণগানে বিভোক্ত ছিলেন, তখন,

নিকটে যবন বাজ। পরম দুর্ব্বার।  
তথাপিহ চিত্তে ভয় না জন্মে কাহার ॥  
নির্ভয় হইয়া সর্বলোক বোলে হরি।  
হুঃখ শোক গৃহ বিত্ত সকল পারসি ॥  
কোটোয়াল গিয়া কহিলেক রাজস্থানে।  
এক শ্রাসী আসিয়াছে রামকেলি গ্রামে ॥  
নিরবধি করয়ে ভূতেব সংকীর্তন।  
না জানি তাঁহার স্থানে মিলে কতজন ॥  
রাজা বোলে কহ কহ সন্ন্যাসী কেমন।  
কি পায়, কি নাম, কৈছে দেহের গঠন ॥

“কোটোয়াল” উচ্ছ্বসিত ভাষায় সন্ন্যাসীর রূপ-গুণ ও আচরণ বর্ণনা করলেন। তাঁর কথা শুনে রাজা কেশব খানকে ডাকিয়ে জিজ্ঞাসা করলেন,

কহত কেশব খান কেমত তোমার।  
শ্রীকৃষ্ণচৈতন্য বলি নাম বোল যার ॥  
কেমত তাঁহার কথা কেমত মনুষ্য।  
কেমত গোসাঞি তিহে। কহিবা অবশ্য ॥  
চতুর্দিকে আইছে লোক তাঁহারে দেখিতে।  
কি নিমিত্তে আইসে কহিবা ভালমতে ॥  
শুনিল কেশব খান পরম সজ্জন।  
ভয় পাই লুকাইয়া কহেন কখন ॥  
কে বলে গোসাঞি, এক ভিক্তক সন্ন্যাসী।  
দেশান্তরী গরিব বৃদ্ধের তলবাসী ॥

তখন

রাজা বোলে, গরিব না বোলো কতু তানে  
মহাদোষ হয় ইহা শুনিলেও কানে ॥

হিন্দু যারে বোলে 'কৃষ্ণ' খোদায় যবনে ।  
 সেই তিহেঁ নিশ্চয় জানিহ সর্বজনে ॥  
 আপনার রাজ্যে সে আমার আজ্ঞা রহে ।  
 তাঁর আজ্ঞা সর্বদেশে শিরে করি বহে ॥  
 এই নিজ রাজ্যেই আমারে কত জনে ।  
 মন্দ করিবারে লাগি যাচে মনে মনে ॥  
 তাঁহারে সকল দেশে কায়-বাক্য-মনে ।  
 ঈশ্বর নহিলে বিনা অর্থে ভজে কেনে ॥  
 আজি আমি জীবিকা না দিলে ।

যুক্তি করিবেক সেবক সকলে ॥  
 আপনার সেবি লোক তাহানে খাইতে ।  
 চাহে তাহা কেহো নাহি পায় ভালমতে ॥  
 অতএব তিহো সত্য জানিহ ঈশ্বর ।  
 গরিব করিয়া তাঁরে না বোল উত্তর ॥  
 রাজা বোলে, এই মুঞি বলিলু সভারে ।  
 কেহো পাছে উপদ্রব করয়ে তাঁহারে ॥  
 যেখানে তাহান ইচ্ছা থাকুন সেখানে ।  
 আপনার শাস্ত্রমত করুন বিধানে ॥  
 সর্বলোক লই স্থখে করুন কীর্তন ।  
 কি বিরলে থাকুন যে লয় তাঁর মন ॥  
 কাজী বা কোটাল বা তাঁহাকে কোনো জনে ।  
 কিছু বলিলেই তার লইমু জীবনে ॥”

হোসেন শাহ এই কথা বলে ভিতরে চলে গেলেন । তাঁর কথা শুনে “তুটু  
 হইলেন যত সজ্জনের গণ” । কিন্তু তাঁরা নিশ্চিন্ত হতে পারলেন না । এক সঙ্গে  
 বসে মঙ্গলা করতে লাগলেন,

স্বভাবেই রাজা মহা কালযবন ।  
 মহাতমোগুণবৃদ্ধি জন্মে ঘনেঘন ॥  
 ওড়দেশে কোটি কোটি প্রতিমা প্রাসাদ ॥  
 ভাঙ্গিলেক কত কত করিলে প্রমাদ

দৈবে আসি সবুগুণ উপজিল মনে ।  
 তেঞি ভাল कहিলেন আমা সভা স্থানে ॥  
 আর কোন পাত্র আসি কুমন্ত্রণা দিলে ।  
 আরবার কুবুদ্ধি আসিয়া পাছে মিলে ॥  
 জানি কদাচিৎ কহে, কেমন গোসাঞি ।  
 আন গিয়া সভে চাহি দেখি এই ঠাঞি ॥  
 অতএব গোসাঞিরে পাঠাই कहিয়া ।  
 রাজার নিকট-গ্রামে কি কার্য রহিয়া ॥

এই যুক্তি করে তাঁরা একজন ব্রাহ্মণকে চৈতন্যদেবের কাছে পাঠালেন । সেই ব্রাহ্মণ সঙ্কীৰ্তনরত ভাববিভোর চৈতন্যদেবকে দেখে তাঁকে আর কিছু বলতে পারল না, তাঁর ভক্তদের কাছে সব কথা বলে চৈতন্যদেবকে অবসরমত জানাতে অন্তরোধ করে গেল । ভক্তেরাও সঙ্কোচবশত চৈতন্যদেবের কাছে কিছু বলতে পারলেন না । কিন্তু “অন্তর্ধামী শচীনন্দন” সমস্ত বুঝে নিলেন । তারপর

প্রভু বোলে তুমি সব ভয় পাও মনে ।  
 রাজা আমা দেখিবাবে নিবেক কারণে ॥  
 আমা চাহে হেন জন আমিও তা চাও ।  
 সবে আমা চাহে হেন কোথাও না পাও ॥  
 তোমরা ইহাতে কেন ভয় পাও মনে ।  
 রাজা আমা চাহে মুঞি যা ইমু আপনে  
 রাজা বা আমারে কেনে বলিব চাহিতে ।  
 কি শক্তি রাজার এ বা বোল উচ্চারিতে ॥  
 আমি যদি বোলাই সে রাজার মুখেতে ।  
 তবে সে বলিব রাজা আমারে চাহিতে ॥  
 আমা দেখিবারে শক্তি কোন্ বা তাহার ।  
 বেদে অশেষিয়া দেখা না পায় আমার ॥

অতঃপর কিছুদিন বাদে মহাপ্রভু নিজের ইচ্ছায় আর অগ্রসর না হয়ে ফিরে গেলেন ।

কবিকর্ণপুর বৃন্দাবনদাসের সমসাময়িক গ্রন্থকার । চৈতন্যদেবের জীবন-কাহিনী বর্ণনা করে তিনি সংস্কৃত ভাষায় দু’খানি বই লেখেন—‘ত্রিচৈতন্যচরিতামৃত্ত মহাকাব্য’ ( রচনাকাল ১৫৪২ খ্রিঃ ) ও ‘ত্রিচৈতন্যচন্দ্রোদয় নাটক’ ( রচনাকাল

১৫৭২-৭৩ খ্রি:)। এর মধ্যে প্রথমটিতে আলোচ্য প্রসঙ্গ সম্বন্ধে কোন কথা নেই। 'শ্রীচৈতন্যচন্দ্রোদয় নাটকে' চৈতন্যদেবের গোড় ভ্রমণের সহযাত্রী রাম রামানন্দ কর্তৃক প্রেরিত একজন লোক উৎকলরাজ প্রতাপরুদ্রের কাছে বলছে,

“শ্রুতং গোড়েশ্বরস্য রাজধাণ্ডাঃ পারে গঙ্গা চলতো ভগবতঃ পশ্চাত্ত্রয়োঃ পার্শ্বদ্বয়োশ্চলন্তীং লোকঘণ্টামালোক্য গোড়েশ্বরে। গঙ্গাতটঘটমানোপকারি-  
কামারুটো বিস্মিতঃ কিমধিকমিতি যদা পৃষ্টবান্ তদা কেশববসুনায়া তদমাতোন্  
কথিতং সুরত্রাণ শ্রীকৃষ্ণচৈতন্যো নাম কোহপি মহাপুরুষঃ পুরুষোত্তমায়ুধুবাং  
প্রয়াতি তদ্দৃশ্যয়া অমী লোকাঃ সঞ্চবন্তি ইতি তত শ্বেনাপূক্তম্ অয়মীশ্বরো  
ভবতি যন্ত্রবংবিধ লোকাক্ষণমিতি।”

[ আমি শুনেছি যে ভগবান যখন গোড়েশ্বরের রাজধানী থেকে গঙ্গাপারে যান, সেই সময় তাঁর পিছনের শু দু'শাশের চলন্ত লোকদের দেখে গঙ্গাতীরের চন্দ্রশালিকায় অধিরূঢ় গোড়েশ্বর বিস্মিত হয়ে কেশব বসু নামে তাঁর অমাত্যকে জিজ্ঞাসা করলেন, “ওহে এ কী। এত লোক কেন?” তখন অমাত্য বললেন, “স্বলতান! শ্রীকৃষ্ণচৈতন্য নামে একজন মহাপুরুষ পুরুষোত্তম থেকে মথুরায় যাচ্ছেন, কাজেই তাঁকে দেখতে এত লোক আসছে। তাই শুনে তিনি (গোড়েশ্বর) বললেন, “হি সাক্ষাৎ ঈশ্বর! নয়তো এত লোক আরুণ্ট হবে কেন?” ]

জয়ানন্দের চৈতন্যমঙ্গলে ( ১৫৪৮ থেকে ১৫৬০ খ্রীষ্টাব্দের মধ্যে রচিত ) আলোচ্য প্রসঙ্গ সম্বন্ধে এই লেখা আছে ( এশিয়াটিক সোসাইটির G-5398 নং পুঁথির পাঠ ),

গোড় নিকটে কৃষ্ণকেলি নামে গ্রাম ।  
তাহে ব্রাহ্মণ গোষ্ঠী ভুবনে অন্তঃপায় ॥  
সকীর্ত্তনে নাচে প্রভু কৃষ্ণকেলি গ্রামে ।  
সর্বলোক উন্নত হইল হরি নামে ॥  
চৈতন্য চান্দের রূপ দেখীয়া বিশাল ।  
রাজারে জানাএ গিয়া রাজার কোটাল  
এক সম্মাশী কৃষ্ণচৈতন্য তার নাম ।  
উন্নত করাইলেক নাটে কৃষ্ণকেলি গ্রাম ॥  
তাহার নাট দেখীয়া বনের পশু কান্দে ।  
রূপ দেখী কুলবধু বৃক্ নাঞি বান্দে ॥

গাছে মাথা নড়া গোসাঞার নাটে ।  
 আছুক মাহুঘের কাজ পাথর দেখীয়া ফাটে ॥  
 রাজা বলে কেশবখা ধরিয়া আন এখা ।  
 কেমন কৃষ্ণচৈতন্ত তারে পাথর নড়া মাথা ॥  
 তাহা শুনি নিবর্ত্ত হইল চৈতন্ত ঠাকুর ।  
 সর্ব পারিষদ সঙ্গে গেলা শান্তিপুর ॥

চুড়ামণিদাসের 'গৌরান্ধবিজয়ে' ( রচনাকাল সম্ভবত ষোড়শ শতাব্দীর শেষ ভাগ ) হোসেন শাহ যে শ্রীচৈতন্ত্যদেবকে স্বচক্ষে দেখেছেন, এরকম আভাস দেওয়া হয়েছে । চুড়ামণিদাসের মতে মহাপ্রভু যখন পিতার পিণ্ড দিতে গিয়া ষাচ্ছিলেন, তখন গোড় হয়ে যান এবং সে সময়ে হোসেন শাহ তাঁর অলৌকিক কীর্তি দর্শন করে মুগ্ধ হন । চুড়ামণি দাস লিখেছেন, গোড়ের বিস্তীর্ণ গঙ্গা দেখে

আবেশে অবশ প্রভু গঙ্গাস্নান করে ।  
 পূজিল গোবিন্দ গঙ্গা বহু উপচারে ॥  
 এক অযুত পদ্ম প্রভু কিনি আনে ।  
 গঙ্গানিবেদন করে এ মন্ত্রবিধানে ॥  
 গঙ্গার হুকুল মাঝে পদ্ম ভাসি যায় ।  
 দেখিয়া গোড়ের লোক চমৎকার পায় ॥  
 দেখিয়া হুকুল লোক আকুল আনন্দে ।  
 কোন ভাগ্যবান কৈল এসব প্রবন্ধে ॥  
 গঙ্গার হুকুল মাঝে ভাসে পদ্মরাশি ।  
 শিবশিরে রহে গিয়া পলাইয়া শশী ॥  
 কিবা লক্ষ্মী গোড়ে রহি করএ বিহার ।  
 গঙ্গা বা দিলেন তাঁরে পদ্ম উপহার ॥  
 সুলুতান হুসেন সাহা শুনিয়া এ রঙ্গ ।  
 আপনি দেখিতে আলা পাত্রমিত্র সঙ্গ ॥  
 সুলুতান কহে শুন অহে পাত্রমিত্র ।  
 এসব মানুষি নহে গোসাঞী চরিত্র ॥  
 এক এক পদ্ম হৈল লাখ লাখ দলে ।  
 দেখি পদ্মময় গঙ্গা না দেখিএ জলে ॥

যা যাবার সময় যে চৈতন্যদেব গৌড় হয়ে গিয়েছিলেন, এ কথা জয়ানন্দের 'চৈতন্যমঙ্গল'েও পাওয়া যায়। কিন্তু এক অযুত পদ্ম কিনে গঙ্গায় ভাসিয়ে গঙ্গাকে ঢেকে ফেলা এবং তাই দেখতে স্বয়ং হোসেন শাহের গঙ্গাতীরে আগার কাহিনী গল্পকথার মতই শোনায়। তা'ছাড়া এক এক পদের "লাখ লাখ দলে" পরিণত হওয়া সম্পূর্ণ অলৌকিক ব্যাপার। এটা বাদ দিলে চুড়ামণিদাসের বিবরণের যা থাকে, অন্ত কোন সূত্রে তার কোন সমর্থন পাওয়া যায় না বলে বর্তমান অবস্থায় তার যাথার্থ্য নির্ধারণ করার কোন উপায় নেই।

অতঃপর কৃষ্ণদাস কবিরাজ তাঁর 'চৈতন্যচরিতামৃত' এ সম্বন্ধে যা লিখেছেন, তা উদ্ধৃত করব। এই বই সপ্তদশ শতাব্দীর দ্বিতীয় দশকে রচিত হলেও আলোচ্য বিষয় সম্বন্ধে এর বিবরণ খুব মূল্যবান, কারণ চৈতন্যদেব ও হোসেন শাহ—এই দুজনেরই ঘাঁরা ঘনিষ্ঠ সান্নিধ্য লাভ করেছিলেন, এমন কয়েকজন ব্যক্তির সঙ্গে কৃষ্ণদাস কবিরাজের অন্তরঙ্গতা ছিল; কৃষ্ণদাস কবিরাজের বিবরণের প্রথম অংশের সঙ্গে পূর্ববর্তী লেখকদের বর্ণনার বিশেষ পার্থক্য নেই, কিন্তু তার শেষ অংশে দু'টি নতুন কথা পাঠ। সে দু'টি কথা এই যে, কেশব ছত্রীকে চৈতন্যদেব সম্বন্ধে জিজ্ঞাসা করার পরে হোসেন শাহ "দবীর খাসে"র সঙ্গে চৈতন্যদেব সম্বন্ধে আলোচনা করেছিলেন এবং রূপ-সনাতন নিজের মুখে চৈতন্যদেবকে রামকেলি গ্রাম ছেড়ে চলে যেতে অনুরোধ করেছিলেন। বলা বাহুল্য এই নতুন সংবাদ দুটি সম্পূর্ণ বিশ্বাসযোগ্য, কারণ কৃষ্ণদাস কবিরাজ দীর্ঘকাল বৃন্দাবনে রূপ ও সনাতন গোস্বামীর নিবিড় সঙ্গ লাভ করেছিলেন। সাহেব্, 'চৈতন্যচরিতামৃত'র মধ্যলীলা প্রথম পরিচ্ছেদে কৃষ্ণদাস কবিরাজ এ সম্বন্ধে যা লিখেছেন, তা নীচে উদ্ধৃত হল।

এছে চলি আইলা প্রভু রামকেলিগ্রাম।

গৌড়ের নিকটে গ্রাম অতি অল্পশাম ॥

তঁাহা নৃত্য করে প্রভু প্রেমে অচেতন।

কোটি কোটি লোক আইল দেখিতে চরণ ॥

গৌড়েশ্বর স্বরূপ রাজা প্রভাব শুনিয়া।

কহিতে লাগিলা কিছু বিস্মিত হইয়া ॥

বিনা দানে এত লোক যার পাছে হয়।

সেই ত গোসাঞি ইহা জানিহ নিশ্চয় ॥

কাজী যবন ! ইহার না করিহ হিংসন ।  
 আপন ইচ্ছায় বুলুন—যাহা উহার মন ॥  
 কেশব ছত্রীয়ে রাজ্য বার্তা পুছিল ।  
 প্রভুর মহিমা ছত্রী উড়াইয়া দিল ॥  
 ভিখারী সন্ন্যাসী করে তীর্থ পর্যটন ।  
 তাঁহা দেখিবারে আইসে দুইচারিজন ॥  
 যবনে তোমার ঠাই করয়ে লাগানি ।  
 তাঁর হিংসায় লাভ নাহি হয় আরো হানি ॥  
 রাজ্যারে প্রবোধি কেশব ব্রাহ্মণ পাঠাইয়া ।  
 চলিবার তরে প্রভুরে পাঠাইল কাহিয়া ॥  
 দবীর খাসেরে রাজা পুছিল নিভৃতে ।  
 গোসাঞির মহিমা তেহে লাগিলা কহিতে ॥  
 যে তোমাতে রাজ্য দিল তোমার গোসাঞা ।  
 তোমার দেশে তোমার ভাগ্যে জন্মিলা আসিয়া ॥  
 তোমার মঙ্গল বাঞ্ছে বাক্যসিদ্ধ হয় ॥  
 ইহার আশীর্বাদে তোমার সর্বত্রোতে জয় ॥  
 মোরে কেনে পুছ, তুমি পুছ আপন মন ।  
 তুমি নরাধিপ হও বিষ্ণু অংশসম ॥  
 তোমার চিন্তে চৈতন্তের কৈছে হয় জ্ঞান ?  
 তোমার চিন্তে যেই লয়, সেইত প্রমাণ ॥  
 রাজা কহে শুন মোর মনে যেই লয় ।  
 সাক্ষাৎ ঈশ্বর ইহে নাহিক সংশয় ॥

এরপর রূপ-সনাতন চৈতন্তদেবের সঙ্গে দেখা করে তাঁর চরণে পতিত হলেন ।  
 চৈতন্তদেব তাঁদের কৃপা করলেন । তাঁর কৃপা লাভ করে রূপ-সনাতন তখনকার  
 মত বিদ্যায় নিলেন । যাবার সময় রূপ-সনাতন মহাপ্রভুকে এই অনুরোধ  
 করেন,

ইহা হৈতে চল প্রভু ইহা নাহি কাজ ।  
 যতপি তোমাতে ভক্তি করে গোড়রাজ ॥  
 তথাপি যবন জাতি না করি প্রতীতি ।

মহাপ্রভু এই অনুরোধ রেখেছিলেন ।



আলোচ্য প্রসঙ্গ সম্বন্ধে বিভিন্ন চৈতন্যচরিতগ্রন্থে যে সমস্ত বিবরণ পাওয়া যায়, সেগুলি আমরা উদ্ধৃত করলাম। এ বিষয়ে কোনই সন্দেহ নেই যে, এই বিবরণগুলি একই সূত্রে থেকে সংগৃহীত নয়, কারণ তাদের মধ্যে যথেষ্ট পার্থক্য আছে। এদের মধ্যে বর্ণিত ঘটনা যে মূলত সত্য, তাতে সংশয়ের কোন অবকাশ নেই। বাস্তব ভিত্তি না থাকলে এতগুলি বইয়ে এই প্রসঙ্গ স্থান পেত না। কিন্তু বিভিন্ন বইয়ে যেসমস্ত পরস্পরবিরোধী খুঁটিনাটি বিবরণ পাওয়া যায়, তাদের মধ্যে কোনগুলি সত্য আর কোনগুলি অমূলক, তা বলা শক্ত। তিনটি বিষয়ে অধিকাংশ বিবরণের মধ্যে ঐক্য দেখা যায়। সেগুলি এই,

(১) চৈতন্যদেব যখন ভক্তদের সঙ্গে রামকেলি গ্রামে গিয়েছিলেন, তখন হোসেন শাহ প্রথম চৈতন্যদেবের কথা জানতে পারেন।

(২) হোসেন শাহ কেশব ছত্রীর কাছে চৈতন্যদেবের পরিচয় সম্বন্ধে জিজ্ঞাসাবাদ করেছিলেন।

(৩) হোসেন শাহ চৈতন্যদেবের কোন ক্ষতি করেন নি।

এই তিনটি বিষয় সত্য বলেই গ্রহণ করা যায়। এদের মধ্যে তৃতীয় বিষয়টি সন্দেহের অতীত, কারণ এ সম্বন্ধে সমস্ত বিবরণের মধ্যে ঐক্য আছে। কিন্তু অগ্রাগ্রা বিষয়গুলি সম্বন্ধে কোন সিদ্ধান্তে উপনীত হওয়া শক্ত। হোসেন শাহ যে চৈতন্যদেবকে চোখে দেখেছিলেন, এরকম আশ্রাম চূড়ামণিদাস ভিন্ন আর কেউ দেন নি। কবিবর্ণপুর লিখছেন যে হোসেন শাহ চৈতন্যদেবের পিছনের ও হুপাশের জনতা দর্শন করেছিলেন। বৃন্দাবনদাস লিখেছেন যে হোসেন শাহের সজ্জন হিন্দু কর্মচারীরা একসঙ্গে মিলে বলাবলি করেছিলেন যে দুই লোকের কুমন্ত্রণায় পড়ে হয় তো হোসেন শাহ চৈতন্যদেবকে তাঁর সামনে নিয়ে আসতে বলবেন। জয়ানন্দ বলেন যে হোসেন শাহ চৈতন্যদেবকে ধরে আনতেই বলেছিলেন; কিন্তু একথার সমর্থন অত্র কোন সূত্রে থেকে পাওয়া যায় না বলে এর উপর নির্ভর করা যায় না। ‘চৈতন্যভাগবত’ ও ‘চৈতন্যচরিতামৃত’ের মতে কেশব ছত্রী চৈতন্যদেবের নিরাপত্তার কথা ভেবে হোসেন শাহের কাছে চৈতন্যদেবের মহিমা লাঘব করে বলেছিলেন; একথা সম্পূর্ণ বিশ্বাসযোগ্য। বৃন্দাবনদাসের মতে হোসেন শাহের সজ্জন অমাত্যরা নিজেদের মধ্যে পরামর্শ করে চৈতন্যদেবের কাছে ব্রাহ্মণ পাঠিয়ে তাঁকে রামকেলি গ্রাম থেকে দূরে চলে যেতে বলেছিলেন, কিন্তু চৈতন্যদেব রাজার ভয়ে ভীত হন নি, তিনি সেখানে কিছুদিন থেকে তারপর স্বেচ্ছায় সেখান থেকে গিয়েছিলেন। বৃন্দাবনদাস

কবিরাজের মতে প্রথমে কেশব চত্বারী ব্রাহ্মণ পাঠিয়ে এবং পরে রূপ-সনাতন নিজেরা চৈতন্যদেবের কাছে গিয়ে তাঁকে স্থান ত্যাগ করতে অহুরোধ জানিয়েছিলেন, চৈতন্যদেব রাজভয়ে ভীত না হলেও তাঁদের অহুরোধ রক্ষা করেছিলেন। জয়ানন্দের মতে চৈতন্যদেব হোসেন শাহের কথা শুনেই আর অগ্রসর না হয়ে ফিরে আসেন। কৃষ্ণদাস কবিরাজের সঙ্গে রূপ-সনাতনের ঘনিষ্ঠ সম্পর্ক ছিল বলে তাঁর কথাই এক্ষেত্রে সত্য বলে মনে হয়। হোসেন শাহ কবিকর্ণপুর ও বন্দাবনদাসের মতে কেশব চত্বারী কাছে এবং কৃষ্ণদাস কবিরাজের মতে দবীর খাসের কাছে স্বীকার করেছিলেন যে চৈতন্যদেব স্বয়ং ভগবান ভিন্ন আর কেউ নন। নিষ্ঠাবান মুসলমান হোসেন শাহ চৈতন্যদেবের ঈশ্বরত্বে বিশ্বাস করেছিলেন বলে মনে হয় না, তবে চৈতন্যদেব যে সাধারণ লোক নন, এ কথা বুঝতে পারাই তাঁর মত বিচক্ষণ রাজার পক্ষে স্বাভাবিক। তিনি যে চৈতন্যদেবের অসাধারণত্বের স্বীকৃতি দিয়েছিলেন, তাকেই ভক্ত চৈতন্যচরিতকাররা চৈতন্যদেবের ভগবন্তার স্বীকৃতিরূপে উপস্থাপিত করেছেন।

হোসেন শাহ চৈতন্যদেবের কোন কৃতি করেন নি বা তাঁর চলার পথে বাধা সৃষ্টি করেন নি। বন্দাবনদাসের মতে তিনি বলেছিলেন, চৈতন্যদেবকে কেউ কিছু বললে তিনি তাকে বধ করবেন। এর মধ্যে একটু অতিরঞ্জন থাকলেও মোটামুটিভাবে একথা বিশ্বাসযোগ্য। কারণ হোসেন শাহ ধর্মোন্মাদ ছিলেন না। চৈতন্যদেব থেকে যখন তাঁর কোন অনিষ্ট হচ্ছে না, তখন তাঁর কৃতি করে অযথা হিন্দু প্রজাদের অসন্তোষ সৃষ্টি করা তাঁর মত দূরদর্শী রাজার দ্বারা সম্ভব নয়। বরং সহজে হিন্দু প্রজাদের মন পাবার উপায় হিসাবে চৈতন্যদেবের নিরাপত্তাবিধান করাই তাঁর পক্ষে স্বাভাবিক। যাহোক, চৈতন্যদেবকে হোসেন শাহ ভগবান বলে স্বীকার করুন বা না করুন, চৈতন্যদেব যে হোসেন শাহের মনে খুব গভীরভাবে রেখাপাত করেছিলেন, তাতে কোন সন্দেহ নেই।

সমস্ত চরিতগ্রন্থগুলির মধ্যে মাত্র দুই তিন জায়গায় চৈতন্যদেবকে হোসেন শাহের প্রসঙ্গ উত্থাপন করতে দেখা যায়। ‘চৈতন্যচরিতামৃত’র মধ্যলীলা ১৫শ পরিচ্ছেদে দেখি চৈতন্যদেব অত্র ভক্তদের কাছে মুকুন্দের পরিচয় দেবার সময় বলেছেন, তিনি “শ্রেষ্ঠ রাজা”র চিকিৎসা করেন; শেষে অবশু “শ্রেষ্ঠ রাজা”কে তিনি “মহাবিদগ্ধ রাজা” বলেছেন। জয়ানন্দের চৈতন্য-মঙ্গলে দেখি, প্রতাপরুদ্রকে গোড় আক্রমণ থেকে বিরত করবার সময় চৈতন্যদেব বলেছেন, “কালঘবন রাজা পঞ্চগৌড়েশ্বর”; তিনি তাঁর প্রচণ্ড শক্তির

কথাও সেই প্রসঙ্গে বলেছেন। চৈতন্যদেব যদি সত্যি এইসব উক্তি করে থাকেন, তাহলে বুঝতে হবে তিনি হোসেন শাহকে খুব শ্রদ্ধা না করলেও তাঁর শক্তি এবং বিদ্যাবুদ্ধির উৎকর্ষ সম্বন্ধে সম্পূর্ণ সচেতন ছিলেন।

হোসেন শাহের বিশিষ্ট অমাত্য রূপ-সনাতন পরবর্তী জীবনে চৈতন্যদেবের পার্শ্বদ হয়েছিলেন। স্মৃতরাং তাঁদের দুজনকে এক মহাপুরুষ ও এক মহানৃপতির মধ্যের যোগসূত্র বলা যায়।

### হোসেন শাহ কি সত্যপীর-পূজার প্রবর্তক ?

অনেকের মনে ধারণা আছে যে আলাউদ্দীন হোসেন শাহ প্রথম সত্যপীরের সিনি প্রবর্তন করেন। নগেন্দ্রনাথ বসু তাঁর 'বিশ্বকোষে' সর্বপ্রথম এই মত প্রচার করেন। দীনেশচন্দ্র সেনও এই কথা লিখেছেন তাঁর History of Bengali Language and Literature বইয়ে। এঁদের উক্তিকে অনেকে যাচাই না করে সত্য বলে গ্রহণ করেছেন। বাংলা দেশে অনেকের মনেই এই ধারণা বদ্ধমূল হয়ে রয়েছে যে হোসেন শাহ সত্যপীর-পূজার প্রবর্তক। সেইজন্য তাঁর বিচার করা দরকার।

প্রথমে বলে রাখা দরকার, হোসেন শাহ যে সত্যপীর-পূজার প্রবর্তন করেছিলেন, এ কথা কোন প্রামাণিক সূত্রে পাওয়া যায় না। সপ্তদশ শতাব্দীর দ্বিতীয়ার্ধের আগে সত্যপীরের কোন উল্লেখ নিঃসন্দ্বিগ্ধভাবে কোথাও পাওয়া যায় না।\* স্মৃতরাং ১৬৫০ খ্রীষ্টাব্দের পরে এদেশে সত্যপীর-পূজার প্রবর্তন হয়েছিল বলে মনে হয়।

প্রশ্ন হচ্ছে, তাহলে হোসেন শাহ কর্তৃক সত্যপীর-পূজার প্রবর্তন করার ধারণা লোকের মনে এল কেন? এল, তাঁর কারণ অষ্টাদশ ও ঊনবিংশ শতাব্দীতে এদেশে সত্যপীর সম্বন্ধে নানা প্রকর অলৌকিক-রসাপ্রিত কাহিনী প্রচলিত হয়েছিল। তাঁর মধ্যে একটি কাহিনীতে আছে সত্যপীর "আলা বাদশাহ" নামে জৈনক নৃপতির কুমারী কন্যার গর্ভে জন্মগ্রহণ করেন এবং "আলা বাদশাহ" সত্যপীরের পূজা করেন। আর একটি কাহিনীতে আছে "হোছেন শাহ" নামে জৈনক রাজা সত্যপীরের রূপা লাভ করেন। নগেন্দ্রনাথ বসু তাঁর 'বিশ্বকোষে' (অষ্টাদশ ভাগ, ১৩১৪ বঙ্গাব্দ, পৃঃ ১৬০) সর্বপ্রথম এই কাহিনীগুলি

\* কোন কোন গবেষক মনে করেন, কবি কঙ্ক ও শেখ ফরজুল্লাহ ষোড়শ শতাব্দীতে যথাক্রমে সত্যপীর ও সত্যপীরের পাঁচালী রচনা করেছিলেন। কিন্তু আমরা এই মত সমর্থন করি না।

নিয়ে আলোচনা করেন। তিনি লেখেন, “.....সত্যনারায়ণের কথায় যে ‘আলা’ বাদশাহের উল্লেখ আছে, তাঁহাকে আমরা আলাউদ্দীন হোসেন শাহ বলিয়া মনে করি। হোসেন শাহ হিন্দু মুসলমানকে সমভাবে দেখিতেন; তাঁহার উদারতা ও জায়পরতা ইতিহাসে চিরপ্রসিদ্ধ। সম্ভবতঃ হিন্দুমুসলমানের মধ্যে একতা স্থাপনের উদ্দেশ্যে তাঁহারই যত্নে সত্যনারায়ণের পূজা প্রবর্তিত হয়।” দীনেশচন্দ্র সেন রামানন্দ এবং নায়ক ময়াজ গাজীর লেখা দুটি সত্যপীরের পাঁচালীর তুলনা করে সিদ্ধান্ত করেন যে হোসেন শাহ-ই সত্যপীর-পূজার প্রবর্তক (History of Bengali Language and Literature, 1911, p. 797)।

এ সম্বন্ধে আমি কয়েক বছর আগে লিখেছিলাম, “শঙ্কর-আচার্য এবং কবি কর্ণ রচিত ‘সত্যপীরের পাঁচালী’তে জর্নৈক ‘আলা বাদশাহ’ কর্তৃক সত্যপীরের পূজার একটি অলৌকিক-রসাম্বিত কাহিনী পাওয়া যায় এবং আরিফ রচিত ‘লালমোনের কেছায়’ এই কটি চরণ মেলে,

সত্যপীর ছিল ছলে লালমোন সুল্লরী।  
হোছেন শাহা বাদশা নিয়া হয় দেশান্তরী ॥

পূরিল মনের সাধ পোহাইল রজনী।  
সও লক্ষ টাকা দিল সত্যপীরের সিনি ॥

একথা মনে করা যেতে পারে, শঙ্কর-আচার্য ও কবি কর্ণের পাঁচালীতে উল্লিখিত ‘আলা বাদশাহ’ এবং লালমোনের কেছায় উল্লিখিত ‘হোছেন শাহা বাদশা’ অভিন্ন লোক, এবং ইনি আসলে বাংলার সুলতান আলাউদ্দীন হোসেন শাহ ( ১৪২৩-১৫১২ খৃঃ )। হয়ত হোসেন শাহ কোন সময় সত্যপীরের সিনি দিয়েছিলেন, সেই কাহিনীই পরবর্তী সাহিত্যে পল্লবিত ও নানা অলৌকিক কাহিনীর সঙ্গে জড়িত আকারে স্থান পেয়েছে।” ( বাংলার নাথসাহিত্য, বিশ্বভারতী প্রকাশিত সাহিত্য-প্রকাশিকা, প্রথম খণ্ড, পৃঃ ২৩০ )

কিন্তু এখন আর এই মত সমর্থন করতে পারছি না। কারণ প্রথমত, “আলা বাদশাহ” ও “হোছেন শাহা” সংক্রান্ত কাহিনীগুলি একেবারে ভিন্ন ভিন্ন ধরনের। এগুলি থেকে দুজনকে এক লোক বলে মনে হয় না। দ্বিতীয়ত, এই সব কাহিনীতে “আলা বাদশাহ” ও “হোছেন শাহা” কাউকেই বাংলার

রাজা বলা হয় নি। বাংলার বিখ্যাত রাজা আলাউদ্দীন হোসেন শাহের সঙ্গে তাঁদের অভিন্ন ভাবার অন্তরালে এক নামসাদৃশ্য ছাড়া আর কোন যুক্তিই নেই। তৃতীয়ত, “আলা বাদশাহ” ও হোছেন শাহা”র কাহিনীগুলি এতই অলৌকিক-রসাক্রান্ত যে তাদের কোন সামান্যতম বাস্তব ভিত্তি আছে বলেও মনে হয় না।

স্বতরাং, আলাউদ্দীন হোসেন শাহ সত্যপীর-পূজার প্রবর্তন করেছিলেন, এরকম ধারণার কোন হেতু নেই।

রজনীকান্ত চক্রবর্তী তাঁর ‘গৌড়ের ইতিহাস’-এ লিখেছেন যে রাজা গণেশ বাংলা দেশে সত্যপীরের মিনি দেবার প্রথা প্রবর্তন করেন। বলা বাহুল্য, এই উক্তির পিছনেও কোন প্রমাণ নেই।

### হোসেন শাহের মন্ত্রী, কর্মচারী ও অমাত্যবর্গ

বিভিন্ন সূত্র থেকে হোসেন শাহের বহু মন্ত্রী, কর্মচারী ও অমাত্যের নাম পাওয়া যায়। নীচে আমরা তার একটি যথাসম্ভব পূর্ণাঙ্গ তালিকা প্রণয়নের চেষ্টা করলাম।

হোসেন শাহের বিভিন্ন শিলালিপি থেকে তাঁর এই সব মুসলমান কর্মচারীর নাম পাওয়া যায়।

#### (১) খলিশ খান

ইনি ১১১ হিঃ বা ১৫০৫-০৬ খ্রীষ্টাব্দে মুঘাজ্জমাবাদ বা সোনারগাঁও অঞ্চলের উজীর ও সর-এ-লস্কর ছিলেন। একটি শিলালিপিতে এঁর নাম পাওয়া যায়।

#### (২) হিঙ্গু খান

ইনি ১১১-১২ হিঃ বা ১৫০৫-০৭ খ্রীষ্টাব্দে হোসেনাবাদ, অরুণা সজ্জা মন্দির এবং লাওবলা এলাকার সর-এ-লস্কর এবং প্রথম দুই স্থানের উজীর ছিলেন। দুটি শিলালিপিতে এঁর নাম পাওয়া যায়।

#### (৩) রুকনুদ্দীন রুক্ন খান

ইনিও হোসেনাবাদ, অরুণা সজ্জা মন্দির ও লাওবলা এলাকার সর-এ-লস্কর এবং প্রথম দুই স্থানের উজীর ছিলেন। সম্ভবত ইনি হিঙ্গু খানের পরে এঁ পদে নিযুক্ত হন। একটি শিলালিপিতে এঁর নাম এইভাবে উল্লিখিত হয়েছে—“রুকনুদ্দীন রুক্ন খান ইব্নু আলাউদ্দীন সরহাটী।”

### (৪) আলাউদ্দীন রুক্ন খান

ইনি পূর্বোক্ত রুক্নুদ্দীন রুক্ন খানের পিতা। ইনি ১১৮ হিঃ বা ১৫১২ খ্রীষ্টাব্দে মুজাফফরাবাদ শহরের উজীর, ফিরোজাবাদ শহরের সর-এ-লস্কর, কোতবাল-বাক (প্রধান কোর্টাল) এবং মুনসিফ-দিওয়ান-কোতবালী (ফৌজদারী আদালতের বিচারক) ছিলেন। একটি শিলালিপিতে তাঁর নাম এইভাবে উল্লিখিত হয়েছে—“খান মুয়াজ্জম রুক্ন খান আলাউদ্দীন সরহাটা।” ব্রহ্মায়ানের মতে “আলাউদ্দীন”র আগে “ইব্ন” শব্দটি বাদ পড়ে গিয়েছে এবং এই শিলালিপিতে প্রকৃতপক্ষে পুত্র রুক্নুদ্দীনের নামই উল্লিখিত হয়েছে। আর একটি শিলালিপিতে শুধুমাত্র “রুক্ন খান” নাম আছে—তাতে “আলাউদ্দীন” বা “রুক্নুদ্দীন”-এর উল্লেখ নেই। এই রুক্ন খান আটটি কামহার (?) জয় করেছিলেন, বিভিন্ন শহরের উজীর ও লস্কর ছিলেন এবং কামরূপ, কামতা, জাজনগর ও উড়িষ্যা বিজয়ে উল্লেখযোগ্য অংশ গ্রহণ করেছিলেন বলে শিলালিপিটি থেকে জানা যায়। ৮মুখীন্দনাথ ভট্টাচার্যের মতে এই রুক্ন খান অসমীয়া বুরঞ্জীতে বর্ণিত “বড় উজীর”-এর সঙ্গে অভিন্ন (Mughal North-East Frontier Policy, pp. 86-87, f. n. দ্রষ্টব্য)।

### (৫) খওয়াস খান

ইনি ১১৯ হিজরা বা ১৫১৩ খ্রীষ্টাব্দে মুয়াজ্জমাবাদের উজীর এবং ত্রিপুরার সর-এ-লস্কর ছিলেন। একটি শিলালিপিতে তাঁর নাম পাওয়া যায়।

### (৬) মজলিস মাহমুদ

ইনি কোন এক জায়গার (সম্ভবত ভাগলপুর অঞ্চলের) সর-এ-লস্কর ছিলেন। ভাগলপুরের এক শিলালিপিতে তাঁর নাম পাওয়া যায়। তাঁর পিতার নাম যুসুফ।

### (৭) রামনুদল (?)

ইনি ১০৪ হিজরার ১৩ই জমাদী-অল-আউয়ল তারিখে একটি মসজিদ তৈরী করিয়েছিলেন। এর পিতার নাম কিনাপতি (?)।

এঁরা ছাড়াও আলাউদ্দীন হোসেন শাহের বিভিন্ন শিলালিপিতে তাঁর আরও অনেক কর্মচারীর নাম পাওয়া যায়। এঁরা মসজিদ, দরগা প্রভৃতি নির্মাণ করিয়েছিলেন। কিন্তু এঁদের বিস্তৃত পরিচয় জানা যায় না। নীচে এঁদের নাম উল্লেখ করা হল।

- (৮) মজলিস রাহৎ
- (৯) শের খান
- (১০) আতা মালিক
- (১১) রিকায়ৎ খান
- (১২) মজলিস অল-মজলিস (উপাধি)
- (১৩) মুকাবর খান
- (১৪) মজলিস আখিয়ার
- (১৫) ওয়ালী মুহম্মদ
- (১৬) জাফর খান
- (১৭) নাজির খান

এঁরা ছাড়া সমসাময়িক সাহিত্য থেকে হোসেন শাহের এই ক'জন মুসলমান কর্মচারীর নাম পাওয়া যায়।

### (১) পরাগল খান

ইনি কবীন্দ্র পরমেশ্বরের পৃষ্ঠপোষক হিসাবেই বিশেষভাবে পরিচিত। কবীন্দ্র পরমেশ্বর তাঁর মহাভারতে লিখেছেন, পরাগল খান হোসেন শাহ কর্তৃক চট্টগ্রাম অঞ্চলের লস্কর অর্থাৎ সামরিক শাসনকর্তা\* নিযুক্ত হয়েছিলেন। চট্টগ্রাম জেলার 'পরাগলপুর' নামে একটি গ্রাম এখনও এঁর স্মৃতি বহন করছে।

### (২) নসরৎ খান বা ছুটি খান

পরাগল খানের পুত্র নসরৎ খান ছুটি খান নামেই সাধারণের কাছে পরিচিত ছিলেন। এঁর প্রকৃত নাম যে নসরৎ খান, তা শ্রীকর নন্দীর উক্তি থেকে জানা যায়—“ছুটি খান নাম নসরৎ মহামতি”। এঁরই আজ্ঞায় শ্রীকর নন্দী জৈমিনি-ভারতের অশ্বমেধ পর্ব অবলম্বনে বাংলা মহাভারত লিখেছিলেন। শ্রীকর নন্দী লিখেছেন যে ছুটি খান ত্রিপুরার রাজাকে যুদ্ধে পরাজিত করে

---

\* “লস্কর” ফার্সী শব্দ, এর অর্থ ‘সৈন্য’; কিন্তু বাংলা ভাষায় যে শব্দটি ‘সামরিক শাসনকর্তা’ অর্থে ব্যবহৃত হত তার প্রমাণ প্রাচীন বাংলা সাহিত্যের বহু জায়গা থেকে পাওয়া যায়। ‘চৈতন্য-ভাগবত’ থেকে জানা যায় যে, “লস্কর” রামচন্দ্র খান বাংলার “দক্ষিণ রাজ্যে”র অধিকারী ছিলেন এবং সেখানকার “সব ভার” তাঁর উপরে স্তম্ভ ছিল; ‘রাজমালা’ থেকে জানা যায় যে, ত্রিপুরারাজ ষষ্ঠমাণিক্য ষণ্ডল জয় করবার পরে “তবে রাজা সৈন্য দ্বিরা বৈসাইল খানা। লস্কর করিল রাজ্য নিজ একজমা”।

অরণ্যে আশ্রয় গ্রহণ করতে বাধ্য করেন এবং ত্রিপুরার লঙ্কর পদে নিযুক্ত হন। সম্ভবত ইনি এই পদে পূর্বোক্ত খওয়্যাস খানের স্থলাভিষিক্ত হন।

### (৩) হামিদ খান

দৌলত-উজীর বাহরাম খানের লেখা 'লায়লী-মজহু'তে এর নাম পাওয়া যায়। লায়লী-মজহু ঔরঙ্গজেবের রাজত্বকালে (১৬৫৮-১৭০৭ খ্রিঃ) রচিত হয়। এতে দৌলত-উজীর লিখেছেন যে, তাঁর পূর্বপুরুষ হামিদ খান হোসেন শাহের প্রধান উজীর ছিলেন। তিনি বহুগুণে বিভূষিত এবং অদ্বিতীয় দাতা ছিলেন,

পূর্বকালে নরপতি                      ভুবন বিখ্যাত অতি

আছিল হোসেন শাহাবর।

তান রত্ন সিংহাসন                      অতি মহা বিলক্ষণ

গৌড়তে শোভিত মনোহর ॥

প্রধান উজির তান                      সুনাম হামিদ খান

তাহার গুণের অস্ত নাই।

অন্নশালা স্থানে স্থান                      মসজিদ স্থানিস্থাপ

পুষ্করী দিলেক ঠাই ঠাই ॥

অনুদিন মহামতি                      পিপীলিকা মক্ষী প্রতি

সর্করা দিলেন্ত খাইবার।

কাক পিক পক্ষী আদি                      শিবা সেজা চতুষ্পদী

যোগাইলা সভান আহার ॥

বাতুল আতুর জখ                      পালিলেন্ত অবিরত

দান ধর্ম করিলা বিশেষ ॥

নটক গাইন জ্ঞান                      সত্য জখ কৃতি তান

প্রকাশ হইল সর্বদেশ ॥

গুনিয়া দানের ধ্বনি                      ক্রোধ হইল নৃপমণি

জখ ধন লুটাই সদাএ।

কেমত ধার্মিক সার                      একে একে সপ্তবার

তাহাকে বুঝিল পরীক্ষাএ ॥

হোসেন শাহ নাকি সাতবার সাতরকম উপায়ে হামিদ খানকে পরীক্ষা করে তাঁর অলৌকিক শক্তির পরিচয় পেয়েছিলেন। অস্ততঃ হামিদ খানের বংশধর



বাহ্রাম খান সেই কথা লিখেছেন। তিনি আরও লিখেছেন যে হামিদ খানের শক্তির পরীক্ষা সমাপ্ত হবার পর হোসেন শাহ তাঁকে

করিলেন্ত প্রশংসা অধিক।

দেখিয়া ধর্মের সাজ                      ভালবাসে মহারাজ

প্রসাদ করিলা দুই সিক ॥

নগর ফতেয়াবাদ                      দেখিয়া পুরএ সাধ

চাটিগ্রাম স্নানাম প্রকাশ।

মনোভব মনোরম                      অমরাবতীর সম

সাধু সং অনেক নিবাস ॥

লবণাশু সন্নিহিত                      কর্ণফুলি নদীতট

ভুভপুরী অতি দিব্যমান।

চৌদিকে পর্বত গড়                      অধিক উঞ্চলতব

তাত শাহা বদর আলাম ॥

আদেশিলা গোড়েখরে                      উজির হামিদ খারে

অধিকারী হৈতে চাটিগ্রাম।

আত্মরূপে দানধর্ম                      করিলা পুণ্যের কর্ম

আনন্দে রহিলা সেই ঠাম ॥

বাহ্রাম খানের এই বর্ণনা কতদূর সত্য আর কতখানি অতিরঞ্জিত, তা নির্ণয় করার বর্তমানে কোন উপায় নেই।

(অধ্যাপক আহমদ শরীফ সম্পাদিত ও ঢাকার বাঙলা-একাডেমী কর্তৃক প্রকাশিত দৌলত-উজীর বাহ্রাম খানের ‘লায়লী-মজনু’ থেকে উপরের উদ্ধৃতগুলি গৃহীত হয়েছে। ইতিপূর্বে বঙ্গীয় প্রাচীন পুঁথির বিবরণ, ১ম খণ্ড ২য় সংখ্যার ১৪-১৭ পৃষ্ঠায় আবদুল করিম সাহিত্যবিশারদ এই বইয়ের একটি পুঁথির বিবরণ দিয়েছিলেন এবং উপরে প্রদত্ত অংশ উদ্ধৃত করেছিলেন। তার মধ্যে এক জায়গায় ‘স্নানাম হামিদ খান’-এর জায়গায় ‘মহম্মদ খান নাম’ এই ভ্রান্ত পাঠ পাওয়া যায়, কিন্তু অন্যান্য জায়গায় কবির পূর্বপুরুষের নাম ‘হামিদ খান’ রূপেই উল্লিখিত হয়েছে।)

#### (৫) হৈতন খাঁ

‘রাজমালা’তে এর নাম পাওয়া যায়। হোসেন শাহের ইনি অন্ততম সেনাপতি ছিলেন। ‘রাজমালা’র মতে হোসেন শাহের আর একজন সেনাপতি

গোরাই মল্লিক ত্রিপুরা জয় করতে গিয়ে ব্যর্থতা বরণ করার পরে হৈতন খাঁর উপর ত্রিপুরা অভিযানের নেতৃত্ব অর্পণ করা হয় ; কিন্তু তিনিও সাফল্য লাভ করতে পারেন নি । এ সম্বন্ধে আগেই আলোচনা করা হয়েছে । ‘হৈতন খাঁ’ নামটি বড়ই অদ্ভুত । এর অর্থও করা যায় না । তবে হোসেন শাহের কর্ম-চারীদের মধ্যে এই জাতীয় অর্থহীন (?) নামের আরও নিদর্শন পাওয়া যায় । ‘পরাগল খান’ নামই এর দৃষ্টান্ত ।

### (৪) মজিলীশ বারবক

১৪২৪ খ্রীষ্টাব্দে রচিত মহাদেব আচার্যসিংহের ‘মালতীমাধব-টীকা’য় এঁর নাম পাওয়া যায় । আচার্যসিংহ এঁকে “গোড়মহীমহেন্দ্রসচিবশ্রেণীশিরোভূষণ” বলেছেন । ইনি সম্ভবত ঐ সময়ে নবদ্বীপ অঞ্চলের শাসনকর্তা ছিলেন ।

### (৫) অজ্ঞাতনামা সীমাধিকারী

কবিকর্ণপুর তাঁর ‘চৈতন্যচন্দ্রোদয়’ নাটকে এবং কৃষ্ণদাস কবিরাজ তাঁর ‘চৈতন্যচরিতামৃত’ে এই ব্যক্তির উল্লেখ করেছেন । এঁরা লিখেছেন যে চৈতন্যদেব নীলাচল থেকে গোড়ে আগমনের সময় জলপথে আসছিলেন । কিন্তু উৎকল ও গোড় রাজ্যের সীমানায় এসে তাঁরা সঙ্কটে পড়লেন, কারণ সে সময়ে দুই রাজ্যের মধ্যে শত্রুতা বর্তমান ছিল, তাই যারা উড়িষ্যা থেকে সীমান্ত পার হয়ে বাংলায় যেত, তাদের দুরবস্থার একশেষ হত ; বাংলার সীমাধিকারী (officer-in-charge of the frontier) ছিল জর্নৈক মুসলমান, সে ঘোরতর মাতাল ও দুর্বৃত্ত প্রকৃতির ছিল এবং যারা সীমানা পার হয়ে আসত, তাদের চরম দুর্গতি করত । কবিকর্ণপুর লিখেছেন,

“তৎসীমাধিকারী তুরুকোহরুক্ষোষকার ইব সর্বেষাং মর্ম্মহা মহামত্বেণ  
দুর্বৃত্তচক্রচূড়ামণিঃ ইতো দেশাদ্ যেষ গচ্ছন্তি তেষাং দুর্গতিঃ ক্রিয়তে ।”

[ সেই সীমানার অধিকারী মহামত্বে, দুর্বৃত্তমণ্ডলীর চূড়ামণি এবং হৃদয়জাত ভ্রণের মত সকলের মর্ম্মপীড়ক এক “তুরুক” আছে, সে এই দেশ ( অর্থাৎ উড়িষ্যা থেকে ) যারা গমন করে, তাদের দুর্গতি করে থাকে । ]

কবিকর্ণপুর ও কৃষ্ণদাস কবিরাজের মতে এই মুসলমান সীমাধিকারী আকস্মিকভাবে চৈতন্যদেবের ভক্ত হয়ে পড়ে এবং তাঁকে নিরাপদে সীমান্ত পার করিয়ে দিয়ে অনেকদূর অবধি তাঁর সঙ্গে যায় ।

## (৫) ছিলে খোজা

‘রাজমালা’র এর নাম পাওয়া যায়। গৌরাই মল্লিকের নেতৃত্বে হোসেন শাহের যে সৈন্তবাহিনী ত্রিপুরা আক্রমণ করে, এই ব্যক্তি সেই বাহিনীর অগ্রতম সৈন্ত ছিল।

## (৬) নবদ্বীপের কাজী

ইনি চৈতন্যদেবের নবদ্বীপলীলার সময়ে কীর্তনের উপর নিষেধাজ্ঞা জারী করেছিলেন। চৈতন্যদেব সদলবলে কীর্তনে বেরিয়ে সে নিষেধাজ্ঞা অমান্য করেছিলেন। বৃন্দাবনদাসের চৈতন্যভাগবতে লেখা আছে যে চৈতন্যদেবের ভক্তের দল কাজীর ঘর ভেঙে ফেলে ফুলের বাগানের গাছ উপড়ে তছনছ করে দিয়েছিলেন; চৈতন্যদেব স্বয়ং কাজীকে ধরে আনতে বলেন ও তাঁর ঘরে আগুন দিতে বলেন, ভক্তেরাই তাঁকে বুঝিয়ে স্তব্ধ হয়ে ঠাণ্ডা করে। কৃষ্ণদাস কবিরাজ তাঁর চৈতন্যচরিতামৃতে লিখেছেন যে এরপর চৈতন্যদেব “ভব্যালোক পাঠাইয়া কাজীরে বোলাইলা।” কাজী এসে চৈতন্যদেবকে বলল,

গ্রাম-সম্বন্ধে চক্রবর্তী হয় মোর চাচা।

দেহ-সম্বন্ধে হইতে হয় গ্রাম-সম্বন্ধ সাঁচা ॥

নীলাধর চক্রবর্তী হয় তোমার নানা।

সে সম্বন্ধে হও তুমি আমার ভাগিনা ॥

অতঃপর চৈতন্যদেবের সঙ্গে কাজীর গোবধ নিয়ে বিচার হয় এবং বিচারে পরাস্ত হয়ে কাজী চৈতন্যদেবের পা ছুঁয়ে তাঁর কাছে প্রার্থনা করেন, “এই কৃপা কর যে তোমাতে রয়ে ভক্তি।” এই কাজীর বাড়ী ছিল সিমুলিয়া গ্রামে।

কোন প্রামাণিক চরিত্রগ্রন্থে এই কাজীর নাম উল্লিখিত হয়নি। একটি অর্বাচীন কিংবদন্তীর মতে এঁর নাম ছিল ‘চাঁদ কাজী’ এবং ইনি হোসেন শাহের দৌহিত্র ছিলেন। আর একটি অর্বাচীন কিংবদন্তীর মতে এঁর নাম ছিল মোলানা সিরাজুদ্দীন এবং ইনি হোসেন শাহের শিক্ষক ছিলেন।

## (৭) গদাধর দাসের গ্রামের কাজী

‘চৈতন্যভাগবত’ অষ্টাধ্যায়ের পঞ্চম অধ্যায়ে এঁর উল্লেখ আছে। বৃন্দাবনদাস লিখেছেন,

সেই গ্রামে কাজী আছে পরম দুর্ব্বার।

কীর্তনের প্রতি দ্বেষ করয়ে অপার ॥

পরানন্দে মত্ত গদাধর মহাশয় ।

নিশাভাগে গেলা সেই কাজীর আলয় ॥

যে কাজীর ভয়ে লোক পালাত, নির্ভয়ে তার বাড়ীতে গিয়ে

গদাধর বোলে, আরে কাজী বেটা কোথা ।

ঝাট কৃষ্ণ বোল নহে ছিণ্ডেঁ। এই মাথা ॥

অগ্নি হেন ক্রোধে কাজী হইল বাহির ।

গদাধরদাস দেখি মাত্র হৈল স্থির ॥

কাজী বোলে গদাধর তুমি কেনে এথা ।

গদাধর তখন বললেন, “ক্রীচতন্ত্র ও নিত্যানন্দ প্রভৃ অবতীর্ণ হয়ে সকলকে ‘হরি’ বলিয়েছেন, কেবল তুমি ‘হরি’ নাম করনি । তাই

তাহা বোলাইতে আইলাঙ্ তোমা স্থান ॥

পরম-মঙ্গল হরি-নাম বোল তুমি ।

তোমার সকল পাপ উদ্ধারিব আমি ॥

যতপিহ কাজী মহা হিংসক চরিত ।

তথাপিহ না বোলে কিছু হইল শ্রুতিত ॥

হাসি বোলে কাজী শুন দাস গদাধর ।

কালিকা বলিবাঙ্ হরি আজি যাহ ঘর ॥

হরি-নাম মাত্র শুনিলেন তার মুখে ।

গদাধরদাস পূর্ণ হৈল প্রেম সুখে ॥

গদাধরদাস বোলে, আর কালি কেনে ।

এই ত বলিলা ‘হরি’ আপন বদনে ॥

আর তোর অমঙ্গল নাহি কোন কণে ।

যখনে করিলা ‘হরি’ নামের গ্রহণে ॥

কাজীদের সঙ্গে চৈতন্তভক্তদের বিরোধ প্রায়ই লেগে থাকত । কোন কোন সময় তাঁরা কাজীদের উপর নিজেদের প্রভাব বিস্তার করতেও সক্ষম হতেন । জয়ানন্দের চৈতন্তমঙ্গলে চৈতন্তদেবের কয়েকজন ভক্ত ও পার্শ্বদেব কাজীদের সঙ্গে বিরোধ এবং কাজীদের নিয়ে হরিনাম করানোর উদ্দেশ্যে পাণ্ডুরা যায় ।

(১) কাজি মুখে হরি বোলাই নিত্যানন্দ । ( উত্তরখণ্ড, সাহিত্য পদ্যিক )

(২) কাজি সনে বাদ করে প্রেম উনমাদে ।

সাতদিন গৌরীদাস ছিল গঙ্গাহ্রদে ॥ ( উত্তরাখণ্ড, সাহিত্য পরিষদ  
সং, পৃ: ১৫১ )

(৩) কাজি সনে বাদ করিল গদাধর দাস ।

অগ্নিকুণ্ডে ঝাঁপ দিল দেখি লোকে ত্রাস ॥ ( ঐ, পৃ: ১৫১ )

চৈতন্যচরিতগ্রন্থগুলিতে যেভাবে কাজীদের পরাজয়ের প্রসঙ্গ উল্লিখিত হয়েছে, তার মধ্যে অনেকখানি অতিরঞ্জন আছে সন্দেহ নেই ।

(৮) করবে খাঁ

‘রাজমালা’য় এঁর নাম পাওয়া যায় । ত্রিপুরার বিক্কে হৈতন খাঁর নেতৃত্বে যে সৈন্যবাহিনী প্রেরিত হয়েছিল, তার সঙ্গে ইনি সহকারী সেনানায়ক হিসাবে গিয়েছিলেন । ইনি জাতিতে পাঠান ছিলেন ।

(৯) অজ্ঞাতনামা কারাধ্যক্ষ ( শেখ হাক্কু ? )

‘চৈতন্যচরিতামৃত’ মধ্যলীলা ২০শ পরিচ্ছেদে এঁর উল্লেখ পাওয়া যায় । সনাতন হোসেন শাহের সঙ্গে উড়িষ্যা-অভিযানে যেতে রাজী না হওয়ায় হোসেন শাহ সনাতনকে কারারুদ্ধ করে উড়িষ্যায় চলে যান । সনাতন তখন এই “যবন-রক্ষক”কে অনেক কাকুতিমিনতি করেন এবং অবশেষে সাত হাজার মুদ্রা দিয়ে তাঁকে বশীভূত করেন ।

সাত-হাজার মুদ্রা তার আগে রাশি কৈল ॥

লোভ হৈল যবনের মুদ্রা দেখিয়া ।

রাত্রে গঙ্গাপার কৈল দাঁড়ুকা কাটিয়া ॥

কিংবদন্তী অনুসারে এই মুসলমান কারাধ্যক্ষের নাম শেখ হাক্কু এবং এঁর বাড়ী ছিল ফতেপুর গ্রামে ; সেখানে একটি ধ্বংসস্তপকে এখনও লোকে এঁর ভিটা বলে দেখিয়ে দেয় (Memoirs of Gaur and Pandua, p. 35 অষ্টব্য) ।

(১০) সপ্তগ্রাম-মলুকের চৌধুরী

‘চৈতন্যচরিতামৃত’ অন্ত্যলীলা ষষ্ঠ পরিচ্ছেদে এঁর উল্লেখ আছে । ইনি সপ্তগ্রাম মলুকের “অধিকারী” অর্থাৎ শাসনকর্তা ছিলেন । হিরণ্য মজুমদার যখন গোড়ের স্থলতানের সঙ্গে বন্দোবস্ত করে এই মলুকের রাজস্ব আদায়ের ভার নেন এবং বিশ লক্ষ টাকা রাজস্বের মধ্যে বার লক্ষ টাকা রাজকোষে জমা

দিয়ে বাকী আট লক্ষ টাকা নিজে নিতে থাকেন, তখন এই “চৌধুরী” হিংসার জ্বলতে থাকেন। কৃষ্ণদাস কবিরাজ লিখেছেন,

হেনকালে মূলকের এক স্নেহে অধিকারী।

সপ্তগ্রাম মূলকের সে হয় চৌধুরী ॥

হিরণ্যদাস মূলক নিল মোকতা করিয়া।

তার অধিকার গেল মরে সে দেখিয়া ॥

বার লক্ষ দেন রাজায় সাধেন বিশ লক্ষ।

সেই তুড়ুক কিছু না পাঞা হৈল প্রতিপক্ষ ॥

রাজবরে কৈফিতি দিয়া উজীর আনিল।

হিরণ্য মজুমদার পলাইল রঘুনাথের বান্ধিল ॥

প্রতিদিন রঘুনাথে করয়ে ভৎসনা।

বাপ-জ্যোঠা আনহ নহে পাইবি যাতনা ॥

রঘুনাথ মিষ্ট কথায় এই মুসলমানের মন জয় করেন এবং তাঁর জ্যোঠা হিরণ্য মজুমদারের সঙ্গে তাঁর একটা মিটমাট করে দেন।

এখন হোসেন শাহের হিন্দু অমাত্য ও কর্মচারীদের পরিচয় দেব। এদের মধ্যে অনেকের নাম সুপরিচিত, কিন্তু প্রামাণিক সূত্র অবলম্বনে হোসেন শাহের হিন্দু অমাত্য-কর্মচারীদের নাম ও পরিচয়ের পূর্ণাঙ্গ তালিকা প্রণয়নের চেষ্টা এপর্যন্ত কেউ করেন নি। এখন আমরা সেই চেষ্টাই করব।

### (১) সনাতন

ইনি ছিলেন হোসেন শাহের বিশিষ্ট অমাত্যদের অন্যতম। চৈতন্যদেবের সমসাময়িক চরিতকার মুরারি গুপ্ত তাঁর ‘শ্রীকৃষ্ণচৈতন্যচরিতামৃতম্’ গ্রন্থের ৩য় প্রক্ৰম ১৮শ সর্গ ১০ম শ্লোকে সনাতন ও তাঁর ভ্রাতা রূপকে “রাজপাত্র” বলেছেন। সনাতন যে হোসেন শাহের মন্ত্রী ছিলেন এবং তাঁর সভায় বসতেন, তা কবিকর্ণপুর ও কৃষ্ণদাস কবিরাজের উক্তি থেকে জানা যায়। কবিকর্ণপুর সনাতনকে “গৌড়েন্দ্রশ্রু সভাবিভূষণমণিঃ” বলেছেন; কৃষ্ণদাস কবিরাজ লিখেছেন, “রাজমন্ত্রী সনাতন বুদ্ধো বৃহস্পতি।” চৈতন্যদেব যখন রামকেলিতে যান, তখন সনাতন ও রূপ তাঁর সঙ্গে দেখা করেন এবং কিছুদিন পরে চাকরী ও সংসার ছেড়ে তাঁরা চৈতন্যদেবের সঙ্গে মিলিত হন। এঁদের অবশিষ্ট জীবন বৃন্দাবনে কাটে। গোড়ীয় বৈষ্ণব ধর্মের ভাষ্যকার ও বৈষ্ণবসম্প্রদায়ের নেতা হিসাবেই এই দুই ভাই অমর হয়েছেন। সনাতন যে হোসেন শাহের কত

প্রিয় ছিলেন ও তাঁর সরকারে কত দায়িত্বপূর্ণ পদে অধিষ্ঠিত ছিলেন, সে কথা 'চৈতন্যচরিতামৃত'র মধ্যলীলা ১২শ পরিচ্ছেদের নিম্নোক্ত অংশ পড়লে বোঝা যায়।

এথা সনাতন গোসাঞি ভাবে মনেমন ।  
রাজা মোরে প্রীতি করে, সে মোর বন্ধন ॥

অস্বাস্থ্যের চন্দ্ৰ করি রহে নিজ ঘরে ।  
রাজকার্য্য ছাড়িল, না যায় রাজদ্বারে ॥  
লেভ কায়স্থগণে রাজকার্য্য করে ।  
আপনি স্বগৃহে করে শাস্ত্রের বিচারে ॥  
ভট্টাচার্য্য পণ্ডিত বিশ ত্রিশ লঞা ।  
ভাগবত বিচার করে সভাতে বসিয়া ॥  
আরদিন গোড়েশ্বর সঙ্গে একজন ।  
আচম্বিতে গোসাঞি-সভাতে কৈল আগমন ॥  
পাংশা দেখিয়া সভে সম্মমে উঠিলা ।  
সম্মমে আসন দিয়া রাজা বসাইলা ॥  
রাজা কহে তোমার স্থানে বৈষ্ণ পাঠাইল ।  
বৈষ্ণ কহে ব্যাধি নাহি স্থস্থ সে দেখিল ॥  
আমার যে কিছু কার্য্য সব তোমা লঞা ।  
কার্য্য ছাড়ি রহিলা তুমি ঘরেতে বসিয়া ॥

## (২) রূপ

ইনি সনাতনের ছোট ভাই। ইনিও সনাতনের মত হোসেন শাহের মন্ত্রী ছিলেন। 'চৈতন্যচরিতামৃত'র মধ্যলীলা ১৬শ পরিচ্ছেদে দেখি চৈতন্যদেব রূপ-সনাতন সম্বন্ধে বলছেন, "দুই ভাই ভক্তরাজ কৃষ্ণকৃপাপাত্র। ব্যবহারে রাজমন্ত্রী হয় রাজপাত্র ॥" রূপ ছিলেন অপূর্ব কবিত্বশক্তির অধিকারী। চৈতন্যদেবের শিষ্যত্ব গ্রহণ করে সন্ন্যাসী হবার আগে ইনি সংস্কৃত ভাষায় কয়েকটি লৌকিক কাব্য রচনা করেছিলেন, তার পরে অনেক কাব্য ও নাটক রচনা করেন, সমস্তই কৃষ্ণলীলাবিষয়ক ও ভক্তিরসায়ক। রূপ গোস্বামী 'ভক্তিরসায়তসিন্ধু' ও 'উজ্জলনীলমণি' নামে গোড়ীয় বৈষ্ণব ধর্মের অলঙ্কারশাস্ত্র রচনা করেন এবং 'পদ্মাবলী' নামে বিখ্যাত পদসঙ্কলনগ্রন্থ সংকলন করেন।

এখানে একটি বিষয়ের আলোচনা করা দরকার। ‘চৈতন্তভাগবত’, ‘চৈতন্ত-চরিতামৃত’, ‘চৈতন্তমঙ্গল’ প্রভৃতি চরিতগ্রন্থে অনেক ক্ষেত্রে সনাতন ও রূপের কথা বখন বলা হয়েছে, তখন দু’টি উপাধিরও উল্লেখ করা হয়েছে। এই দু’টি উপাধি হচ্ছে—সাকর মল্লিক ও দবীর খাস। কিন্তু এ দুইয়ের মধ্যে কোনটি কার উপাধি, সে সম্বন্ধে পণ্ডিতদের মধ্যে কিছু মতভেদ দেখা যায়। অধিকাংশ পণ্ডিতের মতে সনাতনের উপাধি ছিল ‘সাকর মল্লিক’ এবং রূপের ‘দবীর খাস’। কিন্তু ‘সম্মগোষ্ঠামৌ’ নামক গ্রন্থের মতে রূপেরই উপাধি ছিল ‘সাকর মল্লিক’ এবং সনাতনের ‘দবীর খাস’। এই মত কোন কোন বিশিষ্ট গবেষক গ্রহণ করেছেন। গিরিজাশঙ্কর রায় চৌধুরী তাঁর ‘শ্রীচৈতন্তদেব ও তাঁহার পার্বদগণ’ বইয়ে ( পৃ: ১৪৭-১৪৯ ) এসম্বন্ধে বিস্তৃতভাবে আলোচনা করে এই সিদ্ধান্তে উপনীত হয়েছেন যে “সাকর মল্লিক ও দবীর খাস—শ্রীসনাতনকেই এই দুই নামে অভিহিত করা হইয়াছে।” এইসব পরস্পরবিরোধী অভিমতের জন্ত বিষয়টি সম্বন্ধে সবিস্তারে আলোচনা করার প্রয়োজন আছে; এই আলোচনায় আমরা কেবলমাত্র প্রামাণিক চৈতন্তচরিতগ্রন্থগুলির উক্তির উপরেই নির্ভর করব।

সনাতনের উপাধি যে সাকর মল্লিক ছিল, তাতে সন্দেহের কোন অবকাশ নেই। প্রমাণস্বরূপ আমি চৈতন্তভাগবত ও চৈতন্তচরিতামৃত থেকে কয়েকটি উক্তি উদ্ধৃত করছি,

সাকর মল্লিক আর রূপ দুই ভাই। ( চৈ. ভা., অস্ত্য, ১০ম অঃ )

সাকর মল্লিক নাম ঘুচাইয়া তান।

সনাতন অবধূত থুইলেন নাম ॥ ( চৈ. ভা., অস্ত্য, ১০ম অঃ )

অর্দ্ধরাজ্যে দুই ভাই আসিলা প্রভুহানে।

প্রথমে মিলিলা নিত্যানন্দ হরিদাস সনে ॥

তাঁহা দুইজন জানাইল প্রভুর গোচরে।

রূপ সাকর মল্লিক আইলা তোমা দেখিবারে ॥

( চৈ. চ., মধ্য, ১ম পঃ )

সর্বশেষ উদ্ধৃত অংশটির “রূপ সাকর মল্লিক” কথার অর্থ—রূপ এবং সাকর মল্লিক। ঐ কথাটি থেকে কেউ যেন না ভাবেন যে রূপ আর সাকর মল্লিক একই লোক। কারণ দু’জন লোক বখন মহাপ্রভুর সঙ্গে দেখা করতে এসেছেন,



তখন নিত্যানন্দ এবং হরিদাস মহাপ্রভুকে তাঁদের কথা বলতে গিয়ে মাত্র একজনের নাম করবেন বলে কল্পনা করা যায় না।

‘সাকর মল্লিক’ সম্ভবত ফার্সী শব্দ ‘সগীর মলিক’-এর অপভ্রংশ। ‘সগীর মলিক’ অর্থ ‘ছোট রাজা’। এই উপাধিটি থেকে বোঝা যায়, সনাতন হোসেন শাহের সরকারে কত সম্মানজনক পদে অধিষ্ঠিত ছিলেন।

‘সাকর মল্লিক’ বলতে যে সনাতনকেই বোঝানো হয়েছে, তা জানা গেল। এখন ‘দবীর খাস’ বলতে কাকে বোঝানো হয়েছে, সে সম্বন্ধে আলোচনা করতে হবে। ‘সাকর মল্লিক’ ও ‘দবীর খাস’ সমজাতীয় শব্দ নয়। ‘সাকর মল্লিক’ একটি উপাধিমাাত্র, কিন্তু ‘দবীর খাস’ একটি রাজপদের নাম। ‘দবীর’ মানে লেখক (সেক্রেটারী) ; ‘দবীর’ ও ‘মুনশী’ সমার্থবাচক শব্দ। ‘খাস’ শব্দের অর্থ প্রধান। সুতরাং ‘দবীর খাস’ বলতে রাজার প্রধান সেক্রেটারীকে বোঝাত। ‘দবীর খাস’ (দবীর-ই-খাস)-এর কাজ ছিল খুবই গুরুত্বপূর্ণ। এসম্বন্ধে আই এইচ কুরেশী লিখেছেন, “The third office was the diwan-i-insha which dealt with royal correspondence. It has rightly been called the ‘treasury of secrets,’ for the dabir-i-khās, who presided over this department, was also the confidential clerk of the state.....The dabir-i-khās was assisted by a number of dabirs, men who had already established their reputatian as masters of style.....The dabir-i-khās was always at hand so that he could be summoned to draft an urgent letter or even take down notes of any conversation worth-recording. (The Administration of the Sultanate of Delhi, 4th Edition, pp. 86-87 )

প্রামাণিক চৈতন্যচরিতগ্রন্থগুলির সাক্ষ্য বিশ্লেষণ করলে স্পষ্ট বোঝা যায় যে, তাদের মধ্যে কেবলমাত্র রূপকে বা কেবলমাত্র সনাতনকে ‘দবীর খাস’ বলা হয় নি, দুজনকেই ‘দবীর খাস’ বলা হয়েছে, অর্থাৎ রূপ ও সনাতন দুজনেই হোসেন শাহের ‘দবীর খাস’ ছিলেন। চৈতন্যচরিতগ্রন্থগুলির যে সব অংশে ‘দবীর খাস’-এর উল্লেখ পাওয়া যায়, সেগুলি উদ্ধৃত করলেই বিষয়টি স্পষ্ট হবে।

বৃন্দাবনদাসের 'চৈতন্যভাগবতে' কয়েক জায়গায় 'দবীর খাস'-এর উল্লেখ পাওয়া যায় ; যেমন,

(১) শেষথণ্ডে শ্রীগৌরহৃন্দর মহাশয় ।  
দবীর খাসেরে প্রভু দিলা পরিচয় ॥  
প্রভু চিনি দুই ভাইর বন্ধ বিমোচন ।  
শেষে নাম খুইলেন রূপ-সনাতন ॥ ( আদিখণ্ড, প্রথম অধ্যায় )

(২) হেনমতে শ্রীগৌরহৃন্দরের রঙ্গ ॥  
তাহান রূপার এই স্বাভাবিক ধর্ম ।  
রাজ্য-পদ ছাড়ি করে ভিক্ষকের কর্ম ॥  
কলিযুগে তার সাক্ষী শ্রীদবীর খাস ।  
রাজ্যপাট ছাড়ি যার অরণ্যে বিলাস ॥ ( আদিখণ্ড, নবম অধ্যায় )

(৩) দবীর খাসেরে প্রভু বলিতে লাগিলা ।  
এখানে তোমার কৃষ্ণপ্রেমভক্তি হইলা ॥  
অষ্টদ্বৈতের প্রসাদে হয় প্রেমভক্তি ।  
জানিহ অষ্টদ্বৈত শ্রীকৃষ্ণের পূর্ণশক্তি ॥  
কথোদিন জগন্নাথ শ্রীমুখ দেখিয়া ।  
তবে দুই ভাই মথুরায় থাক গিয়া ॥  
তোমা সভা হৈতে যত রাজস তামস ।  
পশ্চিমা সভারে দিয়া দেহ ভক্তিরস ॥ ( অন্ত্যখণ্ড, দশম অধ্যায় )

কৃষ্ণদাস কবিরাজের 'চৈতন্যচরিতামৃতে'ও কয়েক জায়গায় 'দবীর খাস'-এর উল্লেখ দেখতে পাই ; যেমন,

(৪) দবীর খাসেরে রাজা পুছিল নিভূতে ।  
গোসাঁঞর মহিমা তেহৌ লাগিলা কহিতে ॥  
( মধ্যলীলা, প্রথম পরিচ্ছেদ )

(৫) তবে দবীর খাস আইলা আপনার ঘরে ॥  
ঘরে আসি দুই ভাই যুক্তি করিয়া ।  
প্রভু দেখিবারে চলে বেশ লুকাইয়া ॥ (ত্রি)

(৬) শুনি মহাপ্রভু কহে শুন দবীর খাস ।  
তুমি দুই ভাই মোর পুরাতন দাস ॥ (ত্রি)

যারা ‘দবীর খাস’কে রূপের উপাধি বলে মনে করেছিলেন, তাঁদের একমাত্র অবলম্বন উপরে উদ্ধৃত (৬) নং উদাহরণের প্রথম চরণের পাঠান্তর, “তিনি প্রভু কহে তনু রূপ দবীর খাস।” কিন্তু এখানে “রূপ দবীর খাস” শব্দের অর্থ ‘দবীর খাস উপাধিধারী রূপ’ যেমন করা যায়, তেমনি ‘রূপ এবং দবীর খাস’ও করা যায়; তাহলে ‘দবীর খাস’ সনাতনের উপাধি হয়। কিন্তু “তিনি প্রভু কহে তনু রূপ দবীর খাস” প্রকৃত পাঠ নয়, “তিনি মহাপ্রভু কহে তনু দবীর খাস”—ই প্রকৃত পাঠ, চৈতন্যচরিতামৃতের বহু নির্ভরযোগ্য পুঁথিতে এবং প্রাচীন মুদ্রিত সংস্করণ গণেশচন্দ্র ঘোষ প্রকাশিত ‘শ্রীশ্রীচৈতন্যচরিতামৃতে’ (মধ্যখণ্ড, পৃ: ৬) এই পাঠ দেখা যায়। আর চৈতন্যচরিতামৃত ও অন্যান্য চরিতগ্রন্থগুলির সর্বত্রই যখন রূপ-সনাতনকে যুক্তভাবে ‘দবীর খাস’ বলা হয়েছে (নীচে আলোচনা দ্রষ্টব্য), তখন ‘রূপ দবীর খাস’—এই খাপছাড়া পাঠকে প্রকৃত পাঠ বলে মেনে নেওয়া যায় না।

জয়ানন্দের ‘চৈতন্যমঙ্গল’ের উক্তি থেকে ‘দবীর খাস’-সমস্তার সমাধানের স্পষ্ট নৃত্র পাওয়া যায়। জয়ানন্দের ‘চৈতন্যমঙ্গলে’ রূপ ও সনাতন দুজনকেই খুব স্পষ্টভাবে ‘দবীর খাস’ (দবির খাশ) বলা হয়েছে। নীচে আমরা জয়ানন্দের ‘চৈতন্যমঙ্গল’ের প্রাসঙ্গিক অংশগুলি উদ্ধৃত করছি (এশিয়াটিক সোসাইটির G-5398 নং পুঁথির পাঠ, প্রয়োজনবোধে ছাপা বইয়ের পাঠ গ্রহীত হয়েছে),

(৭) হেনকালে দবির খাশ (স) ভার সহিতে ।

চৈতন্যচন্দ্রের ঠাঞি গেলা আচাষিতে ॥

মহাবৈরাগ্য মৃত্তিকাভাণ্ড সঙ্গে ।

নিরবধি প্রেমধারা পুলক সর্বাঙ্গে ॥

গৌড়েন্দ্র-সম্পদ তারা তৃণজ্ঞান করি ।

বৃন্দাবনে ভ্রমেন অকিঞ্চন বেশ ধরি ॥

ঈশ্বর দবির খাশ তাই সনাতন ।\*

গৌড়েন্দ্র সম্পদ ছাড়ি হইলা অকিঞ্চন ॥†

---

\* এই ছত্রটির পাঠ এশিয়াটিক সোসাইটির পুঁথির। এর অর্থ পরের পাদটীকায় দ্রষ্টব্য। ছাপা বইয়ের পাঠ “ঈশ্বর দবিরখাস তাই সনাতন” নিতান্তই ভুল।

† এই পয়ারটির অর্থ—সনাতন ঈশ্বরের ‘দবীর খাস’, তাই তিনি গৌড়েশ্বরের সম্পদ ত্যাগ করে, অকিঞ্চন হলেন। জয়ানন্দ যে ‘দবীর খাস’-এর অর্থ জানতেন, তা এর থেকে বোঝা যায়।

সহস্র ঘোড়া যার আশু-পাছ দৌড়ে ।  
 বাইশ লক্ষ স্বর্ণ রহিল পৌতা গোড়ে ॥  
 পূর্বে তারা অক্ষার মানসপুত্র ছিল।  
 শাপভ্রষ্ট দুই ভাই পৃথিবী জন্মিলা ॥  
 চৈতন্যদর্শনে তার পাশ বিমোচন ।  
 গোসাঞি নাম খুইল দুই ভাই রূপ-সনাতন ।  
 প্রভু বলেন শাপান্তর হইল দবির খাশ ।  
 রূপ-সনাতন হইলা ক্ষিতি-পরকাশ ॥

- (৮) শ্রীকৃষ্ণচৈতন্য রহিলেন কুতূহলে ।  
 দবির খাশ দুই ভাই গেলা নীলাচলে ॥  
 দবির খাশ দুই ভায়ে খণ্ডাল্য সংসার বন্ধন ।  
 দুই ভাএর নাম খুইল রূপ-সনাতন ॥

উপরে উদ্ধৃত উদাহরণগুলি যত্নসহকারে বিশ্লেষণ করলে দেখা যাবে, ‘দবীর খাস’ পদের দ্বারা রূপ বা সনাতন, কাউকেই এককভাবে বোঝানো হয়নি। রূপ ও সনাতন উভয়কেই “দবীর খাস” বলা হয়েছে। প্রমাণ স্বরূপ, (৩) নং উদাহরণে বলা হয়েছে মহাপ্রভু দবীর খাসকে বললেন, “তোমরা দুই ভাই মথুরায় গিয়ে থাক।” (৫) নং উদাহরণে বলা হয়েছে, দবীর খাস ঘরে ফিরলেন এবং দুই ভাই প্রভুকে দেখবার জন্য ছদ্মবেশ ধরে গেলেন, (৬) নং উদাহরণে বলা হয়েছে মহাপ্রভু ‘দবীর খাস’ কে বলছেন, “তোমরা দুই ভাই আমার পুরাতন দাস”, (১) ও (৭) নং উদাহরণে বলা হয়েছে, চৈতন্যদেব ‘দবীর খাসের’ নাম রাখলেন রূপ-সনাতন; এই তিনটি উদাহরণে খুব স্পষ্টভাবে রূপ ও সনাতন উভয়কেই ‘দবীর খাস’ বলা হয়েছে। (২) নং উদাহরণে ‘বার’, (৩) নং উদাহরণে ‘তোমার’, (৪) নং উদাহরণে ‘যেহৌ’ এবং (৬) নং উদাহরণে ‘তুমি’ ‘দবীর খাস’-এর সর্বনামরূপে ব্যবহৃত, কিন্তু তার দ্বারা প্রমাণিত হয় না যে ‘দবীর খাস’ একজন লোকেরই নাম কারণ এই সর্বনামগুলি ষোড়শ শতাব্দীতে একবচন ও বহুবচন উভয় বচনেই ব্যবহৃত হত।

সুতরাং এখন পরিষ্কারভাবে বোঝা যাচ্ছে, রূপ ও সনাতন দু’জনেই হোসেন শাহের ‘দবীর খাস’ ছিলেন। একজন স্থলতানের দুজন ‘দবীর খাস’ থাকতে যেমন বাধা নেই, তেমনি ‘দবীর খাস’ পদের অধিকারীর পক্ষে ‘সাকর মাল্লক’

উপাধি লাভ করতেও কোন বাধা নেই। অতএব দুই ভাইয়ের যে একই পদ ছিল, তাতে সন্দেহের কোন কারণ নেই। তবে সনাতনের 'সাকর মল্লিক' উপাধি এবং তাঁর প্রতি হোসেন শাহের "আমার যে কিছু কাণ্ড সব তোমা লঞা" উক্তি থেকে মনে হয়, দু'জনের মধ্যে সনাতনেরই পদমর্যাদা বেশী ছিল, তাঁরই হাতে অধিকতর গুরুত্বপূর্ণ বিষয়গুলির ভার হস্ত ছিল এবং তিনিই হোসেন শাহের বেশী প্রিয় ছিলেন।

এই দুই ভ্রাতার 'রূপ' ও 'সনাতন' নাম চৈতন্যদেবের দেওয়া। এই নামেই এঁরা পরবর্তীকালে প্রসিদ্ধি লাভ করেছেন। অবাচীন কিংবদন্তী অনুসারে রূপ ও সনাতনের পিতৃদত্ত নাম ছিল যথাক্রমে সন্তোষ ও অমর; কিন্তু এই কিংবদন্তীর সপক্ষে কোন প্রমাণ এ পর্যন্ত পাওয়া যায় নি।

### (৩) বল্লভ

ইনি সনাতন-রূপের কানষ্ট ভ্রাতা। ইনিও শ্রীচৈতন্যদেবের দর্শন ও রূপা লাভ করেছিলেন। কিন্তু লাভ করার অল্পদিন পরেই এঁর মৃত্যু হয়। বিখ্যাত জীব গোস্বামী এঁর পুত্র। 'চৈতন্যচরিতামৃত'ে এঁর সম্বন্ধে লেখা আছে, "অনুপম মল্লিক তাঁর নাম শ্রীবল্লভ"। স্মরণ্য এঁর প্রকৃত নাম বল্লভ এবং 'অনুপম মল্লিক' উপাধি—'সাকর মল্লিক'-এর মত। অতএব রূপ-সনাতনের মত বল্লভও যে হোসেন শাহের সরকারে কাজ করতেন, তাতে কোন সন্দেহ নেই। বল্লভ রূপ-সনাতনের সঙ্গে গোঁড়ের বাস করতেন, কারণ 'চৈতন্যচরিতামৃত'ে দেখি সনাতন বলছেন,

আমি আর রূপ তাঁর জ্যেষ্ঠ সহোদর।

আমা দৌহা সঙ্গে তেহৌ রহে নিরন্তর ॥

বল্লভ রামভক্ত ছিলেন। রূপ গোস্বামীর সঙ্গে তিনি প্রয়াগে গিয়ে মহাপ্রভুর দর্শন লাভ করেন। প্রয়াগ থেকে বৃন্দাবন হয়ে বাংলায় আসার পর তিনি পরলোকগমন করেন। কোন কোন আধুনিক গ্রন্থে বল্লভ বা অনুপম মল্লিক 'অনুপ' নামে উল্লিখিত হয়েছে। কিংবদন্তী অনুসারে তিনি গোঁড়ের টাকশালের অধ্যক্ষ ছিলেন।

### (৪) শ্রীকান্ত

ইনি সনাতন-রূপের ভগ্নীপতি। ইনি হাজীপুরে থাকতেন। সুলতান.

হোসেন শাহের ঘোড়া সংগ্রহ করে পাঠানো ছিল এঁর কাজ। ‘চৈতন্য-চরিতামৃত’ মধ্যলীলা ২০শ পরিচ্ছেদে এঁর সম্বন্ধে লেখা আছে,

সেই হাজিপুরে রহে ত্রীকান্ত তার নাম।

গোসাঁঞর ভগিনীপতি করে রাজকাম ॥

তিন লক্ষ মূদ্রা রাজা দিয়াছে তার স্থানে।

ঘোড়া মূল্য লঞা পাঠায় পাংশার স্থানে।

(৫) সনাতনের “বড় ভাই” ( রঘুনন্দন ? )

রূপ-সনাতনের যে আরও ভাই ছিল, তা জীব গোস্বামী তাঁর ‘লঘু বৈষ্ণব-তোষণী’র উপক্রমে বলেছেন। ‘চৈতন্যচরিতামৃত’ মধ্যলীলার ১২শ পরিচ্ছেদে সনাতনের এক বড় ভাইয়ের উল্লেখ পাই। সনাতন যখন রাজকাৰ্য ছেড়ে ঘরে বসেছিলেন, তখন হোসেন শাহ তাঁকে বলেছিলেন,

তোমার বড় ভাই করে দণ্ড্য-ব্যবহার ॥

জীব বহু মারিয়া বাকলা কৈল খাস।

এথা তুমি কৈলে মোর সৰ্বকাৰ্য্য নাশ ॥

‘খাস’ অর্থ রাজার নিজস্ব এলাকা। সনাতনের বড় ভাই যখন বাকলাকে “খাস” করেছিলেন, তখন তিনি নিশ্চয়ই সুলতান হোসেন শাহের কর্মচারী ছিলেন এবং এই কাজের ভার পেয়েছিলেন। এ কাজ করতে গিয়ে তিনি বহু জীব হত্যা করেছিলেন; অর্থাৎ পশুপাখী মেরেছিলেন এবং সম্ভবত যে সব মানুষ মখল ছাড়তে রাজী হইনি, তাদেরও অনেককে বধ করেছিলেন। এই জন্ত হোসেন শাহ তাঁর উপর বিরক্ত হয়ে তাঁর কাজকে “দণ্ড্য-ব্যবহার” বলেছেন।

অবশ্য উদ্ধৃত শ্লোকের কেউ কেউ এই অর্থও করতে পারেন যে সনাতনের বড় ভাই বাকলায় হোসেন শাহের বহু প্রজাকে হত্যা করে সেখানে স্বাধীন রাজা হয়ে বসেছিলেন। কিন্তু এই অর্থ গ্রহণযোগ্য নয়, কারণ তা’হলে হোসেন শাহ তাঁর ভাই ও আত্মীয়দের রাজপদে বহাল রাখতেন না এবং তাঁর বিরুদ্ধে যুদ্ধাভিযান না করে বসে থাকতেন না।

অর্বাচীন কিংবদন্তীর মতে সনাতনের এই বড় ভাইয়ের নাম রঘুনন্দন ( ভারতবর্ষ, জ্যৈষ্ঠ, ১৩৩৭, পৃ: ২২০ প্র: )।

‘বাকলা’র সঙ্গে সনাতন-রূপের পরিবারের সম্পর্ক খুবই পুরোনো। জীব গোস্বামী তাঁর ‘লঘু বৈষ্ণবতোষণী’তে বলেছেন সনাতন-রূপের পিতা কুমারদেব “জ্যোহ”বশত নৈহাটি ছেড়ে পূর্ববঙ্গ চলে যান ( “কঞ্চিং জ্যোহম্বাপ্য

সংকুলজনির্বাকালয়ঃ সঙ্গতঃ”)। ভক্তিরত্নাকরে স্পষ্টভাবে লেখা হয়েছে যে কুমারদেব বাকলা-চন্দ্রদ্বীপে গিয়েছিলেন,

নিজগণ সহ বঙ্গদেশেতে শীঘ্র গেলা।

বাকলা চন্দ্রদ্বীপ গ্রামেতে বাস কৈলা ॥

সুতরাং স্পষ্টই বোঝা যায় যে, সনাতন, রূপ ও বল্লভ বাকলা ছেড়ে গৌড়ে এসে রাজকাষ করছিলেন আর তাঁদের বড় ভাই বাকলাতে থেকেই রাজকাষ করতেন। সুতরাং দেখা যাচ্ছে এই চার ভাই ও তাঁদের ভগ্নীপতি শ্রীকান্ত— এক পরিবারের এই পাঁচজনই হোসেন শাহের কর্মচারী ছিলেন।

‘বর্ধমান সাহিত্য-সভা’র একটি সংস্কৃত পুঁথিতে (এই বইয়ের ১৪২ পৃষ্ঠায় উল্লিখিত) ভুল সংস্কৃতে লেখা আছে সনাতন-রূপ-বল্লভের একজন নয়—দু’জন বড় ভাই ছিলেন এবং তাঁরা “দেশাধিকারী” ছিলেন (“জ্যেষ্ঠ অগ্রজৌ দৌ দেশাধিকারিণৌ ভবৎ”)। চৈতন্যচরিতামৃতের পূর্বোক্ত উক্তির পরিপ্রেক্ষিতে “দেশাধিকারী” মানে এখানে আঞ্চলিক শাসনকর্তা ধরতে হবে। তাহলে বলতে হবে পাঁচ ভাইই হোসেন শাহের অধীনে কাজ করতেন। অবশ্য সংস্কৃত পুঁথির উক্তির যথার্থ্য সম্বন্ধে তথা রূপ-সনাতনের আর একজন ভাইয়ের অস্তিত্ব সম্বন্ধে কোন প্রমাণ নেই।

### (৬) কেশব ছত্রী

ইনি কেশব ছত্রী, কেশব বসু ও কেশব খান তিন নামেই বিভিন্ন জায়গায় উল্লিখিত হয়েছেন। এঁর নাম রুক্ষদাস কবিরাজের ‘চৈতন্যচরিতামৃত’ এবং রূপ গোস্বামী সংকলিত ‘পদ্মাবলী’তে লেখা হয়েছে ‘কেশব ছত্রী,’ কবিকর্ণপুরের ‘চৈতন্যচন্দ্রোদয় নাটক’ ও কুলজীগ্রন্থে ‘কেশব বসু’ এবং বৃন্দাবনদাসের ‘চৈতন্যভাগবত’ ও জয়ানন্দের ‘চৈতন্যমঙ্গল’ে ‘কেশব খান’। সম্ভবত এঁর পদবী ‘বসু’, উপাধি ‘খান’ এবং রাজপদের নাম ‘ছত্রী’\*। ‘চৈতন্যভাগবত’ ও ‘চৈতন্যচরিতামৃত’ে লেখা আছে যে হোসেন শাহ যখন কেশবের কাছে চৈতন্যদেব সম্বন্ধে বিস্তৃত বিবরণ জানতে চান, তখন কেশব চৈতন্যদেবের যাতে

\* ‘ছত্রী’ নামক রাজপদের অস্তিত্ব ভারতবর্ষে প্রাচীন কাল থেকেই আছে। ‘ছত্রী’রা রাজার সভায় যাওয়ার সময় এবং অগ্নিগ্ন জামুষ্ঠানিক ব্যাপারে রাজার ছত্র ধারণ করতেন বলে মনে হয়। ‘ছত্রী’ মানে যে আড়াল করে রাখে—অর্থাৎ দেহরক্ষীও হতে পারে। আবার ‘ছত্রী’ ‘ক্ষত্রী’র অপভ্রংশও হতে পারে। ‘রাজতরঙ্গিণী’র মতে ‘ক্ষত্রী’ ও ‘প্রতিহার’ সমার্থক।

অনিষ্ট না হয়, সেজন্ত তাঁর মহিমা লাঘব করে বলেন। ‘চৈতন্তচরিতামৃত’ এও লেখা আছে যে ইনি চৈতন্তদেবের কাছে ব্রাহ্মণ পাঠিয়ে তাঁকে চলে যেতে বলেছিলেন। এই ব্যাপার থেকে বোঝা যায়, কেশব ছত্রীও চৈতন্তদেবের ভক্ত ছিলেন। তিনি স্বকবিও ছিলেন। তাঁর লেখা একটি কৃষ্ণলীলাবিষয়ক পদ ‘পদ্মাবলী’তে উদ্ধৃত হয়েছে। এই পদে ভক্ত হৃদয়ের ছাপ আছে। জনশ্রুতি অনুসারে কেশব ছত্রী হোসেন শাহের প্রধান দেহরক্ষী ছিলেন। তাঁর ‘ছত্রী’ উপাধি এই জনশ্রুতির সমর্থন জোগায়।

কুলগ্রন্থের মতে কেশব ছত্রী মালাধর বসুর ভ্রাতুষ্পুত্র। মালাধর বসুর উপাধি ছিল গুণরাজ খান, কিন্তু জয়ানন্দের চৈতন্তমঙ্গলে তিনি ‘গুণরাজ ছত্রী’ বলে উল্লিখিত হয়েছেন। সম্ভবত মালাধর বসুও গোড়েশ্বরের (রুক্মদ্দীন বারবক শাহের) কর্মচারী ছিলেন এবং কেশব ছত্রীর মত তাঁরও রাজপদের নাম ছিল ‘ছত্রী’।

### (৭) স্ববুদ্ধি রায়

স্ববুদ্ধি রায় ছিলেন “গোড়-অধিকারী” অর্থাৎ গোড় শহরের চৌধুরী বা ভারপ্রাপ্ত প্রশাসক। হোসেন শাহের সিংহাসনে আরোহণের অনেক আগে থেকেই তিনি এই পদে অধিষ্ঠিত ছিলেন। হোসেন তখন তাঁর অধীনে কাজ করতেন। কাজের ক্রটির জন্ত তিনি হোসেনকে চাবুক মেরেছিলেন। পরে হোসেন স্নলতান হলে, “স্ববুদ্ধি বায়েরে তেঁহো বহু বাঢ়াইল।” কিন্তু তাঁর বেগম চাবুক মারার কথা জেনে স্ববুদ্ধি রায়ের উপর ক্রুদ্ধ হন এবং বেগমের উপরোধে হোসেন শাহ স্ববুদ্ধি রায়ের জাতি নাশ করেন। স্ববুদ্ধি রায় তখন কাশী চলে যান এবং পণ্ডিতদের কাছে প্রায়শ্চিত্তের বিধান চান। পণ্ডিতদের পরস্পরবিরোধী বিধান “শুনিঞা রহিলা রায় করিয়া সংশয়।” পরে কাশীতে চৈতন্তদেব এলে স্ববুদ্ধি রায় তাঁর সঙ্গে দেখা করেন। চৈতন্তদেব বলেন, “বৃন্দাবনে গিয়ে কৃষ্ণনাম সঙ্গীতন কর, তাহলেই সব পাপ খণ্ডন হবে।” স্ববুদ্ধি রায় তা’ই করলেন। শুকনো কাঠ বেচে তিনি নিজের জীবনধারণ ও বৈষ্ণবদের সেবা করতেন। রূপ ও সনাতন বৃন্দাবনে এলে তাঁদের স্ববুদ্ধি রায় অনেক যত্ন করেছিলেন।

চৈতন্তচরিতামৃত মধ্যলীলা ২৫শ পরিচ্ছেদে স্ববুদ্ধি রায়ের কাহিনী বর্ণিত আছে। ১৫১৬ খ্রীষ্টাব্দের জানুয়ারী-ফেব্রুয়ারী মাসে চৈতন্তদেব কাশীতে এসে-ছিলেন। স্তবরাং হোসেন শাহের হাতে স্ববুদ্ধি রায়ের লাঞ্ছনা তার কিছু আগে



ঘটেছিল। সুবুদ্ধি রায়ের অধীনে হোসেন শাহের চাকরী করা তারও ৩০।৪০ বছর আগেকার ঘটনা, কারণ হোসেন তখন যুবক। ১৪২৩-২৪ খ্রীষ্টাব্দে সিংহাসনে আরোহণের সময় যে হোসেন প্রবীণ বয়সে উপনীত হয়েছিলেন, তা আমরা আগেই দেখে এসেছি।

### (৮) মুকুন্দ

ইনি ছিলেন হোসেন শাহের চিকিৎসক। এঁর পিতা নারায়ণদাস রুকমুদীন বারবক শাহের চিকিৎসক ছিলেন। মুকুন্দ চৈতন্যদেবের একজন বড় ভক্ত ছিলেন। এঁর অল্পজ নরহরি ও পুত্র রঘুনন্দন চৈতন্যদেবে বশিষ্ট পার্শ্বদেবের অগ্রতম ছিলেন এবং তাঁরা পরবর্তীকালে বাংলার বৈষ্ণবসম্প্রদায়ের নেতা ও গুরুরূপে প্রতিষ্ঠা অর্জন করেন। মুকুন্দদের বাড়ী ছিল শ্রীখণ্ডে। ‘চৈতন্য-চরিতামৃত’ের মধ্যলীলা ১৫শ অধ্যায়ে লেখা আছে যে চৈতন্যদেব স্বয়ং নীলাচলে বসে মুকুন্দের সামনে তাঁর প্রেমভক্তির পরিচয় অল্প ভক্তদের কাছে দিয়েছিলেন। এর মধ্যে “স্নেহ রাজা” অর্থাৎ হোসেন শাহেরও উল্লেখ আছে। এই স্থানটি আমরা উদ্ধৃত করছি।

ভক্তের মহিমা প্রভু কহিতে পায় স্থখ ।

ভক্তের মহিমা কহিলে হয় পঞ্চমুখ ॥

ভক্তগণে কহে শুন মুকুন্দের প্রেম ।

নিগূঢ় নির্মল প্রেম যেন দন্ধ হেম ॥

বাহে রাজবৈজ্ঞ ইহা করে রাজসেবা ।

অন্তরে কৃষ্ণপ্রেম ইহার জানিবেক কেবা ॥

একদিন স্নেহ রাজার উচ্চ টুঙ্গীতে ।

চিকিৎসার বাত কহে তাহার অগ্রতে ॥

হেনকালে এক ময়ূরপুচ্ছের আড়ানী ।

রাজার শিরোপরি ধরে এক সেবক আনি ॥

ময়ূরপুচ্ছ দেখি মুকুন্দ প্রেমাষিষ্ট হৈলা ।

অতি উচ্চ টুঙ্গী হৈতে ভূমিতে পড়িলা ॥

রাজার জ্ঞান রাজবৈজ্ঞের হৈল মরণ ।

আপনে নামিয়া রাজা করাইল চেতন ॥

রাজা বলে ব্যথা তুমি পাইলে কোন্ ঠাঞি ।

মুকুন্দ কহে অতিবড় ব্যথা নাহি পাই ॥

রাজা কহে মুকুন্দ তুমি পড়িলা কি লাগি ।  
মুকুন্দ কহে মোর এক ব্যাধি আছে মৃগী ॥  
মহা বিদগ্ধ রাজা সেই সব বাত জানে ।  
মুকুন্দেই হৈল তাঁর মহাসিদ্ধ জানে ॥

## (৯) রামচন্দ্র খান

ষোড়শ শতাব্দীতে বাংলাদেশে রামচন্দ্র খান নামে তিনজন বিশিষ্ট ব্যক্তি বর্তমান ছিলেন। এঁদের মধ্যে অন্তত দু'জন হোসেন শাহের সমসাময়িক। প্রথম রামচন্দ্র খানের কাহিনী 'চৈতন্যচরিতামৃত' পাওয়া যায়। ইনি ছিলেন বেনাপোলের জমিদার। কৃষ্ণদাস কবিরাজের মতে ইনি যখন হরিদাসের উপর অত্যাচার করেছিলেন এবং বারাদনা দিয়ে তাঁকে প্রলুব্ধ করে তাঁর সাধনা নষ্ট করবার চেষ্টা করেছিলেন; পরে নিত্যানন্দ এ'র গ্রামে এলে তাঁকেও ইনি অপমান করেছিলেন; ইনি পরে দস্যুরূপে করে বেড়াতেন এবং রাজকর দিতেন না; তারপরে "শ্লেচ্ছ উজীর" এসে স্ত্রীপুত্র সমেত তাঁকে বন্দী করেন, তাঁর গৃহে অভ্যক্ষ মাংস রন্ধন করান এবং ঘর ও গ্রাম তিন দিন ধরে লুণ্ঠ করে অশ্বশানে পরিণত করেন। দ্বিতীয় রামচন্দ্র খান একখানি বাংলা মহাভারত রচনা করেন। এটি জৈমিনী রচিত অশ্বমেধ-পর্বের মর্যাদাবাদ। এর শেষে যে রচনাকালবাচক শ্লোক আছে, তার পাঠ বিকৃত বলে অর্থ সম্বন্ধে সকলে একমত নন। কারও মতে এর থেকে ১৪৫৪ শক, কারও মতে ১৪৭৪ শক পাওয়া যায়। যাহোক, ১৪৫৪ থেকে ১৪৭৪ শকাব্দের (১৫৩২-১৫৫২ খ্রীঃ) মধ্যে যে এই মহাভারত লেখা হয়েছিল, তাতে কোন সন্দেহ নেই। এর থেকে বোঝা যায় যে, এই রামচন্দ্র খানও সম্ভবত হোসেন শাহের রাজত্বকালে বর্তমান ছিলেন, অন্তত ঐ সময়ে জন্মগ্রহণ করেছিলেন। এ'র নিবাস ছিল উত্তর রাঢ়ে, কোন পুঁথির মতে দণ্ড সিমলিয়া-ডাঙা গ্রামে, কোন পুঁথির মতে জঙ্গীপুরে। তৃতীয় রামচন্দ্র খানই আমাদের আলোচ্য ব্যক্তি। এ'র কথা 'চৈতন্যভাগবতে'র অন্ত্যখণ্ডের দ্বিতীয় অধ্যায়ে পাওয়া যায়। ইনি হোসেন শাহের অধীনে গোড়-উৎকল সীমান্ত অঞ্চলের লস্কর বা সামরিক শাসনকর্তা ছিলেন। সীমান্ত রক্ষার দায়িত্ব এর উপরেই গুরুত্ব ছিল। 'চৈতন্যভাগবতে' দেখি রামচন্দ্র খান সম্বন্ধে চৈতন্যদেবকে ছত্রভোগের "সর্ব-লোক" বলছে, "এই অধিকারী প্রভু দক্ষিণ রাজ্যেতে" এবং রামচন্দ্র খান চৈতন্যদেবকে নিজের সম্বন্ধে বলছেন, "মুঞি সে লস্কর এথা সব

মোর ভার।” ইনিই ছত্রভোগে চৈতন্যদেবকে নিরাপদে গোড়-উৎকল সীমান্ত পার হতে সাহায্য করেছিলেন। কেউ কেউ মনে করেন এই রামচন্দ্র খানই মহাভারতের রচয়িতা। কিন্তু এই মতের পক্ষে বিন্দুমাত্রও প্রমাণ নেই, বরং বিপক্ষে প্রমাণ আছে। মহাভারত-রচয়িতা রামচন্দ্র খানের বাড়ী ছিল উত্তর রাঢ়ে, আর এই রামচন্দ্র খানকে দেখতে পাওয়া যায় বাংলা ও উড়িষ্যার সীমান্তে। এই রামচন্দ্র খান ব্রাহ্মণ ছিলেন না (বা. সা. ই. ১১২, পৃ: ২৩১ ক্র:), কিন্তু মহাভারতকার রামচন্দ্র খান কোন কোন পুঁথির মতে ব্রাহ্মণ ছিলেন। সুতরাং এই দুই রামচন্দ্র খানের অভিন্নতা কোন ক্রমেই প্রমাণ করা যায় না।

### (১০) চিরঞ্জীব সেন

ইনি ত্রিখণ্ডনিবাসী বিখ্যাত পদকর্তা গোবিন্দদাস কবিরাজের পিতা। গোবিন্দদাস তাঁর ‘সঙ্গীতমাধব’ নাটকে নিজের সম্বন্ধে বলেছেন,

স্বধূর্ত্তাস্তীরভূমৌ শরজনিগরে গোড়ভূপাধিপাত্রাদ্  
ব্রহ্মণ্যাদ্ বিষ্ণুভক্তাদপি সুপরিচিতাং ত্রিচিরঞ্জীবসেনাং ।

যঃ ত্রীরামেন্দুনা মা সমজনি পরমঃ ত্রীহুনন্দাভিধায়াং

সোহয়ং ত্রীমাত্রপ্রাথো স হি কবিরূপতিঃ সমাগাসীদভিন্নঃ ॥

এর থেকে জানা যায়, গোবিন্দদাসের পিতা চিরঞ্জীব সেন ‘গোড়ভূপাধিপাত্র’ ছিলেন। এই ‘গোড়ভূপ’ নিশ্চয়ই আলাউদ্দীন হোসেন শাহ। কারণ চিরঞ্জীব সেন চৈতন্যদেবের সমসাময়িক ভক্ত। কবিকর্ণপুরের ‘গৌরগণোদ্দেশদীপিকা’য় (রচনাকাল ১৫২৮ শক বা ১৫৭৬-৭৭ খ্রি:) এবং ‘চৈতন্যচরিতামৃত’ের আদিলীলা ১০ম পরিচ্ছেদে চৈতন্যদেবের পার্শ্বদেবের যে তালিকা দেওয়া আছে, তাতে ত্রিখণ্ডবাসী চিরঞ্জীবের নাম আছে। সুতরাং চিরঞ্জীব হোসেন শাহেরই সমসাময়িক।

### (১১) যশোরাজ খান

সপ্তদশ শতাব্দীতে সঙ্কলিত পীতাম্বর দাসের ‘রসমঞ্জরী’তে যশোরাজ খানের একটি পদ উদ্ধৃত হয়েছে; তার ভণিতা এই,

ত্রীযুত হুন জগতভূষণ সোই ইহ রস জান ।

পঞ্চগৌড়েশ্বর ভোগপুরন্দর ভণে যশোরাজ খান ॥

এই ভণিতায় “পঞ্চগৌড়েশ্বর” “ত্রীযুত হুন”-এর উল্লেখ থেকে বোঝা যায়, যশোরাজ খান হোসেন শাহের সমসাময়িক ছিলেন। তিনি হোসেন শাহের

দরবারে কাজ করতেন বলেও এর থেকে অনুমান হয়। এই অনুমান যে ঠিক, তার প্রমাণ পাওয়া যায় গোপালদাস-রসিকদাসের শাখানির্ণয়ে। তাতে লেখা আছে যশোরাজ “রাজসেবী” ছিলেন।

যশোরাজ খান দামোদর মহাকবি।

কবিরঞ্জন আদি সবে রাজসেবী ॥

সুতরাং যশোরাজ খান যে আলাউদ্দীন হোসেন শাহের কর্মচারী ছিলেন, তাতে কোন সন্দেহ নেই।

### (১২) দামোদর

উপরে উদ্ধৃত পয়ারটিতে “রাজসেবী”দের তালিকায় যশোরাজ খান-এর পরেই দামোদর-এর নাম আছে। দামোদর গোবিন্দদাস কবিরাজের মাতামহ। অতএব যশোরাজ খানের মত তিনিও ষোড়শ শতাব্দীর প্রথম দিকে বর্তমান ছিলেন। সুতরাং তিনি হোসেন শাহেরই সরকারে কাজ করতেন বলে মনে হয়। নরহরি চক্রবর্তীর ‘ভক্তিরত্নাকর’ থেকে জানা যায়, এই দামোদর ‘সঙ্গীত-দামোদর’ নামে একখানি গ্রন্থ লিখেছিলেন। বইটি এখন আর পাওয়া যায় না।

### (১৩) কবিরঞ্জন

পূর্বোক্ত পয়ারে তৃতীয় নাম ‘কবিরঞ্জন’-এর। কবিরঞ্জন শুধুমাত্র রাজসেবী ছিলেন না, একজন বিখ্যাত কবিও ছিলেন। এঁর প্রকৃত নাম দৈবকীনন্দন সিংহ। এঁর তিনটি উপাধি—কবিরঞ্জন, কবিশেখর ও বিদ্যাপতি। এই তিন ভণিতাতেই তিনি পদরচনা করতেন। এঁর লেখা বহু পদ পাওয়া গিয়েছে। ইনি ‘গোপালচরিত মহাকাব্য’, ‘গোপীনাথবিজয় নাটক’, ‘গোপালবিজয় কাব্য’ এবং ‘দণ্ডাঙ্গিকা পদাবলী’ প্রভৃতি গ্রন্থ রচনা করেন। তার মধ্যে মাত্র শেষ দুখানি গ্রন্থ পাওয়া গিয়েছে (এ সম্বন্ধে বিস্তৃত আলোচনার জন্ত ‘প্রাচীন বাংলা সাহিত্যের কালক্রম’, পৃ: ১৭০-১৭৫ দ্রষ্টব্য)। বিভিন্ন পদের নিম্নোক্ত ভণিতাগুলির প্রথম তিনটি থেকে বোঝা যায়, এই “রাজসেবী” কবিরঞ্জন বা কবিশেখর বা বাঙালী বিদ্যাপতি হোসেন শাহ এবং তাঁর পুত্র নাসিরুদ্দীন নসরৎ শাহের সরকারে কাজ করতেন। চতুর্থ ভণিতাটি যদি এই কবিরই হয়, তাহলে বলতে হবে, এই কবি হোসেন শাহের অপর পুত্র গিয়াসুদ্দীন মাহমুদ শাহের

অধীনেও কাজ করতেন (এ সম্বন্ধে গিয়াসুদ্দীন আজম শাহের প্রসঙ্গে বিস্তৃত আলোচনা দ্রষ্টব্য)। ভণিতাগুলি এই,

- (১) শাহ হুসেন অহুমানে যারে হানল মদনবাণে ।  
চিরজীব হ'উ পঞ্চগোড়েশ্বর কবি বিজাপতি ভাণে ॥
- (২) বিজাপতি ভাদি অশেষ অহুমানি  
সুলতান শাহ নসীর মধুপ ভূলে কমলা বাণী ॥
- (৩) কবিশেষের ভণ অপরূপ রূপ দেখি ।  
রাএ নসরং শাহ ভুললি কমলমুখী ॥
- (৪) বেকতেও চোরি গুপ্ত কর কতিখন বিজাপতি কবি ভাণ ।  
মহলম জুগপতি চিরেজীব জীবথু গ্যাসদীন সুরতান ॥

যশোরাজ খান ও দামোদরের সঙ্গে একত্র উল্লেখ থেকে মনে হয়, কবিরঞ্জন এঁদের সমসাময়িক ছিলেন। এর থেকেও তিনি ঐসব সুলতানদের সরকারে কাজ করতেন বলে প্রতীত হয়।

#### (১৪-১৫) হিরণ্যদাস ও গোবর্ধনদাস

এ রা দুই ভাই। ষট্ গোস্বামীর অত্তম রঘুনাথ দাসের এঁরা যথাক্রমে জ্যেষ্ঠতাত ও পিতা। এঁদের নিবাস ছিল সপ্তগ্রামে। এঁদের সম্বন্ধে কৃষ্ণদাস কবিরাজ 'চৈতন্যচরিতামৃত'ের অন্ত্যালীলা ৩য় পরিচ্ছেদে লিখেছেন,

হিরণ্য গোবর্ধন দুই মূলকের মজুমদার ।

এবং অন্ত্যালীলা ৬ষ্ঠ পরিচ্ছেদে লিখেছেন,

হিরণ্যদাস মূলক নিল মোকতা করিয়া ।

বার লক্ষ দেয় রাজার সাথে বিশ লক্ষ ॥

এর থেকে বোঝা যায় যে হিরণ্য মজুমদারের উপর হোসেন শাহ সপ্তগ্রাম মূলকের রাজস্ব আদায়ের ভার অর্পণ করেছিলেন এই সূত্রে যে বিশ লক্ষ টাকা রাজস্ব সংগ্রহ করে হিরণ্য বার লক্ষ টাকা রাজকোষে জমা দেবেন।

#### (১৬) গোপাল চক্রবর্তী

ইনি হোসেন শাহের আরিন্দা অর্থাৎ কর-আদায়কারী ছিলেন। ইনি গোড়ে থাকতেন এবং রাজকোষে বার লক্ষ টাকা জমা দিতেন। 'চৈতন্যচরিতামৃত' অন্ত্যালীলা ৩য় পরিচ্ছেদে কৃষ্ণদাস কবিরাজ এঁর সম্বন্ধে লিখেছেন,

গোপাল চক্রবর্তী নাম একজন ।

মজুমদারের ঘরে সেই আরিন্দা ব্রাহ্মণ ॥

গোড়ে রহে পাতসাহা আগে আরিন্দাগিরি করে ।

বার লক্ষ মূদ্রা সেই পাতসাহারে ভরে ॥

পরম সুন্দর পণ্ডিত নূতন যৌবন ।

ইনি হিরণ্য মজুমদারের ঘরে সমবেত ব্রাহ্মণ ও পণ্ডিতদের সামনে হরিদাসকে বলেছিলেন যে নামাভাসে মুক্তিলাভ করা যায় না এবং এই নিয়ে হরিদাসের সঙ্গে ক্রুদ্ধভাবে তর্কবিতর্ক করেছিলেন । তার ফলে একে দ্বিকৃত হতে হয় । সম্ভবত এই সময় ইনি গোড়েখরের প্রাপ্য বার লক্ষ টাকা নেবার জন্ত সপ্তগ্রামে এসেছিলেন ।

এখানে একটি বিষয় লক্ষ্য করবার আছে । এই গোপাল চক্রবর্তী গোড়ের সুলতানের কর্মচারী হওয়া সত্ত্বেও ব্রাহ্মণ ও পণ্ডিত হিসাবে তাঁর প্রতিষ্ঠা কিছু মাত্র খর্ব হয়নি । অতএব যারা রূপ-সনাতনের দৃষ্টান্ত থেকে বলেন যে রাজ-সরকারে কাজ করলেই সে যুগে উচ্চবর্ণের হিন্দুরা সমাজে পতিত হত, তাঁরা সম্পূর্ণ ভ্রান্ত ।

কারও কারও মতে এই গোপাল চক্রবর্তী গোড়েখরের কর্মচারী নন, হিরণ্য মজুমদারেরই কর্মচারী । কিন্তু কৃষ্ণদাস কবিরাজ স্পষ্ট লিখেছেন যে গোপাল চক্রবর্তী গোড়ে থাকতেন । হিরণ্য মজুমদারের কর্মচারী হলে বার মাস গোড়ে থাকার দরকার হত না । তা ছাড়া যখন গোপাল চক্রবর্তীর সঙ্গে হরিদাসের তর্ক হয়, তখন রঘুনাথদাস বালক । ‘চৈতন্যচরিতামৃত’ অন্ত্যলীলার তৃতীয় পরিচ্ছেদে এই কথা লেখা আছে এবং ঐ পরিচ্ছেদেই এই তর্কের বর্ণনা আছে । ষষ্ঠ পরিচ্ছেদে হিরণ্য মজুমদারের গোড়েখরের রাজস্ব আদায়ের ভার লাভের কথা আছে এবং ঐ সময়ে যে রঘুনাথ যুবক, সে কথাও সেখানে বলা হয়েছে । অতএব গোপাল চক্রবর্তী যখন হরিদাসের সঙ্গে তর্ক করেছিলেন, তখন হিরণ্য মজুমদারের বার লক্ষ টাকা রাজকোষে জমা দেবার কথা উঠতে পারে না । গোপাল চক্রবর্তী পূর্ববর্তী ইজারাদারের কাছ থেকে গোড়েখরের প্রাপ্য বার লক্ষ টাকা নেবার জন্ত এই সময়ে সপ্তগ্রামে এসেছিলেন ।

### (১৭) গৌরাই মল্লিক

‘রাজমালা’তে এর নাম পাওয়া যায় । ১৪৩২ ও ১৪৩৭ শকাব্দের মধ্যে জিপুরার বিরুদ্ধে অন্ততম অভিযানের সময় ইনি হোসেন শাহের সৈন্যবাহিনীর

নেতৃত্ব করেন। এই অভিযান ও তার ফলাফল সম্বন্ধে আগেই আলোচনা করা হয়েছে। সম্ভবত এর প্রকৃত নাম ছিল গৌর মল্লিক। জনাব এ. টি. এম রুহুল আমিনের মতে গৌরাই মল্লিক হিন্দু নন, মুসলমান; তিনি “শাহজাদ খানী বংশীয়” পাঠান দোলাহ-ই-আলম (মাসিক মোহাম্মদী, শ্রাবণ, ১৩৭১, পৃ: ৭১৭ ত্রঃ)। অবশ্য কোন মুসলমানের নাম (ডাক নাম) “গৌরাই মল্লিক” হতে পারে; কিংবদন্তী অনুসারে হোসেন শাহের একজন কাজীর নাম ছিল “গৌরাই কাজী”। ‘রাজমালা’তে গৌরাই মল্লিকের অভিযান বর্ণনার সময় দু'জায়গায় “পাঠান” শব্দটাও ব্যবহৃত হয়েছে (“পাঠান স্ত্রীলোক নহে চারুক লইয়া” এবং “গরু রোষে ভর সোষে পাঠান বন্ধর ॥”); তবে এখানে কাকে “পাঠান” বলা হয়েছে, তা বোঝা যায় না। “গৌরাই মল্লিক”কে হিন্দু বলে মনে করার কারণ “গৌরাই” নামটিই পুঁথিতে স্পষ্টভাবে উল্লিখিত হয়েছে এবং “গৌর” থেকে “গৌরাই” হওয়াই বেশী স্বাভাবিক।

### (১৫) বিজ্ঞাবাচম্পতি

ইনি ছিলেন বাহুদেব সার্বভৌম ভট্টাচার্যের ভাই। গঙ্গার পশ্চিম তীরে কুলিয়ার কাছে ইনি বাস করতেন। সনাতনের ইনি অগ্রতম শিক্ষাগুরু ছিলেন। চৈতন্যদেব যখন নীলাচল থেকে বাংলায় এসেছিলেন, তখন এঁর বাড়ীতে উঠেছিলেন। ‘ভক্তিরত্নাকর’র মতে ইনি মাঝে মাঝে রামকেলি গ্রামে থাকতেন,

শ্রীসনাতনের গুরু বিজ্ঞাবাচম্পতি।

মধ্যে মধ্যে রামকেলি গ্রামে তাঁর স্থিতি ॥

বিজ্ঞাবাচম্পতির পৌত্র রুদ্র ঞ্জাবাচম্পতি তাঁর ‘ভ্রমরদূত’ কাব্যের শেষে এঁর সম্বন্ধে লিখেছেন,

যোহুদ্ গোড়ক্ষিতিপতিশিখারত্বঘুষ্ঠাভিহ্নরেণু-

বিজ্ঞাবাচম্পতিরিতি জগদগীতকীর্তিপ্রপঞ্চঃ।

এই শ্লোকে বলা হয়েছে বিজ্ঞাবাচম্পতির পদরেণু গোড়ক্ষিতিপতির মুকুটমণিকে ঘর্ষণ করত। এই উক্তি থেকে বোঝা যায়, সমসাময়িক গোড়েন্দ্র হোসেন শাহ বিজ্ঞাবাচম্পতিকে খুব সম্মান করতেন। অবশ্য হোসেন শাহ বিজ্ঞাবাচম্পতির চরণে সমুদ্র মাথা ঠেকিয়ে প্রণাম করতেন বলে মনে হয় না। এখানে রুদ্র ঞ্জাবাচম্পতি একটু বেশী রকমের অত্যাক্তি করেছেন। বিজ্ঞাবাচম্পতি কি হোসেন শাহের সভাপণ্ডিত ছিলেন?

### (১৬-১৭) জগাই-মাধাই

এরা নবদ্বীপের অধিবাসী ও ব্রাহ্মণ-সন্তান। এরা ছিল মত্তপ, উচ্ছৃঙ্খল, ও পাপাচারী। চৈতন্যদেব ও নিত্যানন্দের কৃপা পেয়ে এদের চরিত্র সংশোধিত হয় এবং তারা পরে চৈতন্যদেবের পরম ভক্ত হয়ে ওঠে। জগাই ও মাধাইও সম্ভবত কোন রাজপদে অবস্থিত ছিল। কারণ লোচনদাস তাঁর ‘চৈতন্যমঙ্গল’ লিখেছেন যে তারা ছিল নবদ্বীপের “ঠাকুর”,

মহাপাপী ব্রাহ্মণ সে আছে দুই ভাই।

নবদ্বীপের ঠাকুর সে জগাই মাধাই ॥

এই বইয়ে দেখি, চৈতন্যদেবের কৃপা পাবার পর জগাই-মাধাই বলছে,

ধিক্ জাউ আমার নদীয়ার ঠাকুরাল।

গুরুহত্যা ব্রহ্মহত্যায় এ দেহ আমার ॥

‘ঠাকুর’ অর্থে রাজা, ব্রাহ্মণ, পুজ্য, নায়ক, অধিকারী—সব কিছুকেই বোঝাতে পারে। জগাই-মাধাই সম্বন্ধে যে সব তথ্য পাওয়া যায়, তাদের পরিপ্রেক্ষিতে এই সমস্ত অর্থের কোনটিই খুব স্পষ্ট বলে মনে হয় না। \* এই কারণে মনে হয়, এক্ষেত্রে ‘ঠাকুর’ শব্দটি দ্বারা কোটালজাতীয় কোন রাজপদকে বোঝাচ্ছে।

বৃন্দাবনদাস তাঁর ‘চৈতন্যভাগবত’ মধ্যখণ্ডের ১৩শ অধ্যায়ে জগাই-মাধাই সম্বন্ধে লিখেছেন,

ব্রাহ্মণ হইয়া মত্ত গোমাংস ভক্ষণ।

ডাকা চুরি পরগৃহ দাহে সর্বক্ষণ ॥

দেয়ানে না দেয় দেখা বোলায় কোটাল।

মত্ত মাংস বিনা আর নাহি যায় কাল ॥

উপরে উদ্ধৃত অংশের তৃতীয় ছত্রের ‘বোলায়’ ক্রিয়াপদটির দুটি অর্থ করা যায়—(১) ‘পরিত্যজ দেয়’—এই অর্থে ‘বোলায়’ ক্রিয়ার ব্যবহারের অল্প নিদর্শন জগাই-মাধাই সম্বন্ধে চৈতন্যভাগবতের আর একটি উক্তি “পরম মত্তপ পুন বোলায় ব্রাহ্মণ”; (২) ‘ডাকায়’—এই অর্থে ক্রিয়াপদটির ব্যবহারের

---

\*জগাই-মাধাই নবদ্বীপের “রাজা” বা “নায়ক” বা “অধিকারী” ছিল না; তাদের “পুজা” বলেও কেউ মনে করত না। “ব্রাহ্মণ” তারা ছিল, কিন্তু নবদ্বীপে আরও সহস্র সহস্র ব্রাহ্মণ ছিলেন, সুতরাং এই দুইজনকে বিশেষভাবে ‘নবদ্বীপের ব্রাহ্মণ’ বলার কোন কারণ নেই। অতএব নিঃসন্দেহে লোচনদাস এই সব অর্থে ‘ঠাকুর’ শব্দ প্রয়োগ করেন নি।



নিদর্শন শ্রীকৃষ্ণকীর্তনের উক্তি “একৈ একৈ সখিজন সম্মাক বোলাইলো”। প্রথম অর্থ গ্রহণ করলে উদ্ধৃত অংশের তৃতীয় চরণের অর্থ হবে—‘তারা (জগাই-মাধাই) কোটাল বলে (নিজেদের) পরিচয় দিত, কিন্তু দেয়ানে (অর্থাৎ রাজদ্বারে) উপস্থিত থাকত না (কোটালদের যা অবশ্য কর্তব্য)’। দ্বিতীয় অর্থ গ্রহণ করলে চরণটির অর্থ হবে—‘কোটাল ডাকলেও তারা দেয়ানে (অর্থাৎ রাজদ্বারে) দেখা দিত না’। কিন্তু শেষোক্ত অর্থ খুব সম্ভব নয়; কারণ মেয়ূগে কোটালদেব আজ্ঞা লঙ্ঘন করা কারও পক্ষে সহজসাধ্য ছিল বলে মনে হয় না। প্রথম অর্থটিই সূচী, কারণ এই অর্থ গ্রহণ করলে লোচনদাসের পূর্বোক্ত উক্তির সার্থকতা খুঁজে পাওয়া যায়। অতএব জগাই-মাধাই যে নবদ্বীপের কোটাল ছিল, তাতে সন্দেহের অবকাশ নেই। লোচনদাস ‘ঠাকুর’ অর্থে কোটালই বুঝিয়েছেন। জগাই-মাধাই নিজেরা নবদ্বীপের দণ্ডমুণ্ডর কর্তা ছিল বলেই তারা নির্ভয়ে চুনীতি ও যথেষ্টাচারের স্রোতে গা ভাসিয়ে দিতে পেরেছিল। হোসেন শাহের আমলে বাংলা-দেশের সর্বত্র যে আদর্শ শাসনব্যবস্থা চালু ছিল না, তা’ও এর থেকে বোঝা যায়।

উপরে যাদের নাম উল্লিখিত হল, তাঁরা ছাড়াও হোসেন শাহের যে অনেক হিন্দু অমাত্য ও কর্মচারী ছিলেন, তাতে কোন সন্দেহ নেই। হোসেন শাহের যে হিন্দু কাজীও ছিল, তা ‘চৈতন্যভাগবত’ (মধ্যখণ্ড, ২৩শ অধ্যায়, ১০৮ সংখ্যক শ্লোক) থেকে জানা যায়। কৃষ্ণদাস কবিরাজ লিখেছেন যে নীলাচল থেকে গোড়ে আসবার সময়ে চৈতন্যদেব যখন উড়িষ্যা-বাংলা সীমান্ত পার হবার জন্ত অপেক্ষা করেছিলেন, তখন বাংলার “যবন সীমাধিকারী”র কাছ থেকে একজন হিন্দু চর ছদ্মবেশে তাঁর দলে প্রবেশ করে ও খোঁজখবর নিয়ে যায়,

সেইকালে সে যবনের এক অহুচর।

উড়িয়া কটক আইল করি বেশান্তর ॥

প্রভুর সে অদ্ভুত চরিত্র দেখিয়া।

হিন্দু চর কহে সেই যবন পাশ গিয়া ॥ (চৈ. চ.)

‘রাজমালা’ থেকে জানা যায়, হৈতন খাঁর নেতৃত্বে হোসেন শাহের যে সৈন্যবাহিনী প্রেরিত হয়েছিল, তাতে অনেক হিন্দু সৈন্য ছিল এবং তারা গোমতী নদীর তীরে পুষ্পাঞ্জলি দিয়ে পাথরের প্রতিমা পূজা করেছিল।

রজনীকান্ত চক্রবর্তী তাঁর ‘গৌড়ের ইতিহাস’ দ্বিতীয় খণ্ডে লিখেছেন যে, হোসেন শাহের অন্তঃপুরে মালতী নামে একজন ধাত্রী ছিলেন। সম্ভবত এই কথা সত্য, কারণ ঐ সময়ে গৌড়ে যে ঐ নামের একজন মহিলা সত্যই ছিলেন, তার প্রমাণ আছে। আলাউদ্দীন হোসেন শাহের পুত্র গিয়াসুদ্দীন মাহমুদ শাহের রাজত্বকালে নিমিত্ত গৌড়ের একটি মসজিদের শিলালিপি থেকে জানা যায় যে বিবি মালতী নামে জন্মকণা মহিলা ৯৪১ হিজরা বা ১৫৩৪-৩৫ খ্রীষ্টাব্দে ঐ মসজিদটি নির্মাণ করিয়েছিলেন। সম্ভবত এই মহিলা প্রথম জীবনে হিন্দু ছিলেন, পরে মুসলিম ধর্মে দীক্ষিতা হন। ইসলামধর্মে তাঁর আন্তরিক নিষ্ঠার পরিচয় মেলে মসজিদ নির্মাণ করানোর মধ্যে; কিন্তু হিন্দু নামকে তিনি ত্যাগ করেননি। রজনীকান্ত চক্রবর্তীর মতে ধাত্রী মালতীর নাম থেকেই গুয়ামালতী নামক স্থানের নামকরণ হয়েছে। আবিদ আলীর মতে ‘গুয়ামালতী’ ‘বুয়া মালতী’র অপভ্রংশ। ‘বুয়া’ শব্দের মানে ‘দিদি’, প্রাচীন মালদহ শহরের ‘চলীসপাড়া’ অঞ্চলে একটি শিলালিপি পাওয়া যায়, তার থেকে জানা যায় যে, হোসেন শাহের পুত্র নসরৎ শাহের রাজত্বকালে ৯৩৮ হিজরা বা ১৫৩১-৩২ খ্রীষ্টাব্দে ‘বুয়া মালতী’ একটি সিকায়াহ্ বা জলসত্র তৈরী করেছিলেন। ‘বিবি মালতী’ ও ‘বুয়া মালতী’ যে অভিন্ন, তাতে কোন সন্দেহ নেই।

এছাড়া রজনীকান্ত চক্রবর্তী তাঁর ‘গৌড়ের ইতিহাসে’ লিখেছেন যে, পুরন্দর খান নামে এক ব্যক্তি হোসেন শাহের উজীর ছিলেন। রাখালদাস বন্দ্যোপাধ্যায় তাঁর ‘বাঙ্গালার ইতিহাস’ ২য় খণ্ডে এবং ডঃ হবীবুল্লাহ্ History of Bengal, Vol. IIতে এই উক্তির পুনরাবৃত্তি করেছেন, তার ফলে “পুরন্দর খান” এখন ঐতিহাসিক ব্যক্তিতে পরিণত হয়েছেন। কিন্তু কিংবদন্তী ও কুলজীগ্রন্থের বাইরে কোথাও পুরন্দর খানের নাম পাওয়া যায় না! কুলজীগ্রন্থের মতেও পুরন্দর খান হোসেন শাহের নয়, তাঁর পূর্ববর্তী কোন সুলতানের অমাত্য ছিলেন। নগেন্দ্রনাথ বসু লিখেছেন, “পুরন্দর খাঁর অভ্যুদয় সম্বন্ধে সাধারণের বিশ্বাস যে সুলতান হোসেন শাহের সময় তিনি গৌড়েশ্বরের রাজস্বমন্ত্রী ছিলেন। কিন্তু প্রাচীন কুলগ্রন্থ আলোচনা করিলে জানা যায়, সুলতান হোসেন শাহের পূর্বে তিনি কায়স্থ সমাজপতি ছিলেন এবং গৌড়ের দরবারে লেখাপড়ার কর্তা বা সাক্ষিবিশিষ্ট ছিলেন।...গোপীনাথ বসু সুলতানগণের প্রিয়কার্যসাধন করিয়া রাজস্ব বিভাগের শ্রেষ্ঠ মন্ত্রিত্ব লাভ করেন। তিনি পুরন্দর খাঁ উপাধি এবং তাঁহার জ্যেষ্ঠ সহোদর গোবিন্দ বসু ধনাধ্যক্ষ হইয়া গজদ্বর্ক খাঁ উপাধিতে

ভূষিত হন।” সুতরাং পুরন্দর খান বলে হোসেন শাহের কোন মন্ত্রী ছিলেন না।

প্রসঙ্গক্রমে ‘গন্ধর্ব খাঁ’ সম্বন্ধে একটি কথা বলা যেতে পারে। আমরা আগেই বলেছি, কুত্তিবাসের আত্মকাহিনী থেকে জানা যায়, রুকনুদ্দীন বারবক শাহের সভায় ‘গন্ধর্ব রায়’ নামে একজন সভাসদ ছিলেন এবং ইনি কুলজীগ্রন্থে উল্লিখিত গন্ধর্ব খাঁ-র সঙ্গে অভিন্ন হতে পারেন। ডঃ স্কুমার সেন লিখেছেন, “হোসেন-শাহার দরবারে গন্ধর্ব রায় প্রভাবশালী ব্যক্তি ছিলেন” (বা. সা. ই. ১১২, পৃঃ ৫৬৩)। তাঁর মতে এর প্রমাণ—কুতবনের ‘মুগাবতী’তে সুলতান হোসেন শাহের প্রশস্তির একটি চরণ—“রায় জহাঁ লউ গংদ্রয় রহহী” (পাঠান্তর—“রায় জহাঁ লহ গন্ধর্ব অহর্দে”)। কিন্তু এর থেকে হোসেন শাহের সভায় গন্ধর্ব রায়ের অবস্থান প্রমাণিত হয় না। কারণ প্রথমত চরণটির অর্থ “গন্ধর্বেরা যেখানে আছে, ততদূর পর্যন্ত রাজার গতি”—“যেখানে গন্ধর্ব রায় থাকেন” নয়। দ্বিতীয়ত এই হোসেন শাহ বাংলার হোসেন শাহ নন, জৌনপুরের সুলতান হোসেন শাহ শর্কী। এ সম্বন্ধে আমরা পরে আলোচনা করব।

### হোসেন শাহের রাজ্যসীমা

বহুরাজ্যবিজেতা হোসেন শাহ তাঁর রাজ্যের সীমানাকে পূর্ববর্তী সুলতানদের তুলনায় কতখানি প্রসারিত করেছিলেন, তা আলোচনা করলে বিস্মিত হতে হয়।

হোসেন শাহের মুদ্রাগুলি উৎকীর্ণ হয়েছিল হোসেনাবাদ, মুহম্মদাবাদ, মুয়াজ্জমাবাদ, খলিফতাবাদ, চন্দ্রাবাদ ও ফতেহাবাদের টাকশালে। এই স্থানগুলির মধ্যে মুয়াজ্জমাবাদ সোনারগাঁওয়ের অদূরে অবস্থিত। খলিফতাবাদ বাগেরহাটের নামান্তর। হোসেনাবাদ নামে ২৪ পরগণা, মুশিদাবাদ ও মালদহ জেলায় তিনটি স্থান আছে, মালদহ জেলার হোসেনাবাদেই হোসেন শাহের মুদ্রা উৎকীর্ণ হয়েছিল বলে মনে হয়। মুহম্মদাবাদেরও অবস্থান নির্ণয় করা যায় নি। ‘চন্দ্রাবাদ’ সম্ভবত চাঁদপাড়া বা চাঁদপুরের (মুশিদাবাদ জেলা) সঙ্গে অভিন্ন।

আজ পর্যন্ত এই সমস্ত জায়গায় তাঁর শিলালিপি পাওয়া গিয়েছে :—

মালদহ, মান্দারণ (হুগলী), খেরোল (মুশিদাবাদ), আজিমনগর (ঢাকা), মুন্সের, মোরগ্রাম (মুশিদাবাদ), বাবারগ্রাম (মুশিদাবাদ), ইসমাইলপুর (সারণ),

মুচাইন (ঢাকা), ইংরেজবাজার (মালদহ), বনহরী (পাটনা), গোড়, শূভী (মুর্শিদাবাদ), গিলহরী (মুর্শিদাবাদ), হায়দরপুর (মালদহ), সোনারগাঁও (ঢাকা), সিলেট, জিবেগী (হুগলী), চক অমবিয়া (মালদহ), অতিয়া (ময়মনসিংহ), হজরৎ পাণ্ডুরা (মালদহ), মজলকোট (বর্ধমান), দেওকোট (দিনাজপুর), মোলানাতলী (মালদহ), সাগবদীঘি (মুর্শিদাবাদ), বাদশাহী শড়ক (বীরভূম), ধমরাই (ঢাকা), কাটাছয়ার (রংপুর) জাহানাবাদ (রাজসাহী), কুন্তবা (রাজসাহী), ভাগলপুর, বাট (পাটনা), মজিহাটা (পাটনা), ব্যাণ্ডেল (হুগলী), জোয়ার (ময়মনসিংহ), চেরান্দ (সারণ), নবুহন (সাবণ) ।\*

এর থেকে বোঝা যায়, বাংলা দেশের প্রায় সবটা এবং বিহারের এক বৃহৎশ তাঁর রাজ্যের অন্তর্গত ছিল। এছাড়া কামরূপ ও কামতা রাজ্য এবং উড়িষ্যা ও ত্রিপুরা রাজ্যের কিয়দংশ অন্তত সাময়িকভাবে তাঁর রাজ্যের অন্তর্ভুক্ত হয়েছিল।

হোসেন শাহের রাজ্যের উত্তর-পূর্ব সীমা কামরূপ-কামতা রাজ্যের শেষ সীমা পর্যন্ত বিস্তৃত হয়েছিল বলে ধরতে পারি। মোটামুটিভাবে ব্রহ্মপুত্র নদ পর্যন্ত তাঁর রাজ্য ছিল মনে করলে অগ্রায় হবে না।

গঙ্গার উত্তরে হাজীপুর অঞ্চল হোসেন শাহের অধিকারভুক্ত ছিল। কৃষ্ণদাস কবিরাজ 'চৈতন্যচবিতামৃতের' মধ্যলীলা ২০শ পরিচ্ছেদে লিখেছেন যে হাজীপুরে সনাতনের ভগ্নপতি শ্রীকান্ত থাকতেন এবং তিনি বাংলার স্থলতানের জগ্না বোড়া কিনে পাঠাতেন। হোসেন শাহের রাজ্যের উত্তর সীমারেখার সঙ্গে বর্তমান বিহার ও উত্তরপ্রদেশের সীমারেখার খুব তফাৎ ছিল বলে মনে হয় না। কারণ বর্তমান পাটনা ও সারণ জেলার বিভিন্ন অঞ্চলে তাঁর শিলালিপি পাওয়া গিয়েছে। অবশ্য অপেক্ষাকৃত দক্ষিণে এই সীমারেখা বর্তমান বিহার-উত্তর-প্রদেশের সীমারেখার অনেকখানি পূর্বেই অবস্থিত ছিল। কারণ হোসেন শাহ ও সিকন্দর শাহ লোদীর সৈন্যদল পরস্পরের মুখোমুখি হয়েছিল গঙ্গার দক্ষিণ তীরে বিহার-শরীফের ২২ মাইল উত্তর-পূর্বে অবস্থিত বাট নামক জায়গায়। বাটে হোসেন শাহ কর্তৃক নির্মিত একটি জামী মসজিদের শিলালিপি পাওয়া গিয়েছে।

আরও দক্ষিণে হোসেন শাহের রাজ্যসীমা ছিল সম্ভবত খড়্গপুর পর্যন্ত মালদহ।

\* ইংরেজবাজার প্রভৃতি আধুনিক শহরগুলিতে হোসেন শাহ ও অন্যান্য স্থলতানের দে মসজিদ পাওয়া গিয়েছে, সেগুলি অন্ত জায়গা থেকে উঠিয়ে-আনা।

পত্নীগীজ ঐতিহাসিক জোঁয়া-দে-বারোস লিখেছেন যে কোন একটি পর্বতমালা বাংলাকে “Patane” দেশ এবং উড়িষ্যা থেকে পৃথক করে রেখেছিল। তাঁর ভাষায়, “... these mountains separate the Bengalas from the Patane peoples, and lower down towards the south, from the kingdom of Orissa.” এই “these mountains” খজাপুর পর্বতমালা তিন আর কিছু হতে পারে না। জোঁয়া-দে-বারোস তাঁর বইয়ে বাংলার যে মানচিত্র দিয়েছেন, তাতে তিনি বাংলার দক্ষিণ-পশ্চিমে অবস্থিত একটি ভূখণ্ডকে “Patane” (= পাঠান ?) নামে চিহ্নিত করেছেন।

বাংলার দক্ষিণে উড়িষ্যা প্রদেশ। কবিকর্ণপুর ও কৃষ্ণদাস কবিরাজ চৈতন্যদেবের নীলাচল থেকে গোড়ে আগমনের যে বর্ণনা দিয়েছেন, তাঁর থেকে দেখা যায় যে ১৫১৫ খ্রীষ্টাব্দে বেমুন্যার খানিকটা উত্তরে এবং পিছলদার খানিকটা দক্ষিণে অবস্থিত মত্বেশ্বর নদ ছিল দুই রাজ্যের সীমারেখা। কবিকর্ণপুর লিখেছেন যে বাংলার যবন সীমান্তরক্ষী স্বয়ং চৈতন্যদেবকে মত্বেশ্বর নদ পার করিয়ে পিছলদা গ্রাম পর্যন্ত পৌঁছে দিয়েছিল (“অথ স এব জলচরদস্যভয়নিবারণায় স্বয়মগ্রেসরোভূত্বা মত্বেশ্বরমুত্তীৰ্য্য পিচ্ছলদাগ্রাম-পর্যন্তমাগং যবান”—শ্রীচৈতন্যচন্দ্রোদয় নাটক—নবম অঙ্ক)। কৃষ্ণদাস কবিরাজও এই কথা লিখেছেন।

পত্নীগীজ পর্যটক বারবোসার ভ্রমণ-বিবরণী থেকে জানা যায় যে, ১৫১৪ খ্রীষ্টাব্দে “গঙ্গা” নামে একটি নদী ছিল বাংলা ও উড়িষ্যার সীমারেখা। জোঁয়া-দে-বারোসও এই নদীটির কথা বলেছেন। তিনি বাংলাদেশের যে মানচিত্র দিয়েছেন, তাঁর থেকে দেখা যায় যে এই গঙ্গা নদী (R. Ganga) উড়িষ্যা (Reino De Orixá) থেকে এসে পিছলদার (Pisolta) খানিকটা দক্ষিণে ভাগীরথীর (R. Ganges) সঙ্গে মিলিত হয়েছে। জোঁয়া-দে-বারোস লিখেছেন যে হিন্দুরা এই দ্বিতীয় “গঙ্গা” নদীকে মূল গঙ্গা নদীর মতই পবিত্র মনে করতেন এবং এটি “Gate” (ঘাট) পর্বতমালা থেকে বেরিয়ে সাতগাঁওয়ের কাছে ভাগীরথীর সঙ্গে মিলিত হত। এই দ্বিতীয় গঙ্গা নদীকে কেউ বর্তমান কাঁসাই নদীর সঙ্গে, কেউ সুরবরেখার সঙ্গে, কেউ ব্রাহ্মণী ও বৈতরণীর মিলিত প্রবাহ ধামরা নদীর সঙ্গে অভিন্ন বলে মনে করেন। এই সব নদীর গতিপথ যে তখনকার দিনে এখনকার তুলনায় পৃথক ছিল, তা বলাই বাহুল্য। যা হোক, বারবোসার বিবরণ এবং জোঁয়া-দে-বারোসের মানচিত্র ও বিবরণের সঙ্গে

কবিকর্ণপুর ও কৃষ্ণদাস কবিরাজের উক্তি মিলিয়ে দেখে আমাদের মনে হয়, এই তথাকথিত দ্বিতীয় “গঙ্গা” নদী মজুমদার নদের সঙ্গে অভিন্ন।

বর্তমান ২৪ পরগণা জেলার অন্তর্গত ছত্রভোগ\* ১৫১০ খ্রীষ্টাব্দে হোসেন শাহের রাজ্য এবং উড়িষ্যার সীমান্তে অবস্থিত ছিল। চৈতন্যদেব প্রথমবার নীলাচলে যাবার সময় এইখানে সীমান্ত পার হয়েছিলেন, একথা বৃন্দাবনদাস বলেছেন।

বাংলা ও উড়িষ্যার মধ্যে দীর্ঘকালব্যাপী যুদ্ধের ফলে এই দুই রাজ্যের সীমান্থে প্রায়ই পরিবর্তিত হত।

হোসেন শাহের বিভিন্ন শিলালিপিতে তাঁর অধিকারভুক্ত অঞ্চল হিসাবে অসলী, সাজলা মংখাবাদ, থানা লাওবলা, সিমলাবাদ, হোসেনাবাদ ও হাদী-গড়ের উল্লেখ পাওয়া যায়। ব্রহ্মদাস দেখিয়েছেন যে, অসলী সাজলা মংখাবাদ একটি প্রশাসনিক অঞ্চল, সাতগাঁও এই অঞ্চলের অন্তর্ভুক্ত ছিল এবং থানা লাওবলা বর্তমান ২৪ পরগণার জেলার অন্তর্গত ত্রিবেণীর ১০ মাইল পূর্বে অবস্থিত লাওপাল। সিমলাবাদ—বর্তমান বর্ধমান জেলার অন্তর্গত দামোদর তীরবর্তী সেলিমাবাদ। হোসেনাবাদও ২৪ পরগণা জেলার মধ্যেই অবস্থিত। হাদীগড় বর্তমান ২৪ পরগণা জেলার অন্তর্গত ডায়মণ্ডহারবারের দক্ষিণে অবস্থিত হাতিয়াগড়ের সঙ্গে অভিন্ন।

হোসেন শাহের রাজ্যের দক্ষিণ সীমা সম্বন্ধে এ থেকে একটা ধারণা করা যায়।

দক্ষিণবঙ্গেও হোসেন শাহের অধিকার ছিল। খলিফতাবাদ (আধুনিক বাগেরহাট) ও ফতেহাবাদে (আধুনিক ফরিদপুর) হোসেন শাহের টাকশাল ছিল। বর্তমান ফরিদপুর, বাথরগঞ্জ ও নোয়াখালি জেলার অংশবিশেষ নিয়ে গঠিত ‘বাকলা’ অঞ্চল যে হোসেন শাহের রাজ্যের অন্তর্ভুক্ত ছিল, তার প্রমাণ ‘চৈতন্য-চরিতামৃতের’ মধ্যলীলা ২০শ অধ্যায়ে সনাতনের প্রতি হোসেন শাহের উক্তি;

তোমার বড় ভাই করে দস্ত্য-ব্যবহার ॥

জীব বহু মারিয়া বাকলা কৈল খাস।

\* ছত্রভোগ কলকাতার প্রায় ২৫ মাইল দক্ষিণ-পশ্চিমে অবস্থিত। এর পাশ দিয়ে দীর্ঘকালী আদিগঙ্গা প্রবাহিত। ‘চৈতন্যভাগবত’ থেকে জানা যায়, ষোড়শ শতাব্দীতে গঙ্গার প্রধান শ্রোত এখান দিয়েই প্রবাহিত হত। “আদিগঙ্গা” যে সতিহি আদি গঙ্গা, তার প্রমাণ এর থেকে পাওয়া যায়।

সুতরাং দক্ষিণবঙ্গের এক বৃহদংশ হোসেন শাহের রাজ্যের অন্তর্ভুক্ত ছিল সন্দেহ নেই। মোটের উপর বঙ্গোপসাগর থেকে হোসেন শাহের রাজ্যের দক্ষিণ সীমা খুব দূরে ছিল না এবং স্থানে স্থানে বঙ্গোপসাগরকে স্পর্শ করেছিল বলেই আমার বিশ্বাস।

কবীন্দ্র পরমেশ্বর ও শ্রীকর নন্দীর মহাভারত এবং অশ্বাশ্ব সূত্র থেকে জানা যায় যে দক্ষিণ পূর্বে হোসেন শাহের রাজ্য চট্টগ্রাম অঞ্চল পর্যন্ত বিস্তৃত হয়েছিল। শ্রীকর নন্দী লিখেছেন যে চট্টগ্রাম “ফণী (ফেনী) নদীএ বেষ্টিত” এবং তার “পূর্ব-দিকে মহাগিরি”। জোআ-দে-বারোসের মতে “Chatigram river” ছিল বাংলা এবং “lands of Codavascam” এর সীমারেখা। তিনি লিখেছেন, “The Chatigram river rises in the mountains of the kingdoms of Ava and Vagaru, and flowing from the North-East to the South-West divides the kingdom of Bengala from the lands of Codavascam, and along the course of this river lie the kingdoms of Tipora and of Brema Limma which surround Bengala in the East.” এই “Chatigram river” সম্ভবত কর্ণফুলী নদী। “Codavascam” ‘খোদা বখ্শ খান’ নামের বিকৃতি। বারোস যাকে “lands of Codavascam” বলেছেন, তা একটি পার্বত্য অঞ্চল, আরাকান পর্বত এবং মাতামহরি নদী পর্যন্ত প্রসারিত। এই অঞ্চলের অধিকার নিয়ে বাংলার সঙ্গে ত্রিপুরা ও অশ্বাশ্ব প্রতিবেশী রাজ্যের বিবাদ লেগে থাকত। অন্ততপক্ষে নাসিরুদ্দীন নসরৎ শাহ থেকে শুরু করে গিয়াসুদ্দীন মাহমুদ শাহ পর্যন্ত সুলতানদের রাজত্বকালে এই অঞ্চল তাঁদের রাজ্যভুক্ত এবং খোদা বখ্শ খান নামে একজন শাসনকর্তার শাসনাধীন ছিল, একথা পত্নীগীজদের লেখা থেকে জানা যায়। বারোসের মতে এই “Chatigram river” ছিল বাংলা ও ত্রিপুরা রাজ্যেরও সীমারেখা। হোসেন শাহের সৈন্তেরা যে অন্তত দু'বার ত্রিপুরার গোমতী নদীর তীরবর্তী অঞ্চল পর্যন্ত অধিকার করেছিল এবং অন্তত ছয়কড়িয়া অবধি অঞ্চল যে শেষ পর্যন্ত তাঁর রাজ্যের অন্তর্ভুক্ত ছিল, তা ত্রিপুরার ‘রাজমালা’র সাক্ষ্য থেকেই জানা যায়।

### হোসেন শাহের চরিত্র

আলাউদ্দীন হোসেন শাহের সম্বন্ধে যে সমস্ত তথ্য পাওয়া যায়, তা একত্র সংগ্রহের চেষ্টা করলাম। তথ্যের পরিমাণ আশাহুরূপ না হলেও এর থেকেই বোঝা যাবে নৃপতি হিসাবে তিনি কত অসামান্য ছিলেন। সমগ্র বাংলাদেশ, বর্তমান বিহারের প্রায় অর্ধেক, কোচবিহার ও উত্তর আসাম এবং উড়িষ্যা ও ত্রিপুরার কিয়দংশ ধীর রাজ্যের অন্তর্ভুক্ত ছিল, বিভিন্ন দেশের রাজারা ধীর বাহবলের কাছে নতি স্বীকার করেছিলেন এবং সুদীর্ঘ ছাফিশ বছর যিনি ঐ বিশাল ভূখণ্ডে নিরুদ্বিগ্নে অপ্রতিহতভাবে রাজত্ব করেছিলেন, তিনি যে শ্রেষ্ঠ রাজা হিসাবে ইতিহাসে ও জনসাধারণের স্মৃতিতে পুঞ্জিত হবেন, তাতে বিশ্বাসের কিছুই নেই।

যে অবস্থার মধ্যে হোসেন শাহ বাংলার সিংহাসনে আরোহণ করেন, তার কথা মনে রাখলেও তাঁর অসামান্য কৃতিত্বের কথা উপলব্ধ হবে। গোলাম হোসেন লিখেছেন, জলালুদ্দীন ফতেহ শাহের হত্যার পরে বাংলাদেশে যে কেউ রাজাকে হত্যা করত, সে-ই দেশের সর্বত্র সিংহাসনের অধিকাররূপে সম্মানিত হত। ফিরিশ্তা বাক্য করে লিখেছেন, প্রভুহত্যা না করলে কেউ গোড়ের সিংহাসন লাভ করতে পারত না। পর্তুগীজ ঐতিহাসিক ফরিয়া-ই-সুজা লিখেছেন, গোড় দেশে পুত্র পিতৃসিংহাসন অধিকার করে না, সময়ে সময়ে ক্রীতদাসেরা প্রভুহত্যা করে রাজ্যলাভ করে। মোগল সম্রাট বাবর তাঁর আত্মজীবনীতে লিখেছেন, “এই সময়ে সৈয়দ সুলতান আলাউদ্দীনের পুত্র নসরৎ শাহ বাংলা দেশের রাজা, তিনি উত্তরাধিকার সূত্রে বাংলার সিংহাসন লাভ করেছেন। বাংলা রাজ্যে উত্তরাধিকার প্রথায় সিংহাসন লাভ অত্যন্ত বিরল। যে কেউ সিংহাসন অধিকার করতে পারে, সে-ই দেশের সর্বত্র রাজা বলে সম্মানিত হয়। নসরৎ শাহের পিতার রাজ্যলাভের আগে একজন হাবশী রাজাকে হত্যা করে কিছুকাল বাংলা রাজ্য শাসন করেছিল এবং সুলতান আলাউদ্দীন সেই হাবশীকে বধ করে রাজ্যলাভ করেছিলেন।” দেশের যখন এইরকম বিশৃঙ্খল অবস্থা, এবং কোন রাজারই রাজত্ব যখন স্থায়ী হচ্ছিল না, সেই সময়ে হোসেন শাহ আবির্ভূত হয়ে এই বিরাট দেশকে নিজের আয়ত্বে এনে তাতে এমন স্থায়ী শান্তি ও শৃঙ্খলা প্রতিষ্ঠা করেছিলেন, যা তাঁর সুদীর্ঘকালব্যাপী রাজত্বের মধ্যে কোন দিনই বিচলিত হয়নি।

হোসেন শাহ যে অশাসক ছিলেন, তাতে কোন সন্দেহের কারণ নেই। তা



না হলে তাঁর রাজত্ব অতদিন স্থায়ী হত না এবং সমসাময়িক হিন্দু কবিদের রচনায় তাঁর প্রশংসা উল্লেখ থাকত না। 'তবকাৎ-ই-আকবরী', 'তারিখ-ই-ফিরিশ্তা' ও 'রিয়াজ-উল-সলাতীনে' হোসেন শাহের সম্বন্ধে অনেক প্রশংসার কথা লেখা আছে। এইসব বইদের মতে হোসেন শাহ জ্ঞানী ও বুদ্ধিমান লোকদের, প্রধান প্রধান অমাতাদের এবং নিজের অমুগত ব্যক্তিদের উচ্চপদ দান করেন। তিনি রাজ্যের বিভিন্ন জেলায় শাসনবার্ষিক নির্বাহের জন্ত উপযুক্ত রাজকর্মচারী পাঠাতেন। তার ফলে পূর্ববর্তী রাজাদের আমলে যে রাজ্য ধ্বংসোন্মুখ অবস্থায় পৌঁছেছিল, তাতে আবার শান্তি, শৃঙ্খলা ও শ্রী ফিরে এসেছিল এবং অসন্তোষ ও বিদ্রোহের মূল উৎপাটিত হয়েছিল। ফিরিশ্তার মতে হোসেন শাহ তাঁর রাজ্যে কোথাও আঞ্চলিক শাসনকর্তা মাথা তুলছে বা বিদ্রোহীদের সঙ্গে যোগদান কবছে জানতে পারলেই তক্ষণি সৈন্যবাহিনী পাঠিয়ে তাকে বশতা স্বীকার করতে বাধ্য করতেন।

'তবকাৎ-ই-আকবরী'তে লেখা আছে, "দেশকে সমৃদ্ধ করে তোলবার জন্ত, দেশের উন্নতি বিধানের জন্ত তিনি অনেক চেষ্টা ও পরিশ্রম করেন। ... তাঁর প্রশংসনীয় চরিত্র ও মনোরঞ্জক গুণগুলির জন্ত তিনি বহু বছর ধরে রাজার কর্তব্য পালন করতে পেরেছিলেন।" ফিরিশ্তার মতে হোসেন শাহ বাংলাদেশের শহরগুলিকে সমৃদ্ধ করে তোলেন এবং অনেক জায়গায় বিনা পয়সার অন্নসত্র বা লজরখানা স্থাপন করেন।

'রিয়াজ'-এর মতে পূর্ববর্তী রাজাদের রাজত্বকালে যে সমস্ত বিশৃঙ্খলা উপস্থিত হত, হোসেন শাহের স্বব্যবস্থায় সে সমস্ত দূর হয় এবং সকলেই শান্তিতে কালযাপন করে। কারও বিরুদ্ধাচরণের সমস্ত সম্ভাবনাই তিনি দূর করেন। বাহাতি বা গওক নদীর কূলে একটি সুদৃঢ় দুর্গ নির্মাণ করে তিনি রাজ্যের সীমানা সুরক্ষিত করেন। তিনি রাজ্যের বিভিন্ন স্থানে মসজিদ ও সরাইখানা নির্মাণ করেছিলেন এবং আলিম ও দরবেশদের বহু অর্থ দান করেছিলেন। স্টুয়ার্ট তাঁর History of Bengal-এ 'রিয়াজে'র এই সমস্ত কথার প্রতিধ্বনি করেছেন। এই সমস্ত কথা যে অনেকাংশে সত্য, হোসেন শাহের শিলালিপি ও সমসাময়িক সাহিত্য থেকে তার প্রমাণ পাওয়া যায়।

হোসেন শাহের রাজত্বকালে ভারতের ও বারবোলা নামে দু'জন ইউরোপীয় পর্যটক বাংলাদেশে ভ্রমণ করেন। এঁদের লেখা ভ্রমণ-বিবরণী থেকে হোসেন শাহ সম্বন্ধে কিছু কিছু তথ্য পাওয়া যায়।

ভারধেমা লিখেছেন যে বাংলার স্বলতানের সৈন্তবাহিনীতে ২০,০০০ নিয়মিত সৈন্ত ছিল। বারবোসা লিখেছেন যে ইনি একজন খুব বড় এবং অত্যন্ত ধনী রাজা ছিলেন, বিভিন্ন শহরে এর অধীনস্থ শাসনকর্তারা এবং রাজস্ব ও শুল্ক-আদায়কারী কর্মচারীরা থাকত।

হোসেন শাহের রাজত্বকালে তাঁর বা তাঁর অধীনস্থ কর্মচারীদের দ্বারা অনেক সুন্দর সুন্দর মসজিদ, প্রাসাদ, ফটক প্রভৃতি নির্মিত হয়েছিল। তাদের কয়েকটি এখনও বর্তমান আছে। এদের মধ্যে সবচেয়ে উল্লেখযোগ্য গোড়ের দক্ষিণ উপকণ্ঠস্থিত ফিরোজপুরের ছোট্ট সোনা মসজিদ এবং গোড়ের গুম্‌টি ফটক। এদের শিল্পসৌন্দর্য অসাধারণ।

হোসেন শাহ অনেকগুলি রাস্তাও তৈরী করিয়েছিলেন। ফ্রান্সিস বুকানন লিখেছেন, "Hoseyn Shah formed a fine road through the country between the Tanggon and Punabhoba, and it is said to have extended to Ghoraghat." বীরভূমের পূর্বপ্রান্তে "বাদশাহী সড়ক" নামে পরিচিত রাস্তাটিও হোসেন শাহ তৈরী করিয়েছিলেন বলে প্রসিদ্ধি আছে। এই রাস্তার একটি মসজিদে হোসেন শাহের শিলালিপি পাওয়া গিয়েছে। রাস্তাটিতে আগে ক্রোশ-অস্তর দীঘি এবং আজান-অস্তর মসজিদ ছিল, এখন মসজিদ ও দীঘিগুলির অধিকাংশই বিলুপ্ত।

হোসেন শাহের রাজত্বকালে দেশের যে বেবল ভালই হয়েছে তা নয়। ১৫০২ খ্রীষ্টাব্দে যে হোসেন শাহের রাজ্যে দুর্ভিক্ষ হয়েছিল, তার প্রমাণ আছে। ঐ বছরে চৈতন্যদেব নবদ্বীপে সংকীর্তন করছিলেন। 'চৈতন্যভাগবতে'র মধ্যখণ্ড অষ্টম অধ্যায়ে লেগা আছে যে পাষণ্ডীরা তখন এই কথা বলেছিল,

যে না ছিল রাজ্য দেশে আনিঞা কীর্তন।

দুর্ভিক্ষ হইল সব গেল চিরন্তন ॥

দেবে হরিলেক রুটি জানিহ নিশ্চয়।

ধাত্ত মরি গেল কড়ি উৎপন্ন না হয় ॥

প্রাকৃতিক কারণেই এই দুর্ভিক্ষ হয়েছিল। এই জাতীয় দুর্ভিক্ষের সত্ত্ব হোসেন শাহকে প্রত্যক্ষভাবে দায়ী না করা গেলেও পরোক্ষ দায়িত্ব তিনি এড়াতে পারেন না। তিনি সিংহাসনে আরোহণের পর থেকে ক্রমাগত একের পর এক যুদ্ধই করে গিয়েছেন। এইসব যুদ্ধের ব্যয়ভার নিশ্চয়ই বাংলাদেশের

জনসাধারণকে যোগাতে হত। ফলে তাঁর রাজত্বকালে বাঙালী জনসাধারণের আর্থিক স্বচ্ছলতা আগের তুলনায় হ্রাস পেয়েছিল এবং তাদের দুর্ভিক্ষ প্রতিরোধের শক্তি কমে গিয়েছিল, সে বিষয়ে কোন সন্দেহ নেই। অবশ্য হোসেন শাহের রাজত্বকালে বাংলাদেশে জিনিষপত্রের দাম খুব সস্তাই ছিল। কৃষ্ণদাস কবিরাজ 'চৈতন্যচরিতামৃত' মধ্যলীলা ২০শ পরিচ্ছেদে লিখেছেন যে সনাতন গোস্থানী তাঁর ভগ্নীপতি শ্রীকান্তব দেওয়া যে “বহুমূল্য” ভোটকম্বল গায়ে দিয়ে বাসীতে চৈতন্যদেব সঙ্গে দেখা করেছিলেন, তার দাম ছিল তিন টাকা ( “তিন মুদ্রার ভোট গাখ” — “মুদ্রা” মানে এখানে রৌপ্যমুদ্রা, স্বর্ণমুদ্রা নয়; স্বর্ণমুদ্রাকে কৃষ্ণদাস কবিরাজ সবসময় “মোহর” বলেছেন। ) চতুর্দশ শতাব্দীর মাঝামাঝি সময়ে ইউব্ বস্তুতঃ বাংলাদেশে জিনিষপত্রের যে স্থূলভ মূল্য দেখেছিলেন, এ মূল্য তার চেয়েও স্থূলভ বলে মনে হয়। সম্ভবত হোসেন শাহের রাজত্বকালে জনসাধারণের ক্রয়শক্তি হ্রাস পাওয়াতেই জিনিষপত্রের মূল্য কমে গিয়েছিল।

আরও একটি বিষয় লক্ষ্য করতে হবে। হোসেন শাহ বহু যুদ্ধ করেছেন, কিন্তু পরিপূর্ণ জয়লাভ করেছেন মাত্র কয়েকটি যুদ্ধে। যতদিন ধরে তিনি যুদ্ধ করেছেন এবং যত শক্তি ক্ষয় করেছেন, তার তুলনায় তিনি ভিন্ন রাজ্যগুলির যতটা অঞ্চল স্থায়ীভাবে অধিকার করতে পেরেছিলেন, তা খুবই কম বলে মনে হয়। সুতরাং সামরিক ক্ষেত্রে হোসেন শাহ যথেষ্ট দক্ষতা দেখালেও পরিপূর্ণ সাফল্য অর্জন করেছিলেন বলা যায় না।

এই সব দিক দিয়ে বিচার করলে রাজা হিসাবে হোসেন শাহকে বোল আনা কৃতিত্ব দেওয়া যায় না। তবে মোটের উপর তিনি যে একজন অত্যন্ত সূক্ষ্ম শাসক ছিলেন, তা পূর্বোল্লিখিত বিভিন্ন সূত্রের সাক্ষ্য থেকে পরিষ্কারভাবে বোঝা যায়। বহু বছর ধরে বাংলাদেশে যে বিশৃঙ্খল ও অনিশ্চিত অবস্থা বিরাজ করছিল, তাকে অল্প সময়ের মধ্যে দূর করা এবং সুদীর্ঘ ছাব্বিশ বছর ধরে আলাস্তরীয় শৃঙ্খলা বজায় রাখা তাঁর প্রধান কৃতিত্ব। যদিও তিনি তাঁর রাজত্বের বেশীভাগ সময়েই ভিন্ন দেশের সঙ্গে যুদ্ধবিগ্রহে লিপ্ত ছিলেন, তাতে দেশের শান্তি ব্যাহত হ'ল, কারণ এই সব যুদ্ধ রাজ্যজয়ের যুদ্ধ এবং এগুলি অস্থিতি হত দেশের বাইরে। আর একটি বিষয় লক্ষণীয় যে হোসেন শাহ বহুবার নিজেই সৈন্যবাহিনীর নেতৃত্ব করে বিদেশে যুদ্ধ করতে গিয়েছেন, কিন্তু কখনও কেউ রাজ্যে তাঁর অস্থিতির সুযোগ নিয়ে বিদ্রোহ করতে চেষ্টা

করেছিল বলে জানা যায় না। এ ব্যাপার থেকেও হোসেন শাহের কৃতিত্বেরই পরিচয় পাওয়া যায়।

আলাউদ্দীন হোসেন শাহের চরিত্রে মহত্বের অভাব ছিল না। এর দৃষ্টান্ত আমরা দেখি জৌনপুরের রাজ্যচ্যুত সুলতান হোসেন শাহ শকাঁকে আশ্রয়-দানের মধ্যে।

কিন্তু আধুনিক যুগের এক শ্রেণীর সমালোচক ব্যক্তিত্ব, শাসনদক্ষতা, সামরিক দক্ষতা ও মহত্ব ছাড়াও হোসেন শাহের চরিত্রে অল্প সমস্ত গুণ দেখেছেন, যার জন্য তাঁরা হোসেন শাহকে আকবরের সঙ্গে তুলনা করেন। তাঁদের মতে হোসেন শাহ বিজ্ঞা ও সাহিত্যের একজন বড় পৃষ্ঠপোষক ছিলেন এবং তাঁর পৃষ্ঠপোষণের ফলে বাংলা সাহিত্য বিশেষভাবে সমৃদ্ধ হয়ে ওঠে; এই ধারণার বশবর্তী হয়ে এঁরা বাংলা সাহিত্যের ইতিহাসের একটি পর্বকে “হোসেন শাহী আমল” নামে চিহ্নিত করেছেন। তারপর, এইসব সমালোচকেরা বলেন হোসেন শাহের ধর্মমত ছিল উদার, তিনি হিন্দু-মুসলমানে সমদর্শী ছিলেন, হিন্দুদের প্রতি তাঁর উদার ও অপকণাভাৱে আচরণের ফলেই বাংলাদেশে শ্রীচৈতন্যদেব এমন অবাধে ধর্মপ্রচার করতে পেরেছিলেন। এইসব মত কতদূর সত্য, তা আমরা এখন বিচার করব।

### হোসেন শাহ কি বিজ্ঞা ও সাহিত্যের পৃষ্ঠপোষক ছিলেন ?

হোসেন শাহের কয়েকজন অমাত্য—যথা রূপ, সনাতন ও কেশব ছদ্মী স্বকবি ছিলেন। এছাড়া যশোরাজ খান, দামোদর ও কবিরঞ্জন প্রভৃতি কবিরা যে হোসেন শাহের কর্মচারী ছিলেন, তা আমরা আগেই দেখাবার চেষ্টা করেছি। কিন্তু যদিও এই সমস্ত কবিরা হোসেন শাহের কর্মচারী বা অমাত্যের পদে অধিষ্ঠিত ছিলেন, এঁদের সাহিত্যসৃষ্টির মূলে যে হোসেন শাহের পৃষ্ঠপোষণ বা অতুলপ্রেরণা ছিল, এমন কোন প্রমাণ আজ পর্যন্ত পাওয়া যায়নি। বিপ্রদাস পিপিলাই, শঙ্করকিরণ মিশ্র\*, কবীন্দ্র পরমেশ্বর, শ্রীকর নন্দী প্রভৃতি সমসাময়িক

\*শঙ্করকিরণ মিশ্র ১৪১৯ (“নব শশী সুর ইন্দ্র”) শকাব্দ বা ১৪২৭-২৮ খ্রীষ্টাব্দে ‘গৌরীমঙ্গল’ নামে একখানি কাব্য রচনা করেছিলেন। কাব্যটি এখনও প্রকাশিত হয়নি, তবে বিশ্বভারতী-প্রকাশিত ‘পু’ণি-পরিচয়’ তৃতীয় খণ্ডে এর কয়েকটি পুঁথির বিবরণ প্রকাশিত হয়েছে ‘গৌরীমঙ্গল’ সমসাময়িক রাজা হিসাবে হোসেন শাহের নাম এইভাবে পাওয়া যায়,

পৃথিবীর সার রাজ্যে পঞ্চগৌড় নাম ।

নৃপতি হোসেন শাহ কলিযুগে রাম ॥

খাগুএ প্রচণ্ড রাজা প্রতাপে তপন ।

যার ভয়ে কম্পিত সকল নৃপগণ ॥

কবির। তাঁদের কাব্যে হোসেন শাহের নাম করেছেন, কিন্তু হোসেন শাহের কাছে তাঁরা কোন পৃষ্ঠপোষক পেয়েছিলেন বলে জানা যায় না। হোসেন শাহের বিজ্ঞোৎসাহিতা সম্বন্ধেও বিশেষ প্রমাণ পাই না। বিজ্ঞোৎসাহিতার সম্বন্ধে তাঁর শৌত্রের উক্তি “যোহুদ্ গোড়কিতিপতিশিখারত্বঘটাজিহ্নুরেণুবিজ্ঞো-  
বাচম্পতিবিত্তি” ভিন্ন কোন সংস্কৃত-পাণ্ডিতের সঙ্গে হোসেন শাহের যোগাযোগের আর কোন আভাস কোথাও পাই না। বিজ্ঞোৎসাহিতার সম্বন্ধে তাঁর ঠিক কী ধরনের সম্পর্ক ছিল, তা পরিষ্কারভাবে জানা যায় না।

কোন কোন সমসাময়িক মুসলমান পাণ্ডিতের সঙ্গে হোসেন শাহের যোগা-  
যোগের কিছু কিছু দৃষ্টান্ত আমরা বিভিন্ন সূত্রে থেকে পাই। এদের মধ্যে একজনের নাম মুহম্মদ বুদই উফ্ সৈয়দ মীর অলাউদী। ইনি ফার্সী ভাষায় একটি ধনুবিজ্ঞা-বিষয়ক বই লিখেছিলেন; বইটির নাম হিদায়ত-অল-রামী। বইটি সাতাশটি অধ্যায়ে বিভক্ত। লেখক এই বই সুলতান আলাউদ্দীন হোসেন শাহকে উৎসর্গ করেছেন। এই বইয়ের পুঁথি বর্তমানে ব্রিটিশ মিউজিয়মে আছে (Charles Rieu : Catalogue of Persian Manuscripts in the British Museum, Vol. II, p. 489, No. Add. 26, 306 দ্রষ্টব্য)। দ্বিতীয় জনের নাম মুহম্মদ বিন যজ্ঞদান বখ্শ। ইনি খওয়ারজ্মী শিরওয়ানী নামেই বিশেষভাবে পরিচিত। সুলতান আলাউদ্দীন হোসেন শাহের রাজধানী একডালায় বসে ইনি রাজকীয় কোষাগারের জন্ত ১১১ হিজরার ২রা জমাদী অল-আউয়ল, বুধবারে (= ১লা অক্টোবর, ১১০৪ খ্রিষ্টাব্দ) শহীহ্ অল-বুখারী নামে ঐশ্ব্যময় গ্রন্থের তিনটি খণ্ড নকল সম্পূর্ণ করেন। এর পুঁথি বর্তমানে বাকীপুরের ওরিয়েন্টাল পাবলিক লাইব্রেরীতে আছে (Catalogue of Arabic and Persian Manuscripts in the Oriental Public Library at Bankipore, Vol. V, Pt. I., Nos. 130-132)। তৃতীয় খণ্ডের পুঁথির পুস্পিকায় হোসেন শাহের এক দীর্ঘ প্রশস্তি আছে। এই বই আলাউদ্দীন হোসেন শাহই উৎসাহী হয়ে নকল করিয়েছিলেন বলে মনে হয়। কিন্তু এই নকল করানোর মধ্যে তাঁর বিজ্ঞোৎসাহিতার বদলে ধর্মপরায়ণতারই নিদর্শন বেশী মেলে।

সমসাময়িক মুসলমান কবিদের মধ্যে মাত্র একজন তাঁর কাব্যে রাজা হোসেন শাহের নাম করেছেন, কিন্তু তিনি কোন্ হোসেন শাহ সে সম্বন্ধে পাণ্ডিতদের মধ্যে মতভেদ দেখা যায়। এই কবির নাম শেখ সুৎবন।

এর কাব্যের নাম ‘মৃগাবতী’। এটি প্রাচীন অবধী ভাষায় লেখা। কবি নিশ্চয়ই উত্তর ভারতের লোক। অধ্যাপক সৈয়দ হাসান আস্কারি লিখেছেন, “The ‘Pir’ or the ‘Guru’ to whom the poet was so greatly devoted was Makhdum Shaikh Badhan, the greatest of the spiritual disciple and successor of the celebrated saint Md. Isā Taj, Jaunpuri, whose brother Ahmad Isā Taj, lies buried in Bhainsāsūr Muhalla of Bihar Sharif town. He was an inhabitant of the ‘Qasba’ of Ajauli in U. P. where he lies buried.” এই সমস্ত বিষয় থেকে ও ‘মৃগাবতী’ কাব্যের ভাষা থেকে—কুংবন যে বর্তমান উত্তর প্রদেশের অন্তর্গত কোন স্থানের অধিবাসী ছিলেন, তাতে কোন সন্দেহ থাকে না। চতুর্দশ শতাব্দীর শেষ দিক থেকে শুরু করে পঞ্চদশ শতাব্দীর তৃতীয় পাদ পর্যন্ত উত্তর ভারতের এক বৃহৎ জুড়ে যে জৌনপুর সাম্রাজ্য বর্তমান ছিল, কুংবনেব নিবাসভূমি তারই অন্তর্গত ছিল, সে বিষয়ে কোন সন্দেহ নেই। জৌনপুরের শকী রাজবংশের শেষ রাজা হোসেন শাহ শকী ১৭৭২ খ্রীষ্টাব্দে বহুলোল লোদীর সঙ্গে যুদ্ধে সম্পূর্ণ পরাজিত ও রাজ্যচ্যুত হন। এরপর তিনি বিহারে আশ্রয় নেন এবং ১৪২৫ খ্রীষ্টাব্দে আবার একবার সিকন্দর লোদীর সঙ্গে যুদ্ধ করে রাজ্য পুনরুদ্ধারের চেষ্টা করেন। সে চেষ্টাও ব্যর্থ হয় এবং সিকন্দর লোদীর হাত থেকে রক্ষা পাবার জন্য তিনি বাংলার সুলতান আলাউদ্দীন হোসেন শাহের রাজ্যে এসে আশ্রয় লাভ করেন এবং ভাগলপুরের কাছে কহলগাঁও নামক স্থানে তাঁর শেষ জীবন কাটে।

কুংবনের ‘মৃগাবতী’ ১০২ হিজরার মহরম মাসে অর্থাৎ ১৫০৩ খ্রীষ্টাব্দের জুন-জুলাই মাসে সম্পূর্ণ হয়েছিল (ডঃ সুকুমার সেন নানা জায়গায় ভুল করে ১০২ হিজরা = ১৫১২ খ্রীঃ লিখেছেন)। কিছুদিন আগে পর্যন্ত এর একটিমাত্র খণ্ডিত পুঁথির অস্তিত্ব জানা ছিল, সেটির সংক্ষিপ্ত বিবরণ প্রকাশিত হয়েছিল ১৯০০ খ্রীষ্টাব্দে গ্রামস্কন্দর দাস সংকলিত Report of the Search for Hindi Manuscripts-এর ১৭-১৯ পৃষ্ঠায়। কয়েক বছর আগে অধ্যাপক সৈয়দ হাসান আস্কারি ‘মৃগাবতী’র আর একটি খণ্ডিত পুঁথি পান এবং তার কিছুদিন পরে তিনি এর একটি সম্পূর্ণ এবং প্রাচীন পুঁথিও আবিষ্কার করেন; এই সম্পূর্ণ পুঁথিটির বিস্তৃত বিবরণ তিনি প্রকাশ করেন Journal of the Bihar Research Societyর ১৯৫৫ সালের ডিসেম্বর মাসের সংখ্যায় (pp.

454 ff.)। আস্কারি সাহেবের এই বিবরণ থেকে জানা যায় যে 'মৃগাবতী'র এই সম্পূর্ণ পুঁথিটি ফার্সী অক্ষরে লেখা এবং এটি দিল্লীর এক পুরোনো 'খানকা'র সম্পত্তি।

'মৃগাবতী'র গোড়ার দিবকার কয়েকটি শ্লোকে জনৈক রাজা হোসেন শাহের প্রশস্তি আছে। Report of the Search for Hindi Manuscripts-এ প্রশস্তিটির যে পাঠ পাওয়া যায়, তার ভাষা আধুনিক ধরনের এবং সব জায়গার অর্থও বোঝা যায় না। আস্কারি সাহেবের আবিস্কৃত পুঁথিটিতে এর যে পাঠ পাওয়া যায়, তার ভাষা প্রাচীন। আস্কারি সাহেব তাঁর প্রবন্ধে এই পুঁথির থেকে প্রশস্তি-অংশটি সম্পূর্ণভাবে উদ্ধৃত করেছেন (JBRS, Dec. 1955, p. 458 দ্রষ্টব্য)। অবশ্য এই পাঠেও কিছু কিছু লিপিক্রমগ্রহাদ থাকায় কোন কোন অংশের অর্থ স্পষ্টভাবে বোঝা যায় না। বিশ্বভারতী হিন্দীভবনের অধ্যাপক ডঃ শিবনাথ এই দুই পাঠ মিলিয়ে রাজ-প্রশস্তিটির একটি আদর্শ পাঠ প্রস্তুত করেছেন।\* নীচে সেই পাঠটি আনয়ন বাংলা অলুবাদ সমেত দিলাম,

শাহ হোসেন আহ বড় রাজা ।  
 ছাং সিংহাসন ইন্হু য়ে ছাজা ॥  
 পণ্ডিৎ অউ বুধবন্তু দিয়ানা ।  
 পোথা বাঁচ অর্থ সব জানা ॥  
 ধরম ছুদিষ্টল ইন্হু কিন্হু ছাজা ॥  
 হম পর ছাহ জিব (jiw) জগ রাজা ॥  
 দান দৈ য়ী বহুগিনৎ ন আওয়া ।  
 বল অউ করন না সরবর পাওয়া ॥  
 রায় জই। লহ গন্ধর্প অহর্জ ॥  
 সেবা করছি বার সব চহই ॥  
 চতুর স্বজন ভাখা সব জানা ।

এস ন দেখ নু কোয়ী ।

সভা সুনো সব কান দৈ

য়ী কিন্হু দেখা নু সোয়ী ॥

\* সম্প্রতি কুৎসনের 'মৃগাবতী' মুদ্রিত হয়েছে। মুদ্রিত গ্রন্থে রাজপ্রশস্তির যে পাঠ পাওয়া যায়, সেটি আনয়ন এই বইয়ের পরিশিষ্টে উদ্ধৃত করেছি।

[শাহ হুসেন বড় রাজা আছেন, যার ছত্র ও সিংহাসন সুশোভিত, (যিনি) পণ্ডিত, বুদ্ধিমান এবং বিচক্ষণ, বই পড়ে তার সমস্ত অর্থ (যিনি) বোঝেন। একেই ধৰ্মে সুধিষ্ঠির বলা শোভা পায়। সংসারে (এই) রাজা আমার উপরে ছায়ার মত। ইনি বহু দান দেন, (যার) গণনা হয় না, বলি আর কর্ণও (দানে যার) সমকক্ষতা পায় না। গন্ধর্বেরা যেখানে আছে, ততদূর পর্যন্ত রাজার গতি। সবাই (তার) সেবা করে ও দ্বারে (শরণ) চায়। (ইনি) চতুর ও জ্ঞানী, সব ভাষা জানেন, এরকম কাউকে দেখা যায় না। সভাতে সবাই কান দিয়ে শোন, এঁর মত আর (কাউকে) দেখা গেল না।]

এই “বড় রাজা” “শাহ হুসেন” যে বাংলার সুলতান আলাউদ্দীন হোসেন শাহ, সে সম্বন্ধে এতদিন কারও মনে কোন সংশয় ছিল না। কারণ ২০২ হিজরা বা ১৫০৩ খ্রীষ্টাব্দের অল্প কোন রাজা হোসেন শাহের নাম কিছুদিন আগে পর্যন্ত জানা যায় নি। কিন্তু একটা প্রশ্ন ছিল এই যে উত্তর-ভারতের এবং সম্ভবত জৌনপুর অঞ্চলের কবি কুংবন তাঁর অবধী ভাষায় লেখা কাব্যে বাংলার সুলতান হোসেন শাহের প্রশংসা কেন করেছেন। তার একটা আত্মমানিক ব্যাখ্যা কোন কোন পণ্ডিত দিয়েছেন। ডঃ স্কুমার সেনের ভাষাতে ব্যাখ্যাটা এই, “জৌনপুরের শেষ সর্কাবংশীয় সুলতান হোসেন শাহা দিল্লীর বাদশাহা বহলুল লোদী ও সিকন্দর লোদীর কাছে হার মানিয়া প্রথমে বিহারে (১৪৭৮\*) পরে বাঙ্গালায় পলাইয়া আসেন। গোড়-সুলতান হোসেন শাহা তাঁহাকে সাদরে আশ্রয় দেন। সপরিবার ও সপরিজন হোসেন শাহা সর্কা গঙ্গাতীরে কহলগাঁয়ের কাছে বাসস্থান করিয়া শেষ জীবনে এইখানেই কাটাওয়া দেন। সর্কা-সুলতানের সঙ্গে কবি গুণীও কেহ কেহ আসিয়াছিলেন। তাঁহাদের মধ্যে ছিলেন সূফী সাধক কবি কুতবন।” [বা. সা. ই. ১/৩ (পু), পৃ: ২৬]

এতদিন পর্যন্ত ব্যাপারটাকে এইভাবেই দেখা হয়েছে, কুংবন-উল্লিখিত “শাহ হুসেন” যে বাংলার সুলতান হোসেন শাহই, সেসম্বন্ধেও কেউ ভিন্ন মত প্রকাশ করেননি। কিন্তু সম্প্রতি সৈয়দ হাসান আস্কারি এই মত প্রকাশ করেছেন যে এই “শাহ হুসেন” জৌনপুরের রাজাচ্যুত সুলতান হোসেন শাহ

\* এখানে ভুলবশত “১৪৭২”র জায়গায় ডঃ সেন “১৪৭৮” লিখেছেন।



শর্কী ( JBRS, 1955 p. 457 )।\* পরবর্তীকালের কোন কোন ইতিহাস-গ্রন্থে লেখা আছে যে হোসেন শাহ শর্কী ৯০৬ হিজরা বা ১৫০০-০১ খ্রীষ্টাব্দে পরলোকগমন করেছিলেন, Cambridge History of India, Vol. III তে তাঁর মৃত্যুর এই তারিখই দেওয়া হয়েছে। কিন্তু হোসেন শাহ শর্কীর কতকগুলি মুদ্রা আবিষ্কৃত হয়েছে, যেগুলি ৯১০ হিজরা বা ১৫০৪-০৫ খ্রীষ্টাব্দে উৎকীর্ণ হয়েছিল। আস্কারি সাহেব লিখেছেন “He ( Husain Shah Sharqi ) lived at least till 910 at Kahalgaon as refugee, for the last of the coins bearing his name, but not that of the mint town, is of that date.” অবশ্য এর অনেক আগে নেলসন রাইট-ও হোসেন শাহ শর্কীর ৯১০ হিজরার মুদ্রার কথা বলেছিলেন ( Catalogue of the Coins in the Indian Museum, Vol. II, p. 207 ), তা তখন কারও দৃষ্টি আকর্ষণ করে নি।

জৌনপুরের রাজ্যচ্যুত সুলতান হোসেন শাহ শর্কী যখন ৯০৪ হিজরায়ও বেঁচে ছিলেন বলে জানা যাচ্ছে, তখন ৯০৩ হিজরায় লেখা ‘মুগাবতী’তে কুৎবন কোন্ হোসেন শাহের নাম করেছেন—জৌনপুরের না বাংলার? এ ক্ষেত্রে জৌনপুরের হোসেন শাহেরই দাবী যে বেশী, তাতে কোন সন্দেহ নেই। কারণ কুৎবনের দেশ জৌনপুর অঞ্চলে এবং তিনি জৌনপুরের সুলতান হোসেন শাহের সহচর হয়ে বাংলা দেশে এসেছিলেন বলে আগেই অনুমান করা হয়েছিল। আস্কারি সাহেব মনে করেন যে কুৎবন নিজের দেশে বসেই কাব্য রচনা করেছিলেন এবং ঐ অঞ্চলে তখন হোসেন শাহ শর্কীর আধিপত্য না থাকলেও তিনি হোসেন শাহ শর্কীকেই আসল রাজা ধরে নিয়ে তাঁর প্রশংসা করেছেন। কিন্তু এই অনুমান সমর্থন করা যায় না। ১৫০৩ খ্রীষ্টাব্দে জৌনপুর অঞ্চল দিল্লীর লোদী সম্রাটদের অধীন ছিল। কুৎবন নিজের দেশে বসে কাব্য লেখবার সময় তাঁদের নাম না করে প্রায় ২৪ বছর আগে যিনি রাজ্যচ্যুত হয়েছেন, তাঁকেই আসল রাজা বলে ধরে নিয়ে তাঁর প্রশংসা করেছেন, এরকম কল্পনা করা যায় না। কিন্তু এরকম হওয়া মোটেই অসম্ভব নয় যে হোসেন শাহ শর্কী যে কজন বিখ্যাত অমুচরকে সঙ্গে নিয়ে জৌনপুর থেকে

\* কেউ কেউ মনে করেন, এই “শাহ হোসেন” শের খানের পিতা হাসান খান নুর। কিন্তু এই মত সত্য হতে পারে না; কারণ প্রথমত, ‘হাসান’ এবং ‘হোসেন’ বা ‘হোসেন’ ভিন্ন নাম। দ্বিতীয়ত, হাসান খান নুর কোনদিনই বাধীন মৃগশি ছিলেন না।

বাংলায় এসেছিলেন এবং যাদের দ্বারা পরিবৃত্ত হয়ে তিনি প্রজাহীন অবস্থায় “রাজত্ব” করছিলেন ও মৃত্যু প্রকাশ করেছিলেন (টাকশালের নাম দিতে পারেন নি, কারণ জায়গাটা বাংলার স্বলতানের অধীন; এরকম রাজাহীন রাজ্যের ভিন্ন দেশে বসে “রাজত্ব” করার দৃষ্টান্ত আধুনিক যুগেও দেখা যায়), শেষ কুৎবন তাঁদের অন্ততম। তাই কুৎবন ‘মুগাবতী’তে তাঁর প্রশস্তি করেছেন।

কুৎবন যে “শাহ হুসেন” এর প্রশস্তি কবছেন, তিনি যে জৌনপুরের হোসেন শাহ শকী, তাব প্রমাণ প্রশস্তিটির মধ্যেই রয়েছে। প্রশস্তিটির একটি চরণ—“রায় জই লছ গন্ধর্প অহর্জ” (গন্ধর্বেরা যেখানে আছে, ততদূর পযন্ত রাজার গতি)। গন্ধর্বেরা শ্রেষ্ঠ সঙ্গীতজ্ঞ হিসাবেই পুরাণে প্রসিদ্ধ। অতএব গন্ধর্বদের অধিষ্ঠানক্ষেত্র পর্যন্ত “শাহ হুসেন”—এর গতি, এই কথায় অর্থ—“শাহ হুসেন” একজন শ্রেষ্ঠ সঙ্গীতজ্ঞ ছিলেন। জৌনপুরের হোসেন শাহ শকী ভারতের অমর সঙ্গীতজ্ঞদের মধ্যে অন্ততম; তিনি খেয়াল সঙ্গীতের স্রীবৃদ্ধি করে তাকে জনপ্রিয় করেন এবং বহু নতুন রাগ রাগিণী প্রবর্তন করেন; শুধু তাই নয়, হোসেন শাহ শকী উপাধিই ছিল “গন্ধর্ব”। যারা অতীত ও সমকালীন সঙ্গীতের ব্যবহারিক দিকে বিশেষরূপে পারদর্শী হতেন, তাঁরাই “গন্ধর্ব” উপাধি লাভ করতেন (ডঃ আবদুল হালীম রচিত ‘ইন্দো-পাক সঙ্গীতের ইতিহাস’ থেকে এই সমস্ত তথ্য জানা যায়)। অতএব কুৎবন-উল্লিখিত “শাহ হুসেন” যে জৌনপুরের হোসেন শাহই, তাতে কোন সন্দেহ নেই।

আলাউদ্দীন হোসেন শাহ যে বিজ্ঞা ও সাহিত্যের পৃষ্ঠপোষক ছিলেন, সে সম্বন্ধে আমরা কোন সূত্র থেকেই স্থনির্দিষ্ট প্রমাণ পেলাম না। কয়েকজন সমসাময়িক কবি ও গ্রন্থকার তাঁর নাম করেছেন, একজন তাঁর নামে বই উৎসর্গও করেছেন। তাঁর সভাসদ ও কর্মচারীদের মধ্যে বেউ বেউ পণ্ডিত বা কবি হিসাবে প্রতিষ্ঠা অর্জন করেছিলেন। \* তাঁর অমাত্য ও মেননাগবদের মধ্যে পরাগীল খান ও ছুটি খান বাংলা সাহিত্যের পৃষ্ঠপোষক ছিলেন এবং সনাতন পণ্ডিতদের পৃষ্ঠপোষক করতেন। এই সমস্ত বিষয় থেকে এবং ভুলবশত হোসেন শাহকে

\* ইংরেজ শাসনকালে বকিমচন্দ্র, রমেশচন্দ্র, অন্নদাচন্দ্র রায়, অচিন্ত্যকাম সেনগুপ্ত, নবনাগীরা দাস, দেবেন্দ্রনাথ ঠাকুর প্রভৃতি বাঙালী সাহিত্যিকেরা সরকারী কর্মচারী ছিলেন—এর থেকে প্রমাণ হয় না যে ইংরেজ সরকার বাংলা সাহিত্যের পৃষ্ঠপোষক ছিলেন। তেমনি হোসেন শাহের কর্মচারী লজ্জানন্দ পণ্ডিত বা কবি ছিলেন বলেই প্রমাণ হয় না যে হোসেন শাহ বিজ্ঞা ও সাহিত্যের পৃষ্ঠপোষক ছিলেন।

মাল্যবর বহু পৃষ্ঠপোষক হিসাবে ধরে নিয়ে সকলে ভেবেছিলেন যে, হোসেন শাহ পণ্ডিত ও সাহিত্যিকদের পৃষ্ঠপোষক করতেন। আর একটি বিষয় দেখতে হবে। বাল্লবক শাহের কাছ থেকে যেমন বহু ব্যক্তি পাণ্ডিত্য বা অল্প কোন কারণের জন্য সম্মানসূচক উপাধি পেয়েছিলেন, হোসেন শাহের কাছে সেরকম উপাধি কেউ পেয়েছিলেন বলে জানা যায় না। এর থেকেও হোসেন শাহ বিজ্ঞা ও সাহিত্যের পৃষ্ঠপোষক ছিলেন—এরকম ধারণা সমর্থিত হয় না। অবশ্য আমরা জোর করে একথা বলতে পারি না যে হোসেন শাহ বিজ্ঞা ও সাহিত্যের কোন পৃষ্ঠপোষকতাই করেন নি। বরং থাকতে পারেন, কিন্তু সে সম্বন্ধে সুনির্দিষ্ট তথ্য-প্রমাণ কিছু পাওয়া যায় না। বরং বিরুদ্ধে প্রমাণ পাওয়া যায়। ‘চৈতন্যভাগবত’ (সিদ্ধান্তসবজ্ঞতী সম্পাদিত) মধ্যখণ্ডের সপ্তদশ অধ্যায়ে হোসেন শাহ সম্বন্ধে লেখা আছে, “না করে পাণ্ডিত্য-চর্চা রাজা সে যখন।”

বাংলা সাহিত্যের ইতিহাসের একটি পর্বকে ‘হোসেন শাহী আমল’ নামে চিহ্নিত করারও কোন সার্থকতা নেই। কারণ হোসেন শাহের রাজত্বকালে মাত্র দু’খানি উল্লেখযোগ্য বাংলা গ্রন্থ রচিত হয়েছিল—বিপ্রদাসের মনসামঙ্গল ও কবীন্দ্র পরমেশ্বরের মহাভাবত। অনেকের মতে বিজয়গুপ্তের মনসামঙ্গল এবং শ্রীকর নন্দীর মহাভারতও হোসেন শাহের রাজত্বকালে রচিত হয়েছিল, কিন্তু এ ধারণা সম্পূর্ণ সত্য নয়। বিজয়গুপ্তের মনসামঙ্গল তাঁর রাজত্বকালের আগে রচিত হয়েছিল। শ্রীকর নন্দীর মহাভারত হোসেন শাহের রাজত্বকালের পরে রচিত হওয়া অসম্ভব নয়। যা হোক, এই সমস্ত গ্রন্থ রচনার মূলে যেমন হোসেন শাহের প্রত্যক্ষ প্রভাব কার্যকরী ছিল না, তেমনি এই সব গ্রন্থ রচনার মধ্য দিয়ে যে বাংলা সাহিত্যের স্বর্ণযুগ সৃষ্টি হয়েছিল, এমন কথাও বলা চলে না। হোসেন শাহের আমলেই বাংলার পদাবলী-সাহিত্যের চরম উন্নতি ঘটে বলে কেউ কেউ মন্তব্য করেছেন। কিন্তু পদাবলী-সাহিত্যের চরম উন্নতি ঘটে হোসেন শাহের রাজত্ব অবসানের কয়েক দশক পরে, যখন জ্ঞানদাস, গোবিন্দ-দাস প্রভৃতি কবিরা পদ রচনা শুরু করেন। পদাবলী-সাহিত্য তথা বৈষ্ণব সাহিত্যের চরম সমৃদ্ধির মূলে যার প্রভাব সবচেয়ে বেশী সক্রিয়, তিনি চৈতন্যদেব, হোসেন শাহ নন। এই কারণে বাংলা সাহিত্যের ইতিহাসের একটি অধ্যায়ের সঙ্গে বিশেষভাবে হোসেন শাহের নাম যুক্ত করে রাখার কোন ঐতিহাসিক কারণ আছে বলে মনে হয় না।

## হোসেন শাহের ধর্ম-সম্বন্ধীয় নীতি

আধুনিক ঐতিহাসিকদের মধ্যে অনেকই মনে করেন, হোসেন শাহের ধর্ম সম্বন্ধে কোন গোঁড়ামি ছিল না। এং তিনি হিন্দু-মুসলমানে সমদর্শী ছিলেন। প্রধানত দুটি বিষয়ের উপর এঁদের এই ধারণা নির্ভর করছে। প্রথম—হোসেন শাহের রাজত্বকালেই চৈতন্যদেবের পূর্ণ অভ্যুদয় ঘটেছিল; হোসেন শাহ একবার চৈতন্যদেবের মহিমা স্বীকার করেছিলেন এবং তাঁর নিরাপত্তা রক্ষার আশ্বাস দিয়েছিলেন; এর থেকে মনে হয় ধর্মবিষয়ে তিনি উদার ছিলেন। দ্বিতীয়—হোসেন শাহ রাজ্যের গুরুত্বপূর্ণ পদে হিন্দুদের নিয়োগ করেছিলেন, এঁদের মধ্যে সনাতন ছিলেন হোসেন শাহের ডান হাত; এ ব্যাপার কি হোসেন শাহের হিন্দুদের প্রতি উদার মনোভাবের পরিচায়ক নয়?

প্রথম বিষয়টি সম্বন্ধে বলা যায়, হোসেন শাহের রাজত্বকালে চৈতন্যদেবের অভ্যুদয় ঘটেছিল বটে, কিন্তু এজ্ঞ চৈতন্যদেবকে নানারকম বাধাবিল্লের সম্মুখীন হতে হয়েছিল। এ সম্বন্ধে পরে আলোচনা করছি। এ ব্যাপারও বিশেষভাবে লক্ষণীয় যে, সন্ন্যাসগ্রহণ করার পরে চৈতন্যদেব আর হোসেন শাহের রাজ্যে থাকেন নি, হিন্দু রাজ্যের দেশ উড়িষ্যায় চলে গিয়েছিলেন। মুসলিম-শাসিত বাংলা দেশে থাকলে তাঁর ধর্মচর্চার বিঘ্ন হতে পারে, এরকম আশঙ্কার বশবর্তী হয়েই তিনি বোধ হয় উড়িষ্যায় গিয়েছিলেন। হোসেন শাহ কর্তৃক চৈতন্যদেবের মাহাত্ম্য স্বীকার ও নিরাপত্তার আশ্বাসদান যে একটি বিচ্ছিন্ন আকস্মিক ঘটনা, সে কথা চৈতন্যদেবের চরিতকাররাই বলেছেন। বৃন্দাবনদাস বলেছেন সে সময়ে হোসেন শাহের “দৈবে আসি সবুগুণ উপজিল মনে।” হোসেন শাহের হিন্দু কর্মচারীরাও এর উপর ভরসা রাখতে পারেন নি।

দ্বিতীয় বিষয়টি সম্বন্ধে বলা চলে, সব সময়ে সমস্ত কাজের জন্ত যোগ্য মুসলমান কর্মচারী পাওয়া যেত না বলে হিন্দুদের গুরুত্বপূর্ণ পদে নিয়োগের প্রথা বাংলা দেশে অনেকদিন আগে থেকেই চলে আসছিল—রুকনুদ্দীন বারবক শাহের আমলেও বহু হিন্দু উচ্চ রাজপদে প্রতিষ্ঠিত ছিলেন। সুতরাং হোসেন শাহ এ ব্যাপারে পূর্ববর্তী সুলতানদের প্রথা অনুসরণ করেছিলেন। সনাতনও সম্ভবত তাঁর পূর্ববর্তী সুলতান সৈফুদ্দীন ফিরোজ শাহের রাজত্বকালেই প্রথম নিযুক্ত হয়েছিলেন। আসল কথা, সনাতন, রূপ এবং অগ্ন্যস্ত্র হিন্দু অমাত্য ও কর্মচারীদের অভুলনীয় কর্মদক্ষতার জন্তই হোসেন শাহ তাঁদের উচ্চপদে বহাল রেখেছিলেন। এতে রাজ্য হিসাবে তাঁর বিচক্ষণতা ও

দুর্দশিতারই প্রমাণ পাওয়া যায়, হিন্দুদের প্রতি উদার মনোভাবের প্রমাণ মেলে না।

যাহোক, বিশ্বাসযোগ্য সূত্রগুলি বিশ্লেষণ করে দেখা যাক, ধর্ম সম্বন্ধে হোসেন শাহ কোন দৃষ্টিভঙ্গী পোষণ করতেন। তাঁর দেহত্যাগের ৭১ বছর পরে রচিত 'তবকাৎ-ই-আকবরী'তে তাঁর সম্বন্ধে লেখা আছে, "তিনি শেখ নূর কুৎব আলমের সমাধিসংলগ্ন দানসত্রগুলির খরচ চালাবার জন্ত অনেকগুলি গ্রাম দান করেছিলেন। প্রতি বছর তিনি তাঁর রাজধানী একডালা থেকে পাণ্ডুয়া আসতেন, শেখ নূরের সমাধি প্রদক্ষিণ করার জন্ত।" 'তারিখ-ই-ফরিশ্তা', 'মাসির-ই-রহিমী' এবং 'রিয়াজ-উস-সলাতীন'-এও এই কথাগুলি লেখা আছে। 'মাসির'-এর মতে তিনি একডালা থেকে পাণ্ডুয়া আসার পথে সরাইখানা স্থাপন করেছিলেন, সেগুলি ব্যবহার করতে পয়সা লাগত না। 'রিয়াজ'-এর মতে তিনি প্রতি বছর পায়ে হেঁটে একডালা থেকে পাণ্ডুয়া নূর কুৎব আলমের সমাধিভূমিতে আসতেন। সুতরাং হোসেন শাহ সত্যিকারের নিষ্ঠাবান মুসলমান ছিলেন বলেই সিদ্ধান্ত করা যেতে পারে।

তাঁর শিলালিপিগুলির সাক্ষ্য থেকে এই সিদ্ধান্ত দৃঢ়ভিত্তিতে প্রতিষ্ঠিত হয়। এ পর্যন্ত তাঁর রাজত্বকালে উৎকীর্ণ ৫৮টি শিলালিপি পাওয়া গিয়েছে, তার মধ্যে মাত্র কয়েকটি ব্যতীত আর সবগুলিতেই তাঁর নাম আছে। বাংলার আর কোন সুলতানের এর অধিক সংখ্যক শিলালিপিও মেলে না। এর অর্থ এই যে অল্প সুলতানদের রাজত্বের তুলনায় হোসেন শাহের রাজত্বকালে অনেক বেশী নতুন মসজিদ তৈরী হয়েছিল; কারণ মুসলিম আমলের বেশীর ভাগ শিলালিপিই মসজিদের গাছে উৎকীর্ণ। হোসেন শাহের রাজত্বকালে রাজ্যের বিভিন্ন জায়গায় অসংখ্য নতুন মসজিদ নির্মিত হয়েছিল, তার মধ্যে ৩১টিতে শিলালিপি পাওয়া গিয়েছে। স্বয়ং সুলতান হোসেন শাহের নির্দেশে সূতী ( মুশিদাবাদ ), হজরৎ পাণ্ডুয়ার ছোটী দরগা, মৌলানাতলী ( মালদহ ), প্রভৃতি জায়গায় মসজিদ এবং মচাইন ( ঢাকা ), বনহরা ( পাটনা ), শাহ গদার দরগা ( মালদহ ), ধরমাই ( ঢাকা ), বাঢ় ( পাটনা ) ও আরও দু'তিন জায়গায় জামী মসজিদ নির্মিত হয়েছিল। তিনি গোড়ে মখদুম শেখ আখী সিরাজুদ্দীনের সমাধিগৃহে ছুটি দরজা এবং একটি সিকায়াহ বা জলসত্র তৈরী করিয়ে দিয়েছিলেন। ৯০৭ হিজরায় "ধর্মবিজ্ঞান শিক্ষা এবং কেবলমাত্র যেসব আদেশ সত্য, সেগুলি সম্বন্ধে নির্দেশ" দেবার জন্ত তিনি একটি মাদ্রাসা নির্মাণ

করিয়েছিলেন। গোড়ের 'কদম্ রশূল' ভবনের ( যেটি তাঁর পুত্র নসরৎ শাহ নির্মাণ করিয়েছিলেন বলে তুলবশত মনে করা হয় ) একটি তোরণ তিনি তৈরী করিয়েছিলেন, এবং বর্ধমান জেলার মঙ্গলকোট মোলানা হামিদ দানিশমন্দের সমাধির পাশে তিনি একটি জলাশয় খনন করিয়ে দিয়েছিলেন। 'কদম্ রশূল' ভবনের শিলালিপিতে হুলতান হোসেন শাহকে "ইসলাম ও মুসলমানদের রক্ষক" বলা হয়েছে, কাঁটাতারের শিলালিপিতে তাঁকে বলা হয়েছে "মুসলিম পুরুষ ও স্ত্রীলোকদের প্রতি দয়াশীল" এবং জাহানাবাদের শিলালিপিতে তাঁর সম্বন্ধে লেখা হয়েছে, "যাঁর উত্তোগে ইসলাম বর্ধিত হচ্ছে।" সুতরাং হোসেন শাহ যে সত্যকার ধর্মপ্রাণ মুসলমান ছিলেন, তাতে কোন সন্দেহ নেই। সৈয়দ বংশের সম্ভানের পক্ষে তা'ই হওয়া স্বাভাবিক।

এখন দেখা যাক, হিন্দুদের প্রতি হোসেন শাহ উদার নীতি অবলম্বন করেছিলেন, এই ধারণা কতদূর সত্য? চৈতন্যচরিতগ্রন্থগুলি থেকে কিছু এসম্বন্ধে প্রতিকূল প্রমাণ পাওয়া যায়। ১৫১৪-১৫ খ্রীষ্টাব্দে যখন চৈতন্যদেব সদলবলে রামকেলি গ্রামে গিয়েছিলেন, সেই সময় সকলে মিলে যে হরিশ্চন্দ্র নি করেছিলেন, তার বর্ণনা দিতে গিয়ে বৃন্দাবনদাস লিখেছেন,

নিকটে যবন রাজ। পরম দুর্ব্বার।

তথাপিহ চিন্তে ভয় না জন্মে কাহার ॥

এর কয়েক বছর আগে চৈতন্যদেব যখন সন্ন্যাস গ্রহণের পূর্বে নবদ্বীপে শ্রীবাসের ঘরে হরিসংকীর্তন করছিলেন, সেই সময় নবদ্বীপে গুজব রটেছিল যে রাজার আদেশে কীর্তনীয়াদের ধরে নিয়ে যাবার জন্ত দু'টি নৌকা আসছে। 'চৈতন্য-ভাগবত' মধ্যখণ্ডের দ্বিতীয় অধ্যায়ে বৃন্দাবনদাস লিখেছেন,

কেহো বোলে আরে ভাই। পাড়িল প্রমাদ।

শ্রীবাসের বাদে হৈল দেশের উৎপাদ ॥

আজি মুক্তি দেয়ানে শুনিলু সব কথা।

রাজার আজ্ঞায় দুই নাও আইসে এথা ॥

শুনিলে নদীয়ার কীর্তন বিশেষ।

ধরিয়া নিবারে হৈল রাজার আদেশ ॥

এই মত কথা হৈল নগরে নগরে।

রাজ-নৌকা আইসে বৈষ্ণব ধরিবারে ॥

শ্রীবাস পণ্ডিত বড় পরম উদার ।  
যেই কথা শুনে তাই প্রতীত তাঁহার ॥  
যবনের রাজ দেখি মনে হৈল ভয় ।

‘চৈতন্যভাগবত’ মধ্যখণ্ডের সপ্তদশ অধ্যায়ে লেখা আছে স্বয়ং চৈতন্যদেবকে নবদ্বীপের “পাষণ্ডী”রা রাজার রোষের কথা বলে ভয় দেখাবার চেষ্টা করেছিল,

পাষণ্ডি-সকল বোলে নিম্নাঞ্চে পণ্ডিত ।  
তোমারে রাজার আজ্ঞা আইসে হরিত ॥

প্রভু বলে অস্ত অস্ত এ সব বচন ।  
মোর ইচ্ছা আছে করোঁ রাজ-দরশন ॥

পাষণ্ডী বলয়ে রাজা চাহিব কীর্তন !  
না করে পাণ্ডিত্য-চর্চা রাজা সে যবন ॥

এই সমস্ত প্রবাদ রটা এবং পাষণ্ডীদের এই জাতীয় উক্তি করা থেকে মনে হয় হোসেন শাহ হিন্দু ধর্মের প্রতি বিশেষ প্রসন্ন ছিলেন না। হয়তো এসম্বন্ধে নবদ্বীপবাসীদের অপ্রীতিকর পূর্ব-অভিজ্ঞতা ছিল, তাই তাঁদের মধ্যে এই জাতীয় কথা রটত। নবদ্বীপের হিন্দুরা যে হোসেন শাহকে সবিশেষ ভয়ের চোখে দেখতেন, তা’ও এই সব বিবরণ থেকে বেশ বোঝা যায়।

এসম্বন্ধে সমসাময়িক পত্নীগীজ পর্যটক বারবোসার সাক্ষ্য বিশেষ গুরুত্বপূর্ণ। তিনি লিখেছেন যে বাংলার রাজার অধীনে “পৌত্তলিক ( হিন্দু ) অধ্যুষিত এক বিরাট অঞ্চল ছিল, তাদের ( হিন্দুদের ) মধ্যে প্রত্যেক দিন বহু লোক রাজা এবং শাসনকর্তাদের আনুকূল্য অর্জনের জগ্ন মূর (মুসলমান) হয়ে যেত।” স্মরণ্য হোসেন শাহ যে গোঁড়া মুসলমান ছিলেন না এবং তিনি হিন্দু-মুসলমানে সমদর্শী ছিলেন—একথা বলবার আর কোন উপায় নেই।

হোসেন শাহ যে উড়িষ্যায় অভিযানে গিয়ে বহু দেবমন্দির ও দেবমূর্তি ধ্বংস করেছিলেন, একথা সমস্ত চৈতন্যচরিতগ্রন্থেই নানা জায়গায় পাওয়া যায়। ‘চৈতন্যভাগবতে’ আছে,

যে হুসেন সাহা সর্ব উড়িয়ার দেশে ।

দেবমুন্তি ভাঙ্গিলেক দেউল বিশেষে ॥

ওড়দেশে কোটি কোটি প্রতিমা প্রাসাদ ।

ভাঙ্গিলেক কত কত করিলে প্রমাদ ॥

‘চৈতন্তচরিতামৃতে’ লেখা আছে, উড়িষ্যা-অভিভানে যাবার সময় হোসেন শাহ যখন সনাতনকে তাঁর সঙ্গে যাবার জন্য অহরোধ করেন, তখন সনাতন বলেন, যাবে তুমি দেবতায় ছুং দিতে ।

মোর শক্তি নাই তোমার সঙ্গে যাইতে ॥

সনাতনের এই স্পর্ধিত উক্তি শুনে হোসেন শাহ “তবে তারে বান্ধি রাখি করিল গমন ।”

তবে এখানে একটা কথা উঠতে পারে,—হোসেন শাহ উড়িয়ার মন্দির ভেঙেছেন যুদ্ধের সময় । শান্তির সময়েও যে তিনি হিন্দুধর্মের প্রতি অশ্রদ্ধা দেখিয়েছেন ও হিন্দুদের প্রতি অহুদার ব্যবহার করেছেন, তার প্রমাণ কই ? এর প্রত্যক্ষ প্রমাণ, তিনি সুবুদ্ধি রায়ের জাতি নষ্ট করেছিলেন । এ সম্বন্ধে পরোক্ষ প্রমাণ যথেষ্টই আছে । হোসেন শাহ যখন কেশব ছত্রীকে চৈতন্তদেবের কথা জিজ্ঞাসা করেছিলেন, তখন কেশব ছত্রী তাঁর কাছে চৈতন্তদেবের মহিমা লাভব করে বলেছিলেন । এর থেকে মনে হয়, হিন্দুদের প্রতি, বিশেষত হিন্দু সাধু-সন্ন্যাসীদের প্রতি হোসেন শাহের পূর্ব-ব্যবহার খুব সন্তোষজনক ছিল না ।

হোসেন শাহের অধীনস্থ আঞ্চলিক শাসনকর্তা ও রাজকর্মচারীদের আচরণ সম্বন্ধে যে সব তথ্য পাই, তা’ও হোসেন শাহের হিন্দু-মুসলমানে সমদর্শিতা প্রমাণ করে না । যখন চৈতন্তদেব নবদ্বীপে হরি-সঙ্কীর্তন করছিলেন এবং “নগরে নগরে সঙ্কীর্তন” করাচ্ছিলেন, তখন নবদ্বীপের কাজী কীর্তনের উপর নিষেধাজ্ঞা জারী করেছিলেন । ‘চৈতন্তভাগবতে’র মধ্যখণ্ড, ২৩শ অধ্যায়ে লেখা আছে,

কাজী বোলে হিন্দুয়ানী হইল নদীয়া ।

করিমু ইহার শাস্ত নাগালি পাইয়া ॥

ক্ষমা করি যাও, আজি দৈবে হৈল রাত্তি ।

আর দিন লাগি পাইলেই লৈব জাতি ॥



এইমত প্রতিদিন দুষ্টগণ লৈয়া ।  
নগরে ভ্রময়ে কাজি কীর্তন চাহিয়া ॥  
হুঃখে সব নগরিয়া থাকে লুকাইয়া ।

প্রভু-স্থানে গিয়া সভে করিলা গোচর ॥  
কাজীর ভয়েতে আর না করি কীর্তন ।  
প্রতিদিন বুলে লই সহশ্রেক জন ॥  
নবদ্বীপ ছাড়িয়া বাইব অগ্ন স্থানে ।  
গোচরিল এই দুই তোমার চরণে ॥

‘চৈতন্যভাগবত’ অন্ত্যখণ্ডের ৫ম অধ্যায়ে গদাধর দাসের গ্রামের কাজীর অহরূপ আচরণের বর্ণনা আছে,

সেই গ্রামে কাজী আছে পরম দুর্ব্বার ।  
কীর্তনের প্রতি ঘেঁষ করয়ে অপার ॥

জয়ানন্দের ‘চৈতন্যমঙ্গল’ের কয়েক জায়গাতেও কাজীদের সঙ্গে চৈতন্য-ভক্তদের বিরোধের উল্লেখ আছে ।

কৃষ্ণদাস কবিরাজ তাঁর ‘চৈতন্যচরিতামৃত’ের আদিলীলা ১৭শ পরিচ্ছেদে লিখেছেন যে চৈতন্যদেবের নবদ্বীপলীলার সময়ে নবদ্বীপের কাজী জনৈক কীর্তনীয়ার ঘরে গিয়ে তাঁর খোল ভেঙে দিয়ে কীর্তন করতে নিষেধ করেছিলেন,

মৃদঙ্গ করতাল সঙ্কীর্ণন উচ্চধ্বনি ।  
হরিহরধ্বনি বিনে আন নাহি শুনি ॥  
শুনিয়া যে ক্রুদ্ধ হৈল সকল যবন ।  
কাজী পাশে আসি সভে কৈল নিবেদন ॥  
ক্রোধে সন্ধ্যাকালে কাজী এক ঘরে আইল ।  
মৃদঙ্গ ভাঙ্গিয়া লোকে কহিতে লাগিল ॥  
এতকাল কেহো নাহি কৈল হিন্দুমানী ॥  
এবে যে উত্তম চালাও কোন্ বল জানি ॥  
কেহো কীর্তন না করিহ সকল নগরে ।  
আজি আমি ক্ষমা করি বাইতেছি ঘরে ॥  
আর যদি কীর্তন করিতে লাগ পাইমু ।  
সর্ব্বদা দণ্ডিয়া তার জাতি যে লইমু ॥

হোসেন শাহের অথবা তাঁর পুত্র নসরৎ শাহের রাজত্বকালের একটি ঘটনা থেকে জানতে পারি বাংলার স্বাধীনতার মুসলমান উজীররা কীভাবে কথায় কথায় হিন্দুর ধর্ম নষ্ট করতেন। এই সময় বেনাপোলের (বর্তমানে পূর্ব পাকিস্তানের যশোর জেলার অন্তর্গত) জমিদার ছিলেন রামচন্দ্র খান। ইনি একজন গোঁড়া শাস্ত্র ছিলেন, বৈষ্ণবদের সহ্য করতে পারতেন না। হরিদাস ঠাকুর ও নিত্যানন্দ এঁর কাছে বিরূপ ব্যবহার পেয়েছিলেন। কৃষ্ণদাস কবিরাজ ‘চৈতন্যচরিতামৃত’ এর চরিত্র এমনভাবে বর্ণনা করেছেন, যার থেকে মনে হয় ইনি ঘোরতর দুষ্টকারী ছিলেন। কিন্তু নিষ্ঠাবান বৈষ্ণব কৃষ্ণদাস এই বৈষ্ণব-বিরোধী চরিত্র অঙ্কনে অতিরঞ্জনের আশ্রয় নিয়েছেন বলে মনে হয়। ১৫১৫ খ্রীঃর কয়েক বছর পরে এই রামচন্দ্র খানের রাজকর বাকী পড়ায় \* বাংলার স্বাধীনতার উজীরের হাতে তাঁর কী অবস্থা হয়েছিল, তা কৃষ্ণদাস কবিরাজের লেখা থেকে উদ্ধৃত করছি,

দস্তাবেজ করে রামচন্দ্র না দেয় রাজকর।  
কুদ্ধ হঞা শ্বেচ্ছ উজীর আইল তার ঘর ॥  
আসি সেই দুর্গামণ্ডপে বাসা কৈল।  
অবধ্যবধ করি মাংস সে ঘরে রাখাইল ॥  
স্ত্রী-পুত্র সহিতে রামচন্দ্রে বান্ধিয়া।  
তার ঘর গ্রাম লুটে তিনদিন রহিয়া ॥  
সেই ঘরে তিনদিন করে অমেধ্য-রন্ধন।  
আর দিন সভা লঞা করিল গমন ॥  
জাতি-ধন-জন খানের সব নষ্ট হৈল।  
বহুদিন পর্যন্ত গ্রাম উজাড় রহিল ॥

রাজকর না দেওয়ার জন্ত রামচন্দ্র খানকে বন্দী করে এবং তার ঘর গ্রাম লুট করেও উজীরের তৃপ্তি হল না, তিনি হতভাগ্য রামচন্দ্রের দুর্গামণ্ডপে “অবধ্য” অর্থাৎ গরু বধ করে তার মাংস তিনদিন ধরে রন্ধন করে তবে ক্ষান্ত হলেন! (সবচেয়ে আশ্চর্যের কথা কৃষ্ণদাস কবিরাজ এই ঘটনা অত্যন্ত

\* ১৫১৫ খ্রীঃ বা তারও কিছু পরে নিত্যানন্দ নীলাচল থেকে বাংলায় ফিরে আসেন। তার কিছুদিন পরে তিনি প্রেমধর্ম প্রচার উপলক্ষে রামচন্দ্র খানের গ্রামে গিয়ে রামচন্দ্রের কাছে আশ্রয় ব্যবহার পান। তারও কিছুদিন পরে রামচন্দ্র খানের রাজকর বাকী পড়ে।

পরিতোষ সহকারে বর্ণনা করেছেন, হরিদাস ঠাকুর ও নিত্যানন্দের প্রতি অসদাচরণকারী রামচন্দ্রের উচিত শাস্তি হল ভেবে। রামচন্দ্রের এই লাঞ্ছনা যে সমগ্র হিন্দু-সমাজের অপমান, সে কথা তাঁর মনে জাগে নি।)

‘চৈতন্তচরিতামৃত’ের অন্ত্যলীলা বর্ষ পরিচ্ছেদ থেকে জানা যায় যে সপ্তগ্রামের মুসলমান শাসনকর্তা নিছক গায়ের জোরে ঐ অঞ্চলের ইজারাদার হিরণ্য মজুমদার ও গোবর্ধন মজুমদারের স্বলতানের কাছে প্রাপ্য আট লক্ষ টাকার ভাগ চেয়েছিল, তার মিথ্যা নালিশ শুনে হোসেন শাহের উজীর হিরণ্য ও গোবর্ধনের মত সম্ভ্রান্ত ব্যক্তিদের বন্দী করতে এসেছিলেন এবং তাঁদের না পেয়ে গোবর্ধনের পুত্র নিরীহ রঘুনাথ দাসকে বন্দী করেছিলেন। সবচেয়ে আশ্চর্য কথা, রাজার কারাগারে বন্দী হবার পরেও সপ্তগ্রামের শাসনকর্তা রঘুনাথকে তর্জনগর্জন ও ভীতিপ্রদর্শন করতে থাকে। শুধু উজীর ও রাজকর্মচারীরা নয়, অসংখ্য সম্ভ্রান্ত মুসলমানরাও আলাউদ্দীন হোসেন শাহের রাজত্বকালে হিন্দুদের উপর অনেক সময় জুলুম করতেন। বিপ্রদাস পিপিলাইয়ের ‘মনসামঙ্গল’ হোসেন শাহের রাজত্বকালে—১৪২৫-২৬ খ্রীষ্টাব্দে রচিত হয়। তার চতুর্থ পালায় বিপ্রদাস হাসন-হুসেনের রাজত্বের মুসলমানদের সম্বন্ধে লিখেছেন,

কেহ বা জুলুম করে                      কেহ গুনা শিরে ধরে  
কজু করি করয়ে নছাব।  
জতেক ছৈঃদ মোল্লা                      জপয়ে ত বিসমল্লা  
সদা মুখে কলিমা কেতাব ॥  
হিন্দুত কলিমা দিল                      মুছলমানি শিখাইল  
তথা বৈসে জত মুছলমান।

এই বর্ণনা নিশ্চয়ই তৎকালীন মুসলমানদের দেখে কবি লিপিবদ্ধ করেছেন। স্মরণ্য ঐ সময়ে যে ‘সৈয়দ মোল্লা’রা হিন্দুদের জোর করে মুসলমান করত, তার আভাস এখানে পাচ্ছি।

অত্যাচারের কথা বাদ দিলেও হোসেন শাহের মুসলমান কর্মচারীদের পর-ধর্ম-বিশ্বেষের নিদর্শন বহু সূত্র থেকেই পাওয়া যায়। বৈষ্ণবদের কীর্তনকে তাঁরা বলতেন “ভূতের কীর্তন”, একথা ‘চৈতন্তভাগবত’ের মধ্যখণ্ড, ২৩শ অধ্যায় থেকে জানা যায়। ‘চৈতন্তভাগবত’ অন্ত্যখণ্ডের ৪র্থ অধ্যায়ে লেখা আছে

যে হোসেন শাহের “কোটোয়াল” তাঁর কাছে চৈতন্তদেবের বর্ণনা দেবার সময় বলেছিল,

এক স্থানী আসিয়াছে রামকেলি গ্রামে ॥

নিরবধি করয়ে ভূতের সংকীৰ্ত্তন ;

না জানি তাঁহার স্থানে মিলে কত জন ॥

কেউ কেউ বলতে পারেন, উজীর ও কর্মচারীদের বা অজ্ঞাত মুসলমানদের এই সমস্ত কাজ থেকে রাজার হিন্দুবিদ্বেষ প্রমাণিত হয় না। কিন্তু রাজা যদি হিন্দুদের উপর সহানুভূতিসম্পন্ন হতেন, তাহলে উজীর ও কর্মচারীরা বা অজ্ঞাত মুসলমানরা হিন্দুদের উপর অকথা নির্ধাতন করতে ও তাঁদের ধর্ম নষ্ট করতে পারতেন বলে মনে হয় না। আকবরের সময়েও হিন্দুদেবী মুসলমান কর্মচারীর ও সাধারণ মুসলমানের অভাব ছিল না। কিন্তু সম্রাটের নীতিব বিরুদ্ধাচরণ করে হিন্দুদের উপর অত্যাচার করতে তাঁরা সাহস করেন নি। সুতরাং হোসেন শাহ যে আকবরেরই মত ধর্মবিষয়ে উদার ও হিন্দু-মুসলমানে সমদর্শী ছিলেন, একথা বলা ঐতিহাসিক সত্যের অপলাপ মাত্র। বাহোকে, স্বয়ং হোসেন শাহেরও ধর্মবিষয়ে অসুদারতার প্রমাণ যথেষ্টই পাই। ‘চৈতন্তচরিতামৃত’ আদিলীলা সপ্তদশ পরিচ্ছেদ থেকে বোঝা যায়, হোসেন শাহ হরি-সঙ্কীৰ্ত্তন একেবারেই পছন্দ করতেন না এবং কোথাও হিন্দুরা হরি-সঙ্কীৰ্ত্তন করলে তিনি স্থানীয় কাজীকে শাস্তি দিতেন। জনৈক মুসলমান নবদ্বীপের কাজীকে বলেছিল,

হরি-হরি করি হিন্দু করে কোলাহল ।

পাংশা শুনিলে তোমায় করিবেক ফল ॥

বৃন্দাবনদাসের চৈতন্তভাগবতে দেখি হোসেন শাহের হিন্দু কর্মচারীরা তাঁর সম্বন্ধে বলছেন,

স্বভাবেই রাজা মহা কালযবন ।

মহাতমোশুণবৃদ্ধ জন্মে ঘনেঘন ॥

এর থেকে বোঝা যায়, হোসেন শাহ বহুবারই হিন্দুবিদ্বেষ ও হিন্দুবিরোধী কার্য-কলাপের পরিচয় দিয়েছেন।

সুতরাং হোসেন শাহ যে অসাম্প্রদায়িক মনোভাবসম্পন্ন ছিলেন ও হিন্দুদের প্রতি অপকৃপাত আচরণ করতেন, এ ধারণা একেবারেই ভুল। হোসেন শাহ একজন শ্রেষ্ঠ রাজা ছিলেন, তাঁর শাসনদক্ষতা অতুলনীয় ছিল এবং তিনি উচ্চস্তরের সামরিক প্রতিভারও অধিকারী ছিলেন। কিন্তু পরধর্ম সম্বন্ধে

উদারতা তাঁর খুব বেশী ছিল না। অপরদিকে নিজের ধর্মের প্রতি তাঁর নিষ্ঠা ছিল খুবই বেশী। নৈতিক বৈষ্ণবরা হোসেন শাহকে ধর্ম-বিষয়ে উদার মনে করেন নি কোনদিনই। তাঁরা চৈতন্যদেবের সমসাময়িক বিভিন্ন বৈষ্ণব ও অবৈষ্ণব ব্যক্তির তত্ত্বনিরূপণ করেছেন, অর্থাৎ ঘাপরঘুগে কৃষ্ণলীলার সময় কে কী ছিলেন, তা কল্পনা করেছেন। তাঁদের মতে হোসেন শাহ কৃষ্ণলীলার সময় জরাসন্ধ ছিলেন ( চিত্রে নবদীপ, শরদিন্দুনারায়ণ রায়, ২য় সংস্করণ, পৃ: ৭৮ )। হোসেন শাহের হিন্দু সম্বন্ধীয় নীতির অসহনীয়তা সন্দেহে এর থেকে খানিকটা আভাস পাওয়া যায়।

রমেশচন্দ্র বন্দ্যোপাধ্যায় তাঁর ‘প্রাচীন বাংলা সাহিত্যে হিন্দু-মুসলমান’ বইয়ের একাধিক প্রবন্ধে “হোসেন শাহ স্বীয় প্রকৃতি ও কৃতকার্যের জন্ত হিন্দুদিগের বিরূপ ভয় ও অবিশ্বাসের কারণ হইয়াছিলেন,” তা দেখাবার চেষ্টা করেছেন। রমেশচন্দ্র বন্দ্যোপাধ্যায়ের সিদ্ধান্ত মোটামুটিভাবে সমর্থনযোগ্য। কিন্তু তাঁর আলোচনার একটি প্রধান ত্রুটি হচ্ছে এই যে তিনি কয়েকটি অপ্রামাণিক সূত্রের উক্তি প্রমাণস্বরূপ উদ্ধৃত করেছেন, যেমন, ঈশান নাগরের ‘অদ্বৈতপ্রকাশ’, ‘প্রেমবিলাস’ ও ‘বৃহৎ সারাবলী’। তিনি যাকে সমসাময়িক ও প্রামাণিক সূত্র বলে মনে করেছেন, সেই ঈশান নাগরের ‘অদ্বৈতপ্রকাশ’ আসলে জাল বই—অনেক পরবর্তী কালের রচনা; ‘প্রেমবিলাস’ের এক বৃহৎংশই প্রক্ষিপ্ত এবং ‘বৃহৎ সারাবলী’ নিতান্তই অধাচীন গ্রন্থ—১৮৪৮ খ্রীষ্টাব্দে রচিত। তাছাড়া রমেশচন্দ্র বন্দ্যোপাধ্যায় যে সমস্ত ঘটনা হোসেন শাহের রাজত্বকালে ঘটেছিল বলে মনে করেছেন, তাঁদের মধ্যে অনেকগুলি হোসেন শাহের রাজত্ব সূত্র হবার অনেক আগে ঘটেছিল, যেমন গোড়েশ্বর কর্তৃক “নদীয়া উচ্ছন্ন” করা এবং হরিদাস ঠাকুরের নির্ধাতন (এই বইয়ের ষষ্ঠ অধ্যায়ে ‘জলালুদ্দীন ফতেহ শাহ’ সম্বন্ধীয় আলোচনা দ্রষ্টব্য)। তিনি বিজয়গুপ্তের সাক্ষ্যও উদ্ধৃত করেছেন, কিন্তু বিজয়গুপ্তের ‘মনসামঞ্জরী’ হোসেন শাহের সিংহাসনে আরোহণের প্রায় ন’ বছর আগে লেখা (পৃ: ২২০-২২১ দ্রষ্টব্য)। অবশ্য রমেশচন্দ্র বন্দ্যোপাধ্যায় হিন্দুদের প্রতি হোসেন শাহের আচরণ সন্দেহে বিভিন্ন নির্ভরযোগ্য সূত্র থেকেও অনেক উপকরণ সংগ্রহ করেছেন। সেগুলি আমরা আগেই বিচার করে এসেছি। একটি কথা বলা দরকার। এই সমস্ত দৃষ্টান্ত থেকে পরদর্শ্য সন্দেহে হোসেন শাহের অসহনীয়তার প্রমাণ মেলে, কিন্তু তাঁর ধর্মোন্নততার প্রমাণ মেলে না।

হোসেন শাহ হিন্দুধর্ম তথা পরধর্মের উপর বিশেষ প্রসন্ন ছিলেন না, তাই সময়ে সময়ে তিনি হিন্দুদের প্রতি ঘৃণ্যবহার করেছেন। কিন্তু তিনি যে ফিরোজ শাহ তোগলক, সিকন্দর লোদী বা ঔরংজেবের মত ধর্মোন্মাদ ছিলেন না, তাতে কোন সন্দেহ নেই। হোসেন শাহ যদি ধর্মোন্মাদ হতেন, তাহলে নবদ্বীপের কীর্তন বন্ধ করায় সেখানকার কাজী ব্যর্থতা বরণ করার পর নিজেই অকুস্থলে উপস্থিত হতেন এবং জোর করে কীর্তন বন্ধ করে দিতেন। তাঁর রাজত্বকালে কয়েকজন মুসলমান হিন্দু-ভাবাপন্ন হয়ে পড়েছিলেন। কবিকর্ণপুরের 'চৈতন্য-চন্দ্রোদয়' নাটক ও কৃষ্ণদাস কবিরাজের 'চৈতন্যচরিতামৃত' থেকে জানা যায় যে, খ্রীঃসের মুসলমান দজি চৈতন্যদেবের রূপ দেখে প্রেমে পাগল হয়ে মুসলমানদের তিরস্কার এবং তাড়নাকে অগ্রাহ্য করে হরিনাম ও কীর্তন করেছিল, আর উৎকল-সীমান্তের মুসলমান সীমাধিকারী ১৫১৫ খ্রীষ্টাব্দে চৈতন্যদেবের ভক্ত হয়ে পড়েছিল। ইতিপূর্বে-নির্ধাতিত যবন হরিদাস হোসেন শাহের রাজত্বকালে স্বাধীনভাবে ঘুরে বেড়াতেন এবং নবদ্বীপে নগর-সঙ্কীর্তনের সময় সামনের সারিতে থাকতেন। চট্টগ্রামের শাসনকর্তা পরাগল খান ও তাঁর পুত্র ছুটি খান হিন্দুদের পবিত্র গ্রন্থ মহাভারত শুনতেন। এসব ব্যাপার—অস্বস্ত শেষ ব্যাপারটা হোসেন শাহের কাছে অজানা থাকবার কথা নয়। হোসেন শাহ যখন এঁদের কোন শাস্তি দেন নি, তখন বুঝতে হবে তিনি ধর্মোন্মাদ ছিলেন না। এ কথাও মনে রাখতে হবে যে তাঁর রাজধানীর খুব কাছেই রামকেলি, কানাই-নাটশালা প্রভৃতি গ্রামে বহু নিষ্ঠাবান ব্রাহ্মণ ও বৈষ্ণব বাস করতেন। 'রাজমালা'য় লেখা আছে যে হোসেন শাহের হিন্দু মৈত্রেয় ত্রিপুরায় যুদ্ধ করতে গিয়ে গোমতী নদীর তীরে পাথরের প্রতিমা পূজা করেছিল। হোসেন শাহ ধর্মোন্মাদ হলে এ সব ব্যাপার সম্ভব হত না।

আসল কথা হোসেন শাহ ছিলেন বিচক্ষণ ও রাজনীতিচতুর নরপতি। হিন্দুধর্মের প্রতি অত্যধিক বিদ্বেষের পরিচয় দিলে অথবা হিন্দুদের মনে বৈদ্যুতিক আঘাত দিলে তার ফল যে বিষময় হবে, তা তিনি বুঝতেন। তাই তাঁর হিন্দু-বিরোধী কার্যকলাপ সংখ্যায় অল্প না হলেও তা কোনদিনই একেবারে মাত্রা ছাড়িয়ে যায় নি।

### হোসেন শাহের মৃত্যু

আলাউদ্দীন হোসেন শাহের যে সমস্ত শিলালিপি পাওয়া যায়, তার মধ্যে সোনারগাঁওয়ের গোয়ালদী মসজিদের শিলালিপিটিই শেষতম; এর তারিখ

১২৫ হিজরার ১৫ই শাবান অর্থাৎ ১৫১২ খ্রীষ্টাব্দের ১২ই আগস্ট। অতএব হোসেন শাহ অন্তত ঐ তারিখ অবধি নিশ্চয়ই জীবিত ছিলেন। এর অল্প কিছুদিন পরেই বোধহয় তাঁর মৃত্যু হয়েছিল; কারণ ১২৫ হিজরা থেকেই তাঁর পুত্র ও উত্তরাধিকারী নাসিরুদ্দীন নসরৎ শাহের মৃত্যু পাওয়া যাচ্ছে, পরের বছর থেকে নসরৎ শাহের শিলালিপিও পাওয়া যাচ্ছে। হোসেন শাহের নিশ্চয়ই স্বাভাবিক মৃত্যু হয়েছিল, কারণ বাবর তাঁর আত্মকাহিনীতে লিখেছেন যে নসরৎ শাহ শান্তিপূর্ণভাবে উত্তরাধিকারসূত্রে সিংহাসন লাভ করেছিলেন। ‘তবকাত-ই-আকবরী’তে স্পষ্টভাবেই লেখা আছে যে আলাউদ্দীনের স্বাভাবিক মৃত্যু হয়েছিল। অন্ত্যান্ত গ্রন্থেও একথা লেখা আছে।

হোসেন শাহের সমাধি-ভবন ছিল এক অপূর্ব শিল্পকর্মের নিদর্শন। এটি এখন আর বর্তমান নেই, কিন্তু যখন ছিল, সে সময়ে ক্রেটন একে দেখে এর একটি ছবি এঁকে গিয়েছেন। সেটি দেখলে এর অতুলনীয় সৌন্দর্যের আভাস পাওয়া যায়। মেজর উইলিয়ম ফ্রাঙ্কলিনও এই ভবনটি দেখেছিলেন। তিনি এর এই বিবরণ লিপিবদ্ধ করেছিলেন।

“You enter by a handsome arched gateway built of stone, the sides and front of this doorway are incrustated with a peculiar kind of composition, blue and white China tiling, which has a singular appearance; at the four corners are large roses cut in the stone...The minarets which flank the building are ornamented with curious carved work of trees, flowers, etc. Within the doorway is a large enclosure containing the bodies of Shah Sultān Hosein and other branches of the royal family. The sides of the enclosure are incrustated with the same kind of blue and white composition.” (Memoirs of Gaur and Pandua, p. 59 দ্রষ্টব্য।)

সে যুগের অনেক মুসলমান নৃপতি নিজেদের সমাধি-ভবন নির্মাণ করে যেতেন। হোসেন শাহও সম্ভবত তাই করেছিলেন। তা’ যদি করে থাকেন, তাহলে এর থেকে হোসেন শাহের শিল্পবোধ ও সৌন্দর্যসিকতার পরিচয় পাওয়া যায়।

## উপসংহার

যে রাজার নাম বাঙালীর কাছে একান্ত পরিচিত,—ইতিহাসে, সাহিত্যে ও কিংবদন্তীতে যিনি অমরতা লাভ করেছেন, তাঁর সম্বন্ধে আমরা যথাসাধ্য আলোচনা করলাম। অবশ্য দীর্ঘ আলোচনা সম্বন্ধে যেটুকু তথ্য উদ্ধার করা গেল, তা পর্যাপ্ত নয়। দীর্ঘ ছাব্বিশ বৎসর ব্যাপী এক গৌরবোজ্জ্বল রাজত্বের কতটুকু সংবাদই বা আমরা জানতে পারলাম? এ সম্বন্ধে অধিকাংশ তথ্যই বিশ্বাসিত্যের গহন অরণ্যের অন্ধকারে হারিয়ে গিয়েছে, জানি না কোনদিন তাদের উদ্ধার সাধন সম্ভব হবে কিনা।

“হোসেন শাহের আমল”—কথাটি শুনেই বাঙালীর মনে একটি অতুচ্ছল গরিমাময় আলেখ্য ফুটে ওঠে। “হোসেন শাহের আমল” বলতে বাঙালী বোঝেন এমন এক আমল, যে সময় এদেশ ও তাঁর মানুষেরা রাজনৈতিক, সামাজিক, সাংস্কৃতিক—সব দিক দিয়েই উন্নতির সর্বোচ্চ শিখরে আরোহণ করেছিল। এই ধারণা অমূলক নয়। তবে আমাদের এ কথাও মনে রাখতে হবে যে হোসেন শাহের আমল সম্বন্ধে বারো আনা সংবাদই আমরা পাই চৈতন্য-চরিত গ্রন্থগুলি থেকে। হোসেন শাহের রাজত্বকালেই চৈতন্যদেব নবদ্বীপে লীলা করেছিলেন এবং সম্মানগ্রহণ করেছিলেন। চরিতকাররা চৈতন্যদেবের জীবনের এই অংশের যে বর্ণনা দিয়েছেন, তাঁর থেকেই আমরা প্রাসঙ্গিকভাবে হোসেন শাহের আমল সংক্রান্ত তথ্যগুলি পাই। অগ্র গৌড়েশ্বরদের রাজত্ব-কালে অসুস্থরূপে বিশিষ্ট ঘটনা ঘটে নি, তাই তাঁদের আমল সম্বন্ধে আমরা বিশেষ কিছু জানতে পারি নি। তাঁর কলে—তাঁদের আমলের তুলনায় হোসেন শাহের আমল যে সর্বাংশে শ্রেষ্ঠ ও বৈশিষ্ট্যপূর্ণ, সাধারণের মনে এই ধারণার সৃষ্টি হয়েছে। হোসেন শাহের ছাব্বিশ বৎসর ব্যাপী নির্বিঘ্ন রাজত্ব, রাজ্যের বিশাল আয়তন ও রাজ্যে শান্তি-শৃঙ্খলা অক্ষুণ্ণ রাখার কথা ভাবলে এবং তাঁর রাজত্ব-কালে বাংলাদেশে যে সমস্ত বিশিষ্ট ব্যক্তির আবির্ভাব হয়েছিল, তাঁদের কথা স্মরণ করলে এই ধারণার অসুস্থলে যুক্তিও পাওয়া যায়। কিন্তু সেই সঙ্গে এ কথাও মনে রাখতে হবে, বাংলার অগ্রাগ্র শ্রেষ্ঠ সুলতানদের আমল সম্বন্ধে আমরা পর্যাপ্ত তথ্য পাই নি। তাই এ সম্বন্ধে চরম সিদ্ধান্তে উপনীত হওয়া যায় না।

হোসেন শাহের আমলে দেশের লোকে ষোড়ামুটি স্নেহেই ছিল। সুলতানের



পরধর্ম সম্বন্ধে উদারতার ষেটুকু অভাব ছিল, তাঁর শাসনদক্ষতা দিয়ে তিনি সেটুকু পুষিয়ে নিয়েছিলেন, তাই গোলযোগ বিশেষ হয় নি।

ষাহোক, কল্লনা ও সংস্কারের ধূম্রজাল ভেদ করে এই লোকবিশ্রুত নরপতির সত্য পরিচয় উদ্ধারের চেষ্টা করা গেল। এখন তাঁর কাছ থেকে আমরা বিদায় নিতে পারি।

## নবম অধ্যায়

### হোসেন শাহী বংশের শেষ পর্ব

#### নাসিরুদ্দীন নসরৎ শাহ

আলাউদ্দীন হোসেন শাহের মৃত্যুর পর তাঁর স্ত্রীগণ্য পুত্র নাসিরুদ্দীন নসরৎ শাহ সিংহাসনে আরোহণ করেন। আগেই বলেছি যে মুদ্রা ও শিলালিপি সাফ্য থেকে দেখা যায়, ২২৫ হিজরাতে হোসেন শাহের মৃত্যু ও নসরৎ শাহের সিংহাসনে আরোহণ ঘটেছিল।

কিন্তু নাসিরুদ্দীন নসরৎ শাহের ২১৮ এবং ২২২-২২৪ হিজরায় উৎকীর্ণ মুদ্রাও পাওয়া গিয়েছে। এর থেকে রাখালদাস বন্দ্যোপাধ্যায় সিদ্ধান্ত করেছিলেন, “নসরৎ শাহ পিতার জীবদ্দশায় বিদ্রোহী হইয়া দক্ষিণবঙ্গে স্বাধীনতা ঘোষণা করিয়াছিলেন।” কিন্তু এই সিদ্ধান্ত যুক্তিযুক্ত বলে মনে হয় না। বাংলার সুলতানদের পুত্রেরা ঘোঁরায়ে অভিযুক্ত হবার সময়েই যে নিজের নামে মুদ্রা প্রকাশের অধিকারী হতেন, তার বহু নিদর্শন পাওয়া যায়। রুকনুদ্দীন বারবক শাহ ও শামসুদ্দীন যুসুফ শাহ এইরকম যুবরাজ হওয়ার পরে পিতার জীবদ্দশায় মুদ্রা ও শিলালিপি প্রকাশ করেছিলেন। সুতরাং নসরৎ শাহের ঐ মুদ্রাগুলিকে তাঁর যুবরাজ অবস্থার মুদ্রা বলে গ্রহণ বরাই সম্ভব। হোসেন শাহের জীবদ্দশায় যে নসরৎ তাঁর প্রতি চিরদিনই অঙ্গুগত ছিলেন, তা মনে করার যথেষ্ট কারণ আছে। বাবর তাঁর আত্মকাহিনীতে লিখেছেন যে নসরৎ শাহ তাঁর পিতার মৃত্যুর পরে উত্তরাধিকারসূত্রে পিতৃসিংহাসন লাভ করেছিলেন। বাবরই লিখেছেন যে বাংলাদেশে উত্তরাধিকারসূত্রে সিংহাসন লাভ অত্যন্ত বিরল এবং যে রাজাকে বধ করে, সে-ই রাজা হয়। সুতরাং নসরৎ শাহ যে পিতার বিরুদ্ধে বিদ্রোহ করেছিলেন, একথা বলার কোন কারণই নেই।

‘তবকাং-ই-আকবরী’, ‘মাসির-ই-রহিমী’ ও ‘রিদ্দাজ-উস্-সলাতীনে’ লেখা আছে যে সুলতান হোসেন শাহের ১৮ জন পুত্র ছিলেন এবং নসরৎ শাহ তাঁদের মধ্যে জ্যেষ্ঠ ছিলেন। ‘রিদ্দাজ’-এ লেখা আছে, অগ্রান্ত রাজাদের মত নসরৎ শাহ তাঁর ভাইদের বন্দী করেননি, তার বদলে তাঁদের পিতৃসন্ত বৃত্তি বিত্ত দান করে দেন। একথা সত্য হলে বলতে হবে নসরৎ শাহ অত্যন্ত মহৎ প্রকৃতির

লোক ছিলেন। কিন্তু এই উদারতার পরিণাম খুব শুভ হয় নি। নসরৎ শাহের মৃত্যুর পর তাঁর পুত্র আলাউদ্দীন ফিরোজ শাহ যখন রাজা হলেন, তখন নসরৎ শাহের একজন ভাইই তাঁকে সিংহাসনচ্যুত ও নিহত করে নিজে রাজা হয়েছিলেন।

নসরৎ শাহের পরবর্তী কাজ সম্বন্ধে 'রিয়াজ'-এ লেখা আছে, "তিনি ত্রিছতের রাজাকে বন্দী করে বধ করলেন। ত্রিছত ও হাজীপুরের শেষ সীমান্ত পর্যন্ত জয় করার জন্য তিনি হোসেন শাহের জামাতা ও তাঁর অমাত্য আলাউদ্দীন ও মখদুম আলম বা শাহ আলমকে নিযুক্ত করেন।" 'রিয়াজ'-এর এই উক্তি সত্য বলেই মনে হয়। কারণ, এই সময় ত্রিছত বা মিখিলায় ওইনিবার-বংশীয় রাজারা রাজত্ব করতেন। তাঁদের মধ্যে শেষে রাজার নাম জানা যায়—তিনি ভৈরবসিংহের পৌত্র ও রামহুজসিংহের পুত্র লক্ষ্মীনাথ বা কংসনারায়ণ \* (J. A. S. B., 1915, pp. 430-431 এবং Select Inscriptions of Bihar by R. K. Choudhari, pp. 126-127 দ্রষ্টব্য)। এর পরে এই বংশের আর কোন রাজার নাম পাই না। সুতরাং নসরৎ শাহই কংসনারায়ণকে বধ করে এই বংশ লোপ করেছিলেন বলে মনে হয়। †

\* কংসনারায়ণ সম্ভবত নসরৎ শাহের সামন্ত ছিলেন, কারণ লোচনের 'রাগতরঙ্গিণী'তে (মুক্তি গ্রন্থ. পৃঃ ২৭) সম্বলিত কংসনারায়ণের ভণিতায়ুক্ত একটি পদে 'নসিরা শাহ' অর্থাৎ নাসিরুদ্দীন নসরৎ শাহের এই প্রশস্তি পাই (এতে উল্লিখিত 'সে'রূম দেই' সম্ভবত নসরৎ শাহের হিন্দু বেগম)—  
সুখি সমাদ সমাদরে সমদল নসিরামাহ হুরতানে।

নসিরা ভূপতি সোরম দেই পতি কংসনারায়ণ ভাগে ॥

সম্ভবত কংসনারায়ণ স্বাধীন হবার চেষ্টা করাতে অথবা বাবরের সঙ্গে যোগ দেওয়ারে নসরৎ শাহ তাঁকে আক্রমণ করে বন্দী করেন ও বধ করেন।

† মিখিলায় প্রচলিত একটি শ্লোকের সাক্ষ্য এই প্রসঙ্গে উল্লেখযোগ্য। এতে বলা হয়েছে যে, কংসনারায়ণ ১৪৪৯ শকাব্দের ভাদ্র মাসের শুক্লা প্রতিপদ তিথিতে মঙ্গলবারে নিহত হয়েছিলেন,

অঙ্কাবেদরাসি সঙ্গিতশাকবর্ধে।

ভাত্রেসিতে প্রতিপদি কিতিসুহবারে ॥

হা হা নিহতা কংসনারায়ণোহসৌ।

তত্বাজ দেবসরসী নিকটে শরীরম্ ॥

(Proceedings of the Indian History Congress, 16th Session, 1953, p. 206 দ্রষ্টব্য।)

এই শ্লোকটি প্রামাণিক বলে মনে হয়, কারণ ১৪৪৯ শকাব্দের ভাদ্র মাসের শুক্লা প্রতিপদ তিথি মঙ্গলবারেই পড়েছিল; ঐ দিন তারিখ ছিল ২৭শে আগষ্ট, ১৫২৭ খ্রীঃ (Indian Ephemerics, Swami Kanupillay, Vol V, p. 257 দ্রষ্টব্য)। ১৫২৭ খ্রীষ্টাব্দে নসরৎ শাহ বাংলার হুলতান ছিলেন। সুতরাং নসরৎ শাহ ত্রিছতের রাজাকে নিহত করেছিলেন—'দিয়াজ'-এর এই উক্তির সঙ্গে শ্লোকটির উক্তির সম্পূর্ণ সামঞ্জস্য রয়েছে।

‘রিয়াজ’-এ উল্লিখিত মধ্যম আলম-এর নাম বাবরের আত্মকাহিনীতে পাওয়া যায়। ত্রিহত যে নসরৎ শাহের রাজ্যের অধিকারভুক্ত হয়েছিল, তাতে সন্দেহের অবকাশ অল্প; কারণ ত্রিহতের পূর্ব, দক্ষিণ ও পশ্চিম—তিন দিকে অবস্থিত অঞ্চলই যে নসরৎ শাহের রাজ্যভুক্ত ছিল, তার প্রমাণ আছে। নসরৎ শাহের ত্রিহত অধিকারের একটি প্রত্যক্ষ প্রমাণও পাওয়া গিয়েছে। ত্রিহতের বেগুসরাইয়ে নসরৎ শাহ একটি মসজিদ নির্মাণ করিয়েছিলেন, তার শিলালিপি পাওয়া গিয়েছে; মসজিদটিকে নদী গ্রাস করেছে (JBRS, 1955, pp. 367-368)। তাছাড়া ত্রিহতে নসরৎ শাহ, তাঁর পিতা হোসেন শাহ ও হাব্বী সুলতান মুজাফফর শাহের মূদ্রা আবিষ্কৃত হয়েছে।

নসরৎ শাহের রাজত্বকালের অন্ততম প্রধান ঘটনা ভারতে চাগতাই (মোগল) সাম্রাজ্যের প্রতিষ্ঠাতা বাবরের সঙ্গে তাঁর সংঘর্ষ।

হোসেন শাহের রাজ্য বাংলার সীমা অতিক্রম করে বিহারের অনেক দূর পর্যন্ত বিস্তৃত হয়েছিল বটে, কিন্তু তার পাশেই ছিল পরাক্রান্ত সুলতান সিকন্দর লোদীর রাজ্য। এইজন্য বাংলার সুলতানকে কতকটা সশক্তভাবেই থাকতে হত। কিন্তু নসরৎ শাহের সিংহাসনে আরোহণের দু’ বছরের মধ্যেই লোদী সুলতানদের রাজ্যে ভাঙন ধরল। জৌনপুর থেকে গাটনা পর্যন্ত অঞ্চল প্রায় স্বাধীন হল এবং এই অঞ্চলে লোহানী ও ফর্মুলী বংশীয় লোকরা মাথা তুলে দাঁড়ালেন। নসরৎ এঁদের সঙ্গে সখ্য স্থাপন করলেন। এর ফলে নতুন কিছু অঞ্চল তাঁর রাজ্যভুক্ত হয়েছিল মনে করা যেতে পারে।

এর পরবর্তী ঘটনার বিস্তৃত বিবরণ বাবরের আত্মকাহিনীতে পাওয়া যায়। এই বিবরণের সংক্ষিপ্তসার নীচে দেওয়া হল।

১৫২৬ খ্রীষ্টাব্দে বাবর পাণিপথের প্রথম যুদ্ধে দিল্লীর সুলতান ইব্রাহিম লোদীকে পরাজিত ও নিহত করে দিল্লী দখল করেন এবং তখন থেকেই রাজ্য-বিস্তারে মন দেন। আফগান নায়কেরা তাঁর হাতে পরাজিত হয়ে পূর্ব ভারতে পালায়ে গেলেন। ১৫২৬ খ্রীঃ আগস্ট মাসে হমায়ুন কনৌজ ও জৌনপুর থেকে মাদ্রফ এবং নাসির লোহানীকে বিতাড়িত করলেন। ট’স নদীর দক্ষিণ থেকে স্ক্র করে ঘররা পর্যন্ত সমস্ত অঞ্চল এইভাবে বাবরের রাজ্যভুক্ত হল এবং তাঁর রাজ্যের সীমা নসরৎ শাহের রাজ্যের সীমাকে স্পর্শ করল। নসরৎ বাবর কর্তৃক বিতাড়িত আফগানদের অনেককে তাঁর রাজ্যে আশ্রয় দিলেন। কিন্তু তিনি খোলাখুলিভাবে বাবরের বিরুদ্ধাচরণ করলেন না। বাবর তাঁর সভায়

দূত পাঠিয়ে তাঁকে তাঁর মনোভাব সম্বন্ধে জিজ্ঞাসা করলেন। সেই দূত নসরৎ শাহের সভায় এক বছরেরও বেশী সময় রইল, কিন্তু নসরৎ এক বছরের মধ্যেও তাকে খোলাখুলিভাবে কিছু জানালেন না। অবশেষে যখন বাবরের সন্দেহ জাগ্রত হল, তখন নসরৎ বাবরের দূতকে ফেরৎ পাঠালেন নিজের দূত সঙ্গে দিয়ে। বাবরের কাছে অনেক উপহার পাঠিয়ে তিনি তাঁর বন্ধুত্ব জ্ঞাপন করলেন। ফলে ১৫২২ খ্রীঃ জামুয়ারী মাসে বাবর স্থির করলেন বাংলা আক্রমণ করা তাঁর পক্ষে উচিত হবে না।

এর পরবর্তী কিছু সময়ের ঘটনা সম্বন্ধে আমরা কিছু জানতে পারি না, কারণ বাবরের আত্মকাহিনীর এই অংশ হারিয়ে গিয়েছে। ইতিমধ্যে বিহারের লোহানী-প্রধান বহার খানের আকস্মিক মৃত্যু ঘটল। তাঁর স্থলাভিষিক্ত হলেন তাঁর বালক পুত্র জলাল খান। শের খান সুর দক্ষিণ বিহারের জায়গীর গ্রহণ করলেন এবং জৌনপুরের শাসনকর্তার (মোগলের অধীন) সঙ্গে মিলে নিজের স্বার্থসিদ্ধির উপায় খুঁজতে লাগলেন।

এদিকে ইব্রাহিম লোদীর ভাই মাহমুদ নিজেকে ইব্রাহিম লোদীর উত্তরাধিকারী বলে ঘোষণা করলেন। তিনি জৌনপুর অধিকার করলেন এবং বালক জলাল খান লোহানীকে আক্রমণ করে তার রাজ্য কেড়ে নিলেন। জলাল দলবল সমেত হাজীপুরে পালিয়ে গিয়ে তার পিতৃবন্ধু নসরৎ শাহের কাছে আশ্রয় চাইল। নসরৎ কিন্তু জলালকে হাজীপুরে আটক করে রাখলেন। এদিকে বিহারের আফগান নায়কেরা মাহমুদ লোদীর সঙ্গে যোগ দিলেন। এঁদের মধ্যে শের খানও ছিলেন।

অতঃপর শের খান এবং মাহমুদ লোদী বাবরের বিরুদ্ধে যুদ্ধযাত্রা করেন। মাহমুদ এবং শের গঙ্গার দুই তীর ধরে যথাক্রমে চুনার ও কাশীর দিকে রওনা হলেন। বিবন এবং বায়াজিদ নামে অপর দুজন আফগান নায়ক ঘর্ষণা নদী ধরে উত্তরে গোরক্ষপুরের দিকে রওনা হলেন। বাবরের আত্মকাহিনীতে এই বিবরণ পাওয়া যায়। শের খান দক্ষতার পরিচয় দিয়ে কাশী অধিকার করলেন। কিন্তু বিবন ও বায়াজিদের সারণ পর্যন্ত পৌছোতেই অনেক দেবী হয়ে গেল। এদিকে বাবর-বিরোধী-গোষ্ঠীর নেতা মাহমুদের অপদার্থতায় সমস্ত প্রচেষ্টা ব্যর্থ হয়ে গেল। বাবর ঐ সময় ঢোলপুরে ছিলেন। তিনি আফগানদের অগ্রগতির খবর পেয়ে আগ্রায় ফিরে এলেন এবং বিহারের দিকে সসৈন্তে রওনা হলেন। বাবরের অগ্রগতির খবর শুনে মাহমুদ কোন যুদ্ধ

না করেই মাহোবাতে পালিয়ে গেলেন। বাবরের অগ্রাগ্র প্রতাপের মধ্যে শের খান বেগতিক দেখে এক মাসের মধ্যেই আত্মসমর্পণ করলেন। বিবন ও বায়াজিদ পালিয়ে এলেন। হাজীপুরে নসরৎ শাহের ভগ্নীপতি মখদুম-ই-আলম তাঁদের আটকে রাখলেন, মোগলের কাছে আত্মসমর্পণ করতে দিলেন না। বাবর ইতিমধ্যে তাঁর সৈন্তবাহিনী সমেত গঙ্গা ও ঘর্ষরা নদীর সঙ্গমস্থলে অবস্থিত বন্ধারে এসে পৌঁছেছিলেন। জলাল লোহানী তাঁর দলবল সমেত নসরতের কবল থেকে জোর করে মুক্তিলাভ করে তাঁর মা দুদ্দু বিবিবে সঙ্গ নিয়ে বন্ধারে বাবরের কাছে আত্মসমর্পণ করার উদ্দেশ্যে রওনা হলেন।

উপরে বর্ণিত বাবর-বিরোধী অভিযানগুলিতে নসরৎ শাহ প্রত্যক্ষভাবে কোন অংশগ্রহণ করেছিলেন বলে বাবর তাঁর আত্মকাহিনীতে লেখেন নি। কিন্তু ‘রিয়াজ-উস-সলাতীন’ লেখা আছে, নসরৎ মোগল বাহিনীকে পরাজিত করার জন্য ভরাইচ অঞ্চলের দিকে কুৎব্ খাঁর অধীনে এক বিরাট সৈন্তবাহিনী পাঠিয়েছিলেন। নসরৎ যদি কোন সৈন্তবাহিনী পাঠিয়ে থাকেন, তা মোগল বাহিনীর সঙ্গে যুদ্ধ করে নি নিশ্চয়ই। ফলে তাঁর নিরপেক্ষতার বিরুদ্ধে বাবর কোন প্রকাশ্য প্রমাণ পাননি। অবশ্য গঙ্গা ও ঘর্ষরার সঙ্গমস্থলের কাছে, ঘর্ষরার পরপারে নসরতের খরিদস্থ বাহিনী ১০০।১৫০ টি নৌকা নিয়ে জমায়েৎ হয়েছিল। তা সত্ত্বেও বাবর তিনটি সপ্তে নসরৎ শাহের সঙ্গে সন্ধি করতে চাইলেন এবং নসরৎ শাহের দূত ইসমাইল মিতার কাছে সন্ধির প্রস্তাব দিলেন (১২শে এপ্রিল, ১৫২২ খ্রিঃ)। নসরৎকে তাড়াতাড়ি এই সন্ধি অঙ্গমোদন করতে অঙ্গরোধ জানিয়ে বাবর তাঁর কাছে একজন দূত পাঠালেন। নসরৎ কিন্তু তাড়াতাড়ি এর কোন উত্তর দিলেন না। এদিকে বাবর দু’জন চরের মুখে খবর পেলেন যে গওক নদীর তীরে ২৪টি জায়গায় মখদুম-ই আলমের নেতৃত্বে বাংলার সৈন্তবাহিনী সমবেত হয়ে আত্মরক্ষার ব্যবস্থা সূদূত করে তুলছে। শুধু তাই নয়, তারা আত্মসমর্পণেচ্ছু আফগানদের সপরিবারে নদী পার হয়ে বাবরের কাছে আসতে দিচ্ছে না এবং তাদের নিজেদের দলভুক্ত করেছে। এপ্রিল মাসের শেষে বাংলার দূত ইসমাইল মিটা ও বাবরের দূত মুজা মজহব বাংলার দিকে রওনা হলেন। তার ক’দিন আগে বাবর ইসমাইল মিটাকে নিজের কাছে ডাকিয়ে বলে দিলেন যে (১) নসরতের অধিকারের ক্ষতি না করে তিনি তাঁর শত্রুদের পিছনে যথেষ্টভাবে ধাওয়া করবেন, (২) তিনটি সপ্তের অন্ততম অঙ্গসারে নসরতের

সৈন্তেরা বাবরের পথ ছেড়ে দিয়ে খরিদে ফিরে যাবে, বাবরের কিছু তুর্কী সৈন্ত তাদের সঙ্গে গিয়ে খরিদে রেখে আসবে, (৩) নসরতের লোকদের কটুক্তি করা বন্ধ করতে হবে। অল্পখা তাঁদের যে অমঙ্গল ঘটবে, তার জন্ত তাঁরাই দায়ী হবেন। কিন্তু বাংলার দূত চলে যাওয়ার পরে কয়েকদিন অপেক্ষা করেও বাবর তাঁর সন্ধির প্রস্তাবের কোন উত্তর পেলেন না, নসরৎ শাহ ও ঘর্ঘরা নদীর ওপার থেকে তাঁর সৈন্ত সরালেন না। তখন বাবর জোর করে ঘর্ঘরা নদী পার হবেন স্থির করলেন।

বাবর বাংলার সৈন্তদের শক্তি এবং কামান চালানায় দক্ষতার কথা জানতেন, তাই তিনি নিজের বাহিনীকে অসাধারণ শক্তিশালী করে গঠন করেছিলেন। এরপর যখন জৌনপুর থেকে আরও ২০,০০০ সৈন্ত এসে তাঁর বাহিনীকে পুষ্টতর করে তুলল, তখন বাবর আক্রমণ শুরু করতে বিলম্ব করলেন না। উস্তাদ আলী কুলী খান ঘর্ঘরা নদীর পূর্ব তীরে অবস্থিত বাংলার বাহিনীর দিকে মুখ করে গঙ্গা ও ঘর্ঘরা নদীর মাঝে উচু জায়গায় কামান বসালেন। ঘর্ঘরা ও গঙ্গা নদীর সঙ্গমস্থল থেকে কিছু দূরে মুস্তাফা প্রস্তুত রইলেন ওধারের এক ঘাঁপের নিকটে অবস্থিত বাংলার হস্তী ও নৌবাহিনীর উপর গোলা বর্ষণের জন্ত। একদল মিস্ত্রী ও কারিগরকেও এইসব জায়গায় পাঠান হল। বাবরের বাহিনী ছ'টি দলে বিভক্ত ছিল, তার মধ্যে চারটি ছিল তাঁর পুত্র আশ্কারির পরিচালনাধীন। এরা ইতিমধ্যেই গঙ্গার উত্তর দিকে পৌঁছেছিল। কথা ছিল এরা 'হলদী' নামক স্থানে হেঁটে বা নৌকায় চড়ে ঘর্ঘরা নদী পার হবে, যাতে শত্রুদের দৃষ্টি কামান-বাহিনীর উপর না পড়ে এদের উপর পড়ে এবং এইভাবে কামান-বাহিনী নির্বিঘ্নে নদী পার হয়ে যাবে। পঞ্চম বাহিনীটি ছিল স্বয়ং বাবরের অধীন। কথা ছিল যে, যখন শত্রুদের উপর কামান দাগা হবে, তখন এই বাহিনী নদী পার হবে। মুহম্মদ-ই-জমান মীর্জা প্রভৃতির পরিচালনাধীন ষষ্ঠ বাহিনী গঙ্গার ডান ধারে মুস্তাফার গোলন্দাজ সৈন্তদের সাহায্য করতে নিযুক্ত ছিল।

২রা মে তারিখে বাবরের পরিচালনাধীন সৈন্তবাহিনী গঙ্গা পার হল। ৪ঠা মে তারিখে বাবর তাঁর ঘাঁটি থেকে রওনা হয়ে দুই নদীর সঙ্গমস্থল থেকে ২ মাইল দূরের একটি জায়গায় পৌঁছোলেন এবং আলী কুলীকে কামান চালাতে বললেন।

আলী কুলী বাংলার দুটি নৌকাকে ঐদিন ডুবিয়ে দিলেন। মুস্তাফাও

তা'ই করলেন। ঐদিন রাতেই একজন বাঙালী বাবরের বজ্রায় উঠে তাঁকে বধ করার চেষ্টা করে, কিন্তু নৈশ প্রহরীর সতর্কতায় বাবর অব্যাহতি পান।

এই মে তারিখে বাঙালীরা প্রতি-আক্রমণ করে। তাদের নৌবল উৎকৃষ্টতর হওয়ার দক্ষণ তারা সহজেই নদীর উপর নিজেদের আধিপত্য বিস্তার করল এবং ঘর্ষার অপর পারে আস্কারির নতুন ঘাটির কাছে তাদের একদল পদাতিক সৈন্য অবতরণ করতে সমর্থ হল। গঙ্গার অপর পারে নীচের মুহম্মদ-ই-জমান মীর্জার তাঁবুর কাছেও তাদের একদল পদাতিক সৈন্য অবতরণ করল।

ঐদিন মধ্যাহ্নে বাবরের অস্থির উত্তার সঙ্গে বাঙালীদের কামান-যুদ্ধ হ'ল। বাবর বাঙালীদের কামান চালানোর পদ্ধতির প্রশংসা করে লিখেছেন, “বাঙালীরা কামান চালানোর নৈপুণ্যের জ্ঞাত বিখ্যাত। আমরা এখন তার পরিচয় পেলাম। তারা একটি নির্দিষ্ট লক্ষ্য স্থির করে কামান চালায় না, যথেষ্টভাবে চালায়।” \*

যা হোক, বাঙালীদের এই সাফল্য বেশীক্ষণ স্থায়ী হয় নি। ঘর্ষার ওপারে যারা অবতরণ করেছিল, মোগল অখারোহী সৈন্যরা তাদের হটিয়ে দেয় এবং গঙ্গার ওপারে যারা অবতরণ করেছিল, মুহম্মদ-ই-জমান মীর্জা তাদের পরাজিত ও বিতাড়িত করেন।

ঐদিনই আস্কারির অধীন সৈন্যবাহিনীর এক বৃহদংশ ঘর্ষা নদী পার হয়। আস্কারি বাবরকে জানান যে তিনি বাংলার সৈন্যবাহিনীকে পরদিন পরিপূর্ণভাবে আক্রমণ করার পরিকল্পনা করেছেন।

এই খবর শুনে বাবর এই মের বিকালে আদেশ দেন যে তাঁর দলের কয়েকজন যোদ্ধার পরিচালনায় কয়েকটি রণতরী ঘর্ষা নদীতে অগ্রসর হয়ে বাংলার সৈন্যদের ঘাঁটির ঠিক সামনে এক জায়গায় সমবেত হবে এবং ঐসন তিমুর হুলতান ও তুখতেহ-বুঘা হুলতান সেখানে গিয়ে তাদের উপর নজর রাখবেন। তাঁর কথা অস্থায়ী কাজ হল। কিন্তু এই মে মধ্যাহ্নের মত সময়ে বাংলার নৌবাহিনী ঘর্ষা নদীর একটি বঁাকে এই সমস্ত নৌকার অগ্রগতি সম্পূর্ণভাবে বোধ করল। বাবরের ভাষায় “নদীর আরও উপরের দিকে যে সমস্ত জাহাজ সমবেত ছিল, তাদের কাছ থেকে মধ্যাহ্নে খবর এল

\* অর্থাৎ কামান-চালনাতে বাঙালীদের হাত এত পাকা যে তাদের নির্দিষ্ট লক্ষ্য স্থির করার হয় না, যথেষ্টভাবে কামান চালিয়ে তারা শত্রুদের খারেল করতে পারে।



যে যুদ্ধের জয় আদেশ-প্রাপ্ত নৌবাহর নির্দেশ অমুযায়ী এগিয়ে গিয়েছে। যে সমস্ত জাহাজ সমবেত হয়েছে, তারা আদেশ অমুসারে চলছে, বাঙালীরা নদীর একটি সর্পির্ন বাক দখল করে তাদের আটকে রেখেছে। একজন নাবিকের পা গুলি লেগে ভেঙে গিয়েছে। তারা এগিয়ে যেতে পারছে না।”

কিন্তু বাবর এতে দমে গেলেন না। তিনি মুহম্মদ-ই-সুলতান মীর্জাকে আদেশ পাঠালেন অবিলম্বে নদী পার হয়ে আশ্কারির সঙ্গে যোগ দিতে। সেই সঙ্গে ঐসন তিমুর সুলতান এবং তুখতেহ্-বুঘা খানকে অবিলম্বে মদী পার হতে তিনি আদেশ দিলেন।

বাবরের আদেশ অমুযায়ী তাঁর রণতরীগুলি যখন নদী পার হতে লাগল, তখন বাংলার অধারোহী সৈন্তেরা পূর্ণোচ্চমে তাদের আক্রমণ করার জয় অগ্রসর হল। কিন্তু তাতেও মোগল নৌ-বাহিনী নিরস্ত না হয়ে নদী পার হতে লাগল। ঐসন তিমুর সুলতান ত্রিশ চল্লিশ জন অশুচর নিয়ে ঘোড়ায় চড়ে নদী পার হলেন। প্রথম দলটি নদী পার হবার সঙ্গে সঙ্গে বাংলার পদাতিক সৈন্তেরা তাদের আক্রমণ করল। সাত আটজন মোগল সৈন্ত ঘোড়ায় চড়ে তাদের সঙ্গে যুদ্ধ করতে লাগল। ইতিমধ্যে অগ্রাগ্র মোগলরাও তৈরী হয়ে গেল এবং আর একখানা নৌকা নদী পার হল। ঐসন তিমুর সুলতানের অদম্য বিক্রম সমগ্র সৈন্তবাহিনীকে উৎসাহিত করে তুলল। ইতিমধ্যে বাবরের অগ্র অনেক সৈন্ত ও রণতরী বিনা বাধায় নদী পার হয়ে এপারে চলে এল।

বাংলার নৌবাহিনী দুই নদীর সঙ্গমস্থলের কাছে দাঁড়িয়ে অপেক্ষা করছিল। কিন্তু বাবরের বাহিনী যখন নদী পার হয়ে বাংলার স্থলবাহিনীকে পরাজিত করল, তখন তারা নিরাশ হয়ে পড়ল। এদিকে দরবেশ মুহম্মদ খান সরবন, দোস্ত ঈশাক আগা, নূর বেগ এবং অন্তেরা গজার অশুদ্ধি দিয়ে এসে বাংলার কামানবাহিনীকে এড়িয়ে চলে গেল। গিয়ে বাংলার স্থলবাহিনীকে আক্রমণ করল। এইভাবে বাংলার স্থলবাহিনী দু'দিক দিয়ে বাবরের বাহিনী দ্বারা আক্রান্ত হল। বাংলার নৌ-বাহিনী তাদের সাহায্য করতে না পেরে পালাতে লাগল। ঐসন তিমুর সুলতান এবং তাঁর বাহিনী একদিকে যুদ্ধ করতে লাগলেন। অপরদিকে আশ্কারির একদল সৈন্ত কুকী নামে একজন অধ্যক্ষের অধীনে যুদ্ধ করে বাংলার বাহিনীকে রণক্ষেত্র থেকে বিতাড়িত করল। এরা বসন্ত রাও নামে জনৈক বিখ্যাত হিন্দু (বাবরের ভাষায় “একজন খ্যাতিমান পৌত্তলিক”)

বীরকে নিহত করে তাঁর মাথা কেটে ফেলল। বসন্ত রাওয়ের দশ পনেরো জন অল্পচর কুকীর সৈন্যদের আক্রমণ করতে গিয়ে খণ্ড খণ্ড হয়ে কাটা পড়ল।

তখন বাবর নিজেও নৌকায় নদী পার হয়ে রণক্ষেত্র পর্যবেক্ষণ করলেন। তাঁর যে সৈন্যেরা তখনও নদী পার হয়নি, তাদের তিনি পায়ে হেঁটে নদী পার হতে আদেশ দিলেন। ৬ই মে ছপুরের মধ্যেই যুদ্ধ শেষ হয়ে গেল।

মোগল সৈন্যেরা যুদ্ধে জয়লাভ করে ঘর্ষরা নদী পার হয়ে সারণে উপনীত হল। সারণের নিরহন পরগণার কুন্ডীহ্ গ্রামে যখন বাবর পৌছোলেন, তখন জলাল লোহানী এসে তাঁর সঙ্গে দেখা করলেন। বাবর জলালকে বিহারে তাঁর সামন্ত হিসাবে প্রতিষ্ঠা করলেন।

কিন্তু নসরতের দূরদর্শিতার জন্তু বাবরের সঙ্গে তাঁর সংঘর্ষ বেশী দূর গড়াল না। ইতিপূর্বে বাবর প্রথমে গোলাম আলী নামক একজন দূত এবং পরে মুন্না মজহব নামে আর একজন দূত মারফৎ নসরৎ শাহের সঙ্গে সন্ধি করার প্রস্তাব পাঠিয়েছিলেন। উপরে বর্ণিত যুদ্ধের কয়েকদিন পর গোলাম আলী বাবরের কাছে প্রত্যাভর্তন করে জানালেন যে অপর পক্ষ বাবরের তিনটি সর্ত মেনে নিয়ে সন্ধি করতে রাজী হয়েছেন। গোলাম আলীর সঙ্গে আবুল ফতেহ্ নামে মুন্সেরের শাহজাদার একজন লোক এসেছিলেন। লস্কর-উজীর \* হোসেন খান ও মুন্সেরের শাহজাদা এদের মারফৎ বাবরকে একটি চিঠি পাঠান। তাতে এরা নসরৎ শাহের পক্ষ থেকে জানান যে তাঁরা বাবরের সর্তে সম্মত এবং সন্ধি পালনের দায়িত্ব তাঁরা গ্রহণ করলেন। বাবরের প্রতিপক্ষ আফগান নায়কদের কতক পশুদন্ত, কতক নিহত হয়েছিল, কয়েকজন বাবরের কাছে বশুতা স্বীকার করেছিল এবং কয়েকজন বাংলায় আশ্রয় গ্রহণ করেছিল। তার উপরে এই সময়ে বর্ষাও আসন্ন হয়ে উঠেছিল। তাই বাবরও সন্ধি করতে রাজী হয়ে অপর পক্ষকে চিঠি দিলেন। এইভাবে বাবর ও নসরৎ শাহের সংঘর্ষের শান্তিপূর্ণ সমাপ্তি ঘটল। এই সংঘর্ষের পরে বর্তমান বিহার ও উত্তর প্রদেশের

---

\* 'লস্কর উজীর' উপাধি যে রাজার সেনাপতিরা পেতেন, তার প্রমাণ দৌলত কাজীর 'সভী ময়নামতী' কাব্য থেকে মেলে। এই কাব্যে দৌলৎ কাজী তাঁর পৃষ্ঠপোষক আশরফ খান সম্বন্ধে লিখেছেন,

সেনাপতি হৈলা নানা সৈন্য অধিপতি।

আশরফ খান নামে শোভা হৈল অতি ॥

শ্রী আশরফ খান লস্কর উজীর।

অন্তর্গত কিছু অঞ্চল নসরতের হস্তচ্যুত এবং বাবরের রাজ্যভুক্ত হয়েছিল বলে দেখা যাচ্ছে। বাবর তাঁর আফগান সমর্থকদের সারণ ও গোরক্ষপুরের শাসনভার দিয়েছিলেন এবং খরিদ ও আজমগড়ে পদার্পণ করেছিলেন বলে তাঁর আত্মজীবনী থেকে জানা যায়। অথচ এই সমস্ত জায়গা যে বাংলার সুলতানের রাজ্যভুক্ত ছিল, তা তাঁর শিলালিপি থেকেই জানা যায়। খরিদে নসরৎ শাহের ৯৩৩ হিজরা বা ১৫২৭ খ্রীষ্টাব্দে উৎকীর্ণ শিলালিপি পাওয়া গিয়েছে। অথচ বাবর নিজের লিখেছেন যে তিনি নসরৎ শাহের সঙ্গে বিজ্ঞেতার মত আচরণ করেননি, পূর্বঘোষিত সম্মানজনক সর্তে সন্ধি করেছিলেন। সম্ভবত বাবর ও নসরৎ শাহের মধ্যে যে সন্ধি হয়েছিল, তারই সর্ত অমুযায়ী এই সমস্ত অঞ্চল বাবরের অধিকারভুক্ত হয়েছিল।

১৫৩০ খ্রীষ্টাব্দে বাবরের মৃত্যুর পরে মাহমুদ লোদী—বিবন, বায়াজিদ এবং শের খানের সহায়তায় মোগলদের বিরুদ্ধে আর একবার অভিযান করেন এবং বিহারের সীমা অতিক্রম করে ক্রমশ জৌনপুর অবধি অধিকার করেন ও লঙ্কো ঘেরাও করেন। অবশেষে নিজের অযোগ্যতা ও শের খানের বিশ্বাসঘাতকতার ফলে দাদরার যুদ্ধক্ষেত্রে মোগলের হাতে চূড়ান্তভাবে পরাজিত হন। এই অভিযানে নসরৎ শাহের পরোক্ষ সমর্থন ছিল কিনা, সে সম্বন্ধে কোন প্রমাণ পাওয়া যায় না।

‘রিয়াজ-উস-সলাতীনে’ লেখা আছে যে, হুমায়ূনের সিংহাসনে আরোহণের কিছুদিন পরে নসরৎ শাহের কাছে খবর আসে হুমায়ুন বাংলার বিরুদ্ধে যুদ্ধযাত্রার উদ্যোগ করছেন। এই খবর পেয়ে নসরৎ গুজরাটের সুলতান বাহাদুর শাহের কাছে অনেক উপঢৌকন সমেত মালিক মর্জান নামে একজন খোজাকে দূতস্বরূপে পাঠান। মালিক মর্জান মাঝুতে বাহাদুর শাহের সঙ্গে দেখা করেন এবং তাঁর কাছে থিলাং পান। এই কথা বিশ্বাসযোগ্য বলে মনে হয়। বাহাদুর শাহ হুমায়ূনের প্রবল শত্রু; তাঁর সঙ্গে মৈত্রীবন্ধনে আবদ্ধ হলে হুমায়ুন যখন নসরতের রাজ্য আক্রমণ করবেন, তখন বাহাদুর অপর দিক থেকে হুমায়ূনের রাজ্য আক্রমণ করবেন। সম্ভবত নসরতের এই বিজ্ঞোচিত কূটনৈতিক কার্যের ফলেই হুমায়ুন বাংলা-আক্রমণ থেকে বিরত হন।

ত্রিপুরার সঙ্গে যে নসরৎ শাহের পিতা হোসেন শাহের দীর্ঘকাল ধরে যুদ্ধ চলেছিল, তা আমরা আগেই দেখে এসেছি। কিন্তু নসরৎ শাহের সঙ্গেও যে ত্রিপুরার যুদ্ধ হয়েছিল, সে খবর অনেকেই রাখেন না। প্রাচীন ‘রাজমালা’র

( সা. প. ২২৫২ নং পুঁথি, ২৩ খ পত্র ) ধন্তমাণিক্যের পুত্র ও পরবর্তী রাজা দেবমাণিক্য \* সম্বন্ধে লেখা আছে,

চাট্টগ্রাম থানা রাখি আসিলেক দেশ ।

যত রাজ্য পিতৃস্বৰ্গ আছিলেক পুনি ।

সকল শাসিল হুখে সেই নুপমণি ॥

দেবমাণিক্যের রাজত্বকাল ১৫২২-১৫২৭ খ্রীঃ ( রাজমালা, কালীপ্রসন্ন সেন সম্পাদিত সংস্করণ, ২য় লহর, পৃ: ১৮৪ দ্রষ্টব্য )। ‘রাজমালা’তে যখন দেবমাণিক্য চট্টগ্রাম জয় করেছিলেন বলে দাবী জানানো হয়েছে, তখন চট্টগ্রামের অধিকারী বাংলার সুলতান নসরৎ শাহের সঙ্গে যে তাঁর সংঘর্ষ হয়েছিল, তাতে কোন সন্দেহ নেই।

এ সম্বন্ধে আর একটি প্রমাণ আছে। ১০৫৬ হিজরা বা ১৬৪৫-৪৬ খ্রীষ্টাব্দে চট্টগ্রাম-নিবাসী কবি মোহাম্মদ খান তাঁর ‘মক্তুল হোসেন’ কাব্য রচনা করেন। এই কাব্যের উপক্রমে কবি তাঁর বিস্তৃত বংশপরিচয় দিয়েছেন। সংক্ষেপে তাঁর বংশনতিক্রম এই,

মাহি আসোয়ার

হাতিম

সিদ্দিক

রাস্তি খান

মিনা খান

গাভুর খান

হামজা খান

নসরৎ খান

জালাল খান

বিরাহিম খান

মুবারিজ খান

মোহাম্মদ খান

\* কোন কোন ঐতিহাসিকের মতে (‘রাজমালা’র মতে নয়) ধন্তমাণিক্য ও দেবমাণিক্যের দাবীখানে “ধন্তমাণিক্যের জ্যেষ্ঠ পুত্র ধন্তমাণিক্য” অল্প সময়ের জন্য রাজা হয়েছিলেন।

নীচে আমরা 'মক্তুল হোসেন' থেকে রাস্তি খান হতে শুরু করে নসরৎ খান পর্যন্ত কবির পূর্বপুরুষদের বিবরণ উদ্ধৃত করলাম (সম্পূর্ণ বিবরণের জন্য ঢাকা বিশ্ববিদ্যালয় প্রকাশিত সাহিত্য পত্রিকা, বর্ষা সংখ্যা, ১৩৬৬, পৃ: ১০১-১০৩ দ্রষ্টব্য)।

সর্বসিদ্ধি কল্পতরু পর উপকার চারু সত্যবাদী সিদ্ধিক সমান।  
তান পুত্র জানে গুরু দানে কর্ণ মানে কুরু রাস্তি খান রূপে পঞ্চবাণ ॥  
চাটিগ্রাম দেশপতি স্বর্গে যেন শচীপতি তাহানে প্রণামি বারে বার।  
তাহান নন্দন বলি রসে 'দধি বলে শ্লী দানে হরিচন্দ্র সমসর ॥  
তেজে অগ্নি কোপে যম মানেত কোরবসম রণে যেন ভৃগুপতি রাম।  
কামিনীমোহন বর অভিনব পঞ্চশর মিনা খান রূপে অমুপাম ॥  
তান পুত্র গুণবান ভীমসম বলবান কার্তবীর সম ধনুধারী।  
জানে শুক্র জানে গুরু দানে বলি বল্লভরু যার কীর্তি গোড়দেশে ভরি ॥  
ভিক্ষুক জনের গতি ঐশ্বৰ্যে যে যযাতি ধৈর্যে বীর্যে গম্ভীর সাগর।  
গাভুর খান গুণনিধি থিরে ক্ষিতি রসে 'দধি তাহানে প্রণামি বহুতর ॥  
করিয়া বিষম রণ জিনিয়া ত্রিপুরাগণ লীলাএ পাঠানগণ জিনি।  
শত্রু সব করি ক্ষয় বাহ বলে লভি জয় বাণ হোস্তে কৈলা রাজধনি ॥  
লইয়া পণ্ডিতগণ শাস্ত্র শুনে অমুকুণ রত্ন ঢঙ্গ কোতুক অপার।  
হামজা খান মহলন্দ হাশ্রবাণী মকরন্দ তাহাকে প্রণামি বারে বার ॥  
তাহান নন্দনবর রসে যেন রত্নাকর ধর্যে কর্মে যেন বৃহস্পতি।  
স্বমেক সদৃশ থির পার্থসম মহাবীর ঐশ্বর্যাদি নূপ যযাতি ॥  
বংশের প্রসিদ্ধি হেতু নিজ কুল জয়বৈতু জয় হৈল প্রচণ্ড প্রতাপ।  
গাঙ্গারী-নন্দন মানে কর্ণ-বলি জিনি দানে ভিক্ষুক জনের যেন বাপ ॥  
বিজয়ে বিজয় সম বিপক্ষ কুলের যম চন্দ্রমুখ হুধা মধু হাস।  
রূপে কাম সমসর ধীর স্নললিত বর পুরাস্ত সকল নারী আশ ॥  
প্রজার পালক রাম বাপ হোস্তে অমুপাম বাহবলে শাসিলেন্ত ক্ষিতি।  
বান্ধব জনের প্রাণ নসরৎ খান জান তান পদে করম মিনতি ॥

মোহাম্মদ খানের এই বংশপরিচয়ে যে রাস্তি খানের নাম পাওয়া যাচ্ছে, তিনি মোহাম্মদ খানের ঊর্ধ্বতন অষ্টম পুরুষ। মোহাম্মদ খান যখন সপ্তদশ শতাব্দীর মধ্যভাগে বর্তমান ছিলেন, তখন সময়ের হিসাবে রাস্তি খান পঞ্চদশ শতাব্দীর দ্বিতীয়ার্ধে বর্তমান ছিলেন বলা যেতে পারে। মোহাম্মদ খান রাস্তি

খানকে “চাটিগ্রাম দেশপতি” বলেছেন। সুতরাং এবিষয়ে কোনই সন্দেহ নেই যে এই রাস্তি খান রুকনুদ্দীন বারবক শাহের সমসাময়িক “মজলিস আলী” রাস্তি খানের সঙ্গে অভিন্ন, যিনি ১৪৭৪ খ্রীষ্টাব্দে চট্টগ্রামের হাটহাজারী খানার জোবরা গ্রামে একটি মসজিদ তৈরী করিয়েছিলেন।

কবীন্দ্র পরমেশ্বরের মহাভারত থেকে জানা যায় যে এই রাস্তি খানেরই পুত্র পরাগল খান ও পৌত্র ছুটি খান।\* এদিকে মোহাম্মদ খানের বংশপরিচয়ে রাস্তি খানের পুত্র মিনা খান, পৌত্র গাভুর খান, প্রপৌত্র হাম্জা খান, বৃদ্ধ-প্রপৌত্র নসরৎ খান প্রভৃতির নাম পাওয়া যাচ্ছে। পরাগল খান ও ছুটি খানকে কেউ কেউ যথাক্রমে মিনা খান ও গাভুর খানের সঙ্গে অভিন্ন বলে মনে করেন, কিন্তু এ মতের স্বপক্ষে কোন যুক্তি বা প্রমাণ নেই।† প্রকৃতপক্ষে পরাগল খান ও মিনা খান রাস্তি খানের দুজন পুত্রের নাম। কবীন্দ্র পরমেশ্বর ও মোহাম্মদ খানের সাক্ষ্য মিলিয়ে রাস্তি খানের নিম্নতম পঞ্চম পুরুষ অবধি এই বংশলতা দাঁড়ায়,

\* কবীন্দ্র পরমেশ্বর রাস্তি খানের পুত্র পরাগল খানকে “রুদ্রবংশরত্নাকর” নামে অভিহিত করেছেন। এর থেকে কেউ কেউ মনে করেন রাস্তি খান অথবা তাঁর পিতা হিন্দু থেকে মুসলমান হয়েছিলেন এবং আগে তাঁদের “রুদ্র” পদবী ছিল। কিন্তু মোহাম্মদ খান লিখেছেন যে রাস্তি খানের প্রপিতামহ মুসলমান ছিলেন, তাঁর নাম ছিল “মাহি আসোয়ার” এবং তিনি ভারতবর্ষের বাইরে থেকে এসেছিলেন। এর থেকে কেউ কেউ অনুমান করেন যে, কবীন্দ্র পরমেশ্বর উল্লিখিত রাস্তি খান ও মোহাম্মদ খানের পূর্বপুরুষ রাস্তি খান পৃথক লোক। কিন্তু এই অনুমান যুক্তিযুক্ত নয়। একই সময়ে একই জায়গায় দুই রাস্তি খানের অস্তিত্ব কল্পনা করা সম্ভব নয়। এ সমস্তার সমাধান অসম্ভাব্যেও করা যায় এবং তা-ই এর প্রকৃত সমাধান বলে মনে হয়। মোহাম্মদ খান লিখেছেন যে মাহি আসোয়ার বাংলাদেশে এসে এক ব্রাহ্মণের মেয়েকে বিয়ে করেছিলেন। সম্ভবত এই ব্রাহ্মণকন্যাই রুদ্রবংশীয়া ছিলেন, তাই তাঁর বৃদ্ধপ্রপৌত্র পরাগল “রুদ্রবংশরত্নাকর” বিশেষণে অভিহিত হয়েছেন।

† যারা মিনা খান-গাভুর খানকে পরাগল খান-ছুটি খানের সঙ্গে অভিন্ন মনে করেন, তাঁদের একমাত্র তথাকথিত যুক্তি এই যে, ছুটি খান ও গাভুর খান উভয়েই রাস্তি খানের পৌত্র এবং উভয়ের কীর্তি একই, কারণ শ্রীকর নন্দী বলেছেন যে ছুটি খান ত্রিপুরার রাজাকে যুদ্ধে পরাজিত করেছিলেন আর এঁদের মতে মোহাম্মদ খান গাভুর খান সম্বন্ধে “জিনিয়া ত্রিপুরাগণ” ইত্যাদি উক্তি করেছেন। কিন্তু পর পৃষ্ঠায় আমরা আলোচনা করে দেখিয়েছি যে মোহাম্মদ খান এই উক্তি গাভুর খান সম্বন্ধে করেন নি, তাঁর পুত্র হাম্জা খান সম্বন্ধে করেছেন। অতএব এর থেকে ছুটি খান ও গাভুর খানের অভিন্নতা প্রমাণিত হয় না। পরাগল খান ও ছুটি খান হোসেন শাহের লক্ষর ও সেনাপতি ছিলেন। মিনা খান ও গাভুর খান তা ছিলেন বলে

## রাষ্টি খান

পরাগল খান  
|  
ছুটি খান  
(এটি জনপ্রিয় নাম, প্রকৃত  
নাম নসরৎ খান)

মিনা খান  
|  
গাভুর খান  
|  
হামজা খান  
|  
নসরৎ খান

মোহাম্মদ খান তাঁর বংশপরিচয়ে তাঁর একজন পূর্বপুরুষ সম্বন্ধে বলেছেন, “করিয়া বিষম রণ জিনিয়া ত্রিপুরাগণ ইত্যাদি। এখন প্রশ্ন হচ্ছে এই যে, এই উক্তি কার সম্বন্ধে প্রযুক্ত হয়েছে? অনেকে বলেন যে এই উক্তি গাভুর খান সম্বন্ধে প্রযুক্ত হয়েছে। কিন্তু এই মত যুক্তিযুক্ত নয়। কারণ মোহাম্মদ খান তাঁর বংশপরিচয়ে প্রত্যেক পূর্বপুরুষের উদ্দেশ্যে প্রণাম বা চরণবন্দনা জানাবার পরই তাঁর প্রসঙ্গ শেষ করে তাঁর পুত্রের প্রসঙ্গ শুরু করেছেন। বংশপরিচয়ের যে অংশ আমরা উদ্ধৃত করেছি এবং যে অংশ উদ্ধৃত করি নি, দুইয়ের মধ্যেই এই বৈশিষ্ট্য রয়েছে ( সাহিত্য পত্রিকা, বর্ষা সংখ্যা ১৩৬৬, পৃ: ১০১-১০৩ ত্র: )। সুতরাং মোহাম্মদ খান গাভুর খানকে “তাহানে প্রণামি বহুতর” বলে পরে “করিয়া বিষম রণ জিনিয়া ত্রিপুরাগণ” বলে যে বর্ণনা শুরু করেছেন, তা গাভুর খান সম্বন্ধে নয়, তাঁর পুত্র হামজা খান সম্বন্ধেই প্রযুক্ত হয়েছে সন্দেহ নেই। আর “করিয়া বিষম রণ” ইত্যাদি উক্তি গাভুর খান সম্বন্ধে প্রযুক্ত ধরলে বলতে হয়, হামজা খান সম্বন্ধে মোহাম্মদ খান মাত্র “লইয়া পণ্ডিতগণ...তাহাকে প্রণামি বারে বার” এইটুকুমাত্র বর্ণনা লিপিবদ্ধ করেছেন এবং হামজা খান কার পুত্র, তা বলেন নি; এই দুই বিষয়ই বংশপরিচয়ের অগ্রাঙ্ক অংশের সঙ্গে খাপ খায় না। সুতরাং মোহাম্মদ খান হামজা খানকেই ত্রিপুরা-বিজেতা বলেছেন, তাতে বিন্দুমাত্র সন্দেহ নেই। পরাগল খান আলাউদ্দীন হোসেন শাহের সমসাময়িক, ছুটি খানও হোসেন শাহের বয়ঃকনিষ্ঠ সমসাময়িক; সুতরাং ছুটি

মোহাম্মদ খান লেখেন নি। অথচ পূর্বপুরুষদের সমস্ত গৌরবের কথা তিনি বিস্তারিত ভাবে বলেছেন। এর থেকেও বাঁধা যায়, পরাগল খান-ছুটি খান মিনা খান-গাভুর খানের সঙ্গে জড়িত নন। মোহাম্মদ খান মিনা খানের কেবলমাত্র স্নেহভাৱে প্রণাম করেছেন এবং গাভুর খান সম্বন্ধে সাধারণভাবে বলেছেন, “বার কীতি গোড়-দেশ ভরি।” সম্ভবত গাভুর খানের পুত্র হামজা খান থেকেই রাষ্টি খানের বংশের এই শাখাটি প্রভাব-প্রতিপত্তি অর্জন করে।

খানের এক পুরুষ পরবর্তী হাম্জা খানকে নসরৎ শাহের সমসাময়িক ধরা যায়। এই হাম্জা খান ত্রিপুরা জয় করেছিলেন বলে দাবী জানানো হয়েছে। অতএব নসরৎ শাহের যে ত্রিপুরায় সঙ্গে সংঘর্ষ হয়েছিল, তা এর থেকেও বোঝা যায়।

অহোম বুঞ্জী থেকে জানা যায় নসরৎ শাহ তাঁর রাজত্বের শেষ বছরে আসাম আক্রমণ করেছিলেন। এই আক্রমণ ও তার পরিণতি সম্বন্ধে অহোম বুঞ্জীতে যে বিবরণ পাওয়া যায় (Mughal North-East Frontier Policy, Sudhindranath Bhattacharya, pp. 89-99 দ্রষ্টব্য), তার সংক্ষিপ্তসার নীচে দেওয়া হল। এই বিবরণ আক্ষরিকভাবে সত্য না-ও হতে পারে, কিন্তু মোটামুটিভাবে যে সত্য তাতে কোন সন্দেহ নেই।

১৫৩২ খ্রীষ্টাব্দের এপ্রিল মাসে তুরবক নামে বাংলার একজন মুসলমান সেনাপতি ৩০টি হাতী, ১০০টি ঘোড়া এবং বহু কামান নিয়ে অহোম রাজ্য আক্রমণ করেন। তেমেনি দুর্গ বিনা বাণায় জয় করার পরে মুসলমানরা অহোম রাজ্যের দুর্ভেদ্য ঘাঁটি সিঙ্গুরির সামনে এসে তাঁবু ফেলে অপেক্ষা করতে থাকে। সিঙ্গুরির ঘাঁটি রক্ষা করছিলেন বর পাত্র গোহাইন। অহোম-রাজ তাঁর পুত্র স্ক্রেনকে একদল শক্তিশালী সৈন্য দিয়ে সিঙ্গুরি রক্ষা করবার জন্ত পাঠালেন। অল্পকালের মধ্যেই দুই পক্ষের খণ্ডযুদ্ধ শুরু হয়ে গেল এবং কিছু দিন ধরে তা চলতে থাকল। স্ক্রেন ব্রহ্মপুত্র নদ পার হয়ে মুসলমানদের আক্রমণ করলেন। তুমুল যুদ্ধের ফলে মুসলমানরা প্রথমে ব্যতিব্যস্ত হয়ে পড়ল, কিন্তু অবশেষে তারা অসমীয়াদের পরাজিত করতে সমর্থ হল। আটজন অসমীয়া সেনাধ্যক্ষ নিহত হলেন, বহু লোক জলে ডুবে মরল, রাজপুত্র স্ক্রেন আহত হলেন এবং অল্পের জন্ত মৃত্যুর হাত থেকে বেঁচে গেলেন। অবশিষ্ট অসমীয়া সৈন্যবাহিনী সাদা নামক জায়গায় পালিয়ে গেল। অহোম-রাজ সৈন্যবাহিনী পুনর্গঠন করে বর পাত্র গোহাইনের অধীনে রাখলেন।

প্রায় এই সময়েই নসরৎ শাহ পরলোকগমন করেন। তাঁর মৃত্যুর পরেও এই যুদ্ধ চলেছিল। ষষ্ঠাঙ্গানে এই যুদ্ধের পরবর্তী অংশ বর্ণিত হবে।

তেরো বছর রাজত্বের পরে ৯৩৮ হিজরা বা ১৫৩১-৩২ খ্রীষ্টাব্দে নাসিরুদ্দীন নসরৎ শাহের মৃত্যু হয়। ‘রিয়াজ-উস-সলাতীন’র মতে নসরৎ শাহ শেষ জীবনে ঘোরতর অত্যাচারী হয়ে ওঠেন এবং জনসাধারণের উপর নিষ্ঠুর অত্যাচার করতে শুরু করেন। এই সমস্ত কথা কতদূর সত্য তা বলা যায় না।



‘রিয়াজ’-এ লেখা আছে যে একদিন নসরৎ শাহ গোড়ের একনাকা নামক স্থানে তাঁর পিতার সমাধিক্ষেত্রে গিয়েছিলেন। এর আগে তিনি একজন খোজাকে কোন দোষের জন্য শাস্তি দিয়েছিলেন। এই খোজা অত্র খোজাদের সঙ্গে ষড়যন্ত্র করে এবং নসরৎ শাহ যখন একনাকা থেকে প্রাসাদে ফিরছিলেন, তখন নসরৎকে হত্যা করে। কিন্তু বুকাননের বিবরণীতে লেখা আছে, নসরৎ শাহ “was killed while asleep, by his servant Khwajeh Soray.” “Khwajeh Soray” বলতে বুকানন ‘খওয়াজা সেরা’ অর্থাৎ প্রাসাদের খোজাকে বুঝিয়েছেন। কারণ জলালুদ্দীন ফতেহ শাহের হত্যাকারীকেও তিনি ‘Khwajeh Soray’ বলেছেন। নসরৎ শাহ যে আততায়ীর হাতে নিহত হয়েছিলেন, তাতে সংশয়ের অবকাশ অল্প। তবে কীভাবে তিনি প্রাণ হারিয়েছিলেন, তা সঠিকভাবে বলা শক্ত।

নসরৎ শাহ যে একজন অত্যন্ত যোগ্য শাসক ছিলেন তাতে কোন সন্দেহ নেই। বাবর এবং আফগান নায়কবৃন্দ উভয় পক্ষের সঙ্গেই তিনি যেভাবে মৈত্রীর সম্পর্ক রক্ষা করেছিলেন, তা থেকে তাঁর কুশাগ্র কূটনীতিজ্ঞানের পরিচয় মেলে। স্ববীন্দ্রনাথ ভট্টাচার্য লিখেছেন, “Alau-d din Husain Shah's son and successor, Nasrat Shah ( 1519-32 A. D. ) appears to have been an indolent and tactless sovereign.” কিন্তু এরকম অহুমানের কোন ভিত্তিই নেই, ঐতিহাসিক তথ্য-প্রমাণ থেকে এর বিপরীত সিদ্ধান্তে আসতে হয়।

নসরৎ শাহ শুধুমাত্র কূটনীতির ক্ষেত্রে নয়, যুদ্ধের ক্ষেত্রেও সাফল্যের পরিচয় দিয়েছিলেন। অবশ্য বাবর তাঁর আত্মকাহিনীতে লিখেছেন যে ঘর্ষা ও গঙ্গা নদীর সঙ্গমস্থলে নসরৎ শাহের সৈন্যবাহিনী তাঁর বাহিনীর কাছে পরাজিত হয়েছিল। কিন্তু নসরৎ শাহের প্রতিপক্ষের উক্তির উপর নির্ভর করে নসরতের শক্তি ও যোগ্যতা সম্বন্ধে কোন ধারণা করে বসলে ভুল করা হবে। ঘর্ষার যুদ্ধ সম্বন্ধে আমরা কেবলমাত্র বাবরের বিবরণী ছাড়া আর কোন সূত্র স্বতঃস্ফূর্ত না পাচ্ছি, ততক্ষণ পর্যন্ত এদিককে চূড়ান্ত সিদ্ধান্তে উপনীত হওয়া চলে না। নসরতের নিজের পক্ষের বিবরণী অথবা নিরপেক্ষ বিবরণী পাওয়া গেলে প্রকৃত সত্য হয়তো খানিকটা ভিন্ন মূর্তি নিয়ে দেখা দেবে। হয়তো দেখা যাবে ঘর্ষার যুদ্ধে নসরতের সৈন্যবাহিনী বাবরের সৈন্যবাহিনীর তুলনায় কম কৃতিত্বের পরিচয় দেয় নি। এরকম ধারণার কারণ,

ঘর্ষরার যুদ্ধের পর বাবর নসরৎ শাহের সঙ্গে তাঁর পূর্বের সর্ভ অজুযায়ী সন্ধি করেছেন। অথচ এই যুদ্ধে জয়লাভ করার পরে বাবরের পক্ষে বাংলাদেশ জয় করার জন্তু এগিয়ে যাওয়াই ছিল স্বাভাবিক। কারণ নতুন নতুন রাজ্য জয় ছিল বাবরের চিরদিনের নেশা এবং ভারতবর্ষে আসার পর থেকে বাবরের প্রধান লক্ষ্যই হয়ে দাঁড়িয়েছিল রাজ্যবিস্তার। এই সময়ে তাঁর প্রতিপক্ষ আফগানরাও পর্যুদন্ত হয়েছিল। সুতরাং বাবরের বাংলা জয়ের জন্তু অগ্রসর হওয়ার পথে এদিক দিয়ে কোন বাধা ছিল না। যদি ধরে নেওয়া যায়, বাবরের কথা সম্পূর্ণ সত্য, তাহলেও নসরৎ শাহের গৌরব খর্ব হয় না। কারণ বাবর নিজেকে লিখেছেন যে বাংলার সৈন্তদের শক্তি এবং কামান চালানোর দক্ষতার কথা শুনে তিনি নিজের সৈন্তবাহিনীকে অসাধারণ রকম শক্তিশালী করে গঠন করেছিলেন। বাংলার সৈন্তবল যে কতখানি ছিল, সে সম্বন্ধে কিছুই জানা যায় না। সম্ভবত সীমান্তের ঘাঁটি রক্ষার জন্তু সাধারণত যত সৈন্ত থাকে, তা-ই ছিল। অতএব অধিকতর সৈন্ত নিয়ে গঠিত অপরিমিত শক্তি-সম্পন্ন বাহিনীর সঙ্গে যুদ্ধে তারা যদি পরাজিত হয়ে থাকে, তাহলেও তাদের দোষ দেওয়া যায় না। ঘর্ষরার যুদ্ধের পরেই বাবর যে নসরৎ শাহের সঙ্গে সন্ধি করলেন, এর থেকেও মনে হয় যে বাবর বাংলার এই সৈন্তবাহিনীর যোগ্যতার যে পরিচয় পেয়েছিলেন, তার থেকে বুঝতে পেরেছিলেন তাদের নিজেদের দেশে বৃহত্তর সৈন্তবাহিনীর সঙ্গে যুদ্ধ করলে তাঁর সুবিধা না হওয়ার সম্ভাবনাই বেশী। বাবর সন্ধি করার সপক্ষে বর্ষা আসন্ন হওয়ার অছিল। দেখানোতে এই সন্দেহ দৃঢ় হয়। অতএব বাবরের সঙ্গে সংঘর্ষ ও তার পরিণতিকে কোন মতেই নসরৎ শাহের পক্ষে অগৌরবের বিষয় বলা যায় না।

আসাম-অভিযান নসরৎ শাহের আর একটি গৌরবময় কীর্তি। অসমীয়া ব্রহ্মীগুলির সাক্ষ্য থেকেই জানা যায় যে, নসরৎ শাহ যতদিন জীবিত ছিলেন, ততদিন বাংলার সৈন্তবাহিনী আসামের সৈন্তবাহিনীকে পরাজিত ও কোণঠাসা করে রেখেছিল। নসরতের পক্ষে বিশেষ গৌরবের বিষয় এই যে, আসাম রাজ্যের সঙ্গে যুদ্ধে তাঁর বিজ্ঞতকীর্তি পিতা শোচনীয় ব্যর্থতা বরণ করেছিলেন, কিন্তু তিনি এই ব্যাপারে সাফল্য অর্জন করেছিলেন।

হোসেন শাহের মত নসরৎ শাহের রাজত্বকালেও পত্নীগীজরা বাংলাদেশে বাণিজ্যের ঘাঁটি স্থাপন করার চেষ্টা করে, কিন্তু এবারও তাদের চেষ্টা সার্থক

হয় নি। বিভিন্ন সমসাময়িক বা প্রামাণিক পত্ৰগীজ গ্রন্থে এ সম্বন্ধে যে বিবরণ পাওয়া যায়, নীচে আমরা তা সংক্ষেপে লিপিবদ্ধ করলাম।

যদিও সিলভেরার বাংলাদেশে আগমন ফলশ্রুত হয়নি, তবু তার পর থেকেই পত্ৰগীজদের মধ্যে প্রতি বছর বাংলাদেশে একখানি করে সওদাগরী জাহাজ পাঠাবার প্রথা চালু হয়। ১৫২৬ খ্রীষ্টাব্দে পত্ৰগীজ গভর্নর লোপো ভাজ-দে-সম্পয়ো রুই-ভাজ-পেরেরা নামে এক ব্যক্তির পরিচালনাধীন এক বাণিজ্য-জাহাজ বাংলায় পাঠান। পেরেরা চট্টগ্রামে পৌঁছে দেখেন সেখানে খাজা শিহাবুদ্দীন নামে একজন ইরানী বণিকের একটি জাহাজ রয়েছে; এটি পত্ৰগীজ রীতিতে তৈরী। এর উদ্দেশ্য, অস্ত্রাস্ত্র বাণিজ্য-জাহাজ এর দ্বারা লুণ্ঠ করে তার দোষ পত্ৰগীজদের ঘাড়ে চাপানো। পেরেরা এই জাহাজটি অধিকার করে নিজের সঙ্গে নিয়ে চলে গেলেন।

এর পর ১৫২৮ খ্রীষ্টাব্দে মাতিম-আফন্সো-দে-মেলো নামে একজন পত্ৰগীজ কাপ্তেন তাঁর জাহাজ নিয়ে অগ্ন জায়গায় যেতে যেতে ঝড়ের দরুণ বাংলার উপকূলের কাছে এক জায়গায় এসে পড়েন। এখানকার কয়েক জন জেলে তাঁকে চট্টগ্রামে পৌঁছে দেবার নাম করে চকরিয়ায় নিয়ে যায়। এখানকার শাসনকর্তা খোদা বখ্শ খান (পত্ৰগীজ বিবরণে Codavascam নামে উল্লিখিত)\* এই সময় একজন প্রতিবেশী তুর্কমীর সঙ্গে যুদ্ধে লিপ্ত ছিলেন। পত্ৰগীজদের পেয়ে তিনি তাদের বন্দী করে বলেন যে তাঁর হয়ে যুদ্ধ করলে তিনি তাদের মুক্তি দেবেন ও নিরাপদে তাদের গন্তব্যস্থলে চলে যেতে দেবেন। পত্ৰগীজরা তাঁর হয়ে যুদ্ধ করে তাঁকে যুদ্ধে জেতাল। কিন্তু খোদা বখ্শ খান পত্ৰগীজদের মুক্তি না দিয়ে বিশ্বাসঘাতকতা করে চট্টগ্রামের দক্ষিণ-পূর্ব দিকে অবস্থিত সোরে শহরে বন্দী করে রাখলেন।

এদিকে দুয়ার্তে-মেনদেস-ডাসকনসেলস ও জোআঁ-কোএলহো নামে আফন্সো-দে-মেলোর দলের দুজন লোক তাঁদের জাহাজ নিয়ে চকরিয়ায় এসে উপস্থিত হন এবং তাঁদের জাহাজের সমস্ত জিনিস খোদা বখ্শ খানকে দিয়ে

\*জনাব এ. টি. এম রুহল আমীরের মতে Codavascam হচ্ছেন আসলে “শাহজাদ-খানী-বংশীয়” হুলতান কুতুব-ই-আলম (মাসিক মোহাম্মদী, আশ্বিন, ১৩৭১, পৃ: ৭১২-৭১৩ জঃ)। কিন্তু কিংবদন্তীর বাইরে যেমন এই কুতুব-ই-আলমের অস্তিত্বের কোন প্রমাণ নেই, তেমনি Codavascam-এর অধিকারভুক্ত অঞ্চলের যে বিবরণ পত্ৰগীজ সূত্রজালিতে পাই, তা “শাহজাদ-খানী হুলতান”দের অধীন ছিল বলে প্রমাণ পাওয়া যায় না। ধনিভদ্রের দিক থেকেও বলা যায় যে, “কুতুব-ই-আলম” (বা “কুতুব আলম”) Codavascam-এ পরিণত হওয়া সম্ভব নয়।

দে-মেলোকে মুক্ত করার চেষ্টা করে। কিন্তু খোদা বখ্শ তাতে সন্তুষ্ট না হয়ে আরও চান। কিন্তু তাঁদের কাছে আর কিছুই ছিল না। দে-মেলো তাঁর দলের সঙ্গে পালিয়ে এসে ভাসকনসেলস ও কোএলহোর সঙ্গে যোগ দেবার চেষ্টা করেন, কিন্তু এই চেষ্টা ব্যর্থ হয়। উপরন্তু তাঁর রূপবান্ ও তরুণবয়স্ক ভ্রাতুষ্পুত্র গঞ্জলো-ভাস-দে-মেলোকে ব্রাহ্মণেরা ধরে দেবতার কাছে বলি দেয়।

এই সময়ে হুনো-দা-কুন্হা ছিলেন গোয়ার পত্নীগীজ গভর্নর। তিনি বাংলায় বাণিজ্য শুরু করার ব্যাপারে বিশেষ উৎসাহী ছিলেন। পূর্বোক্ত ইরানী বণিক খাজা শিহাবুদ্দীন তাঁর কাছে নিজের লুঠ হওয়া জাহাজটি জিনিসপত্র সমেত ফিরে চান এবং বলেন যে ফিরে পেলে ৩০০০ ক্রুজেডোর (পত্নীগীজ মুদ্রা) বিনিময়ে তিনি আফমো-দে-মেলোকে মুক্ত করিয়ে দেবেন। পত্নীগীজ গভর্নর তাঁর জাহাজ জিনিসপত্র সমেত ফিরিয়ে দিলেন। খাজা শিহাবুদ্দীন ১৫২২ খ্রীষ্টাব্দে আফমো-দে-মেলোকে মুক্ত করিয়ে তাঁর ভাই খাজা শকুবু-উল্লার সঙ্গে গোয়ায় পৌঁছে গেলেন। এরপর তিনি পত্নীগীজদের বিশেষ বন্ধু হয়ে পড়লেন। বাংলার সুলতান নসরৎ শাহের সঙ্গে একটা গোলযোগপূর্ণ বিষয়ের নিষ্পত্তি করার জন্তু এবং নিরাপদে ওরমুজ যাবার জন্তু তিনি পত্নীগীজ জাহাজের সাহায্য চাইলেন এবং বললেন তাঁকে সাহায্য করলে তিনি পত্নীগীজরা যাতে বাংলায় বাণিজ্য করার সুযোগ-সুবিধা লাভ করে, এমনকি যাতে চট্টগ্রামে দুর্গ নির্মাণ করার অসুবিধা লাভ করে, তার জন্তু বাংলার সুলতানের উপর তাঁর প্রভাব প্রয়োগ করবেন। পত্নীগীজ গভর্নর এই প্রস্তাবে রাজী হন। কিন্তু এ সম্বন্ধে আর কিছু ঘটবার আগেই নসরৎ শাহের মৃত্যু হয়। (Campos, Portugese in Bengal, pp. 30-33 দ্রষ্টব্য)

নসরৎ শাহ ধর্মপ্রাণ মুসলমান ছিলেন। গোড়ে তিনি অনেকগুলি মসজিদ নির্মাণ করিয়েছিলেন। গোড়ে ‘কদুম্ রসুল’ নামে যে বিখ্যাত ভবনটি আছে, সেটি তিনিই নির্মাণ করিয়েছিলেন বলে গোলাম হোসেন থেকে শুরু করে আবদ আলী পর্যন্ত সমস্ত ঐতিহাসিক লিখেছেন। এই ভবনেরই প্রকোষ্ঠে একটি কালো কারুকর্ষণচিত মর্মর-বেদীর উপরে হজরৎ মুহম্মদের “পদচিহ্ন”-উৎকীর্ণ একটি পাথর ছিল। এই প্রকোষ্ঠের দরজার মাথায় একটি শিলালিপিতে লেখা আছে যে সুলতান নাসিরুদ্দীন নসরৎ শাহ ৯৩৭ হিজরায় “এই পবিত্র মক্কা এবং এর পাথর, যার উপরে রসুলের পদচিহ্ন আছে, তা উৎকীর্ণ করিয়েছিলেন।” সম্ভবত এর থেকেই ঐতিহাসিকেরা মনে করেছেন যে

নসরৎ শাহই ভবনটির নির্মাতা। কিন্তু এই ভবনের ফটকের উপরে একটি শিলালিপি ছিল, তাতে লেখা ছিল যে সুলতান আলাউদ্দীন হোসেন শাহের রাজত্বকালে ৯০২ হিজরার ২২শে মহরম তারিখে “এই ফটক নিমিত হয়েছিল”। এখনও এই ভবনের প্রবেশপথের বা পাশের ভিতরের দিকে একটি শিলালিপি রয়েছে, তাতে লেখা আছে সুলতান শামসুদ্দীন যুসুফ শাহের রাজত্বকালে ১৮ই রমজান তারিখে মিশাদ খান “এই মসজিদ তৈরী করিয়েছিলেন।” অনেকে মনে করেন, শেষোক্ত ছ’টি শিলালিপি মূলে এই ভবনে ছিল না, কিন্তু এই মতের অমূল্য কোন প্রমাণ নেই। আমাদের মনে হয়, ভবনটি শামসুদ্দীন যুসুফ শাহের রাজত্বকালে মিশাদ খানই প্রথম নির্মাণ করান, তখন এটি একটি সাধারণ মসজিদ ছিল। পরে আলাউদ্দীন হোসেন শাহের রাজত্বকালে এর ফটকটি নিমিত হয়। নসরৎ শাহ কেবলমাত্র হজরৎ মুহম্মদের পদচিহ্ন-সংবলিত পাথরটি ও যে মঞ্চের উপরে সেটি রক্ষিত ছিল, সেইটি স্থাপন করেছিলেন এবং তাঁর সময় থেকেই এই মসজিদটি ‘কদম্ রশূল’ নামে পরিচিত হয়; এর আদি নির্মাতা তিনি নন।

যা হোক, নসরৎ শাহ গোড়ের অগ্র অনেক প্রসিদ্ধ প্রাসাদ ও মসজিদ নির্মাণ করান। তার মধ্যে বিখ্যাত বারহুয়ারী মসজিদ বা বড় সোনা মসজিদ অন্যতম। এটি ৯৩২ হিজরা বা ১৫২৬ খ্রীষ্টাব্দে সমাপ্ত হয়।

সমসাময়িক বাংলা সাহিত্যের অনেক জায়গায় নসরৎ শাহের নাম পাওয়া যায়। শ্রীকর নন্দীর মহাভারতে এইভাবে নসরৎ শাহের নাম পাই,

নসরৎ সাহ নাম অতি মহারাজা।

পুত্র সম রক্ষা করে সকল পরজা ॥

রূপতি হুসন সাহ তনয় স্তমতি।

সামদানদণ্ডভেদে পালে বহুমতী ॥

এর পাঠান্তর :—

নসরৎ সাহ তাত অতি মহারাজা।

রামবৎ নিত্য পালে সব প্রজা ॥

রূপতি হুসেন সাহ হএ ক্রিতিপতি।

সামদানদণ্ডভেদে পালে বহুমতী ॥

অনেকের ধারণা, নসরৎ শাহ নিজের একখানি মহাভারত লিখিয়েছিলেন

কোন কবিকে দিয়ে। এরকম ধারণার কারণ, কবীজ্ঞ পরমেশ্বরের মহাভারতের কোন কোন পুঁথিতে এই পয়ারটি পাওয়া যায়,

শ্রীযুত নায়ক সে যে নসরৎ খান।

রচাইল পঞ্চালী যে গুণের নিদান ॥

কিন্তু এই নসরৎ খান নসরৎ শাহ নন, ইনি চট্টগ্রামের শাসনকর্তা পরাগল খানের পুত্র, যিনি ছুটি খান নামে বিশেষভাবে পরিচিত। এই নসরৎ খান বা ছুটি খান শ্রীকর নন্দীকে দিয়ে যে মহাভারত লিখিয়েছিলেন, তারই কথা এই পয়ারটিতে বলা হয়েছে এবং কালক্রমে এই পয়ারটি কবীজ্ঞ পরমেশ্বরের মহাভারতের অর্বাচীন পুঁথিতে প্রবেশ করেছে।

নসরৎ শাহের সময়ে একজন বড় পদকর্তা ছিলেন। ইনি কবিশেখর, কবিরঞ্জন এবং বিজ্ঞাপতি এই তিন নামেই পদ লিখতেন। এঁর কয়েকটি পদের ভণিতায় নসরৎ শাহের নাম পাওয়া যায়। সেগুলি নীচে উদ্ধৃত করছি,

(১) কবিশেখর ভণ অপরূপ রূপ দেখি।

রাএ নসরৎ শাহ ভুললি কমলমুখী ॥

(২) বিজ্ঞাপতি ভাণি

অশেষ অজুমানি

সুলতান শাহ নসীর মধুপ ভুলে কমলা-বাণী ॥

(৩) নসীরা শাহ সে জানে

যারে হানল মদনবাণে

চিরঞ্জীব রহ পঞ্চগৌড়েশ্বর কবি বিজ্ঞাপতি ভাণে ॥

সম্ভবত এই কবি নসরৎ শাহের দরবারে চাকরী করতেন। আগেই এঁর সম্বন্ধে আমরা বিস্তৃতভাবে আলোচনা করেছি।

প্রসঙ্গক্রমে উল্লেখযোগ্য, নসরৎ শাহের প্রশস্তি-সংবলিত একটি পদের ভণিতায় কবির নাম “শেখ কবীর” লেখা রয়েছে। এর থেকে ডঃ এনামুল হক মনে করেন যে শেখ কবীর নামে নসরৎ শাহের একজন সমসাময়িক কবি ছিলেন এবং তিনি নসরৎ শাহের পৃষ্ঠপোষক লাভ করেছিলেন। কিন্তু ডঃ শহীদুল্লাহ মনে করেন এখানে “শেখ কবীর” “কবিশেখর”-এর বিকৃতি। এই অজুমানিই স্বার্থ বলে মনে হয় (এ সম্বন্ধে পরিশিষ্টে আলোচনা দ্রষ্টব্য)।

নসরৎ শাহের রাজ্যের আয়তন তাঁর পিতার রাজ্যের তুলনায় কম ছিল না, বরং কোন কোন নতুন জায়গা তাঁর রাজ্যের অন্তর্ভুক্ত হয়েছিল। হোসেন

শাহের রাজ্যের পশ্চিম সীমারেখা বর্তমান বিহার রাজ্যের পশ্চিম সীমারেখাকে কোথাও অতিক্রম করে নি বলে মনে হয়। কিন্তু নসরৎ শাহের রাজ্যের মধ্যে বর্তমান উত্তর প্রদেশের অন্তর্গত কোন কোন স্থানও অন্তর্ভুক্ত ছিল। উত্তর প্রদেশের খরিদ বা সিকন্দরপুরে নসরৎ শাহের শিলালিপি পাওয়া গিয়েছে এবং 'রিয়াজ'-এর মতে নসরৎ শাহ উত্তর প্রদেশের ভরাইচ বা বহরাইচে কুংবু থানের অধীনে এক বিরাট সৈন্যবাহিনী পাঠিয়েছিলেন।

সমসাময়িক পত্নীগীজ বিবরণ থেকে জানা যায় যে, চকরিয়া অঞ্চল এবং চট্টগ্রাম বন্দর নসরৎ শাহের রাজ্যের অন্তর্ভুক্ত ছিল।

নসরৎ শাহের যে সব মুদ্রা এ পর্যন্ত পাওয়া গিয়েছে, সেগুলি এই সমস্ত জায়গার টাকশাল থেকে উৎকীর্ণ হয়েছিল,

- (১) নসরতাবাদ, (২) ফতেহাবাদ (ফরিদপুর), (৩) হোসেনাবাদ, (৪) খলিফতাবাদ, (৫) মুহম্মদাবাদ, (৬) মাহমুদাবাদ, (৭) বারবকাবাদ।

এদের মধ্যে বারবকাবাদ ও নসরতাবাদ উত্তরবঙ্গে অবস্থিত বলে 'আইন-ই-আকবরী' থেকে জানা যায়। খলিফতাবাদ বাগেরহাটের নামান্তর।

এই সমস্ত জায়গায় নসরৎ শাহের শিলালিপি আবিষ্কৃত হয়েছে:—

- (১) গোড়, (২) সোনারগাঁও (ঢাকা), (৩) মজলকোট (বর্ধমান), (৪) মোলানাতলী (মালদহ), (৫) বাঘা (রাজশাহী), (৬) আশরফপুর (ঢাকা), (৭) নবগ্রাম (পাটনা), (৮) সিকন্দরপুর (খরিদ, উত্তর প্রদেশ),\* (৯) দেওতলা (মালদহ), (১০) মালদহ, (১১) মুর্শিদাবাদ, (১২) সাতগাঁও (হুগলী), (১৩) সন্তোষপুর (হুগলী), (১৪) বেগুসরাই (জিহত)।

এর থেকে নসরৎ শাহের রাজ্যের আয়তন সম্বন্ধে বেশ স্পষ্ট ধারণা করা যায়।

এই সব শিলালিপিতে নসরৎ শাহের এই সব কর্মচারীর নাম পাওয়া যায়:—

- (১) তকীউদ্দীন  
(২) মিঞা মুআজ্জম  
(৩) মুবারক খান  
(৪) ফতে খান  
(৫) মজলিস সাঈদ

\* সিকন্দরপুরে প্রাপ্ত শিলালিপির ভাষার ধরন দেখে ডঃ দানী এই অঞ্চলে নসরৎ শাহের সার্বভৌম অধিকার ছিল কিনা, সে সম্বন্ধে সম্বন্ধে প্রকাশ করেছেন (Bibliography of the Muslim Inscriptions of Bengal, p. 70)। এই সম্বন্ধে ভিত্তি খুবই দুর্বল।

- (৬) খলিক খান
- (৭) মজলিস সিরাজ
- (৮) শের-এ-মালিক
- (৯) সৈয়দ জমালুদ্দীন
- (১০) মুখভিয়ার খান
- (১১) মজলিস খানওয়ার
- (১২) হালান খান
- (১৩) আনওয়ার খান

এছাড়া বাবরের আশ্বকাহিনী থেকে নসরৎ শাহের এই সমস্ত দূত, কর্মচারী, আঞ্চলিক শাসনকর্তা ও সৈন্যাদ্যক্ষের নাম পাওয়া যায়—

- (১) ইসমাইল মিভা
- (২) আবুল কতেহ্
- (৩) হোসেন খান লক্ষর উজীর
- (৪) মখদুম-ই-আলম

(৫) মুন্সেরের শাহজাদা ( ইনি সম্ভবত নসরৎ শাহের পুত্র, কিন্তু এর নাম জানা যায় না )।

#### (৬) বসন্ত রাও

পত্নীগীজ বিবরণগুলি থেকে জানা যায় যে চট্টগ্রামের নিকটবর্তী চকরিয়ায় খোদা বখ্শ খান নামে নসরৎ শাহের অবীনহ একজন শাসনকর্তা থাকতেন এবং তিনি এক বিস্তীর্ণ অঞ্চল শাসন করতেন। ‘রিয়াজ-উন্-সলাতীনে’র মতে কুংব্ খান নামে নসরৎ শাহের একজন সেনাপতি ছিলেন। আকাস খানের ‘তারিখ-ই-শেরশাহী’তে গিয়াসুদ্দীন মাহমুদ শাহের কুংব্ খান নামে একজন সেনাপতির উল্লেখ পাওয়া যায়; তিনি ও ইনি সম্ভবত অভিন্ন। অসমীয়া বুরঞ্জিতে “ভুরবক” নামে নসরৎ শাহের আর একজন সেনাপতির নাম উল্লিখিত হয়েছে। এর নাম অল্প কোথাও পাওয়া যায় না।

নাসিরুদ্দীন নসরৎ শাহ সম্বন্ধে যেটুকু তথ্য পাওয়া যায়, সেগুলির পরিচয় দেওয়া হল। এই সমস্ত তথ্য থেকে সুস্পষ্টভাবে বোঝা যাচ্ছে যে নসরৎ শাহ তাঁর পিতারই মত নানা ষোগ্যতার অধিকারী একজন শ্রেষ্ঠ নরপতি ছিলেন। বাবরও তাঁর আশ্বকাহিনীতে লিখেছেন যে তাঁর সমসাময়িক শ্রেষ্ঠ ভারতীয়



রাজাদের মধ্যে নসরৎ শাহ অন্ততম। অকালে আকস্মিকভাবে নসরৎ শাহের মৃত্যু না ঘটলে হয়তো তিনি তাঁর পিতার সমান ঘশই অর্জন করতেন।

### আলাউদ্দীন ফিরোজ শাহ (২য়)

নাসিরুদ্দীন নসরৎ শাহের মৃত্যুর পর তাঁর পুত্র আলাউদ্দীন ফিরোজ শাহ সিংহাসনে আরোহণ করেন। এর আগে পঞ্চদশ শতাব্দীর প্রথমে শিহাবুদ্দীন বায়াজিদ শাহের পুত্র আলাউদ্দীন ফিরোজ শাহ সুলতান হয়েছিলেন। সুতরাং একে দ্বিতীয় আলাউদ্দীন ফিরোজ শাহ বলা উচিত। কিন্তু এর রাজত্ব প্রথম আলাউদ্দীন ফিরোজ শাহেরই মত স্বল্পস্থায়ী হয়েছিল।

দ্বিতীয় আলাউদ্দীন ফিরোজ শাহের কতকগুলি মুদ্রা ইতিপূর্বে পাওয়া গিয়েছিল, এদের মধ্যে সবগুলিরই তারিখ ৯৩৯ হিজরা। বর্ধমান জেলার কালনায় এর একটি শিলালিপি পাওয়া গিয়েছে, এটি ৯৩৯ হিজরার ১লা রমজান বা ২৭শে মার্চ, ১৫৩৩ খ্রীষ্টাব্দে উৎকীর্ণ হয়েছিল। এটি আলাউদ্দীন ফিরোজ শাহের উজীর ও সেনাপতি মালিক উলুগ মসনদ খান স্থাপন করেছিলেন। ফিরোজ শাহের পিতা নসরৎ শাহের ৯৩৮ হিঃ পর্যন্ত মুদ্রা পাওয়া গিয়েছে এবং ৯৩৯ হিঃ থেকেই আবার ফিরোজের পরবর্তী সুলতান গিয়াসুদ্দীন মাহমুদ শাহের মুদ্রা শুরু হয়েছে। এই সমস্ত বিষয় থেকে সকলেই মনে করেছিলেন যে ফিরোজ শাহ মাত্র ৯৩৯ হিজরার কিছু সময় রাজত্ব করেছিলেন। কিন্তু সম্প্রতি আলাউদ্দীন ফিরোজ শাহের ৯৩৮ হিজরায় উৎকীর্ণ কতকগুলি মুদ্রাও পাওয়া গিয়েছে (JASP, Vol. IV, 1959, pp. 173-180 এবং Varendra Research Society's Monographs, No. 6, pp. 16-18 দ্রষ্টব্য)। অতএব ৯৩৮ হিজরাতেই (১৫৩০-৩১ খ্রীঃ) নসরৎ শাহের মৃত্যু ও ফিরোজ শাহের সিংহাসনে আরোহণ ঘটেছিল এবং অন্তত কালনা শিলালিপির তারিখ অর্থাৎ ৯৩৯ হিঃর নবম মাস পর্যন্ত ফিরোজ শাহ রাজত্ব করেছিলেন। 'রিফাজ'-এর মতে ফিরোজ শাহ মাত্র তিন মাস রাজত্ব করেছিলেন। বলা বাহুল্য এ কথা সত্য হতে পারে না। বুকানন-বিবরণীতে লেখা আছে "Firuz Shah governed nine months." এই কথা সত্য হলেও হতে পারে। কিন্তু সেক্ষেত্রে বলতে হবে ফিরোজ শাহের ৯৩৮ হিজরার মুদ্রাগুলি তাঁর রাজত্বের প্রথম মাসে উৎকীর্ণ হয়েছিল এবং কালনার শিলালিপিটি সম্পূর্ণ হবার অব্যবহিত পরেই তাঁর মৃত্যু হয়।

বাংলা সাহিত্যের ইতিহাসে এই ফিরোজ শাহের নাম সুপরিচিত। কারণ সর্বপ্রথম বাংলা কালিকামঙ্গল বা বিজ্ঞানসুন্দর কাব্য এই ফিরোজ শাহেরই আজ্ঞায় লেখা হয়েছিল। এর লেখক দ্বিজ শ্রীধর কবিরাজ। তিনি ফিরোজ শাহকে (তঁার কাব্যের মধ্যে “রাজা শ্রীপেরোজ সাহা” এবং “ছিরি পেরোজ সাহা বিদিত যুবরাজ” বলেছেন এবং ফিরোজ শাহের পিতা হিসাবে নসীর (নসরৎ) শাহের নাম করেছেন। কেউ কেউ মনে করেন ফিরোজ যখন যুবরাজ ছিলেন, তখন শ্রীধর কাব্য রচনা শুরু করেন, তিনি রাজা হবার পরে কাব্য রচনা শেষ হয়। কিন্তু এই ধারণা ঠিক নয়। কারণ শ্রীধর তঁার ‘কালিকামঙ্গল কাব্যে’ অনেক ক্ষেত্রে ফিরোজকে একবার “রাজা” বলে তার অব্যবহিত পরেই “যুবরাজ” বলেছেন। এর থেকে স্পষ্ট বোঝা যায় যখন নসরৎ শাহ বাংলার সুলতান (১৫১৯-১৫৩২ খ্রীঃ) এবং ফিরোজ শাহ যুবরাজ, সেই সময়ে ফিরোজের নির্দেশে শ্রীধর কালিকামঙ্গল রচনা করেন; তিনি ফিরোজকে স্তুতিচ্ছলে “রাজা” বলেছেন। শ্রীধর সম্ভবত চট্টগ্রাম অঞ্চলের লোক, কারণ তঁার কালিকামঙ্গলের সব পুঁথিই চট্টগ্রাম অঞ্চলে পাওয়া গিয়েছে। এর থেকে মনে হয়, পিতার রাজত্বকালে ফিরোজ চট্টগ্রাম অঞ্চলের শাসনকর্তা ছিলেন এবং সেই সময়েই তিনি শ্রীধরকে দিয়ে এই কাব্যখানি লেখান।

অসমীয়া ব্রজবীর সাক্ষ্য বিশ্লেষণ করলে জানা যায় যে নসরৎ শাহের রাজত্বকালে বাংলার সৈন্যবাহিনী আসামে যে অভিযান শুরু করেছিল, তা ফিরোজ শাহের রাজত্বকালেও অপ্রতিহত গতিতে চলেছিল।

ইতিপূর্বে বাংলার সৈন্যবাহিনীর যে জয়লাভের কথা উল্লেখ করেছি, তার পরে তারা আসামের ভিতর দিকে অগ্রসর হয়। মুসলমানরা দক্ষিণকোলে ব্রহ্মপুত্র পার হন এবং কালিয়াবারে পৌঁছোলো। এই সময় বর্ষা এসে যাওয়াতে তারা অগ্রগতি বন্ধ করতে বাধ্য হল। ১৫৩২ খ্রীঃ অক্টোবর মাসে তারা উত্তর-কোলে ফিরে এল এবং কিছুদিনের মধ্যেই ঘীলাধরিতে (দরং জেলার বিশ্ণুনাথের উত্তর-পশ্চিমে অবস্থিত) গিয়ে হাজির হল। শত্রুর অগ্রগতি দেখে অহোমরাজ বিচলিত হয়ে বুর্াই নদীর মোহানা পাহারা দেবার জন্ত এক শক্তিশালী সৈন্যবাহিনী পাঠালেন এবং পরিত্রা কাটালেন, কিন্তু মুসলমানরা তাদের মতলব পালাটে ফেলল। তারা ব্রহ্মপুত্রের দক্ষিণ তীরে সরে গিয়ে সালা দুর্গ অবরোধ করল। দুর্গের চারপাশের ঘরবাড়ীগুলি তারা পুড়িয়ে ফেলল এবং ঝড়ের মত তীব্রবেগে আক্রমণ চালিয়ে দুর্গ দখল করে নিতে চেষ্টা করল, কিন্তু দুর্গের অধ্যক্ষ

তাদের উপর গরম জল ঢেলে দিয়ে তাদের প্রচেষ্টা ব্যর্থ করে দিলেন। দু'মাস ইতস্তত খণ্ডযুদ্ধ চলার পর একটি বৃহৎ স্থলযুদ্ধ হয়। অহোমরা ৪০০ হাতী নিয়ে মুসলমান অধিরোহী ও গোলন্দাজ সৈন্যদের সঙ্গে যুদ্ধ করল। কিন্তু মুসলমানরা এই যুদ্ধে সম্পূর্ণভাবে জয়ী হল। অহোমরা পরাজিত হয়ে দুর্গের মধ্যে আশ্রয় নিল। ( Mughal North-East Frontier Policy, Sudhindra Nath Bhattacharya, pp. 90-91 দ্রষ্টব্য )।

দ্বিতীয় আলাউদ্দীন ফিরোজ শাহের রাজত্বকালের আর কোন ঘটনার কথা এ পর্যন্ত জানা যায় নি।

মুদ্রা ও শিলালিপির সাক্ষ্য থেকে দেখা যায় যে, পরবর্তী সুলতান গিয়াসুদ্দীন মাহমুদ শাহ আলাউদ্দীন হোসেন শাহের পুত্র এবং আলাউদ্দীন ফিরোজ শাহের পিতৃব্য। রিয়াজ-উল-সলাতীন এবং বুকাননের বিবরণীতে লেখা আছে যে, পিতৃব্য মাহমুদ ভ্রাতৃপুত্র ফিরোজকে হত্যা করে সিংহাসন অধিকার করেছিলেন। এই কথা সম্পূর্ণ সত্য, কারণ সমসাময়িক ও প্রামাণিক পত্ৰগীজ বিবরণগুলিতে এই বিষয়ের উল্লেখ আছে।

ফিরোজ শাহের উজীর ও সেনাপতি এবং কালনা শিলালিপির নির্মাতা মসনদ খান ভিন্ন তাঁর অত্র কোন কর্মচারীর নাম এ পর্যন্ত জানা যায় নি।

ফিরোজ শাহের মুদ্রাগুলি ফতেহাবাদ (ফরিদপুর), নসরতাবাদ (উত্তরবঙ্গে অবস্থিত), হোসেনাবাদ ও মুহম্মদাবাদের টাকশাল থেকে উৎকীর্ণ হয়েছিল।

### গিয়াসুদ্দীন মাহমুদ শাহ

‘রিয়াজ-উল-সলাতীন’র মতে গিয়াসুদ্দীন মাহমুদ শাহ আলাউদ্দীন হোসেন শাহের আঠারো জন পুত্রের মধ্যে একজন এবং নসরৎ শাহ তাঁকে আমীর পদবী দান করেছিলেন। সাহজাপুরের (গোড়) শিলালিপি থেকে জানা যায় যে ইনি আব্দু শাহ ও আবদুল বদর নামেও অভিহিত হতেন।

গিয়াসুদ্দীন মাহমুদ শাহ ১৩৯ হিজরার আগে বাংলার সুলতান হন নি। কিন্তু তাঁর ১৩৩-১৩৫ ও ১৩৮ হিজরায় মুদ্রিত মুদ্রা পাওয়া গিয়েছে, এর থেকে কেউ কেউ মনে করেন নসরৎ শাহ তাঁকেই সিংহাসনের উত্তরাধিকারী মনোনীত করেছিলেন, আবার কারও কারও মতে তিনি নসরৎ শাহের রাজত্বকালে বিদ্রোহ ঘোষণা করেছিলেন। নসরৎ শাহ তাঁর পুত্রকে সিংহাসনের উত্তরাধিকারী মনোনীত না করে ভাইকে করবেন, এটা খুব সম্ভবপর বলে মনে হয়

না। বিশেষত, নসরৎ শাহের রাজত্বকালে রচিত শ্রীধরের কালিকামঙ্গলে ফিরোজ শাহকে “যুবরাজ” বলা হয়েছে, একথাও মনে রাখতে হবে। সুতরাং নসরতের রাজত্বকালে গিয়াসুদ্দীন মাহমুদ শাহ বিক্রোহ ঘোষণা করেছিলেন, এইটিই বেশী সম্ভাব্য বলে মনে হয়। অবশ্য এইসব মূত্রার তারিখ ঠিকমত পড়া হয়েছে কিনা, তাতেও সন্দেহের অবকাশ আছে।

‘রিয়াজ-উস-সলাতীনে’ গিয়াসুদ্দীন মাহমুদ শাহ সম্বন্ধে কিছু কিছু বিবরণ পাওয়া যায়। বলা বাহুল্য এগুলি সর্বাংশে নির্ভরযোগ্য নয়। গিয়াসুদ্দীন শের শাহ ও হুমায়ূনের সমসাময়িক এবং তাঁদের সঙ্গে তাঁর ভাগ্য পরিণামে এক স্ত্রে জড়িত হয়ে পড়ে। এই কারণে শের শাহ ও হুমায়ূন সংক্রান্ত প্রামাণিক ইতিহাসগ্রন্থগুলিতে তাঁর সম্বন্ধে অনেক তথ্য পাওয়া যায়। এই বইগুলির মধ্যে আকাস খান সরওয়ানী রচিত ‘তারিখ-ই-শেরশাহী’ প্রধান। পতুগীজ বণিকদের সঙ্গে মাহমুদ শাহের যোগাযোগ ছিল বলে পতুগীজ বিবরণগুলির মধ্যেও তাঁর সম্বন্ধে কিছু কিছু সংবাদ পাওয়া যায়।

‘রিয়াজ-উস-সলাতীনে’র মতে গিয়াসুদ্দীন মাহমুদ শাহ সিংহাসনে আরোহণ করলে তাঁর ভগ্নীপতি মখদুম-ই-আলম ত্রিছতে বিক্রোহ করেছিলেন এবং ফিরোজ শাহের হত্যার প্রতিশোধ নেবার স্বল্প ঘোষণা করেছিলেন। আকাস খান সরওয়ানী ‘তারিখ-ই-শেরশাহী’তে (Eng. Translation, 2nd Ed., p. 44) লিখেছেন শের খান দিল্লী থেকে পালিয়ে যখন বিহারে এসেছিলেন, তখন বাংলার সুলতানের অধীনস্থ হাজীপুরের সরলস্কর মখদুম আলমের সঙ্গে তাঁর বন্ধুত্ব হয়েছিল; বাংলার সুলতান এই সময় মখদুম আলমের উপর কোন কারণে অসন্তুষ্ট হয়েছিলেন। এদিকে বাংলার সুলতান আফগানদের হাত থেকে বিহার প্রদেশ জয় করার মূলব আটছিলেন। মাহমুদ শাহ মুন্ডের সরলস্কর কুৎব খানকে পাঠিয়েছিলেন বিহার জয় করবার জন্ত। শের খান মাহমুদ শাহের এই আচরণের বিরুদ্ধে প্রতিবাদ জানিয়েছিলেন, কিন্তু কুৎব খান তাতে কর্ণপাত করেন নি।

‘তারিখ ই-শের শাহী’তে লেখা আছে (Ibid, pp. 44-45) যে শের শাহ যখন সন্ধি স্থাপনে অক্ষম হলেন, তখন তিনি আফগানদের সঙ্গে মিলে কুৎব খানের সঙ্গে যুদ্ধ করে তাঁকে বধ করলেন। মখদুম আলম কুৎব খানকে সাহায্য করেন নি বলে মাহমুদ শাহ তাঁর বিরুদ্ধে এক সৈন্তবাহিনী পাঠালেন। এই সময় শের খান বিহারের অধিপতি জলাল খান লোহানীর অমাত্য ও

অভিভাবক ছিলেন। 'তারিখ-ই-শের শাহী'র মতে শের খান লোহানীদের প্রতিকূলতার জন্তু নিজে গিয়ে মখদুম আলমকে সাহায্য করতে পারেন নি। তার বদলে তিনি তাঁর ভগ্নীপতি হসনু খানকে পাঠিয়েছিলেন। মখদুম আলম মাহমুদের সৈন্যদের হাতে নিহত হলেন, কিন্তু হসনু খান অক্ষত শরীরে ফিরে এলেন।\* এদিকে মখদুম আলম যুদ্ধে যাবার আগে তাঁর ধনসম্পত্তি শের খানের জিম্মায় রেখে গিয়েছিলেন। তাঁর মৃত্যুর ফলে শের খান ঐ বিপুল সম্পত্তির মালিক হলেন। 'তারিখ-ই-শের শাহী' ও অন্যান্য প্রামাণিক গ্রন্থ থেকে এর পরবর্তী ঘটনা সম্বন্ধে যা জানা যায়, তা নীচে বর্ণিত হল।

জলাল খান লোহানী শের খানের অভিভাবকত্ব বেশীদিন সহ্য করতে পারলেন না। তিনি মাহমুদের কাছে চলে গিয়ে তাঁর অধীনতা স্বীকার করলেন এবং তাঁকে অহুরোধ জানালেন শের খানকে দমন করার জন্তু। মাহমুদ জলাল খান ও কুতুব খানের পুত্র ইব্রাহিম খানকে শের খানের বিরুদ্ধে পাঠালেন বহু সৈন্য, হাতী ও কামান সঙ্গে দিয়ে। শের খান এই বিরাট সৈন্যবাহিনীকে আসতে দেখে সসৈন্যে বাংলার দিকে অগ্রসর হলেন। (ডঃ কালিকারঞ্জন কাকুনগোর মতে মৃন্দের ও পাটনার মাঝখানে, মুন্সেবের ১৩ ক্রোশ দূরে অবস্থিত সুরজগড়ে দুই পক্ষের সৈন্য পরস্পরের সম্মুখীন হয়।) শের খান চারদিকে মাটির প্রাকার তৈরী করে ছাউনি ফেললেন। ইব্রাহিম খান শের খানের ছাউনি ঘিরে ফেলে তোপ বসালেন এবং নতুন সৈন্য পাঠাবার জন্তু মাহমুদকে অহুরোধ করে পাঠালেন। প্রাকারের মধ্যে থেকে খানিকক্ষণ যুদ্ধ করে শের খান ইব্রাহিম খানের কাছে দূত পাঠিয়ে জানালেন, তিনি পরদিন সকালে প্রাকার থেকে বেরিয়ে তাঁকে আক্রমণ করবেন। এদিকে শের খান রাত্রি শেষ হবার আগেই প্রাকারের মধ্যে বাছা বাছা অল্প সৈন্য রেখে অন্য সৈন্যদের নিয়ে উঁচু জমির আড়ালে অপেক্ষা করতে লাগলেন। ইব্রাহিম খানের সৈন্যেরা যখন এল, তখন শের খানের ঘোড়সওয়ার সৈন্যরা একবার তীর ছুঁড়েই পিছু হটল। তখন আফগানরা পালিয়ে যাচ্ছে ভেবে বাংলার ঘোড়সওয়ার সৈন্যেরা তাদের পিছু পিছু ধাওয়া করল।

\* এই যুদ্ধে মখদুম আলম নিহত হলেন আর শের খানের আত্মীয় হসনু খান অক্ষত শরীরে ফিরে এলেন, এর থেকে সন্দেহ হয়, শের খান মখদুম আলমের ধনসম্পত্তির মালিক হবার জন্তু মখদুম আলমকে বিশ্বাসঘাতকতা করে বধ করিয়েছিলেন। শের খানের জীবনে অনুরূপ বিশ্বাসঘাতকতার দৃষ্টান্ত মোটেই বিরল নয়।

শের খান তাঁর লুকোনো সৈন্যদের নিয়ে বাংলার সৈন্যদের আক্রমণ করলেন। বাংলার সৈন্যরা পালিয়ে না গিয়ে স্থির হয়ে দাঁড়িয়ে যুদ্ধ করতে লাগল। এই যুদ্ধে বাংলার বাহিনী পরাজিত হল এবং তাদের সেনাপতি ইব্রাহিম খান নিহত হলেন। তাঁদের সমস্ত হাতী, তোপ এবং অর্থভাণ্ডার শের খানের দখলে এল। এরপর শের খান বাংলাদেশ আক্রমণ করে গড়ি (তেলিয়াগড়ি) পর্যন্ত সব অঞ্চল অধিকার করে নিলেন (Tarikh-i-Sher Shahi, Eng. Translation, 2nd Ed, pp. 45-55, 68-69 প্রঃ)।

অতঃপর শের শাহ তেলিয়াগড়ি ও সক্রীগুলির গিরিপথ দিয়ে বাংলাদেশে প্রবেশের চেষ্টা করলেন। কিন্তু মাহমুদের সেনাপতিরা, বিশেষত পতুগীজ সেনাপতি জোআঁ-কোরীআ অতুলনীয় বীরত্বের সঙ্গে যুদ্ধ করে শের শাহের প্রচেষ্টা ব্যর্থ করে দিলেন। তখন শের শাহ অপেক্ষাকৃত অরক্ষিত এক পথ দিয়ে তাঁর সৈন্যবাহিনী নিয়ে চলে গেলেন (এ সম্বন্ধে বিস্তৃত আলোচনার জন্ত ডঃ কালিকারঞ্জন কাছুনগো রচিত Sher Shah, pp. 120-125 দ্রষ্টব্য—ডঃ কাছুনগোর মতে এই পথ ঝাড়খণ্ডের পথ) এবং ৪০,০০০ অশ্বারোহী সৈন্য, ১৬,০০০ হাতী, ২০,০০০ সৈন্য ও ৩০০ নৌকা নিয়ে গোড়ৈ গিয়ে হাজির হলেন। নির্বোধ মাহমুদ শাহ ১৩ লক্ষ স্বর্ণমুদ্রা দিয়ে শের শাহের সঙ্গে সন্ধি করলেন। শের শাহ তখনকার মত ফিরে গেলেন এবং মাহমুদের অর্থে নিজের শক্তি বৃদ্ধি করে মাহমুদেরই বিরুদ্ধে তা প্রয়োগ করলেন। এক বছর বাদে তিনি মাহমুদকে জানালেন যে সার্বভৌম নৃশক্তি হিসাবে তাঁর মাহমুদের কাছে বার্ষিক নজরানা প্রাপ্য এবং এই উপলক্ষে তিনি এক বিরাট পরিমাণ অর্থ দাবী করলেন। মাহমুদ তা দিতে রাজী না হওয়ায় তিনি আবার গোড়ৈ আক্রমণ করলেন (Campos, Portugese in Bengal, pp. 38-39, 40-41.)। পতুগীজ বিবরণীর মতে শের শাহ গোড়ৈ আক্রমণ করে শহরটি জালিয়ে দিয়েছিলেন এবং লুণ্ঠ চালিয়ে ষাট মণ সোনা হস্তগত করেছিলেন। কিন্তু ‘তারিখ-ই-শের শাহী’ থেকে জানা যায় যে, গোড়ৈ নগরী অধিকারের সময় শের শাহ নিজে উপস্থিত ছিলেন না, তাঁর পুত্র জলাল খান ও সেনাপতি খওয়াস খান এই সময় তাঁর সৈন্যবাহিনীর নেতৃত্ব করেছিলেন। স্বতরাং তাঁরাই গোড়ৈ জালিয়ে দিয়েছিলেন ও লুণ্ঠ করেছিলেন।

গিয়াসুদ্দীন মাহমুদ শাহ তখন আর উপায়ান্তর না দেখে হুমায়ূনের কাছে

সাহায্য প্রার্থনা করলেন। হুমায়ুন খান-ই-খানান যুদ্ধক্ষেত্রের অনুরোধে শের খানকে দমন করার জন্ত জোনপুর থেকে বিহারের দিকে রওনা হয়েছিলেন। আমীরদের পরামর্শে হুমায়ুন প্রথমে চুণার দুর্গ অবরোধ করলেন। শের খান গাজী খান সুর এবং বুলাকী খানকে চুণার দুর্গ রক্ষার জন্ত রেখে নিজে বহুব্রহ্মা দুর্গে পালিয়ে গেলেন এবং কৌশলে ও বিশ্বাস-ঘাতকতার দ্বারা রোটার দুর্গ অধিকার করলেন। এদিকে হুমায়ুন প্রায় ছ'মাস অবরোধের পর চুণার দুর্গ জয় করতে সক্ষম হলেন। এ খবর পেয়ে শের শাহ বিচলিত হলেন। ওদিকে তাঁর পুত্র জলাল খান ও সেনাপতি খওয়াস খান গোড় নগর অবরোধ করেছিলেন। গিয়াসুদ্দীন মাহমুদ শাহ গোড়নগরকে প্রাকার ও পরিখা দিয়ে ঘিরে আত্মরক্ষা করছিলেন। একদিন খওয়াস খান পরিখায় পড়ে জলমগ্ন হয়ে মারা যান। শের খান এর ছোট ভাই মোসায়েব খানকে খওয়াস খান উপাধি দিয়ে গোড়ে পাঠালেন। এই দ্বিতীয় খওয়াস খান ৬ই জিব্বদ, ৯৪৪ হিঃ তারিখে (৬ই এপ্রিল, ১৫৩৮ খ্রিঃ) গোড় নগরী জয় করেন। 'রিয়াজ'-এর মতে গোড়ে খাড়াভাবে দেখা দেওয়ার ফলে আফগানরা গোড়ের দুর্গ জয় করতে পেরেছিলেন; গোড় দখলের পর শের খানের পুত্র জলাল খান গিয়াসুদ্দীন মাহমুদ শাহের পুত্রদের বন্দী করলেন; মাহমুদ শাহ নিজে পালিয়ে গেলেন; শের খান তাঁর পিছু পিছু ধাওয়া করলেন; মাহমুদ তখন উপায়ান্তর না দেখে শের খানের সঙ্গে যুদ্ধ করলেন এবং দেই যুদ্ধে পরাজিত ও আহত হলেন। এদিকে হুমায়ুন ততদিনে চুণার দুর্গ অধিকার করে গোড়ের দিকে রওনা হবার উদ্যোগ করছিলেন। শের খান তাঁর কাছে সন্ধির প্রস্তাব করে দূত পাঠালেন। মাহমুদ হুমায়ুনের কাছে দূত পাঠিয়ে শের খানের কথা না শুনতে অহরোধ জানালেন এবং বলে পাঠালেন শের খান গোড় শহর দখল করলেও বাংলার অধিকাংশ তাঁরই দখলে আছে, হুমায়ুন গোড় আক্রমণ করলে তিনি সাহায্য করবেন। হুমায়ুন তাঁর কথায় রাজী হয়ে গোড়ের দিকে রওনা হলেন এবং খান-ই-খানান যুদ্ধক্ষেত্র বহুব্রহ্মার দিকে যাত্রা করলেন। শের খান এই খবর পেয়ে তাঁর মৈত্র্যবাহিনীকে রোটার দুর্গে পাঠিয়ে দিলেন এবং নিজে পার্শ্বভ্য অঞ্চলে আশ্রয় নিলেন। শোণ ও গঙ্গার সঙ্গমস্থলে মনের গ্রামে হুমায়ুনের সঙ্গে আহত মাহমুদ শাহের দেখা হল। (Tarikh-i-Sher Shahi, Eng. Translation, 2nd. Ed, pp. 69-79 দ্রঃ)। কোন কোন ঐতিহাসিকের মতে হুমায়ুন মাহমুদ শাহকে সম্মানের সঙ্গে অভ্যর্থনা করেছিলেন, আবার

কেউ কেউ বলেন তিনি মাহমুদকে আদৌ খাতির করেন নি। কিন্তু হুমায়ূনের সহচর জোহর তাঁর ‘তজকিরু-উল-ওয়ারাক’এ লিখেছেন যে হুমায়ূন মাহমুদকে সাদর অভ্যর্থনা জানিয়ে সম্ভাব্য সমস্ত রকম উপায়ে সাহায্যের প্রতিশ্রুতি দিয়েছিলেন।

যাহোক, হুমায়ূন গোড়ের দিকে রওনা হলেন। পথে তেলিয়াগড়ের গিরিপথে হুমায়ূন বাধা পেলেন। জলাল খান এখানে তাঁর বাহিনীকে প্রায় এক মাস আটকে রেখে অবশেষে পথ ছেড়ে দিলেন। শের খান এই এক মাসের মধ্যে ঝাড়খণ্ড হয়ে রোটার্স দুর্গে গিয়ে উপস্থিত হলেন। তেলিয়াগড় দখলের পর হুমায়ূন গোড়ের দিকে যাত্রা করলেন। ( Tarikh-i-Sher Shahi, Eng. Translation, pp. 82-83 )। ইতিমধ্যে গিয়াসুদ্দীন মাহমুদ শাহের মৃত্যু হয়। ‘রিয়াজ-উস-সলাতীন’-এর মতে কহলগাঁও-তে গিয়াসুদ্দীন মাহমুদ শাহ খবর পান যে তাঁর দুই ছেলে শের খানের ছেলে জলাল খানের আদেশে নিহত হয়েছেন; মাহমুদ শাহ এই খবর শুনে মর্মান্বিত হন এবং কিছু দিনের মধ্যেই পরলোকগমন করেন। বুকাননের বিবরণীতেও লেখা আছে যে মাহমুদ তাঁর দুর্গের পতনের এবং দু’টি ছেলের নিহত হওয়ার খবর পেয়ে রোগে আক্রান্ত হন ও তাইতেই মারা যান। এইভাবে বাংলার শেষ স্বাধীন স্বলতানের জীবনাবসান ঘটল এবং আলাউদ্দীন হোসেন শাহের মৃত্যুর মাত্র ১২ বছর বাদে বাংলা দেশে তাঁর বংশের রাজত্ব শেষ হল। অতঃপর হুমায়ূন বিনা বাধায় গোড় অধিকার করেন ( জুলাই, ১৫০৮ খ্রীষ্টাব্দ )।

নাসিরুদ্দীন নসরৎ শাহের রাজত্বকালে বাংলার সৈন্তবাহিনী আসামে যে অভিযান শুরু করেছিল, তা গিয়াসুদ্দীন মাহমুদ শাহের রাজত্বকালে চূড়ান্ত ব্যর্থতার মধ্য দিয়ে সমাপ্ত হয় ( Mughal North-East Frontier Policy, Sudhindra Nath Bhattacharya, pp. 91-92 দ্রষ্টব্য )। আলাউদ্দীন ফিরোজ শাহের রাজত্বকালে বাংলার বাহিনী অসমীয়া বাহিনীকে সালার যুদ্ধক্ষেত্রে পরাজিত করে এবং সারা দুর্গে আশ্রয় গ্রহণ করতে বাধ্য করে। অসমীয়া বুরঞ্জী থেকে জানা যায় যে, ১৫৩৩ খ্রীর মার্চ মাসের মাঝামাঝি সময়ে মুসলমানরা জল এবং স্থলে যুগপৎ আক্রমণ চালিয়ে সারা দুর্গ জয় করবার চেষ্টা করে। কিন্তু তিন দিন তিন রাত্রি তুমুল যুদ্ধের পরেও দুর্গের পতন হল না।

এর পর অসমীয়া বাহিনীর ভাগ্য ফিরে গেল। বুয়াই নদীর মোহানায় অল্পাধিক এক যুদ্ধে তারা মুসলমান নৌবাহিনীকে পরাজিত করল। মুসলমানরা



আর একবার সারা দুর্গ জয় করার চেষ্টা করে ব্যর্থ হল। এরপর মুসলমানরা দুইমুনিশিলার নৌ-যুদ্ধে শোচনীয়ভাবে পরাজিত হল। এই যুদ্ধে তাদের একজন সেনাপতি ও ২৫০০ সৈন্য হত হল এবং তাদের ২০টি জাহাজ অসমীয়ারা জয় করে নিল।

এর পর হোসেন খানের অধীনে একদল নতুন শক্তিশালী সৈন্য এসে যোগ দেওয়ায় মুসলমানরা আবার উৎসাহিত হয়ে যুদ্ধ করতে শুরু করে। ১৫৩৩ খ্রীর মে মাসের মধ্যভাগে মুসলমানদের নৌবাহিনী তেজপুরেও অতিক্রম করে চলে যায় এবং ডিকরাই নদীর মোহানায় ঘাঁটি গাড়ে। কিন্তু তাদের ঠিক মুখোমুখি অহোমরা এক শক্তিশালী নৌ-বহর নিয়ে ঘাঁটি গেড়েছিল। আড়াই মাস দু'পক্ষ প্রায় বিনা যুদ্ধে এইভাবে থাকবার পর অহোমরা আক্রমণ শুরু করে। তার ফলে ডিকরাই নদীর তীরে প্রচণ্ড যুদ্ধ হল। মুসলমানরা এই যুদ্ধে পরাজিত হল। মুসলমানদের মধ্যে অনেকেই মারা পড়ল, অনেকে অদূরবর্তী জলাভূমিতে আশ্রয় নিতে গিয়ে শত্রুদের হাতে ধরা পড়ে গেল।

অতঃপর ১৫৩৩ খ্রীর সেপ্টেম্বর মাসে হোসেন খান ভরালি নদীর কাছে তাঁর অখারোহী সৈন্যবাহিনী নিয়ে অহোম বাহিনীকে বেশরোয়াভাবে আক্রমণ করতে গিয়ে নিহত হলেন, তাঁর বাহিনীও ছত্রভঙ্গ হয়ে পড়ল। অসমীয়ারা ২৮টি হাতী, ৮৫০টি ঘোড়া, এক বাঈ সোনা, ৮০ থল রূপা এবং অসংখ্য বন্দুক সমেত বহু জিনিস লুণ্ঠ করল।

এইখানেই বাংলার মুসলমানদের আসাম অভিযানের সমাপ্তি ঘটল। সুধীশ্রুনাথ ভট্টাচার্য মনে করেন কামরূপে অবস্থিত বাংলার মুসলমান বীররা নিজেদের উত্তমে এই অভিযান চালিয়েছিলেন, বিপদের মুখেও তাঁরা বাংলার স্থলতানের কাছ থেকে কোন সাহায্য পান নি। এই মত যদি সত্য হয়, তাহলে গিয়াসুদ্দীন মাহমুদ শাহের অপদার্থতার আর একটি নিদর্শন পাওয়া যায়। আসাম অভিযানে ব্যর্থতার কিছুদিন পরে মুসলমানরা পূর্বদিক থেকে অহোমদের এবং পশ্চিম দিক থেকে কোচদের চাপ সহ্য করতে না পেয়ে কামরূপও ত্যাগ করতে বাধ্য হয়। দুর্বল গিয়াসুদ্দীন মাহমুদ শাহ এবারেও এদের কোন সাহায্য করতে পারেন নি।

গিয়াসুদ্দীন মাহমুদ শাহের রাজত্বকালের আর একটি উল্লেখযোগ্য ঘটনা এদেশে পতু'গীজদের বাণিজ্যের ঘাঁটি স্থাপন। ইতিপূর্বে হোসেন শাহ ও নসরৎ শাহের রাজত্বকালে পতু'গীজরা এই বিষয়ে চেষ্টা করে ব্যর্থ হয়েছিল।

মাহমুদ শাহের রাজত্বকালে তারা যেভাবে সফল হল, বিভিন্ন প্রামাণিক পত্নীগীজ গ্রন্থে তার বিস্তৃত বিবরণ পাওয়া যায়। এই বিবরণগুলির বৈশিষ্ট্য এই যে, এদের মধ্যে পত্নীগীজদের বাণিজ্যের ঘাঁটি স্থাপনের কথা ছাড়া গিয়াসুদ্দীন মাহমুদ শাহ ও শের শাহের সংঘর্ষ সর্বত্র নতুন ও মূল্যবান সংবাদ পাওয়া যায়। নীচে এই সব বিবরণের সংক্ষিপ্তসার দেওয়া হল।

১৫৩৩ খ্রীষ্টাব্দে গোয়ার পত্নীগীজ গভর্নর হুনো-দা-কুনহা খাজা শিহাবুদ্দীনকে সাহায্য করবার এবং বাংলায় বাণিজ্য আরম্ভের ব্যবস্থা করবার জন্ত মারুতিম-আফসো-দে-মেলোকে পাঁচটি জাহাজ এবং ছ'শো লোক সঙ্গে দিয়ে পাঠান। চট্টগ্রামে পৌঁছে দে-মেলো তাঁর দূত দুয়ার্তে-দে-আজেভেদোকে ১২ জন লোক সঙ্গে দিয়ে বাংলার রাজার জন্ত অনেক ঘোড়া ও অলঙ্কার নিয়ে প্রায় ১২০০ পাউণ্ড মূল্যের উপহার সমেত গোড়ে পাঠালেন। তখন মাহমুদ শাহ সন্তোষিত হয়ে হতা করে রাজা হয়েছেন, তাঁর মন খুব খারাপ। তারপর পত্নীগীজদের পাঠানো উপঢৌকনের মধ্যে কয়েক বাঁক গোলাপ-জল ছিল, এগুলি দমিঠাও-বার্নালদেস নামে একজন পত্নীগীজ জলদস্যু একটি মুসলমান জাহাজ থেকে লুট করেছিল, মাহমুদ এগুলিকে সেই লুটের মাল বলে চিনতে পারলেন। রেগে গিয়ে তিনি মনস্থ করলেন শুধু পত্নীগীজ দূতদের নয়, বাংলায় আগত সমস্ত পত্নীগীজকেই তিনি বধ করবেন। কিন্তু আলফা খান নামে একজন মুসলমান এবং জনৈক শতাধিক বর্ষ বয়স্ক মুসলিম সন্ন্যাসী তাঁকে বুঝিয়ে স্বজিয়ে এ কাজ করা থেকে বিরত করলেন। সুলতান তখন পত্নীগীজ দূতদের বন্দী করলেন এবং অগ্রাগ্র পত্নীগীজদেরও বন্দী করবার জন্ত চট্টগ্রামে একজন লোককে পাঠালেন। আফসো-দে-মেলোর সঙ্গে শুদ্ধবিভাগের কর্মচারীর একদিন বচসা চলছিল, এমন সময় মাহমুদ শাহের পাঠানো লোকটি মাঝখান থেকে কথা বলল এবং দে-মেলোকে নৈশ ভোজের জন্ত আমন্ত্রণ জানাল। দে-মেলো এই আমন্ত্রণ গ্রহণ করলেন। কিন্তু ভোজের মাঝখানে লোকটি অসুস্থতার অছিলা করে উঠে গেল। তখন একদল মুসলমান বন্দুক ও তীরধনুক নিয়ে পত্নীগীজদের আক্রমণ করল। দে-মেলো ও ৪০ জন পত্নীগীজ নিমন্ত্রণে এসেছিলেন; তাঁরা প্রাণপণ যুদ্ধ করলেন, শেষে অনেকে নিহত হলেন, অস্ত্রেরা আত্মসমর্পণ করলেন। তাঁদের সঙ্গীরা সমুদ্র-তীরে শূকর শিকার করছিলেন, মুসলমানরা তাঁদের অতর্কিতে আক্রমণ করে অনেককে মেরে ফেলল, অগ্রাগ্র লোকরা বন্দী হলেন। পত্নীগীজদের ১,০০,০০০ পাউণ্ড মূল্যের

সম্পত্তি বাজেয়াপ্ত করা হল। মাত্র ত্রিশজন পত্নীগীজ হত্যাকাণ্ড থেকে অব্যাহতি পেয়ে বন্দী হয়েছিলেন। তাঁদের প্রথমে অন্ধকূপের মত একটা ঘরে বিনা চিকিৎসায় রাখা হল, তারপর একটা গোটা রাজি ধরে হাঁটিয়ে ছয় লীগ দূরে মাওয়া নামে একটা জায়গায় নিয়ে যাওয়া হল, সেখান থেকে তাঁদের গোড়ে চালান দেওয়া হল এবং গোড়ে মাহমুদ শাহের লোকেরা পত্নীগীজ বন্দীদের সঙ্গে পশুর মত ব্যবহার করে নরকের মত একটা জায়গায় আটকে রাখল।

এই খবর শুনে হুনো-দা-কুন্হা অত্যন্ত ক্রুদ্ধ হয়ে আস্তোনিও-দে-সিলভা-মেনেজেসকে ন'টি জাহাজ ও ৩৫০ জন পত্নীগীজ সঙ্গে দিয়ে চট্টগ্রামে পাঠালেন মাহমুদের কাছে কৈফিয়ৎ তলব এবং দে-মেলো ও তাঁর সঙ্গীদের মুক্ত করবার জন্ত। মেনেজেস চট্টগ্রামে এসে তাঁর দূত জর্জ-অলকোকোরাদোকে মাহমুদ শাহের কাছে পাঠিয়ে বন্দীদের মুক্তি দাবী করলেন। সেই সঙ্গে তিনি জানালেন দূতের কোন ক্ষতি করা হলে অথবা এক মাসের মধ্যে তাকে ফিরতে না দিলে তিনি যুদ্ধ করবেন। দূত যখন মাহমুদের কাছে উপস্থিত হল, তখন মাহমুদ বন্দীদের মুক্তি না দিয়ে মেনেজেসকে একটি চিঠি পাঠালেন গোয়ার গবর্নরের কাছে ছুতার, মণিকার এবং অস্ত্রাস্ত্র মিস্ত্রী পাঠাবার জন্ত অত্যাচার করে। এদিকে দূতের প্রত্যাভর্তন করতে এক মাসের বেশী দেরী হয়ে গেল। তখন মেনেজেস চট্টগ্রামের এক বৃহৎ অঞ্চলে আগুন লাগিয়ে দিলেন এবং বহু লোককে বধ ও বন্দী করলেন। মাহমুদ এ খবর শুনে খুব উত্তেজিত হলেন। মেনেজেসের দূতকে বন্দী করার জন্ত তিনি আদেশ দিলেন, কিন্তু দূত ইতিমধ্যে মেনেজেসের কাছে পৌঁছে গিয়েছিল।

আফসো-দে-মেলো ও তাঁর দলবলকে হয়তো মাহমুদ বধ করতেন, কিন্তু এই সময়ে শের খান বাংলা আক্রমণ করাতে তাঁর মতিগতি পালটে গেল। তিনি দে-মেলোকে বধ করার বদলে বরং তাঁর কাছে আশ্রয়ক্ষার ব্যবস্থা সম্বন্ধে পরামর্শ চাইলেন এবং গোয়ার পত্নীগীজ গভর্নরের কাছে সাহায্য চেয়ে দূত পাঠাবেন স্থির করলেন।

এই সময়ে হুনো-দা-কুন্হার কাছ থেকে দিয়োগো-রেবেলো নামে আর একজন পত্নীগীজ কাপ্তেন তিনখানি জাহাজ নিয়ে সপ্তগ্রামে এসে পৌঁছোলেন। রেবেলো সপ্তগ্রামে এসেই প্রথমে কাষে থেকে আগত দু'খানি ভিন্ন দেশের বড় বাণিজ্য-জাহাজকে সেখান থেকে তাড়িয়ে দিলেন এবং নিজের ভাণ্ডে

দিওগো দে-স্পিন্দোলা ও ছুআর্তে-দিআস নামে আর একজন লোককে মাহমুদ শাহের কাছে পাঠিয়ে বললেন যে আফসো-দে-মেলো ও তাঁর লোকদের মুক্তি না দিলে তিনি মেনেজেসের অহরূপ কার্ঘ্যের অহুষ্ঠান করবেন। এতদিন চট্টগ্রাম থেকে মেঘনা নদী দিয়ে পতুগীজ দূতরা গোড়ে গিয়েছিল, এই প্রথম ভাগীরথী নদী দিয়ে গেল। এদিকে মাহমুদ তখন অস্ত্র মাহুষ। তিনি পতুগীজ দূতকে খাতির করলেন এবং সপ্তগ্রামের শাসনকর্তার কাছে চিঠি লিখে রেবেলোর সঙ্গে ভালো ব্যবহার করতে বললেন। পতুগীজ গভর্নরের কাছে বন্ধুত্বের প্রমাণস্বরূপ দূত পাঠাচ্ছেন বলেও তিনি জানালেন। পতুগীজদের কাছে তিনি সাহায্য চাইলেন এবং তার বিনিময়ে কুঠি তৈরীর জমি এবং দুর্গ তৈরীর অহুমতি দেবেন বলে জানালেন। তিনি ২১ জন পতুগীজ বন্দীকে রেবেলোর কাছে ফেরৎ পাঠালেন এবং জানালেন যে আফসো-দে-মেলোর পরামর্শ দরকার বলে তাঁকে তিনি রেখে দিচ্ছেন। আফসো-দে-মেলোও পতুগীজ গবর্নরকে চিঠি লিখে আশ্বস্ত করলেন।

এদিকে শের খান তখন অগ্রসর হয়ে তেলিয়াগড়ি ও সক্রীগলি গিরিপথ পর্যন্ত পৌছেছেন। এই দুই গিরিপথ রক্ষা করার জন্য জোআঁ-দে-ভিল্লালো-বোস ও জোআঁ-কোরীআর অধীনে দুই জাহাজ পতুগীজ সৈন্য প্রেরিত হল। তারা অমিত বিক্রমে যুদ্ধ করে শের খানকে গরিজ (গড়ি) দুর্গ ও গৌড় থেকে ২০ লীগ দূরে অবস্থিত “ফারান্দুজ” (?) শহর অধিকার করতে দিল না এবং মাহমুদ শাহের কাজ্জিত একটি বিখ্যাত হাতীকে অধিকার করল। কিন্তু শের খান অস্ত্র অরক্ষিত পথ দিয়ে ৪০,০০০ অশ্বারোহী সৈন্য, ১,৫০০ হাতী, ২,০০,০০০ সৈন্য এবং ৩০০ নৌকা নিয়ে গোড়ে প্রবেশ করলেন। নির্বোধ মাহমুদ তাঁকে বাধা দিতে না পেয়ে আফসো-দে-মেলোর নিবেদন সত্ত্বেও তেরো লক্ষ স্বর্ণমুদ্রা দিয়ে শের শাহের সঙ্গে সন্ধি করলেন।

যদিও মাহমুদ শের শাহের সঙ্গে যুদ্ধ জয়লাভ করতে পারেননি, তাহলেও তিনি পতুগীজদের বীরত্ব দেখে খুশী হয়েছিলেন। আফসো-দে-মেলোকে তিনি বিস্তর পুরস্কার দিলেন এবং কুঠি ও গুহগৃহ নির্মাণের অহুমতি দিলেন। চট্টগ্রাম ও সপ্তগ্রামে বথাক্রমে জুনো-কার্নান্দেজ-ক্রীয়ার ও জোআঁ-কোরীআর অধীনে একটি বড় ও একটি ছোট গুহগৃহ স্থাপিত হল। পতুগীজরা অনেক জমি ও বাড়ী পেলেন। তাঁদের হিন্দু-মুসলমান অধিবাসীদের কাছ থেকে খাজনা আদায়ের অধিকার এবং আরও নানারকম স্বযোগ-স্ববিধা দেওয়া হল। স্থলতান

পতুগীজদের এতখানি ক্ষমতা এবং পাকাপোক্ত অধিকার দান করেছেন দেখে লোকেরা অবাক হয়ে গেল। এটি নির্বোধ মাহমুদের নিবুদ্ভিতার আর একটি দৃষ্টান্ত। বলা বাহুল্য এর পরিণাম বাংলার পক্ষে শুভ হয় নি। কারণ এর পর থেকে বাংলার নদীপথে পতুগীজদের অত্যাচার চরমে ওঠে। মাহমুদ শাহ তাদের এমন-শক্ত ঘাঁটি প্রতিষ্ঠার সুযোগ দেওয়ায় ও অত্যধিক ক্ষমতা দান করায় পতুগীজরা “ছুঁচ হয়ে ঢুকে ফাল হয়ে বেরোতে” পেরেছিল।

যাহোক, অমূল্য সুযোগ দেখে অগ্রাগ্র পতুগীজরাও বাংলায় আসতে লাগল। ইতিমধ্যে কাশ্মির লোকদের সঙ্গে পতুগীজদের যুদ্ধ বেধেছিল। পতুগীজ গভর্নর মাহমুদের কাছে দূত পাঠিয়ে আফসো-দে-মেলোকে ফেরৎ চাইলেন, কারণ কাশ্মির যুদ্ধের জন্ত তাঁকে দরকার। মাহমুদকে তিনি জানালেন এই যুদ্ধের জন্ত তিনি তাঁকে তক্ষণি কোন সাহায্য পাঠাতে পারছেন না, তবে পরের বছর পাঠাবেন। মাহমুদ পাঁচজন পতুগীজ বন্দীকে সাহায্য-দানের প্রতিশ্রুতির জামিনস্বরূপ রেখে আফসো-দে-মেলো ও অগ্রাগ্র পতুগীজদের ছেড়ে দিলেন।

কিন্তু এর অব্যবহিত পরেই শের শাহ আবার গোড় আক্রমণ ও অধিকার করেন। হুনো-দা-কুন্হা আগেকার প্রতিশ্রুতি অমুখ্যায়ী মাহমুদকে সাহায্য করার জন্ত ভাস্কো-পেরেস-দে-সম্পায়োর অধীনে নয় জাহাজ সৈন্ত পাঠিয়েছিলেন, কিন্তু এই সাহায্য এসে পৌছোবার আগে মাহমুদ শের শাহের সঙ্গে যুদ্ধে সম্পূর্ণভাবে পরাজিত হয়ে পরলোকগমন করেছিলেন। পতুগীজ জাহাজগুলি যখন চট্টগ্রাম বন্দরে এসে পৌছোলো, তখন বাংলাদেশ শের শাহের অধিকারে। (Campos, Portugese in Bengal, pp. 33-42 অবলম্বনে উপরের আটটি অমূল্য লেখা হয়েছে।)

যাহোক, গিয়াসুদীন মাহমুদ শাহের রাজত্বকালে এবং তাঁরই অমুহোদন অমুসারে বাংলাদেশে একটি ইউরোপীয় জাতি বাণিজ্যের ঘাঁটি স্থাপন করল। এক কথায় বলতে গেলে ইউরোপের সঙ্গে বাংলার ব্যাপক ও প্রত্যক্ষ সংযোগ এই প্রথম শুরু হল। এর আগে নিকলো কস্তি, ভারথেনা, বারবোসা প্রভৃতি কয়েকজন ইউরোপীয় পৰ্বটক বাংলাদেশে ভ্রমণ করেছিলেন, কয়েকটি পতুগীজ জাহাজ বাংলাদেশের বন্দরে এসে পৌছেছিল, এর বেশী ইউরোপের সঙ্গে বাংলার আর কোন যোগসূত্র স্থাপিত হয়নি। এখন মাহমুদ শাহের কল্যাণে বাংলাদেশের সামনে পশ্চিমের দ্বার খুলে গেল। এর ফল অনেক দিক দিয়ে

ভাল হলেও সব দিক দিয়ে যে ভাল হয়নি, সে কথা ইতিহাসের পাঠক মাজেই জানেন।

গিয়াসুদ্দীন মাহমুদ শাহ যে একজন নির্বোধ ও অদূরদর্শী রাজা ছিলেন, তাতে কোন সন্দেহ নেই। তাঁর পূর্ব-বর্ণিত ইতিহাসের প্রায় প্রত্যেকটি ঘটনাই তাঁর নিবুদ্ধিতার পরিচয় বহন করেছে। কিন্তু নিবুদ্ধিতা ছাড়া অগ্নাগ্র দোষও তাঁর কিছু কম ছিল না। নিজের ভাতৃপুত্রকে বধ করে সিংহাসনে আরোহণ করে তিনি যে অপরিসীম নিষ্ঠুরতার পরিচয় দিয়েছিলেন, তারই ফলে মখদুম-ই-আলম তাঁর বিরুদ্ধে যান এবং এরই পরিণামে মাহমুদ শাহ সর্বস্বান্ত হন। এর উপর তিনি ছিলেন অতিমাত্রায় ইন্দ্রিয়পরায়ণ। সমসাময়িক পত্নীগীজ বণিকদের মতে তাঁর উপপত্নীর সংখ্যা ছিল প্রায় ১০,০০০। এই সমস্ত দোষের ফলে তিনি শেষ পর্যন্ত রাজ্য হারিয়েছিলেন, তাতে বিশ্বাসের কিছুই নেই। তাঁর প্রতিদ্বন্দ্বী শের শাহ অবশ্য রাজনৈতিক ও সামরিক প্রতিভায় অতুলনীয় ছিলেন। কিন্তু মাহমুদ শাহের মত এরকম অপদার্থ নৃপতি বাংলার সিংহাসনে অবিস্ত্রিত না থাকলে তিনি সহজে এ দেশ জয় করতে পারতেন বলে মনে হয় না।

আজ পর্যন্ত এই সমস্ত জায়গায় গিয়াসুদ্দীন মাহমুদ শাহের শিলালিপি পাওয়া গিয়েছে :—

ধোরাইল (দিনাজপুর), সাহুল্লাপুর (মালদহ), গোড়, জোয়ার (ময়মনসিংহ)।

মাহমুদ শাহের রাজত্বকালে উৎকীর্ণ ধোরাইল গ্রামের শিলালিপির ভাষা সংস্কৃত। বাংলার আর কোন স্থলতানের সংস্কৃতে লেখা শিলালিপি পাওয়া যায় নি। মাহমুদ শাহের গোড়ের একটি মসজিদের শিলালিপি থেকে জানা যায় যে, এই মসজিদটি বিবি মালতী নামে জনৈক স্ত্রীলোক তৈরী করিয়েছিলেন।

গিয়াসুদ্দীন মাহমুদ শাহের অনেকগুলি মুদ্রা পাওয়া গিয়েছে। এদের মধ্যে কতকগুলি হোসেনাবাদ ও খলিফতাবাদের (দক্ষিণ যশোহর) টাকশাল থেকে বেরিয়েছিল।

এছাড়া ফতেহাবাদ, নসরতাবাদ এবং মুহম্মদাবাদের টাকশালেও গিয়াসুদ্দীন মাহমুদ শাহের মুদ্রা উৎকীর্ণ হয়েছিল। গিয়াসুদ্দীন মাহমুদ শাহের সোনা, রূপা ও তামা তিন ধাতুতেই তৈরী মুদ্রা পাওয়া গিয়েছে। তাঁর বহু মুদ্রায় তাঁর রাজকীয় নামের সঙ্গে ‘বদর শাহ’ নামটিও উল্লিখিত

হয়েছে। খলিফতাবাদ বা বাগেরহাটের টাকশালে উৎকীর্ণ তাঁর অনেকগুলি মুদ্রা থেকে দেখা যায়, তিনি খলিফতাবাদের নামের সঙ্গে 'বদরপুর' নামটি যোগ করে দিয়েছিলেন।

গিয়াসুদ্দীন মাহমুদ শাহের রাজ্যের আয়তন বেশ বৃহৎ ছিল। তাঁর শিলালিপিগুলি উত্তরবঙ্গ ও পূর্ববঙ্গ থেকে আবিষ্কৃত হয়েছে। তাঁর টাকশালগুলি উত্তরবঙ্গ, পূর্ববঙ্গ ও দক্ষিণবঙ্গে অবস্থিত ছিল। পশ্চিমবঙ্গে তাঁর কোন শিলালিপি বা টাকশালের সন্ধান এ পর্যন্ত পাওয়া যায় নি। তবে পশ্চিমবঙ্গের সাতগাঁও অঞ্চল যে গিয়াসুদ্দীন মাহমুদ শাহের রাজ্যের অন্তর্ভুক্ত ছিল, তা পতুগীজ বিবরণী থেকে জানা যায়। গিয়াসুদ্দীন মাহমুদ শাহের রাজ্যের পশ্চিম সীমা মুন্সের ও পাটনার মাঝখানে এবং মুন্সের থেকে প্রায় ১৩ কোশ দূরে অবস্থিত সুরজগড় অবধি বিস্তৃত ছিল, এ কথা আবুল ফজলের 'আকবর-নামা' থেকে জানা যায়। আরও উত্তরে মাহমুদ শাহের রাজ্যের পশ্চিম সীমা হাজীপুর অবধি বিস্তৃত ছিল, অবশ্য হাজীপুরের সর-ই-লস্কর মখদুম-ই-আলম মাহমুদ শাহের বিরুদ্ধে দাঁড়িয়েছিলেন এবং তার পরিণামস্বরূপ তিনি নিহত হন। দক্ষিণ-পূর্বে মাহমুদ শাহের রাজ্য যে চট্টগ্রাম পর্যন্ত বিস্তৃত ছিল, এবং খোদাবখ্শ্ খানের শাসনাধীন আরাকানের পর্বতমালা ও মাতামহুরি নদী পর্যন্ত প্রসারিত অঞ্চলটি যে মাহমুদ শাহের রাজ্যেরই অন্তর্ভুক্ত ছিল তা পতুগীজ বিবরণী থেকে জানা যায়।

শিলালিপি, 'তারিখ-ই-শেরশাহী' প্রভৃতি ইতিহাসগ্রন্থ এবং পতুগীজ বিবরণীগুলি থেকে গিয়াসুদ্দীন মাহমুদ শাহের এই সব কর্মচারীর নাম পাওয়া যায় :—

- (১) ফরাস খান
- (২) নুর খান
- (৩) মখদুম-ই-আলম
- (৪) কুৎব্ খান
- (৫) ইব্রাহিম খান (কুৎব্ খানের পুত্র)
- (৬) খোদাবখ্শ্ খান (Codavascām) \*

\* শেখ এ. টি. এম্ রুহুল আমিনের মতে Codavascām = কুৎব আলম। কিন্তু ধ্বনিতত্ত্বের বিচারে, Codavascām (কোদাবস্কাঁম) = খোদা বখ্শ্ খান ছাড়া আর কিছু হতে পারে না। এ সম্বন্ধে বিস্তৃত আলোচনার জন্য পৃঃ ৪৩২, পাণ্টটিকা দ্রষ্টব্য।

### (৭) হামজা খান ( Amarzacão )\*

এঁদের মধ্যে শেষ চারজন মাহমুদ শাহের সেনাপতি ছিলেন। শেষ দু'জনের নাম পতু'গীজ বিবরণে পাওয়া যায়। এঁরা দু'জনেই চট্টগ্রাম অঞ্চলে থাকতেন। খোদা বখ্শ খান একটি বিস্তীর্ণ অঞ্চলের শাসনকর্তা ছিলেন। মাহমুদ শাহের মৃত্যুর পর এঁদের মধ্যে চট্টগ্রামের অধিকার নিয়ে বিরোধ বেধেছিল।

পতু'গীজ বিবরণীগুলিতে লেখা আছে যে মাহমুদ শাহ যখন আফগানো-দে-মেলো কর্তৃক প্রেরিত পতু'গীজ দূতদের বধ করার পরিকল্পনা করছিলেন, তখন আলফা খান নামে ভূটনৈক ব্যক্তি মাহমুদকে বুঝিয়ে তাঁদের প্রাণ রক্ষা করেছিলেন। এই আলফা খানও সম্ভবত মাহমুদ শাহের কর্মচারী ছিলেন।

ইতিপূর্বে আমরা একাধিকবার লিখেছি যে বিজাপতির নামাঙ্কিত একটি পদের ( বিজাপতি, খগেন্দ্রনাথ মিত্র ও বিমানবিহারী মজুমদার সম্পাদিত, ২নং পদ ) ভণিতা এই,

বেকতেও চোরি গুপ্ত কর কতিখন বিজাপতি কবি ভাণ।

মহলম জুগপতি (যুগপতি) চিরেজীব জীবথু গ্যাসদীন হুরতান ॥

এই “গ্যাসদীন হুরতান”-কে কেউ গিয়াসুদ্দীন আজম শাহের সঙ্গে, আবার কেউ গিয়াসুদ্দীন মাহমুদ শাহের সঙ্গে অভিন্ন বলে মনে করেন। একে গিয়াসুদ্দীন আজম শাহের সঙ্গে অভিন্ন বলার সপক্ষে যে সমস্ত যুক্তি আছে, সেগুলি এই বইয়ের দ্বিতীয় অধ্যায়ে উল্লেখ করেছি। এখন, একে গিয়াসুদ্দীন মাহমুদ শাহের সঙ্গে অভিন্ন বলার পক্ষে যে সব যুক্তি আছে, সেগুলি উল্লেখ করছি।

(১) আলোচ্য পদটি কেবলমাত্র লোচনের ‘রাগতরঙ্গিনী’তে পাওয়া যায় ; লোচন যেহেতু নিজের মৈথিল, অতএব তিনি কেবলমাত্র মৈথিল কবিদেরই

\* মুহম্মদ খানের ‘মস্তুল হোসেন’ কাব্য থেকে জানা যায় যে, তাঁর পূর্বপুরুষ হামজা খান ১৫৩০ খ্রীঃ মত সময়ে বর্তমান ছিলেন ; তিনি সম্ভবত চট্টগ্রামের শাসনকর্তা ছিলেন ; এঁকেই পতু'গীজ বিবরণে উল্লিখিত Amarzação এর সঙ্গে অভিন্ন বলে ধরেছি ; ধরার অন্তকূলে নামলাদৃশ্য ছাড়াও একটি বুদ্ধি আছে ; ‘মস্তুল হোসেন’ লেখা আছে যে হামজা খান পাঠানদের যুদ্ধে পরাস্ত করেছিলেন, আর পতু'গীজ বিবরণে দেখা আছে যে Amarzação পাঠান হুলতান শের শাহের প্রেরিত সেনাপতিকে পরাস্ত ও বন্দী করেছিলেন ( সাহিত্য পত্রিকা, ৮ম বর্ষ, ১ম সংখ্যা, পৃ: ১৬৮ প্র: )।



পদ সঙ্কলন করেছেন এবং যেহেতু তিনি বিখ্যাত মৈথিল কবি বিद्याপতি ছাড়া অল্প কোন কবি বিद्याপতির নাম করেন নি, অতএব তিনি দ্বিতীয় কোন বিद्याপতির পদ সঙ্কলন করতে পারেন না বলে অনেকে মনে করেন। কিন্তু লোচনের 'রাগতরঙ্গিণী'তে সঙ্কলিত বিद्याপতির "আনন লোহুঅ বচনে বোলএ ইসি" পদটিতে কবিশেখরের ভণিতা ("কবিশেখর ভণ অপরূপ রূপ দেখি") পাওয়া যায়। ষোড়শ শতাব্দীর প্রথমার্ধে বাংলাদেশে যে একজন দ্বিতীয় বিद्याপতি ছিলেন, তার প্রমাণ আছে; মৈথিল বিद्याপতির 'কবিশেখর' উপাধি ছিল বলে জানা যায় না, কিন্তু ঐ দ্বিতীয় বিद्याপতির এই উপাধি ছিল (এ সম্বন্ধে আলোচনার জন্য পরিশিষ্ট দ্রষ্টব্য)। অতএব "আনন লোহুঅ বচনে বোলএ ইসি" পদটি যে এই বাঙালী কবি দ্বিতীয় বিद्याপতির রচনা, তাতে কোন সন্দেহ নেই। এর থেকে প্রমাণ পাওয়া যাচ্ছে যে লোচন কর্তৃক 'রাগতরঙ্গিণী'তে সঙ্কলিত বিद्याপতির সব পদই মৈথিল বিद्याপতির রচনা নয়। অতএব "গ্যাসদীন সুরতান"-এর নাম-সংবলিত পদটিও এই বাঙালী বিद्याপতির রচনা হতে পারে। এই বাঙালী কবি কবিরঞ্জন, কবিশেখর ও বিद्याপতি এই তিন ভণিতাতেই পদ রচনা করতেন; গোপালদাস-রসিকদাস কৃত 'শাখানির্গয়' থেকে জানা যায়, এই কবি "রাজসেবী" ছিলেন। এই "রাজসেবী" কবির লেখা কয়েকটি পদের ভণিতায় হোসেন শাহ, নসীর শাহ, নসরৎ শাহ প্রভৃতি রাজার নাম পাওয়া যায় (পরিশিষ্ট দ্রষ্টব্য), "আনন লোহুঅ বচনে বোলএ ইসি" পদটির ভণিতাতে নসরৎ শাহের নাম পাওয়া যায়। এইসব ভণিতায় উল্লিখিত নসীর শাহ ও নসরৎ শাহ যে বাংলার সুলতান নাসিরুদ্দীন নসরৎ শাহ (১৫১৯-১৫৩২ খ্রী:) এবং হোসেন শাহ যে তাঁর পিতা আলাউদ্দীন হোসেন শাহ (১৪৯৩-১৫১৯ খ্রী:), সে বিষয়ে সন্দেহের কোন অবকাশ নেই। অতএব "গ্যাসদীন সুরতান"-কেও এই বংশের আর একজন সুলতান গিয়াসুদ্দীন মাহমুদ শাহের সঙ্গে অভিন্ন বলে ধরা যায়।

(২) মৈথিল বিद्याপতির লেখা 'পুরুষপরীক্ষা' ও 'শৈবসর্বস্বসারের'র সাক্ষ্য বিশ্লেষণ করলে মনে হয়, তাঁর পৃষ্ঠপোষক শিবসিংহের সঙ্গে গিয়াসুদ্দীন আজম শাহের শত্রুতা ছিল (বর্তমান গ্রন্থ, পৃ: ৮২ দ্রষ্টব্য)। অতএব মৈথিল বিद्याপতির লেখা পদের ভণিতায় গিয়াসুদ্দীন আজম শাহের নাম এত উচ্ছৃঙ্খলিত প্রশংসার সঙ্গে উল্লিখিত হওয়া সম্ভব কিনা, সে সম্বন্ধে প্রশ্ন উঠতে

পারে। পদটি যদি দ্বিতীয় বিজাপতি অর্থাৎ কবিশেখর-বিজাপতির লেখা হয়, তাহলে তার ভণিতায় গিয়াসুদ্দীন মাহমুদ শাহের উল্লেখ সন্ধ্যা অক্ষুণ্ণ কোন প্রসঙ্গ ওঠে না। অবশ্য আলোচ্য পদটিতে কবি “গ্যাসদীন সুরতান”-কে “মুগপতি” বলেছেন, যা গিয়াসুদ্দীন মাহমুদ শাহের মত অপদার্থ সুলতানকে বলা সম্ভব কিনা প্রশ্ন উঠতে পারে। কিন্তু কবিদের পক্ষে এই জাতীয় অত্যাক্তি করা মোটেই অস্বাভাবিক নয়।

সুতরাং আলোচ্য পদটির ভণিতায় উল্লিখিত “গ্যাসদীন সুরতান” যে গিয়াসুদ্দীন মাহমুদ শাহ নন, তা জোর করে বলা যায় না। ইনি যদি গিয়াসুদ্দীন মাহমুদ শাহই হন, তাহলে বলতে হবে, পদটির রচয়িতা “রাঙ্গসেনী” কবিরঞ্জন-বিজাপতি আলাউদ্দীন হোসেন শাহ ও নাসিরুদ্দীন নসরৎ শাহের মত গিয়াসুদ্দীন মাহমুদ শাহের সরকারেও চাকরী করতেন।

হোসেন শাহের বংশধরদের আমলে দেশের আভ্যন্তরীণ শান্তি ও শৃঙ্খলা খুব বেশী ব্যাহত হয়নি। ধর্মের ক্ষেত্রেও এই সব সুলতানরা মোটামুটিভাবে সহিষ্ণুতাই দেখিয়েছেন। এর কিছু প্রমাণ আমরা দিচ্ছি। নাসিরুদ্দীন নসরৎ শাহের রাজত্বকালে সাতগাঁওতে একটি জামী মসজিদ নির্মিত হয়েছিল—১৩৬ হিংর রমজান অর্থাৎ ১৫৩০ খ্রীঃর মে মাসে; এর নির্মাতা সৈয়দ ফখরুদ্দীনের পুত্র সৈয়দ জমালুদ্দীন (Dani, Bibliography of the Muslim Inscriptions of Bengal, pp. 71-72 ত্রঃ)। এই জামী মসজিদটির ধ্বংসাবশেষ এখনও বর্তমান আছে। এদিকে, এই জামী মসজিদটির মাত্র এক ফার্সি দূরেই অবস্থিত ছিল (এখনও অবস্থিত আছে) চৈতন্যদেবের ভক্ত ও নিত্যানন্দের অন্তরঙ্গ পার্শ্বদ উদ্ধারণ দস্তের ত্রিপাট। উদ্ধারণ দস্ত এবং সাতগাঁওয়ের আরও অনেক বণিক নিত্যানন্দের কাছে বৈষ্ণব ধর্মে দীক্ষা গ্রহণ করার পরে দ্বিবারাত্র সংকীর্তনে অতিবাহিত করতেন। বৃন্দাবনদাসের ভাষায়

সপ্তগ্রামে যত হৈল কীর্তন বিহার।

শত বৎসরেও তাহা নারি বর্ণিবার।

( চৈতন্যভাগবত, অন্ত্যখণ্ড, ৫ম অধ্যায় )

এ ঘটনা নসরৎ শাহের রাজত্বকালের। বৃন্দাবনদাস লিখেছেন যে, নিত্যানন্দের কাছে অনেক মুসলমানও শরণ গ্রহণ করেছিল,

অস্ত্রের কি দায়, বিক্ষুব্ধোহী যে যবন ।

তাহারাও পাদপদ্মে লইল শরণ ॥

যবনের নয়নে দেখিয়া প্রেমধার ।

ত্রাঙ্কণেও আপনাকে করেন ধিক্কার ॥

( চৈতন্যভাগবত, অষ্টাখণ্ড, ৫ম অধ্যায় )

এই সব মুসলমানদের ও সপ্তগ্রামের কীর্তনকারীদের (জামী মসজিদের অনতিদূরে কীর্তন করা সত্ত্বেও) কোন শাস্তি দেওয়া হয়নি; এর থেকে, নসরৎ শাহের রাজত্বকালে ধর্মের ক্ষেত্রে উদারতার নীতি রক্ষিত হয়েছিল মনে করা চলে ।

আলাউদ্দীন ফিরোজ শাহ ( ২য় ) ও গিয়াসুদ্দীন মাহমুদ শাহের রাজত্বকালেও এই নীতি রক্ষিত হয়েছিল বলে মনে হয়। আলাউদ্দীন ফিরোজ শাহ দ্বিজ ত্রিধর কবিরাজকে দিয়ে কালীদেবীর মাহাত্ম্যবর্ণনামূলক কাব্য ‘কালিকামঙ্গল’ লিখিয়েছিলেন। গিয়াসুদ্দীন মাহমুদ শাহের রাজত্বকালে ফরাস খান নামে একজন রাজপুরুষ একটি সেতু তৈরী করিয়ে তার উপর সংস্কৃত ভাষায় শিলালিপি উৎকীর্ণ করিয়েছিলেন ( Dani, Bibliography of the Muslim Inscriptions of Bengal, p. 76 ত্রঃ )। এই সব দৃষ্টান্তগুলি আমাদের ধারণার পোষকতা করছে ।

১৬৪১ খ্রীষ্টাব্দে মান্রিক দেখেছিলেন যে ধ্বংসপ্রাপ্ত গৌড় শহরে অনেকগুলি হিন্দু মন্দির রয়েছে; তাদের মধ্যে দেবতার বিগ্রহ আছে, তাদের চারপাশে রয়েছে নানারকম খোদাই-করা অদ্ভুত মূর্তি ও গাছের পাতা ( carved grotesques and leaves )। এর থেকে মনে হয়, গৌড়ের সুলতানরা তাঁদের রাজধানীতে হিন্দুদের ধর্মচর্চার অবাধ অধিকার দিয়েছিলেন। গৌড়ের পাশে অবস্থিত রামকেলি গ্রাম তো হিন্দুদের ধর্মচর্চার একটি বিশিষ্ট কেন্দ্র ছিল ।

সুতরাং ধর্ম সম্বন্ধে হোসেন শাহী বংশের সুলতানরা তথা বাংলার অধিকাংশ সুলতানই গোঁড়ামি দেখান নি বলে মনে হয়। অবশ্য হিন্দু রাজার রাজ্যে যুদ্ধাভিযান করার সময় এঁদের মধ্যে অনেকে মন্দির ও বিগ্রহ প্রভৃতি ধ্বংস করতেন। কিন্তু হিন্দু ধর্মের প্রতি বিদ্বেষই তার একমাত্র কারণ নয়; মন্দির ও মূর্তিগুলির ভিতরে অনেক ধনরত্ন থাকত, সেগুলি হস্তগত করার জন্তও এঁরা এঁগুলি ভাঙতেন। অবশ্য এই ভাঙা সম্বন্ধেও অনেকখানি অতিরঞ্জিত সংবাদ পরিবেশিত হয়েছিল। দৃষ্টান্তস্বরূপ বলা যায়, হোসেন শাহ থেকে

আরম্ভ করে বহু সুলতানই উড়িষ্কার অসংখ্য মন্দির ধ্বংস করেছিলেন বলে লিপিবদ্ধ হয়েছে, কিন্তু আসলে এঁরা উড়িষ্কার মন্দিরগুলিতে সামান্য আঁচড় কাটার বেশি আর কিছু করতে পারেন নি; করা এঁদের পক্ষে সম্ভবও ছিল না, কারণ এত বড় বড় মন্দির ভাঙতে হলে যত মজুর দরকার, হিন্দু রাজ্যে এই কাজের জন্য এত মজুর পাবার উপায় ছিল না।

বাংলার সুলতানরা (হু'একজন বাদে) নিজেদের রাজ্যে মন্দির ও মূর্তি ধ্বংস করার ব্যাপারে আগ্রহ দেখিয়েছিলেন বলে মনে হয় না। হিন্দু প্রজা ও হিন্দু অমাত্য-কর্মচারীদের মনে অযথা আঘাত দিলে তার ফল ভাল হবে না মনে করেই সম্ভবত এঁরা এই ব্যাপারে মোটামুটিভাবে সাহসুতার পরিচয় দিয়েছিলেন। বাংলার যে সমস্ত স্থানের নাম পৌত্তলিকতাগন্ধী, সেগুলির অধিকাংশই এই সুলতানদের আমলে অপরিবর্তিত ছিল, তাদের মুসলমানী নাম দেওয়া হয়নি; এ ব্যাপারও এঁদের সহিষ্ণু মনোভাবেরই পরিচয় দেয়।

স্বাধীন সুলতানদের আমলে, বিশেষভাবে হোসেন শাহী সুলতানদের আমলে বাংলার মুসলিম জনসাধারণও যে ক্রমশ হিন্দুদের প্রতি বৈরভাব বিদ্যুত হচ্ছিলেন ও উভয় সম্প্রদায়ের মধ্যে সম্প্রীতি প্রতিষ্ঠার সূচনা দেখা দিচ্ছিল, তার প্রমাণ আছে। 'চৈতন্যচরিতামৃতের' আদিখণ্ড সপ্তদশ পরিচ্ছেদে লেখা আছে যে তখন হিন্দু ও মুসলমানের মধ্যে গ্রাম-সম্পর্ক স্থাপিত হত; নবদ্বীপের কাজী চৈতন্যদেবকে বলেছিল,

গ্রাম-সম্বন্ধে (নীলাশ্বর) চক্রবর্তী হয় মোর চাচা।

দেহ-সম্বন্ধে হৈতে হয় গ্রাম-সম্বন্ধ সাঁচা।

নীলাশ্বর চক্রবর্তী হয় তোমার নানা।

সে সম্বন্ধে হও তুমি আমার ভাগিনা।

ষোড়শ শতাব্দীর প্রথম দিকে বাংলার মুসলমানরা যে হিন্দুদের পবিত্র গ্রন্থ রামায়ণ ও মহাভারতের রস ব্যাপকভাবে আত্মদান করত, তার প্রমাণ আছে। রুম্মাবনদাস 'চৈতন্যভাগবতে' লিখেছেন,

যেন সীতা হারাটয়া শ্রীরঘুনন্দনে।

নির্ভরে শুনিলে তাহা কান্দয়ে ধবনে।

(চৈতন্যভাগবত, মধ্যখণ্ড, ৩য় অধ্যায়)

এবং

যবনেহ যার কীর্তি শ্রদ্ধা করি শুনে

ভজ হেন রাঘবেশ্বর প্রভুব চরণে ॥

( চৈতন্যভাগবত, অন্ত্যখণ্ড, ৪র্থ অধ্যায় )

কবীন্দ্র পরমেশ্বর কর্তৃক হোসেন শাহের রাজত্বকালে রচিত বাংলা মহাভারত যে বাংলার মুসলমানদের ঘরে ঘরে পড়া হত, তা ষোড়শ শতাব্দীর মধ্যভাগে সৈয়দ শুলতান লিখে গিয়েছেন। তিনি লিখেছেন,

লঙ্কর পরাগল খান আজ্ঞা শিরে ধরি।

কবীন্দ্র ভারত-কথা কহিল বিচারি ॥

হিন্দু-মুসলমান তাএ ঘরে ঘরে পড়ে।

( মাসিক মোহাম্মদী, শ্রাবণ, ১৩৭১ বঙ্গাব্দ, পৃঃ ৭০২ )

সপ্তদশ ও অষ্টাদশ শতাব্দীতে বাংলার হিন্দু ও মুসলমানদের মধ্যে অনিবিড় বন্ধন স্থাপিত হয়েছিল। কিন্তু এর সূচনা স্বাধীন শুলতানদের আমলেই হয়েছিল বললে ভুল হবে না।

## স্বাধীন সুলতানদের আমলে বাংলার শাসন-ব্যবস্থা ও সামরিক ব্যবস্থা

১২০৪ খ্রীষ্টাব্দে বখতিয়ার খিলজী বাংলায় প্রথম মুসলিম রাজত্বের প্রতিষ্ঠা করেন। এই মুসলিম রাজ্যের নাম হয় 'লখনৌতি'। রাজ্যটি অনেকগুলি 'ইক্কা' অর্থাৎ প্রশাসনিক অঞ্চলে বিভক্ত ছিল।<sup>১</sup> বলবনের বংশধররা যখন এদেশের অধিপতি হন, তখন তাঁরা 'লখনৌতি' রাজ্যের নাম দেন 'ইক্কা' লখনৌতি' এবং একে অনেকগুলি 'ইক্কা'য় বিভক্ত করেন। কিন্তু পূর্ববঙ্গের যে অংশ তাঁদের রাজ্যভুক্ত ছিল, তাঁর নাম তাঁরা দিয়েছিলেন 'অরসহ্' বঙ্গালহ্'।<sup>২</sup> এরপর যখন মুহম্মদ তোগলক বাংলাদেশ জয় করলেন, তখন তিনি তাকে লখনৌতি, সোনারগাঁও ও সাতগাঁও—এই তিনটি 'ইক্কা'য় বিভক্ত করলেন।<sup>৩</sup>

স্বাধীন সুলতানদের আমলে (১৩৩৮-১৫৫৮ খ্রীঃ) এই ব্যবস্থার খানিকটা পরিবর্তন সংঘটিত হল। তাঁদের আমলে সমগ্র বাংলাদেশ 'লখনৌতি' নামে পরিচিত না হয়ে 'বঙ্গালহ্' নামে পরিচিত হতে লাগল, রাজ্যের প্রশাসনিক বিভাগগুলি 'ইক্কা'র বদলে 'ইক্কা' নামে অভিহিত হতে লাগল, 'ইক্কা'র উপবিভাগগুলি 'অরসহ্' নামে অভিহিত হল।<sup>৪</sup> সামরিক বাংলা সাহিত্যে রাজ্যের উপবিভাগগুলিকে 'মুলুক' বলা হয়েছে।<sup>৫</sup> বোধহয় 'অরসহ্'র ও উপবিভাগ ছিল এবং তার নাম ছিল 'মুলুক' (মুলুক)। কোন কোন প্রাচীন বাংলা গ্রন্থে আবার মুলুকেরও একটি উপবিভাগের উল্লেখ পাওয়া যায়, তার নাম 'তকসিম'।<sup>৬</sup>

এই আমলে দুর্গহীন শহরকে বলা হত 'কশ্বাহ্' এবং দুর্গযুক্ত শহরকে বলা হত 'খিট্টাহ্'; সীমান্ত রক্ষার ঘাঁটিকে বলা হত 'খানা'; 'বঙ্গালহ্' রাজ্য অনেকগুলি রাজস্ব-অঞ্চলে বিভক্ত ছিল, এই অঞ্চলগুলি 'মহল' নামে পরিচিত ছিল, কয়েকটি 'মহল' নিয়ে এক একটি 'শিক' গঠিত হত; 'শিকদার' নামক কর্মচারীরা এদের ভারপ্রাপ্ত হতেন।<sup>৭</sup> রাজস্ব দু'ধরনের হত, 'গনীমাহ্' অর্থাৎ লুণ্ঠনলব্ধ অর্থ এবং খরজ অর্থাৎ খাজনা; সাধারণত যুদ্ধবিগ্রহের সময়ে

<sup>১</sup> J. A. S. P. Vol. III, 1958, pp. 67-68 <sup>২</sup> Ibid, pp. 72-73 f.n. <sup>৩</sup> Ibid, p. 75

<sup>৪</sup> Ibid, pp. 86-89 <sup>৫</sup> বর্তমান গ্রন্থ, পৃ: ২২৮ <sup>৬</sup> বর্তমান গ্রন্থ, পৃ: ২৪০ <sup>৭</sup> J. A. S. P.,

Vol., III 1958, pp. 89-90

লুঠ করে যে অর্থ সংগ্রহ করা হত, তার পাঁচভাগের চারভাগ সৈন্যবাহিনীর মধ্যে বন্টিত হত এবং বাকী এক ভাগ 'গনীমাহ'-রূপে রাজকোষে জমা হত।<sup>৮</sup> 'খরজ' এক বিচিত্র পদ্ধতিতে সংগৃহীত হত। সুলতান বিশেষ বিশেষ অঞ্চলে বিশেষ বিশেষ ব্যক্তিকে 'মোকতা' করতেন অর্থাৎ ঐ অঞ্চলের ( ইস্তার ) 'খরজ' সংগ্রহের ভার দিতেন—যেমন হোসেন শাহ হিরণ্য ও গোবর্ধন মজুমদারকে সপ্তগ্রাম মুলুকের 'খরজ' সংগ্রহের ভার দিয়েছিলেন। সপ্তগ্রাম মুলুক থেকে বিশ লক্ষ টাকা খাজনা সংগৃহীত হত। হিরণ্য ও গোবর্ধন মজুমদার তার থেকে হোসেন শাহকে বারো লক্ষ টাকা দিতেন এবং বাকী আট লক্ষ টাকা নিজেদের আইনসম্মত প্রাপ্য হিসাবে গ্রহণ করতেন।<sup>৯</sup> সুলতানের প্রাপ্য টাকা নিয়ে যাবার জন্য রাজধানী থেকে যে সব কর্মচারী আসত, তাদের 'আরিফা' বলা হত।<sup>১০</sup> সুলতানের রাজস্ব-বিভাগের প্রধান কর্মচারীর উপাধি ছিল 'সব-ই-গুমাশ্‌তাহ'।<sup>১১</sup> জলপথে যে সব জিনিস আসত, সুলতানের কর্মচারীরা তাদের উপর শুল্ক আদায় করতেন;<sup>১২</sup> যে সব ঘাটে এই শুল্ক আদায় করা হত, তাদের বলা হত 'কুতঘাট'।<sup>১৩</sup> বিভিন্ন শহরে ও নদীর ঘাটে সুলতানের বহু কর্মচারী রাজস্ব আদায়ের জন্য নিযুক্ত ছিল; সে যুগে 'হাটকর', 'ঘাটকর', 'পথকর' প্রভৃতি করও ছিল বলে মনে হয়; তখন কোন কোন জিনিষ অবাধে উড়িয়া থেকে বাংলায় নিয়ে আসা যেত না, যেমন চন্দন; এ সব জিনিস আনলে দু'দিকেই মোটা শুল্ক দিতে হত।<sup>১৪</sup> আলোচ্য যুগে বাংলার অমুসলমানদের কাছ থেকে জিজিয়া কর আদায় করা হত বলে কোন প্রমাণ পাওয়া যায় না।

রাজ্যের শাসনব্যবস্থায়, বলা বাহুল্য, সুলতানের স্থান ছিল সবচেয়ে উচ্চত্রে। সুলতান ছিলেন স্বাধীন ও সর্বশক্তিমান। তিনি যে প্রাসাদে বাস করতেন, তার আয়তন ছিল বিরাট; সেখানে প্রশস্ত দরবার-ঘরে তাঁর সভা বসত।<sup>১৫</sup> নীতকালে কখনও কখনও উন্মুক্ত অঙ্গনে সুলতানের সভা বসত।<sup>১৬</sup> সভায় সুলতানের পাত্রমিত্রসভাসদেরা উপস্থিত থাকতেন।

৮ J. A. S. P., Vol. III, 1958, pp. 90-91 ৯ বর্তমান গ্রন্থ, পৃ: ৩৭৮-১০ বর্তমান গ্রন্থ, পৃ: ৩৭৮-৭৯ ১১ J. A. S. P., Vol. III, 1958, p. 92 ১২ J. A. S. P., Vol. III, 1958, p. 92 ১৩ বড়ু চণ্ডীদাসের 'শ্রীকৃষ্ণকীর্তন' গ্রন্থে শব্দটি পাওয়া যায়। ১৪ J. A. S. P., Vol. III, 1958, p. 92 এবং 'চৈতন্যচরিতামৃত', মধ্যলীলা, ৪র্থ পরিচ্ছেদ দ্রষ্টব্য। ১৫ চীনা গ্রন্থ 'শিং-ছা-তুং-লাম' থেকে এই তথ্য জানা যায়; বর্তমান গ্রন্থ, ১১শ অধ্যায় ভ্র:। ১৬ কুস্তিবাসের আত্মকাহিনী থেকে এই তথ্য জানা যায়, বর্তমান গ্রন্থ ১১শ অধ্যায় ভ্র:।

সুলতানের প্রাসাদে ‘হাজিব’, ‘সিলাহ্‌দার’, ‘শরাবদার’, ‘জমাদার’ ও ‘দরবান’ প্রভৃতি কর্মচারীরা থাকতেন। ‘হাজিব’রা সভার বিভিন্ন অঙ্গুষ্ঠানের ভারপ্রাপ্ত ছিলেন; ‘সিলাহ্‌দার’রা সুলতানের বর্ম বহন করতেন; ‘শরাবদার’রা সুলতানের স্মরণানের ব্যবস্থা করতেন; ‘জমাদার’রা ছিলেন তাঁর পোষাকের তত্ত্বাবধায়ক এবং ‘দরবান’রা প্রাসাদের ফটকে পাহারা দিত।<sup>১৭</sup> এ ছাড়া সমসাময়িক বাংলা সাহিত্যে ‘ছত্রী’ নামক এক শ্রেণীর রাজকর্মচারীর উল্লেখ পাওয়া যায়, এঁরা হয় উৎসব-অঙ্গুষ্ঠানের সময়ে সুলতানের ছত্র ধারণ করতেন, না হয় সুলতানের দেহরক্ষী ছিলেন।<sup>১৮</sup> সুলতানের চিকিৎসকরা সাধারণত বৈজ্ঞানিক হিন্দু হতেন, তাঁদের উপাধি হত ‘অস্তরঙ্গ’।<sup>১৯</sup> কয়েকজন সুলতানের হিন্দু সভাপণ্ডিতও ছিল।<sup>২০</sup> সুলতানের প্রাসাদে অনেক ক্রীতদাস থাকত। এরা সাধারণত খোজা অর্থাৎ নপুংসক হত।

সুলতানের অমাত্য ও সভাসদবর্গ ও অগ্রাগ্র অভিজাত রাজপুরুষগণ ‘আমীর’, ‘মালিক’ প্রভৃতি অভিধায় ভূষিত হতেন। এঁদের ক্ষমতা নিতান্ত অল্প ছিল না, বহুবার এঁদের ইচ্ছায় বিভিন্ন সুলতানের সিংহাসনলাভ ও সিংহাসনচ্যুতি ঘটেছে। কোন সুলতানের মৃত্যুর পর তাঁর ত্রায়সঙ্গত উত্তরাধিকারীর সিংহাসনে আরোহণের সময়ে সম্ভবত আমীর, মালিক ও উচ্চপদস্থ রাজকর্মচারীদের আনুষ্ঠানিক অত্মমোদন দরকার হত।<sup>২১</sup> রাজ্যের বিশিষ্ট পদাধিকারীরা ‘ওয়াজীর’ (উজীর) আখ্যা লাভ করতেন। ‘ওয়াজীর’ (উজীর) বলতে সাধারণত মন্ত্রী বোঝায়, কিন্তু আলোচ্য সময়ে বাংলার অনেক সেনানায়ক এবং আঞ্চলিক শাসনকর্তাও ‘ওয়াজীর’ আখ্যা লাভ করেছেন দেখতে পাই।<sup>২২</sup> যুদ্ধবিগ্রহের সময়ে বাংলার সীমান্ত অঞ্চলে সামরিক শাসনকর্তা নিযুক্ত করা হত। সামরিক শাসনকর্তাদের ‘লস্কর-ওয়াজীর’ বলা হত, কখনও কখনও শুধু ‘লস্কর’-ও বলা হত।<sup>২৩</sup> সুলতানদের প্রধান মন্ত্রীরা (অন্তত কেউ কেউ) ‘খান-ই-জহান’ উপাধি লাভ করতেন; প্রধান আমীরকে বলা হত ‘আমীর-উল-উমারা’।<sup>২৪</sup> সুলতানের মন্ত্রী, অমাত্য,

১৭ J. A. S. P., Vol. III, 1958, pp. 79-80 ১৮ বর্তমান গ্রন্থ, পৃ: ৩৭২-৩৭৩ ১৯ বর্তমান গ্রন্থ, পৃ: ২০১ ২০ রায়মুকুট বৃহস্পতি মিশ্রের ‘রাজপণ্ডিত’ উপাধি ছিল, কৃত্তিবাসের আত্মজীবনীতে গোড়েশ্বরের মুরুল নামে একজন পণ্ডিতের উল্লেখ পাই। ২১ বর্তমান গ্রন্থ, পৃ: ৯৮ ২২ J. A. S. P. Vol, III, 1958, p. 83 ২৩ বর্তমান গ্রন্থ, পৃ: ৩৫৬ ২৪ ‘তারিখ-ই-কিরিশ্তা ও ‘রিয়াজ উস-সলাতীন’ এবং বর্তমান গ্রন্থ, পৃ: ২৪০ প্র:।



ও পদস্থ কর্মচারীরা 'খান মজলিস', 'মজলিস অল-আলা', 'মজলিস-অল-আজম', 'মজলিস অল-মুআজ্জম', 'মজলিস অল-মজালিস', 'মজলিস-বারবক' প্রভৃতি উপাধি লাভ করতেন ; স্থলতানের সেক্রেটারীদের বলা হত 'দবীর'; প্রধান সেক্রেটারীকে 'দবীর খাস' ( দবীর-ই-খাস ) বলা হত ।<sup>২৫</sup>

আলোচ্য যুগের সামরিক ব্যবস্থা সম্বন্ধেও কিছু কিছু তথ্য পাওয়া যায় । সৈন্যবাহিনীর সর্বাধিনায়ক ছিলেন স্থলতান স্বয়ং । বিভিন্ন অভিযানের সময়ে যে সব বাহিনী প্রেরিত হত, তাদের অধিনায়কদের 'সর-ই-লস্কর' বলা হত । সৈন্যবাহিনী চার ভাগে বিভক্ত ছিল—হাতীসওয়ার, ঘোড়সওয়ার, পদাতিক এবং নৌবহর । বাংলার পদাতিকদের বিশিষ্ট নাম ছিল 'পাইক', এরা এ দেশেরই লোক ; এরা খুব ভাল যুদ্ধ করত ।<sup>২৬</sup>

পঞ্চদশ শতাব্দীর শেষ দিক পর্যন্ত বাংলার সৈন্যেরা প্রধানত তীর-ধনুক দিয়ে যুদ্ধ করত । এ ছাড়া তারা বর্শা, বল্লম ও শূল প্রভৃতি অস্ত্রও ব্যবহার করত । শর ও শূল ক্ষেপণের যন্ত্রের নাম ছিল যথাক্রমে "আরাদা" ও "মঞ্জালিক" । সম্ভবত পঞ্চদশ শতাব্দীর শেষ দিক থেকে বাংলার সৈন্যেরা কামান ব্যবহার করতে শেখে এবং ১৫২৯ খ্রীষ্টাব্দের মধ্যেই তারা কামান চালানোর দক্ষতার জন্ত দেশ-বিদেশে খ্যাতি অর্জন করে ।<sup>২৭</sup>

বাংলার সৈন্যবাহিনীতে দশ জন অখারোহী সৈন্য নিয়ে এক একটি দল গঠিত হত ; তাদের নায়কের উপাধি ছিল 'সর-ই-খেল' ; বাংলার নৌবহরের অধিনায়ককে বলা হত 'মীর বহুবু' ।<sup>২৮</sup> বাংলার স্থলবাহিনীর প্রধান শক্তি ছিল হাতী ; সে সময়ে বাংলার মত এত ভাল হাতী ভারতবর্ষের আর কোথাও পাওয়া যেত না ।<sup>২৯</sup> সৈন্যেরা তখন নিয়মিত বেতন ও খাত পেত । সৈন্যবাহিনীর বেতনদাতার উপাধি ছিল 'আরিজ-ই-লস্কর' ।<sup>৩০</sup>

আলোচ্য সময়ের বিচারব্যবস্থা সম্বন্ধে বিশেষ কিছু জানা যায় না । কাজীরা বিভিন্ন স্থানে বিচারের জন্ত নিযুক্ত থাকতেন এবং তাঁরা ঐন্সামিক বিধান অনুসারে বিচার করতেন, এইটুকু মাত্র জানা যায় । কোন কোন স্থলতান নিজেই কিছু কিছু মামলার বিচার করতেন ।<sup>৩১</sup>

<sup>২৫</sup> J. A. S. P., Vol. III, 1958, pp. 83-84 এবং বর্তমান গ্রন্থ, পৃ: ২৮৪-৮৫, পৃ: ৩৬৫-৭০ জ: । <sup>২৬</sup> J. A. S. P., Vol. III, 1958, pp. 95-96 <sup>২৭</sup> বর্তমান গ্রন্থ, পৃ: ৪৯ ও ৪২১ জ: <sup>২৮</sup> J. A. S. P. Vol. III, 1958, p. 97 <sup>২৯</sup> Ibid, pp. 97-98 <sup>৩০</sup> বর্তমান গ্রন্থ, পৃ: ৩ <sup>৩১</sup> বর্তমান গ্রন্থ, পৃ: ২১৪ জ: ।

অপরাধীদের জন্য যে সব শাস্তির ব্যবস্থা ছিল, তাদের মধ্যে প্রধান ছিল বাঁশের লাঠি দিয়ে প্রহার ও নির্বাসন।<sup>৩২</sup> কোন মুসলমান হিন্দুর দেবতার নাম করলে তাকে কঠোর শাস্তি দেওয়া হত এবং কখনও কখনও বিভিন্ন বাজারে নিয়ে গিয়ে তাকে বেত্রাঘাত করা হত।<sup>৩৩</sup> সুলতানদের “বন্দিঘর” অর্থাৎ কারাগারও ছিল। কখনও কখনও হিন্দু জমিদারদের সেখানে আটক করে রাখা হত বলে প্রমাণ পাওয়া যায়।<sup>৩৪</sup> সুলতানের কোন কর্মচারী তাঁর বিরুদ্ধে বিশ্বাসঘাতকতা করলে সুলতান তাকে মৃত্যুদণ্ড দিতেন।<sup>৩৫</sup> নরহত্যার জন্য মৃত্যুদণ্ড দেওয়া হত কিনা, তা জানা যায় না ; যতদূর মনে হয় নরহত্যার ক্ষেত্রে সাধারণ ঐজামিক আইনই প্রযুক্ত হত।

স্বাধীন সুলতানদের আমলে বাংলাদেশের শাসনব্যবস্থায় শুধু মুসলমানরা নয়, হিন্দুরাও গুরুত্বপূর্ণ অংশ গ্রহণ করতেন। তাঁরা অনেক সময়ে মুসলমান কর্মচারীদের উপরে ‘ওয়ালি’ অর্থাৎ প্রধান তত্ত্বাবধায়কের পদে নিযুক্ত হতেন ; বাংলার সুলতানদের মন্ত্রী, সেক্রেটারী, এমনকি সেনাপতির পদেও অনেক হিন্দু নিযুক্ত হয়েছেন।<sup>৩৬</sup>

<sup>৩২</sup> J. A. S. P., Vol. III, 1958, p. 101 <sup>৩৩</sup> বর্তমান গ্রন্থ, পৃ: ২২৪-২৮ <sup>৩৪</sup> বর্তমান গ্রন্থ, পৃ: ২২৭-৩৮ <sup>৩৫</sup> J. A. S. P., Vol. III, 1968, p. 100 <sup>৩৬</sup> বর্তমান গ্রন্থ, পৃ: ৮৩, ১৬০, ২০১-০৫, ৩৬৩-৮৩ প্র: ১

## সমসাময়িক দৃষ্টিতে এ' যুগের বাংলাদেশ

আগের পরিচ্ছেদগুলিতে ১৩৩৮ থেকে শুরু করে ১৫৩৮ খ্রীষ্টাব্দ পর্যন্ত সময়ের বাংলাদেশের রাজনৈতিক ইতিহাস লিপিবদ্ধ হয়েছে। বর্তমান পরিচ্ছেদে আমরা এই সময়কাল বাংলাদেশের যে চিত্র সমসাময়িক সূত্রগুলিতে পাওয়া যায়, তা সংকলন করব।

এই সব সমসাময়িক সূত্রে নিম্নোক্ত কয়েকটি শ্রেণীতে ভাগ করা চলে।

(ক) বিদেশীর লেখা বিবরণ

(খ) শাস্ত্রগ্রন্থ

(গ) সাহিত্যগ্রন্থ

এই সূত্রগুলি নানা ভাষায় লেখা। বর্তমান পরিচ্ছেদে আমরা কালানুক্রমিক রীতি অনুসরণ করে এই সব সূত্র থেকে প্রয়োজনীয় অংশ উদ্ধৃত করব।

### (১) ইব্ন্ বত্তুতার বিবরণ

আলোচ্য যুগের বাংলাদেশ সম্বন্ধে বিদেশীর লেখা যে সমস্ত সমসাময়িক বিবরণ পাওয়া যায়, তাদের মধ্যে সবচেয়ে প্রাচীন মূর পর্যটক ইব্ন্ বত্তুতার 'রেহ্লা' (ভ্রমণ-বিবরণী)। ইব্ন্ বত্তুতা বাংলাদেশের যে অংশে ভ্রমণ করেন, তার স্থলতান সে সময়ে ছিলেন ফখরুদ্দীন মুবারক শাহ। ইব্ন্ বত্তুতা ঠিক কোন্ সময়ে বাংলাদেশে এসেছিলেন, তা তিনি স্পষ্ট করে লেখেন নি। তবে তা অসম্ভব করা কঠিন নয়। ইব্ন্ বত্তুতা লিখেছেন যে তিনি ৭৪৫ হিঃর ১৫ই রবী উল-আখির (২৬শে আগস্ট, ১৩৪৪ খ্রীঃ) তারিখে মলুক ত্যাগ করে সিংহলের দিকে যাত্রা করেন এবং ৭৪৮ হিঃর মহরর মাসে (এপ্রিল, ১৩৪৭ খ্রীঃ) ধোফর (জফার) পৌছোন। এই দুই তারিখের মাঝখানে তিনি বহু দেশ ভ্রমণ করেন, বাংলাদেশ তার মধ্যে অন্ততম এবং ইব্ন্ বত্তুতার বাংলাদেশে পরিভ্রমণ ধোফর বা জফারে পৌছোনোর কয়েক মাস আগেকার ঘটনা। সুতরাং ইব্ন্ বত্তুতা ১৩৪৬ খ্রীষ্টাব্দে বাংলাদেশে ভ্রমণ করেছিলেন বলে

অহুমান করা যায়। ইব্ন্ বত্তুতার অস্পষ্ট সময়-নির্দেশ থেকে মনে হয়, ১৩৪৬ খ্রীর শেষ দিকে নীতকালে তিনি বাংলায় এসেছিলেন। কর্ণেল য়ুল মনে করেন, তারও এক বছর আগে অর্থাৎ ১৩৪৫-৪৬ খ্রীর গোড়ার দিকে ইব্ন্ বত্তুতা বাংলায় আসেন। মাহ্‌দী হোসেনের মতে ইব্ন্ বত্তুতা ১৩৪৬ খ্রীষ্টাব্দের জুলাই মাসের মত সময়ে বাংলাদেশে এসেছিলেন। শেখোক্ত মত গ্রহণযোগ্য বলে মনে হয়। যাহোক, ইব্ন্ বত্তুতা যে ১৩৪৬ খ্রীষ্টাব্দে বাংলায় এসেছিলেন, তাতে সংশয়ের কোন কারণ নেই।

ইব্ন্ বত্তুতা শুধু বাংলাদেশেই আসেন নি, আসামের কামরূপ অঞ্চলেও গিয়েছিলেন। বাংলা ও আসাম ভ্রমণের বিবরণ তিনি একসঙ্গেই দিয়েছেন। নীচে আমরা ঐ বিবরণ উদ্ধৃত করলাম।

“বাংলা একটি বিরাট দেশ। এখানে প্রচুর পরিমাণে চাল উৎপন্ন হয়। সারা পৃথিবীতে আমি এমন একটিও দেশ দেখিনি, যেখানে বাংলাদেশের চেয়ে জিনিসপত্রের দাম সস্তা। যাহোক, বাংলাদেশ স্যাৎসেঁতে, খুরাসানিরা (অর্থাৎ বিদেশীরা) একে বলে ‘সম্পদে ভরা নরক’। আমি বাংলাদেশের রাস্তায় দেখেছি, এক রূপোর দিনার<sup>১</sup>, যা আট দিরহামের সমান, তার বিনিময়ে দিল্লীর ২৫ রংল্ ওজনের চাল বিক্রী হচ্ছে, ভারতবর্ষের এক দিরহামের মূল্য (মিশর ও সিরিয়ার) একটি রূপোর দিরহামের সমান, দিল্লীর রংলের ওজন মরক্কোর কুড়ি রংলের সমান। আমি শুনেছি যে বাংলার লোকেরা মনে করে তাদের দেশে ঐটাই চড়া দাম। মরক্কোর লোক ধার্মিক প্রকৃতির মুহম্মদ-উল-মশমুদী ছিলেন এই দেশের একজন পুরোনো বাসিন্দা, দিল্লীতে আমার কাছে থাকার সময়ে তাঁর মৃত্যু হয় : তিনি আমায় বলেছিলেন যে তিনি, তাঁর স্ত্রী এবং একজন চাকর—এই তিনজনের এক বছরের উপযোগী জিনিস তিনি আট দিরহামেই কিনতেন এবং খোসা সমেত চাল (ধান) তিনি কিনতেন আট দিরহামে দিল্লীর আশী রংল্ দরে। (ঐ ধান) ভেঙে পাকা পঞ্চাশ রংল্ চাল পাওয়া যেত, পঞ্চাশ রংল্ মানে দশ কিনটার। আমি সেখানে (বাংলাদেশে) তিনটি রূপোর দিনারে একটি ছদ্মবতী গাভী বিক্রী হতে দেখেছি ; এই সব অঞ্চলে গরুর কাজ মহিম দিয়েও চালানো হয়। আমি সেখানে এক দিরহামে আটটি দরে ছোটপুট মুরগী বিক্রী হতে এবং এক দিরহামে

১ “রূপোর দিনার” এবং “টকা” (টাকা) সমার্থক। ২ দিল্লীর এক রংল্ = বর্তমান যুগের ১৪ সের।

পনেরোটি দরে বাচ্ছা পায়রা বিক্রী হতে দেখেছি। একটি পরিপুষ্ট মেঘশাবক দুই দিরহাম দামে বিক্রী হতে দেখেছি; (বাংলায়) চার দিরহামে এক রংলু চিনি পাওয়া যেত—রংলের ওজন দিল্লীর মান অনুযায়ী। এছাড়া, এক রংলু গোলাপ-জল পাওয়া যেত আট দিরহামে, এক রংলু ঘী চার দিরহামে এবং এক রংলু তিল(seasame) তেল দুই দিরহামে। সবচেয়ে মিহি পাংলা এক থান কাপড় আমি দুই দিনারে ত্রিশ হাত দরে বিক্রী হতে দেখেছি। একটি সুন্দরী ক্রীতদাসী বালিকা—যে উপপত্নী হতে সমর্থ—তার দাম এক সোনার দিনার, যা মরক্কোর আড়াই সোনার দিনারের সমান। এই দরে আমি অশ্বা নামে অত্যন্ত সুন্দরী একটি ক্রীতদাসী বালিকাকে ক্রয় করলাম। আমার একজন সঙ্গী লুলু নামে একটি অল্পবয়স্ক সুদর্শন বালককে দুই সোনার দিনার দামে কিনলেন।

“বাংলাদেশের প্রথম যে শহরে আমরা প্রবেশ করলাম, তা হল সোদকা-ওয়াঙ।<sup>১</sup> এটি মহাসমুদ্রের তীরে অবস্থিত একটি বিরাট শহর, এরই কাছে গঙ্গা নদী—যেখানে হিন্দুরা তীর্থ করেন—ও যমুনা নদী একসঙ্গে মিলেছে এবং সেখান থেকে প্রবাহিত হয়ে তারা সমুদ্রে গিয়ে পড়েছে। গঙ্গা নদীর তীরে<sup>২</sup> অসংখ্য জাহাজ ছিল, সেইগুলি দিয়ে এরা (সোদকাওয়াঙের লোকেরা) লখনৌতির লোকেদের সঙ্গে যুদ্ধ করে।

### বাংলার সুলতান

“ইনি সুলতান ফখরুদ্দীন, ডাকনাম ফখরা। গুলী রাজা ইনি। বিদেশীদের, বিশেষত ফকীর ও সূফীদের ইনি ভালবাসেন। বাংলা-রাজ্যের মালিক আসলে ছিলেন সুলতান গিয়াসুদ্দীন বলবনের পুত্র সুলতান নাসিরুদ্দীন। এর পুত্র মুইজুদ্দীন দিল্লীর সম্রাট হন। তারপর নাসিরুদ্দীন তাঁর পুত্রের সঙ্গে যুদ্ধ করার জন্ত যাত্রা করেন। তাঁরা গঙ্গা নদীর উপরে<sup>৩</sup> পরস্পরের সম্মুখীন হন। তাঁদের সাক্ষাৎকার ‘লিকা-উস-সদাইন’ (‘দুটি শুভ তারার সাক্ষাৎকার’) নাম দিয়ে বর্ণিত হয়েছে। আমরা আগেই এর বিবরণ দিয়েছি

<sup>১</sup> “সোদকাওয়াঙ.”—চট্টগ্রাম। এ সম্বন্ধে আলোচনার জন্ত বর্তমান গ্রন্থ, পৃ: ৭ দ্রষ্টব্য।

<sup>২</sup> ইবনু বতুতা এখানে কর্ণফুলী নদীকে ভুল করে “গঙ্গা” বলেছেন বলে মনে হয়।

<sup>৩</sup> আসলে সরস্বতী নদী।

এবং বলেছি কীভাবে নাসিরুদ্দীন তাঁর পুত্রের পক্ষে দিল্লীর সিংহাসন ত্যাগ করলেন এবং বাংলাদেশে ফিরে এসে আমরগকাল সেখানেই রইলেন। এরপর তাঁর (নাসিরুদ্দীনের) পুত্র শামসুদ্দীন<sup>৪</sup> সিংহাসনে আরোহণ করলেন। তিনিও মারা গেলে তাঁর স্থলাভিষিক্ত হলেন তাঁর পুত্র শিহাবুদ্দীন ; তাঁকে তাঁর ভাই গিয়াসুদ্দীন বহাদুর ব্র কালক্রমে পরাস্ত করলেন। শিহাবুদ্দীন স্থলতান গিয়াসুদ্দীন তোগলকের সাহায্য ভিক্ষা করলেন, তিনি তাঁকে সাহায্য করলেন এবং বহাদুর বুরকে বন্দী করলেন। স্থলতান গিয়াসুদ্দীনের পুত্র মুহম্মদ সিংহাসনে আরোহণ করে বহাদুর বুরকে মুক্ত করে দিলেন, তিনি (বহাদুর বুর) তাঁর (মুহম্মদ তোগলকের) সঙ্গে যুক্তভাবে রাজত্ব করতে সম্মত হলেন। কিন্তু তিনি তাঁর প্রতিশ্রুতি ভঙ্গ করলেন। স্থলতান মুহম্মদ তাঁর সঙ্গে যুদ্ধ করে তাঁকে বধ করলেন এবং তাঁর ধর্ম-ভ্রাতাকে<sup>৫</sup> এই প্রদেশ শাসনের ভার দিলেন ; কিন্তু তাঁকে দৈতেরা বধ করল। তখন আলী শাহ—যিনি লখনৌতিতে ছিলেন—বাংলার শাসনক্ষমতা হস্তগত করলেন। যখন ফখরুদ্দীন দেখলেন যে স্থলতান নাসিরুদ্দীনের বংশের রাজত্ব শেষ হয়েছে, তখন তিনি তাঁদের সঙ্গে তাঁর বন্ধুত্বের<sup>৬</sup> জন্ত সোদকাওয়াঙে<sup>৭</sup> ও বাংলার অবশিষ্ট অংশে বিদ্রোহ করলেন। কিন্তু আলী শাহের সঙ্গে তাঁর যুদ্ধ বেধে গেল। শীতকালে এবং বর্ষার কাদার মধ্যে ফখরুদ্দীন জলপথে লখনৌতি আক্রমণ করতেন, কারণ জলে তিনি শক্তিশালী ছিলেন। কিন্তু শুষ্ক ঋতু (গ্রীষ্ম) এলে আলী শাহ স্থলপথে বাংলাদেশ আক্রমণ করতেন, কারণ স্থলে তিনিই ছিলেন শক্তিশালী।

### কাহিনী

“ফকীরদের প্রতি স্থলতান ফখরুদ্দীনের প্রীতি এত গভীর ছিল যে তিনি শায়দা নামে একজন ফকীরকে সোদকাওয়াঙে তাঁর নায়েব (প্রতিনিধি) নিযুক্ত করেছিলেন। তারপর স্থলতান ফখরুদ্দীন তাঁর এক শত্রুর বিরুদ্ধে যুদ্ধ করবার জন্ত যাত্রা করেন। কিন্তু শায়দা নিজস্বাধীন হবার মনলব করে তাঁর বিরুদ্ধে

<sup>৪</sup> শামসুদ্দীন (কিরোজ শাহ) নাসিরুদ্দীনের পুত্র নন। বর্তমান গ্রন্থ, পৃ: ৮ দ্রষ্টব্য।  
<sup>৫</sup> বহরাম খান। এঁর স্বাভাবিক মৃত্যুই হয়েছিল। <sup>৬</sup> এই উক্তির যাবার্থ্য সম্বন্ধে সন্দেহের কারণ আছে। বর্তমান গ্রন্থ, পৃ: ৮-৯ দ্রষ্টব্য।

বিদ্রোহ করে বসল। সে সুলতান ফখরুদ্দীনের পুত্রকে হত্যা করল; এইটি ছাড়া সুলতানের আর কোন পুত্র ছিল না। খবর শুনে সুলতান তাঁর রাজধানীতে ফিরে এলেন। শায়দা এবং তার সমর্থকরা দুর্ভেদ্য বাঁটি সুনার-কাওয়াড (সোনারগাঁও) নগরে পালিয়ে গেল। সুলতান ঐ স্থান অবরোধ করবার জন্ত এক সৈন্তবাহিনী পাঠালেন। সেখানকার অধিবাসীরা নিজেদের জীবনের ভয়ে শায়দাকে ধরে সুলতানের সৈন্তবাহিনীর কাছে পাঠিয়ে দিল। সুলতানের কাছে এ খবর গেল। তিনি বিদ্রোহীর মাথা পাঠিয়ে দিতে আদেশ করলেন। আমি যখন সোদকাওয়াডে গিয়েছিলাম, তার সুলতানকে আমি দেখিনি, তাঁব সঙ্গে আলাপও করিনি, কারণ তিনি ভারতবর্ষের সম্রাটের বিরুদ্ধে বিদ্রোহ করেছিলেন এবং তা (ফখরুদ্দীনের সঙ্গে সাক্ষাৎকার) করলে তার ফল কী হবে, সে সম্বন্ধে আমার ভয় ছিল। আমি সোদকাওয়াড ত্যাগ করে কামরু (কামরূপ) পর্বতমালার দিকে রওনা হলাম। সেখান (সোদকাওয়াড) থেকে ঐ জায়গায় যেতে এক মাস সময় লাগে। কামরু পর্বতমালা বিরাট ও বিস্তীর্ণ, চীন থেকে তিব্বত পর্যন্ত প্রসারিত। সেখানে কস্তুরী মৃগ পাওয়া যায়। এই সব পাহাড়ের অধিবাসীদের সঙ্গে তুর্কীদের মিল আছে। এদের পরিভ্রমসাধ্য কাজ করার শক্তি অসাধারণ। তাদের জাতের একজন ক্রীতদাস অগ্র জাতের অনেকজন ক্রীতদাসের সমকক্ষ। তারা ষাট্ এবং ভোজবাজীতে দক্ষতা ও অহুরাগের জন্ত সুপ্রসিদ্ধ। আমার এই পর্বতমালাতে যাবার উদ্দেশ্য ছিল একজন সন্তকে দর্শন করা। তিনি ঐখানেই বাস করছিলেন। তাঁর নাম শেখ জলালুদ্দীন তব্রিজী।

### শেখ জলালুদ্দীন

“এই শেখ ছিলেন একজন প্রেষ্ঠ সন্ত, তাঁর ব্যক্তিত্ব অনগ্রসাধারণ। তাঁর ‘কেরামৎ’ (অলৌকিক ক্রিয়াকলাপ) এবং মহৎ কাজগুলি জনসাধারণের কাছে সুপরিচিত। তাঁর বয়স খুব বেশী। তিনি আমাকে বলেছিলেন—ভগবান তাঁকে দয়া করুন—যে খলিফা অল-মুস্তাশিম্ বিল্লাহ্, অল-আক্বাসীকে তিনি বাগদাদে দেখেছিলেন এবং তাঁর হত্যাকাণ্ডের সময়ে তিনি উপস্থিত ছিলেন। তাঁর অহুচরেরা আমায় পরে বলেছিলেন যে তিনি একশো পঞ্চাশ বছর বয়সে পরলোকগমন করেন। চল্লিশ বছর ধরে তিনি উপবাস করেছিলেন, পর পর দশ দিন অনশনে অতিবাহিত করার আগে কোন উপবাসই তিনি ভঙ্গ করতেন

না। তাঁর একটি গরু ছিল, তার দুধ খেয়ে তিনি উপবাস ভাঙতেন। তিনি সারারাত্রি খাড়া থেকে প্রার্থনা করতেন। তিনি ছিলেন ক্ষীণদেহ, দীর্ঘকায় এবং বিরলশব্দ। এইসব পর্বতের অধিবাসীরা তাঁরই কাছে ইসলাম ধর্মে দীক্ষা নিয়েছিল। এই কারণেই তিনি এদের মধ্যে বাস করতেন।<sup>৭</sup>

\*

শেখ জলালুদ্দীনের কাছ থেকে বিদ্যায় নিয়ে আমি হবক শহরে গেলাম। (বাংলার) সবচেয়ে সুন্দর ও গৌরবপূর্ণ শহরগুলির মধ্যে এটি অন্যতম। একটি নদীর উপর দিয়ে এখানে যেতে হয়। সেটি কামরু পর্বতমালা থেকে বেরিয়েছে। তার নাম 'নীল নদী' (নহর-উল-অজরক)। বাংলা এবং লখনৌতিতে যাবার পথ এই নদী দিয়ে। এই নদীর ডান ও বাঁ দুই তীরেই জলের চাকী, বাগান এবং গ্রাম আছে, মিশরের নীল নদের তীরে যেমন আছে। হবকের অধিবাসীরা কাফের। তারা 'জিন্না'র (রক্ষণব্যবহার) অধীন। তাদের উৎপন্ন শস্তের অর্ধেক (সরকার কর্তৃক) নিয়ে নেওয়া হয়। তা ছাড়াও তাদের কোন কোন কর দিতে হয়। পনেরো দিন ধরে এই নদীতে নৌকো বেয়ে আমরা অনেক গ্রাম ও ফলের বাগান পার হলাম। (মনে হচ্ছিল) আমরা যেন বাজারের উপর দিয়ে যাচ্ছি। সেখানে (নদীতে) অসংখ্য নৌকা আছে। প্রত্যেক নৌকায় একটা করে ঢোল আছে। যখন দু'টি নৌকা সামনাসামনি আসে, দু'দলই নিজেদের ঢোল বাজায়। এইভাবে মাঝিরা পারস্পরিক শুভেচ্ছা বিনিময় করে। পূর্বোক্ত সুলতান ফখরুদ্দীন আদেশ দিয়েছেন যে এই নদীতে ফকীরদের কাছ থেকে কোন ভাড়া আদায় করা হবে না এবং যাদের কিছু নেই, তাদের খাবার দেওয়া হবে। তদনুসারে, এই শহরে কোন ফকীর এলে তাকে আধ দীনার দেওয়া হয়।

“আমরা যে বর্ণনা দিলাম, সেইভাবে পনেরো দিন ধরে নদীপথে চলবার পর আমরা ‘সুনারকাওয়াত’ (সোনারগাঁও) শহরে পৌঁছোলাম। এই শহরের অধিবাসীরাই শায়দা নামক ফকীর এখানে আশ্রয় নিলে তাকে বন্দী করেছিল।

---

<sup>৭</sup> এর পর ইব্ন বতুতা শেখ জলালুদ্দীন তব্রিজীর “অলৌকিক জিহ্বাকলাপ”-এর বিবরণ দিয়েছেন। নিম্নায়োজনবোধে এগুলি বাদ দেওয়া হল। ইব্ন বতুতা সত্যই শেখ জলালুদ্দীন তব্রিজীকে দেখেছিলেন কিনা, সে বিষয়ে কোন কোন গবেষক সংশয় প্রকাশ করেছেন। এ সম্বন্ধে বিস্তৃত আলোচনা পরিশিষ্টে প্রদত্ত।



এখানে পৌছে আমরা একটি 'জাহ' (চীনদেশের একধরনের বড় জাহাজ) দেখলাম।\* সেটি স্নমাত্রা যাবে। ঐ জায়গা (স্নমাত্রা) এখান (সোনারগাঁও) থেকে চল্লিশ দিনের পথ। আমরা এই জাহে চড়লাম।"

### (১) ওয়াংতা-ইউয়ানের বিবরণ

ইব্ন বতুতার গ্রন্থের সমসাময়িক একটি চীনা গ্রন্থেও আমরা বাংলাদেশের সংক্ষিপ্ত বিবরণ পাই। এই চীনা গ্রন্থটির নাম 'তাও-য়ি-চি-লিয়েহ্'†; ১:৪২-৫০ খ্রীষ্টাব্দের শীতকালে এই গ্রন্থটি রচিত হয়েছিল (T'oung Pao, 1915, p. 62 প্রঃ)। এই গ্রন্থের লেখক ওয়াংতা-ইউয়ান চীনের ফু-কিয়েন প্রদেশের শুক-বিভাগের অধ্যক্ষ ছিলেন; তিনি নিজের বাণিজ্য উপলক্ষে পৃথিবীর বহু স্থানে ভ্রমণ করেছেন এবং বিদেশী নাবিক ও বণিকদের কাছে আরও নানা স্থানের বিবরণ শুনেছেন; 'তাও-য়ি-চি-লিয়েহ্' তে তিনি এই সব স্থানের বর্ণনা দিয়েছেন। এই গ্রন্থে প্রদত্ত বাংলাদেশের বর্ণনাটি নীচে উদ্ধৃত হল।

"এ দেশে পাঁচটি উচ্চ ও শিলাবন্ধুর পর্বতমালা এবং একটি গভীর অরণ্য আছে। লোকেরা (এ দেশে) বিচ্ছিন্নভাবে ছড়িয়ে ছড়িয়ে বাস করে। সারা বছর তারা চাষ করে এবং বীজ বোনে, তাই পতিত জমি (এ দেশে) নেই। ক্ষেত্রগুলি খুবই শস্যসমৃদ্ধ। (এ দেশে) বছরে তিনবার ফসল ফলে। জিনিসপত্রের দাম মোটামুটিভাবে সম্ভা ও মানানসই। প্রাচীনকালে এ দেশকে বলা হত হ্‌সিন্-তু-চৌফুর (হিন্দুস্তানের) অধ্যক্ষালয় (prefecture)।

"এ দেশের আবহাওয়া সব সময়েই গরম থাকে। (এ দেশের) লোকদের আচারব্যবহার ও প্রথাপদ্ধতিগুলি পবিত্র ও ধর্মনিষ্ঠ। পুরুষ ও স্ত্রীলোক উভয়েই স্নান তুলার পাগড়ী এবং লম্বা আলখাল্লা পরে।

"(এ দেশের) সরকারী কর (আয়ের) দুই দশমাংশ। সরকার টং-কা নামে এক রকম মুদ্রা খোদাই করেন, এই মুদ্রার ওজন আট ক্যাণ্ডারীন (বা চীনা আউন্সের আট শতাংশ)। কেনাবেচার সময় এরা (বাংলার লোকেরা) কড়ি ব্যবহার করে। একটি ক্ষুদ্র মুদ্রার (অর্থাৎ টং-কার) সঙ্গে ১০,৫২০-র

\* তখন কি সোনারগাঁও অবধি নদীপথে জাহাজ আসত? ইব্ন বতুতা বোধহয় এখানে সোনারগাঁও ও চাটগাঁও-এর মধ্যে গোলমাল করে কলেছেন।

† উচ্চারণ—'তাও-য়ি-চি-লিয়েহ্'।

মত কড়ির বিনিময় হয়। জনসাধারণের পক্ষে এই মুদ্রা অত্যন্ত সুবিধাজনক। এদেশের উৎপন্ন দ্রব্যের মধ্যে উল্লেখযোগ্য আমাদের চীনদেশের মত তুলার বস্ত্র—যেমন পি-পু, কাও-নি-পু এবং তু লো-কিন; আর (উল্লেখযোগ্য দ্রব্য) মাছরাঙার পালক। বাণিজ্যের জন্ত এইসব জিনিস ব্যবহৃত হয়—দক্ষিণের ও উত্তরের রেশম, রঙীন তফেতা, জায়ফল—নীল ও সাদা, সাদা চীনা মাটির জিনিসপত্র, সাদা সূতা (বা ফিতা) এবং এই ধরনের আরও সব জিনিস।

“এই লোকগুলি (বাঙালীরা) নিজেদের গুণেই যাবতীয় শাস্তি ও সমৃদ্ধি অর্জন করেছে। এর মূলে রয়েছে তাদের কৃষিকার্যের প্রতি অমুরাগ—যার ফলে তারা অবিরাম পরিশ্রম করে, চাষ করে’ ও (শস্ত্র) রোপণ করে’ জঙ্গলে ঘেঁষা জমির উদ্ধার সাধন করেছে। স্বর্গের (আকাশের) বিভিন্ন ঋতু এই রাজ্যের উপরে পৃথিবীর সম্পদ ছড়িয়ে দিয়েছে; এগানকার লোকদের সম্পদ ও সততা বোধহয় চিউ-চিআং (পালেমবাং)-এর লোকদের চেয়ে বেশি এবং চাও-আর (জাভার) লোকদের সমান।”

যতদূর মনে হয়, এই বর্ণনা প্রধানত চট্টগ্রাম অঞ্চলের। চট্টগ্রামই সে সময় ছিল বাংলার বৃহত্তম বন্দর। চীনের নাবিক ও বণিকদের অধিকাংশই চট্টগ্রাম ভিন্ন বাংলার আর কোন স্থান দেখবার সুযোগ পেতেন না। ওয়াং-তা-ইউয়ান সম্ভবত চট্টগ্রাম অঞ্চলটুকুই দেখেছিলেন অথবা কারও কাছে তার বিবরণ শুনেছিলেন।

### মা-হোয়ানের বিবরণ

সময়ের দিক দিয়ে—এর পরে উল্লেখযোগ্য আর একটি চীনা গ্রন্থ—মা-হোয়ানের ‘য়িং-য়া শ্বং-লান’-এ প্রদত্ত বাংলা দেশের বিবরণ। ১৪০২ এবং ১৪১২ খ্রীষ্টাব্দে চীন-সম্রাটের কাছ থেকে যে রাজপ্রতিনিধিদল বাংলার রাজ্য সন্ধান এসেছিলেন (এ সম্বন্ধে বিস্তৃত আলোচনার জন্ত বর্তমান গ্রন্থ, পৃ: ১০৪-১৮১ দ্রষ্টব্য), মা-হোয়ান ছিলেন সেই দুই দলের দোভাবী। তাঁর ‘য়িং-য়া-শ্বং-লান’ গ্রন্থ ১৪২৫ থেকে ১৪৩০ খ্রীষ্টাব্দের মধ্যে রচিত হয়। এই গ্রন্থে মা-হোয়ান বাংলাদেশের যে বর্ণনা লিপিবদ্ধ করেছেন, তা আমরা নীচে উদ্ধৃত করছি। তবে এখানে একটি কথা বলার আছে। মা-হোয়ানের গ্রন্থের দু’টি বিভিন্ন সংস্করণ প্রচলিত আছে। একটি সংস্করণে প্রদত্ত বাংলা-সংক্রান্ত

বিবরণের অমুবাদ করেছিলেন রকহিল; ১৯১৫ খ্রীষ্টাব্দের T'oung Pao পত্রিকায় (pp. 436-440) এই অমুবাদ প্রকাশিত হয়েছিল। আর একটি সংস্করণের বাংলা বিষয়ক অংশ ফিলিপ্‌স্ অমুবাদ করেন এবং ১৮৯৫ খ্রীষ্টাব্দের Journal of the Royal Asiatic Society (লণ্ডন) পত্রিকায় (pp. 529 543) এই অমুবাদ প্রকাশিত হয়। প্রথমে আমরা প্রথমোক্ত সংস্করণের বাংলা সংক্রান্ত অংশের পূর্ণাঙ্গ অমুবাদ দিচ্ছি।

“(বাংলা) দেশের আয়তন খুব বড়, লোকবসতিও অত্যন্ত ঘন এবং এর অগাধ ও প্রচুর ঐশ্বর্য। সু-মেন-তা-লা (সুমাত্রা) থেকে সমুদ্রপথে যাত্রা করলে প্রথমে একটি দ্বীপ এবং পরে ৭-সুই-লন (নিকোবর) দ্বীপপুঞ্জ দেখা যায় এবং সেখান থেকে উত্তর-পশ্চিম দিকে যাত্রা করলে কুড়ি দিন বাদে চে-টি-কিআং (চাটগাঁও) তে উপস্থিত হওয়া যায়। এই জায়গাটি থেকে ছোট নৌকোয় চড়ে ৫০০ লি<sup>১</sup> মত দূর গেলে সো-না-উল্-কিআং (সোনার গাঁও)-তে পৌঁছানো যায়। এই জায়গা থেকে বাংলার রাজধানীতে যেতে হয়। রাজধানীটি দেওয়াল দিয়ে ঘেরা, এর অনেকগুলি সহরতলী আছে। রাজার প্রাসাদ এবং ছোট বড় সমস্ত অমাত্যের প্রাসাদ শহরের মধ্যেই। তাঁরা সবাই মুসলমান।

“এ দেশের স্ত্রী-পুরুষ সকলেরই গায়ের রং কালো, যদিও কবুলা লোকও এদের মধ্যে হামেশাই দেখা যায়। পুরুষেরা মাথার চুল কেটে ফেলে এবং সাদা রঙের সূতীর পাগড়ী মাথায় দেয়। তারা এক ধরনের লম্বা জামা পরে, তাতে গোল গ্রীবা বেঁটনী লাগানো থাকে, সেটি জরীর পাড় দিয়ে আটকে রাখা হয়।

“রাজা এবং উচ্চপদস্থ অমাত্যেরা মুসলমানী কাপড়ের পোষাক ও টুপি পরেন। এই পোষাকগুলি খুব সুন্দর দেখতে। এখানে সর্বসাধারণের ব্যবহারের ভাষা বাংলা; অবশ্য ৫৬ কেউ ফারসী ভাষাতেও কথা বলেন।

“ব্যবসায়-বাণিজ্যের জন্তু এরা একরকম রৌপ্য-মুদ্রা ব্যবহার করে, তার নাম টং-কা, তার ওজন তিন ক্যাণ্ডারীন, পরিধি ১৫ ইঞ্চি এবং তার দু'দিকেই লেখা থাকে। এই দিয়ে এরা ওজন অনুসারে জিনিষপত্রের দাম নির্ধারণ করে। এরা কড়িও ব্যবহার করে।

<sup>১</sup> এই দূরত্ব নির্দেশে ভুল আছে; কারণ ১ লি=১৩৩২ মাইল, কিন্তু চাটগাঁও থেকে সোনারগাঁওয়ের দূরত্ব ১৪৪ মাইল।

“এ দেশের বিবাহ এবং অন্ত্যেষ্টিক্রিয়া মুসলিম ধর্মের বিধান অনুসারে সম্পন্ন হয়।

“এ দেশে অপরাধীদের নানারকম শাস্তির ব্যবস্থা আছে। যেমন ভারী বাঁশের লাঠি দিয়ে প্রহার এবং নির্বাসন।

“এ দেশের রাজকর্মচারীদের নিজেদের সিলমোহর আছে, চিঠিপত্রের মধ্য দিয়ে যোগাযোগ রক্ষার ব্যবস্থা আছে। সৈন্তদের জ্ঞাত নিয়মিত মাইনে এং খাত্তের বরান্দের ব্যবস্থা আছে। সৈন্তবাহিনীর অধিনায়ককে বলা হয় পা-স্-সে-লা-উল্ (সিপাহ-সালার)।

“এদেশে জ্যোতিষী আছে, চিকিৎসক আছে, শাস্ত্রজ্ঞ আছে। এক কথায় এদেশে সব রকম কাজে দক্ষ লোক আছে। এখানকার কতকগুলি লোক সাদা ও কালো রঙের নকশা দেওয়া এক রকমের জামা পরে। তাদের দেখায় ঠিক ভাঁড়ের মত। প্রবাল, ফটিক ও রঙীন পাথর এক সঙ্গে গেঁথে বানানো এক ধরনের মালা তারা গলায় ঝুলিয়ে রাখে, হাতেও পাথরের চুড়ি পরে। এই লোকগুলি খুব ভাল নাচতে এবং গান করতে পারে। পান-ভোজনের অহুষ্ঠানকে এরা আনন্দে ভরিয়ে রাখে।

“এখানে আর এক শ্রেণীর লোক আছে, যারা কেন্-সিআও-সু-লু-নাই<sup>২</sup> নামে পরিচিত। প্রত্যেক দিন ভোর পাঁচটার সময়ে তারা উক্তপদস্থ রাজকর্মচারীদের এবং ধনী লোকদের বাড়ীর ফটকের সামনে সো-না (সানাই) এবং ঢাক বাজাতে থাকে। প্রাতরাশের সময় উপস্থিত হলে তারা বাড়ী বাড়ী গিয়ে বক্শিস আদায় করে—মদ, খাবার, টাকা এবং আরও অনেক জিনিস তারা পায়। এরা ছাড়াও এদেশে আরও নানারকমের বাজিয়ে আছে।

“এখানে আর এক শ্রেণীর লোক আছে, যারা বাজারে এবং গৃহস্থবাড়ীতে এক ধরনের খেলা দেখায়। তাদের সঙ্গে লোহার শিকলে বাঁধা একটি বাঘ থাকে। (খেলা দেখাবার সময়) তারা বাঘের শিকল খুলে দেয় এবং বাঘ মাটিতে শুয়ে পড়ে। তারপর একটি লোক খালি গায়েই বাঘটিকে খোঁচা মারে। বাঘ কেঁপে গিয়ে লাফিয়ে তার উপর পড়ে এবং সেও বাঘের সঙ্গে মাটিতে পড়ে যায়। কয়েকবার এইরকম চলে। তারপর লোকটি বাঘের গলায় একটি ঘুসি মারে, অবশ্য বাঘের তাতে কোন আঘাত লাগে না। খেলা

<sup>২</sup> বীম্‌সের মতে মূল শব্দটি ‘খজুরী-হুর্নাই’ (J. R. A. S., 1895, pp. 898-900 জঃ)। শব্দটি ‘কাসি-সানাই’ও হতে পারে।

দেখাবার পরে লোকটি বাঘকে আবার বেঁধে ফেলে। বাড়ীর লোকেরা তখন বাঘকে মাংস খাওয়াতে এবং লোকটিকে টাকা দিতে ভোলে না। বাঘের খেলা দেখানো এদেশে একটা লাভের ব্যবসা।

“এদেশের পঁাজীতে বারোটি মাংস আছে, বিস্তৃত তাতে মলমাংস গণনার কোন ব্যবস্থা নেই।”

“দেশের শস্যের মধ্যে প্রধান হচ্ছে বাজরা, তিল, বরবটি এবং ধান। ধান এখানে বছরে দু'বার পাঁকে।<sup>৪</sup> উদ্ভিজ্জ সব্দের মধ্যে প্রধান হচ্ছে আদা, সরষে, পেঁয়াজ, রসুন, শসা এবং বেগুন। এরা নারকেল, তাল এবং কাঁজাফ (খেজুর?) থেকে মদ তৈরী করে। চায়ের বদলে এরা পান খায়।

গৃহপালিত প্রাণীদের মধ্যে উল্লেখযোগ্য উট, ঘোড়া, খচ্চর, মহিষ, গরু, ছাগল, মুরগী, পাতিহাঁস, শুয়োর, রাজহাঁস, কুকুর এবং বিড়াল।

এদের ফলমূল হচ্ছে কলা, কাঁঠাল, ডালিম, আখ, চিনি এবং মধু।

এদেশে অনেক রকমের কাপড় পাওয়া যায়। তার মধ্যে কয়েকটির নাম উল্লেখযোগ্য। প্রথমটি হচ্ছে পি-পু<sup>৫</sup>—নানা রকম রঙের পাওয়া যায়। এগুলিকে পি-পোও বলা হয়, এগুলি তিন ফুটেরও বেশী চওড়া এবং সাত'র ফুট লম্বা। এগুলি ছবির মত চমৎকার। এছাড়া আদার মত হলদে রঙের এক রকম কাপড় পাওয়া যায়, তার নাম মান্-চে-তি।<sup>৬</sup> এগুলি চার ফুট চওড়া এবং পঞ্চাশ ফুটেরও বেশী লম্বা—অত্যন্ত মজবুত ও ঠান্ডানানি। শা-না-পা-ফু<sup>৭</sup> নামে আর এক ধরনের কাপড় আছে, সেগুলি পাঁচ ফুট চওড়া এবং ত্রিশ ফুট লম্বা। কি-পই-লেই-ত-লি নামের কাপড়গুলি তিন ফুট চওড়া এবং ষাট ফুট লম্বা। এই কাপড়গুলির বুনানি আলগা এবং এগুলি খুব মোটা।

“পাগড়ীর কাপড়ের নাম শা-ত-উল্ (চাদর)। এগুলি পাঁচ ইঞ্চি চওড়া এবং চল্লিশ ফুট লম্বা, আমাদের সন্-সোর মত। ম-হেই-ম লেই (মলমল)

৩ বলা বাহুল্য এখানে মুসলমানদের পঁাজীর কথা বলা হয়েছে।

৪ আমন ও বোরো ধান।

৫ যতদূর মনে হয়, ‘পি পু’ বিশগজী ধান। ওয়াংতা-ইউয়ানের বিবরণেও ‘পি-পু’র উল্লেখ আছে।

৬ বাসন্তী?

৭ সম্ভবত এই ‘শা-না-পা-ফু’কেই ভারতের ‘সিনাবাক’ নামে এবং বারবোসা ‘সানাবাকোজ’ ও ‘সিনাবাকো’ নামে উল্লেখ করেছেন তাঁদের ভ্রমণ-বিবরণে।

আর এক ধরনের কাপড়, চার ফুট চওড়া এবং কুড়ি ফুট লম্বা, আমাদের ডু-লো-কিন-এর মত। এরা রেশম বুনে রুমাল তৈরী করে।

“জরীর কাজ করা তফেতাও এখানে আছে। এদেশের কাগজের রং সাদা, এই কাগজ গাছের ছাল থেকে তৈরী এবং হরিণের চামড়ার মত মসৃণ ও মোলায়েম।

“এদের গৃহস্থালীর সরঞ্জামের মধ্যে গালাস পেয়লা, বাটি, ইম্পাতের বর্শা\* কাঁচি প্রভৃতির নাম করা যায়।”

মা-হোয়ানের গ্রন্থের দ্বিতীয় যে সংস্করণটি প্রচলিত আছে, তার বাংলা-সংক্রান্ত বিবরণের সঙ্গে উপরে উদ্ধৃত বিবরণের কিছু কিছু পার্থক্য দেখা যায়। এই সংস্করণের কোন কোন স্থানে এমন কিছু কিছু বিষয় উল্লিখিত হয়েছে, যা উপরে উদ্ধৃত বিবরণে পাওয়া যায় না। উভয় সংস্করণের এই পার্থক্যের জন্ম আমরা এই সংস্করণের বাংলা-সংক্রান্ত বিবরণেরও পূর্ণাঙ্গ অনুবাদ নীচে দিলাম (প্রথমোক্ত সংস্করণের বিবরণকে ‘ক-বিবরণ’ নামে উল্লেখ করে এই সংস্করণের বিবরণের সঙ্গে তার পার্থক্য পাদটীকায় দেখানো হল)।

“সু-য়েন্-তা-লা রাজ্য থেকে পাং-কো-লা ( বাংলা ) রাজ্য জাহাজে যাওয়া যায় এইভাবে—প্রথমে মাওশান<sup>১</sup> এবং ২সুই-লন দ্বীপপুঞ্জ অভিযুখে যাত্রা করতে হয় ; এ সব জায়গায় পৌঁছোবার পর জাহাজকে উত্তর-পশ্চিমে ঘোরাতে হয় এবং বাতাস অনুকূল থাকলে ২১ দিন<sup>২</sup> পরে চট্টগ্রামে পৌঁছে জাহাজ নোঙ্গর ফেলে। তারপর ছোট নৌকা ব্যবহার করে নদীপথে যেতে হয়। নদীর উজানে ৫০০ লি বা তার একটু বেশী গেলে সোনা-উরুহ্-কংয়ে পৌঁছোনো যায় ; এখানেই অবতরণ করতে হয়। এই জায়গা থেকে দক্ষিণ-পশ্চিম দিকে ৩ যাত্রা করে ৩৫টি পর্ব (stage) পার হলে বাংলা রাজ্যে পৌঁছোনো যায়। এই রাজ্যের শহরগুলি দেওয়াল দিয়ে ঘেরা এবং

\* রকহিলের ইংরেজী অনুবাদে এখানে রয়েছে steel gun, কিন্তু তা ভুল, কারণ বাংলা দেশে তখনও বন্দুক ব্যবহৃত হয়নি। মূল চীনা বিবরণে এখানে oh'iang ২ক রয়েছে, এর মানে ‘বর্শা’ও হয়, ‘বর্শা’ ধরাই এক্ষেত্রে সম্পূর্ণ বুদ্ধিযুক্ত।

১ ক-বিবরণে “মাওশান” নামটি পাওয়া যায় না। ২ ক-বিবরণের মতে ২০ দিন। ৩ পাণ্ডুরা সোনারগাঁওয়ের দক্ষিণ-পশ্চিমে নয়, উত্তর-পশ্চিমে অবস্থিত ; চীনা দূতেরা বাংলার রাজধানী পাণ্ডুরায় গিয়েছিলেন, হুতরাং এ বর্ণনায় ভুল আছে ; ক-বিবরণে দূরত্ব সবক্ষেত্র কিছু দেখা নেই।

(রাজধানীতে) রাজা এবং সমস্ত স্তরের রাজপুরুষরা বাস করেন।<sup>৪</sup> এটি (বাংলা) বিরাট দেশ। এর উৎপন্ন দ্রব্য যেমন প্রচুর, জনসংখ্যাও তেমনি বিপুল। এরা (বাংলার লোকেরা) মুসলমান<sup>৫</sup> এবং তাদের ব্যবহার সরল ও খোলাখুলি। (এদেশের) ধনীরা জাহাজ তৈরী করে, যা দিয়ে এরা বিদেশী জাতিগুলির সঙ্গে বাণিজ্য চালায়। (এদেশের লোকদের মধ্যে) অনেকে ব্যবসায় করে এবং বেশ কিছু লোক চাষবাস করে। অস্ত্রেরা মিস্ত্রী, তারা হাতের কাজ করে। এরা কৃষ্ণবর্ণ জাতি, যদিও প্রায়ই এদের মধ্যে ফরসা চেহারার লোক দেখা যায়। (এদের) পুরুষেরা মাথা কামায়; তারা এক রকম ঢিলা জামা পরে; তার কলার গোল; ঐ পোষাক তারা মাথা দিয়ে গলিয়ে পরে এবং চওড়া একটি রঙীন রুমাল দিয়ে তাকে কোমরের সঙ্গে বেঁধে রাখে।<sup>৬</sup> এরা ছু চলো প্রাক্ত-বিশিষ্ট চামড়ার জুতা পরে।

রাজা এবং রাজপুরুষেরা সবাই মুসলমানের মত পোষাক পরেন; তাঁদের টুপি ও জামা-কাপড় যথাযোগ্যভাবে সাজানো থাকে।<sup>৭</sup> (এদেশের) লোকদের ভাষা বাংলা; ফার্সী ভাষাও চলে।

“এ দেশের মুদ্রা হচ্ছে একটি রূপার মুদ্রা; তার নাম টং-কা; এর ওজন চীনদেশের দুই মেসের সমান; এর ব্যাস ১১ট ইঞ্চি এবং তার ছ'শিঠেই খোদাই করা থাকে; এই মুদ্রা দিয়েই সমস্ত বড় ব্যবসায়-বাণিজ্য নিষ্পন্ন হয়, কিন্তু ছোটখাট কেনাকাটার জন্য তারা একটি সামুদ্রিক পদার্থ (shell) ব্যবহার করে; বিদেশীরা (বাঙালীরা) একে বলে কঙ-লি (কোড়ি)।<sup>৮</sup>

“এদের বয়ঃপ্রাপ্তি, অস্ত্যুষ্টিক্রিয়া, দান-যজ্ঞ এবং বিবাহ উপলক্ষে এরা যে সমস্ত অঙ্কঠান করে, সেগুলি মুসলমানদের মত।

“(এ দেশের) সারা বছর আমাদের গ্রীষ্মকালের মত গরম। এখানে ছ'বার ধান পাকে। এখানে এক বিশেষ ধরনের ধান আছে, যার দানা খুব লম্বা, স্ততার মত (wiry) এবং লাল। এখানে প্রচুর পরিমাণে গম, তিল, সব রকমের ডাল, জুয়ার, আদা, সর্ষে, পেঁয়াজ, ডাঙ, কোয়াস, বেগুন এবং নানা ধরনের তরীতরকারী ফলে। এদের ফলও অনেক রকমের, তার মধ্যে সংখ্যায়

৪ ক-বিবরণে পরবর্তী পাঁচটি বাক্য নেই। ৫ ক-বিবরণে স্পষ্টভাবে বাংলার সব লোককে মুসলমান বলা হয় নি। মা-হোযান বাংলার হিন্দুদের সম্বন্ধে কিছু জানবার হযোগ পান নি বলে মনে হয়। ৬ এই বর্ণনা ক-বিবরণে একটু ভিন্নভাবে আছে। ৭ ঐ ৮ ক-বিবরণের সঙ্গে এর পার্থক্য লক্ষ্যীয়।

বেশী—কলা।<sup>৯</sup> এখানে তিন-চার রকমের মদ পাওয়া যায়—নারকেল, ধান, ভাড়ি এবং কাজাঙ্গ ( ? ) থেকে তৈরী। বাজারে উগ্র মদ বিক্রী হয়।<sup>১০</sup>

“চা (এদেশে) নেই বলে এরা অতিথিকে তার জায়গায় পান খেতে দেয়। (এদেশের) রাস্তাগুলিতে বেশ ভাল ভাল নানা ধরনের দোকান আছে; এ ছাড়া পানাগার, ভোজনাগার ও স্নানাগারও আছে।”<sup>১১</sup>

“(এদেশের) পশু-পাখী সংখ্যায় অগণিত। তাদের মধ্যে আছে উট, ঘোড়া, খচ্চর, গাধা, মহিষ, বলদ, ছাগল, ভেড়া, রাজহাঁস, পাতিহাঁস, মুরগী, শূকর, কুকুর এবং বিড়াল। কলা ছাড়া এদের আরও নানা রকমের ফল আছে—যেমন কাঁঠাল, আম, ডালিম; এছাড়া আখ, দানাদার চিনি, সাদা চিনি এবং—চিনির রস দিয়ে পাক করা নানা রকমের সংরক্ষিত ফল।”<sup>১২</sup>

“এদের উৎপন্ন হ্রবোর অন্ততম ছ’ রকমের সূক্ষ্ম তুলার কাপড়। (এদের মধ্যে) একটি আমাদের পি-পুর মত, এর বিদেশী (বাংলা) নাম পি-ছিহ্; এগুলির বুনানি খুব কোমল, (এগুলির) গ্রন্থ তিন ফুট এবং দৈর্ঘ্য ছাপ্পান-সাতান ফুট।<sup>১৩</sup> আর এক রকমের আদার রঙের কাপড় আছে, তার নাম মান্-চে-তি—চার ফুট বা তার কিছু বেশী চওড়া এবং পঞ্চাশ ফুট লম্বা; এগুলির বুনানি খুব ঘন; (এগুলি) খুব মজবুত। এক রকমের কাপড় আছে—পাঁচ ফুট চওড়া ও কুড়ি ফুট লম্বা, এর নাম শাহ-না-কিএহ্; এগুলি আমাদের লো-পুর মত।<sup>১৪</sup> আর (এক রকম কাপড়) আছে, তার বিদেশী নাম হিন্-পেই-তুং-তা-লি; এগুলি তিন ফুট চওড়া এবং আট ফুট লম্বা। এর বুনানির জালগুলি খোলা এবং সূক্ষ্ম; এগুলি কতকটা গ্যাজের (gauze) মত, পাগড়ীর জন্ত এগুলি খুব বেশি ব্যবহার হয়।<sup>১৫</sup> আর আছে শা-ত-উবুহ্ (চাদর); এর দৈর্ঘ্য ৪০ ফুট বা তার কিছু বেশী এবং গ্রন্থ ছ’ ফুট পাঁচ বা ছ’ ইঞ্চি; এর সঙ্গে চীন (কাপড়) সন্-সোর বেশ মিল আছে। আর আছে ম-হেই-ম-লেহ্, এর দৈর্ঘ্য ২০ ফুট বা তার কিছু বেশী, গ্রন্থ

৯ ক-বিবরণে এই বর্ণনা অনেক সংক্ষিপ্ত। জিনিসপত্রের নামও সেখানে অনেক কম।  
 ১০ ক-বিবরণে তিন রকম মদের নাম আছে এবং সর্বশেষ বাক্যটি নেই। ১১ এই অনুচ্ছেদটি ক-বিবরণে নেই। ১২ ক-বিবরণে এই বর্ণনা সংক্ষিপ্ত, পশুপাখী ও জিনিসপত্রের নামও কম।  
 ১৩ ক-বিবরণের সঙ্গে এর পার্থক্য লক্ষ্যীয়। এক্ষেত্রে ক-বিবরণের বর্ণনাই ঠিক বলে মনে হয়।  
 ১৪ ক-বিবরণের তুলনায় সম্পূর্ণ পৃথক। ১৫ এ



চার ফুট ; এর দু'দিকে দশভাগের চার বা পাঁচ ভাগ ঘন আবরণ (facing) আছে ; ( এগুলির ) সঙ্গে চীনা তৌ-লো-কিন-এর মিল আছে ।

“এখানে তুঁতগাছ ও গুটিপোকাও দেখতে পাওয়া যায় ।<sup>১৬</sup> সোনালী জরীতে খচিত চিত্রবিচিত্র কারুকার্য-করা রেশমী রুমাল ও টুপি, গামলা, পেয়ালা, ইম্পাতের জিনিসপত্র, বর্শা, ছুরি, কাঁচি—সমস্তই এখানে পাওয়া যায় ।<sup>১৭</sup> এরা এক রকম গাছের ছাল থেকে এক ধরনের কাগজ তৈরী করে—যা হরিণের চামড়ার মত মসৃণ ও মোলায়েম (glossy) ।

“এখানে আইন ভঙ্গ করার শাস্তি লাঠি দিয়ে গ্রহার এবং নিকট ও দূর দেশে নির্বাসন । আমাদের দেশে ঘেরকম, সেরকম এখানেও বিভিন্ন পদমর্যাদা অনুযায়ী রাজকর্মচারীদের দেখতে পাওয়া যায় ; তারা সরকারী বাসায় থাকে ।<sup>১৮</sup> তাদের দিলমোহর আছে এবং সরকারী চিঠি চলাচলের ব্যবস্থা আছে । এছাড়া আছে চিকিৎসক, জ্যোতিষী, ভূলিখনবিদ্যার (geomancy) অধ্যাপক, কারিগর এবং ছনরী । তাদের স্থায়ী সৈন্তবাহিনী আছে, সৈন্তদের বেতন জিনিসপত্র দিয়ে দেওয়া হয় ; সৈন্তবাহিনীর অধ্যক্ষকে বলা হয় পা-স্জু-লা-উবুহ্ ।

“এদের ভাঁড়েরা একরকম লম্বা সাদা তুলার পোষাক পরে, তাতে কালো সূতা নিয়ে কারুকার্য করা থাকে—তা' তাদের কোমরে একটি রঙীন রেশমী রুমাল দিয়ে বাঁধা থাকে, তাদের কাঁধের উপরে ( এই পোষাক ) ঝোলে ।<sup>১৯</sup> তাদের মধ্যে ( ঐ পোষাকে ) প্রবালের খণ্ড ও রঙীন পাথরে গাঁথা একটি সূতা ( লাগানো ) থাকে । তারা কজীতে পরে ঘোর লাল রঙের পাথরের বাল। । ভোজ-উৎসবের সময় এই লোকগুলি নিয়োজিত হয় কোন কোন স্বর বাজাবার, তাদের দেশের গান গাইবার এবং সমবেতভাবে নানা ধরনের নাচ নাচবার জন্য ।<sup>২০</sup>

“এখানে কেন্-সি-আও-সু-লু-নাই নামে আর এক শ্রেণীর লোক আছে । এরা সঙ্গীতজ্ঞ । এই লোকগুলি প্রত্যেক দিন সকালে—প্রায় চারটার সময় উচ্চপদস্থ রাজকর্মচারীদের ও ধনীদের বাড়ীতে যায় ; একজন লোক এক ধরনের

১৬ ক-বিবরণে এই বাক্যটি নেই । ১৭ ক-বিবরণে জিনিসপত্রের নাম অনেক কম এক আলোচ্য অংশটি সেখানে বিবরণের শেষে আছে । ১৮ ক-বিবরণে এই বাক্যটি নেই এবং এর পরবর্তী বাক্য দুটি ক-বিবরণের গোড়ার দিকে আছে । ১৯ ক-বিবরণে এই বর্ণনা একটু ভিন্নভাবে আছে । ২০ ক-বিবরণে এই বর্ণনা খানিকটা সংক্ষিপ্ত ।

তুর্ধ বাজায়, আর এক জন বাজায় ছোট ঢাক, তৃতীয় জন বাজায় বড় ঢাক। যখন তারা আরম্ভ করে, তাদের লয় থাকে বিলম্বিত; ক্রমশ তা' দ্রুত হতে থাকে, চরমে পৌছোবার পরে বাজনা হঠাৎ থেমে যায়। এই ভাবে এরা এক বাড়ী থেকে অগ্নি বাড়ীতে যেতে থাকে। খাবার সময়ে তারা আবার সমস্ত বাড়ীতে যায়। তখন তারা টাকা ও খাবার উপহার পায়।<sup>২১</sup>

“এখানে অনেক বাজীকর (conjurer) আছে, কিন্তু তাদের খেলাগুলি খুব অসাধারণ কিছু নয়। নিম্নবর্ণিত খেলাটি কিন্তু উল্লেখ করার মত। একজন লোক এবং তার স্ত্রী একটা লোহার শিকলে বাঁধা বাঘ নিয়ে রাস্তায় হেঁটে যায়। কোন একটি বাড়ির সামনে এসে তারা এই খেলা দেখায়—বাঘটির শিকল খুলে দেওয়া হয়, সে মাটিতে বসে; পুরুষটি সম্পূর্ণ খালি গায়ে<sup>২২</sup> হাতে একটা চাবুক নিয়ে বাঘের সামনে নাচে, তাকে নিয়ে টানাটানি করে, ঘুসি মেয়ে তাকে ফেলে দেয় এবং তাকে লাথি মারে, বাঘ ক্রুদ্ধ হয়ে গর্জন করতে থাকে এবং লোকটির উপর লাফিয়ে পড়ে। তারা হু'জনেই (লোকটি ও বাঘটি) এক সঙ্গে (মাটিতে পড়ে) গড়াতে থাকে। তারপর লোকটি বাঘের মুখ দিয়ে তার গলার ভিতরে নিজের হাত ঢুকিয়ে দেয়, বাঘ তাকে কামড়াতে সাহস করে না। খেলা শেষ হলে বাঘের গলায় আবার শিকল বাঁধা হয় এবং সে (বাঘ) শুয়ে পড়ে। তারপর খেলোয়াড়রা (খেলোয়াড় ও তার স্ত্রী) আশপাশের বাড়ী থেকে বাঘের জন্তু খাতু চায়; সাধারণত তারা পশুটির জন্তু অনেক টুকরো মাংস পায়, সেইসঙ্গে তারা নিজেরা টাকা উপহার পায়।<sup>২৩</sup>

“এদের নির্দিষ্ট পঞ্জিকা আছে—বছরে বারোটি মাস, কোন মলমাস নেই।<sup>২৪</sup> ঋতুগুলি সূর্য হবার কিছু আগেই এরা হিসাব করে যে, ঋতু তাড়াতাড়ি সূর্য হবে, না দেরীতে। (এ দেশের) রাজা জাহাজে করে তাঁর লোকদের বিদেশে পাঠান বাণিজ্যের জন্তু, (এদের মাধ্যমে তিনি অগ্নি

২১ ক-বিবরণে এই বর্ণনা সংক্ষিপ্ত। ২২ ইংরেজী অনুবাদে আছে “naked”, এখানে অভিপ্রেত অর্থ “খালি গায়ে” বলেই মনে হয়। ২৩ ক-বিবরণে এই বর্ণনা সংক্ষিপ্ত ও কিয়দংশ পৃথক; এখানকার বর্ণনা অপেক্ষাকৃত সূক্ষ্ম ও বাস্তব। ২৪ ক-বিবরণে এই বাক্যটি বর্ণনার মাঝের দিকে আছে। এর পরবর্তী বাক্যগুলি ক-বিবরণে আদৌ নেই এবং ফিলিপ্সের অনুবাদে সংক্ষিপ্তভাবে আছে; বন্ধুধর রান-য়ুন-হুয়া মূল চীনা গ্রন্থ (‘মিং-রা-শুং-লান’) থেকে এই বাক্যগুলি অনুবাদ করে দিয়েছেন।

দেশের) স্থানীয় উৎপন্ন দ্রব্য, মুক্তা ও হীরা সংগ্রহ করেন এবং চীনে এই সমস্ত জিনিষ ভেট হিসাবে পাঠান।”

### ফেই-শিনের বিবরণ

এর পরবর্তী বিবরণটিও আমরা একটি চীনা গ্রন্থে পাই। এই চীনা গ্রন্থটির নাম ‘শিং-ছা-শুং-লান’। এটি ১৪৩৬ খ্রীষ্টাব্দে রচিত হয়। এর লেখকের নাম ফেই-শিন। ১৪১৫ খ্রীষ্টাব্দে চীন-সম্রাটের কাছে থেকে যে দূতের দল বাংলার রাজা জলালুদ্দীন মুহম্মদ শাহের সভায় এসেছিল (বর্তমান গ্রন্থ, পৃ: ১২১-২২ দ্রষ্টব্য); এবং তাঁর কাছে বিপুল সংবর্ধনা লাভ করেছিল, ফেই-শিন ছিলেন সেই দলের সদস্য। ফেই-শিন ‘শিং-ছা-শুং-লান’-এ বাংলার রাজসভায় তাঁদের আগমন, বাংলার রাজার কাছে তাঁদের সংবর্ধনা এবং তাঁর দেখা বাংলা দেশের অত্যন্ত মনোরম বর্ণনা লিপিবদ্ধ করেছেন। এই বর্ণনা নীচে উদ্ধৃত হল।

“বাতাস অল্পকূল থাকলে সন্ধ্যাত্রা থেকে এই দেশে কুড়ি দিনে পৌঁছানো যায়। এ দেশ (চীনের) পশ্চিমে অবস্থিত ভারতবর্ষ নামে দেশটির অন্তর্গত। বাংলা দেশের পশ্চিম সীমায় বঙ্গাসনের দেশ, যার নাম চণ্ড-ন-ফু-উল্ (জোনপুর)—এই হচ্ছে সেই জায়গা, যেখান শাক্য বোধিলাভ করেছিলেন। সম্রাট য়ুং-লোর রাজত্বের ত্রয়োদশ বর্ষে (১৪১৫ খ্রি:) সম্রাট হু’বার আদেশ রাজী করার পরে রাজপ্রতিনিধি হৌ-শিয়েন এক বিরাট নৌবহর এবং এবং অনেক লোকজন নিয়ে (বাংলার) রাজা, রানী এবং অমাত্যদের কাছে তাঁর (চীনসম্রাটের) উপহার পৌঁছে দেবার জন্ত রওনা হলেন।

“এই দেশটিতে উপসাগরের কূলে একটি সামুদ্রিক বন্দর আছে, তার নাম চা-টি-কিআং (চাটগাঁও বা চাটিগ্রাম বা চট্টগ্রাম)। এখানে কোন কোন শুক আদায় করা হয়। রাজা যখন শুনলেন আমাদের জাহাজ সেখানে এসে পৌঁছেছে, তিনি পতাকা এবং অস্ত্রাস্ত্র উপহার সমেত উচ্চপদস্থ রাজকর্মচারীদের সেখানে পাঠালেন। হাজারেরও বেশী ঘোড়া ও মাহুঘ বন্দরে এসে হাজির হল। ষোলটি পর্ব (stage) অতিক্রম করে আমরা হুও-না-উল-কিআং (সোনার-গাঁও)-তে পৌঁছোলাম। এই জায়গাটি দেওয়াল দিয়ে ঘেরা; এখানে পুকুর, রাস্তাঘাট ও বাজার আছে, সেখানে সবরকম জিনিষের কেনাবেচা চলে।

এখানে রাজার লোকেরা হাতী, ঘোড়া প্রভৃতি নিয়ে আমাদের সঙ্গে দেখা করল। সেখান থেকে রওনা হয়ে কুড়িটি পর্ব (stage) পার হয়ে আমরা পান্-টু-য়া (পাণ্ডুয়া)-তে পৌঁছোলাম, যেখানে দেশের রাজা বাস করেন। এই শহরের দেওয়ালগুলি খুব চমৎকার, বাজারগুলির ব্যবস্থা খুব ভাল, দোকানগুলি পাশাপাশি অবস্থিত, খামগুলি স্ফুৰ্ণভাবে সারে সারে সাজানো। এখানে সব রকমের জিনিস পাওয়া যায়।

“রাজার প্রাসাদ ইট ও সুরকীর গাঁথুনীতে তৈরী। যে সিঁড়ি বেয়ে প্রাসাদে উঠতে হয় তা উঁচু আর চওড়া। হলঘরের ছাদগুলি চারকোণা, তাদের ভিতরের দিকটা চূণকাম করা। প্রাসাদটিতে ন'টি মহল এবং তিনটি দরজা আছে। খামগুলি পিতলের রঙের এবং পালিশ করা, তাদের গায়ে নানারকম ফুল এবং জীবজন্তুর ছবি খোদাই করা। ডাইনে এবং বাঁয়ে লম্বা লম্বা অনেকগুলি বারান্দা রয়েছে। সেখানে এক হাজারের বেশী লোক জড়ো হয়েছিল, তাদের পরিধানে উজ্জল বর্ম। বাইরের উঠানে সারি সারি সৈন্য দাঁড়িয়েছিল। তাদের মাথায় উজ্জল শিরস্রাণ এবং হাতে বর্শা, তরবারি, তীরধনুক প্রভৃতি শোভা পাচ্ছিল। তারা দৃষ্ট বীরত্বের প্রতিমূর্তি। রাজার ডাইনে এবং বাঁয়ে শত শত লোক, তাদের মাথায় ময়ূরের পালকে তৈরী ছাতা।<sup>১</sup> হল ঘরের সামনে কয়েকশো হাতীসওয়ার সৈন্য ছিল। প্রধান দরবার-ঘরে দামী পাথরে খচিত উঁচু এক সিংহাসনে পায়ে উপর পা রেখে রাজা বসেছিলেন, তাঁর কোলের উপর ছিল একটি ছুঁমুণে তলোয়ার।

“আমাদের ভিতরে নিয়ে যাবার জন্য দুটি লোক এল, তাদের হাতে রূপার লাঠি, মাথায় পাগড়ী। আমরা পাঁচ পা এগোলে তারা সেলাম করল। হলের মাঝখানে পৌঁছে তারা খামল এবং আর দু'টি লোক এল — তাদের হাতে সোনার লাঠি; তারা আগেরই মত সেলাম করে আমাদের এগিয়ে নিয়ে গেল। রাজা আমাদের প্রত্যাভিবাদন করে (আমাদের) সম্রাটের ফরমানটি নিলেন এবং নিজের মাথায় সেটি ঠেকিয়ে খুলে পড়লেন। (আমাদের) সম্রাটের উপহারগুলি গালিচার উপর ছড়িয়ে রাখা হল।

১ চৈতন্যচরিতামৃতের মথালীলা ১৫শ পরিচ্ছেদে “শ্রেষ্ঠ রাজা”র মাথায় ‘ময়ূরপুচ্ছের আড়ানী (পাখা)’ ধরার উল্লেখ আছে। চীনা বিবরণে যাকে “ছাতা” বলা হয়েছে, তা সম্ভবত “আড়ানী”ই।

“রাজা (চীন) সম্রাটের প্রতিনিধিদের এক ভোজসভায় আশ্বাসিত করলেন এবং আমাদের সৈন্যদেব অনেক জিনিস উপহার দিলেন। ভোজে মেঘমাংস ও গোমাংসের কাবাব দেওয়া হয়; মত্তপান নিষিদ্ধ ছিল, কেন না এতে ইন্দ্রিয় উত্তেজিত হবার ও শিষ্টাচারের বিধি লঙ্ঘিত হবার আশঙ্কা; তার বদলে তারা (চীনসম্রাটের প্রতিনিধিরা) গোলাপজল-দেওয়া সরবৎ পান করেছিল।<sup>২</sup> ভোজসভা শেষ হলে রাজা (চীনা) রাজপ্রতিনিধিদের সোনার বাটী, সোনার কটিবন্ধ, সোনার কুঁজো আর সোনার পেয়ালা উপহার দিলেন। প্রতিনিধিদের যারা সহকারী, তাঁরা সবাই ঐ সমস্ত জিনিসই পেলেন, তবে সেগুলি রূপার তৈরী। নিম্নপদস্থ কর্মচারীরা প্রত্যেকে পেল একটি সোনার ঘটা এবং এক ধরনের লম্বা সাদা রেশমী পোষাক। সৈন্যেরা সবাই রূপার টাকা পেল। সত্যি কথা বলতে কি, এ দেশের লোকেরা যেমন ধনী তেমনি মোজস্তপরায়ণ। এর পর রাজা সোনায়ে তৈরী একটি আধারে রক্ষিত এক স্মারকলিপি (চীন) সম্রাটকে দেবার জন্ত সমর্পণ করলেন। স্মারকলিপিটি সোনার পাতের উপরে লেখা হয়েছিল। (চীনা) রাজপ্রতিনিধিরা যথোচিত সম্মানের সঙ্গে তাঁর কাছ থেকে (চীন) সম্রাটের উদ্দেশ্যে প্রেরিত আরো অনেক উপহার-সামগ্রী সমেত এই স্মারকলিপিটি গ্রহণ করলেন।

“এই দেশের লোকদের চরিত্র অত্যন্ত মহৎ। এদেশের পুরুষেরা সাদা সূতীর পাগড়ী মাথায় দেয় এবং সাদা রঙের লম্বা সূতীর জামা পরে। তারা পায়ে দেয় সোনালী জরীর কাজ করা ভেড়ার চামড়ায় তৈরী চটি জুতা। যারা একটু মৌখীন, তারা নানারকম নকশা আঁকা জুতা পরে। প্রত্যেকটি লোকেরই নিজের ব্যবসায় আছে, যাতে দশ হাজার স্বর্ণমুদ্রা অবধি থাকে। কিন্তু যখন লোকসান হয়, তারা কখনও দুঃখ করে না।

“মেয়েরা খাটো জামা পরে, তার চারদিকে সূতী, রেশম বা কিংখাবের ওড়না জড়ায়। তাদের রং সাধারণত ফরসা, এইজন্ত তারা অঙ্গরাগ ব্যবহার করে না। কানেতে তারা দামী পাথর বসানো সোনার তুল পরে। তাদের গলাতে দোলে হার। চুলগুলি তারা মাথার পেছনদিকে ঝোঁপা করে বেঁধে

২ এই বাক্যটি বন্ধুর শ্রীযুক্ত শারদাচন্দ্র সেন মূল চীনা গ্রন্থ থেকে অনুবাদ করে দিয়েছেন; রকছিল ‘শিং-ছা-তুং-লান’-এর যে অনুবাদ করেছিলেন (T'oung Pao, 1915, pp. 440-444 জট্টব্য), তাতে এই বাক্যটি ভুলভাবে অনূদিত হয়েছিল।

রাখে। হাতের কস্মী এবং পায়ের গোড়ালীতে তারা সোনার বালা ও মল পরে এবং হাত ও পায়ের আঙুলে আংটি পরে।

“এখানে এক সম্প্রদায়ের লোক আছে, যাদের নাম য়িন্-তু (হিন্দু)। তারা গরুর মাংস খায় না এবং তাদের পুরুষ এবং স্ত্রীলোকেরা এক জায়গায় বসে খাওয়াদাওয়া করে না। স্বামীর মৃত্যু হলে স্ত্রী আর দ্বিতীয়বার বিবাহ করে না, তেমনি স্ত্রীর মৃত্যু হলে স্বামীও আর দ্বিতীয়বার বিবাহ করে না। \* তাদের মধ্যে যদি কোন গরীব লোকের জীবিকানির্বাহের কোন উপায় না থাকে, তাহলে গ্রামের বিভিন্ন পরিবার পালা করে তাকে সাহায্য করবে, কিন্তু অল্প কোন গ্রামে গিয়ে ভিক্ষা করতে দেবে না। এই লোকগুলি তাদের উদার সমাজ-চেতনার জন্য সত্যিই প্রশংসা পাবার যোগ্য।

“এখানকার মাটি উর্বর এবং তাতে প্রচুর ফসল ফলে; বছরে দু'বার ধান পাকে। এরা নিড়ানি দিয়ে ক্ষেতের আগাছা পরিষ্কার করে না। পুরুষেরা এবং মেয়েরা মরহুম বুকে কখনও ক্ষেতে কাজ করে, কখনও কাপড় বোনে।

“এদেশের ফলমূলের মধ্যে একটি হচ্ছে পো-লো-মি (কাঁঠাল), এক একটির আয়তন বৃশেলের মত বিরাট আর স্বাদ অদ্ভুত রকম মিষ্টি। আর একটি ফল হচ্ছে আম, যদিও তার স্বাদ একটু টক, তবু খুব চমৎকার। এছাড়া এদেশে আরও নানারকমের ফল, তরীভরকারী, গরু, মহিষ, ঘোড়া, মুরগী, ভেড়া, হাঁস এবং সামুদ্রিক মাছ পাওয়া যায়। ব্যাপক ব্যবসায়ের জন্য এরা টাকার বদলে কড়ি ব্যবহার করে।

“এদেশের স্বাভাবিক উৎপন্ন দ্রব্যের মধ্যে সূক্ষ্ম বস্ত্র (মসলিন), সা-হ-ল্ (শাল), কস্মল, তু-লো-কিন, নানারকম কাপড়, ফটিক, গোমেদ, প্রবাল, মুক্তা, দামী পাথর, চিনি, বি, ময়ূরের পালক প্রভৃতির নাম করা যায়।

“এদেশ থেকে সোনা, রূপা, স্যাটিন, রেশম, নীল ও সাদা রঙের চীনা মাটি, পিতল, লোহা, চন্দন, সিঁদুর, পারদ এবং মাছের রপ্তানী হয়।”

মা-হোয়ানের বিবরণে বাংলার মুসলমানদের কথাই কেবল লেখা হয়েছে, হিন্দুদের সম্বন্ধে মা-হোয়ান কিছু জানবার সুযোগ পাননি। ফেই-শিন কিন্তু

---

\* ফেই-শিন একেজেরে যে ভুল খবর পেয়েছিলেন, তাতে কোন সন্দেহ নেই। স্বামীর মৃত্যু হলে হিন্দু স্ত্রী তখন দ্বিতীয়বার বিবাহ করত না এই কথা সত্য, কিন্তু স্ত্রীর মৃত্যু হলে স্বামী বিবাহ করত; এমন কি হিন্দু পুরুষদের মধ্যে বহুবিবাহও প্রচলিত ছিল; সমসাময়িক সাহিত্য ও স্মৃতিশাস্ত্র থেকে তা জানা যায়।

হিন্দুদের সম্বন্ধে কিছু খবর পেয়েছিলেন এবং তাঁর বিবরণে তাদের সম্বন্ধে কয়েকটি কথা লিপিবদ্ধ করেছেন।

অন্য কয়েকটি চীনা গ্রন্থেও ('শি-য়াং-ছাও-কুং-তিয়েন-লু', 'ও-মু-চৌংজ-লু', 'মিং-শু' প্রভৃতি) পঞ্চদশ শতাব্দীর বাংলাদেশের বিবরণ পাওয়া যায়, কিন্তু এই বিবরণগুলি আমরা উদ্ধৃত করব না। কারণ—প্রথমত, এইসব চীনা গ্রন্থগুলি আলোচ্য সময়ের পরে লেখা; দ্বিতীয়ত, এগুলির বিবরণ প্রায় সম্পূর্ণভাবেই 'তাও-য়ি-চি-লিয়েহ্', 'য়িং-য়া-শুং-লান' ও 'শিং-ছা-শুং-লান' থেকে নেওয়া।

### নিকলো কস্তির বিবরণ

নিকলো কস্তি (বা নিকলো দি কস্তি) নামে একজন ভেনিসীয় বণিক পঞ্চদশ শতাব্দীর প্রথম পাদে মধ্য ও পূর্ব এশিয়ায় ভ্রমণ করেছিলেন। তিনি পারস্যদেশ অতিক্রম করে মালাবার উপকূল ধরে সমুদ্রপথে অগ্রসর হয়েছিলেন, সেখান থেকে তিনি দেশের ভিতরে প্রবেশ করে বাংলা সমেত ভারতের কতকগুলি অঞ্চল দর্শন করেন। অতঃপর সিংহল, সুমাত্রা, যবদ্বীপ, দক্ষিণ চীন, ইথিওপিয়া প্রভৃতি দেশে ভ্রমণ করে, জলপথে লোহিত সাগর অতিক্রম করে, মক্কাভূমি পার হয়ে তিনি কায়রোয় পৌঁছোন; এখানে তাঁর জ্বর ও দু'টি পুত্রে মৃত্যু হয়। এর পচিশ বছর পরে—১৪৪৪ খ্রীষ্টাব্দে তিনি ভেনিসে ফিরে আসেন। স্মরণ্য ১৪১০ থেকে ১৪১২ খ্রীষ্টাব্দের মধ্যে তিনি বাংলাদেশে ভ্রমণ করেছিলেন বলে সিদ্ধান্ত করা যেতে পারে।

নিকলো কস্তি তাঁর ভ্রমণের অভিজ্ঞতা নিজে লিপিবদ্ধ করে যান নি। নিকলো একবার তাঁর সহযাত্রী ও জ্ঞাপুত্রদের বাঁচাবার জন্য খ্রীষ্টধর্ম ত্যাগ করে অন্তর্ধর্ম বরণ করতে বাধ্য হয়েছিলেন। দেশে ফেরার পর তিনি পোপ চতুর্থ ইউজেনের শরণ নেন এই পাপের প্রায়শ্চিত্তের জন্য। পোপ বলেন নিকলো তাঁর ভ্রমণের অভিজ্ঞতা বর্ণনা করলেই তাঁর পাপের প্রায়শ্চিত্ত হবে। পোপের নির্দেশ অনুসারে নিকলো পোপের একান্ত সচিব পোজ্জিও ত্রাচ্চিওলিনির কাছে তাঁর ভ্রমণের অভিজ্ঞতা বর্ণনা করেন। ত্রাচ্চিওলিনি নিকলোর অভিজ্ঞতাগুলি নিজের ভাষায় লিপিবদ্ধ করে একটি বই লেখেন। এই বই ল্যাটিন ভাষায় লেখা। এই বই থেকে নিকলো কস্তির বাংলাদেশ-ভ্রমণের অভিজ্ঞতা নীচে উদ্ধৃত হল।

“হল ও জলপথে বহু ভ্রমণ করে তিনি ( নিকলো ) গঙ্গা নদীর মোহানায় এসে পৌঁছালেন। এই নদী ধরে পনেরো দিন যাবার পর তিনি শেরনোভ ( শহব-ই-নো ? ) নামে এক বিরাট ও বদ্বীপ নগরে এসে উপনীত হলেন। এই নদীটি ( গঙ্গা ) এত বড় যে এর মাঝখানে এলে দুই তীর আর দেখা যায় না। তাঁর দৃঢ় বিশ্বাস নদীটি কোথাও কোথাও পনেরো মাইল চওড়া। এই নদীর তীরে খুব লম্বা লম্বা নলখাগড়া ( বাঁশ ) জন্মায়। সেগুলো এত আশ্চর্য রকম মোটা যে একজন লোক হাত দিয়ে তা জড়িয়ে ধরতে পারে না। এগুলো দিয়ে তাবা (বাঙালীরা) জেলে-নৌকা তৈরী করে; তার জন্তে একটা (বাঁশ)ই যথেষ্ট। হাতের চেটোর চেয়ে একটু চওড়া কাঠ বা বকল দিয়ে তারা নদীর বুকে চলাফেরার জন্ত ডিজি বানায়। (ডিজির) গাঁটগুলোর ব্যবধান হবে এক মাস্তব সমান। কুমীর এবং আমাদের অজানা বহু মাছ নদীটিতে দেখা যায়। নদীর উভয় তীরেই চমৎকার অটালিকা, ফুলের বাগিচা ও ফলের বাগান নজরে পড়ে, তাতে ( ফলের বাগানে ) বহু বিচিত্র ফল ধরে আছে। এর মধ্যে আবার সেরা ফল হল মুসা ( ? )। সেগুলো মধুর চেয়েও মিষ্টি, দেখতে ডুমুরের মত। এ ছাড়া বাদামও আছে—যাকে আমরা বলি ভারতীয় বাদাম।

“নগরটি পরিত্যাগ করে তিনি ( নিকলো কস্তি ) তিন মাস ধরে গঙ্গা বেয়ে উপরের দিকে উঠতে লাগলেন। চারটি খুব বিখ্যাত শহর পিছনে রেখে তিনি এসে পৌঁছলেন মারাজিয়া (?) নামে এক বড় নগরে। এখানে প্রচুর পরিমাণে স্মৃতকুমারী লতা, কাঠ, মোনা, রূপা, মূল্যবান পাথর এবং মুক্তা পাওয়া যায়। এখান থেকে তিনি পূর্ব দিকের পাহাড়ের পথ ধরলেন,— সেখান থেকে পদ্মরাগ নামে মূল্যবান পাথর সংগ্রহ করার অভিপ্রায়ে। এই অভিযানে তেরো দিন কাটিয়ে তিনি শেরনোভ নগরীতে ফিরে এলেন। তারপর সেখান থেকে রওনা হলেন বুফতানিয়া ( বর্ধমান )-র দিকে। সেখান থেকে রওনা হয়ে একমাস চলার পর তিনি রাকা ( আরাকান ) নদীর মোহানায় উপনীত হলেন।”

নিকলো কস্তির ভ্রমণ-কাহিনীর মধ্যে সাধারণভাবে তৎকালীন ভারতীয়দের জীবনযাত্রা সংক্ষেপে অনেক তথ্য পাওয়া যায়। ঐতিহাসিকদের কাছে এই তথ্যগুলি খুবই মূল্যবান, তবে এদের কতখানি তৎকালীন বাঙালীদের জীবন-যাত্রা সংক্ষেপে প্রযোজ্য, তা বলা মুশ্কিল। নিকলো কস্তির ভ্রমণ-বিবরণের



একটা বড় ক্রটি হ'ল এই যে—তিনি পারশ্ব থেকে সুমাত্রা পর্যন্ত সমগ্র অঞ্চলটাকেই ভারতবর্ষ বলে গণ্য করেছেন। আসল ভারতবর্ষকে (বাংলা সমেত) তিনি “মধ্যভারত” বলেছেন। উপরে যে অংশটুকু উদ্ধৃত হল, তা নিঃসন্দেহে বাংলাদেশেরই বর্ণনা। নিকলো কস্তির ভ্রমণ-কাহিনী থেকে আরও দু'টি অংশ আমরা নীচে উদ্ধৃত করছি, এদের মধ্যে প্রথমটি সতীদাহের বর্ণনা, দ্বিতীয়টি দেব-পূজার বর্ণনা। এই বর্ণনা দু'টি যে তৎকালীন বাংলাদেশ সম্বন্ধেও প্রযোজ্য, তাতে কোন সন্দেহ নেই।

“জীবিত স্ত্রীরা অধিকাংশ ক্ষেত্রেই স্বামীর চিতায় সহমরণে যান। বিবাহের সময়ের চুক্তিমত একজন বা তার বেশী স্ত্রী যান সহমরণে। একমাত্র স্ত্রী হলেও প্রথম স্ত্রী আইনত সহমরণে যেতে বাধ্য। কিন্তু অন্ত স্ত্রীদের সঙ্গে প্রকাশ্য চুক্তি থাকে যে চিতার মহিমা বৃদ্ধির জন্য তাদেরও সহমরণে যেতে হবে। এটা মহা গৌরবের কাজ বলে মনে করা হয়। সবচেয়ে ভাল পোষাক পরিয়ে খাটিয়ার উপরে মৃত স্বামীকে শুইয়ে দেওয়া হয়। তাঁর উপরে বিরাট এক পিরামিডের আকারে নানা সুগন্ধি কাঠের চিতা সাজানো হয়। চিতায় আগুন দেওয়া হলে শ্রেষ্ঠ পোষাকে সজ্জিত হয়ে স্ত্রী হাসিমুখে গান গাইতে গাইতে চিতা প্রদক্ষিণ করেন। তাঁর সঙ্গে এক বিরাট জনতা ঢাকটোল ও বাঁশী বাজিয়ে গান করতে থাকে। ইতিমধ্যে বাচালি(?) নামে একজন পুরোহিত উঁচু মঞ্চের উপর দাঁড়িয়ে জীবন ও মৃত্যুকে তুচ্ছ করবার প্ররোচনা দিয়ে স্বামীর সঙ্গে পরলোকে প্রচুর আমোদ-আহ্লাদ-ধনৈশ্বৰ্য-অলঙ্কার পাওয়ার আশা দেখান। কয়েকবার অগ্নি প্রদক্ষিণ করা হলে যে মঞ্চে পুরোহিত থাকেন, তার নীচে এসে সাজসজ্জা খুলে ফেলে বিধবা স্ত্রীর সাদা কাপড় পরেন। তার আগেই প্রথাহুযায়ী তাঁকে স্নান করিয়ে নেওয়া হয়। পুরোহিতের নির্বন্ধ অহুরোধে তিনি তখন আগুনে ঝাপিয়ে পড়েন। যদি কেউ ভয় পান (কারণ প্রায়ই দেখা যায় যে তাঁরা অন্তর আগুনে পোড়ার কষ্ট দেখে কিংবা নিজেদের কষ্টের কথা ভেবে বিহ্বল হয়ে পড়েন), দর্শকরা তাঁদের ধরে আগুনে ছুঁড়ে দেয়, তাঁদের মতামতের অপেক্ষা না রেখেই। তাঁদের ভয় কুড়িয়ে এনে হাঁড়িতে তুলে রেখে দেওয়া হয়—সেটা সমাধিস্থানের অলংকরণে নিয়োজিত হয়।”

...

...

...

...

“ভারতের সর্বত্র দেবতার পূজা হয়। সে জন্য তারা আমাদেরই মতন

মন্দির তৈরী করে তার ভিতরে বিভিন্ন মূর্তি এঁকে রাখে। পালশার্বে মন্দিরগুলি ফুল দিয়ে সাজানো হয়।\* ভিতরে প্রতিমা রেখে দেয়, কোনটা পাথরের, কোনটা সোনার, কতকগুলো রুপার, বাকীগুলো হাতীর দাঁতের প্রতিমা। প্রতিমাগুলি কখনও কখনও ষাট ফুট উঁচু হয়। উপাসনা ও বলি দেবার পদ্ধতি আছে নানা ধরনের। পবিত্র জলে স্নান করে সকালে কি সন্ধ্যায় তারা মন্দিরে প্রবেশ করে। তারপর কখনো কখনো সাষ্টাঙ্গে স্তব্ধ হাত আর পা উঁচু করে স্তব পড়ে ও মাটি চুষন করে, কোথাও কোথাও হৃদয় আরতি করা হয় দেবতাকে নানা রকম ধূপ-ধূনা দিয়ে। গঙ্গার এপারের ভারতীয়েরা ঘণ্টা ব্যবহার করে না—তারা ছোট ছোট করতাল বাজায়। পূণাকালের মূর্তি-উপাসকদের মত দেবতাদের উদ্দেশ্যে তারা ভোগ দেয়—পরে দ্রব্রজদের সেই ভোগ বিলিয়ে দেওয়া হয়।”

### রায়মুকুট বৃহস্পতি মিশ্রের বিবরণ

১৪২০ খ্রীঃ থেকে ১৫০০ খ্রীঃ—এই ৮০ বছরের মধ্যে বাংলাদেশে কোন বিদেশী ভ্রমণকারী এসেছিলেন বলে জানা যায় না। যদি কেউ এসে থাকেন, তিনি বাংলাদেশ সম্বন্ধে কোন বিবরণ রেখে যান নি।

এই সময়কার বাংলাদেশের কোন বিশদ বৃত্তান্ত কোথাওই পাওয়া যায় না। কেবলমাত্র রায়মুকুট বৃহস্পতি মিশ্রের বিভিন্ন গ্রন্থ ও কৃতিবাসের আত্মকাহিনী থেকে এই যুগের বাংলা সম্বন্ধে ছ'একটা বিচ্ছিন্ন তথ্য সংগ্রহ করা যায়।

বৃহস্পতি মিশ্রের কিছু পরিচয় আগেই দেওয়া হয়েছে (পৃঃ ১৬৩, ১৯২-১৯৪ প্রঃ)। তিনি ‘গীতগোবিন্দ’, ‘কুমারসম্ভব’, ‘রঘুবংশ’, ‘মেঘদূত’ এবং ‘শিশুশালবধ’ প্রভৃতি কাব্যের টীকা রচনা করেছিলেন। এ ছাড়া ‘স্মৃতিরত্নহার’ নামে একটি স্মৃতিগ্রন্থ এবং ‘পদচন্দ্রিকা’ নামে জমরকোষের একটি টীকাও তিনি রচনা করেছিলেন। বৃহস্পতির বিভিন্ন গ্রন্থের ভূমিকা ও পুঙ্খিকা থেকে জানা যায় যে, বৃহস্পতির পিতার নাম গোবিন্দ, মাতার নাম নীলমুখারী, গুরুর নাম শ্রীধর, স্ত্রীর নাম নিবৃত্তা এবং অন্ত্যন্তম পুত্রের নাম বিশ্বাস রায়। বৃহস্পতি গুরু, পৃষ্ঠপোষক ও রাজাদের কাছ থেকে অনেক উপাধি পেয়েছিলেন—যেমন মিশ্র, আচার্য, রাজ্যধরাচার্য, রাজপণ্ডিত, পণ্ডিতসার্বভৌম, কবিশণ্ডিহুড়ামণি, মহাচার্য এবং রায়মুকুট। বৃহস্পতির নিবাস ছিল রাঢ়।

বৃহস্পতির কর্মজীবন জলালুদ্দীন মুহম্মদ শাহের রাজত্বকাল ( ১৪১৫-১৬, ১৪১৮-৩৩ খ্রীঃ ) থেকে শুরু করে রুকনুদ্দীন বারবক শাহের রাজত্বকাল ( ১৫৫৫-৭৬ খ্রীঃ ) পর্যন্ত প্রসারিত। বৃহস্পতি জলালুদ্দীনের কাছে কিছু পৃষ্ঠপোষক পেয়েছিলেন এবং বারবক শাহের কাছ থেকে 'পণ্ডিতসার্বভৌম' ও 'রায়মুকুট' উপাধি পেয়েছিলেন। জলালুদ্দীনের সেনাপতি রায় রাজ্যধরও বৃহস্পতির পৃষ্ঠপোষক ছিলেন।

বৃহস্পতি তাঁর বিভিন্ন গ্রন্থে নিজের সম্বন্ধে যে সমস্ত কথা লিখে গিয়েছেন, তার সারমর্ম আমরা উপরে দিলাম। বৃহস্পতির গ্রন্থগুলি থেকে সেযুগের বাংলা দেশ ও বাঙালী সমাজ সম্বন্ধে নিম্নোক্ত তথ্যগুলি জানা যায়।

(১) সে যুগে মুসলমান গোঁড়েশ্বররা হিন্দুদের উচ্চ রাজপদে নিয়োগ করতেন। হিন্দু রায় রাজ্যধর ছিলেন জলালুদ্দীন মুহম্মদ শাহের সেনাপতি, বৃহস্পতি মিশ্রের বিশ্বাস রায় প্রভৃতি পুত্রেরা ছিলেন বারবক শাহের মন্ত্রীদের মধ্যে মুখ্য। বৃহস্পতির 'রায়মুকুট' উপাধি থেকে মনে হয়, তিনি নিজেও কোন উচ্চ রাজপদে অধিষ্ঠিত ছিলেন।

(২) সে যুগে গোঁড়েশ্বররা কাউকে উচ্চ রাজপদে নিয়োগ করার সময় খুব আড়ম্বরপূর্ণ অহুষ্ঠান করতেন। রায় রাজ্যধরকে সেনাপতিপদে নিয়োগ করার সময়ে জলালুদ্দীন মুহম্মদ শাহ তাঁকে হাতী, ঘোড়া, মৌনা, রূপা, ছাতার সারি প্রভৃতি দান করে তুর্ক ও শম্বের ধনিতে সংবর্ধনা জানিয়েছিলেন (বর্তমান গ্রন্থ, পৃঃ ১৬০ খ্রঃ)। বৃহস্পতি মিশ্রকে 'রায়মুকুট' উপাধি (যা কোন উচ্চ রাজপদের স্নাতক বলে আমরা মনে করি) দেবার সময় রাজা (বারবক শাহ) তাঁকে উজ্জল মণিময় হৃন্দর হার, দ্যুতিমান দু'টি কুণ্ডল, রত্নখচিত দশ আঙুলের রতনচূড় দিয়েছিলেন এবং তাঁকে হাতীর পিঠে চড়িয়ে স্বর্ণ-কলসের অভিষেক করিয়ে ছাতা ও ঘোড়া দান করেছিলেন (বর্তমান গ্রন্থ, পৃঃ ১২৩, পাদটীকা খ্রঃ)।

(৩) সে যুগের ধনী হিন্দুরা নানা রকম দান ও ষাগবজ্ঞের অহুষ্ঠান করতেন। রায় রাজ্যধর ব্রহ্মাণ্ড, স্বর্ণাশ্বস্কর রথ, বিশ্বচক্র, পৃথ্বী, কৃষ্ণাজিন ও কল্লতরু প্রভৃতি দান অহুষ্ঠান করে ব্রাহ্মণদের দৈন্ত দূর করে দিয়েছিলেন। বৃহস্পতি মিশ্রের পুত্রেরা ব্রহ্মাণ্ড, কল্লতরু ও তুলাপুরুষ প্রভৃতি দান অহুষ্ঠান করেছিলেন। এ ছাড়া এই সব ধনী হিন্দুরা কবি-পণ্ডিতদের পৃষ্ঠপোষকও করতেন।

(৪) সে যুগের হিন্দুদের বিশিষ্ট পার্বণ ছিল বৈশাখী পৌর্ণমাসী, আরণ্য ষষ্ঠী, শক্ৰোথান বা ইজ্রোৎসব, দুর্গোৎসব, কোজাগর, প্রেতচতুর্দশী, স্বন্দপূজা, ত্রীপঞ্চমী প্রভৃতি। শক্ৰোথান বা ইজ্রোৎসব বর্তমানে অপ্রচলিত। সেযুগে বর্ষার শেষের দিকে গুরুপক্ষে ইজ্রের হাতে অসুরদের পরাজয়-স্মরণ উপলক্ষে এই উৎসব অনুষ্ঠিত হত; উৎসব-প্রাক্ষণে ইজ্রের একটি ধ্বজা তুলে তার চারদিকে লোকেরা সমবেত হয়ে নাচগান, আয়োদ্যপ্রমোদ বরত। তখনকার দিনে বড় ও ছোট—দু'ধরণের দুর্গোৎসব ছিল। বড় দুর্গোৎসবে কক্ষপক্ষের নবমীতে কল্লারস্ত হত, নবপত্রিকা (কলা বোঁ) স্নান করানো হত এবং অষ্টমী পূজার দিন মধ্যরাত্রে ভদ্রকালী পূজা হত। ছোট দুর্গোৎসবে কল্লারস্ত হত দেবীপক্ষের ষষ্ঠীতে, তাতে নবপত্রিকা-স্নান এবং ভদ্রকালী পূজার রীতি ছিল না। বিজয়া দশমীর দিন লোকে ক্রীড়াকৌতুক-মঙ্গল বা শবরোৎসব (চণ্ডালদের উৎসব) নামে একটি উৎসব করত এবং এই উপলক্ষে অত্যন্ত কুৎসিত আচরণ ও অশ্লীল নৃত্যগীত করত। ব্রাহ্মণেরা তখনও প্রাচীন-যুগের মত মুখস্ত বেদ আবৃত্তি করতেন, তবে আগেকার মত শ্রাবণ মাসে উৎসর্গ (বেদ আবৃত্তির আরম্ভ) এবং পৌষ মাসে উপাকর্ম (বেদ আবৃত্তির সমাপ্তি) অনুষ্ঠান না করে শ্রাবণ মাসেই উৎসর্গ ও উপাকর্ম অনুষ্ঠান করতেন; সম্ভবত তাঁরা খুব অল্প পরিমাণে বেদ পড়তেন। তখনও বোধ হয় ব্রাহ্মণেরা চার বর্ষে বিবাহ করতেন, কারণ কোন ব্রাহ্মণের মৃত্যুতে তাঁর ভিন্ন ভিন্ন বর্ষের স্ত্রীদের গর্তজাত সন্তানরা কীভাবে অশোচ পালন করবে, বৃহস্পতি তার বিধান দিয়েছেন। (বৃহস্পতি মিশ্রের 'স্মৃতিরত্নহার' গ্রন্থ থেকে এই সমস্ত তথ্য জানা যায়—সাহিত্য পরিষৎ পত্রিকা, ১৩৩৮ বঙ্গাব্দ, পৃ: ৬১-৬৩ দ্রষ্টব্য)।

### কুন্তিবাসের বিবরণ

কুন্তিবাসের আবির্ভাবকাল সম্বন্ধে আমরা ইতিপূর্বেই (বর্তমান গ্রন্থ, পৃ: ১২৫-১২৮) আলোচনা করেছি এবং দেখাবার চেষ্টা করেছি যে, কুন্তিবাস কক্কুদীন বারবক শাহের কাছে সংবর্ধনা লাভ করেছিলেন। কুন্তিবাসের আত্মকাহিনী ('কুন্তিবাস পরিচয়', পৃ: ৫-১১ দ্র:) থেকে পঞ্চদশ শতাব্দীর শেষার্ধের বাংলাদেশ সম্বন্ধে কিছু তথ্য পাওয়া যায়, যেমন

(১) সেযুগে গোড়েশ্বর অর্থাৎ বাংলার রাজা নয়-মহলা প্রাসাদে বাস

করতেন। প্রাসাদের ঘরগুলি ছিল সোনালী ও রূপালী রঙের কাজ করা (‘‘সোনাকুপার ঘর দেখি মনে চমৎকার’’ )। শীতকালে রাজপ্রাসাদের আঙিনায় উন্মুক্ত স্থানলোকে রাজার সভা বসত। এই সভা সকালে বসত এবং ‘‘দপ্ত ঘটি বেলা’’ অর্থাৎ বেলা প্রায় সাড়ে ন’টার সময়ে ভঙ্গ হত। আঙিনার ওপর রাঙা ‘‘মাজুর’’ বিছিয়ে, তার ওপর ‘‘পাট নেত তুলি’’ পেতে সেখানে সভা বসানো হত। সভাতে পাটের চ’দোয়ার নীচে উপবিষ্ট রাজার পিছনে ও হুঁপাশে বিশিষ্ট সভাসদেরা বসে থাকতেন, অগ্র সভাসদেরা দাঁড়িয়ে থাকতেন। সভা ভাঙবার পূর্বাঙ্কে রাজসভায় নৃত্যগীত ও বিভিন্ন প্রমোদাহুষ্ঠান হত; রাজা এ সময়ে কাব্যচর্চাও করতেন, কবি কুন্তিবাস এই সময়েই রাজার দর্শন পেয়েছিলেন। রাজা কোন কবির কবিতা শুনে খুশি হলে তাঁকে ফুলের মালা ও পাটের পাছড়া দিয়ে সংবর্ধনা করতেন এবং রাজার আদেশে তাঁর কোন বিশিষ্ট সভাসদ কবির মাথায় চন্দনের ছড়া ঢেলে দিতেন। তারপর রাজা কবিকে (কবি চাইলে) অর্থ বা কোন মহার্ঘ উপহার দান করতেন। রাজা অনেক সময় অল্পগ্রহভাজন ব্যক্তিকে ঘোড়া উপহার দিতেন।

(২) সেযুগে বাঙালী ব্রাহ্মণদের মধ্যে ধারা কুলে-জীলে শ্রেষ্ঠ ছিলেন এবং শাস্ত্রমুগ্ধ আচরণ করতেন, তাঁরা শুধু বাংলা দেশে নয়, বাংলার বাইরেও খ্যাতি অর্জন করতেন। বেশি উপবাস করা সে যুগে খুব কৃতিত্বের বিষয় বলে গণ্য হত। কুন্তিবাসের দুই ভাই—যতুঞ্জয় এবং শ্রীধর—নিত্য-উপবাসী ছিলেন।

(৩) সেযুগে বাংলার শ্রেষ্ঠ বিজ্ঞানকেন্দ্র অবস্থিত ছিল উত্তর বঙ্গে। ফুলিয়া-নিবাসী কুন্তিবাস ‘‘বড় গঙ্গা’’ (পদ্মা) পার হয়ে উত্তর বঙ্গে গিয়ে নানা গুরুত্বপূর্ণ কাজে পড়ে সর্বশাস্ত্রে পাণ্ডিত্য অর্জন করেছিলেন।<sup>১</sup>

<sup>১</sup> এর থেকে বোঝা যায়, বাংলার শ্রেষ্ঠ বিজ্ঞানকেন্দ্র হিসাবে নবদ্বীপের উত্তর তখনও হয় নি; যদি হত, তা হলে কুন্তিবাস উত্তরবঙ্গে না গিয়ে নবদ্বীপেই পড়তে যেতেন, কারণ নবদ্বীপ ফুলিয়া থেকে মাত্র ১৫১৬ মাইল দূরে অবস্থিত। বৃন্দাবনদাসের ‘চৈতন্যভাগবত’ ও জয়ানন্দের ‘চৈতন্যমঙ্গল’ পড়লে মনে হয় চৈতন্যদেবের জন্মের সময়েই ( ১৪৮৬ খ্রীঃ ) নবদ্বীপ বিজ্ঞানকেন্দ্র হিসাবে পূর্ণতা লাভ করেছিল। কুন্তিবাসের ছাত্রজীবন নিঃসন্দেহে ১৪৬০ খ্রীষ্টাব্দের আগেই শেষ হয়েছিল। সুতরাং ১৪৬০ থেকে ১৪৮০ খ্রীষ্টাব্দের মধ্যে বিজ্ঞানকেন্দ্র হিসাবে নবদ্বীপের অভ্যুদয় ও পূর্ণবিকাশ হয়েছিল বলে সিদ্ধান্ত করা যায়।

### সনাতনের বিবরণ

হোসেন শাহের আমল থেকে আবার আমরা বিভিন্ন সমসাময়িক সূত্রে সে যুগের বাংলা দেশের বিশদ ও উজ্জ্বল চিত্র পাচ্ছি। এই সমস্ত সূত্রের মধ্যে সর্বপ্রথমে উল্লেখযোগ্য হোসেন শাহের মন্ত্রী ও চৈতন্যদেবের পার্শ্বদ সনাতন গোষ্ঠামীর 'বৃহত্তাগবতামৃত'। গোড়ীয় বৈষ্ণব ধর্মের প্রামাণিক গ্রন্থ হিসাবেই শুধু এই বইখানি মূল্যবান নয়, এর মধ্যে যে হোসেন শাহ ও তাঁর আমলের বাংলাদেশ সম্বন্ধে ঐতিহাসিক তথ্যও কিছু পাওয়া যায়, তা ভ: বিমানবিহারী মজুমদার দেখিয়েছেন; তিনি লিখেছেন, "সনাতন রাজমন্ত্রী ছিলেন। তাই রাজা, মহারাজা ও সার্বভৌম নৃপতির বৈশিষ্ট্য তিনি করেক স্থলে উল্লেখ করিয়াছেন ( ১১৪৫-৪৬; ২১১১ )। গ্রামের এক একজন অধিকারী থাকিতেন; কতকগুলি গ্রামের উপর এক একজন মণ্ডলেশ্বর থাকিতেন; তাঁহাদের উপর মহারাজা ও সর্বোপরি সার্বভৌম বা রাজচক্রবর্তী। মণ্ডলেশ্বরের উপাধি ছিল রাজা।...মণ্ডলেশ্বর ব্রিটিশ আমলের ভারতীয় রাজত্বদের মতন পররাষ্ট্রের আক্রমণ হইতে নিরুদ্বেগে বাস করিতে পারিতেন না।.....রাজচক্রবর্তী—সর্ব মণ্ডলের অধিপ সত্রাটের বিবিধ আদেশ, যথা 'ইহা কর', 'ইহা করিও না' ইত্যাদিরূপ আদেশ পরিপালন করিতে ঘাইয়া অনুভব হইত যে, তিনি অস্বতন্ত্র বা পরাধীন।" (যোড়শ শতাব্দীর পদাবলী-সাহিত্য, পৃ: ২৯২-৩০০ )

সনাতন বাংলাদেশের বিবরণ দিতে গিয়েই এই সমস্ত কথা বলেছেন। তাঁর উক্তি অনুসরণ করে আমরা এই সিদ্ধান্ত করতে পারি যে, হোসেন শাহের আমলে—স্বলতানের অধীনে বিভিন্ন আঞ্চলিক বিভাগের ( ইক্লীম্ ? ) শাসনকর্তারা, তাঁদের অধীনে উপবিভাগের ( অব্‌সহ্ ? ) শাসনকর্তারা, তাঁদের অধীনে উপবিভাগেরও উপবিভাগের ( মূলক বা মূলক্ ? ) শাসনকর্তারা এবং তাঁদের অধীনে গ্রামের শাসনকর্তারা ছিলেন।

সনাতন 'বৃহত্তাগবতামৃত'ে বৈকুণ্ঠেশ্বরের সভায় গোপকুমারের গমনের যে বর্ণনা দিচ্ছেন, তার মধ্যেও কিছু ঐতিহাসিক তথ্য প্রাঞ্জলভাবে নিহিত রয়েছে বলে মনে হয়। গোপকুমার বৈকুণ্ঠের প্রাসাদের গোপূরে বা প্রধান দ্বারে উপস্থিত হলে দ্বারপাল তাঁকে বহির্দ্বারে অপেক্ষা করতে বলে তাঁর "প্রভু"কে অর্থাৎ উর্ধ্বতন কর্মচারীকে সংবাদ দিতে গেলেন। "প্রভু" গোপকুমারের আগমনসংবাদ শুনে প্রাসাদে প্রবেশের অহুমতি দিলেন।

তারপর প্রতি দ্বারে দ্বারপালেরা নিজের নিজের অধ্যক্ষকে জানিয়ে গোপ-কুমারকে প্রবেশ করাতে লাগলেন। বৈকুণ্ঠেশ্বরের যত কাছে যে দ্বারপাল থাকেন, তিনি তাঁর চেয়ে দূরে অবস্থিত দ্বারপালের মাননীয়। দ্বারপালেরা এক দ্বার থেকে অন্য দ্বারে গমন বরে সেই দ্বারের অধিকারীদের প্রণাম করতে লাগলেন। গোপকুমার দেখলেন যে, যারা প্রাসাদে প্রবেশ কবছেন, তাঁরা শুধু-হাতে যাচ্ছেন না, নানারকম ভেট নিয়ে যাচ্ছেন। বৈকুণ্ঠেশ্বরের সভায় প্রবেশ কবে গোপকুমার দেখলেন যে রত্নখচিত হুন্দর সুবর্ণময় সিংহাসনে গদি পাতা রয়েছে এবং তার উপর হুন্দর হুন্দর সব তাকিয়া রয়েছে, বৈকুণ্ঠেশ্বরের তাকিয়ায় কতই রেখে বসে আছেন।

যতদূর মনে হয়, হোসেন শাহকে দর্শনের জ্ঞান যারা তাঁর সভায় যেতেন, তাঁদের এই গোপকুমারেরই অনুরূপ অভিজ্ঞতা লাভ হত এবং হোসেন শাহের প্রাসাদেও বৈকুণ্ঠেশ্বরের প্রাসাদেও অনুরূপ আদবকায়দা প্রচলিত ছিল। ডঃ বিমানবিহারী মজুমদার লিখেছেন, “সনাতন গোষ্ঠ্যমী বৈকুণ্ঠের ভগবানের খাস প্রাসাদ বুঝাইতে মুসলমানী মহাল শব্দ ও টিকায় ব্যবহার করিয়াছেন—শ্রীমতো মহল্ল প্রবরন্ত পরমোত্তমাত্তঃপুরবিশেষন্ত মধ্যে প্রাসাদমেবং (২।৪।৬৩ টীকা)।” (ষোড়শ শতাব্দীর পদাবলী-সাহিত্য, পৃ: ৩০২)

### ভারথেমার বিবরণ

ষোড়শ শতাব্দীর প্রথম দিকে—১৫০৩ থেকে ১৫০৮ খ্রীঃ মধ্যে ভারথেনা নামে একজন ইতালীয় পর্যটক ভারতবর্ষে আসেন। তিনি তখন সময়ের জ্ঞান বাংলাদেশেও এসেছিলেন এবং এখানকার একটি বন্দর-শহর দর্শন করে তার বিবরণ লিখে রেখে গিয়েছেন। ভারথেনা ঐ বন্দর-শহরের নাম বলেছেন “Banghella”। এই “Banghella”র অবস্থান সম্বন্ধে কিছু মতভেদ আছে। দুয়ার্তে বারবোঁসার বাংলাদেশ-সংক্রান্ত বিবরণে “Bengala” নামে বাংলার একটি বন্দর-শহরের উল্লেখ পাওয়া যায়। ভারথেমার “Banghella” ও বারবোঁসার “Bengala” অভিন্ন বলেই মনে হয় এবং খুব সম্ভবত এই বন্দর শহরটি চট্টগ্রামের খুব কাছে এবং তার ঠিক উত্তে দিকে অবস্থিত ছিল। ভারথেমার ভ্রমণ-বিবরণের (Itinerario de Ludovico de Varthema etc. নামে ১৫৭০ খ্রীঃাব্দে প্রথম প্রকাশিত) ইংরেজী অনুবাদের (J. W. Jones কৃত; Hakluyt Society, London থেকে প্রকাশিত) ভূমিকায় (p. lxxx)

সম্পাদক G. P. Badger লিখেছেন, "In an old Dutch Latin Geography book,...with wonderfully good maps, by J and C. Blaen, ( no title ; date about 1640, as Charles I is spoken of as reigning, ) I find *Bengala* put down as a town close and opposite to *Chatigam* (Chittagong.)"

ভারতের ভ্রমণ-বিবরণের প্রাসঙ্গিক অংশ নীচে উদ্ধৃত হল,

"আমরা বাংঘেলা শহরের দিকে রওনা হলাম। ঐ শহর টার্নাস্‌সারি (টেনাসেরিম) থেকে সাতশো মাইল দূর, সেখান থেকে এখানে আমরা সমুদ্রপথে এলাম এগারো দিনে। আমি এ পর্যন্ত যত শহর দেখেছি, তার মধ্যে এটি (বাংঘেলা) অন্যতম শ্রেষ্ঠ, এবং খুব বড় রাজার অধীন। এই স্থানের রাজা একজন মুব (মুসলমান); তিনি ছ'লক্ষ পদাতিক ও অশ্ব-রোহীকে যুদ্ধের জন্য নিয়োজিত রেখেছেন, তারা সবাই মুসলমান। তিনি সব সময়েই নরসিংঘের (উড়িষ্যার?) রাজার সঙ্গে যুদ্ধে লিপ্ত থাকেন। এই দেশে শস্ত, সব রকমের মাংস, চিনি, আদা এবং তুলা পৃথিবীর অন্যান্য দেশগুলির তুলনায় প্রচুর পরিমাণে পাওয়া যায়। এখানেই আমি সবচেয়ে ধনী বণিকদের দেখা পেয়েছি। এই স্থানে প্রতি বছর পঞ্চাশটি জাহাজ তুলা ও রেশমের দ্রব্য—অর্থাৎ বৈরাম, নামোন, লিজাতি, সিআনতাব, দোআজার ও সিনাফ প্রভৃতি বস্ত্রে—(রপ্তানীর জন্য) বোঝাই হয়। এই সব জিনিস গোটা ভারত, গোটা তুরস্ক, সিরিয়া, পারস্য, আরব উপদ্বীপ ও ইথিওপিয়ায় চালান যায়। এখানে জহরতের খুব বড় ব্যবসায়ী অনেক আছে, এই সব জহরৎ অন্যান্য দেশ থেকে আমদানী হয়।

"এখানে আমাদের কয়েকজন খ্রীষ্টান বণিকের সঙ্গে দেখা হল। তাঁরা বললেন যে তাঁরা সারনৌ (?) নামে একটি শহর থেকে এসেছেন। তাঁরা রেশমের জিনিস, মুসকর, ধূনা, কস্তুরী প্রভৃতি বিক্রী করবার জন্তে নিয়ে এসেছিলেন। তাঁরা ব্যাথের মহান্‌ পানের প্রজা।<sup>১</sup>

"...বাংঘেলা থেকে বিদায় নেবার আগে আমরা প্রবালগুলি,<sup>২</sup> জাকরান

<sup>১</sup> এর থেকে বোঝা যায়, ঐ সময়ে সুদূর চীন ও মঙ্গোলিয়ার লোকেরা বাংলার ব্যবসায়-বাণিজ্য করতে আসত।

<sup>২</sup> প্রবালের জিনিসগুলি "বাংঘেলা"র চেয়ে পেগো (পেগু)-তে বেশী দামে বিক্রী হত। এইজন্য পূর্বাঞ্চলীনা খ্রীষ্টান বণিকরা ভারতের এবং তাঁর সঙ্গীদের তাঁদের আনা প্রবালগুলি পেগোতে নিয়ে গিয়ে বিক্রী করবার পরামর্শ দিয়েছিলেন।



এবং ফ্লোরেন্স থেকে আনা দু'টি গোলাপী রঙের কাশড় ছাড়া আর সব বাণিজ্যিক সামগ্রীই বিক্রী করলাম। (তারপর) আমরা শহরটি ত্যাগ করলাম। আমার বিশ্বাস, থাকার জন্তু এই শহরটিই পৃথিবীতে সর্বশ্রেষ্ঠ। আপনারা যে সব বস্ত্রের কথা ইতিপূর্বে (আমার কাছ থেকে) শুনেছেন, সেগুলি এই শহরে স্ত্রীলোকেরা বোনে না, পুরুষেরা বোনে।

সেখান থেকে আমরা পূর্বোক্ত খ্রীষ্টানদের সঙ্গে রওনা হলাম এবং বাংঘেলা থেকে ১০০০ মাইল দূরে অবস্থিত পেগো নামক একটি শহরের দিকে যাত্রা করলাম।”

### বারবোসার বিবরণ

ভারতবর্ষের সমসাময়িক আর একজন ইউরোপীয় বণিক প্রায় একই সময়ে ভারতবর্ষে এসেছিলেন। ইনি জাতিতে পর্তুগীজ। এর নাম দুয়ার্তে বারবোসা। বিখ্যাত নাবিক ম্যাগেলান এর জাতি।

বারবোসা বাংলাদেশ সমেত ভারতবর্ষের বহু অঞ্চলে ভ্রমণ করেছিলেন। এই ভ্রমণের বিবরণ পাওয়া যায় তাঁর লেখা *Liuro em que da relação do que viu e ouviu no Oriente* বই থেকে।

বারবোসা কোন্ বছরে বাংলা দেশে ভ্রমণ করেছিলেন, তা তিনি বলেন নি, তবে তাঁর ভ্রমণ-বিবরণে দিউ-এর বর্ণনা, গুরুমুজ্ব অধিকারের বৃত্তান্ত, কালিকটে পর্তুগীজদের দুর্গ প্রতিষ্ঠা এবং পর্তুগীজদের ভারতীয় জাহাজ দখল করে ভারতীয়দের সামুদ্রিক বাণিজ্যে বিঘ্ন সৃষ্টি করা প্রভৃতি বিষয়ের উল্লেখ থাকার জন্তু মনে হয়, ১৫১৪ খ্রীষ্টাব্দে বারবোসা ভারতবর্ষের বিভিন্ন অঞ্চলে ভ্রমণ করেন।

বারবোসা তাঁর দেখা বাংলাদেশের যে বিবরণ লিপিবদ্ধ করেছেন, তা' নীচে উদ্ধৃত হ'ল।

“উড়িষ্যা (Otisa) রাজ্য—এটি পৌত্তলিকদের দেশ... ‘গ্যান্জেস’ নদী পর্যন্ত সমুদ্রতটের সমস্ত লীগ পরিমিত স্থান জুড়ে বিস্তৃত। একে (‘গ্যান্জেস’কে) এরা বলে ‘গুএজা’ (গঙ্গা)। এই নদীর অপর পার থেকে বাংলা রাজ্যের স্রুজ। এর সঙ্গে উড়িষ্যার রাজ্যের কখনও কখনও যুদ্ধ হয়। সব ভারতীয়রা তীর্থযাত্রা উপলক্ষে এই নদীতে (গঙ্গায়) গিয়ে স্নান করে, তারা বলে যে এতে তারা সবাই নিরাপদ হয়, কারণ এমন একটি স্বর্ণা থেকে

এটি (গঙ্গা) বেরিয়েছে, যা পৃথিবীর স্বর্গ। এই নদীটি বিরাট এবং অতি সুন্দর। এর দুই তীরে পৌত্তলিকদের বহু সমৃদ্ধ ও অভিজাত নগর অবস্থিত। এই নদী এবং ইউফ্রেটিস নদীর মাঝখানে রয়েছে প্রথম ও দ্বিতীয় ভারত। ঐ অঞ্চল খুব সমৃদ্ধ ও স্বয়ংসম্পূর্ণ এবং স্বাস্থ্যকর ও নাতিশীতোষ্ণ; এই নদী থেকে স্রু করে মালাকা (মালাক্কা) পর্যন্ত অঞ্চলকে মুবেরা (মুসলমানেরা) বলে তৃতীয় ভারত।<sup>২</sup>

‘গ্যান্জেস’ (গঙ্গা) নদী পার হয়ে (উদ্ভিগ্না থেকে) সমুদ্রতট ধরে উত্তর-পূর্বে কুড়ি লীগ গিয়ে তারপর পূর্বে গেলে এবং দক্ষিণ-পশ্চিমে কুড়ি লীগ গিয়ে তারপর পূর্ব দিকে বারো লীগ দ্রবতী প্যারালেম (৭) নদী পর্যন্ত গেলে বাংলা (Bengala) রাজ্যে পৌঁছানো যাবে। এই রাজ্যের ভিতরেব দিকে এবং সমুদ্রতটে অনেক শহর আছে। ভিতরের শহরগুলিতে পৌত্তলিকেরা বাস করে। তাবা বাংলার রাজার প্রজা; তিনি (বাংলার রাজা) একজন মুর (মুসলমান)। সামুদ্রিক বন্দরগুলিতে মুব ও পৌত্তলিকেরা বাস করে। তারা বহু জিনিসপত্রের ব্যবসায় করে এবং বহু স্থানে জাহাজ নিয়ে যায়; এই সমুদ্র একটি উপসাগর, এটি উত্তর দিকে (স্থলভাগের মধ্যে) প্রবেশ করেছে। এর অভ্যন্তরে প্রত্যন্তদেশে একটি বিরাট শহর আছে। সেখানে মুররা বাস করে। তার নাম ‘বেংগাল’। সেটি একটি ভাল বন্দর। এর অধিবাসীরা শ্বেতকায়, তাদের দেহ সুগঠিত। বিভিন্ন অঞ্চল থেকে আগত বহু বিদেশী এই শহরে বাস করে, আরব ও ইরানী দুই জাতির লোকেরা, হাবশীরা এবং ভারতীয়েরা এখানে সম্মিলিত হয়েছে,—কারণ দেশটি অত্যন্ত উর্বর, এর জলবায়ু নাতিশীতোষ্ণ। এরা সকলেই বড় ব্যবসায়ী, এদের নিজেনের বড় জাহাজগুলির নির্মাণকৌশল মক্কার জাহাজের মত, অল্প জাহাজগুলি চীনদেশের পদ্ধতিতে তৈরী, তাদের এরা বলে “জাঙ্গো” (jungo = junk); এগুলি খুবই বৃহৎ এবং যথেষ্ট পরিমাণে মাল বহন করে। এইসব জাহাজ নিয়ে এরা চোল-মান্দার, মালাবার, কাষে, পেণ্ডু, টার্নাসারি (টেনাসেরিম্), সমাজ্রা (সুমাট্রা), সিংহল এবং মালাকায় যায়। এরা নানা জায়গায় বহু রকম জিনিসের ব্যবসায় করে।

এই দেশে প্রচুর তুণী এবং আখের চাষ হয়, এখানে খুব ভাল আদা এবং

লম্বা মরিচ জগায়। এরা অনেক রকমের কাপড় তৈরী করে, সেগুলি খুব মিহি আর নরম। এরা নিজেদের ব্যবহারের জন্য রঙীন কাপড় এবং আর সব জায়গায় বাণিজ্যের জন্য সাদা কাপড় তৈরী করে। এগুলিকে এরা বলে সারাভেতি, মেয়েদের শিখোঁয়াস হিনাবে এগুলি খুব চমৎকার, এই কাজে এদের মূল্য খুব বেশী। আরবেরা এবং ইরানীরা এই কাপড়ে এত বেশী টুপি তৈরী করে যে, প্রত্যেক বছর তারা তা দিয়ে বহু জাহাজ ভতি করে' বিভিন্ন স্থানে পাঠায়। এরা (বাংলার লোকেরা) অল্পরকম কাপড়ও বানায়; কোনটাকে তারা বলে মামুনা, কোনটাকে ছুগ্জা (ছাগ্জি?), কোনটাকে চাউতর (চাদর). কোনটাকে তোপান, কোনটাকে সানাবাফোজ; জামা তৈরীর জন্য এগুলি খুব মূল্যবান। এগুলি খুব টেকসই। এগুলির প্রত্যেকটির দৈর্ঘ্য কুড়ি হাত অথবা তার সামান্য বেশী বা কম। এই শহরে ('বেংগাল'য়) তাদের সবগুলির দামই সম্ভ। এগুলি পুরুষে বোনে ঢাকা আর মাকু দিয়ে।

“এই শহরে (বেংগাল'য়) খুব ভাল জাতের সাদা চিনি তৈরী হয়, কিন্তু এ' (সাদা চিনি) দিয়ে কী করে পাঁউরুটি তৈরী করতে হয়, তা এরা জানে না। তাই এরা তাকে গুঁড়ো করে ভালভাবে সেলাই করে', কাঁচা পশুচর্মে ঢাকা কাপড়ে 'প্যাক' করে। তারা এ' দিয়ে বহু জাহাজ বোঝাই করে এবং সব দেশে বিক্রীর জন্য রপ্তানী করে। যখন এইসব ব্যবসায়ী স্বাধীনভাবে নির্ভয়ে মালাবার ও কাষে বন্দরে জাহাজ নিয়ে যেত, তখন এক বস্তা চিনির দাম মালাবারে ছিল আড়াই ডুকাট, একটি ভাল দিনাবাফোর দাম দুই ডুকাট, মেয়েদের একটি টুপির উপযোগী এক টুকরো মসলিনের দাম তিনশো মারাভেদিস, সবচেয়ে ভাল জাতের একটি চাউতরের (চাদর) দাম ছ'শো মারাভেদিস। যারা এগুলি নিয়ে যেত, তারা অনেক টাকা লাভ করত।

“বাংলার এই শহরের (বেংগাল'র) লোকেরা আদা, কমলালেবু, লেবু এবং এদেশে অল্প যে সমস্ত ফল ফলে, তাই দিয়ে খুব ভাল মোরক্কা তৈরী করে। এই দেশে ঘোড়া, গরু ও ভেড়া অনেক আছে। অল্প মাংসও প্রচুর পরিমাণে পাওয়া যায়, খুব অসাধারণ রকমের বড় মুরগীও মেলে। এই শহরের মুরিশ (মুসলমান) বণিকেরা দেশের ভিতরে গিয়ে বহু পৌত্তলিক বালককে কেনে তাদের পিতামাতার অথবা যারা তাদের চুরি করে, তাদের কাছ থেকে—এবং তাদের নপুংসক বানায়। তাদের (ঐ বালকদের) মধ্যে কেউ কেউ এতে মারা যায়; যারা বেঁচে যায়, তাদের এরা খুব ভালভাবে মানুষ

করে এবং পণ্য হিসাবে ইরানীদের কাছে লোক গিছু কুড়ি বা ত্রিশ ডুকাট দামে বিক্রী করে; তারা (ইরানীরা) তাদের স্ত্রীদের এবং ঘরবাড়ীর রক্ষক হিসাবে এদের খুব মূল্যবান জ্ঞান করে। এই শহরের সম্ভ্রান্ত মুররা পরে লম্বা মরিসকো জামা; এগুলি সাদা রঙের, এদের বুনা নি হালকা এবং পায়ের উপর দিক পর্যন্ত এগুলি প্রসারিত; ভিতরে এরা পরে একধরনের বস্ত্র, তা কোমরের নীচে জড়ানো থাকে। এদের জামার উপরে থাকে কোমর ঘিরে জড়ানো একটি রেশমী বন্ধনী (sash) এবং রূপা-বসানো ছোরা। তারা আঙুলে রত্ন-খচিত আংটি পরে এবং মাথায় দেয় মিহি সূতি-কাপড়ের তৈরী টুপি। এরা বিলাসী লোক, খুব বেশী পরিমাণে পানভোজন করে এবং এদের অগ্ন্যাগ্ন খারাপ অভ্যাসও আছে। এদের বাড়ীতে বড় বড় পুকুর আছে, তাতে এরা বারবার স্নান করে। এদের অনেকগুলি করে চাকর থাকে। প্রত্যেকের তিন চারটি স্ত্রী আছে, আরও যতগুলি (উপপত্নী) তারা রাখতে পারে রাখে। তাদের (স্ত্রীদের) এরা একেবারে আবদ্ধ করে রাখে, খুব দামী পোষাক পরায় এবং রেশম ও রত্নখচিত স্বর্ণালঙ্কার দিয়ে সাজিয়ে রাখে। এরা রাত্রিতে পরস্পরের সঙ্গে দেখা করতে এবং মণ্ডপান করতে বার হয়; উৎসব ও বিবাহের ভোজ রাত্রিতেই করে। এই দেশে নানারকমের মদ তৈরী হয়, প্রধানত চিনি আর তালগাছ থেকেই তৈরী হয়, এ ছাড়া অল্প অনেক জিনিস থেকেও হয়। স্ত্রীলোকেরা এই সব মদ খুব ভালবাসে, এতেই তারা অভিযন্ত। এরা (বাঙালীরা) ভাল সঙ্গীতজ্ঞ, গান গাওয়া আর বাজনা বাজানো দুইই পারে। সাধারণ স্তরের পুরুষেরা খাটো সাদা জামা পরে, সেগুলি উকর আধখানা অবধি প্রসারিত। এছাড়া এরা পায়জামা (drawers) পরে এবং মাথায় তিন চার পাক দিয়ে ছোট পাগড়ী জড়ায়। এরা সবাই চামড়ার জুতা পায় দেয়; কেউ পরে বড় জুতা (shoe), কেউ পরে খুব হাল্কাভাবে তৈরী রেশমী এবং সোনালী সূতা দিয়ে সেলাই করা চটিজুতা।

“(এখানকার) রাজা খুব বড় এবং ধনী নৃপতি। তাঁর রাজ্য বিস্তীর্ণ এবং ঘনবসতিপূর্ণ। এই অঞ্চলগুলির পৌত্তলিকরা প্রত্যহই (অনেকে) মূর (মুসলমান) হয়ে যায়, শাসকদের অহুগ্রহ পাবার জন্য। ‘বেংগাল’ শহর থেকে দূরে দূরে দেশের ভিতরে ও সমুদ্রতটে উভয় স্থানেই আরও অনেক শহর আছে, সেখানেও এই রকম মূর ও পৌত্তলিকদের বাস; তারা এই

রাজার প্রজা। এই সব শহরে তিনি শাসনকর্তাদের এবং তাঁর প্রাপ্য শুদ্ধ ও রাজস্ব আদায় করার জন্ত কর্মচারীদের নিযুক্ত রাখেন।”

### বাবরের বিবরণ

ভারথেরা এবং বারবোসার বিবরণে আলাউদ্দীন হোসেন শাহের শাসনাধীন বাংলাদেশ সম্বন্ধে সংবাদ পাওয়া যায়। এই দুই বিবরণের কয়েক বছর পরে রচিত বাবরের আত্মকাহিনীতে নাসিরুদ্দীন নসরৎ শাহ এবং তাঁর আমলের বাংলাদেশ সম্বন্ধে কিছু তথ্য পাওয়া যায়। অবশ্য বাবর স্বয়ং বাংলাদেশ কোনদিন আসেননি। তবে তিনি তাঁর আত্মকাহিনীতে বাংলাদেশ ও তার রাজার যেটুকু বিবরণ দিয়েছেন, তা সম্পূর্ণ নির্ভরযোগ্য, কারণ বিশ্বস্ত সংবাদ-দাতাদের দেওয়া সংবাদের উপর নির্ভর করে তিনি এই বিবরণ লিপিবদ্ধ করেছিলেন। বাবরের বিবরণ নীচে উদ্ধৃত হ'ল।

“বাংলা দেশের রাজা নসরৎ শাহ। তাঁর পিতা ছিলেন জনৈক সৈয়দ। তিনি আলাউদ্দীন নাম নিয়ে বাংলাদেশে রাজত্ব করেছিলেন। নসরৎ শাহ উত্তরাধিকার সূত্রে রাজত্ব লাভ করেন। বাংলার একটি বিস্ময়কর প্রথা এই যে, এখানে উত্তরাধিকারসূত্রে সিংহাসনে আরোহণ খুব কমই ঘটে। রাজার পদ স্থায়ী এবং আমীর, উজীর ও মনসবদারদের পদ স্থায়ী। পদকেই বাঙালীরা শ্রদ্ধা করে। প্রত্যেক পদের অধীনে একদল বিশ্বস্ত ও অল্পগত কর্মচারী আছে। রাজার মন যদি চায় যে, কোন একজন লোক বরখাস্ত হয়ে তাঁর জায়গায় আর একজন লোক নিযুক্ত হোক, তা'হলে ঐ পদের সঙ্গে যুক্ত সমস্ত কর্মচারী নবনিযুক্ত ব্যক্তির কর্মচারী হয়। খাস রাজার পদের মধ্যেও এই বৈশিষ্ট্য আছে। যে কোন লোক রাজাকে বধ করে নিজে সিংহাসনে বসলে সে-ই রাজা হয়। আমীরেরা, উজীরেরা, সৈন্যেরা ও কৃষকেরা তক্ষণি তাঁর বশতা স্বীকার করে, তাকে ভক্তি করে এবং তার পূর্ববর্তী রাজার জায়গায় তাকেই আইনসম্মত রাজা বলে স্বীকার করে। বাঙালীরা বলে, “আমরা সিংহাসনের প্রতি বিশ্বস্ত; যে সিংহাসন অধিকার করে, তাকেই আমরা অল্পগতভাবে ভক্তি করি।” দৃষ্টান্তস্বরূপ, নসরৎ শাহের পিতা আলাউদ্দীনের রাজত্বের আগে একজন হাবশী তাঁর রাজাকে বধ করে সিংহাসনে আরোহণ করেছিল এবং কিছু সময় রাজত্ব করেছিল। আলাউদ্দীন ঐ হাবশীকে বধ করে সিংহাসনে বসেন এবং রাজা হন। বাংলা

দেশে আর একটি প্রথা আছে। কোন রাজার পক্ষে পূর্ববর্তী রাজাদের সঞ্চিত অর্থ ব্যয় করা অগৌরবজনক বলে গণ্য হয়। রাজা হবার পরে তিনি নিজের অর্থ নিজেই সংগ্রহ করেন। বাংলাদেশে আরও একটি নিয়ম আছে। প্রত্যেক রাজকীয় ব্যয় এবং কোষাগার, মন্দির প্রভৃতি ব্যয় নির্বাহের জন্ত বিভিন্ন পরগণা নির্দিষ্ট আছে। এই সমস্ত ব্যয় নির্বাহের জন্ত অত্র কোন জমি থেকে অর্থ সংগ্রহ করা হয় না।

“উপরে উল্লিখিত এই পাঁচজনই ( অর্থাৎ নসরৎ শাহ এবং দিল্লী, গুজরাট, বাহমণী ও মালবের সুলতান ) শ্রেষ্ঠ মুসলমান নৃপতি। ভারতবর্ষে এঁদের সম্মানিত আসন। এঁদের সৈন্যসংখ্যা বিপুল, রাজ্যও বিশাল।”

বন্ধারের কাছে ঘর্ষরা নদীর উপরে বাংলার সুলতানের সৈন্যবাহিনীর সঙ্গে বাবরের সৈন্যবাহিনীর যে যুদ্ধ হয়েছিল, বাবর তার বিস্তৃত বিবরণ দিয়েছেন তাঁর আত্মকাহিনীতে। আমরা আগেই এই বিবরণের সংক্ষিপ্তসার উদ্ধৃত করেছি এবং এ সম্বন্ধে প্রয়োজনীয় মন্তব্য করেছি ( পৃ: ৪২০-৪২৩ খ্র: )।

বাঙালীরা যে যোদ্ধা হিসাবে মোটেই হীনবল ছিল না, তার প্রমাণ বাবর-প্রদত্ত যুদ্ধের বর্ণনা থেকেই পাওয়া যায়। বাবরের অধীনস্থ সিকন্দরপুরের শিকদার মাহমুদ খান বাবরকে লিখেছিলেন, তিনি ঘর্ষরা নদী পার হবার জন্ত, “ ‘হলদী’র ঘাটে ৫০টি নৌকা সংগ্রহ করেছেন এবং মাঝিদের ভাড়া দিয়েছেন, কিন্তু তারা বাঙালীরা আসছে গুজব শুনে খুব ভয় পেয়ে গিয়েছে।”

এই যুদ্ধে বাবরের বাহিনী বেঁটে কামান ( mortar ), দীর্ঘ সর্পাকার হাতলযুক্ত কামান ( culverin ) এবং ফিরঙ্গী ( পাথর নিক্ষেপ করার যন্ত্র ) প্রভৃতি অস্ত্র ব্যবহার করেছিল। বাংলার বাহিনীও এই সমস্ত অস্ত্র ব্যবহার করেছিল বলে ধরে নেওয়া যেতে পারে। বাঙালী গোলন্দাজদের কামান-চালনার নৈপুণ্য সম্বন্ধে বাবর যে মন্তব্য করেছেন, তা আমরা আগেই উদ্ধৃত করেছি ( পৃ: ৪২১ খ্র: )।

### জোআঁ-দে-বারোসের বিবরণ

পত্নীগীজ ঐতিহাসিক জোআঁ-দে-বারোসের লেখা প্রামাণিক ইতিহাসগ্রন্থ ‘Da Asia’ ষোড়শ শতাব্দীর মধ্যভাগে রচিত হয়। এই গ্রন্থে গিয়াসুদ্দীন

মাহমুদ শাহের রাজত্বকালের গোড় শহরের যে বর্ণনা পাওয়া যায়, তা নীচে উদ্ধৃত হল।

“(গৌড়ের) রাস্তাগুলি খুব চওড়া আর সোজা। প্রধান প্রধান রাস্তাগুলিতে দেওয়াল-বরাবর সারে সারে গাছ লাগানো। এখানকার লোকের সংখ্যা খুব বেশী। জনতা এবং যানবাহনের ভীড়ে রাজপথগুলি সমাকীর্ণ। যারা রাজসভায় যেতে চায়, তাদের ভীড় এত বেশী যে তাদের একজন আর একজনকে অতিক্রম করে এগিয়ে যেতে পারে না। এই শহরের একটা বড় অংশ সুরমা ও সুনমিত প্রাসাদে ভর্তি।”

কোন প্রত্যক্ষদর্শীর কাছ থেকে শুনে জেঁআ-দে-বারোস এই বিবরণ লিপিবদ্ধ করেছিলেন বলে মনে হয়।

সাতগাঁও এবং চাটগাঁও বন্দর সম্বন্ধে জেঁআ-দে-বারোস যা লিখেছেন, তা'ও উদ্ধারযোগ্য। তিনি লিখেছেন, “(গঙ্গা নদীর) প্রথম মোহানা পশ্চিম দিকে। একে ‘সাতীগান্’ (সাতগাঁও) বলা হয়, নদীর উপরে এই নামের একটি শহর আছে। এখানে আমাদের লোকেরা (অর্থাৎ পর্তুগীজরা) বাণিজ্যিক কাজকর্ম করে। অগ্র মোহানাটি পূর্ব দিকে। এর (মোহানার) খুব কাছেই আর একটি অধিকতর বিখ্যাত বন্দর আছে। এর নাম ‘চাটিগান্’ (চাটগাঁও)। বিভিন্ন রাজ্য থেকে যে সব বণিক যাওয়া-আসা করে, তাদের অবিকাংশই এই বন্দর ব্যবহার করে।”

### বুন্দাবনদাসের বিবরণ

বুন্দাবনদাসের ‘চৈতন্যভাগবত’ থেকে সে যুগের বাংলাদেশ সম্বন্ধে অজস্র তথ্য পাওয়া যায়। এই গ্রন্থে বুন্দাবনদাস যে সমস্ত ঘটনার বর্ণনা দিয়েছেন, তাদের প্রায় সবগুলিই হোসেন শাহের রাজত্বকালের। স্মরণ্য এর মধ্যে যে সমস্ত তথ্য মেলে, তাদের হোসেন শাহী আমল সংক্রান্ত তথ্য বলেই গ্রহণ করা যায়। অবশ্য ছ’একটি ক্ষেত্রে হয়তো লেখক কালবৈষম্য করেছেন, এমন কোন কোন বিষয়ের অবতারণা করেছেন, যা হোসেন শাহী আমলে ছিল না; সেগুলি তার পরবর্তী কালের অথবা ‘চৈতন্যভাগবত’ রচনার সমকালের বিষয়। কিন্তু এই জাতীয় ব্যাপারগুলিও আমাদের আলোচ্য সময়েরই (১৩৩৮-১৫৩৮ খ্রিঃ) ব্যাপার, কারণ ‘চৈতন্যভাগবত’ ১৫৩৮ খ্রিষ্টাব্দে অথবা তার সামান্য পরেই রচিত হয়েছিল।

সুতরাং বন্দাবনদাসের 'চৈতন্যভাগবত' গ্রন্থে আমরা যে সব তথ্য পাই, তাদের ভিত্তিতে হোসেন শাহ ও তাঁর বংশধরদের রাজত্বকালের বাংলাদেশের একটি উজ্জ্বল ও প্রামাণিক আলেখ্য রচনা করা যেতে পারে।\*

বন্দাবনদাসের 'চৈতন্যভাগবত' থেকে জানা যায় যে, সে যুগে নবদ্বীপ খুব বিশাল ও সমৃদ্ধ নগর ছিল। রাঢ়, পূর্ববঙ্গ, চট্টগ্রাম, শ্রীহট্ট, উড়িষ্যা প্রভৃতি নানা স্থানের লোকেরা এখানে এসে বসতি স্থাপন করেছিলেন।<sup>১</sup> নবদ্বীপের সম্পদ ছিল অপরিমেয়। এখানে এক এক গঙ্গাঘাটে "লক্ষ লোক" স্নান করত। নবদ্বীপে অসংখ্য পণ্ডিত ও অধ্যাপক বাস করতেন, নানা দেশ থেকে ছাত্রেরা নবদ্বীপে এসে বিদ্যাশিক্ষা করত। এখানে বালকেরা এতখানি বিদ্যা অর্জন করত যে তারা ভট্টাচার্যদের সঙ্গেও তর্ক করত।<sup>২</sup> কিন্তু এই সব অধ্যাপক ও ছাত্রেরা কৃষ্ণভক্ত ছিলেন না, এমন কি যারা গীতা বা ভাগবত পড়াতেন, তাঁরাও না। হু'একজন কেবল স্নানের সময় 'গোবিন্দ' বা 'পুণ্ডরীকাক্ষ' নাম উচ্চারণ করতেন।<sup>৩</sup>

তঙ্কবায়, গোয়ালা, গন্ধবর্ণিক, মালাকার, তাছুলী, শঙ্খবর্ণিক, খোলাবেচা (থোড়, বলা, মূলা, খোলা প্রভৃতির বিক্রেতা) প্রভৃতি নানা জাতির ও পেশার লোক নবদ্বীপে বাস করত।<sup>৪</sup> অনেক তপস্বী, সন্ন্যাসী, জ্ঞানী, যোগীও এখানে বাস করতেন, এঁরা কৌমার্যব্রতধারী ছিলেন, অনেকে কোন দান পরিগ্রহ করতেন না।<sup>৫</sup>

নবদ্বীপে বহু অধ্যাপক ছিলেন। এরা ভট্টাচার্য, চক্রবর্তী, মিশ্র, আচার্য প্রভৃতি উপাধি দ্বারা পরিচিত হতেন; নানা শাস্ত্রে এঁরা পণ্ডিত ছিলেন।<sup>৬</sup> প্রত্যেকেরই অনেক ছাত্র থাকত, এই সব ছাত্রেরা গঙ্গায় স্নানের সময় নিজের গুরুর উৎকর্ষ ও অপরের গুরুর অপকর্ষ প্রচার করে বগড়া-মারামারি করত।<sup>৭</sup> ব্যাকরণ, অলঙ্কার, গ্রন্থ, স্থিতি প্রভৃতি নানা শাস্ত্র এখানে পড়ানো হত। কোন কোন পণ্ডিতের টোল তাঁর বাড়ীতেই ছিল<sup>৮</sup>, কেউ কেউ আবার অপরের বাড়ীতে (সাধারণত কোন ধনী ব্যক্তির দালানে বা চণ্ডীমণ্ডপে) টোল বসাতেন।<sup>৯</sup> টোল বসত সকালে ও বিকালে।<sup>১০</sup> ব্রাহ্মণ পণ্ডিতদের মধ্যে অনেকেরই জীবনযাত্রা ছিল নিষ্কিঞ্চন, অনেকে আবার অত্যন্ত

\*পরবর্তী পাদটীকাগুলির সঙ্কেত ব্যাখ্যার জন্য একাদশ অধ্যায়ের সর্বশেষ পাদটীকা দ্রষ্টব্য।

১ আ ২ (১০) ২ আ ২ (১১) ৩ আ ২ (১১) ৪ আ ৮ (৫৭-৫৯) ৫ ম ১০ (১৫৯)

৬ আ ২ (১১) ৭ আ ৬ (৩৬) ৮ আ ৬ (৩৬) ৯ আ ৭ (৪৮) ১০ ম ১ (১০০)



আড়ম্বরপূর্ণ জীবন যাপন করতেন<sup>১১</sup>; এরা দোলাতেও চড়তেন।<sup>১২</sup> নবদ্বীপের বাইরে বাংলার অগ্রাগ্র জায়গাতেও বিদ্যা-কেন্দ্র ছিল।<sup>১৩</sup> সে যুগে ব্রাহ্মণ পণ্ডিতরা ভক্ত ও শিষ্যদের কাছে সোনা, রূপা, জলপাত্র, আসন, স্রবঙ্গ-কঞ্চল প্রভৃতি জিনিস উপহার পেতেন।<sup>১৪</sup>

নবদ্বীপে তথা সমগ্র বাংলাদেশে সে সময় হিন্দুদের মধ্যে অনেক লৌকিক দেবদেবীর পূজা প্রচলিত ছিল। কেউ বিষহরীর (মনসা) পূজা করত, কেউ বহু ধন দিয়ে “পুতুলি” করত, কেউ নানা উপচার দিয়ে বাঙ্গলীর পূজা করত, কেউ বা মছ মাংস দিয়ে যক্ষপূজা করত; এই সব পূজা উপলক্ষে নৃত্য-গীত-বাঞ-কোলাহল অনেক হত।<sup>১৫</sup> চণ্ডীর পূজাও অনেকে করত, বিশেষ ভাবে করত চোর-ডাকাতরা।<sup>১৬</sup> চণ্ডীভক্তরা “জাগরণ” করে মঙ্গল-চণ্ডীর গীত করত, এবং এই উদ্দেশ্যে ভাল ভাল গায়ন আনাত।<sup>১৭</sup> ষষ্ঠীর পূজাও প্রচলিত ছিল।<sup>১৮</sup> লোকে “যোগিপাল-ভোগিপাল-মহীপালের গীত” (পালরাজাদের কীর্তিকাহিনী বিষয়ক গান?) শুনতেও ভালবাসত।<sup>১৯</sup>

শিশুর জন্মের পর যথাসময়ে বালক-উত্থান, নামকরণ প্রভৃতি পর্ব অমুষ্ঠিত হত; তারপর কয়েক (পাঁচ?) বছর বয়স হলে কর্ণবেধ ও চূড়াকরণ সহকারে হাতে-খড়ি অমুষ্ঠিত হত।<sup>২০</sup> ব্রাহ্মণ-সন্তানদের উপনয়নের বয়স হলে উপনয়ন অমুষ্ঠিত হত; এই উপলক্ষে বন্ধুবান্ধবরা নিমন্ত্রিত হত, নারীরা কৃষ্ণের জয়ধ্বনি দিত, নটেরা মৃদঙ্গ, সানাই ও বাঁশী বাজাত, ব্রাহ্মণরা বেদ পাঠ করত ও ভাটেরা রায়বার পড়ত।<sup>২১</sup> ব্রাহ্মণদের পক্ষে সন্ধ্যা করা ও সন্ধ্যার শেষে কপালে তিলক কাটা অবশ্যকর্তব্য বলে গণ্য হ'ত।<sup>২২</sup>

সে যুগে ভণ্ড সন্ন্যাসী, অমিতাচারী সন্ন্যাসী ও জাল মহাপুরুষের অভাব ছিল না। কোন কোন সন্ন্যাসী (!) বিবাহিত ছিল এবং তারা মত্তপান করত; সুরাকে তারা বলত “আনন্দ”,<sup>২৩</sup> এরা সাধারণত শাস্ত্র হত।<sup>২৪</sup> জাল মহাপুরুষরা নিজেদের ভগবান বলে প্রচার করত এবং এদের মধ্যে কেউ ‘রঘুনাথ’, কেউ ‘গোপাল’ বলে নিজেদের অভিহিত করত।<sup>২৫</sup> এক-

১১ ম ৭ (১৩৩) ১২ ম ৭ (১৩৪) ১৩ আ ১০ (৬৯-৭০) ১৪ আ ১০ (৭১) ১৫ আ ২ (১১) ১৬ আ ৩ (২১) ও অ ৫ (৩১২) ১৭ ম ১৩ (১৭০) ১৮ অ ৪ (২২৩) ১৯ অ ৪ (২২৩) ২০ আ ৩ (১৮-১৯) ও আ ৪ (২৬) ২১ আ ৬ ( ৩৫-৩৬) ২২ আ ১০ (৭৩) ২৩ ম ১৯ (১৯৭) ও অ ২ (২৬১) ২৪ অ ২ (২৬১) ২৫ ম ১৭ (১৮৮) ও আ ১০ (৭০)

দল তাত্ত্বিক মধুমতী সিদ্ধি জানে বলে লোকের ধারণা ছিল। তারা নাকি রাত্রে মদ খেয়ে মত্ত পড়ে পঞ্চকণ্ঠা আনত। তাদের সঙ্গে নানারকম খাবার, মালা ও কাপড়ও আসত। এই সব সাধকরা ঐ খাবার খেয়ে উজ্জ্বল পঞ্চকণ্ঠার সঙ্গে রমণ করত।<sup>২৬</sup>

তখনও 'ভূগোৎসব' ছিল বাংলার প্রধান পার্বণ। সমস্ত ঘরে মৃদঙ্গ, মন্দিরা ও শঙ্খ থাকত, ভূগোৎসবের সময় এই সব বাজা বাজানো হত।<sup>২৭</sup> ভূগোৎসবে সবাই "হুড়াহুড়ি" করে "সাড়ি" দিত অর্থাৎ আওয়াজ করত।<sup>২৮</sup> বৈষ্ণবদের একটি বিশিষ্ট উৎসব ছিল মাধবেন্দ্রপুরীর আরাধনা-দিবস পালন। এই উপলক্ষে শঙ্খ-ঘটা-মৃদঙ্গ-মন্দিরা-করতাল সহযোগে সঙ্গীতন অহুষ্ঠান হত এবং খাওয়া-দাওয়া হত।<sup>২৯</sup> কোথাও কোন মহাপুরুষের আগমন হ'লে সেখানে হাট বসে যেত।<sup>৩০</sup>

চৈতন্যদেবের প্রথমবার বিবাহ হয়েছিল বঙ্গভাচার্যের কন্যা লক্ষ্মী দেবীর সঙ্গে। পাত্রপক্ষ ও পাত্রীপক্ষ উভয়েই দরিদ্র বলে এ বিবাহে ঘটা বিশেষ হয় নি। বৃন্দাবনদাস এই বিবাহের যে বর্ণনা দিয়েছেন, তার থেকে বোঝা যায়, সে যুগে দরিদ্র হিন্দুদের (বিশেষভাবে ব্রাহ্মণদের) বিবাহ কেমনভাবে হত। সে যুগেও পাত্রকে যৌতুক ও পণ দেবার প্রথা ছিল, কিন্তু বঙ্গভাচার্য দরিদ্র বলে মাত্র পঞ্চ হরিতকী দিয়ে কন্যা সম্প্রদান করেছিলেন। বিবাহের পূর্বে উভয়পক্ষের আত্মীয়স্বজনরা সমবেত হয়ে বিবাহের উদযোগ করতে লাগলেন। শুভ দিনে শুভ লগ্নে অধিবাস হল, এই উপলক্ষে নটেরা নৃত্য-গীত করতে ও নানা বাজা বাজাতে লাগল, চারদিকে ব্রাহ্মণেরা বেদধ্বনি করতে লাগল, মাঝখানে বর চৈতন্যদেব বসলেন। তাঁর আত্মীয় ব্রাহ্মণরা ঈশ্বরের গন্ধমালা দিয়ে শুভক্ষণে তাঁর অধিবাস করালেন। তিনিও গন্ধ, চন্দন, তাম্বুল ও মালা দিয়ে ব্রাহ্মণদের সন্তুষ্ট করলেন। তারপর তাঁর শস্ত্র বঙ্গভাচার্য এসে অধিবাস করিয়ে গেলেন। বিবাহের দিন প্রভাতে চৈতন্যদেব স্নান-দানধ্যান করে পূর্বপুরুষদের পূজা করলেন। তখন নৃত্য, গীত, বাজা ও মঙ্গলধ্বনি হতে লাগল, চারদিকে কোলাহল উঠল; এয়ারা এবং আত্মীয়, বন্ধু, শুভাহুধ্যায়ী, ব্রাহ্মণ ও সজ্জনরা এলেন। চৈতন্যদেবের জননী শচীদেবী এয়াদের খই, কলা, সিঁদূর, পান ও তেল দিয়ে সন্তুষ্ট করলেন। গোষ্ঠুলি লগ্নে চৈতন্যদেব আত্মীয়দের সঙ্গে বঙ্গভাচার্যের গৃহে এসে উপস্থিত হলেন।

বল্লাভাচার্য জামাতাকে সমস্তই আসন দিয়ে বিধিযুক্ত বরণ করলেন। শেষে তিনি তাঁর কন্যা লক্ষ্মীকে সর্ব অলঙ্কারে ভূষিত করে নিয়ে এলেন। লক্ষ্মী বরকে সাতবার প্রদক্ষিণ করার পরে হাতজোড় করে রইলেন। দু'জনে “পুষ্পমালা ফেলাফেলি” হল। লক্ষ্মী চৈতন্যদেবের পায়ে মালা দিয়ে নমস্কার করলেন। বল্লাভাচার্য চৈতন্যদেবের চরণে পাণ্ড দিয়ে, কলেবর বস্ত্র-মালা-চন্দনে ভূষিত করে কন্যা সম্প্রদান করলেন। অতঃপর স্ত্রী-আচার অনুষ্ঠিত হল। সে রাত্রি শুশুরবাড়ীতেই কাটিয়ে পরের দিন সন্ধ্যায় স্ত্রীকে নিয়ে, গন্ধ-মালা-অলঙ্কার-মুকুট-চন্দনে ভূষিত হয়ে দোলায় চড়ে চৈতন্যদেব নৃত্য-গীত-বাঁহ-কোলাহলের মধ্যে গৃহে প্রত্যাবর্তন করলেন। শচী দেবী বিপ্রপত্নীদের নিয়ে পুত্রবধূকে ঘরে তুললেন এবং ব্রাহ্মণ, নট ও বাজনদারদের অর্থ, বস্ত্র ও বাক্য দিয়ে পরিতুষ্ট করলেন।<sup>৩১</sup>

চৈতন্যদেবের দ্বিতীয়বার বিবাহ হয় রাজপণ্ডিত সনাতন মিশ্রের কন্যা বিষ্ণুপ্রিয়া দেবীর সঙ্গে। সনাতন মিশ্র ধনী লোক ছিলেন; চৈতন্যদেবের তরফে বিবাহের সমস্ত ব্যয় বহন করেছিলেন তাঁর দুই ধনী শিষ্য—মুকুন্দ-সঙ্কর ও বুদ্ধিমন্ত খান। বাজেই খুব আড়ম্বর ও সমারোহের সঙ্গে এই বিবাহ অনুষ্ঠিত হয়েছিল। এই বিবাহের যে বর্ণনা বুদ্ধাবনদাস দিয়েছেন, তার থেকে সে যুগে ধনী হিন্দুদের বিবাহের বাস্তব চিত্র পাই। এই বিবাহের অধিবাস-লগ্নে বড় বড় চন্দ্রাতপ টাঙিয়ে চার দিকে কলাগাছ লাগানো হয়েছিল; পূর্ণ ঘট, প্রদীপ, ধান, দই, আত্মসার প্রভৃতি মঙ্গল-দ্রব্য একত্র সমাবেশ করে সারা মাটিতে আলপনা দেওয়া হয়েছিল। ঐদিন বিকালে বাজনদাররা মৃদঙ্গ, সানাই, জম্ভাক, করতাল প্রভৃতি বাজনা বাজাতে লাগল, ভাটেরা রায়বার পড়তে লাগল, এয়ারা জয়ধ্বনি দিতে লাগলেন, ব্রাহ্মণরা বেদ আবৃত্তি করতে লাগলেন। বর চৈতন্যদেব ব্রাহ্মণদের মাঝখানে সলেন। নিমন্ত্রিত সবাইকে গন্ধ, চন্দন, তাম্বুল, গুবাক, মালা দেওয়া হতে লাগল (সে যুগে বিবাহ-অনুষ্ঠানে খাওয়াবার রেওয়াজ ছিল না)। এক এক জন তিনবার করে এ সব নিতে লাগলেন। সনাতন মিশ্রও এসে অধিবাস করিয়ে গেলেন। অতঃপর তিনি মিশ্রের বাড়ীতে ফিরে বিষ্ণুপ্রিয়ার অধিবাস করালেন। পরের দিন প্রভাতে চৈতন্যদেব গঙ্গাস্নান করে, প্রথমে বিষ্ণুর পূজা করে, তারপর আত্মীয়দের নিয়ে নান্দীমুখ করতে বসলেন; সে

সময় বাত-নৃত্য-গীতে মহা কোলাহল উঠল, চারদিকে 'জয়' 'জয়' শব্দে মঙ্গলধ্বনি হতে লাগল; ঘরে, ঘারে এবং অন্ধনে অসংখ্য পূর্ণ ঘট, ধান, দই, প্রদীপ ও আত্মার স্বাপন করা হল, চার দিকে নানা রঙের পতাকা ওড়ানো হ'ল, কলাগাছ রোপণ করে তাতে আমের শাখা বেঁধে দেওয়া হল। শচী দেবীও এয়োদের নিয়ে লোকাচার করতে লাগলেন; তিনি প্রথমে গঙ্গার পূজা করে বাতধ্বনির মধ্য দিয়ে যষ্টির স্থানে গিয়ে যষ্টির পূজা করলেন। তারপর আত্মীয়দের ঘরে ঘরে গিয়ে লোকাচার করে তিনি ঘরে ফিরে খই, কলা, তেল, পান ও সিঁহুর দিয়ে এয়োদের বরণ করলেন, প্রতি এয়াকে বিভিন্ন দ্রব্য পাঁচ সাতবার করে দেওয়া হল। অতঃপর এয়োরা তেল মেখে স্নান করলেন। কন্নার বাড়ীতেও বিষ্ণুপ্রিয়ার জননী অম্বরূপভাবে লোকাচার অনুষ্ঠান করলেন। এদিকে চৈতন্যদেব বিধি অনুযায়ী কর্ম করে অল্লক্ষেণের জন্তু বিশ্রাম করলেন; তারপর ব্রাহ্মণদের পদমর্যাদা অনুযায়ী ভোজ্য<sup>৩২</sup> ও বস্ত্র দিয়ে নম্রচিত্তে সম্মানিত করলেন। ব্রাহ্মণরাও তাঁকে আশীর্বাদ করে বাড়ীতে ভোজন করতে গেলেন। বিকালে চৈতন্যদেব বর-বেশে সজ্জিত হলেন; চন্দনে অঙ্ক চর্চিত করে মাঝে মাঝে গণ্ড (ফোঁটা) দিলেন; কপালে অর্ধচন্দ্রাকারে চন্দন দিয়ে তার মাঝখানে গঙ্গের তিলক দিলেন; মাথায় মুকুট ও গলায় সুগন্ধি মালা পরলেন; ত্রিকচ্ছ দিয়ে শূলক্ষেণ পীত বস্ত্র পরে চোখে কাজল দিলেন এবং হাতে ধান, দুর্বা ও সূতা বেঁধে "রঙামঞ্জরী" দর্পণ ধারণ করলেন; দুই কানে সোনার কুণ্ডল পরে হাতে নব-রত্ন হার বাঁধলেন। তারপর তিনি বাত-গীত, ব্রাহ্মণদের বেদধ্বনি ও ভাটদের রায়বার পাঠের মধ্য দিয়ে জননীকে প্রদক্ষিণ করে, ব্রাহ্মণদের নমস্কার ও মাগ্ন করে দোলায় চড়ে বসলেন। অতঃপর নারীদের জয়ধ্বনি ও মঙ্গলধ্বনির মধ্য দিয়ে তিনি প্রথমে গঙ্গাতীরে গেলেন, তারপর সারা নবদ্বীপ ভ্রমণ করলেন; তাঁর সঙ্গে সঙ্গে এক বিরাট দল যেতে লাগল, তারা সহস্র সহস্র জলন্ত দীপ নিয়ে চলতে লাগল, নানারকম বাজি পোড়াতে লাগল, নানারকম পতাকা ওড়াতে লাগল; নানা সম্প্রদায়ের নর্তকরা নৃত্য করে যেতে লাগল; বাজনদাররা জয়ঢাক, বীরঢাক, মুদঙ্গ, কাহাল, পটহ, দগড়, শঙ্খ, বাঁশী, করতাল, বরগোঁ, শিঙ্গা, পঞ্চশঙ্খী প্রভৃতি বাজনা বাজাতে লাগল,

৩২ "ভোজ্য" রাখা নয়, কাঁচা—কারণ এর পরেই বলা হয়েছে যে ব্রাহ্মণেরা বাড়ীতে ভোজন করতে গেলেন।

অনেক শিশু বৃহৎ বাত্ৰভাণ্ডের ভিতরে বসে নেচে যেতে লাগল। এইভাবে নবদ্বীপ ভ্রমণ করে চৈতন্তদেব গোখলি লগ্নে সনাতন মিশ্রের বাড়িতে প্রবেশ করলেন, তখনও মহা জয়ধ্বনি ও বাত্ৰধ্বনি হতে লাগল; সনাতন মিশ্র চৈতন্তদেবকে আলিঙ্গন করে সভায় বসালেন ও তাঁর উপর পুষ্পবৃষ্টি করলেন। অতঃপর তিনি পাণ্ড, অর্ঘ্য, আচমনী, বস্ত্র ও শলকার দিয়ে জামাতাকে বরণ করলেন এবং তাঁর স্ত্রী অম্ম নারীদের সঙ্গে মিলে জামাতার মাথায় ধান-চুর্বা দিয়ে, সপ্ত স্তুতের প্রদীপে আরতি করে খই-কড়ি ফেলে লোকাচার করলেন। অতঃপর সর্বাঙ্গকারভূষিতা বিষ্ণুপ্রিয়া দেবীকে তাঁর আত্মায়েরা আসনে (পিড়িতে) বসিয়ে আনলেন, চৈতন্তদেবকেও আসনে ধরে তোলা হল, ৩৩ মধ্যে অস্তঃপট ধরে বিষ্ণুপ্রিয়া দেবীকে সাতবার চৈতন্তদেবকে প্রদক্ষিণ করানো হল। তারপর তুমুল বাত্ৰধ্বনি ও জয়ধ্বনির মধ্যে “পুষ্প ফেলাফেলি” হল, বিষ্ণুপ্রিয়া চৈতন্তদেবের পায়ে মালা দিলেন, চৈতন্তদেব বিষ্ণুপ্রিয়ার গলায় মালা দিলেন। অতঃপর প্রদীপের সমারোহ ও বাত্ৰধ্বনির প্রাচুর্যের মধ্যে সনাতন মিশ্র চৈতন্তদেবকে পাণ্ড, অর্ঘ্য ও আচমনী দিয়ে কণ্ঠ্য সম্প্রদান করলেন এবং ধোত, ভূমি, শয্যা ও দাসদাসী ৩৪ যৌতুকস্বরূপ দিলেন। বিষ্ণুপ্রিয়াকে চৈতন্তদেবের বাঁ পাশে বসিয়ে হোমকর্ম, বেদাচার ও লোকাচার সম্পন্ন করানো হল। এর পর বর-বধু ভোজন করে একত্রে স্নান-রাত্রি (বাসর) ঘাপন করলেন। পরদিন অপরাহ্নে যথারীতি নৃত্য, গীত, জয়ধ্বনি, নারীদের মঙ্গলধ্বনি, ব্রাহ্মণদের আলীবাদ, যাত্রাযোগ্য শ্লোক পাঠ, ঢাক-পড়া-সানাই-বরগোঁ-করতাল প্রভৃতি বাত্ৰের ধ্বনি ইত্যাদির মধ্য দিয়ে চৈতন্তদেব মানমীষদের নমস্কার করে বিষ্ণুপ্রিয়ার সঙ্গে দোলায় আরোহণ করলেন এবং নৃত্য-গীত-বাত্ৰ-পুষ্পবৃষ্টির মধ্য দিয়ে নবদ্বীপে ভ্রমণ করে গৃহে প্রত্যাবর্তন করলেন। তখন শচী দেবী এয়োদের নিয়ে পুত্রবধুকে বরণ করলেন এবং বর-বধু ঘরে এসে বসলেন। অতঃপর চৈতন্তদেব নট, ভাট ও ঞ্জুকদের বস্ত্র, অর্থ ও বাক্য দিয়ে সন্তুষ্ট করলেন; ব্রাহ্মণ ও আত্মীয়দের প্রত্যেককে তিনি বস্ত্র দিলেন। ৩৫

সে যুগে পৌরাণিক কাহিনী অভিনয় করা হত। একজন নট রাম-বনবাস পালায় দশরথের ভূমিকায় অভিনয় করার সময় ভাবাবিষ্ট হয়ে পরলোকগমন

৩৩ বর্তমানে কেবলমাত্র কলেকেই পিড়িতে বসিয়ে তুলে ধরে সাত পাক ঘোরানো হয়।

৩৪ ক্রীতদাস ও ক্রীতদাসী? ৩৫ আ ১০ (১৫-১৬)

করেছিলেন।<sup>৩৬</sup> চৈতন্যদেব তাঁর সন্ন্যাসের কিছুদিন আগে একবার তাঁর ভক্তদের সঙ্গে মিলে রুক্মিণীহরণ পালা অভিনয় করেছিলেন; এতে চৈতন্যদেব রুক্মিণী, হরিদাস কোতোয়াল, শ্রীবাস পণ্ডিত নারদ, শ্রীরাম পণ্ডিত স্নাতক, শ্রীমান পণ্ডিত “দ্বিয়ড়িয়া হাড়ি” ও নিত্যানন্দ বড়াই সেজেছিলেন; এটি অনেকটা নৃত্যনাট্যের মত; এতে সংলাপ বিশেষ ছিল না, একদল লোক কীর্তন করছিল আর অভিনেতারা নাচছিল।<sup>৩৭</sup> নিত্যানন্দ তাঁর বাল্যকালে তাঁর বন্ধুদের সঙ্গে নানা পৌরাণিক পালা অভিনয় করতেন।<sup>৩৮</sup> “ডঙ্ক” নামে পরিচিত একদল লোক সেযুগে বড়লোকদের বাড়ীতে কালীয়-দমন পালা গান করত।<sup>৩৯</sup> কীর্তন চৈতন্যদেবের আগেও অল্পস্বল্প ছিল, বিশেষ বিশেষ পুণ্যতিথিতে ও গ্রহণের সময় কীর্তন হত<sup>৪০</sup>, কিন্তু ব্যাপকভাবে কীর্তন প্রচলন চৈতন্যদেবই করেন; চৈতন্যদেব তাঁর ভক্তদের প্রথমে যে কীর্তনটি শিখিয়েছিলেন, তা হচ্ছে

হরয়ে নমঃ কৃষ্ণ ষাদবায় নমঃ।

গোপাল গোবিন্দ রাম শ্রীমধুসূদন ॥

কেদার রাগে এটি গাওয়া হত।<sup>৪১</sup>

চৈতন্যদেব নগর-সকীর্তনও প্রবর্তন করেছিলেন। প্রথম যে রায়ে তিনি নবদ্বীপে নগর সকীর্তনে বেরিয়েছিলেন, সেদিন নবদ্বীপের প্রতি বাড়ী কাদি কাদি কলা, নারকেল, আঙ্গুরে পূর্ণ ঘট ও ঘুতের প্রদীপ এবং দই, দুর্বা ও ধান-ভরা বাটা দিয়ে সাজানো হয়েছিল।<sup>৪২</sup>

সে যুগে হিন্দু ও মুসলমানদের সম্পর্ক খুব মধুর ছিল না। মুসলমানদের মধ্যে অনেকেই হিন্দুদের কীর্তন প্রভৃতি পছন্দ করত না; কেউ কেউ হিন্দুদের অত্যন্ত ঘৃণা করত, হিন্দুদের দেখলে ভাত খেত না; কোন মুসলমান হরিনাম করলে অথবা হিন্দুর মত আচরণ করলে মুসলিম রাজশক্তি তাকে নিষ্ঠুরভাবে শাস্তি দিত।<sup>৪৩</sup> তবে মুসলমানরা রামচন্দ্রের কাহিনী শ্রদ্ধা করে শুনত এবং শুনে অশ্রুবর্ষণ করত।<sup>৪৪</sup> হিন্দুদের মধ্যে কেউ, এমন কি কোন ব্রাহ্মণও ইসলাম ধর্ম গ্রহণ করলে হিন্দুরা তাতে ঔদাসীন্য দেখাত।<sup>৪৫</sup> কোন কোন হিন্দু আবার হিন্দুদেরই কীর্তন প্রভৃতি অচুঠানে আপত্তি করত, পাছে মুসলিম

৩৬ আ ৬ (৪২) ৩৭ ম ১৮ (১৮৮-১৯৩) ৩৮ আ ৬ (৪২-৪৩) ৩৯ আ ১১ (৮৪)

৪০ আ ২ (১৪) ৪১ ম ১ (১০৪) ৪২ ম ২৩ (২২১) ৪৩ আ ১১ (৭৯-৮২) ৪৪ অ ৪

(২৯১) ও ম ৩ (১১৭) ৪৫ আ ১১ (৮১)

রাজশক্তি অপ্রসন্ন হয়, সেই ভয়ে ; এরা কীর্তনকারীদের রাজশক্তির হাতে সমর্পণ করার কথা অবধি চিন্তা করতে দ্বিধা করত না।<sup>৪৬</sup> হিন্দুরা মুসলমানদের নীচ জাতি বলে মনে করত।<sup>৪৭</sup> হিন্দুদের মধ্যে অনেকে ধর্ম মানত না, তারা গোমাংস খেত, মদ খেত, চুরি-ডাকাতি-পরগৃহদাহ করত এবং কুৎসিত গালিগালাজ করত।<sup>৪৮</sup>

সে যুগের খাণ্ডের মধ্যে প্রধান ছিল নারকেল, সন্দেশ, মেওয়া, কীর, কর্কটিকা ফল, আখ, দই, দুধ, ঘী, সর, ননী, মৃগ, কলা, চিঁড়া, চালভাজা, লাফরা, পিঠাপানা, ছানাবড়া, তৈতুল পাতার অম্বল, নানা ধরনের শাক—যথা অচ্যুত, পটোল, বাহুর, কাল, শালিঞ্চ, হিলঞ্চ প্রভৃতি।<sup>৪৯</sup> বৈষ্ণবদের অন্নের উপরে তুলসী-মঞ্জরী দেওয়া হত।<sup>৫০</sup> গরীবেরা খোলায় ভাত খেত ও পিতলের বাটি ব্যবহার করত।<sup>৫১</sup> যারা খোলা বিক্রী করত, তারা থোড়, কলা এবং মূলাও বেচত।<sup>৫২</sup> সেযুগে পান খাওয়ার বেশ চলন ছিল। সেযুগে লোকে আমলক দিয়ে কেশ-সংস্কার করত।<sup>৫৩</sup> কেবল নারীরা নয়, পুরুষেরাও নানারকম অলঙ্কার পরতেন, যেমন—অঙ্গদবলয়, আংটি, নুপুর, কুণ্ডল ; এইসব গয়না সোনায়ে তৈরি হত, তার সঙ্গে সময় সময় রূপাও থাকত এবং মরকত, প্রবাল, মুক্তা, বিড়ালাক প্রভৃতি রত্নও গয়নায় ব্যবহৃত হত।<sup>৫৪</sup>

নারীরা অন্তঃপুরচারিণী ছিলেন, তবে চৈতন্যদেব ও শ্রীবাসের স্ত্রীরা তাঁদের কোন কোন বন্ধু বা ভক্তের সামনে বার হতেন।<sup>৫৫</sup> দিনের বেলায় সাধারণত স্বামী ও স্ত্রীর মধ্যে দেখা হত না। এইজন্য চৈতন্যদেব পূর্ববঙ্গ থেকে বাড়ীতে ফিরে লক্ষ্মীকে না দেখেও বুঝতে পারেননি যে তিনি মারা গিয়েছেন।<sup>৫৬</sup> সহমরণ প্রথা অবশ্যই ছিল, কিন্তু তা বাধ্যতামূলক ছিল না, জগন্নাথ মিশ্রের মৃত্যুর পরে তাঁর পত্নী শচী দেবী সংযত হন নি।

খাওয়া-দাওয়ার ব্যাপারে সে যুগের হিন্দুদের মধ্যে প্রবল বাছবিচার ছিল। ব্রাহ্মণেরা অন্ন জাতির লোকদের হাতে তো খেতেনই না, অনাখ্যায় ও অপরিচিত ব্রাহ্মণদের রান্নাও খেতেন না। কারও বাড়ীতে অতিথি এলে তাঁকে কাঁচা ভোজ্যসামগ্রী দেওয়া হ'ত, অতিথি সেগুলি রান্না করতেন।<sup>৫৭</sup>

৪৬ ম ২ (১১১) ৪৭ ম ১০ (১৪৫) ৪৮ ম ১৩ (১৬৬) ৪৯ ম ৮, ম ৮, অ৪, অ৮, অ১০ (১৪৪, ১৪৭, ২২০, ২২৫, ৩২৫, ৩৩২) ৫০ অ ৪ (২২০) ৫১ ম ৯ (১৪২) ও ম ১১ (১৬১) ৫২ ম ৯ (১৪২) ৫৩ ম ২৫ (২৩৮) ৫৪ অ ৫, অ ৮ (১০৬, ৩১০, ৩২৩) ৫৫ ম ১১ (১৬১-১৬৩) ৫৬ অ ১০ (৭২) ৫৭ অ ৩ (২২-২৩)

সে যুগে লোকদের জীবনযাত্রা ছিল স্বচ্ছল। সকলেই ভাবত, যে দোলা-ঘোড়া চড়ে, দশ-বিশ জন লোক ষার আগে-পিছে নড়ে—সে-ই স্বকৃতী।<sup>৫৮</sup> ছেলে-মেয়েদের বিবাহ এবং অন্ত্যস্ত উৎসবে লোকে বহু অর্থ ব্যয় করত।<sup>৫৯</sup> তবে দেশে মাঝে মাঝে দুর্ভিক্ষও হত।<sup>৬০</sup> ধানের দর পাছে বাড়়ে, এই ভয়ে লোকে আতঙ্কিত হয়ে থাকত।<sup>৬১</sup> দেশে অনেকেই জুয়া খেলত।<sup>৬২</sup> চোর ও ডাকাতের সংখ্যা বড় অল্প ছিল না। ছোট ছেলের গায়ে অলঙ্কার থাকলে চোরে তাকে অনেক সময় নিয়ে যেত।<sup>৬৩</sup> ডাকাতদের মধ্যে নানাজাতির লোক থাকত, অনেক সময় ব্রাহ্মণের ছেলেরাও ডাকাতদের সর্দার হত।<sup>৬৪</sup>

সে যুগে লোকদের বাড়িতে শৌচাগারের পাট ছিল না, প্রয়োজনমত বাড়ির বাইরে গিয়ে তারা মলমূত্র ত্যাগ করত।<sup>৬৫</sup>

সে যুগে আয়ুর্বেদ ও টোটকা মতে লোকের চিকিৎসা হ'ত। কারও বায়ুরোগ হলে মাখায় বিষ্ণুতৈল, নারায়ণতৈল ও আরও সব স্নগন্ধি পাক-তৈল দেওয়া হত, শুধু তাই নয়, তাকে তৈলদ্রোণে (তেলে-ভর্তি বিরাট পাত্রে) রাখা হত।<sup>৬৬</sup> অনেক সময় বায়ুরোগগ্রস্ত ব্যক্তিকে বেঁধেও রাখা হত, তাকে খেতে দেওয়া হত ডাবের জল; বায়ুর প্রবেশ বেনী হলে শিষ্যত প্রয়োগ করা হত।<sup>৬৭</sup> কফ-রোগের শুধু ছিল পিপ্পলিখণ্ড।<sup>৬৮</sup>

সে যুগে যে সব ফুলের সমাদর ছিল, তার মধ্যে প্রধান—জ্বরী, কদম্ব ও দমনক (দনা)।<sup>৬৯</sup> লোকেরা জলে সাঁতার কাটতে খুব ভালবাসত। বাংলাদেশে 'কয়া' নামে এক ধরনের জলক্রীড়া প্রচলিত ছিল, তাতে লোকেরা জলে নেমে 'কয়া' 'কয়া' বলে হাততালি দিয়ে জলে বাচ্চ বাজাত।<sup>৭০</sup>

তখনকার কালে বাংলাদেশের বিভিন্ন অঞ্চলের সরকারী বিভাগ বাই থাকুক না কেন, লোকেরা নিজেদের ধারণা অনুযায়ী একটা বিভাগ করে নিয়েছিল। কাটোয়ার কিছু পশ্চিমে অবস্থিত বিশাল ভূগুণকে তারা রাঢ় বলত।<sup>৭১</sup> নবদ্বীপ ও তৎসম্বন্ধিত অংশকে বলত আধুয়া-মুলুক এবং তার দক্ষিণের অংশকে বলত সপ্তগ্রাম-মুলুক। আরও দক্ষিণের অংশকে বলত

৫৮ আ ৫ (৩০) ৫৯ স ২২ (২১১) ৬০ স ৮ (১৪৩) ৬১ আ ১১ (৮৬) ৬২ অ ৩ (২৭৬) ৬৩ আ ৩ (২০) ৬৪ অ ৫ (৩১১) ৬৫ আ ৫ (৩৪) ৬৬ আ ৮ (৫৬) ৬৭ স ২ (১০৭) ৬৮ স ২৫ (২৩৬) ৬৯ অ ৫ (৩০৪) ৭০ অ ৯ (৩২৯) ৭১ অ ১ (২৪৭)



“দক্ষিণ রাজ্য”।<sup>১২</sup> পূর্ববঙ্গকে বলা হত ‘বঙ্গদেশ’। তবে ‘ত্রিষ্ট’ ও ‘চাটিগ্রাম’ (চট্টগ্রাম)—এই দু’টি অঞ্চলকে স্বতন্ত্রভাবেই চিহ্নিত করা হত।<sup>১৩</sup>

বঙ্গেশ্বর ও বৈষ্ণবনাথধাম তখনও প্রসিদ্ধ তীর্থ ছিল।<sup>১৪</sup>

বাংলা-উড়িষ্যার (এবং স্বতই অগ্ন্যাগ্ন্য রাজ্যেরও) মাঝখানের সীমানার দানী (tax-collector) রা থাকত, দান (tax) না দিলে এরা লোকদের এক রাজ্য থেকে অগ্ন্য রাজ্যে যেতে দিত না।<sup>১৫</sup>

### অগ্ন্যাগ্ন্য চরিতকারের বিবরণ

বৃন্দাবনদাসের ‘চৈতন্যভাগবত’ ভিন্ন কৃষ্ণদাস কবিরাজের ‘চৈতন্যচরিতামৃত’, জয়ানন্দের ‘চৈতন্যমঙ্গল’ এবং অগ্ন্য কোন কোন চরিতগ্রন্থেও “চৈতন্যদেবের সমসাময়িক কাল” সম্বন্ধে সংবাদ পাওয়া যায়। কিন্তু এই সংবাদগুলি বৃন্দাবনদাস-প্রদত্ত সংবাদের মত ব্যাপকও নয়, ততটা নির্ভরযোগ্যও নয়। নির্ভরযোগ্য না হবার কারণ, এই বইগুলি আমাদের আলোচ্য যুগ অতিক্রান্ত হবার পরে লেখা, সুতরাং এদের লেখকেরা চৈতন্যদেবের সমসাময়িক কাল সম্বন্ধে বলতে গিয়ে স্থানে স্থানে নিজেদের সময়েরই কথা বলেছেন, এ রকম সন্দেহ করা যেতে পারে। যা হোক, জয়ানন্দ ও কৃষ্ণদাস কবিরাজের দেওয়া সংবাদগুলির মধ্যে যেগুলি আলোচ্য যুগ সম্বন্ধে প্রযোজ্য বলে মনে হয়, আমরা নীচে সেগুলি উল্লেখ করলাম।

জয়ানন্দের ‘চৈতন্যমঙ্গল’ (রচনাকাল ১৫৪৮ থেকে ১৫৬০ খ্রীঃর মধ্যে) থেকে জানা যায় যে, বাংলার মুসলমান রাজা কখনও কখনও হিন্দুদের উপর অত্যাচার করতেন;<sup>১</sup> রাজার লোকরা কখনও কখনও হিন্দু শিশুদের চুরি করে নিয়ে যেত;<sup>২</sup> ব্রাহ্মণ ও মুসলমানের মধ্যে চিরন্তন বিবাদ ছিল;<sup>৩</sup> কিন্তু অনেক হিন্দু (এমন কি ব্রাহ্মণও) দাড়ি রাখত, ফারসী পড়ত, মসনবী আবৃত্তি করত; কোন কোন হিন্দু দেবালয় খুলে তার প্রণামী-লজ্জা অর্থে জীবিকা নির্বাহ করত।<sup>৪</sup>

কৃষ্ণদাস কবিরাজের ‘চৈতন্যচরিতামৃত’ (রচনাকাল ১৬১২ খ্রীঃ )

১২ অ ২ (২৫৬) ১৩ অ ২ (১০) ১৪ অ ৬ (৪৩) ১৫ অ ২ (২৮)

১ বঙ্গীয়-সাহিত্য-পরিষৎ সংস্করণ, পৃ: ১১-১২ ২ ঐ, পৃ: ১২-২০ ৩ ঐ, পৃ: ১১ ৪ ঐ, পৃ: ১৩৯ ও পৃ: ১১

থেকে জানা যায় যে, সে যুগে হিন্দু ও মুসলমানের মধ্যে সাধারণভাবে বিরোধ থাকলেও উভয় সম্প্রদায়ের মধ্যে মিলনের সূচনা দেখা দিয়েছিল, দুই সম্প্রদায়ের লোকদের ভিতর গ্রাম-সম্পর্কও স্থাপিত হতে শুরু হয়েছিল।<sup>৫</sup> কোন কোন জীবিকা মুসলমানদের একচেটিয়া ছিল, যেমন দরজীর জীবিকা, ব্রাহ্মণ পণ্ডিতেরাও মুসলমান দরজীর সাহায্য নিতেন।<sup>৬</sup> জিনিসপত্রের দাম তখন খুব সস্তা ছিল, মাত্র তিন টাকা দামে একটি “বহুমূল্য” ভোটকম্বল পাওয়া যেত; <sup>৭</sup> চৈতন্যদেব ও তাঁর সঙ্গীদের অনেক ভক্ত নিমন্ত্রণ করে খাওয়াতেন, এই গোটা দলকে একবার খাওয়াতে মাত্র চার পণ কড়ি খরচ হত।<sup>৮</sup>

কৃষ্ণদাস কবিরাজের ‘চৈতন্যচরিতামৃত’ে সে যুগের খাদ্যদ্রব্যের বিস্তৃত তালিকা পাওয়া যায়। অবশ্য এগুলি বৈষ্ণবের খাদ্যদ্রব্য, স্তবরাং নিরাশ্রম। নানাদ্রব্যের শাক, নিম-সুকুতার ঝোল, মরিচের ঝাল, ছানাবড়া, বড়ী, দুগ্ধতুষী, দুগ্ধকুম্ভাণ্ড, বেসারি, লাফরা, মোচাভাজা, বুদ্ধ কুম্ভাণ্ডবড়ীর ব্যঞ্জন, ফুলবড়ী, নব নিষপত্রসমেত ভুট্ট বার্তাকী (বেগুনভাজা), পটোলভাজা, মানচাকী, ভুট্ট মাষ, মুদগা সূপ (মুগের ডাল), মধুরাস্ন, (মিষ্টি ও টকের অম্বল), বড়ান্ন (বড়ার অম্বল), মুদগাবড়া, মাষবড়া, কলাবড়া, ক্ষীরপুলী, নারকেলপুলী, কাকিাবড়া, দুগ্ধললকী, দুগ্ধচিঁড়া, নানা ধরনের পিঠা, স্নাতসিক্ত পরমান্ন, চাঁপাকলা, ঘন দুধ, আম-কাঁঠাল ও নানাদ্রব্যের ফলমূল, দই, সন্দেশ, অমৃতগুটিকা(?), পিঠাপানা—এইগুলি ছিল বৈষ্ণবদের বিশিষ্ট খাদ্য।<sup>৯</sup> দীর্ঘ পথ পাড়ি দেবার সময় অথবা দূরদেশে অবস্থিত প্রিয়জনদের উপহার দেবার জন্য লোকে এমন সব খাদ্যদ্রব্য নিয়ে যেত, যা সহজে নষ্ট হয় না। এই সব খাদ্যদ্রব্যের মধ্যে প্রধান—আম্রকাসুন্দী, আদাকাসুন্দী, ঝালকাসুন্দী, নেমু (লেবু)-আদা, আম্র-কোলি, আমসী, আম্রখণ্ড (আমসব ?), তৈলাম্র, আমতা, পুরোনো সুকুতার গুঁড়া, ধনিয়া, মুহুরী ও চাল-গুঁড়া করে চিনি দিয়ে পাক করা নাড়ু, শুষ্কখণ্ড নাড়ু (কড়াইগুঁটি ও মিছরির নাড়ু), কোলিশুষ্কী, কোলিচূর্ণ, কোলিখণ্ড, নারকেলখণ্ড নাড়ু, চিরস্থায়ী খণ্ডবিকার (?), চিরস্থায়ী ক্ষীরসার ও মণ্ডা, অমৃতকর্পুর, শালিকাচুটি

৫ আ ১৭ (৬৫) ৬ আ ১৭ (৬৭) ৭ ম ২০ (২০৭) ৮ অ ৬ (৩০১) কৃষ্ণদাস কবিরাজ লিখেছেন, “দুই নিমন্ত্রণে লাগে কোড়ি অষ্ট পণ।” ৯ ম ১৫ (১৭২-৭৩)

ধানের আতবচিঁড়া, ঘীয়ে ভাঁজা চিঁড়া ও মুড়ি-চিনি দিয়ে পাক করা নাড়ু, ঘী মেশানো শালি-চালভাজার গুঁড়া, কর্পূর-মরিচ-এলাচ-লবঙ্গ-রসবাসের বিভিন্ন ধরনের নাড়ু, ঘীয়ে ভাজা শালি-ধানের খই, চিনি দিয়ে পাক করা কর্পূর-মেশানো উখড়া, ঘীয়ে ভাজা ফুটকলাই গুঁড়া প্রভৃতি।<sup>১০</sup>

দুর্গাপূজার সামগ্রীর মধ্যে প্রধান ছিল—জবাবুল, হলুদ, সিঁদুর, রক্ত-চন্দন ও চাল।<sup>১১</sup> বৈষ্ণবরা দুর্গাপূজা করত না। কোন বৈষ্ণবের ঘরে বা দরজার বাইরে কেউ দুর্গাপূজার সামগ্রী রেখে গেলে তাকে ঘৃণ্য অপরাধ বলে গণ্য করা হত এবং হাড়ি (মেথর) দিয়ে ঐ সব সামগ্রী ফেলে দিয়ে জল ও গোময় দিয়ে ঐ স্থান লেশানো হত।<sup>১২</sup> পক্ষান্তরে নিষ্ঠাবান শাক্তেরাও তাদের দুর্গামণ্ডপে বৈষ্ণবরা এসে উঠলে তাদের তাড়িয়ে দিত ও মাটি খুঁড়িয়ে ফেলে দিয়ে গোময় দিয়ে মন্দির-প্রাঙ্গণ পরিষ্কার করত।<sup>১৩</sup> এর থেকে বোঝা যায়, মেয়ুগে বৈষ্ণব ও শাক্তদের মধ্যে বিরোধ ছিল।

‘চৈতন্যচরিতামৃত’ থেকে জানা যায় যে, কোন বিশিষ্ট অমাত্য বাংলার সুলতানদের অঙ্গীভাজন হলে তাঁকে বন্দী করে রাখা হত। কিন্তু আশ্চর্যের বিষয়, তাঁকে “বাহকৃত্য” (শোচকার্য) করবার জন্ত বাইরে যেতে দেওয়া হত।<sup>১৪</sup> মেয়ুগে পায়খানার প্রবর্তন হয় নি মনে হয়।\*

পুৰোহিত বিবরণগুলি ছাড়া আরও কোন কোন বিবরণে আলোচ্য যুগের বাংলাদেশ সম্বন্ধে কিছু কিছু সংবাদ পাওয়া যায়। কিন্তু এগুলি হয় আলোচ্য যুগের পরে লেখা, না হয় প্রক্ষেপ-দোষে দুট (যেমন বিজয়গুপ্ত ও বিপ্রদাসের ‘মনসামঙ্গল’), না হয় বাঙালী সমাজের এক অতি ক্ষুদ্র অংশের পরিচয়দায়ক (যেমন স্মৃতিগ্রন্থ ও কুলজীগ্রন্থ)। সেইজন্ত বর্তমান অধ্যায়ে আমরা এই সূত্রগুলিকে ব্যবহার করলাম না।

১০ অ ১০ (৩১৬-১৮) ১১ আ ১৭ (৬২) ১২ আ ১৭ (৬২) ১৩ অ ৩ (২৭৭)  
১৪ ম ২০ (২০৫)

\*এই অধ্যায়ে ‘চৈতন্যভাগবত’ ও ‘চৈতন্যচরিতামৃত’ের নির্দশনী মেবার সময় প্রথমে সংক্ষেপে ‘বগু’ বা ‘লীলা’র নাম (‘আ’=আদিবগু ও আদিলীলা, ‘ম’=মধ্যবগু ও মধ্যলীলা, ‘অ’=অন্ত্যবগু ও অন্ত্যালীলা), পরে পরিচ্ছেদের সংখ্যা এবং তারপর ( ) বন্ধনীর মধ্যে পৃষ্ঠাসংখ্যা (‘চৈতন্যভাগবত’ের ক্ষেত্রে বহুমতী-সাহিত্য-মন্দির প্রকাশিত ৫ম সংস্করণের এবং ‘চৈতন্যচরিতামৃত’ের ক্ষেত্রে “বঙ্গবাসী” প্রকাশিত ৪র্থ সংস্করণের) উল্লিখিত হয়েছে।

[ এই অধ্যায়টি লেখার জন্ত নিম্নলিখিত বই ও সাময়িক পত্রগুলি ব্যবহার করেছি।

ইব্ন্ বত্তুতার বিবরণের জন্ত

The Rehla of Ibn Battūṭa—Tr. by Mahdi Husain.

চীনা বিবরণ তিনটির জন্ত

T'oung pao ( 1915, pp. 435-44 ).

Visva-Bharati Annals, Vol I ( pp. 96-134 ).

Journal of the Royal Asiatic Society of Great Britain and Ireland ( 1895, pp. 529-30 ).

নিকলো কস্তির বিবরণের জন্ত

নিকলো কস্তির ভারত-ভ্রমণ—গিরীন চক্রবর্তী কর্তৃক অনূদিত।

India in the 15th century—Edited by R. H. Major.

রায়মুকুট বৃহস্পতি মিশ্রের বিবরণের জন্ত

রাজা গণেশের আমল—স্বথময় মুখোপাধ্যায়।

সাহিত্য পরিষৎ পত্রিকা ( ১৩৩৮ বঙ্গাব্দ, পৃঃ ৬১-৬৩ )।

কুন্তিবাসের বিবরণের জন্ত

কুন্তিবাস-পরিচয়—স্বথময় মুখোপাধ্যায়।

সনাতনের বিবরণের জন্ত

ষোড়শ শতাব্দীর পদাবলী-সাহিত্য—বিমানবিহারী মজুমদার।

ডায়থেমার বিবরণের জন্ত

The travels of Ludovico di Varthema—Tr. by J. W.

Jones, ed. by G. P. Badger.

বারবোসার বিবরণের জন্ত

The book of Barbosa—ed. by Mansel Longworth Dames,

বাবরের বিবরণের জন্ত

The Bābur-namā ( Memoirs of Bābur )—Tr. by A. S.

Beveridge.

জোআঁ-দে-বারোসের বিবরণের জগ্ন

Da Asia—João De Barros ( Vol. VIII, Lisbon Edition. 1778 ).

বন্দাবনদাসের বিবরণের জগ্ন

শ্রীশ্রীচৈতন্যভাগবত—উপেন্দ্রনাথ মুখোপাধ্যায় সম্পাদিত ।

জয়ানন্দের বিবরণের জগ্ন

জয়ানন্দের চৈতন্যমঙ্গল—নগেন্দ্রনাথ বসু সম্পাদিত ।

কৃষ্ণদাস কবিরাজের বিবরণের জগ্ন

শ্রীশ্রীচৈতন্যচরিতামৃত—অতুলকৃষ্ণ গোস্বামী সম্পাদিত ।]

## স্বাধীন সুলতানদের আমলের স্মৃতিচিহ্ন

পশ্চিম বঙ্গ ও পূর্ব পাকিস্তানের নানা জায়গায় এখনও স্বাধীন সুলতানদের আমলের অনেক স্মৃতিচিহ্ন ছড়িয়ে আছে—এই আমলে নিম্নিত প্রাসাদ, মসজিদ ও অগ্ন্যস্ত্র স্থাপত্যকীর্তির ধ্বংসাবশেষের মধ্যে। নীচে এই ঐতিহাসিক স্মৃতিচিহ্নগুলির সংক্ষিপ্ত পরিচয় সমেত একটি তালিকা দেওয়া হল। (এদের স্থাপত্যকলা সম্বন্ধে বিশদ আলোচনার জন্য ডঃ আহমদ হাসান দানীর *Muslim Architecture in Bengal* গ্রন্থ দ্রষ্টব্য।)

(১) আদিনা মসজিদ (খ্রঃ পূঃ ৫৪-৫৬) — এই মসজিদের নির্মাতা ইলিয়াস শাহী বংশের দ্বিতীয় সুলতান সিকন্দর শাহ। এর নির্মাণসমাপ্তিকাল ৭৭০ হিজরা (১৪৬৯ খ্রিঃ)। বর্তমানে এর একাংশ মাত্র (পশ্চিম দিকের কতকাংশ) বর্তমান আছে। এই অংশটির বাইরে ও ভিতরে অসংখ্য চমৎকার কারুকার্য আছে। এর মধ্যে বহু হিন্দু দেবতার মূর্তিও দেখতে পাওয়া যায়। মসজিদটি অত্যন্ত বিরাট। এটি বাংলা দেশের মুসলিম স্থাপত্যকলার অগ্রতম শ্রেষ্ঠ নিদর্শন। পাণ্ডুয়া (মালদহ) থেকে এক মাইল উত্তরে এই মসজিদটি অবস্থিত।

(২) গিয়াসুদ্দীন আজম শাহের সমাধি—পূর্ব পাকিস্তানের মগরাপাড়া (ঢাকা) গ্রামে প্রাচীন সোনারগাঁওয়ের ধ্বংসাবশেষের কাছে—পাঁচ পীর দরগাহ্‌র ১০০ ফুট পূর্বে গিয়াসুদ্দীন আজম শাহের সমাধি অবস্থিত। এই সমাধি যে বাড়ীটিতে আছে, তার মধ্যে স্থাপত্যকলার সুন্দর নিদর্শন দেখতে পাওয়া যায়। এর মধ্যে আদিনা মসজিদের প্রভাব স্পষ্ট।

(৩) একলাখী ভবন—এই ভবনটি আরতনে ছোট হলেও স্থাপত্যকলার নিদর্শনের দিক দিয়ে অপূর্ব। এটি প্রায় আগাগোড়া ইঁটে তৈরী। সম্ভবত পঞ্চদশ শতাব্দীর প্রথম পাদে রাজা গণেশ এই ভবনটি তৈরী করান এবং এটি মূলে ছিল হিন্দু মন্দির (খ্রঃ পূঃ ১৪৮)। একলাখী ভবন পাণ্ডুয়ায় অবস্থিত।

(৪) চিকা মসজিদ—এই মসজিদটি গোড়ে অবস্থিত। এটি সম্ভবত রাজা গণেশের বংশধরদের আমলে নিম্নিত হয়েছিল। এর মধ্যে একলাখী

ভবনের স্থাপত্যকলার দুর্বল অঙ্ককরণ লক্ষ করা যায়। এই মসজিদের ভিতরে অনেক বাহুড় ( চিকা ) ছিল বলে আধুনিক কালে এর নাম 'চিকা' মসজিদ হয়েছে।

(৫) কোংওয়ালী দরওয়াজা—গোড় নগরীর দক্ষিণ প্রান্তে নির্মিত এই বিরাট তোরণটির ধ্বংসাবশেষ মাত্র বর্তমানে দেখতে পাওয়া যায়। মাহদীপুর গ্রামের কাছে এটি অবস্থিত। সম্ভবত নাসিরুদ্দীন মাহমুদ শাহ পঞ্চদশ শতাব্দীর মাঝামাঝি সময়ে কোংওয়ালী দরওয়াজা নির্মাণ করান।

(৬) বাইশগজী—গোড় শহরে সুলতানদের যে বিরাট ও সুরম্য প্রাসাদ ছিল, তার সবই এখন লুপ্ত হয়েছে, কেবল একটি দেওয়াল এখনও অবশিষ্ট আছে। এটিই 'বাইশগজী' নামে পরিচিত। এটি আগে বাইশ গজ উচু ছিল বলে কথিত আছে।

(৭) দাখিল দরওয়াজা—উত্তর দিক থেকে গোড়ের সুলতানদের দুর্গ ও প্রাসাদের মধ্যে প্রবেশ করার এটিই ছিল প্রধান তোরণ। এই দাখিল দরওয়াজার যে অংশ এখনও বর্তমান আছে, তা বাংলার স্থপতিদের আশ্চর্য প্রতিভার নিদর্শন বহন করেছে। এই তোরণটি যেমন বিশাল ও উচ্চ, তেমনি অপূর্ব এর কারুকার্য। এটি ইঁটে তৈরী। সম্ভবত রুকনুদ্দীন বারবক শাহের রাজত্বকালে দাখিল দরওয়াজা নির্মিত হয়।

(৯) চামকাটি মসজিদ—গোড়ের এই প্রাচীন মসজিদটির ধ্বংসাবশেষ মাত্র বর্তমানে দাঁড়িয়ে রয়েছে। এটি 'চামকাটি' নামে পরিচিত মুসলমানদের একটি সম্প্রদায়ের দ্বারা নির্মিত হয়েছিল বলে প্রবাদ আছে। কানিংহাম এই মসজিদের যে শিলালিপি পেয়েছিলেন, তার থেকে জানা যায় যে, শামসুদ্দীন যুসুফ শাহের রাজত্বকালে—৮৮০ হিজরায় ( ১৪৭৫ খ্রিঃ ) এই মসজিদটির নির্মাণ সম্পূর্ণ হয়েছিল। এই মসজিদটি ইঁটেই তৈরী, তবে এর ভিতরের অংশে কিছু পাথরের কাজ দেখতে পাওয়া যায়।

(১০) তাঁতীপাড়া মসজিদ—এই মসজিদটি গোড়ের যে অংশে অবস্থিত, সেখানে আগে তাঁতীদের পাড়া ছিল। কানিংহাম এর যে শিলালিপি পেয়েছিলেন, তার থেকে জানা যায় যে, চামকাটি মসজিদ নির্মাণের পাঁচ বছর পরে—৮৮৫ হিজরায় ( ১৪৮০ খ্রিঃ ) এই মসজিদটি নির্মিত হয়েছিল এবং এর নির্মাতার নাম মিশাঁদ খান। এই মসজিদের বিভিন্ন

অঙ্গুলি যেমন সমাপ্তিতে বিস্তৃত, তেমনি সূক্ষ্ম ও অপূর্ব এর কারুকার্য। এর অলঙ্করণে টেরা-কোটা রীতির নিদর্শন দেখা যায়। কানিংহামের মতে গোড়ের সমস্ত স্থাপত্যকীর্তির মধ্যে এটিই সবচেয়ে সুন্দর।

(১১) ধুনিচক মসজিদ—এই মসজিদও গোড়ে অবস্থিত। বর্তমানে এটি প্রায় সম্পূর্ণ বিধ্বস্ত, কিছু দেওয়াল মাত্র অবশিষ্ট আছে। সম্ভবত মাহমুদ শাহী সুলতানদের আমলে এটি নির্মিত হয়েছিল।

(১২) লোটন মসজিদ—এই মসজিদটি গোড় শহরের দক্ষিণ অংশে অবস্থিত। এটি লোটন নামে জনৈক নর্তকীর অর্থে নির্মিত হয়েছিল বলে প্রবাদ আছে। ক্রেটন ও কানিংহামের মতে এটি ৮৮০ হিজরায় (১৪৭৫ খ্রি:) নির্মিত হয়েছিল, কিন্তু ডঃ দানৌর মতে মসজিদটি হোসেন শাহী বংশের সুলতানদের আমলে তৈরী। এই মসজিদটি মিনে-করা। ইট দিয়ে তৈরী হয়েছিল বলে এর বাইরের সৌন্দর্য আগে খুব জমকালো ছিল। বর্তমানে ইটগুলির 'মিনে' উঠে গিয়েছে বলে এখন মসজিদটির সৌন্দর্যের একাংশের মাত্র আশ্বাদ পাওয়া যায়।

(১৩) দরাসবাড়ী মসজিদ—এটি গোড়ে অবস্থিত একটি জামী (শুক্রবারের উপাসনা করার) মসজিদ। সম্ভবত আগে একটি দরাসবাড়ী বা মাদ্রাসাহ্ এর সংলগ্ন ছিল। মসজিদটির অধিকাংশই বর্তমানে বিধ্বস্ত। এর ধ্বংসাবশেষের মধ্যে যে শিলালিপি পাওয়া গিয়েছে, তার থেকে জানা যায় যে, শামসুদ্দীন মুহম্মদ শাহ ৮৮৪ হিজরায় (১৪৭২ খ্রি:) মসজিদটি নির্মাণ করান।

(১৪) খনিয়া দীঘী মসজিদ—গোড়ের খনিয়া দীঘি ও বালুস দীঘির মাঝখানে এই মসজিদটি অবস্থিত। এর গঠনকৌশল অনেকটা চামকাটি মসজিদের অনুরূপ। সম্ভবত মাহমুদ শাহী সুলতানদের আমলে এটি নির্মিত হয়।

(১৫) ফিরোজ মিনার—এই লাল রঙের মিনারটি গোড়ের একটি অবশ্য-প্রাপ্ত বস্তু। এর নির্মাতা সৈফুদ্দীন ফিরোজ শাহ (খ্র: পূ: ২৫৪)। এর উচ্চতা ৮৪ ফুট এবং নীচের অংশের পরিধি ৬২ ফুট।

(১৬) বড় সোনা মসজিদ—এটি গোড়ের বৃহত্তম মসজিদ; এর আর এক নাম “বারহুমারী মসজিদ”। এই মসজিদটিতে ইট ও পাথর দুই উপকরণই



ব্যবহৃত হয়েছে—পাথরগুলির উপরে নানারকম কারুকার্য করা। মসজিদটির উপরে এগারটি গম্বুজ রয়েছে—এগুলি আগে সোনালী রঙের গিল্টি-করা ছিল। নাসিরুদ্দীন নসরৎ শাহ ২৩২ হিজরায় ( ১৫২৫-২৬ খ্রি: ) এই মসজিদটি নির্মাণ করান।

(১৭) গুণমস্ত মসজিদ—এই মসজিদটি ভাগীরথী নদীর ( গঙ্গার পুরোনো খাত ) তীরে মাহ্‌দীপুর গ্রামে—লোটন মসজিদ থেকে সামান্য দূরে তার পশ্চিম দিকে অবস্থিত। কারও কারও মতে জলালুদ্দীন ফতেহ শাহের রাজত্বকালে এটি নির্মিত হয়, আবার কেউ বেউ বলেন এটি হোসেন শাহী আমলের কীর্তি। এই মসজিদটির চার কোণের স্তম্ভ (tower)-গুলি আট-কোণা (octagonal) এবং এতে ইট ও পাথর দুই উপকরণই ব্যবহৃত হয়েছে। ইটে তৈরী অংশে চমৎকার কারুকাষপূর্ণ টেরাকোটা-শিল্প দেখা যায়। পাথরে তৈরী অংশের মধ্যেও টেরাকোটা শিল্পের নকল দেখা যায়।

(১৮) গুণটি দরওয়াজা—এটি গোড় শহরের পূর্বদিকে ঢোকবার ফটক ছিল। সম্ভবত আলাউদ্দীন হোসেন শাহের রাজত্বকালে এটি নির্মিত হয়। এর গঠন-কৌশল সুন্দর ও জমকালো—তবে একটু হালকা ধরণের।

(১৯) কদম রসূল ভবন—গোড়ে অবস্থিত এই ভবনের নির্মাণকাল সম্বন্ধে আগেই আলোচনা করা হয়েছে (দ্র: পৃ: ৪৩৩-৩৪)। এর মধ্যে আগে হজরৎ মুহম্মদের পদচিহ্ন সংবলিত একটি কালো পাথর ছিল—বর্তমানে এটি আর সেখানে নেই। এই ভবনের গঠনকৌশলে যথেষ্ট কারুকার্য থাকলেও তা হালকার দিকেই ঝুঁকিয়েছে।

(২০) ঝনঝনিয়া মসজিদ—গোড়ের এই মসজিদের মূল নাম সম্ভবত 'জহানিয়া মহজিদ'। গিয়াসুদ্দীন মাহমুদ শাহের রাজত্বকালে—২৪১ হিজরায় ( ১৫৩৪-৩৫ খ্রি: ) এটি নির্মিত হয়। এর শিল্পকলা আড়ম্বরপূর্ণ, আতিশয্য থেকে একেবারে মুক্ত নয়।

(২১) ফতেহ খানের সমাধি-ভবন—গোড়ে অবস্থিত এই ছোট ভবনটির গঠনকৌশল দোঁচালা কুঁড়েঘরের মত। এর নির্মাণকাল সম্বন্ধে পণ্ডিতদের মধ্যে বিরাট মতবৈধ আছে। কারও কারও মতে এটি রাজা গণেশের আমলে নির্মিত হয়, আবার কেউ কেউ বলেন এটি যোগল আমলের কীর্তি।

কোন কোন পণ্ডিতের মতে এই ভবনটি মূলে হিন্দু মন্দির ছিল, কিন্তু এই মত সকলে গ্রহণ করেন নি।

(২২) ছোট সোনা মসজিদ—এটি গোড় শহরের সর্বদক্ষিণ প্রান্তে—বর্তমান ফিরোজাবাদ ( পূর্ব পাকিস্তান ) গ্রামে অবস্থিত। আলাউদ্দীন হোসেন শাহের রাজত্বকালে জৈনক আলীর পুত্র ওয়ালি মুহম্মদ এই মসজিদটি নির্মাণ করিয়েছিলেন। বড় সোনা মসজিদের মত ছোট সোনা মসজিদেও সোনালী রঙের গিটির কারুকার্য ছিল, তার কিছু অংশ এখনও বর্তমান আছে। এই মসজিদের চার কোণেও চারটি আট-কোণা স্তম্ভ আছে। মসজিদটির মধ্যে কারুকার্য ও স্থাপত্যকলার উৎকর্ষের নিদর্শন মেলে। তবে হোসেন শাহী আমলের মসজিদ ও সৌধগুলির কারুকার্য সামগ্রিকভাবে পূর্ববর্তী যুগের তুলনায় নিম্নতর।

(২৩) খান জহানের সমাধি—বাগেরহাটে এই সমাধি অবস্থিত। এর নির্মাণকাল পঞ্চদশ শতাব্দীর তৃতীয় পাদ, এর স্থাপত্যকলায় দিল্লীর তোগুলক আমলের শিল্পকলার প্রভাব দেখা যায়।

(২৪) ষাট-গম্বুজ মসজিদ—বাগেরহাটে খান জহানের সমাধির তিন মাইল দক্ষিণ-পশ্চিমে এই মসজিদটি অবস্থিত। এর গঠন-কৌশল অপূর্ব। বর্তমানে পূর্ব পাকিস্তানের এইটিই বৃহত্তম মসজিদ। এর নাম “ষাট-গম্বুজ মসজিদ” হলেও এতে সাতাত্তরটি গম্বুজ আছে। এর নির্মাণকাল পঞ্চদশ শতাব্দীর মধ্যভাগ বলে মনে হয়।

(২৫) মসজিদকুর মসজিদ—খুলনা জেলার মসজিদকুর গ্রামে এই মসজিদটি অবস্থিত। এটি আয়তনে বৃহৎ। এর স্থাপত্যকলাও সুন্দর। এর নির্মাণকাল ষাট-গম্বুজ মসজিদের সমসাময়িক বলে মনে হয়।

(২৬) কসবা মসজিদ—বাথরগঞ্জ জেলার কসবা গ্রামে এই মসজিদ অবস্থিত। এর গঠনকৌশল মসজিদকুর মসজিদের অনুরূপ; নির্মাণকালও ঐ মসজিদের সমসাময়িক বলে মনে হয়।

(২৭) মসজিদবাড়ী মসজিদ—বাথরগঞ্জ জেলার মসজিদবাড়ী গ্রামে এই মসজিদ অবস্থিত। রুকনুদ্দীন বারবক শাহের রাজত্বকালে খান মুআজ্জয় উজ্জেল (?) খান ৮৭০ হিজরায় ( ১৪৬৫ খ্রিঃ ) এই মসজিদটি নির্মাণ করেন। এর গঠনকৌশল এই অঞ্চলের অন্যান্য মসজিদের তুলনায় স্বতন্ত্র ধরনের।

(২৮) সালিকুপা মসজিদ—যশোহর জেলার ঝিনাইদহ মহকুমার সালিকুপা মৌজায় এই মসজিদ অবস্থিত। নাসিরুদ্দীন নসরৎ শাহের রাজত্বকালে এটি তৈরী হয় বলে প্রসিদ্ধি আছে। এর স্থাপত্যকলায় বৈশিষ্ট্যের পরিচয় আছে, তবে আধুনিককালের সংস্কার-সাধনের ফলে সেই বৈশিষ্ট্য অনেকখানি মুছে গিয়েছে।

(২৯) বাবা আদমের মসজিদ—ঢাকা জেলার রামপাল গ্রামে এই মসজিদটি অবস্থিত। জলালুদ্দীন ফতেহ শাহের রাজত্বকালে মালিক কাফুর এটি নির্মাণ করান। এর গঠন-কৌশল মাহমুদ শাহী বংশের আমলে নিমিত গোড়ের মসজিদগুলির অনুরূপ।

(৩০) শঙ্করপাশা মসজিদ—শ্রীহট্ট জেলার শঙ্করপাশা গ্রামে এই মসজিদ অবস্থিত। সম্ভবত হোসেন শাহী আমলে এটি নিমিত হয়। এর গঠনকৌশল জমকালো, আড়ম্বরপূর্ণ অলঙ্কারগই এর প্রধান বৈশিষ্ট্য।

(৩১) বাঘা মসজিদ—রাজসাহী জেলার বাঘা গ্রামে অবস্থিত এই মসজিদটি নাসিরুদ্দীন নসরৎ শাহের রাজত্বকালে—১৩০ হিজরায় ( ১৫২৩ খ্রি:) নিমিত হয়। এটি ইটে তৈরী এবং জমকালো কারুকার্যে ভরা।

(৩২) নবগ্রাম মসজিদ—পাবনা জেলার নবগ্রামে অবস্থিত এই মসজিদটি নসরৎ শাহের রাজত্বকালে—১৩২ হিজরায় ( ১৫২৫ খ্রি:) নিমিত হয়। গঠন-কৌশল ও কারুকার্যের দিক দিয়ে লোটন মসজিদ ও গুমটি দরওয়াজার সঙ্গে এর মিল আছে।

(৩৩) শাহজাদপুর মসজিদ—পাবনা জেলার শাহজাদপুরে অবস্থিত এই চমৎকার মসজিদটি সম্ভবত পঞ্চদশ শতাব্দীতে নির্মিত হয়। এতে পনেরটি গম্বুজ আছে।

(৩৪) সুরা মসজিদ—দিনাজপুর জেলার সুরা গ্রামে অবস্থিত এই মসজিদটি সম্ভবত হোসেন শাহী বংশের আমলে নিমিত হয়েছিল। এতে ইঁট ও পাথর দুই উপকরণই ব্যবহৃত হয়েছে এবং এর নির্মাণ-কৌশল ছোট সোনা মসজিদের অনুরূপ।

এগুলি ছাড়া স্বাধীন সুলতানদের আমলের নিম্নলিখিত স্থাপত্যকীর্তি-গুলিও উল্লেখযোগ্য।

(৩৫) মোল্লা সিমলা (হুগলী) গ্রামের মসজিদ।

- (৩৬) গোপালগঞ্জ ( দিনাজপুর ) গ্রামের মসজিদ ।
- (৩৭) কালনার ( বর্ধমান ) মজলিস সাহেবের মসজিদ ।
- (৩৮) বাগেরহাটের ( খুলনা ) সালক মসজিদ ।
- (৩৯) খেণৌল গ্রামের ( মুন্সিদাবাদ ) মসজিদ ।
- (৪০) শ্রীহট্টের রুক্ন খানের মসজিদ ।
- (৪১) বড় গোয়ালি গ্রামের ( ত্রিপুরা জেলা, পূর্ব পাকিস্তান ) মসজিদ  
( নির্মাণকাল ৯০৬ হিজরা বা ১৫০০ খ্রী: ) ।

## অতিরিক্ত টীকা ও সংশোধনী

পৃঃ ১১ ছঃ ৯-১০—ডঃ আবদুল করিমের মতে ইব্ন বতুতা যে শেখ জলালুদ্দীনের সঙ্গে সাক্ষাৎ করেছিলেন, তিনি শেখ জলালুদ্দীন তব্রিজী নন, শেখ জলালুদ্দীন কুত্বাদি (Social History of the Muslims in Bengal, pp. 97-98, f. n. এবং Journal of the Pakistan Historical Society, Vol. VIII, Pt I, 1960, pp. 290-96 দ্রষ্টব্য)। কিন্তু ইব্ন বতুতা যে লোককে নিজের চোখে দেখেছিলেন, তাঁর নাম ভুলভাবে লেখা তাঁর পক্ষে আদৌ সম্ভব নয়। শেখ জলালুদ্দীন তব্রিজী একজন অতিবিখ্যাত ব্যক্তি; অত্ৰ কারণে সঙ্গে দেখা করে “শেখ জলালুদ্দীন তব্রিজীর সঙ্গে দেখা করোছ” বলা কোন প্রকৃতিস্থ লোকের পক্ষেই সম্ভব বলে মনে হয় না। ডঃ স্কুমার সেন একবার ঠিক এইরকমভাবে অহুমান করেছিলেন যে জয়ানন্দ শৈশবে গদাধর দাস বা গদাধর পণ্ডিতের দেখা পান, কিন্তু পরবর্তী জীবনে তাঁর সঙ্গে চৈতন্যদেবের গোপমাল করে ফেলে তিনি চৈতন্যমঙ্গলে লেখেন যে শৈশবে তিনি চৈতন্যদেবের দর্শন পেয়েছিলেন (বা. সা. ই. ১২, পৃঃ ২৬২); আরো ডঃ সেনের এই উক্তির তীত্র সমালোচনা করি (প্রাচীন বাংলা সাহিত্যের কালক্রম, পৃঃ ৩১২-৩২০); তাঁর পরে ডঃ সেন ঐ উক্তি প্রত্যাহার করেন (বা. সা. ই. ১৩, পূর্বার্ধ, পৃঃ ৩৬৪)।

ডঃ আবদুল করিম লিখেছেন, “Ibn Baṭṭūṭah’s reference to Shaykh Jalāl Tabrizī in Kamrup is a mistake for Shaykh Jalāl Kunyāī, as he committed in many other cases in connection with Bengal.” কিন্তু ইব্ন বতুতার বাংলাদেশ সন্ধানীয় বিবরণে যেটুকু ভুল আছে, তা প্রধানত বাংলার ইতিহাস ও ভূগোল সংক্রান্ত। কোন দেশের ঐতিহাসিক ও ভৌগোলিক বিবরণ সংগ্রহ করার সময় এবং দীর্ঘকাল পরে তা লিপিবদ্ধ করার সময় ভুল করা কারণে পক্ষেই বিচিত্র নয়, কিন্তু কেউ যখন বলে যে সে নিজে একজন বিশিষ্ট লোককে দেখেছে, তখন তাতে তাঁর ভুল হবার কথা কল্পনা করা যায় না। দীনেশচন্দ্র সেনের বইগুলিতে ইতিহাসঘটিত ভুলের বহু নিদর্শন মেলে, কিন্তু তাই বলে

দীনেশচন্দ্র সেন যেখানে লিখেছেন যে তিনি বক্ষিচন্দ্রকে দেখেছিলেন, সেখানে তাঁর উক্তিকে কেউ অবিশ্বাস করবে না। অতএব ইব্ন বতুতা যে শেখ জলালুদ্দীন তব্রিজীকে দেখেছিলেন, তাতে সন্দেহের কোন কারণই নেই।

ইব্ন বতুতা যে শেখ জলালুদ্দীন তব্রিজীকে দর্শন করেছিলেন, তা মনে করার আর একটি কারণ, তিনি এই শেখ সম্বন্ধে যে সমস্ত উক্ত করেছেন, তাদের সমর্থন অল্প বহু সূত্র থেকে পাওয়া যায়।

ইব্ন বতুতা ৭৪৭ হিজরা বা ১৩৪৬ খ্রীষ্টাব্দে বাংলাদেশে এসেছিলেন। তিনি লিপ্যেছেন যে তার একবছর পরে অর্থাৎ ১৩৪৭ খ্রীষ্টাব্দে শেখ জলালুদ্দীন তব্রিজী ১৫০ বছর বয়সে পরলোকগমন করেন; তাহলে ইব্ন বতুতার উক্তি অনুসারে শেখ জলালের জন্মদাণ হচ্ছে ১১৯৭ খ্রীঃ (চান্দ্র বৎসর ধরলে ৫৮৮ হিজরা বা ১২০২ খ্রীষ্টাব্দ হয়)। শেখ কুৎবুদ্দীন বখ্তিয়ার কাকীর (জয়োদশ শতাব্দির প্রথম দিকের লোক এবং শেখ জলালুদ্দীন তব্রিজীর বন্ধু) বাণীর সংগ্রহ-গ্রন্থ ‘ফওয়াইদ অল-সালকীন’ ও সূফীদের অল্প জীবনীগ্রন্থগুলি থেকে প্রামাণিকভাবে জানা যায় যে শেখ জলালুদ্দীন তব্রিজী তাত্রজ শহরে জন্মগ্রহণ করেন এবং দু’জন গুরুর কাছে শিক্ষা লাভ করার পরে দিল্লীতে আসেন, তখন শামসুদ্দীন ইলতুৎমিশ (১২১০-১২৩৬ খ্রীঃ) দিল্লীর সুলতান।

ডঃ আবদুল করিম মনে করেছেন যে ১১৯৭ খ্রীষ্টাব্দে জন্মগ্রহণ করে যদি শেখ জলালুদ্দীন তব্রিজী ইলতুৎমিশের রাজত্বকালে দিল্লীতে আসেন, তা “...means that he was a mere boy when he came to Dehli, though the sources at our disposal assert that he already served two of his teachers.” কিন্তু ইলতুৎমিশ ১২৩৬ খ্রীঃ পর্যন্ত রাজত্ব করেন। ১১৯৭ খ্রীষ্টাব্দে জন্মগ্রহণ করলে শেখ জলালুদ্দীন তব্রিজীর ১২৩৬ খ্রীষ্টাব্দে বয়স হয় ৩৯ বছর। ঐ বছরে কেন, তার ১৫ বছর আগেও জলালুদ্দীন দুই গুরুর কাছে শিক্ষালাভ সম্পূর্ণ করে দিল্লীতে আসতে পারেন।

অতএব দ্বাদশ শতকের শেষ দিকেই যে শেখ জলালুদ্দীন তব্রিজীর জন্ম হয়েছিল, তাতে কোন সন্দেহ নেই। এখানে ইব্ন বতুতার উক্তির সমর্থন পাওয়া যাচ্ছে। অপরদিকে বুকাননের বিবরণীতে লেখা আছে যে শেখ জলালুদ্দীন তব্রিজী আলীউদ্দীন আলী শাহের রাজত্বকালেও অর্থাৎ ৭৪২-৭৪৩

হিজরায় ( ১৩৪১-১৩৪২ খ্রীঃ ) জীবিত ছিলেন এবং আলাউদ্দীন আলী শাহ তাঁকে সশরীরে প্রত্যক্ষ করেছিলেন ; সুতরাং এখানেও ইব্ন বতুতার উক্তির সমর্থন পাওয়া যাচ্ছে ।

মোটের উপর, ইব্ন বতুতা যে শেখ জলালুদ্দীন তব্রিজীর সঙ্গে সাক্ষাৎ করেছিলেন, তা শুধু তাঁর নিজের উক্তি থেকে নয়, পূর্বোক্ত বিভিন্ন সূত্রের সাক্ষ্য থেকেও প্রমাণিত হয় ।

ডঃ আবদুল করিম ইব্ন বতুতার উক্তির বিরুদ্ধে প্রমাণস্বরূপ আবুল ফজল ও ফিরিশতার উক্তির উল্লেখ করেছেন । সেই সঙ্গে তিনি লিখেছেন, "According to Khazinat al-Aṣfiyā he died in 642/A. D. 1244, while according to Tadhkirat-i Awliyā-i-Hind, an Urdu biography of the saints, he died in 622/A. D. 1225". কিন্তু ইব্ন বতুতার প্রত্যক্ষদৃষ্ট ব্যক্তি সম্বন্ধে ইব্ন বতুতার উক্তির বিরুদ্ধে ষোড়শ শতাব্দীর শেষ দিকে রচিত 'আইন-ই-আকবরী', সপ্তদশ শতাব্দীর প্রথম দিকে রচিত 'তারিখ-ই-ফিরিশতা', অষ্টাদশ শতাব্দীতে রচিত 'খজীনৎ অল-আশফিয়া' এবং ঊনবিংশ শতাব্দীতে রচিত 'তজকিরত-ই-আউলিয়া-ই-হিন্দ'-এর উক্তির কোনই মূল্য নেই । ডঃ করিম দেখিয়েছেন যে নাসিরুদ্দীন নসরৎ শাহের রাজত্বকালে—১৩৪৪ হিজরা বা ১৫২৮ খ্রীষ্টাব্দে উৎকীর্ণ দেওতলার শিলালিপিতে দেওতলাকে "শেখ জলাল মুহম্মদ তব্রিজীর শহর" বলা হয়েছে । কিন্তু এই শিলালিপি ইব্ন বতুতার বাংলাদেশে আগমনের দেড়শো বছরেরও বেশী পরে উৎকীর্ণ । অতএব আলোচ্য বিষয়ে ইব্ন বতুতার উক্তির তুলনায় তার উক্তি বেশী গুরুত্ব লাভ করতে পারে না । ডঃ আহমদ হাসান দানী দেখিয়েছেন যে আশরফ সিম্নানীর একটি চিঠিতে "জলালিয়া দরবেশ"দের দেওতলাতে সমাধিস্থ হওয়ার কথা লেখা আছে । কিন্তু এই চিঠিও শেখ জলালুদ্দীনের সমসাময়িক নয় । অবশ্য এরকম হওয়া মোটেই অসম্ভব নয় যে শেখ জলালুদ্দীন তব্রিজী অনেকদিন দেওতলাতে বাস করেছিলেন এবং তাঁর বহু শিষ্য-প্রশিষ্য সেখানেই সমাধিস্থ হয়েছিলেন ; তা' যদি হয়, তাহলে পূর্বোক্ত দেওতলা শিলালিপি এবং আশরফ সিম্নানীর এই চিঠির উক্তির মধ্যে যথার্থ্য খুঁজে পাওয়া যায় ।

ইব্ন বতুতা লিখেছেন যে শেখ জলালুদ্দীন তব্রিজী কামরূপ পর্বতেই

পরলোকগমন করেছিলেন ও সেখানেই সমাধিস্থ হয়েছিলেন। এ কথার যথার্থ্য সন্দেহ সংশয়ের কোন অবকাশ নেই। কিন্তু বহু জায়গাতেই শেখ জল লুদীন তব্রিজীর সমাধি দেখতে পাওয়া যায়। অধ্যাপক মাহ্‌দী হোসেন এ সন্দেহ যথার্থই লিখেছেন, “.. great saints and martyrs about whom contemporary history is silent have given rise to popular stories, and monuments have been raised in their honour sometimes in the shape of replica tombs bearing identical names”.

এখন এই প্রসঙ্গের সঙ্গে সংশ্লিষ্ট আর একটি বিষয়ের মীমাংসা করতে হবে। চতুর্দশ শতাব্দীর প্রথম পাদে সুলতান শাহজুদীন ফিরোজ শাহের রাষ্ট্রকালে বাংলার মুসলিম রাজশক্তি সর্বপ্রথম শ্রীহট্ট জয় করে। প্রাচীন প্রবাদ ও ‘সুইল-ই-য়মন’ নামক অর্বাচীন গ্রন্থের মতে শাহ জলাল নামে একজন দরবেশ মুসলমানদের শ্রীহট্ট-বিজয়ের অভিযানে নেতৃত্ব করেছিলেন। এখন প্রশ্ন হচ্ছে এই শাহ জলাল কে? অনেকে মনে করেন জলালুদীন তব্রিজী। আমরাও এই বইয়ের প্রথম সংস্করণে এই ধারণাই ব্যক্ত করেছিলাম। কিন্তু শ্রীহট্টের শাহ জলালের দরগায় আলাউদ্দীন হোসেন শাহের ৯৮ হিজরায় ( ১৫১২ খ্রিঃ ) উৎকীর্ণ যে শিলালিপি পাওয়া গিয়েছে, তাতে লেখা আছে “মুহম্মদের পুত্র শেখ জলাল মুজাররদের দরায় সিকন্দর খান গাজী” প্রথম শ্রীহট্ট জয় করেছিলেন। এই দরগায় প্রাপ্ত ৯১১ হিজরায় উৎকীর্ণ আর একটি শিলালিপিতে এই শেখকে “শেখ জলাল মুজাররদ কুতাদে ( কুতার অধিবাসী )” বলা হয়েছে। গউনী নামে একজন গ্রন্থকার ১৬১৩ খ্রীষ্টাব্দে ‘গুলজার-ই-আত্রার’ নামে একটি বই লেখেন; এই বইয়ে তিনি শ্রীহট্ট-বিজেতা সৈন্যদের অগ্রতম ও শেখ জলালের অগ্রতম নুরুল হুদার বংশধর শেখ আলী শেরের ‘শব্দ-ই-নজ্‌হল্-উল্-আবুওয়াহ্’ অবলম্বনে লিখেছেন যে, শেখ জলালুদীন মুজাররদের বাড়ী ছিল তুর্কীস্থানে এবং তিনি তাঁর গুরুদেবের দেওয়া কয়েক শত সৈন্য নিয়ে শ্রীহট্ট ( সিরহট ) জয় করেছিলেন ( J. A. S. P., 1957, Vol. II, pp. 61-66 খ্রিঃ )। যদিও এইসব শিলালিপি ও বই মুসলমানদের শ্রীহট্ট-বিজয়ের সমসাময়িক কালে রচিত নয় এবং এদের পরম্পরের উক্তির মধ্যে সম্পূর্ণ



ঐক্য নেই, তাহলেও এদের সাক্ষ্যকে একেবারে উড়িয়ে দেওয়া যায় না। সুতরাং এদের উক্তির উপর নির্ভর করে আপাতত সিদ্ধান্ত করছি যে, শ্রীহট্ট-বিজয়ের সঙ্গে যে শাহ জলালের নাম জড়িত, তিনি শেখ জলালুদ্দীন তব্রিজীর থেকে স্বতন্ত্র ব্যক্তি—শেখ জলালুদ্দীন কুত্বাঈ। এই শাহ জলাল যদি সত্যিই শ্রীহট্ট অভিযানে সক্রিয় অংশ গ্রহণ করে থাকেন, তাহলে তিনি শেখ জলালুদ্দীন তব্রিজীর সঙ্গে অভিন্ন হতে পারেন না, কারণ শামসুদ্দীন ফিরোজ শাহের রাজত্বকালে শেখ জলালুদ্দীন তব্রিজীর বয়স ১০০ বছরের বেশী হয়েছিল।

কিন্তু আমাদের এই নতুন সিদ্ধান্ত দ্বারা ডঃ আবদুল করিমের সিদ্ধান্ত (অর্থাৎ ইব্ন বতুতা শেখ জলালুদ্দীন তব্রিজীকে দেখেন নি, শেখ জলালুদ্দীন কুত্বাঈকে দেখেছিলেন) মোটেই সমর্থিত হয় না। কারণ, ইব্ন বতুতা একথা কোথাও বলেন নি যে, তিনি যে শেখ জলালুদ্দীনের দর্শন পেয়েছিলেন, তিনি শ্রীহট্ট বিজয়ের সঙ্গে সংশ্লিষ্ট ছিলেন। ইব্ন বতুতা যে জায়গায় শেখ জলালুদ্দীনকে দেখেছিলেন, তা শ্রীহট্ট নয়—কামরুপের পর্বতমালা। শেখ জলালুদ্দীন কুত্বাঈ চতুর্দশ শতাব্দীর প্রথম পাদে শ্রীহট্ট-বিজয়ে প্রত্যক্ষ বা পরোক্ষ অংশ গ্রহণ করার পরেও যে আরও ৩০।৫০ বছর বেঁচে থেকে ১৩৪৬ খ্রীষ্টাব্দে ইব্ন বতুতাকে দর্শন দিয়েছিলেন, এ কথা ভাবার অঙ্কুলে কোন প্রমাণ নেই; শেখ জলালুদ্দীন তব্রিজীর মত পরমাযু তো আর সবাই পায় না। শেখ জলালুদ্দীন তব্রিজী যে বাংলায় এসেছিলেন, এ কথা তাঁর সব জীবনীগ্রন্থে পাওয়া যায়। বাংলার পাণ্ডুয়া, দেওতলা প্রভৃতি স্থানে অনেক দিন বাস করার পরে তিনি কামরুপের পর্বতমালায় চলে যান এবং সেখানেই শেষ জীবন অতিবাহিত করে পরলোক-গমন করেন—এতে সন্দেহের কোন কারণ নেই। মোটের উপর, ইব্ন বতুতার উক্তির সঙ্গে ‘ফওয়াইদ-এল-সালবীন’ ও সুফী দরবেশদের অসংখ্য জীবনীগ্রন্থ এবং বুকাননের বিবরণের উক্ত মিলিয়ে দেখলে পরিষ্কার বোঝা যায় যে, ইব্ন বতুতা শেখ জলালুদ্দীন তব্রিজীরই দর্শন পেয়েছিলেন।

পৃঃ ৯৭ ছঃ ১৫-১৬—‘আইন-ই-আকবরী’তে লেখা আছে, “সেই দেশের (বাংলার) অধিবাসী কান্সি নামে একজন হিন্দু কৌশলের জোরে তাঁর (গিয়াসুদ্দীনের) পৌত্র শামসুদ্দীনের (অর্থাৎ গিয়াসুদ্দীন বাহাজিদ শাহের)

উপর প্রাধান্য বিস্তার করেছিলেন।” (“কান্সি নাম বুমি অভ্ হীলা আন্দোজি রব্ শামসুদ্দীন নবিরে উ চিরা দস্তি যফ্.”) “রিয়াজ উন্-সলাতীন”-এ লেখা আছে, “ঐ সময়ে (শিহাবুদ্দীনের রাজত্বকালে) কান্স অত্যন্ত ক্ষমতাশালী হয়ে উঠেছিলেন।”

পৃ: ১০২ ছ: ২২-২৮—তবকাৎ-ই-আকবরী, আইন-ই-আকবরী, মাসির-ই-রহিমী, তারিখ-ই-ফিরিশ্তা প্রভৃতি বইতে বাংলার স্বাধীন সুলতানদের যে বিবরণ পাওয়া যায়, তা সংক্ষিপ্ত ও ভ্রমপ্রমাদপূর্ণ। ‘রিয়াজ-উন্-সলাতীন’ ও বুকাননের বিবরণী এদের তুলনায় পরবর্তী কালে রচিত হলেও এই দুটি সূত্রের সাক্ষ্য এদের তুলনায় বেশী নির্ভরযোগ্য। ‘রিয়াজ’-রচয়িতা কতকগুলি অধুনালুপ্ত নির্ভরযোগ্য সূত্র ব্যবহার করে বহু অকৃত্রিম তথ্য সংগ্রহ করেছিলেন। এখানে এইরকম একটি তথ্যের উল্লেখ করছি। ‘রিয়াজ’-এ লেখা আছে যে মুসলমান দরবেশদের উপর রাজা গণেশের অত্যাচারের ফলে নূর কুৎব্, আলাম ক্ষুদ্র হয়ে জোনপুরের সুলতান ইব্রাহিম শকীকে চিঠি লিখলেন, এই ইব্রাহিম শকী “ঐ সময়ে বিহারের সীমা পর্যন্ত শাসন করতেন।” ইব্রাহিম শকী যে রাজা গণেশের সমসাময়িক নৃপতি ছিলেন এবং বিহার পর্যন্ত তাঁর অধিকার ছিল, একথা সম্পূর্ণ সত্য। কিন্তু ‘তবকাৎ’, ‘আইন’, ‘ফিরিশ্তা’ ও ‘মাসির’-এর বিবরণ অহুসারে ইব্রাহিম শকীর সিংহাসনে আরোহণের কয়েক বছর আগেই রাজা গণেশ বা কান্স পরলোকগমন করেছিলেন। স্মরণ্য দেখা যাচ্ছে, ঐ সব বইতে যেখানে ভুল খবর দেওয়া হয়েছে, সেক্ষেত্রে ‘রিয়াজ’-এ সঠিক সংবাদ লিপিবদ্ধ হয়েছে। ‘রিয়াজ’-রচয়িতা তাঁর ব্যবহৃত নির্ভরযোগ্য সূত্রগুলির নাম প্রায় করেনই নি, অবশ্য কোথাও কোথাও তিনি “দ্বিতীয় একটি বিবরণ”, “কোন এক ক্ষুদ্র পুস্তিকা” বলে অস্পষ্টভাবে তাদের উল্লেখ করেছেন এবং উল্লেখ করে তাদের যেটুকু সাক্ষ্য উদ্ধৃত করেছেন, তা বেশীর ভাগ ক্ষেত্রেই খাঁটি। ‘রিয়াজ’-রচয়িতার ঐতিহাসিক বোধও বেশ প্রখর ছিল; ‘সুলতান আলাউদ্দীন’-এর যে ‘হোসেন শাহ’ নাম ছিল, ‘নবীব শাহ’ নামে উল্লিখিত সুলতানের প্রকৃত নাম যে ‘নসরৎ শাহ’, তা তিনি শিলালিপির সাক্ষ্য উদ্ধৃত করে প্রমাণ করেছেন। তিনি যে সব গল্প ও প্রবাদ লিপিবদ্ধ করেছেন, তাদের সূচনায় “কথিত আছে” লিখে বুঝিয়ে দিয়েছেন যে এগুলি কোন প্রামাণিক সূত্র থেকে সংগৃহীত নয়।

বুকাননের বিবরণী যে পুঁথির উপর নির্ভর করে লিখিত, সেটি খুবই মূল্যবান সূত্র ছিল, তাতে কোন সন্দেহ নেই। কারণ এই বিবরণীতে সুলতানদের নাম সবক্ষেত্রেই নির্ভুলভাবে উল্লিখিত হয়েছে; তাঁদের রাজত্বকালও যেভাবে উল্লেখ করা হয়েছে, তা প্রায় সব ক্ষেত্রেই সত্যের কাছাকাছি। পক্ষান্তরে 'তবকাং', 'ফিরিশ্তা', 'মাসির' প্রভৃতি বইতে সুলতানদের রাজত্বকাল অধিকাংশ ক্ষেত্রেই এবং নামও অনেক ক্ষেত্রে ভুলভাবে লিপিবদ্ধ হয়েছে। 'রিয়াজ-উস-সলাতীনে'র উক্তির সঙ্গে বুকাননের বিবরণীর উক্তির অনেক জায়গায় ঐক্য দেখা যায়, আবার অনৈক্যও কোন কোন ক্ষেত্রে লক্ষ করা যায়। আচার্য যদুনাথ সরকার বুকানন-বিবরণীর রাজ্য গণেশ ও তাঁর বংশ সংক্রান্ত অংশটি সম্বন্ধে লিখেছেন, "...it looks like a careless and incorrect summary of Riyaz-us-salatin", কিন্তু এই মত সমর্থন করা যায় না; কারণ বুকানন-বিবরণীর এই অংশে সৈয়দুদ্দীন, শিহাবুদ্দীন প্রভৃতি সুলতানদের নাম সম্পূর্ণ নির্ভুলভাবে ও রাজত্বকাল প্রায় সঠিকভাবে উল্লিখিত হয়েছে, যা 'রিয়াজ-উস-সলাতীনে' হয়নি। অগ্ৰাগ্র বিষয়েও দুই বিবরণীর মধ্যে পার্থক্য যথেষ্ট। কেউ কেউ মনে করেন, উনবিংশ শতাব্দীর প্রথম দিকে মুন্সী শামপ্রসাদ ফার্সী ভাষায় বাংলার মুসলমান রাজাদের যে সংক্ষিপ্ত বিবরণ লিখেছেন, সেটি এবং বুকানন-বিবরণীর আধার ফার্সী পুঁথিটি অভিন্ন। কিন্তু এই ধারণা সম্পূর্ণ ভুল, কারণ মুন্সী শামপ্রসাদ বুকাননের সমসাময়িক লোক; তাঁর লেখা ফার্সী বিবরণের পাণ্ডুলিপি India Office Libraryতে আছে, ডঃ আহমদ হাসান দানী Muslim Architecture in Bengal গ্রন্থের পরিশিষ্টে সেটিকে সম্পূর্ণভাবে প্রকাশ করেছেন। এই বিবরণী বুকানন-বিবরণী থেকে সম্পূর্ণ স্বতন্ত্র। (J. A. S. B., 1902. Pt. I, No. I, p. 44-এ মুন্সী শামপ্রসাদের বিবরণ সম্বন্ধে আলোচনাও দ্রষ্টব্য)।

ইতিহাস-রচনার প্রতি হিন্দুদের অনাসক্তি সর্বজনবিদিত। কিন্তু মুসলমানরা ইতিহাস লিখতে ভালবাসতেন। অথচ বাংলাদেশে এসে মুসলমানরাও ইতিহাস লিখতে ভুলে গিয়েছিলেন! যাহোক, 'রিয়াজ-উস-সলাতীনে' উল্লিখিত "কুহ পুস্তিকা" ও "দ্বিতীয় বিবরণ" প্রভৃতি এবং বুকানন-বিবরণীর আধার পুঁথিটি থেকে প্রমাণ হয় যে মধ্যযুগে বাংলাদেশে মুসলিম শাসনের ইতিহাস সম্বন্ধে কিছু কিছু নির্ভরযোগ্য গ্রন্থ রচিত হয়েছিল।

পৃঃ ১৫৪ ছঃ ১৬—স্টয়ার্ট তাঁর History of Bengal-এ লিখেছেন যে তিনি ভৌনপুরের সুলতান ইব্রাহিম শকীকে লেখা শাহ্‌রুখের চিঠিটি পেয়েছেন। তিনি ঐ চিঠির একটি ইংরেজী অনুবাদ দিয়েছেন (Stuart, History of Bengal, 2nd Edn., pp. 111-112 দ্রষ্টব্য)। স্টয়ার্ট লিখেছেন “...the Letter is a curious specimen of the pompous style of the East” এবং “The Letter is taken from Ferishtah” কিন্তু ‘তারিখ-ই-ফিরিশ্তা’র মুদ্রিত সংস্করণে এই চিঠিটি পাওয়া যায় না। স্টয়ার্ট হয়তো ‘তারিখ-ই-ফিরিশ্তা’র কোন পুঁথিতে এটি পেয়েছিলেন। আমরা নীচে এই চিঠির বাংলা অনুবাদ দিলাম।

“এই আদেশ (সমস্ত পৃথিবী যার অধীন এবং বিশ্ব যার বাধা) একদিনের দূর্ব্ব অতিক্রম করে পৌঁছোবামাত্র সেই দেশের সমস্ত মুসলমান বন্দীদের সমবেত করবে ও তাঁদের যার যার প্রভুর হাতে সমর্পণ করে ঐ ব্যাপারে কাজীদের স্বাক্ষরিত ও মোহরযুক্ত একটি নিদর্শন (certificate) নেবে এবং অবিলম্বে তা সম্রাটের সিংহাসনের পাদমূলে প্রেরণ করবে। নিশ্চিত জেনো, যদি তুমি একটুও দেরী কর অথবা সামান্যতম পরিমাণেও এই আদেশ উপেক্ষা কর, তাহলে আমরা আমাদের প্রসিদ্ধতম পুত্র, কাবুলের অধিপতি সুলতান মাহমুদকে এবং খোটেলান, গজনী, কান্দাহার ও গরমুসীরের শাসনকর্তাদের রাজকীয় আদেশ পাঠাব অগ্রসর হতে এবং তোমাকে এমন ভয়ঙ্কর শাস্তি দিতে, যা অস্ত্রদের কাছে উদাহরণ-স্বরূপ হয়ে থাকবে। তা যদি যথেষ্ট না হয়, তাহলে আমরা সেনাপতি ফিরোজ শাহকে খোরাসানের সৈন্ত-বাহিনী নিয়ে যুদ্ধযাত্রা করে তোমার উপর প্রতিশোধ নিতে আদেশ দেব। তাতেও যদি কাজ না হয়, আমরা আমাদের মহত্তম পুত্র সুলতান শাহসুদীনকে আদেশ পাঠাব অরহং, পিরাই, কুন্দুজ এবং বাকেলানের সৈন্তবাহিনী নিয়ে অগ্রসর হয়ে তোমাকে শাস্তি দেবার জন্ত। তাতেও যদি কোন ফল না হয়, আমরা আমাদের সাহসী এবং বিজয়ী পুত্র বয়েস্তেগুর বাহাহরকে বাবুল, সারী, মাজিনদেরান, তবারিস্তান, গরিক এবং জিলানের সৈন্তদের নিয়ে অগ্রসর হয়ে তোমাকে তোমার অপরাধ আর অযোগ্যতা সন্মুখে সচেতন করে তুলতে নির্দেশ দেব। তা সত্ত্বেও তুমি যদি তোমার অসং আচরণ চালিয়ে যেতে সমর্থ হও, তাহলে আমরা আমাদের মহান পুত্র সুলতান ইব্রাহিমকে ইরাক,

আজারবাইজান, বাগদাদ এবং আরবের নানা অঞ্চলের সৈন্তবাহিনী নিয়ে যাত্রা করে তোমার দেহ থেকে আত্মা পৃথক করে ফেলতে আদেশ দেব। তারা যদি আমাদের এই উদ্দেশ্য সিদ্ধ করতে সমর্থ না হয়, তাহলে আমাদের প্রিয়তম এবং বিজয়ী পুত্র উলুগ বেগ গুরগনকে আমাদের রাজকীয় ইচ্ছা জানিয়ে দেব, যাতে সে তুর্কীস্থানের অখারোহী সৈন্তবাহিনী নিয়ে অগ্রসর হয় এবং তোমাকে গণ্ড গণ্ড করে কেটে ফেলে অথবা তোমার দেহকে ঝুলিয়ে রাখে কাবেদের খাবার জগ্না !”

তিনটি জিনিস এখানে সাবধানে লক্ষ করতে হবে। প্রথমত, চিঠিতে বাংলাদেশের নাম কোথাও উল্লিখিত হয়নি। এই চিঠিতে যে দেশের বন্দীদের মুক্তি দেবার কথা আছে, স্টুয়ার্ট ( ) বন্ধনীর মধ্যে তাকে “Bengal” বলেছেন, কোন প্রমাণে বলেছেন, তা আমরা জানি না। দ্বিতীয়ত, চিঠিটিতে ইব্রাহিম শকীরও নাম উল্লিখিত হয়নি। তৃতীয়ত, চিঠিটিতে ইব্রাহিম যে ঐ দেশ আক্রমণ করে'ছিলেন, সে কথাও লেখা হয়নি। এই চিঠি যদি ইব্রাহিম শকীরকেই লেখা হয়, তাহলে এর থেকে শুধু এইমাত্র জানা যায় যে ইব্রাহিম ঐ দেশের অনেক বন্দীকে মুক্তি না দিয়ে আটক করে রেখেছিলেন। সুতরাং ‘মতলা-ই-সদাইনে’ শাহরুখের ইব্রাহিমকে প্রেরিত যে ফরমানের উল্লেখ আছে তা এই চিঠির সঙ্গে অভিন্ন নয়। আলোচ্য চিঠিটি যদি অকৃত্রিম হয়, এটি যদি ইব্রাহিম শকীরকেই লেখা হয় এবং এতে উল্লিখিত ঐ বিশেষ দেশটি যদি বাংলাদেশই হয়, তাহলে বলাতে হবে ইব্রাহিম শকীর বাংলাদেশের উপর আক্রমণ বন্ধ করার পরেও এদেশের বন্দীদের মুক্তি দেননি, তাই শাহরুখ দ্বিতীয়বার তাঁর উপর আদেশ জারী করে মুসলমান বন্দীদের মুক্তি দিতে বলেছিলেন এবং সেই আদেশই এই চিঠির মধ্য দিয়ে জানানো হয়েছে।

আসলে যতদূর মনে হয়, এই চিঠি আদৌ ইব্রাহিম শকীরকে লেখা নয়। কারণ চিঠিটিতে স্পষ্ট লেখা রয়েছে যে এর লেখক ও প্রাপকের মধ্যে দূরত্ব এক দিনের। কিন্তু শাহরুখের রাজধানী হীরাট থেকে ইব্রাহিমের রাজধানী জোনপুরে যেতে ঐ সময়ে কয়েক মাস লাগত।

পৃঃ ১৫৮ ছঃ ২৩-২৮—জলালুদ্দীন মুহম্মদ শাহের পরে নাসিরুদ্দীন মাহমুদ শাহ ( ১ম ), রুকনুদ্দীন বারবক শাহ, শামসুদ্দীন যুসুফ শাহ, জলালুদ্দীন ফতেহ শাহ ও আলাউদ্দীন হোসেন শাহ ‘খলীফা আব্বাহ’ উপাধি

ব্যবহার করেছিলেন। নতুন মুসলমান জলালুদ্দীনের পক্ষে এই উপাধি গ্রহণ ইসলাম ধর্মের প্রতি তাঁর অত্যধিক নিষ্ঠার পরিচয় দেয়, কিন্তু তাঁর পরবর্তী সুলতানবর্গ কর্তৃক এই পুরানো উপাধি ব্যবহার থেকে তাঁদের ধর্মনিষ্ঠা সন্শঙ্কে কোন হদিস পাওয়া যায় না।

ডঃ আবদুল করিমের মতে রুকনুদ্দীন বারবক শাহের পরে বাংলার কোন সুলতান “খলীফা আল্লাহ্” উপাধি গ্রহণ করেন নি, কারণ তাঁদের কারও মুদ্রাতেই এই উপাধি উল্লিখিত হয়নি (Corpus of the Muslim Coins of Bengal, pp. 174-176)। কিন্তু শামসুদ্দীন যুসুফ শাহ, জলালুদ্দীন ফতেহ শাহ ও আলাউদ্দীন হোসেন শাহের কয়েকটি শিলালিপিতে সুলতানদের নামের সঙ্গে “খলীফা আল্লাহ্” উপাধি যুক্ত করা হয়েছে। এ’ সন্শঙ্কে ডঃ আবদুল করিম বলেন যে এই শিলালিপিগুলি সুলতানরা স্বয়ং খোদাই করান নি, তাঁদের কর্মচারী ও প্রজারা খোদাই করিয়েছিলেন, তাঁরা চাটুকারিতা করে সুলতানদের “খলীফা আল্লাহ্” বলেছেন। কিন্তু বিভিন্ন জায়গার এতগুলি লোক এই সব সুলতানকে তোষামোদ করে “খলীফা আল্লাহ্” বলেছেন ভাবা কঠিন; আর আলাউদ্দীন হোসেন শাহের যে চারটি শিলালিপিতে তাঁর “খলীফা আল্লাহ্” উপাধির উল্লেখ আছে, তাদের মধ্যে একটি তাঁরই আদেশে ক্ষোদিত হয়েছিল (Dani, Bibliography of the Muslim Inscriptions of Bengal, pp. 49-50 দ্রষ্টব্য)। অতএব শামসুদ্দীন যুসুফ শাহ, জলালুদ্দীন ফতেহ শাহ ও আলাউদ্দীন হোসেন শাহের যে “খলীফা আল্লাহ্” উপাধি ছিল, তাতে কোন সন্দেহ নেই। মুদ্রার স্বল্পপরিমিত স্থানের মধ্যে সবগুলি উপাধি লিপিবদ্ধ করা সম্ভব নয় বলে এই সব সুলতানরা “খলীফা আল্লাহ্” উপাধিকে মুদ্রা থেকে বাদ দিয়ে তার জায়গায় অন্য উপাধি সন্নিবেশ করেছিলেন, কিন্তু শিলালিপির মধ্যে প্রচুর স্থান থাকার দরুন তাতে এই উপাধিটি তাঁরা যথাযথভাবে উল্লেখ করেছিলেন।

পৃ: ১৫৯ ছ: ১-১৪—পঞ্চদশ শতাব্দীর গ্রন্থকার অল-সখাওয়ী (১৪২৬-১৬ খ্রি:) তাঁর ‘অল-জও অল-লামে লে-অহল্ অল-করুন অল-তাসে’ নামক আরবী ভাষায় লেখা গ্রন্থে (Vol, VIII, p. 280) জলালুদ্দীন মুহম্মদ শাহ সন্শঙ্কে যা লিখেছেন, তার বাংলা অনুবাদ নীচে দিলাম। শ্রীযুক্ত কিশোরীমোহন মৈত্রেয় ইংরেজী অনুবাদ থেকে এই অনুবাদ করা হয়েছে।



সৈন্যধিপত্যমিভসৈন্ধবতুর্গশঙ্খ-

ছত্রাবলীললিতকাঞ্চনরূপ্য.....

...দান্ বহুভূষণঞ্চ

জল্লালদীননৃপতিমুদিতো গুণৌঘৈঃ ॥ ৪

যো ব্রহ্মাণ্ডং কনকতুরগশ্চন্দনং বিশ্বঃক্রং

পৃথ্বীঃ কৃষ্ণাজি [ ন ] সুরতরুন্ ধেমুণৈলোদধীংশ্চ ।

...ধিবদবনৌদেবতানামমন্দং

ভিন্দন্ দৈত্যাং সপদি দধতে ধর্ম্মস্থনোরভিগ্যাম্ ॥ ৫

জন্মাশুং জগদন্ততো গুণনিধেমুর্দ্ধ্বাভি [ যিক্তা ] স্বয়ে

দারাঃ সন্তুলিতা... তিঃ শ্রীভাস্করাঃ স্থনবঃ ।

লক্ষ্মীরন্তু তদানভোগসুভগা মন্ত্রহুম্বকীভূজা-

মিথং যশ্চ মনোরথায় কুতিনঃ কিঞ্চিন্ন কাম্যং স্থিতম্ ॥ ৬

আচাধ্য ইত্যভিমতং কবিচক্র [ বর্তী ]

.....ঐতয়মধ্যগমন্ততো যঃ ।

স শ্রীবৃহস্পতিরিমং বহুসংগ্রহার্থৈ-

নির্ম্মাতি নির্ম্মলমতিঃ স্মৃতিরত্নহারম্ ॥ ৭

এর মধ্যে চতুর্থ স্লোকে নৃপতি জলালুদ্দীন ( 'জল্লালদীন' ) কর্তৃক রায় রাজ্যধরকে সেনাপতি-পদে নিয়োগের কথা আছে ।

এই প্রসঙ্গে আর একটি মতের উল্লেখ করছি । এই মত প্রথমে প্রচার করেন ডঃ হরপ্রসাদ শাস্ত্রী, তার পরে ডঃ রাজেন্দ্রচন্দ্র হাজরা । কিন্তু এদের মত প্রচারিত হবার প্রায় সঙ্গে সঙ্গেই খণ্ডিত হয় । এরাও নীরব হন । বর্তমানে একমাত্র ডঃ আহমদ হাসান দানী ছাড়া এই মতের সমর্থক আর উল্লেখযোগ্য কেউ নেই । মতটি হচ্ছে এই যে, রায় রাজ্যধর এবং সুলতান জলালুদ্দীন মুহম্মদ শাহ অভিন্ন । কিন্তু এই মত কোনক্রমেই সমর্থন করা যায় না । কারণ উপরে উদ্ধৃত 'স্মৃতিরত্নহার'-এর পঞ্চম স্লোকে বৃহস্পতি মিশ্র বলেছেন যে রাজ্যধর ব্রহ্মাণ্ড, স্বর্ণাশ্বযুক্ত রথ, বিশ্বচক্র, পৃথ্বী, কৃষ্ণাজিন, কল্লতরু প্রভৃতি দান অমুঠান করে ভূমিদেব ব্রাহ্মণদের দৈত্য় দূর করে দিয়ে ধর্ম্মপুত্র আখ্যা লাভ করেছিলেন । নিষ্ঠাবান মুসলমান জলালুদ্দীন এই জাতীয়



দান অহুষ্ঠান করতে পারেন না। তৃতীয় ও ষষ্ঠ শ্লোকে বৃহস্পতি বলেছেন যে রাজ্যধরের পিতার নাম ছিল জগদন্ত এবং ষষ্ঠ শ্লোকে তিনি বলেছেন যে রাজ্যধরের শ্রীভাস্কর প্রভৃতি পুত্রেরা ( 'শ্রীভাস্করাঃ সুনবঃ' ) জয়গ্রহণ করেছিলেন। ষষ্ঠ শ্লোকেই বৃহস্পতি বলেছেন যে রাজ্যধর রাজাদের মন্ত্রিত্ব লাভ করেছিলেন। বলা বাহুল্য,—গণেশের পুত্র, শামসুদ্দীন আহমদ শাহের পিতা এবং সার্বভৌম নৃপতি জলালুদ্দীন সম্বন্ধে এ'সব কথা প্রযোজ্য হতে পারে না। সব চেয়ে বড় কথা, চতুর্থ শ্লোকে পরিষ্কারভাবে লেখা আছে যে জলালুদ্দীন রাজ্যধরকে সেনাপতি-পদে নিয়োগ করেছিলেন। বলা বাহুল্য, জলালুদ্দীন নিজেই নিজেকে সেনাপতি-পদে নিয়োগ করতে পারেন না।

কিন্তু অপর পক্ষও হাল ছাড়েন নি। তাঁরা বলেন—(১) পুঁথিতে যাকে 'জগদন্ত' পড়া হয়েছে, তা আসলে 'জগদন্ত' হবে ( কিন্তু পুঁথিতে পরিষ্কারভাবে 'জগদন্ত'ই লেখা আছে ; আমরা পুঁথি দেখেছি ) ; 'জগদন্ত' আবার 'গজদন্ত'র ভ্রান্ত পাঠ, আর 'গজদন্ত' অর্থে 'গণেশ' বুঝতে হবে। (২) 'শ্রীভাস্করাঃ' রাজ্যধরের পুত্রদের নাম নয়, বিশেষণ। (৩) ষষ্ঠ শ্লোকের "ম'ন্ত্রত্মকীভূজাম্" ভ্রান্ত পাঠ, তার জায়গায় "যন্ত্রিত্মকীভূজাম্" হবে। (৪) জলালুদ্দীন রাজ্যধরকে সেনাপতি-পদে নিয়োগ করেননি, বৃহস্পতিকেই সেনাপতি-পদে নিয়োগ করেছিলেন, সেই কথাই চতুর্থ শ্লোকে বলা হয়েছে। কিন্তু পুঁথির যে পাঠ পাওয়া যাচ্ছে, তার স্পষ্ট ও সঙ্গত অর্থ যখন করা যায়, তখন ঐ পাঠের পরিবর্তন করা ( জগদন্ত < জগদন্ত < গজদন্ত ধরলে দু'বার পরিবর্তন করা হয় ) জবরদস্তি ভিন্ন আর কিছুই নয়। বৃহস্পতি জলালুদ্দীনের পিতার নাম সোজাসুজি 'গণেশ' না লিখে 'গজদন্ত'ই বা লিখতে যাবেন কেন ? চতুর্থ শ্লোকের শ্রুতস্থানগুলি ব্যাকরণসম্মতভাবে যেমন করেই পূরণ করা হোক না কেন, তার থেকে কিছুতেই এমন অর্থ দাঁড় করানো যায় না যে জলালুদ্দীন বৃহস্পতি'কে সেনাপতি-পদে নিয়োগ করেছিলেন; ব্রাহ্মণ পণ্ডিতকে সেনাপতি-পদে নিয়োগ করার কল্পনার অবাস্তবতা সংক্রান্ত প্রশ্ন ছেড়েই দিলাম। অপর পক্ষ চতুর্থ শ্লোকের শ্রুতস্থানগুলি যেভাবে পূরণ করেন, তাতে শ্লোকটি মারাত্মক-ভাবে ব্যাকরণহুঁট হয়ে পড়ে। এসব ব্যাপারকে গবেষণার নামে স্বৈরাচার ছাড়া আর কিছুই বলা চলে না। রায় রাজ্যধর যে জলালুদ্দীন মুহম্মদ শাহের সঙ্গে অভিন্ন নন, সে বিষয়ে কোন সন্দেহই নেই।

সপ্তম শ্লোক থেকে জানা যায়, রায় রাজ্যধর বৃহস্পতি মিশ্রের পৃষ্ঠপোষক ছিলেন। বৃহস্পতির অন্ত কতকগুলি গ্রন্থের পুষ্পিকায় উল্লিখিত তাঁর “রাজ্যধরাচাৰ্য্য” উপাধি থেকে বোঝা যায়, রাজ্যধর বৃহস্পতির শিষ্যও ছিলেন; “মন্ত্রিত্বমুকীভুজাম্” উক্তি থেকে বোঝা যায়, রাজ্যধর অন্তত তিনজন রাজার মন্ত্রিত্ব লাভ করেছিলেন; ঐ সময়ে এ ব্যাপার মোটেই অসম্ভব ছিল না, কারণ ১৪১০ খ্রীঃ থেকে ১৪৩৭ খ্রীঃর মধ্যে ১০।১১ জন রাজা বাংলার সিংহাসনে বসেছিলেন।

পৃঃ ১৮১ ছঃ ১২-১৩—চীন সম্রাটদের প্রত্যেকের “রাজত্বের” একটি করে নির্দিষ্ট নাম থাকত। “যুং-লো” ও “চেন থুং” এই রকম “রাজত্বের” নাম। এই দুই সম্রাটের ব্যক্তিগত নাম যথাক্রমে Chu Ti এবং Chu Ch'i-chen ('Ch'-এর উচ্চারণ 'চ' ও 'ট্র'র মাঝামাঝি)।

পৃঃ ১৮৯ ছঃ ২৩—শ্রীযুক্ত কিশোরীমোহন মৈত্র মূল্য তকিয়্যার ‘বয়াজের’ সংশ্লিষ্ট অংশটির মূল ফার্সী থেকে যে ইংরেজী অনুবাদ করেছেন, তার থেকে এই বঙ্গানুবাদ করা হয়েছে। শ্রীযুক্ত মৈত্রের ইংরেজী অনুবাদটি নীচে উদ্ধৃত হল।

“Previously, Sultan Firoz Shah Tughlaq had brought Sultan Shamsuddin Haji Illyas under his domination and had annexed the territory of Tirhut in his possession, which later on became the part of the Sharqi Kingdom. But after 121 years, i. e. in the year 875, Rukn-ud-din Barbak Shah, the Sultan of Bengal, having collected Afghans in his army, which were more than locusts in number, invaded the territory of Tirhut, which was in the possession of Sultan Husain Shah Sharqi. And after a lot of warfare, he became perfectly victorious and directly came into possession of the fort of Hajipur and its suburbs, as much as formed part of the dominion of Haji Illyas. With this, he extended to the north as far as the river Budi Gandak, which was in the hands of the zeminder of Tirhut, where he appointed Kedar Rai as his Naib (Deputy) for the realisation of royal revenues and protection of frontiers. The son of the

zeminder, Bharat Singh by name, ejected the above-mentioned Rai, through his extreme folly and force, and became supreme there. As soon as Sultan Barbak Shah heard this news, he hastened to give punishment to the zeminder. But the Raja showed his submission and gave assurance of his loyalty to the king."

পৃ: ১৯৪ ছ: ১২-১৫—এই শ্লোকটি I. H. Q., 1941, p. 467-468 থেকে উদ্ধৃত। এই শ্লোকটি থেকে জানা যাচ্ছে যে, 'পদচন্দ্রিকা' ১৩৯৬ শকাব্দের জ্যৈষ্ঠ মাসের কৃষ্ণ দ্বাদশী তিথি বা ১৪৭৪ খ্রীষ্টাব্দের ১৫ই জুন তারিখে সম্পূর্ণ হয়েছিল। এই শ্লোকটি এবং এর পরবর্তী দু'টি শ্লোক—তিনটিতেই 'পদচন্দ্রিকা'র রচনাসমাপ্তির কথা আছে। দ্বিতীয় শ্লোকের শেষ চরণ 'তাবয়ে কৃতিরা তনোতু কৃতিনামানন্দবৃন্দো (দ) ২২' থেকে বোঝা যায়, শ্লোকগুলি বৃহস্পতি মিশ্রের নিজেরই রচনা। 'পদচন্দ্রিকা'র আর একটি পুঁথিতে সংক্ষেপে এর রচনাসমাপ্তিকাল '১৩৯৬' (শকাব্দ) উল্লিখিত হয়েছে (I. H. Q., 1941, p. 457 দ্রষ্টব্য)।

'পদচন্দ্রিকা' যে রুকমুদীন বারবক শাহের রাজত্বকালে সম্পূর্ণ হয়েছিল, সে লব্ধ রচনাসমাপ্তিকালবাচক শ্লোকটির সাক্ষ্য ছাড়া অণু প্রমাণও আছে। 'পদচন্দ্রিকা'য় বৃহস্পতি মিশ্র বলেছেন যে তাঁর বিশ্বাস রায় প্রভৃতি পুত্রেরা রাজার মন্ত্রীদেব মধ্যে মুখ্য ছিলেন। অর্জুন মিশ্র তাঁর 'মোক্ষধর্মার্থ-দীপিকা'র টীকায় লিখেছেন যে তিনি গৌড়েশ্বরের মহামন্ত্রী বিশ্বাস রায়ের অনুজ্ঞা পেয়ে গ্রন্থ রচনা করেছেন (I. H. Q., 1941, p. 466 ; f. n. দ্রষ্টব্য)। অর্জুন মিশ্রের আর একজন পৃষ্ঠপোষকের নাম সত্য খান (হরপ্রসাদ শাস্ত্রী সম্পাদিত A Descriptive Catalogue of Sanskrit Manuscripts in the Collections of the Asiatic Society of Bengal, Vol V., Preface, pp. lxix-lxx দ্রষ্টব্য) এবং এক সত্য খান বারবক শাহের সমসাময়িক (বর্তমান গ্রন্থ, পৃ: ২০৩ দ্রষ্টব্য)। সুতরাং 'পদচন্দ্রিকা' বারবক শাহের রাজত্বকালে সম্পূর্ণ হয়েছিল বলেই স্থির করা যায়।

যাঁরা মনে করেন বৃহস্পতির সব বই জলালুদ্দীন মুহম্মদ শাহের রাজত্বকালে

রচিত হয়েছিল, তাঁদের মতের বিপক্ষে একটি যুক্তি দেখানো যায়। ‘স্মৃতিরত্নহার’ বইয়ে বৃহস্পতি জলালুদ্দীন কর্তৃক রায় রাজ্যধরের সেনাপতিপদে নিয়োগের উল্লেখ করেছেন। এই বই এবং রঘুংশটীকা ও শিশুপালবংশীকার মধ্যে বৃহস্পতির গুরুপ্রদত্ত ‘মিশ্র’ উপাধি ছাড়া ‘আচাৰ্য্য’ এবং ‘কবিচক্রবর্তী’ এই দুটি মাত্র উপাধির উল্লেখ দেখা যায় এবং শেষ তিনটি বইতেও রাজ্যধরের নাম উল্লিখিত হয়েছে। অতএব এই চারটি বইয়ের রচনাকালের মধ্যে বিশেষ বাবধান ছিল না এবং এই বইগুলি জলালুদ্দীনের রাজত্বকালে অথবা তার ভ্রাতা পরেই রচিত হয়েছিল সন্দেহ নেই। কিন্তু ‘পদচন্দ্রিকা’র মধ্যে বৃহস্পতির অতিরিক্ত পাঁচটি উপাধির উল্লেখ দেখা যায়। এই পাঁচটি উপাধি হচ্ছে—পণ্ডিতচূড়ামণি, মহাচার্য, রাজপণ্ডিত, পণ্ডিতসার্কভোম ও রাঃমুহুট। এতগুলি উপাধি অর্জন করতে সময় লাগে। সুতরাং ‘পদচন্দ্রিকা’ যে জলালুদ্দীন মুহম্মদ শাহের রাজত্বকালের অনেক পরে রচিত হয়েছিল, তা এর থেকেও বোঝা যায়।

পৃঃ ১৯৮ ছঃ ২২-২৬—ইব্রাহিম কাযুম ফারুকী তাঁর ‘ফরঙ্গ-ই-ইব্রাহিমী’ বা ‘শরফনামা’ গ্রন্থে যে বারবক শাহের নাম করেছেন, তিনি বাংলার সুলতান রুকনুদ্দীন বারবক শাহ কিনা, সে সম্বন্ধে ডঃ এ. বি. এম. হবিবুল্লাহ্ সংশয় সৃষ্টি করেছেন। ডঃ হবিবুল্লাহ্ লিখেছেন, “Fāruqī claims Jaunpur as his native town. Bārbak Shah mentioned in some of the eulogistic verses, therefore, need not necessarily be the Sultan of Bengal, for Jaunpur also at this time had a Bārbak Shāh, the younger son of Bahlol Lodī, appointed as vassal ruler after Husain Sharqī was driven out and whom Sikandar Lodī finally removed a few year after his accession.” ( J. A. S. P., Vol. V, p. 21 )।

কিন্তু নিম্নলিখিত কয়েকটি বিষয় থেকে প্রমাণিত হয় যে, ইব্রাহিম কাযুম ফারুকী যে বারবক শাহের নাম করেছেন, তিনি বাংলার সুলতান রুকনুদ্দীন বারবক শাহ ভিন্ন আর কেউ নন।

(১) ইব্রাহিম কাযুম ফারুকী বারবক শাহকে “আবুল-মুজাফফর বারবক শাহ” বলেছেন। রুকনুদ্দীন বারবক শাহের অসংখ্য মুদ্রা ও শিলালিপি থেকে

দেখা যায় তাঁর পূর্ণ নাম ছিল 'রুক্ন-উদ্-দুনিয়া ওয়াদ্ দীন আবুল-মুজাফফর বারবক শাহ।' অতএব বাংলার বারবক শাহের "আবুল-মুজাফফর" "কুনীয়াহ্" ছিল। কিন্তু জৌনপুরের বারবক শাহের "আবুল মুজাফফর" "কুনীয়াহ্" ছিল বলে জানা যায় না। স্ট্যানলী লেনপুল সম্পাদিত 'Coins of the Muhammadan States of India in the British Museum'-এ (p.112) জৌনপুরের বারবক শাহের মুদ্রার যে বিবরণ প্রকাশিত হয়েছে, তার থেকে দেখা যায়, মুদ্রায় তাঁকে 'আবুল-মুজাফফর বারবক শাহ' বলা হয়নি, শুধু 'বারবক শাহ' বলা হয়েছে।

(২) ইব্রাহিম কায়ুম ফারুকী বারবক শাহ সম্বন্ধে লিখেছেন, "বারবক শাহ শাহ-ই-আলম (পৃথিবীপতি) হোন এবং তিনি তাই। জমশিদেব রাজ্য তাঁর অধীনে থাকুক এবং তা' আছে।" রুকনুদ্দীন বারবক শাহের প্রশংসা করে এই সমস্ত কথা কোন কবি লিখতে পারেন। কিন্তু অতি বড় স্থাবকও জৌনপুরের বারবক শাহ সম্বন্ধে এই সমস্ত কথা লিখতে পারেন না। কারণ জৌনপুরের বারবক শাহ স্বাধীন নৃপতি ছিলেন না, তিনি তাঁর পিতা বহুলোল লোদীর অধীনে শাসনকর্তা ছিলেন। তাঁর পিতা জীবিত ও সিংহাসনে আরুঢ় থাকতে কেউ তাঁকে 'পৃথিবীপতি' ও 'জমশিদেব রাজ্যের মানিক' বলে প্রশংসা করবে বলে কল্পনা করা যায় না। পিতার মৃত্যুর পরে এই বারবক শাহ অল্প সময়ের মধ্যেই তাঁর ভ্রাতা সিকন্দর লোদীর কাছে নতিস্বীকার করতে বাধ্য হন এবং কয়েক বছর সিকন্দরের অধীনস্থ শাসনকর্তা হিসাবে জৌনপুরে থাকেন। কিন্তু জৌনপুরের জমিদারদের বিরোধে দমনে তিনি বারবার ব্যর্থ হওয়ার দরুন সিকন্দর তাঁকে শেষ পর্যন্ত পদচ্যুত ও বন্দী করেন। অতএব পিতার মৃত্যুর পরেও জৌনপুরের বারবক এই জাতীয় প্রশংসা লাভ করতে পারেন বলে মনে করা যায় না।

(৩) বারবক শাহের দান সম্বন্ধে ইব্রাহিম কায়ুম ফারুকী লিখেছেন, "যিনি প্রার্থীকে বহু ঘোড়া দিয়েছেন। যারা পায়ে হেঁটে যায়, তারা হাজার হাজার ঘোড়া উপহার পেয়েছে। এই মহান আবুল-মুজাফফর, যার সবচেয়ে সামান্য ও সাধারণ উপহার একটি ঘোড়া।"

এই ঘোড়া দান করা বাংলার সুলতান রুকনুদ্দীন বারবক শাহেরই

বৈশিষ্ট্য। কুন্তিবাসের সম্পর্কিত পিতৃত্ব নিশাপতি তাঁর কাছ থেকে ঘোড়া পেয়েছিলেন ; এ সম্বন্ধে কুন্তিবাস লিখেছেন,

রাজা গোড়েশ্বর দিল প্রসাদ ঘোড়া।

পাত্রমিত্র সকলে দিলেন থাসা জোড়া ॥

বৃহস্পতি মিশ্রকে 'রায়মুকুট' উপাধি দান করবার সময় রুকনুদ্দীন বারবক শাহ তাঁকে ঘোড়া উপহার দিয়েছিলেন। এ' সম্বন্ধে বৃহস্পতি তাঁর 'পদচক্রিকা'য় লিখেছেন,

যঃ প্রাপ্য দ্বিরদোপবিষ্টকনকস্রনৈরববিন্দুপা-

চ্ছত্রৈতৈস্তরগৈশ্চ রায়মুকুটাভিখ্যামভিখ্যাবতীম্ ॥

( ৪ ) 'ফরঙ্গ-ই-ইব্রাহিমী তে ইব্রাহিম কায়ুম ফারুকী শুধু বারবক শাহের প্রশস্তি করেননি, "জলালুদ্দীন" নামে আর একজন নৃপতির প্রশস্তি করেছেন ( বর্তমান গ্রন্থ, পৃ: ২১৮-১৯ দ্রষ্টব্য )। ইব্রাহিম কায়ুম ফারুকী যদ জৌনপুরে বসে বই লিখে তাতে জৌনপুরের শাসনকর্তা বারবক শাহের প্রশস্তি করে থাকেন, তাহলে প্রশ্ন উঠবে এই জলালুদ্দীন কে? কিন্তু তিনি বাংলায় বসে বই লিখেছেন ও বাংলার বারবক শাহের প্রশস্তি করেছেন ধরলে এই প্রশ্নের উত্তর সহজেই পাওয়া যায়। সে ক্ষেত্রে অনায়াসেই বলা চলে যে ইব্রাহিম কায়ুম ফারুকী যে "জলালুদ্দীন"-এর প্রশস্তি করেছেন তিনি বারবক শাহের ভাই এবং তাঁর পরের পরের সুলতান জলালুদ্দীন ফতেহ শাহ।

( ৫ ) বাংলার সুলতান রুকনুদ্দীন বারবক শাহ ছিলেন বিদ্যা ও সাহিত্যের পৃষ্ঠপোষক, কিন্তু জৌনপুরের বারবক শাহ তা ছিলেন বলে কোন প্রমাণ পাওয়া যায় না। সুতরাং শব্দকোষ-রচয়িতা পণ্ডিতপ্রবর ইব্রাহিম কায়ুম ফারুকীর পক্ষে বাংলার বারবক শাহের কাছে পৃষ্ঠপোষণ লাভ করাই স্বাভাবিক।

এই সমস্ত প্রমাণ থেকে অনায়াসেই বলা চলে যে ইব্রাহিম কায়ুম ফারুকী "বারবক শাহ" বলতে বাংলার সুলতান রুকনুদ্দীন বারবক শাহকেই বুঝিয়েছেন।

পৃ: ২৮৫ ছ: ২৩-২৫—জাহাঙ্গীরের সমসাময়িক নিয়ামতুল্লাহ তাঁর 'মখজান-ই-আফগানী' গ্রন্থে সিকন্দর শাহ ও আলাউদ্দীন হোসেন শাহের সংঘর্ষ সম্বন্ধে লিখেছেন, "From this place he ( Sikandar Shah )

started on the campaign against sultan 'Alāuddin, king of Bengal. As Sikandar reached Tughluqpur lying within the Bihar Territory, Sultan 'Alāuddin detached his son in order to reconnoitre. Sultan Sikandar deputed Mahmud Khan Lodi and Mubarak Khan Nuhani to oppose him. The two forces confronted each other at Barh when both the parties made overtures for peace. It was stipulated that the two monarchs would not make war upon each other nor harbour rebels. ( N. B. Roy, Niamatullah's History of the Afghans, 1958, pp. 77-78)

পৃ: ২৯৩ ছ: ১৮—হলিরাম টেকিয়াল ফুঙ্কনের যে মতের কথা আমরা এখানে উল্লেখ করেছি, তা তাঁর লেখা 'আসাম বুর্জি'-তে লিপিবদ্ধ আছে। ঐ বই ১৮২২ খ্রীষ্টাব্দে প্রকাশিত হয়। একজন অসমীয়া পণ্ডিত কর্তৃক বাংলা ভাষায় লেখা আসামের ইতিহাস-গ্রন্থ হিসাবে এর একটা বৈশিষ্ট্য আছে, কিন্তু এই বইয়ের ঐতিহাসিক মূল্য খুবই অকিঞ্চিৎকর। এর মধ্যে ষোড়শ শতাব্দীর প্রথম দিকে বাংলার সুলতানদের আসাম-অভিযান সম্বন্ধে যা লেখা আছে, তা নীচে উদ্ধৃত হল (অধ্যাপক যতীন্দ্রমোহন ভট্টাচার্য সম্পাদিত 'আসাম বুর্জি' পৃ: ১০-১১ দ্রষ্টব্য।)

“গৌড়দেশের বাদশাহ হুসেন শাহার জামাতা নওয়াব হুলালগাজী নামক একজন কোন কারণ নিমিত্ত মক্কা যাওয়া আবশ্যক হওয়াতে, তিনি মক্কা না গিয়া কামরূপে আসিয়া কামরূপ অধিকার করিয়া এইখানেই ওয়াক্কা হন। তাঁহার কবর গুয়াহাটীতে লৌহিত্য অর্থাৎ ব্রহ্মপুত্র নদের উত্তর পারে আছে।

“পরে তৎপুত্র মসন্দর গাজী এই দেশের অধিকারী হইয়াছিলেন। তাঁহার রাজধানী অম্বক্রাস্তের উত্তরে ছিল।

“পরে তাঁহার মরণান্তে সুলতান গয়াসুদ্দিন গৌড় হইতে আসিয়া এতদেশ আক্রমণ করিয়া শাসন করিয়াছিলেন। আরো তিনি হিন্দুর অনেক দেবালয় নষ্ট করিয়া লৌহিত্যের উত্তর গরুড়াচল পর্বতে মৃত্যু প্রাপ্ত হন। তাঁহার যে কবর আছে তাহাকে পাণ্ডমক্কা কহে।”

উদ্ধৃত অংশটিতে হুলাল গাজী “মক্কা যাওয়া আবশ্যক হওয়াতে” মক্কা

না গিয়ে তার সম্পূর্ণ বিপরীত দিকে কামরূপে কেন গেলেন, তার কোন ব্যাখ্যা দেওয়া হয়নি। এই অংশটিতে যে “সুলতান গিয়াসুদ্দীন”-এর কথা বলা হয়েছে, তিনি নিশ্চয়ই হোসেন শাহর পুত্র গিয়াসুদ্দীন মাহমুদ শাহ। বিস্তৃত ঐ সুলতান সম্বন্ধে এতে যা লেখা হয়েছে, তা সম্পূর্ণ অলীক। কারণ শের শাহ গিয়াসুদ্দীন মাহমুদ শাহের রাজ্য কেড়ে নেবার পর গিয়াসুদ্দীন বাংলার পূর্বদিকে অবস্থিত কামরূপে যান নি, পশ্চিমদিকে বিহার অঞ্চলে গিয়েছিলেন, সেখানে শোন ও গঙ্গার সম্মিলনে হুমায়ূনের সঙ্গে তাঁর দেখা হয় এবং তার অল্প বাদেই তিনি পরলোকগমন করেন; একথা প্রামাণিক ইতিহাস-গ্রন্থগুলিতে পাওয়া যায়। অতএব তাঁর “গৌড় হইতে আসিয়া” কামরূপ শাসন করে সেখানে মৃত্যু বরণ করার কথা সম্পূর্ণ অমূলক। ‘রিয়াজ-উ-সলাতীন’ের মতে গিয়াসুদ্দীন মাহমুদ শাহ ভাগলপুরের নিকটবর্তী কহলগাঁওতে পরলোকগমন করেছিলেন।

পৃ: ২৯৮ ছ: ১৩-১৫—সংস্কৃত ও বাংলা ভাষায় লেখা প্রায় সমস্ত চৈতন্য-চরিতগ্রন্থ থেকে জানা যায় যে প্রতাপরুদ্র চৈতন্যদেবের পরম ভক্ত ছিলেন। এসম্বন্ধে ড: এন. কে. সাহু একটি অভূতপূর্ব মন্তব্য করেছেন। তিনি লিখেছেন, ‘It may be pointed out that nowhere in any of his inscriptions, which are so numerous and in any of his literary works Prataprudra speaks of Sri Chaitanya as his Guru, and that contemporary literature, either Sanskrit, Oriya, or Bengali, has not declared Sri Chaitanya a royal preceptor. On the other hand we know definitely that Kavidindima Jivadevacharya the court poet, was the royal Guru.’ (A History of Orissa, ed. by N. K. Sahu, Vol II, p. 3৪7)

এই উক্তি সত্যই বিস্ময়কর। কেউ কোনদিনই বলেনি যে চৈতন্যদেব প্রতাপরুদ্রের গুরু ছিলেন; হুতরাং তা খণ্ডন করার কোন প্রয়োজন ছিল না। নিষ্ঠাবান বৈষ্ণবদের মতে চৈতন্যদেব কখনও কারণ দীক্ষাদাতা গুরু হননি। চৈতন্যচরিতগ্রন্থগুলির মতে প্রতাপরুদ্র চৈতন্যদেবের ভক্ত ছিলেন, তাকে অবিশ্বাস করার কোন কারণই নেই। জীবদেবাচার্য কবিভিণ্ডিম যে



প্রতাপরুদ্রের গুরু ছিলেন, তাতেও কোন সন্দেহ নেই। কিন্তু স্বয়ং জীবদেবাচার্য কবিভিণ্ডিমের লেখা “ভক্তিভাগবতম্”—এব ২৮ নং শ্লোক (বর্তমান গ্রন্থ, পৃ: ৩০৭ দ্রষ্টব্য) থেকেই জানা যায় যে প্রতাপরুদ্র চৈতন্যদেবের ডাক্ত ছিলেন।

পৃ: ৩৫৬ ছ: ১৩-পৃ: ৩৫৭ ছ: ১—পরাগল খান ও ছুটি খানের পদমর্যাদা কী ছিল, সে সম্বন্ধে ড: আবদুল করিম সম্প্রতি প্রবন্ধ উত্থাপন করেছেন। তিনি লিখেছেন, “আধুনিক পণ্ডিতেরা পরাগল খান ও ছুটি খানকে হোসাইন শাহী আমলে চট্টগ্রামের শাসনকর্তা (বা গভর্নর) মনে করেন। কিন্তু লক্ষণীয় যে কবীন্দ্র পরমেশ্বর ও শ্রীকর নন্দী তাঁদের নামের সঙ্গে শুধু ‘লস্কর’ শব্দ (বা উপাধি) ব্যবহার করেছেন। লস্কর শব্দের অর্থ সৈন্য। .....সুতরাং শুধু আক্ষরিক অর্থ মেনে নিলে বলতে হয় পরাগল খান ও ছুটি খান দুজনেই সামান্য সৈনিক ছিলেন .....বলা যেতে পারে যে ছন্দের মিল রাখার জন্য কবি ‘সর-ই-লস্কর’-এর প্রথম অংশ (সর) বাদ দিয়েছেন এবং দ্বিতীয় অংশই (লস্কর) শুধু উল্লেখ করেছেন। এই অল্পমান সত্য হলেও বলতে হবে পরাগল খান ও ছুটি খান সর-ই-লস্কর (সেনাপতি) ছিলেন। সমসাময়িক শিলালিপিতে উজীর, জিলা (আরছা বা ইকুলীম) কর্তৃপক্ষ এবং থানাদার সবাই সর-ই-লস্কর হিসাবে উল্লেখিত হয়েছে। সুতরাং শুধু সর-ই লস্কর শব্দে তাদের (পরাগল খান ও ছুটি খানের) প্রকৃত পদমর্যাদা নিরূপণ করা সম্ভব নয়। ছুটি খানী মহাভারতের উদ্ধৃত অংশে মনে হয় ‘চাটিগ্রাম নগরের নিকট উত্তরে’ ‘চন্দ্রশেখর পর্বত-কন্দরে’ ‘ফণী নদী বেষ্টিত স্থানে’ পরাগল খান ও ছুটি খানের আবাসস্থান ছিল। ‘লস্করী বিষয়’ থেকে মনে হয় তাঁরা সৈন্য পরিচালনা সংক্রান্ত কোন কাজের ভার পান।...মনে হয়, ঐস্থানে সৈন্যদের একটি থানা স্থাপন করা হয়েছিল এবং পরাগল খান ও ছুটি খানকে ঐ থানারই অধিপতি নিযুক্ত করা হয়েছিল।” (সাহিত্য পত্রিকা, বর্ষা সংখ্যা, ১৩৭১, পৃ: ১৬৩-১৬৬)

কিন্তু ডক্টর করিমের এই মত সমর্থন করা যায় না। কারণ, ডক্টর করিম আরবী ‘লস্কর’ শব্দের মূল অর্থ বিশ্লেষণ করে তার উপরে তাঁর অভিমতকে দাঁড় করিয়েছেন; কিন্তু ঐ সময়ে বাংলা ভাষায় ‘লস্কর’ শব্দ কী অর্থে ব্যবহৃত হত, তা বিচার করে দেখার তিনি প্রয়োজন বোধ করেন নি। বৃন্দাবনদাসের

‘চৈতন্যভাগবত’ ও ত্রিপুরার ‘রাজমালা’র সাক্ষ্য বিশ্লেষণ করলে পরিষ্কার বোঝা যায় যে, ঐ সময়ে বাংলায় ‘লস্কর’ শব্দ সামরিক শাসনকর্তা অর্থে ব্যবহৃত হত (বর্তমান গ্রন্থ, পৃ: ৩৫৬ ও পৃ: ৩৭৫-‘৬ দ্রষ্টব্য।) কবীন্দ্র পরমেশ্বর যে ‘লস্কর’ শব্দ সেনাপতি অর্থে ব্যবহার করেন নি—তার প্রমাণ হচ্ছে, পরাগল খান সশব্দে তিনি তাঁর মহাভারতে লিখেছেন যে পরাগল খান প্রথমে হোসেন শাহের সেনাপতি ছিলেন এবং পরে লস্কর হন।

নৃপতি হুসেন শাহ গোড়ের সৈন্যর।

তান এক সেনাপতি হওন্ত লস্কর ॥

লস্কর পরাগল খান মহামতি।

পরাগল খান ও ছুটি খান সশব্দে কবীন্দ্র পরমেশ্বর ও শ্রীকর নন্দী যা লিখেছেন, তা অবিশ্বাস করার কোন কারণ নেই। এই দুই কবির সাক্ষ্য বিশ্লেষণ করলে পরিষ্কার বোঝা যায় যে, পরাগল খান হোসেন শাহ কর্তৃক চট্টগ্রামের সামরিক শাসনকর্তা নিযুক্ত হয়েছিলেন এবং বহুকাল এই অঞ্চল শাসন করেছিলেন; ছুটি খানও বাংলার স্থলতানের কাছে “লস্করী বিষয়” পেয়েছিলেন অর্থাৎ কোন একটি অঞ্চলের (চট্টগ্রামের নয়, কারণ পরাগল খান তখনও জীবিত ও কর্মরত) সামরিক শাসনকর্তা নিযুক্ত হয়েছিলেন। তিনি সম্ভবত ত্রিপুরার অধিকৃত অঞ্চলের শাসনভার পেয়েছিলেন।

ড: আবদুল করিম বাংলা সাহিত্যে উল্লিখিত ‘লস্কর’ শব্দকে ‘সর-ই লস্কর’-এর অপভ্রংশ বলে মনে করেছেন, কিন্তু আমাদের মনে হয় এক্ষেত্রে ‘লস্কর’-‘লস্কর-ওয়াজীর’ (লস্কর উজীর) শব্দের অপভ্রংশ। সমসাময়িক শিলালিপিতে ও বাবরের আত্মকাহিনীতে বাংলার স্থলতানের অধীন বিশিষ্ট রাজকর্মচারীদের মধ্যে কারও কারও নামের সঙ্গে ‘লস্কর-ওয়াজীর’ শব্দ ব্যবহৃত হয়েছে, এর অর্থ ‘সামরিক শাসনকর্তা’ বলেই পারিপার্শ্বিক সাক্ষ্য থেকে মনে হয়।

পৃ: ৩২৭ ছ: ৪—অধ্যাপক আহমদ শরীফের মতে দৌলত-উজীর বাহরাম খান ১৫৪৫ থেকে ১৫৫৩ খ্রীর মধ্যে ‘লায়লী-মজনু’ কাব্য রচনাকরেন (ঢাকার বাঙলা একাডেমী কর্তৃক প্রকাশিত ‘লায়লী-মজনু’র ভূমিকা, পৃ: ১২-২৭ দ্রষ্টব্য)। বাহরাম খান ‘লায়লা মজনু’তে লিখেছেন “চাটিগ্রাম-অধিপতি” “নৃপতি নেজাম শাহা স্বর” তাঁর পিতাকে ও তাঁকে “দৌলত-

উজীর” খেতাব দেন। অধ্যাপক আহমদ শরীফের মতে এই “নেজাম শাহা সুর” শের শাহ সুরের ভ্রাতা নিজাম খান।

কিন্তু শের শাহের ভাই নিজাম খান যে কোনদিন “চাটিগ্রাম-অধিপতি” হয়েছিলেন, এ কথা কোন সূত্র থেকে জানা যায় না। আরও একটি কারণে অধ্যাপক আহমদ শরীফের মত সমর্থন করা চলে না। ‘লায়লী-মজহু’তে বাহরাম খান লিখেছেন যে তাঁর পূর্বপুরুষ হামিদ খান গোড়ের নরপতি হোসেন শাহের “প্রধান উজীর” ছিলেন; এরপর কবি লিখেছেন,

অনুক্রমে বংশ কথ গঞিলেন্ত এই মত গোড়ের অধীন (পাঠান্তর—অধীন)  
হইল দূর।

চাটিগ্রাম অধিপতি হইলেন্ত মহামতি নৃপতি নেজাম শাহা সুর ॥

১৫১২ খ্রীষ্টাব্দে হোসেন শাহ পরলোকগমন করেন। তার ২৬ থেকে ৩৭ বছর পরে কাব্য রচনা করলে বাহরাম খান এই উক্তি করতেন না। তাঁর এই উক্তি থেকে বোঝা যায়, হোসেন শাহের মৃত্যুর পর চট্টগ্রামে বহু রাজবংশ রাজত্ব করে যাওয়ার পরে নিজাম শাহ সেখানে রাজা হন। সুতরাং ১৫১২ খ্রীর অন্তত ১০০ বছর পরে বাহরাম খান কাব্য রচনা করেছিলেন, তাতে কোন সন্দেহ নেই।

বাহরাম খান যে ঔরংজেবের রাজত্বকালে (১৬৫৮-১৭০৭ খ্রী:) ‘লায়লী-মজহু’ রচনা করেছিলেন, তাতে কোন সন্দেহ নেই। কারণ ‘লায়লী মজহু’র উপক্রমে “আওরঙ্গ শাহা দিল্লীখর”-এর প্রশস্তি আছে এবং এই প্রশস্তিকে প্রক্ষিপ্ত বলবার কোন কারণ নেই। বাহরাম খান যে ঔরংজেবের সমসাময়িক, তাঁর অন্ত প্রমাণও আছে। চট্টগ্রাম-নিবাসী কবি মোহাম্মদ খানের লেখা ‘মজলু হোসেন’ (রচনাকাল ১০৫৬ হিজরা বা ১৬৪৬ খ্রী:) কাব্যে এক পীর সদর জাঁহার উল্লেখ পাওয়া যায়, যাকে বারো ভূঁইয়ার অন্যতম ঈশা খাঁ সংবর্ধনা করেছিলেন (ঢাকা বিশ্ববিদ্যালয় কর্তৃক প্রকাশিত সাহিত্য পত্রিকা, বর্ষা সংখ্যা, ১৩৬৬, পৃ: ১০০ দ্র: )। ঈশা খাঁ ষোড়শ শতাব্দীর শেষ পাদে আধীন রাজা হন এবং ১৫২২ খ্রীষ্টাব্দের সেপ্টেম্বর মাসে পরলোকগমন করেন (Histroy of Bengal, D. U., Vol. II, p. 238 দ্র: )। [ঐ সদর জাঁহার প্রকৃত নাম শাহ আবদুল ওহাব (সি. প. প., ১৩৫৪, পৃ: ২৭-২৮ দ্র: )] এদিকে চট্টগ্রামবাসী বাহরাম খানও ‘লায়লী-মজহু’তে লিখেছেন যে তাঁর

পীর আছাউদ্দীনের প্রপিতামহের নাম সদর জাঁহা (“ছন্নরজাহান”)। সদর জাঁহা ষোড়শ শতাব্দীর শেষ পাদে জীবিত থাকলে তাঁর প্রপৌত্রের শিষ্য বাহরাম খান খুব স্বাভাবিকভাবেই ১৬৫৮ থেকে ১৭০৭ খ্রীঃ মধ্যে জীবিত থাকবেন

বাহরাম খানের পৃষ্ঠপোষক “নেজাম শাহা” বা নিজাম শাহ কোন মুসলমান নৃপতি নন, তিনি আসলে আরাকানের রাজা। তার প্রমাণ, বাহরাম খান নিজাম শাহকে “ধবল অরুণ গজেশ্বর” বলেছেন। আলোচ্য সময়ের আরাকানের রাজাদের যে এই জাতীয় উপাধি ছিল (উপাধিগুলিকে বিভিন্ন কবি ও অনুবাদক বাংলা ও ইংরেজী ভাষায় “ধবল অরুণ গজেশ্বর”, “ধবল গজেশ্বর”; “স্বৈত রক্ত মাতঙ্গ ঈশ্বর” “Lord of the Red Elephant, Lord of the White Elephant”; “Elder brother of the sun, Lord of the golden House and White Elephant” প্রভৃতি রূপে লিপিবদ্ধ করেছেন),—তা আরাকানের রাজাদের মূদ্রা থেকে, দৌলৎ কাজীর ‘সতী ময়না ও লোর চন্দ্রানী’, আলাওলের ‘পদ্মাবতী,’ মোহাম্মদ খানের ‘মক্তুল হোসেন’ প্রভৃতি কাব্য থেকে এবং শিহাবুদ্দীন তালিশের লেখা মোগল বাহিনীর চট্টগ্রাম-বিজয় সংক্রান্ত বিবরণ থেকে জানা যায় (J. A. S. B., 1846, pp. 234-235; প্রবাসী, ফাল্গুন ১৩৬৮, পৃ: ৬০৬-৬০৮, বা. সা. ই. ১১২, পৃ: ৫২৮ এবং Studies in Mughal India by Jadunath Sarkar, p. 119 দ্রষ্টব্য)।

সুতরাং “নেজাম শাহা” আরাকানেরই রাজা। আরাকানের রাজার মুসলমানী নাম থাকা খুবই স্বাভাবিক ব্যাপার। ১৪৩০ খ্রীষ্টাব্দে বাংলার সুলতানের সাহায্যে মেং-সোয়া-মুউন্ রাজ্য ফিরে পাবার (বর্তমান ঝাড়, পৃ: ১৫৬ দ্রঃ) পর থেকে আরাকানের রাজারা নিজেদের আসল নামের সঙ্গে সঙ্গে একটি করে মুসলমানী নামও নিতেন; এঁদের মধ্যে অনেকে নিজেদের মুহাম্মদ মুসলমানী নাম উল্লেখ করেছেন, সকলে অবশ্য করেন নি। বাহরাম খান যখন ‘লায়লী-মজহূ’ রচনা করেন, তখন ঔরংজেব জীবিত ছিলেন, সম্ভবত “নেজাম শাহা”ও জীবিত ছিলেন, দুজনেই যদি এই সময়ে জীবিত থাকেন, তাহলে বলতে হবে এই “নেজাম শাহা” আরাকানরাজা চীচন্দ্রসুন্দরী (রাজত্বকাল ১৬৫২-১৬৮২ খ্রীঃ) কারণ তিনিই ঔরংজেবের সমসাময়িক একমাত্র আরাকানরাজ, যিনি “চাটিগ্রাম-অধিপতি” ছিলেন।

'বাংলার ইতিহাসের দু'শো বছর'-এর প্রথম সংস্করণ প্রকাশিত হবার কিছুদিন পরে অধ্যাপক আহমদ শরীফ 'কবি দৌলতউজ্জির ও কবি মুহম্মদ খান সম্বন্ধে নতুন তথ্য' নামে একটি প্রবন্ধ লিখে সেটি 'সাহিত্য পত্রিকা'য় ( ১৩৭২, দ্বিতীয় সংখ্যা, পৃ: ২০৬-২১৩ ) প্রকাশ করেন। এই প্রবন্ধের 'ক' অংশে তিনি দৌলত উজ্জীর বাহরাম খানের কাব্যরচনাকাল সম্বন্ধে তাঁর পূর্ব সিদ্ধান্ত পরিবর্তন করে আমাদের সিদ্ধান্তই মেনে নেন। কিন্তু 'খ' অংশে আবার নতুন একটি বিষয়ের প্রসঙ্গ উত্থাপন করে এ সম্বন্ধে সংশয়ের অবকাশ রেখে দেন। এই নতুন বিষয়টি সংক্ষেপে এই—'বহারিস্তান গায়বী' গ্রন্থে বলা হয়েছে যে আরাকান অভিযানের সময় জাহাঙ্গীরের সেনাপতি কাশিম খানের বাহিনী চট্টগ্রামের কাছে নিজামপুর নামে একটি গ্রামে বিশ্রাম গ্রহণ করে, এই নিজামপুর থেকে ছ' শো' টাকা রাজস্ব সংগৃহীত হত। অধ্যাপক আহমদ শরীফ বলেন, "নিজামপুর একটি পরগণা - এর থেকে বোঝা যাচ্ছে, ষোল শতকে কোনো এক ধনী ও মানী নিয়াম চট্টগ্রামে ছিলেন—যাঁর নামে চয়শ' টাকা রাজস্বের একটি পরগণার সৃষ্টি হয়েছিল। বাহরাম যদি আলোচ্য নিয়ামের দৌলতউজ্জির হন, তা হলে কবির আবির্ভাব কাল সম্বন্ধে আমাদের পূর্ব সিদ্ধান্ত বহাল থাকে।" এর পর অধ্যাপক আহমদ শরীফ ১৩৭২ বঙ্গাব্দের বর্ষা সংখ্যা 'সাহিত্য পত্রিকা'য় ( পৃ: ২২১ ) নিজামপুর-প্রসঙ্গের পুনরবতারণা করে লিখেছেন, "দৌলত উজ্জির বাহরাম খানের আবির্ভাব কাল সম্বন্ধে আমাদের ধারণা অপরিবর্তিতই রয়েছে।"

অধ্যাপক আহমদ শরীফের মত প্রাজ্ঞ গবেষক যেভাবে তুচ্ছ "নিজামপুর"-এর উপর নির্ভর করে তাঁর পূর্ব সিদ্ধান্ত বজায় রাখবার চেষ্টা করেছেন, তা মজ্জমান ব্যক্তির তৃণখণ্ড অবলম্বন করে বাঁচার চেষ্টাকে স্মরণ করিয়ে দেয়। এই "নিজামপুর"-এর নামকরণ যাঁর নামে হয়েছে, সেই নিজাম একজন "ধনী ও মানী" ব্যক্তি ছিলেন, তাঁর একজন "দৌলত-উজ্জীর" ( ধনাধ্যক্ষ ) রাখার ক্ষমতা ছিল এবং তিনি ষোড়শ শতাব্দীর লোক ছিলেন—ইত্যাদি বিষয় অনুমান করার সপক্ষে অধ্যাপক শরীফ কোন যুক্তি দেখান নি। ঐ "নিজাম" জয়োদশ, চতুর্দশ, পঞ্চদশ, ষোড়শ—যে কোন শতাব্দীর লোক হতে পারেন, কারণ উক্ত নিজামপুর গ্রামের ইতিহাস যে কত দিনের, তা জানা যাচ্ছে না; আর ঐ "নিজাম" একজন "ধনী ও মানী" ব্যক্তি না হলে ফকীর বা দরবেশও

হতে পারেন। ইনি চতুর্দশ শতাব্দীর বিখ্যাত দরবেশ নিজামুদ্দীন আউলিয়ার সঙ্গেও অভিন্ন হতে পারেন। নিজামুদ্দীন আউলিয়ার শিষ্য ও ভক্ত সারা ভারতেই অসংখ্য ছিল (Glimpses of Medieval Indian Culture, by Yusuf Husain, pp. 41-42 দ্রষ্টব্য), সুতরাং তাঁদের মধ্যে কেউ তাঁর নাম অনুসারে আলোচ্য “নিজামপুর” গ্রামের নামকরণ করে থাকতে পারেন। মোটের উপর, “নিজামপুর” গ্রাম অধ্যাপক আহমদ শরীফের পূর্ব সিদ্ধান্ত পরিপোষণে কোন সাহায্য করে বলে মনে হয় না।

অধ্যাপক আহমদ শরীফের আর একটি যুক্তি এই যে,—১৬৬৬ খ্রীষ্টাব্দে শায়েস্তা খান চট্টগ্রাম জয় করে তার নাম ঔরঙ্গজেবের নির্দেশ অনুসারে ইসলামাবাদ রেখেছিলেন; কিন্তু দৌলত-উজীর বাহরাম খান ‘লায়লী-মজহু’তে চট্টগ্রামকে “ফতেয়াবাদ” নামে অভিহিত করেছেন; অতএব ‘লায়লী-মজহু’ ঔরঙ্গজেবের রাজত্বকালের আগে রচিত। কিন্তু বাহরাম খান কি সত্যিই তাঁর সমসাময়িক চট্টগ্রামকে “ফতেয়াবাদ” বলেছেন? তিনি তাঁর পূর্বপুরুষ হামিদ খানের প্রসঙ্গ উল্লেখ করার সময় বলেছেন যে হোসেন শাহ তাঁকে “চাটিগ্রাম”-এর অধিকারী করেছিলেন এবং এই “চাটিগ্রাম”-এর নামান্তর ছিল “ফতেয়াবাদ”—

নগর ফতেয়াবাদ

দেখিয়া পুরএ সাধ

চাটিগ্রাম সুনাম প্রকাশ।

হোসেন শাহের রাজত্ব অবসানের প্রায় দেড়শো বছর পরে চট্টগ্রামের “ইসলামাবাদ” নামকরণ হয়েছিল। তার কথা বাহরাম খান এখানে বলতে যাবেন কেন? প্রসঙ্গত উল্লেখযোগ্য, ঔরঙ্গজেবের দেওয়া চট্টগ্রামের এই নতুন নাম মোটেই চলে নি, মথুরার নামও ঔরঙ্গজেব “ইসলামাবাদ” রেখেছিলেন, সে নামও চলেনি।

যা হোক, দৌলত-উজীর বাহরাম খান যে ঔরঙ্গজেবের রাজত্বকালেই (১৬৫৮-১৭০৭ খ্রী:) ‘লায়লী-মজহু’ রচনা করেছিলেন, তাতে কোন সন্দেহ নেই।

পৃ: ৩৬৯ ছ: ২৭-২৮—শ্রীযুক্ত গোবর্ধন দাস বাবাজী তাঁর ‘শ্রীশ্রীরজধাম ও গোস্বামিগণ’ বইয়ে (২য় খণ্ড, পৃ: ৪২) রূপ-সনাতনের সমসাময়িক বলে কথিত এবং সনাতনের নাম সংবলিত ছুটি দলিলের উল্লেখ করেছেন। তিনি

লিখেছেন, “পিরোজপুরের নিক্কর মালিকদার মিঞা সাহেবের আরবি ভাষায় লিখিত দলিলের শিরোদেশে পাতশাহের স্বর্ণমসীদ্বারা দেবাক্ষরে এইরূপ লিখিত আছে—শ্রীল শ্রীযুক্ত গোব্রাহ্মণ প্রতিপালক সনাতন দবিরখাস। কিন্তু কদম-রৌণ্ডল নামক দরগার নিক্কর ভূঁয়র দলিলে কেবল—‘শ্রীসনাতন দবিরখাস’ লিখিত আছে।” শ্রীযুক্ত গোবর্ধন দাস বাবাজী আরও লিখেছেন যে উল্লিখিত দু’টি দলিলের মধ্যে প্রথমটি রূপের এবং দ্বিতীয়টি সনাতনের স্বহস্তে লেখা বলে তিনি শুনেছেন। কিন্তু তিনি এই দু’টি দলিলের বিস্তৃত বিবরণ দেন নি অথবা এদের অকৃত্রিমতা সম্বন্ধে কোন প্রমাণের উল্লেখ করেন নি। এতদিন বাদে রূপ-সনাতনের আয়লের দলিল আবিষ্কৃত হওয়া যেমন সন্দেহজনক, তেমনি মুসলমানের কাছে প্রাপ্ত আরবী ভাষায় লেখা দলিলে সনাতনের “গোব্রাহ্মণ প্রতিপালক” উপাধির উল্লেখ থাকাও সন্দেহজনক। তা ছাড়া সনাতন যখন হোসেন শাহের “দবিরখাস” ছিলেন, তখন তাঁর “সনাতন” নামই ছিল না; তিনি রাজপদ ত্যাগ করে সম্রাসী হবার পর চৈতন্যদেব তাঁকে সনাতন নাম দেন। সুতরাং আলোচ্য দলিল দু’টি যে জাল, তাতে কোন সন্দেহ নেই।

পৃ: ৩৭৭ ছ: ১৬-পৃ: ৩৭৮ ছ: ১৩—এখানে আমরা লিখেছি যে ‘কবিরঞ্জন’-এর “প্রকৃত নাম দৈবকীনন্দন সিংহ। এর তিনটি উপাধি—কবিরঞ্জন, কবিশেখর ও বিজ্ঞাপতি। এই তিন ভণিতাতেই তিনি পদ রচনা করতেন।” কিন্তু এ সম্বন্ধে সমস্ত গবেষক একমত নন। কারও কারও মতে ‘গোপালবিজয়’ কাব্যের রচয়িতা ‘কবিশেখর’ উপাধিধারী দৈবকীনন্দন সিংহ এবং পদকর্তা কবিশেখর পৃথক লোক। সেই রকম, অনেক গবেষকের মতে কবিশেখর ও কবিরঞ্জন ভিন্ন লোক, সুতরাং এই বিষয়টি নিয়ে বিস্তৃতভাবে আলোচনা করা দরকার বলে মনে করছি।

প্রথমে, দৈবকীনন্দন সিংহ যে পদকর্তা কবিশেখরের সঙ্গে অভিন্ন, তার প্রমাণ উল্লেখ করছি (এ সম্বন্ধে বিস্তৃততর আলোচনার জন্য ‘প্রাচীন বাংলা সাহিত্যের কালক্রম’, পৃ: ১৭০-১৭২ দ্রষ্টব্য)।

(১) পদকর্তা কবিশেখর ‘শেখর’ ও ‘রায়শেখর’ ভণিতাতেও পদ লিখতেন; ‘গোপালবিজয়ে’ও ‘কবিশেখর’ ভণিতার সঙ্গে দু’এক জায়গায় ‘শেখর’ ও ‘রায়শেখর’ ভণিতা পাওয়া যায়।

(২) 'গোপালবিজয়'র ভণিতার সঙ্গে পদকর্তা কবিশেখরের রচনা 'দণ্ডাঙ্কিকা পদাবলী'র ভণিতার হুবহু মিল দেখা যায়। কবিশেখরের কোন কোন পদের অংশবিশেষের সঙ্গে 'গোপালবিজয়'র কোন কোন অংশের ভাষায় ষনিষ্ঠ সাদৃশ্য আছে।

(৩) রামগোপালদাস ও রসিকদাসের শাখানির্ণয়ে মাত্র একজন কবিশেখরেরই নাম আছে, তিনি রঘুনন্দনের শিষ্য পদকর্তা কবিশেখর। কিন্তু রামগোপালদাসের 'রসকল্পবল্লা'তে কবিশেখরের 'গোপালবিজয়' কাব্য থেকে কতকাংশ উদ্ধৃত হয়েছে। রামগোপালদাস পদকর্তা কবিশেখর ও 'গোপাল-বিজয়'-রচয়িতা কবিশেখরকে পৃথক লোক বলে জানলে 'শাখানির্ণয়ে' 'গোপালবিজয়'-রচয়িতার নাম স্বতন্ত্রভাবে উল্লিখিত হত বলে বোধ হয়। তা না হওয়াতে মনে হয়, উভয় কবিশেখর অভিন্ন।

(৪) দুই কবিশেখরের সময়ও এক।

কবিশেখর ও কবিরঞ্জন যে অভিন্ন লোক, তা নিম্নোক্ত বিষয়গুলি থেকে প্রমাণিত হয়।

(১) কবিশেখর ও কবিরঞ্জন উভয়েই রঘুনন্দনের শিষ্য এবং উভয়ের পদের রচনারীতি এক।

(২) রামগোপাল দাস কবিরঞ্জন সম্বন্ধে লিখেছেন, "ছোট বিদ্যাপতি বলি বাহার খেয়াতি"। এর থেকে মনে হয়, কবিরঞ্জনের 'বিদ্যাপতি' উপাধি ছিল। চণ্ডীদাস-বিদ্যাপতির মিলন-বর্ণনামূলক কয়েকটি পদ থেকেও বোঝা যায়, এই কবিরঞ্জন 'বিদ্যাপতি' নামে অভিহিত হতেন (সা. প. প., ১৩৩৭, পৃ: ৪০-৪৭ দ্রষ্টব্য)। কবিশেখরেরও 'বিদ্যাপতি' উপাধি ছিল। কারণ লোচন তাঁর 'রাগতরঙ্গিনী'তে কবিশেখর-ভণিতায়ুক্ত একটি পদ উদ্ধৃত করে তার নীচে লিখেছেন, "ইতি বিদ্যাপতে:"। ড: শহীদুল্লাহ্ দেখিয়েছেন একই বিষয়বস্তু নিয়ে রচিত পরস্পরের পরিপূরক দুটি পদের একটিতে 'কবিশেখর' ভণিতা এবং অপরটিতে 'বিদ্যাপতি' ভণিতা পাওয়া যায় ('বিদ্যাপতি-শতক'-এর ভূমিকা, পৃ: ১৮০ দ্রষ্টব্য)।

(৩) রামগোপালদাস লিখেছেন যে কবিরঞ্জন 'রাজসেবী' ছিলেন। কবিশেখরও 'রাজসেবী' ছিলেন, কারণ তাঁর ভণিতা-সংবলিত পদে নসরৎ



শাহের নাম আছে। 'বিদ্যাপতি'-ভণিতায়ুক্ত কয়েকটি পদেও হোসেন শাহ ও 'নসীর শাহ' অর্থাৎ নাসিরুদ্দীন নসরৎ শাহের নাম আছে।

(৪) উপরে 'রাগতরঙ্গিনী'তে সন্নিবিষ্ট 'কবিশেখর' ভণিতায়ুক্ত যে পদটির আমরা উল্লেখ করেছি, বিভিন্ন গ্রন্থে ও পুঁথিতে তার বিভিন্ন পাঠ পাওয়া যায়। কোন পাঠে 'কবিশেখর', কোন পাঠে 'কবিরঞ্জন', আবার কোন পাঠে 'বিদ্যাপতি' ভণিতা পাওয়া যায়। নীচে পদটির কয়েকটি পাঠ উদ্ধৃত করলাম।

(ক) 'রাগতরঙ্গিনী'তে (মুদ্রিত গ্রন্থ, পৃ: ৪৪-৪৫) এই পাঠ পাওয়া যায় (খগেন্দ্রনাথ মিত্র ও বিধানবিহারী মজুমদার সম্পাদিত 'বিদ্যাপতি'র ৯৩২ সংখ্যক পদেও এই পাঠ গৃহীত হয়েছে),

আনন লোহুঅ বচনে বোলএ হঁসি।

অমিঅ বরিস জনি সরদ পুণিমা সঁসি ॥

অপরূব রূপ রমনিয়া।

জাইতে দেখিল গজরাজ গমনিয়া ॥

কাজলে রঞ্জিত ধবল নয়ন বর।

ভয়র মিলল জনি অরুন কমল দল ॥

ভান ভেল মেহি মাঝ খীনি ধনি।

কুচ সিরিফল ভরে ভাঁগি জাতি জনি ॥

কবিশেখর ভন অপরূব রূপ দেখি।

রাএ নসরদ শাহ ভজলি কুমলমুখি ॥

(খ) সুধীরচন্দ্র রায় ও অপর্ণা দেবী সম্পাদিত 'কীর্তন-পদাবলী'তে (পৃ: ১৫৯) এই পাঠ পাওয়া যায়,

নহুয়া-বদনি ধনি বচন কহসি হসি।

অমিয়া বরিতে জহু শরদ পুনিম শশী ॥

অপরূপ রূপ রমণি-মণি।

যাইতে পেখলু গজরাজগমনি ধনি ॥

সিংহ জনি মাঝা থিনি তহু অতি কমলিনি।

কুচ ছিরিফল ভরে ভাঙ্গিয়া পড়য়ে জানি ॥

কাজরে রঞ্জিত বনি ধরল নয়নবর।

ভ্রমর ভুলল জহু বিমল কমল পর ॥

কবিরঞ্জন ভণে অশেষ অহুমানি ।

রাএ নসরৎ শাহ ভুলল কমলা বাণী ॥

(গ) 'পদকল্পতরু'তে ( পদসংখ্যা ১২৭ ) পদটির এই পাঠ পাওয়া যায়,

নহুড়া বদনি ধনি বচন কহসি হসি ।

অমিয়া বরিখে জহু শরদ পুর্ণিম শশী ॥

অশরূপ রূপ রমণি-রমণি ।

বাইতে পেখলু গজরাজগমনি ধনি ॥

সিংহ জিনি মাঝা থিনি তহু অতি কমলিনি ।

কুচ-ছিরিকল ভরে ভাঙ্গিয়া পড়য়ে জানি ॥

কাজরে রঞ্জিত বনি ধরল নয়নবর ।

ভ্রমর ভুলল জহু বিমল কমল পর ॥

ভণয়ে বিছাপতি সো বয়-নাগর ।

রাই-রূপ হেরি গর-গর অন্তর ॥

ঢাকা বিশ্ববিদ্যালয়ের ২৩৫৩ নং পুথিতে পদটির আর একটি পাঠ পাওয়া গিয়েছিল । এই পাঠ অপখ্যস্ত প্রকাশিত হয়নি, তবে ডঃ শহীদুল্লাহ্ এর ভণিতাটি প্রকাশ করেছেন ( সা. প. প. ১৩৬০, পৃ: ৫০, পাদটীকা ৮: ) । সেটি এই,

বিছাপতি ভানি

অশেষ অহুমানি

হুলতান শাহ নসীর মধুপ ভুলে কমল বাণী ॥

একই পদের বিভিন্ন পাঠে 'কবিশেখর', 'কবিরঞ্জন' ও 'বিছাপতি' ভণিতা পাওয়া যাওয়াতে প্রমাণ হচ্ছে যে এই তিনটি নাম একই লোকের । এই 'বিছাপতি' মৈথিল হতে পারেন না, কারণ শেষ তিনটি পাঠে বাংলা ভাষার প্রভাব অত্যন্ত স্পষ্ট । এই প্রসঙ্গে বলা যেতে পারে, অনেক গবেষক একটি পদের বিভিন্ন পাঠ পেলে সব সময়েই মনে করেন যে গায়ের ও লিপিকরদের হস্তক্ষেপের ফলে এই পাঠের বিভিন্নতা সৃষ্টি হয়েছে; কিন্তু কবি নিজেও যে বিভিন্ন সময়ে একই পদকে বিভিন্ন রূপ দিতে পারেন, তা এদের মাধ্যমে টোকে না । আধুনিক কালে রবীন্দ্রনাথের ক্ষেত্রে দেখতে পাই, তিনি তাঁর

অনেক গানের বারবার পরিবর্তন সাধন করে ভিন্ন ভিন্ন রূপ দিয়েছেন। মধ্যযুগে লেখা ছাপা হত না বলে কবিদের একটি পদের মূল রূপকে সারাজীবন এক-ভাবে রাখবার সুযোগ ও অনুরোধেরা এখনকার তুলনায় অনেক কম ছিল। উপস্থিত ক্ষেত্রে আমরা দেখতে পাচ্ছি যে, কবিশেখর বা কবিরঞ্জন বা বাঙালী বিদ্যাপতি একটি পদকেই নানা সময় নানা রূপ দিয়েছেন এবং এক একবার তাঁর এক একটি উপাধিকে ভণিতায় বসিয়ে দিয়েছেন। তিনি যে সুলতানের পৃষ্ঠপোষক পেয়েছিলেন, তাঁকে তিনি দুটি পাঠে “রাএ নসরৎ (নসরৎ) শাহ” বলেছেন এবং একটি পাঠে “সুলতান শাহ নসীর” বলেছেন। এর থেকে প্রমাণ হয় যে, এই সুলতান দিল্লী বা আর কোন জায়গার সুলতান নন, ইনি বাংলার সুলতান নাসিরুদ্দীন নসরৎ শাহ ( ১৫১২-৩২ খ্রীঃ )।

এই বইয়ের ৪৩৫ পৃষ্ঠায় আমরা ‘শেখ কবীর’ ভণিতা-সংবলিত যে পদটির উল্লেখ করেছি, সেটি আসলে উপরে উক্ত পদটিরই আর একটি পাঠ। অধ্যাপক আহমদ শরীফ সম্পাদিত ‘মুসলিম কবির পদ-সাহিত্য’ ( পদসংখ্যা ২৪ ) থেকে ঐ পাঠটি আমরা উদ্ধৃত করলাম,

অকি অপরূপ রূপের রমণী ধনি ধনি  
চলিতে পেখল গজ-রাজ-গমনি ধনি ধনি ।  
কাজলে রঞ্জিত ধনি ধবল নয়ন ডালে  
ভোমরা ভুলল বিমল কমল দলে ॥  
গুমান না কর ধনি ক্ষীণ অতি মাঝাখানি  
কুচগিরি ফলের ভরে ভাজি পড়িব যৌবনি ॥  
সুন্দরী চান্দ মুখে বচন বোলসি হাসি  
অমিয়া বরিখে ঘৈসে শারদ পূর্ণিমা শকী ॥  
শেখ কবীরে ভণে অহি গুণ পামরে জানে  
সুলতান নাসির সাহা ভুলিছে কমলবনে ॥

পূর্বোক্ত পাঠগুলির সঙ্গে এই পাঠের প্রায় সর্বত্রই মিল আছে, এবং চতুর্থ পাঠের ভণিতার সঙ্গে এই পাঠের ভণিতার ঘনিষ্ঠ সাদৃশ্য আছে। সুতরাং এ বিষয়ে কোনই সন্দেহ নেই যে, এই পাঠটি স্বতন্ত্র পদ নয় অথবা ‘শেখ কবীর’ নামে স্বতন্ত্র একজন কবির লেখা নয়। যতদূর মনে হয়, এই পাঠের ভণিতায় প্রথমে ‘কবিশেখর’ নামই ছিল, পরে ‘কবিশেখর’ ‘কবিরশেখ’-এ পরিবর্তিত

হয়েছে এবং তা আবার পরে ‘শেখ কবির ( কবীর )’-এ পরিণত হয়েছে ।

যাহোক, আমরা যে সমস্ত যুক্তি ও প্রমাণ ইতিপূর্বে দেখিয়েছি, তার থেকে অনায়াসেই বলা যায় যে দৈবকীনন্দন সিংহ, কবিশেখর এবং কবিরঞ্জন একই লোক । ইনি ‘শেখর’, ‘রায়শেখর’ ও ‘শেখর রায়’ ভণিতা-তেও পদ রচনা করতেন, শেষোক্ত দুই ভণিতা থেকে কেউ কেউ মনে করেছেন যে এর বংশ-পদবী ছিল ‘রায়’ । কিন্তু ‘রায়’ শব্দটি তখন পদবী হিসাবে ব্যবহৃত হত না ; বংশমর্যাদার পরিচায়ক হিসাবে বা নিছক সম্মানবাচক বিশেষণ হিসাবে এটি তখনকার দিনে নামের সঙ্গে যুক্ত হত । বৃন্দাবনদাস তাঁর ‘চৈতন্যভাগবতে’ নিত্যানন্দকে ‘নিত্যানন্দ রায়’ বলেছেন ।

আর একটি কথা । এই ‘কবিশেখর’-বিজ্ঞাপতির একটি পদের ভণিতায় পাই,

সাহ হুসেন অহুমানে ।

পঞ্চগৌড়েশ্বর জানে ॥

চিরঞ্জীবী হউ পঞ্চ গৌড়েশ্বর কবি বিজ্ঞাপতি ভাণে ।

কিন্তু এর পাঠান্তরের ভণিতায় পাই,

সে যে নশিরা শাহ সে জানে

যারে হানল মদন বাণে ॥

চিরঞ্জীব রহ পঞ্চগৌড়েশ্বর কবি বিজ্ঞাপতি ভাণে ।

( বর্তমান গ্রন্থ, পৃ: ৩৭৮ ও ৪৩৫ ত্রুটিব্য । )

‘ক্ষণদাগীতচিন্তামণি’র একটি প্রাচীন পুথিতে ( লিপিকাল ১৬৮৬ শকাব্দ ও ১১৭১ সন অর্থাৎ ১৭৬৪-৬৫ খ্রী: ) এই পদটির দুই পাঠই পর পর উদ্ধৃত হয়েছে, প্রথম পাঠে ‘সাহ হুসেন’-এর এবং দ্বিতীয় পাঠে ‘নশিরা শাহ’-র নাম-সংবলিত ভণিতা দেখা যায় । প্রথম পাঠটির আরম্ভ হয়েছে ‘ধনি গো আজহ দেখলি বাল্য’ দিয়ে এবং দ্বিতীয় পাঠটির আরম্ভ হয়েছে ‘গোধূলি পেখলু বাল্য’ দিয়ে । উভয় পাঠে চরণগুলির ভাষার দিক দিয়ে খুব সামান্য পার্থক্য আছে, কিন্তু দুই পাঠে চরণগুলির বিজ্ঞাপনের ক্রম ঐ প্রণয়ের ( সাধনা, ১৩০০, পৃ: ২৬২-২৭৫ ত্রুটিব্য ) । এর থেকে মনে হয় আসল ব্যাপারটি এই । কবি পদটি হোসেন শাহের রাজত্বকালেই লিখেছিলেন এবং তখন তার ভণিতায় ‘সাহ হুসেন অহুমানে’ লিখেছিলেন ; অতঃপর হোসেন শাহের

পুত্র নাসিরুদ্দীন নসরৎ শাহের রাজত্বকালে তিনি পদটির ভাষার ও চরণগুলির বিজ্ঞাসের পরিবর্তন ঘটান এবং ভণিতা থেকে হোসেন শাহের নাম তুলে দিয়ে তার জায়গায় নতুন রাজার নাম বসিয়ে ‘সে যে নশিরা সাহ সে জানে’ লেখেন। শ্রীকর নন্দীও তাঁর মতভারে ঠিক এই ভাবেই যেখানে রাজা হিসাবে হোসেন শাহের নাম ছিল, সেখানে অকৌশলে নসরৎ শাহের নাম বসিয়ে দিয়েছিলেন (বর্তমান গ্রন্থ, পৃ: ৩২৮ দ্রষ্টব্য)।

পৃ: ৩৮২ ছ: ১৭-১৯—‘চৈতন্যভাগবত’-এর বসুমতী সাহিত্য মন্দির সংস্করণে শ্লোকটির এই পাঠ পাওয়া যায়,

দুঃখে সব নগরিয়া থাকে লুকাইয়া ।

হিন্দু কাজী সব আরো মারে কদখিয়া ॥

এই পাঠের উপর নির্ভর করেই আমরা সিদ্ধান্ত করেছি যে হোসেন শাহের হিন্দু কাজী ছিল। কিন্তু ‘চৈতন্যভাগবত’-এর সিদ্ধান্তসরস্বতী-সম্পাদিত সংস্করণে শ্লোকটির এই পাঠ পাওয়া যায়,

দুঃখে সব নগরিয়া থাকে লুকাইয়া ।

হিন্দুগণে কাজী সব মারে কদখিয়া ॥

এই পাঠে “হিন্দু কাজী”র কোন উল্লেখ নেই।

পৃ: ৩৯৬ পাদটীকা—কুহবন (কুংবন) কৃত মুগাবতী—সম্পাদক ড: শিবগোপাল মিশ্র (হিন্দী সাহিত্য সম্মেলন, প্রয়াগ থেকে ১৮৮৫ শকাব্দে প্রকাশিত), পৃ: ৬৮ থেকে সংশ্লিষ্ট অংশটি নীচে উদ্ধৃত করলাম।

সাহ হোসেন আহ বড় রাজা ।

ছত্র সিংহাসন উনকো ছাজা ॥

পণ্ডিত ঔ বুদ্ধবন্ত সয়ানা ।

পট্টে পুরান অরথ সব জানা ॥

ধরম হুদিস্টিল উনহু কই ছাজা ।

হম সির ছাঁহ জীউ জগ রাজা ॥

দান চেয় বহু গনত ন আটৈব ।

বলি ঔ করন ন সরবরি পাটৈব ॥

রাগ জই। লাঁহ গরুপ অহহী ।

সেবা করহি বার সব চহহী ॥

চতুর স্বজান ভাষা সব জানৈ

এস ন দেঠৈ কোয় ।

সভা স্নহ সব কান দৈ

ফুনি রে বখানৈ সোয় ॥

পৃঃ ৪১১ ছঃ ১৮-২০—বৃন্দাবন দাস লিখেছেন যে রামকেলিতে “ব্রাহ্মণসমাজ” ছিল। এইখানে বসেই বরঙ্গগ্রামীণ ব্রাহ্মণ চতুর্ভূজ “ব্রহ্মমহু” অর্থাৎ ১৪১৬ শকাব্দে ( ১৪৯৪ খ্রীঃ ) ‘হরিচরিত’ কাব্য রচনা করেছিলেন। ‘চৈতন্যচরিতামতে’ কানাই-নাটশালা গ্রামে চৈতন্যদেবের “কৃষ্ণচরিত্রঙ্গীতা” দর্শনের উল্লেখ আছে।

পৃঃ ৪২১ ছঃ ৯-১৩—অনেকের ধারণা আছে যে পানিপথের প্রথম যুদ্ধে ( ১৫২৬ খ্রীঃ ) ভারতবর্ষে সবপ্রথম কামান ব্যবহৃত হয়। কিন্তু এ ধারণা একেবারেই ভুল; চতুর্দশ শতাব্দী থেকেই ভারতের বিভিন্ন অঞ্চলে যুদ্ধে কামান ব্যবহৃত হওয়ার প্রমাণ পাওয়া যায় (The Delhi Sultanate, Bharatiya Vidya Bhavan. pp. 460-461 দ্রষ্টব্য)। বাংলা দেশেও পানিপথের প্রথম যুদ্ধের অন্তত নয় বছর আগে থেকে কামান ব্যবহারের প্রমাণ পাওয়া যাচ্ছে। পর্তুগীজ বিবরণগুলিতে লেখা আছে যে, ১৫১৭ খ্রীষ্টাব্দে পর্তুগীজ শাসনকর্তার প্রতিনিধি জোঁআঁ-দে-সিলভেরা যখন চট্টগ্রামের উপকূলের কাছে একটা চালে-বোঝাই নৌকা জোর করে দখল করে নিয়েছিলেন, তখন চট্টগ্রামের শাসনকর্তা ডাঙা থেকে সিলভেরার জাহাজকে উদ্দেশ্য করে কামান দেগেছিলেন ( Campos, Portugese in Bangal p. 2) ডঃ )। বাবরের সমসাময়িক বাংলার সুলতান নসরৎ শাহের গোলন্দাজ-বাহিনীর কামান চালনা দেখে বাবর মুগ্ধ হয়েছিলেন, সুতরাং পানিপথের প্রথম যুদ্ধের অনেক আগেই যে বাংলা দেশে কামান ব্যবহৃত হতে শুরু হয়েছিল, তাতে কোন সন্দেহ নেই।

## হিজরা ও খ্রীষ্টাব্দ

হিজরা	খ্রীষ্টাব্দের কোন্ তারিখে আরম্ভ	হিজরা	খ্রীষ্টাব্দের কোন্ তারিখে আরম্ভ
৭৩৯	২০/৭/১৩৩৮	৭৬৩	৩১/১০/১৩৬১
৭৪০	২৭/৭/১৩৩৯	৭৬৪	২১/১০/১৩৬২
৭৪১	২৭/৮/১৩৪০	৭৬৫	১০/১০/১৩৬৩
৭৪২	১৭/৮/১৩৪১	৭৬৬	২৮/৯/১৩৬৪
৭৪৩	৬/৮/১৩৪২	৭৬৭	১৮/৯/১৩৬৫
৭৪৪	২৬/৫/১৩৪৩	৭৬৮	৭/৯/১৩৬৬
৭৪৫	১৫/৫/১৩৪৪	৭৬৯	২৮/৮/১৩৬৭
৭৪৬	৪/৫/১৩৪৫	৭৭০	১৬/৮/১৩৬৮
৭৪৭	২৪/৪/১৩৪৬	৭৭১	৫/৮/১৩৬৯
৭৪৮	১৩/৪/১৩৪৭	৭৭২	২৬/৭/১৩৭০
৭৪৯	১/৩/১৩৪৮	৭৭৩	১৫/৭/১৩৭১
৭৫০	২২/৩/১৩৪৯	৭৭৪	৩/৭/১৩৭২
৭৫১	১১/৩/১৩৫০	৭৭৫	২৩/৬/১৩৭৩
৭৫২	২৮/২/১৩৫১	৭৭৬	১২/৬/১৩৭৪
৭৫৩	১৮/২/১৩৫২	৭৭৭	২/৬/১৩৭৫
৭৫৪	৬/২/১৩৫৩	৭৭৮	২১/৫/১৩৭৬
৭৫৫	২৬/১/১৩৫৪	৭৭৯	১০/৫/১৩৭৭
৭৫৬	১৬/১/১৩৫৫	৭৮০	৩০/৪/১৩৭৮
৭৫৭	৫/১/১৩৫৬	৭৮১	১৯/৪/১৩৭৯
৭৫৮	২৫/১২/১৩৫৬	৭৮২	৭/৪/১৩৮০
৭৫৯	১৪/১২/১৩৫৭	৭৮৩	২৮/৩/১৩৮১
৭৬০	৩/১২/১৩৫৮	৭৮৪	১৭/২/১৩৮২
৭৬১	২৩/১১/১৩৫৯	৭৮৫	৬/২/১৩৮৩
৭৬২	১১/১১/১৩৬০	৭৮৬	২৪/১/১৩৮৪

হিজরা	খ্রীষ্টাব্দের কোন্ তারিখে আরম্ভ	হিজরা	খ্রীষ্টাব্দের কোন্ তারিখে আরম্ভ
৭৮৭	১২/২/১৩৮৫	৮১৪	২৫/৪/১৪১১
৭৮৮	২/২/১৩৮৬	৮১৫	১৩/৪/১৪১২
৭৮৯	২২/১/১৩৮৭	৮১৬	৩/৪/১৪১৩
৭৯০	১১/১/১৩৮৮	৮১৭	২৩/৩/১৪১৪
৭৯১	৩১/১২/১৩৮৮	৮১৮	১৩/৩/১৭১৫
৭৯২	২০/১২/১৩৮৯	৮১৯	১/০/১৪১৬
৭৯৩	৯/১২/১৩৯০	৮২০	১৮/২/১৪১৭
৭৯৪	২৯/১১/১৩৯১	৮২১	৮/২/১৪১৮
৭৯৫	১৭/১১/১৩৯২	৮২২	২৮/১/১৪১৯
৭৯৬	৬/১/১৩৯৩	৮২৩	১৭/১/১৪২০
৭৯৭	২৭/১০/১৩৯৪	৮২৪	৬/১/১৪২১
৭৯৮	১৬/১০/১৩৯৫	৮২৫	২৬/১২/১৪২১
৭৯৯	৫/১০/১৩৯৬	৮২৬	১৫/১২/১৪২২
৮০০	২৪/৯/১৩৯৭	৮২৭	৫/১২/১৪২৩
৮০১	১৩/৯/১৩৯৮	৮২৮	২৩/১১/১৪২৪
৮০২	৩/৯/১৩৯৯	৮২৯	১৩/১১/১৪২৫
৮০৩	২২/৮/১৪০০	৮৩০	২/১১/১৪২৬
৮০৪	১১/৮/১৪০১	৮৩১	২২/১০/১৪২৭
৮০৫	১/৮/১৪০২	৮৩২	১১/১০/১৪২৮
৮০৬	২১/৭/১৪০৩	৮৩৩	৩০/৯/১৪২৯
৮০৭	১০/৭/১৪০৪	৮৩৪	১৯/৯/১৪৩০
৮০৮	২৯/৬/১৪০৫	৮৩৫	৯/৯/১৪৩১
৮০৯	১৮/৬/১৪০৬	৮৩৬	২৮/৮/১৪৩২
৮১০	৮/৬/১৪০৭	৮৩৭	১৮/৮/১৪৩৩
৮১১	২৭/৫/১৪০৮	৮৩৮	৭/৮/১৪৩৪
৮১২	১৬/৫/১৪০৯	৮৩৯	২৭/৭/১৪৩৫
৮১৩	৬/৫/১৪১০	৮৪০	১৬/৭/১৪৩৬



হিজরা	খ্রীষ্টাব্দের কোন্ তারিখে আরম্ভ	হিজরা	খ্রীষ্টাব্দের কোন্ তারিখে আরম্ভ
৮৪১	৫৭৭/১৪৩৭	৮৬৮	১৫৭২/১৪৬৩
৮৪২	২৪/৬/১৪৩৮	৮৬৯	৩৭২/১৪৬৪
৮৪৩	১৪/৬/১৪৩৯	৮৭০	২৪/৮/১৪৬৫
৮৪৪	২/৬/১৪৪০	৮৭১	১৩/৮/১৪৬৬
৮৪৫	২২/৫/১৪৪১	৮৭২	২/৮/১৪৬৭
৮৪৬	১২/৫/১৪৪২	৮৭৩	২২/৭/১৪৬৮
৮৪৭	১/৫/১৪৪৩	৮৭৪	১১/৭/১৪৬৯
৮৪৮	২০/৪/১৪৪৪	৮৭৫	৩০/৬/১৪৭০
৮৪৯	৯/৪/১৪৪৫	৮৭৬	২০/৬/১৪৭১
৮৫০	২৯/৩/১৪৪৬	৮৭৭	৮/৬/১৪৭২
৮৫১	১৯/৩/১৪৪৭	৮৭৮	২৯/৫/১৪৭৩
৮৫২	৭/৩/১৪৪৮	৮৭৯	১৮/৫/১৪৭৪
৮৫৩	২৭/২/১৪৪৯	৮৮০	৭/৫/১৪৭৫
৮৫৪	১৪/২/১৪৫০	৮৮১	২৬/৪/১৪৭৬
৮৫৫	৩/২/১৪৫১	৮৮২	১৫/৪/১৪৭৭
৮৫৬	২৩/১/১৪৫২	৮৮৩	৪/৪/১৪৭৮
৮৫৭	১২/১/১৪৫৩	৮৮৪	২৫/৩/১৪৭৯
৮৫৮	১/১/১৪৫৪	৮৮৫	১৩/৩/১৪৮০
৮৫৯	২২/১২/১৪৫৪	৮৮৬	২/৩/১৪৮১
৮৬০	১১/১২/১৪৫৫	৮৮৭	২০/২/১৪৮২
৮৬১	২৯/১১/১৪৫৬	৮৮৮	৯/২/১৪৮৩
৮৬২	১৯/১১/১৪৫৭	৮৮৯	৩০/১/১৪৮৪
৮৬৩	৮/১১/১৪৫৮	৮৯০	১৮/১/১৪৮৫
৮৬৪	২৮/১০/১৪৫৯	৮৯১	৭/১/১৪৮৬
৮৬৫	১৭/১০/১৪৬০	৮৯২	২৮/১২/১৪৮৬
৮৬৬	৬/১০/১৪৬১	৮৯৩	১৭/১২/১৪৮৭
৮৬৭	২৬/৯/১৪৬২	৮৯৪	৫/১২/১৪৮৮

হিজরা

খ্রীষ্টাব্দের কোন্ হিজরা  
তারিখে আরম্ভ

খ্রীষ্টাব্দের কোন্  
তারিখে আরম্ভ

৮২৫	২৫/১১/১৪৮২	২২১
৮২৬	১৪/১১/১৪৯০	২২২
৮২৭	৪/১১/১৪৯১	২২৩
৮২৮	২৩/১০/১৪৯২	২২৪
৮২৯	১২/১০/১৪৯৩	২-৫
৯০০	২/১০/১৪৯৪	২২৬
৯০১	২১/৯/১৪৯৫	২২৭
৯০২	৯/৯/১৪৯৬	২২৮
৯০৩	৩০/৮/১৪৯৭	২২৯
৯০৪	১৯/৮/১৪৯৮	২৩০
৯০৫	৮/৮/১৪৯৯	২৩১
৯০৬	২৮/৭/১৫০০	২৩২
৯০৭	১৭/৭/১৫০১	২৩৩
৯০৮	৭/৭/১৫০২	২৩৪
৯০৯	২৬/৬/১৫০৩	২৩৫
৯১০	১৪/৬/১৫ ৪	২৩৬
৯১১	৪/৬/১৫০৫	২৩৭
৯১২	২৪/৫/১৫০৬	২৩৮
৯১৩	১৩/৫/১৫০৭	২৩৯
৯১৪	২/৫/১৫০৮	২৪০
৯১৫	২১/৪/১৫০৯	২৪১
৯১৬	১০/৪/১৫১০	২৪২
৯১৭	৩১/৩/১৫১১	২৪৩
৯১৮	১৯/৩/১৫১২	২৪৪
৯১৯	৯/১/১৫১৩	২৪৫
৯২০	২৬/২/১৫১৪	

১৫/২/১৫১৫
৫/২/১৫১৬
২৪/১/১৫১৭
১৩/১/১৫১৮
৩/১/১৫১৯
২৩/১২/১৫২০
১২/১২/১৫২১
১/১২/১৫২২
২০/১১/১৫২৩
১০/১১/১৫২৪
২৯/১০/১৫২৫
১৮/১০/১৫২৬
২৭/৯/১৫২৭
১৫/৯/১৫২৮
৫/৯/১৫২৯
২৫/৮/১৫৩০
১৫/৮/১৫৩১
৩/৮/১৫৩২
২৩/৭/১৫৩৩
১৩/৭/১৫৩৪
২/৭/১৫৩৫
২০/৬/১৫৩৬
১০/৬/১৫৩৭
৩০/৫/১৫৩৮

বা. সা. ই. ১।২—ডঃ স্কুমার মেন রচিত বাঙ্গালা সাহিত্যের ইতিহাস,  
প্রথম খণ্ড, দ্বিতীয় সংস্করণ।

বা. সা. ই. ১।৩—ঐ, তৃতীয় সংস্করণ।

বা. সা. ই. ১।৪—ঐ, চতুর্থ সংস্করণ।

সা. প. প.—সাহিত্য পরিষৎ পত্রিকা।

I. H. Q.—Indian Historical Quarterly,

I. M. C.—Indian Museum Catalogue.

J. A. S.—Journal of the Asiatic Society.

J. A. S. B.—Journal of the Asiatic Society of Bengal.

J. A. S. P.—Journal of the Asiatic Society of Pakistan.

J. B. O. R. S.—Journal of the Bihar and Orissa Re-  
search Society.

J. B. R. S.—Journal of the Bihar Research Society.

J. N. S. I.—Journal of the Numismatic Society of India.

P. A. S. B.—Proceedings of the Asiatic Society of  
Bengal.

ବିର୍ଷକ୍ତ ଓ ଶ୍ରଦ୍ଧାଞ୍ଜଳି

ଏବଂ

ସାମ୍ବାଜିକ ଇତିହାସର ବିଷୟସୂଚୀ



## নিৰ্ঘণ্ট ও গ্রন্থপঞ্জী

[ এই গ্রন্থ রচনার সময় যে সমস্ত গ্রন্থ থেকে উপকরণ সংগৃহীত হয়েছে, অথবা কোন-না-কোন ভাবে যে সব গ্রন্থ লেখকের কাজে লেগেছে, সেগুলি নিৰ্ঘণ্টে \* চিহ্ন দিয়ে উল্লেখ করা হল। আশা করি, এতেই গ্রন্থপঞ্জীর প্রয়োজন নিবৃত্ত হবে। বেশীর ভাগ গ্রন্থেরই আধুনিকতম সংস্করণ ব্যবহৃত হয়েছে। অবশ্য কোন কোন গ্রন্থের অন্য সংস্করণ ব্যবহৃত হয়েছে। অপ্রকাশিত গ্রন্থগুলির বেলায় কোথাও পুঁথি ব্যবহার করা হয়েছে, কোথাও বা অন্য লেখকের বিবরণের উপর নির্ভর করা হয়েছে। ]

অক্ষয়কুমার মৈত্রেয় ৩৩৯	* 'আইন-ই-আকবরী' ১০, ১৫, ৬৩,
* 'অখবার-অল অখিয়ার, ৫৬-৫৭, ৭০	৬৫, ৯৬, ১০২, ১০৪, ১৩৫, ১৬৭,
অখী সিরাজুদ্দীন, শেখ ৪৫, ৪০২	২০৮, ২৬৯, ৫২৪, ৫২৬-৫২৭
অচিন্ত্যকুমার সেনগুপ্ত ৩৯৯	আকবর ৫৬, ১০২, ১১৪, ১৩৫, ২১০,
অজলকা (?) খান ২০৭	৪০৯
অঈষত ২২৫, ৩৬৭	* 'আকবরনামা' ৪৫২
* 'অদ্বৈতপ্রকাশ' ১০০-১০১, ৪১০	আখন্দ শের ২৪১
অনন্ত সেন ২০১, ২০৪	আছাউদ্দীন ৫৪৫
অনিকর ১২৫-১২৬	আজম খান ৫৭, ৭০
অন্নদাশঙ্কর রায় ৩৯৯	আজমল খান ২০৫
অর্পণা দেবী ৫৫০	আতা মালিক ৩৫৬
অমরমাণিক্য ৩১৩	আতা ওয়াহিদুদ্দীন, মৌলানা ৫৬
অন্নুল মুল্ক মাহর ৪০	আনওয়ার খান ৪৩৭
অর্জুন মিশ্র ২০২, ৫৩৬	আনওয়ার, শেখ ১৩৯
অল-আশরফ বারসবায় ১৫২-১৬০,	আন্তোনিয়ো-দে-সিলভা-মেনেজেস ৪৪৮
৫৩২	আবিদ আলী ১৩৭, ১৪৮-১৪৯, ১৬৮,
* 'অল-জও অল-লামে লে-অহ্ল অল-	২৫৬, ৩৩৯, ৩৮৩, ৪৩৩
কবুল অল-তাসে' ৫৩১	আবুল কজল ১৩৫, ৪৫২
অল-সখাওয়া ২০, ৭৭, ৯৭, ৫৩১	আবুল ফতেহ ৪২৩
আই. এইচ. কুরেশী ৩৬৬	আবু হানিফা ১৫৯, ৫৩২

আবদুর রজ্জাক ১৫৪  
 আবদুল করিম, ড: ২৪, ৭৭, ৯০, ২০  
 ২১৮, ৫২২—৫২৪, ৫২৬, ৫৩১  
 আবদুল করিম সাহিত্যবিশারদ ৩৫৮  
 আবদুল মোমিন চৌধুরী ১০৬  
 আবদুল হক দেহলবী, শেখ ২১০  
 আবদুল হালীম, ড: ৩২২  
 আব্বাস খান সরওয়ানী ৪৩৭, ৪৪১  
 আয়ানতউল্লা আহমদ ২২০  
 “আমীর হুদা” ১০৬  
 আরিফ ৩৫৩  
 আলফা খান ৪৪৭, ৪৫৩  
 আলবুকার্ক ৩৩৬-৩৩৭  
 \* ‘আলমগীরনামা’ ২৮১, ২৯৩  
 আলাউদ্দীন আলী শাহ ৪, ৬, ১  
 ১৩—১৯, ২০, ৫২৩, ৫২৪  
 আলাউদ্দীন ফিরোজ শাহ (১ম) ৯৮,  
 ১০২, ৪৩৮  
 আলাউদ্দীন ফিরোজ শাহ (২য়) ৪১৬,  
 ৪৩৮—৪৪০, ৪৪১, ৪৪৫  
 আলাউদ্দীন বুখারি ১৫২  
 আলাউদ্দীন হোসেন শাহ ৪০, ৬০,  
 ১১৩, ১৪২, ১৪৩, ১৮৪, ১৯৪-১৯৫,  
 ১৯৭, ২০০, ২০৩, ২০৬, ২২০-২২১,  
 ২২৩, ২২৬, ২৪৭, ২৫৬, ২৬৩—২৬৬,  
 ২৬৮-৪১৪, ৪১৫, ৪২৪, ৪২৮,  
 ৪৩১, ৪৩৪—৪৩৬, ৪৪০, ৪৪৫-৪৪৬,  
 ৪৫৫-৪৫৬, ৪৫৮, ৪৬০, ৪৯১-৪৯২,  
 ৪৯৮, ৫০০-৫০১, ৫১৮-৫১৯, ৫২৫,  
 ৫২৭, ৫৩০-৫৩১, ৫৪০, ৫৪৪, ৫৪৭-  
 ৫৪৮, ৫৫০, ৫৫৩-৫৫৪

আলাউদ্দীন ( হোসেন শাহের জামাতা )

৪১৬

আলা-উল-বুখারি ৫৩২

আলা-উল-হক ( আলী অল-হক ) ২১,

৪৫, ৫৬-৫৭, ৫৯, ৬৮-৬৯, ১১৩, ১১৫

আলাওল ৫৪৫

“আলা বাদশাহ” ৩৫২-৩৫৪

আলী মুবারক—ঈ: আলাউদ্দীন আলী  
 শাহ

আলী শাহ ( ইলিয়াস শাহের পুত্র ) ২৫

আশমানতারা ১৪১

আশরফ—ঈ: অল-আশরফ বারসবায়

আশরফ খান ২০৭

আশরফ সিয়নানী ১০৭, ১১০-১১১

১১৩-১১৪, ১২২, ১৩২, ১৪৫, ৫২৪

\* ‘আসাম ব্রজি’ ৫৪০

আসকারি ( বাবরের পুত্র ) ৪২০-৪২২

আহমদ শরীফ, অধ্যাপক ৯০, ৩৫৮,

৫৪৩-৫৪৪, ৫৪৬-৫৪৭, ৫৫২

আহমদ হাসান দানী, ড: ২১, ৪৫,

১০৩-১২০, ১২৮, ১৩৭, ১৫২-১৫৪,

১৫৬, ১৫৮, ১৬২-১৬৩, ১৬৫, ১৬৮,

১৯২, ৪৩৬, ৫১৫, ৫১৭, ৫২৪, ৫২৮,

৫৩৩

ইউজেন ( চতুর্থ ) ৪৮৪

\* ‘ইউজেন-জোলেথা’ ৮২, ৯১-৯৩

\* ‘ইকদুখ-খামিন’ ৭৫

ইকরার খান ২০৫

ইখতিয়ারুদ্দীন গাজী শাহ ৪, ৯,

১১—১৩, ২৩, ৪৮

‘ইতিহাস’ ২২	উজ্জল (২) খান ২০৭, ৫১২
* ‘ইতিহাসপ্রিত বাংলা কবিতা’ ৩১৩	‘উজ্জলনীলমণি’ ৩৬৪
* ‘ইন্দো-পাক সঙ্গীতের ইতিহাস’ ৩২২	উলুখং ১৫৬
* ‘ইন্বা-উল-গুম্ব’ ৫৫, ৭৫, ৭৭, ২৬, ১৫২	উলুগ মসনদ খান ৪৩৮, ৪৪০
* ‘ইন্শা-ই-মাহ্‌র’ ৪০	উস্তাদ আলী কুলী খান ৪২০
* ‘ইব্ন-ই-হজর ২০, ৫৫, ৭৫, ৭৭, ২৬-২৭, ১৫২, ১৬৬-১৬৮	এইচ. ডবলিউ ক্লার্ক ৫৩-৬৪
ইব্ন বত্তুতা ৫-৮, ১১-১২, ১৮, ৩২২, ৪৬৪-৪৬৬, ৪৬৯-৪৭০, ৫১৩, ৫২২-৫২৪, ৫২৬	এনামুল হক, ডঃ—ডঃ মুহম্মদ এনামুল হক, ডঃ
ইব্রাহিম কায়ুম ফারুকী ১০৮-১২২, ২১৫, ২১৮-২১৯, ৫৩৭-৫৩৯	এন. কে. সাহ ৫৪১
ইব্রাহিম খান ৪৪২, ৪৫২	এন. বি. বলোথ, ডঃ ২১২
ইব্রাহিম শাহ শর্কী ১০২-১১১, ১১৩-১২০, ১২২, ১২৫-১২৬, ১২৯, ১৩৭, ১৪৫-১৪৬, ১৫৩-১৫৫, ১৫৭, ১৬০, ১৬৩, ১২০, ৫২৭, ৫২৯-৫৩০	এ. বি. এম. হবীবুল্লাহ, ডঃ ২১৮, ২৪৯, ৩৩১, ৩৮৩, ৫৩৭
ইব্রাহিম শাহ লোদী ৪১৭	ঐসন তিমুর সুলতান ৪২২
ইলতুংমিশ—ডঃ শামসুদ্দীন ইলতুংমিশ	ওয়াইজ ১৩২-১৩৫
ইলাহী বখ্‌শ, মুন্সী ১৩৭, ৩৪২	‘ওয়াকিআত-ই-মুতাকী’ ৩৩৪
* ইলিয়ট ৩৬	ওয়ালি খান ১৫৬
ইলিয়াস শাহ—ডঃ শামসুদ্দীন ইলিয়াস শাহ	ওয়ালি মুহম্মদ ৩৫৬, ৫১২
ইসমাইল গাজী ১৮৪-১৮৯, ২০১, ২১০-২১১, ৩০০-৩০১	ওয়াংতা-ইউয়ান ৪৭০-৪৭১
ইসমাইল মিতা ৪১২, ৪৩৭	ওয়াস্টমেকট ৩৩২
ঈশা খাঁ ৫৪৪	ওয়াংজেব ৫, ৩৫৭, ৪১১, ৫৫৪-৫৫৫, ৫৪৭
ঈশান নাগর ১৪০, ৪১০	* ‘কটকরাজবংশাবলী’ ৩০৪, ৩০৯-৩১০, ৩১২
উইলিয়ম ক্রাফলিন, মেজর ১০০, ২৫৪, ৪১২	কদর খান (১ম) ২, ৩, ৪, ১৩, ১৫, ১৭
	কদর খান (২য়) ১৮২, ২০৪
	কন্দর্পনারায়ণ ১৩৪
	কপিলেন্দ্রদেব ১৭৩, ১৮৮
	কবি কঙ্ক ৩৫২
	কবি কর্ণ ৩৫৩



কবিকর্ণপুর ২০৫-২০৭, ৩১২, ৩১২,	কুংবন, শেখ ২৭০, ৩৮৪, ৩২৪-৩২২
৩৪৫, ৩৫০, ৩৫২, ৩৬৩, ৩৭২, ৩৭৬,	কুংবুদ্দীন আইবক ২৪৩
৩৮৬-৩৮৭, ৪১১	কুংবুদ্দীন বখতিয়ার কাকী, শেখ ৫২৩
কবিশেখর ৩৭৭, ৪৩৫, ৪৫৪-৪৫৫,	কুংবুদ্দীন হানাকী ৭৬
৫৪৮-৫৫৩	কুংবু-উল-মুল্ক ৩১৩
কবিরঞ্জন ৩৭৭, ৩২৩, ৪৩৫, ৪৫৪,	কুংবু খান ৪১২, ৪৩৭, ৪৪১-৪৪২, ৪৫২
৫৪৮-৫৫৩	কুমারদেব ৩৭১-৩৭২
কবীন্দ্র পরমেশ্বর ২০৬, ২৬২, ২৭৫,	‘কুমারসম্ভব’ ১২২-১২৩, ৪৮৭
৩০৪, ৩২৭, ৩২২-৩৩০, ৩৫৬, ৩৮৮,	কুলধর—ঈ: শুভরাজ খান
৩২৩, ৪০০, ৪২৭, ৪৩৫	কুকী ৪২২-৪২৩
কবীর, শেখ ৪৩৫, ৫৫২-৫৫৩	কুন্তিবাস ২২, ১৪৭, ১২৫—২০১, ২০৪-২০৫, ৩৮৪, ৪৬০-৪৬১, ৪৮২-৪২০, ৫৩২
কমলা ১৩৪	* ‘কুন্তিবাস-পরিচয়’ ১৪৭, ৪৮২, ৫১৩
করবে থা ৩১৮, ৩২১, ৩২৩-৩২৪, ৩৬২	কৃষ্ণদাস কবিরাজ ১৪২, ২২৮, ২৭১, ২৭৪, ২২৫-২২৮, ৩৪০, ৩৪২, ৩৪৮, ৩৫০-৩৫১, ৩৫২-৩৬০, ৩৬৩, ৩৬৭, ৩৭২, ৩৭৫, ৩৭৮, ৩৭২, ৩৮২, ৩৮৫-৩৮৭, ৩২২, ৪০৬-৪০৭, ৪১১, ৫১০, ৫১১, ৫১৪
কংসনারায়ণ ২৮২, ৪১৬	কৃষ্ণদেব রায় ২২২, ৩০৭
কাজী সিরাজুদ্দীন ৬৭-৬৮	কৃষ্ণবল্লভ ১৩৪
কানিংহাম ২১৪, ৫১৬-৫১৭	কৃষ্ণমাণিক্য ৩১৩
কান্দু—ঈ: গণেশ, রাজা	কে. কে. বহু ৩২
কাফুর, মালিক ২৪১, ২৬৬-২৬৭	কেদার থা ১২৬, ২০৪
“কামতেশ্বর” ১৮৮	কেদারনাথ মজুমদার ২৫৭
কাশেম্বর ১৮৫-১৮৮	কেদার রায় ১২০-১২১, ১২৭, ২০১, ২০৪, ৫৩৫
কালিকায়রাজ কাছনগো, ড: ৪৪২-৪৪৩	কেশব ছত্রী (খান, বহু) ৩৪৩, ৩৪৬, ৩৪২-৩৫১, ৩৭৩-৩৭৪, ৩২৩, ৪০৫
কালীপ্রসন্ন সেন ৪২৫	
কাশীচন্দ্রমাণিক্য ৩১৩	
কাসিম গনী, ড: ৬৫	
কিশোরীমোহন মৈত্র, শ্রীযুক্ত ২১৮,	
৫৩১, ৫৩৫	
কীরা (কিরাং) খান ২৫৮	
* ‘কীর্তন-পদাবলী’ ৫৫০	
* ‘কীর্তিলতা’ ১১৫	
কীর্তিনিহ ১১৫	

\* 'কোচবিহারের ইতিহাস' ২০

গউসী ৫২৫

ক্রেটন ১২২, ২১৪, ৩৪১, ৪১২, ৫১৭

গগন খাঁ ৩১২, ৩২৩

\* 'কর্ণদাগীতচিন্তামণি' ৫৫৩

গজাদাস পণ্ডিত ২৩৩-২৩৪

খওয়াজা-ই-জহান (মালিক সারওয়ার)

গজপতি ১৮৫, ১৮৮

৭৭-৭৮, ১২০

গজলো-ভাস-দে-মেলা ৪০৩

খওয়াজা করিম, শেখ ১৫৪

গণদেব ১৭৩

খওয়াজা জহান ১৮২

গণেশ (কান্‌স), রাজা ৫৪-৫৫, ৮৫-

খওয়ারাস খান (শের খান সুরের  
সেনাপতি) ৪৪৩-৪৪৪

৮৬, ৯৪, ৯৭-৯৮, ৯৯-১৪৯, ১৫০-

খওয়ারাস খান (হোসেন শাহের কর্মচারী)

১৫১, ১৫৫, ১৬১-১৬৩, ১৬৯,

৩২৬, ৩৫৫, ৩৫৭

১৭২, ১৭২, ১৯৩, ১৯৫, ২৩৫, ২৪১,

খগেন্দ্রনাথ মিত্র ৮৭, ৪৫৩, ৫৫০

২৭৭, ৩৫৪, ৫১৫, ৫১৮, ৫২৭-৫২৮,

\* 'খজানাহ্-ই-আমিয়াহ্' ৭৬

৫৩২, ৫৩৪

'খজীনৎ অল-আশফিয়া' ২১০, ৫২৪

গণেশচন্দ্র ঘোষ ৩৬৮

খলিশ খান ৩৫৪

গদাধরদাস ৩৬০-৩৬২, ৪০৬

খলিক খান ৪৩৭

গদ্বর্দ খান ১২৮, ২০৫, ৩৮৩-৩৮৪

খজুর রায় ৩১২, ৩২৩

গদ্বর্দ রায় ১২৭-১২৮, ২০৪-২০৫, ৩৮৪

খাজা শিহাবুদ্দীন ৪৩২-৪৩৩, ৪৪৭

গাজী খান সুর ৪৪৪

খান-ই-খানান যুসুফখেল ৪৪৪

গাজুর খান ৪২৮-৪২৮

খান জহান (১ম) ১৭৩, ১৮২, ২০৬,

গিয়াসুদ্দীন আজম শাহ ৪৩, ৭৭-৮০,

৫১৯

৬০-৬৪, ৯৫, ১০৭, ১০৮, ১১০,

খান জহান (২য়) ২০৬

১১৫, ১৭৫, ১৭৭, ১৮১, ১৮৪, ৩৩০,

খান জহান (৩য়) ২০৬, ২৪০, ২৫১,

৪৫৩-৪৫৪, ৫১৫

২৬০

গিয়াসুদ্দীন ভোগলক (১ম) ১, ১৬, ৮৭

খান রজলিস আলী ২০৭

গিয়াসুদ্দীন ভোগলক (২য়) ৮৮

\* 'খুর্শীদ-ই-জহান-নামা' ১৩৭

গিয়াসুদ্দীন পীর আলী ৬৫

খুর্শীদ খান ২০৭

গিয়াসুদ্দীন বলবন ৮, ২৪৩

খোদা রখ্‌ খান ৩৮৮, ৪৩২, ৪৩৭,

গিয়াসুদ্দীন বাহাদুর শাহ ১

৪৫২-৪৫৩

গিয়াসুদ্দীন মাহমুদ শাহ ১, ৮৮, ৮৯,

খোদায়াসফ রায় ১৩২, ১৩৪

২১৮, ২৭৪, ৩৭৭, ৩৮৩, ৩৮৮, ৪৩৭-

৪৩৮, ৪৪০-৪৫৮, ৫১৮, ৫৪১

গিয়াহুদ্দীন শাহ (বাহ্মনী রাজ্য) ৩৫

গিরিজাশঙ্কর রায়চৌধুরী ২২৭, ৩২৫

'গীতগোবিন্দ' ১২২

গুণরাজ খান—ঈ: মালাধর বসু

গুল ৬২

'গুলজার-ই-আত্রার' ৫২৫

গেট ২২২

গোপাল চক্রবর্তী ৩৭৮-৩৭৯

'গোপালচরিত মহাকাব্য' ৩৭৭

গোপালদাস (রামগোপালদাস) ৩৭৭,  
৪৫৪, ৫৪২

\* 'গোপালবিজয় কাব্য' ৩৭৭, ৫৪৮-৫৪২

গোপীনাথ আচার্য ২২৫

গোপীনাথ বসু ৩৮৩

'গোপীনাথবিজয় নাটক' ৩৭৭

গোবর্ধন ২০৩

গোবর্ধন দাস বাবাজী ৫৪৭-৫৪৮

গোবর্ধনদাস মজুমদার ৩৭৮, ৪০৮, ৪৬০

গোবিন্দদাস কবিরাজ ৩৭৭, ৪০০

গোবিন্দ বসু ৩৮৩

গোবিন্দ ভোই বিজ্ঞান ৩০১-৩০২, ৩০৪

গোবিন্দমাণিক্য ৩১৩

\* 'গোরক্ষবিজয়' ১৮২

গোলাম আলী ৪২৩

গোলাম আলী আজাদ বিলগ্রামী ৭৬

গোলাম সারোয়ার ২১০

গোলাম হোসেন ১০, ১২, ৩২, ৫৫,  
১০৩, ১৫২, ২৬০, ২৬২, ২৭৩, ২৭২,  
২৯০, ৩৮২, ৪৩৩

\* 'গোড়ের ইতিহাস' ২৫৬, ২৬৬, ৩৫৪,  
৩৮৩

\* 'গৌরগণোদ্দেশদীপিকা' ৩৭৬

গৌরাই মল্লিক ৩১৬, ৩১৭, ৩২২-৩২৫,  
৩৩১, ৩৫২-৩৬০, ৩৭২-৩৮০

\* 'গৌরাকবিজয়' ১২৭, ৩৪৭

গ্যাসপার কোরীয়া ২৭০

গ্রোমাল ৩৩৭

চণ্ডীদাস ৫২

'চন্দ্রপ্রভা' ১২৭

চন্দ্রশেখর ১৩৩

\* 'চন্দ্রকবিজয়' ৩১৩

চরক ২০১

চাঁদ কাজী ৩৬০

\* 'চিত্রে নবদ্বীপ' ৪১০

চিরঞ্জীব লেন ৩৭৬

চুড়ামণিদাস ১২৭, ২০৪, ৩৪২, ৩৪৭-  
৩৪৮, ৩৫০

চেন-খুং ১৭৫, ১৭৭, ১৮১

\* 'চৈতন্যচন্দ্রোদয় নাটক' ২২৫-২২৬, ৩১০,  
৩১২, ৩৪৫-৩৪৬, ৩৫২, ৩৭২, ৩৮৬,  
৪১১

\* 'চৈতন্যচরিতামৃত' ২২৮, ২৬২, ২৭১-  
২৭২, ২৭৫, ২৮২, ২২৬-২২৭, ২২৯,  
৩০৭, ৩১১-৩১২, ৩৩৪, ৩৩২-৩৪১,  
৩৪৮, ৩৫০-৩৫১, ৩৫২-৩৬০, ৩৬২,  
৩৬৪-৩৬৫, ৩৬৭-৩৬৮, ৩৭০-৩৭৬,  
৩৭৮-৩৭৯, ৩৮২, ৩৮৫, ৩৮৭, ৩৯২,  
৪০৫-৪০৯, ৪১১, ৪৬০, ৫১০-৫১১

চৈতন্যচরিতামৃত মহাকাব্য' ৩৪৫

চৈতন্যদেব (মহাপ্রভু) ২০৩, ২২৪, ২২৬-  
২২৯, ২৩২-২৩৭, ২৬৮, ২২৫-৩০০,

৩০৩, ৩০৮, ৩১১-৩১২, ৩৪০, ৩৪২-৩৫২, ৩৫২-৩৬১, ৩৬৩-৩৭০, ৩৭২-৩৭৬, ৩৮০-৩৮২, ৩৯১-৩৯৩, ৪০০-৪০৬, ৪০৯-৪১১, ৪৪১-৪৪২	জালালুদ্দীন তব্রিজী, শেখ ১১, ১৬, ১৮-১৯, ৫২২-৫২৬
* 'চৈতন্যভাগবত' ২২৪, ২২৬-২২৮, ২৩১-২৩৩, ২৩৬-২৩৭, ২৬৯, ২৯৪-২৯৫, ২৯৯, ৩১০-৩১১, ৩৩৯, ৩৪১-৩৪৩, ৩৫০, ৩৬০, ৩৬৫, ৩৬৭, ৩৭২, ৩৭৫, ৩৮১-৩৮২, ৩৮৭, ৩৯১, ৪০০, ৪০৩-৪০৬, ৪০৮-৪০৯, ৫০০-৫০১, ৫১০, ৫১২	জালালুদ্দীন ফতেহ শাহ ২০৬, ২১৩, ২১৬-২৪১, ২৪৩-২৪৫, ২৫০-২৫২, ২৫৯-২৬২, ২৬৬, ২৮৪, ৩৮৯, ৪১০, ৪৩০, ৫৩১, ৫৩৯
ছিলে খোজা ৩১৭, ৩২২, ৩৬০	জালালুদ্দীন মুহম্মদ শাহ ৫৫, ১০০, ১০৯, ১২০-১৩২, ১৩৬-১৪০, ১৪৩, ১৪৯, ১৫০-১৫২, ১৫২-১৬৬, ১৬৭-১৬৮, ১৭২, ১৯৩-১৯৪, ২০০, ২০৯, ২৭৭, ৩৩০, ৩৩২, ৪৮০, ৫৩১-৫৩৪, ৫৩৬-৫৩৭
ছুটি খান ৩২৬-৩২৯, ৩৫৬-৩৫৭, ৩৯৯, ৪১১, ৪২৭-৪২৮, ৪৩৫	জালালুদ্দীন শর্কী ২৮৬
জগদত্ত ১৬০, ৫৩২, ৫৩৪	জালাল খান লোহানী ৪১৮-৪১৯, ৪২৩, ৪৪১-৪৪২
জগদানন্দ (গৌড়েশ্বরের সভাসদ) ১৯৬-১৯৭, ২০৪-২০৫	জালাল খান স্মর ৪৪৩-৪৪৫
জগদানন্দ (চন্দ্রদ্বীপ) ১৩৪	জাফর খান (আলাউদ্দীন হোসেন শাহের কর্মচারী) ৩৫৬
'জগদাভরণ' ৩২৮	জাফর খান (ফখরুদ্দীন মুবারক শাহের জামাতা) ১২-১৩, ৪৭-৪৮, ৫০-৫১
জগন্নাথ পণ্ডিত ৩২৮	জাফর খান (বাংলার নবাব) ১০৪
জগাই ৩৮১-৩৮২	জাফর খান (সৈফুদ্দীন ফিরোজ শাহের কর্মচারী) ২৫৮
জয়চন্দ্র ৩৩২	জামী ২৩
জয়দেব ১৩৪	জালাল খান ৪২৫
জয়ানন্দ ১৯৬, ২২৯, ২৩১-২৩২, ২৩৪-২৩৬, ২৩৯, ২৯৮-৩০০, ৩৪২, ৩৪৬, ৩৪৮, ৩৫০-৩৫১, ৩৬১, ৩৬৮, ৩৭২-৩৭৩, ৪০৬, ৫১০, ৫১৪, ৫২২	জাহাঙ্গীর ৫৬, ১০২, ১১৪, ২১০
জর্জ-অলকোকোরাহো ৪৪৮	জাহিদ, শেখ ১৩৭-১৩৮
জালালুদ্দীন কুত্বাদি, শেখ ৫২২, ৫২৫-৫২৬	জিউয়ল ১০৮, ১৩৯, ১৫১, ১৫৭
	জিয়াউদ্দীন বারনি ২, ৭, ২৪, ৩০, ৩২, ৩৫, ৩৭, ৩৯-৪০, ৪২-৪৫, ৩৩৯-৩৪১

জীব গোস্বামী ১৪১-১৪২, ৩৭০-৩৭১

জীবদেবার্চা কবিভিগ্নিম ৩০৭-৩০৯,

৫৪১-৫৪২

জে. জে. এ. কাম্পোস ৪৪৩, ৪৫০,

৫৫৫

জৈহুদ্দীন ২১৪-২১৫

জৈহুদ্দীন হারাওয়ারী ১২৯, ২১৫

জোআ-কোএলহো ৩৩৭-৩৩৮, ৪৩২

জোআ-কোরীআ ৪৪৩, ৪৪৯

জোআ-দে-বারোস ২৭০, ২৭৩-২৭৪,

৩২৯, ৩৩২, ৩৩৬, ৩৮৬, ৩৮৮,

৪৯৯-৫০০, ৫১৪

জোআ-দে-ভিল্লালোবোস ৪৪৩, ৪৪৯

জোআ-দে-সিলভেরা ৩২৯, ৩৩১, ৩৩৭-

৩৩৮, ৪৩২, ৫৫৫

জোহর ৪৪৫

জানদাস ৪০০

জ্যামেট ৬৩

টমাস ১১, ১৪, ৩৩

তকী আল-কাসি ৭৫

তকীউদ্দীন ৪০৬

‘তজকিরৎ-ই-আউলিয়া-ই-হিন্দ’ ৫২৪

\* ‘তজকিরৎ-উল-গুয়াকৎ’ ৪৪৫

\* ‘তবকাৎ-ই-আকবরী’ ১০, ২৩, ৩৫, ৩৮,

৪৬, ৫৩-৫৪, ৯৪, ৯৬, ৯৮, ১০২,

১১১, ১৫২, ১৬৭, ১৭১, ১৮৪, ২১৩,

২১৬-২১৮, ২২১, ২৩৮-২৩৯, ২৪৪,

২৪৯-২৫০, ২৫২, ২৫৮-২৬১, ২৬৩,

২৬৫, ২৬৯, ২৭৮, ২৮০, ২৮২, ২৮৫,

৩৩৮, ৩৯০, ৪০২, ৪১২, ৪১৫, ৫২৭

তরগী ১২৭, ২০৪, ২০৫

তরবিয়ৎ খান ১৮২

তাই-স্লাই ৮১

\* ‘তাও-সি-চি-লিয়েহ্’ ৪৭০

তাতার খান ৩১

\* ‘তারিখ-ই-ফিরিশতা’ (ফিরিশতা) ২২,

৩৯, ৪৫, ৫৩, ৬৫, ৮৫, ৯৬-৯৮, ১০২,

১০৭, ১১১, ১৩৯, ১৪৬-১৪৭, ১৫০-

১৫২, ১৫৭, ১৬৭-১৬৮, ১৭১-১৭২,

১৮৪, ২০৬-২০৭, ২১৩-২১৪, ২১৬,

২৩৯, ২৪৪, ২৪৭, ২৪৯-২৫২,

২৫৯-২৬৩, ২৬৫-২৬৭, ২৬৯, ২৭৩,

২৭৮-২৮৩, ৩৪১, ৩৮৯-৩৯০, ৪০২,

৫২৪, ৫২৭-৫২৯

\* ‘তারিখ-ই-ফিরোজ শাহী’—ত্রঃ

জিয়াউদ্দীন বারনি ও শামস-ই-

সিরাজ আফিক

‘তারিখ-ই-মক্কা’ ৭৬

\* ‘তারিখ-ই-মুবারক শাহী’ ২, ৪, ৭, ৯,

১৩, ১৬, ৩৩, ৩৫-৩৬, ৩৮, ৪৬, ৫৩,

৭৮, ১২০

\* ‘তারিখ-ই-শের শাহী’ ৪৩৭, ৪৪১-

৪৪৪, ৪৫২

\* ‘তারিখ-ই-হাম্বিদী’ ১৪৩, ৩২৯

তুখতেহ বুখা খান ৪২১-৪২২

‘তুরকা কোতলাল’ ২৯০

তুরবক ২২২, ৪২৯, ৪৩৭

তৈমুর ১১২, ১১৩, ১৪৬, ১৫৪, ১৫৭

তোরাবাল খান ৫০

\* ‘দুগবিবেক’ ১২১, ১২৭

\*‘দণ্ডাঙ্কিকা পদাবলী’ ৩৭৭, ৫৪০  
 দহুজমাধব ১০৭, ১৩২  
 দহুজমর্দন ( চন্দ্রদীপ ) ১৩১—১৩৬  
 দহুজমর্দনদেব ১২৬-১৩২, ১৩৬-১৩৭,  
 ১৪০-১৪৪, ১৫০, ১৫২, ১৬৬, ৩৬০  
 দমিষ্ঠাও-বার্নালদেস ৪৪৭  
 দরিয়া খান হুহানি ৩৩৩-৩৩৪  
 দলীপ সামন্ত ২৫৭  
 \*‘দা এশিয়া’ ২৭০, ৩৩৬, ৪২২  
 দানিয়েল ২৮০, ২৮৬, ২২৩  
 দানী, ডঃ—ডঃ আহমদ হাসান দানী, ডঃ  
 দামোদর ৩৭৭, ৩৭৮, ৩২৩  
 দারাজকো ৩২৮  
 দিওগো-রেবেলো ৪৪৮  
 দিওগো-দে-স্পিনদোলা ৪৪২  
 ‘দিওয়ান-ই-হাকিজ’ ৬৪, ৬৫, ৬৬  
 দীনেশচন্দ্র ভট্টাচার্য ১০৫, ১১৮-১১৯,  
 ১৩০-১৩১, ১২২, ১২৪, ২৮৪, ৩৩২  
 দীনেশচন্দ্র সেন ৩৫২, ৫২২-৫২৩  
 ছয়ার্তে-দিয়াস ৪৪২  
 ছয়ার্তে-দে-আজেভেদো ৪৪৭  
 ছয়ার্তে-বার্নবোলা ২৩৬, ২২৭, ৩৩৮,  
 ৩৮৬, ৩২০, ৪০৪, ৪৫০, ৪২২, ৪২৪,  
 ৫২৮, ৫১৩  
 ছয়ার্তে-মেনদেস-ভাসকনসেলস ৪৩২  
 ছর্গাচরণ সার্যাল ১৪০-১৪১  
 ছর্গাবর ১২৬  
 \*‘ছর্গাভক্তিভরঙ্গি’ ১৭৩-১৭৪  
 ছর্গামণি উজীর ৩১৩-৩১৪  
 ‘ছল্লাল গাজী’ ২২৩, ৫৪০

‘দেববংশের ইতিবৃত্তি’ ১০৩, ১৩২, ১৫৩  
 দেবমণিক্য ৩১২, ৪২৫  
 দেবসিংহ ১১৪-১১৫  
 দেবেশচন্দ্র দাশ ৩২২  
 দৈবকীন্দন সিংহ ৩৭৭, ৫৪৮, ৫৫৩  
 দোস্ত ঈশাক আগা ৪২২  
 দৌলত-উজীর বাহরাম খান ৩৫৭-৩৫৮,  
 ৫৪৩-৫৪৭  
 দৌলত কাজী ৪২৩, ৫৪৫  
 দৌলত খান ২৪১, ২৬৩  
 ‘দ্রব্যগুণ’ ২০১  
 দ্বিজ শ্রীধর কবিরাজ ৪৩২, ৪৪১  
 ধর্মমণিক্য ৩১৩-৩২২, ৩৩১, ৩৩৫, ৪২৫  
 ধর্মমণিক্য ১৬৩, ৩১৩  
 ঞ্জবানন্দ ১২৫  
 ধ্বজমণিক্য ৪২৫  
 ‘নও বাহার’ ২২  
 নগেন্দ্রনাথ বসু ১০৩, ৩০০, ৩৫২, ৩৮৩  
 নবগোপাল দাশ ৩২২  
 নরসিংহ নাড়িয়াল ১০০, ১৪১  
 নরসিংহ ( মিথিলার রাজা ) ১৭৩, ১২১  
 নরহরি চক্রবর্তী ৩৭৭  
 নরহরি সরকার ২০৩, ৩৭৪  
 নলিনাকান্ত ভট্টশালী, ডঃ ১০, ১৪, ২৬,  
 ১২৭, ১৩৬-১৩৭, ১৬২, ২৫২  
 নসরৎ খান ( ছুটি খানের অপরাধ নাম )  
 —ডঃ ছুটি খান  
 নসরৎ খান ( ককছুদীন বারবক শাহের  
 কর্মচারী ) ২০৬, ২০২  
 নসরৎ খান ( হারজা খানের পুত্র ) ৪২৫,  
 ৪২৮

নসরৎ শাহ—ঔঃ নাসিরুদ্দীন নসরৎ শাহ	নীলাধর (কামতাপুর) ২৮৮-২৮৯
নাজির খান ৩৫৬	নীলাধর চক্রবর্তী ২৩২, ৩৬০
নারায়ণচন্দ্র সেন, অধ্যাপক ২৫, ১২১, ৪৮২	হুনো-দা-কুন্হা ৪৩৩, ৪৪৭-৪৪৮, ৪৫০
নারায়ণদাস (নারায়ণ) ১২৬-১২৭, ২০৩-২০৪, ৩৭৪	হুনো-ফার্মান্দজ ফ্রায়ার ৪৪৯
নাসিরুদ্দীন নসরৎ শাহ ৩৭, ১৪৩, ১৮৪, ২৬৩, ২৭৬, ২৮১, ৩২৮-৩২৯, ৩৭৮, ৩৮৩, ৩৮৮-৩৮৯, ৪০৩, ৪০৭, ৪১২, ৪১৫-৪৩৮, ৪৩৮-৪৪১, ৪৫৫-৪৫৬, ৪৯৮, ৫১৮, ৫২০, ৫২৪, ৫২৭, ৫৪৯-৫৫৫	নূর কুৎব্ আলম, শেখ ৫৭, ৬৮-৭০, ৭৫, ৮০, ১০৬-১০৭, ১০৯-১১৫, ১১৭, ১১৯-১২০, ১২৩, ১২৫-১২৭, ১২৯-১৩০, ১৩৭-১৪০, ১৪৫-১৪৬, ১৮২, ২৬৬, ৪০২, ৫২৭
নাসিরুদ্দীন মাহমুদ শাহ (১ম) ১৩৭, ১৫৬, ১৬৭, ১৬৯, ১৭০-১৮২, ১৮২-১৮৩, ১৯০, ২০৪, ২০৯, ২১৩, ২১৭, ২৪১, ২৪৩, ২৬১-২৬২, ৫১৬	নূর খান ৪৫২
নাসিরুদ্দীন মাহমুদ শাহ (২য়) ২৪২, ২৪৪, ২৫৯-২৬৩, ২৬৭	নূর বেগ ৪২২
নায়ক ষয়াজ গাজী ৩৫৩	নূরুল হুদা ৫২৫
নাসির খান ১৬৭-১৬৮, ১৭১, ২৪৩	নেলসন রাইট ১৬৬, ৩৯৮
নাসির লোহানী ৪১৭	*'পদকল্পতক' ৫৫১
নিকলো কস্তি ৪৬, ৪৫০, ৪৮৪-৪৮৬, ৪৯৫, ৫১৩	*'পদচক্রিকা' ১৬৪, ১৯২-১৯৪, ২০২, ৪৮৭, ৫৩৬-৫৩৭, ৫৩৯
নিজামুদ্দীন, শেখ ২৩	পদ্মনাভ ১৪১-১৪৩, ১৪৫
নিজাম শাহ ৫৪৩-৫৪৫	*'পদ্মাবতী' ৫৪৫
নিত্যানন্দ ২২৫, ৩৬১, ৩৬৫-৩৬৬, ৩৭৫, ৩৮১, ৪০৭-৪০৮, ৫০৭, ৫৫৩	*'পদ্মাবলী' ২০৫, ৩৬৪, ৩৭৩
নিশাপতি ১৯৯, ৫৩৯	পরমানন্দ ১৩৪
নীলমুন্সিং-রায় ৩৩৯	পরমানন্দ রায় ১৩৫
	পরাগল খান ১৯৭, ২০৬, ৩২৬-৩২৭, ৩২৯-৩৩০, ৩৫৬, ৩৯৯, ৪১১, ৪২৭-৪২৮, ৪৩৫
	পিণ্ডার খিলজী ৫২
	পিয়ারা, শেখ ২১০
	পীতাম্বর দাস ৩৭৬
	পীক ২৫৬
	পুরন্দর খান ৩৮৩-৩৮৪
	*'পুরাণসর্বস্ব' ২০৩

- \*‘পুরুষপরীক্ষা’ ৮২, ১১৬, ১১৭, ৪৫৪  
 পুরুষোত্তম ৩০৭-৩০৯  
 পৃথ্বীরাজ ১০৭  
 পোজ্জিও ত্রাচিওলিনি ৪৮৪  
 প্রতাপ রায় ৩১৪, ৩২২  
 প্রতাপরুদ্র ২৩০, ২৩৪, ২২৬-৩১৩, ৩৪৬, ৩৫১, ৫৪১-৫৪২  
 প্রতাপাদিত্য ১৩৫  
 ‘প্রবাসী’ ১০৫, ১১৮, ১৩০, ৫৪৫  
 প্রবোধচন্দ্র বাগচী, ড: ২৫  
 প্রভাত মুখোপাধ্যায়, অধ্যাপক ৩০৩, ৩০৭  
 \*‘প্রাচীন বাংলা সাহিত্যের কালক্রম’ ১৭৪, ১২৫, ৩২৭, ৩৭৭, ৫৪৮  
 \*‘প্রাচীন বাংলা সাহিত্যে হিন্দু-মুসলমান’ ৪১০  
 প্রাণনারায়ণ ৫২৮  
 ‘প্রাণভরণম্’ ৩২৮  
 ‘প্রেমবিলাস’ ১০০, ১৪০, ৪১০  
 প্রেমানন্দ ১৩৪  
 \*‘ফওয়াইদ অল-সালকীন’ ৫২৩, ৫২৬  
 ফখরুদ্দীন মুবারক শাহ ১-১১, ১১-১৫, ৪৭-৪৮, ৪৬৪, ৪৬৬-৪৬৯  
 ফজলুল্লাহ্ ৩৩৩  
 ‘ফতিয়াহ্ ই-ইব্রিয়াহ্’ ২৮১, ২২২  
 ফতেহ্ খান ৪৩৬  
 ফয়জুল্লাহ্, শেখ ১৮২, ৩৫২  
 ‘ফরক-ই-আমীর শহাবুদ্দীন হকীম কিরমানী’ ১২২  
 ‘ফরক-ই-ইব্রাহিমী’—ড: ‘শরফনামা’ ফরাস খান ৪৫২  
 ফরিয়া-ই-সুজা ২৭০  
 ফরীদ বিন সালার ৫৭  
 ফান-ই-পেরেস-দা-আজ্লেম ৩৩৭  
 ফিরিশতা—ড: ‘তারিখ-ই-ফিরিশতা’ ফিরোজ খান ৩  
 ফিরোজ শাহ তুঘলক ৮, ২, ২৪-৫৪, ৫৭, ৭১, ৮২-৮৩  
 ফিরোজ শাহ হাবশী—ড: সৈয়দুদ্দীন ফিরোজ শাহ  
 ফিলিপ্‌স্ ৭২, ৪৭২, ৪৭৯  
 ফেই-শিন ১৮০, ৩৩০, ৪৮০, ৪৮৩  
 ফেয়ার ১৫৫-১৫৭, ২০২  
 ফেরদৌসী ৯৩  
 বখতিয়ার খিলজী ৪৫২  
 বখশিশ খান ২০৭  
 বখশী নিজামুদ্দীন—ড: ‘তবকাৎ-ই-আকবরী’  
 বকিমচন্দ্র ৩২৯, ৫২৩  
 \*‘বঙ্গীয় প্রাচীন পুঁথির বিবরণ’ ৩৫৮  
 \*‘বঙ্গের জাতীয় ইতিহাস’ ১০৩  
 ‘বটুভট্টের দেববংশ’ ১০৩, ১৩২, ১৩৫  
 ‘বড় উজীর’ ২২১  
 বদাওনী ৪, ২, ২৮৬  
 বদর-উল-ইসলাম, শেখ ১১০, ১৪৯  
 বনমালী ১২৬  
 বরপাড়া গোহাইন ২২১, ৪২৯  
 বর্ধমান উপাধ্যায় ১২১, ১২৭, ২০১  
 বলবন—ড: গিয়াসুদ্দীন বলবন  
 বলভদ্র বহু ১৩৪  
 বলভ ৩৭০, ৩৭২



বহালসেন ১৪২

বসন্ত রাও ৩৭, ৪২২-৪২৩, ৪৩৭

বসোআহুপু ২০২, ৩৬০

বহরাম খান ২, ৪, ২, ৪৬৭

বহুলভী অল-অশ্ব-ওয়ার্জমান ২১৬

বহলোল শাহ লোদী ২৮৫, ৩২৫, ৩২৭

বহার খান লোহানী ৪১৮

‘বহারিস্তান-ই-গায়বী’ ২৮৭

বড় চণ্ডীদাস ৪৬০

\* ‘বাকলা’ ১৩২

বাকেল ২১৮-২১৯

\* ‘বাখরগঞ্জের ইতিহাস’ ১৩২

\* ‘বাঙ্গালার ইতিহাস’ ১৬৬, ২১৫, ৩৮০

‘বাঙ্গালার সামাজিক ইতিহাস’ ১৪০

\* ‘বাঙ্গালা সাহিত্যের ইতিহাস’ ১৪২,

৩৭৬, ৩২৭, ৫৪৫

\* ‘বাঙ্গালীর সারস্বত অবদান’ ২৮৪

বারর ৩৭, ২৫১, ২৬৩, ২৭৬, ৩৮২,

৪১২, ৪১৫-৪২৪, ৪৩০-৪৩১, ৪৩৭,

৪২৮-৪২৯, ৫১৩, ৫৫৫

বার্নাজি ৪১৮, ৪২৪

বারবক (ক্রীতদাস)—জঃ সুলতান  
শাহজাদা

বারবক শাহ (জোনপুর) ৫৩৭-৫৩৯

বারবক শাহ (বাংলা)—জঃ রুকনুদ্দীন  
বারবক শাহ

বারবোসা—জঃ দুয়ার্ভে-বারবোসা

‘বাল্যলীলাসুত্র’ ১০০-১০১, ১৪০

বাহুবৈব সার্বভৌম ১২২, ২৩০, ২৩৪-২৩৫,

৩৮০

বাহাদুর শাহ ৪২৪

\* ‘বাংলার নাথসাহিত্য’ ৩৫৩

‘বিং মালিক’ ২২১

বিজয় গুপ্ত ২২০-২২৩, ২২৮, ২৩৫,

২৩৮-২৪০, ২৭৬, ২৮৩-২৮৪, ৪০০

বিজ্ঞাপতি (মৈথিল) ৮২, ৮৭-৮৯, ৯২,

১১৫-১১৭, ১৭৩, ৪৫৩-৪৫৪, ৫৫০-

৫৫১

বিজ্ঞাপতি (২য়)—কবিশেখর জঃ

\* ‘বিজ্ঞাপতি-শতক’ ৫৪২

বিজ্ঞাবাচস্পতি ২৩০, ২৩৪, ৩৮০, ৩৯৪

বিজ্ঞানদাস পিপলাই ২৭৬, ৩২৩, ৪০০,

৪০৮

বিবন ৪১৮, ৪২৪

বিবি মালভী ৩৮৩, ৪৫১

বিমানবিহারী মজুমদার, ডঃ ৮৭, ১১৭,

৩০০, ৪৫৩, ৫৫০

বিষিসার ৩৪২

বিরাহিম খান ৪২৫

বিশারদ ১৮৩, ১২২, ২১২, ২৩০

‘বিশ্বকোষ’ ৩৫২

বিশ্বসিংহ ২২০

বিশ্বাস রায় ২০২-২০৩, ৫৩৬

বিষ্ণু পণ্ডিত ২৮৪

বুকানন ১৬-১৭, ২০, ৩৮, ৫৭, ৫৯,

৬১, ৬৬, ৬৮, ৮০, ৯৬, ১০০-১০৫,

১০৯-১১১, ১১৩, ১২৬, ১২৮-১৩১,

১৩৯, ১৪৫-১৪৬, ১৫৭, ১৬১, ১৬৭-

১৬৮, ১৭১-১৭২, ২১৩, ২১৭, ২৪২-

২৫০, ২৭৫, ২৭৭, ২৮২, ৩২১, ৪৩০,

৪৩৮, ৪৪০, ৪৪৫, ৫২৩, ৫২৬, ৫২৭-৫২৮

বুগরা খান (নাসিরুদ্দীন) ৮, ৪৬৭  
বুদ্ধ ১৫৩, ১৭৭, ১৭৯, ৩৪২  
বুলাকী খান ৪৪৪

বৃন্দাবনলাস ২২৬-২২৮, ২৩১-২৩২, ২৩৪, ২৩৭-২৩৯, ২২৪, ৩৩৯, ৩৪২, ৩৪৫, ৩৫০-৩৫১, ৩৬০, ৩৬৭, ৩৭২, ৩৮১, ৩৮৭, ৪০১, ৪০৩, ৪০৯, ৫০০-৫০১, ৫০৩, ৫১০, ৫১৪

‘বৃহৎ সারাবলী’ ৪১০

বৃহস্পতি মিশ্র (রায়মুহুট) ১৬০, ১৬৪, ১৯২-১৯৪, ২০২-২০৩, ৪৬১, ৪৮৭-৪৮৯, ৫১৩, ৫৩৩-৫৩৭, ৫৩৯

বেভারিজ ১০১, ১০৪, ১৩২-১৩৫, ১৩৭, ১৪৪, ৩৩৯

ব্রহ্মান ২৬১, ২৬৮, ৩৮৭

\* ‘ভক্তিভাগবতমহাকাব্যম্’ ৩০৭, ৫৪২

\* ‘ভক্তিরসাকর’ ৩৪০, ৩৭২, ৩৭৭, ৩৮০  
‘ভক্তিরসাকর’ ৩৬৪

ভবানীনাথ ৩৩২

ভরত মল্লিক ১২৭, ২০৩

ভরতসিংহ ১২০, ৫৩৬

ভান্দসী রায় ১৮৬, ১৮৮, ২০১, ২০৪

‘ভারতবর্ষ’ ১০৩, ৩৭১

‘ভারতধর্ম’ ৩৯০-৩৯১, ৪৫০, ৪৯২-৪৯৩, ৫১৩

ভাস্কো-দা-গামা ৩৩৬

ভাস্কো-পেরেস-দে-সম্পয়ো ৪৫০

ভৈরবসিংহ ১৭৩-১৭৪, ১৮৮, ১৯১, ১৯৭, ৪১৬

ভৈরবসিংহ—জঃ ভৈরবসিংহ

‘ভ্রমরদূত’ ৩৮০

‘মক্তুল হোসেন’ ২০৬, ৪২৫-৪২৬, ৫৪৪-৫৪৫

‘মখজান-ই-আফগানী’ ১০২

মখদুম-ই-আলাম ৪১৬, ৪১৯, ৪৩৭, ৪৪১-৪৪২, ৪৫১-৪৫২

মখদুম শাহ মুলতান হোসেন ১১৪-১১৬

মজলীশ বারবক ২৮৪-২৮৫, ৩৫৯

মজলিস অল-মজলিস ৩৫৬

মজলিস আখিয়ার ৩৭৬

মজলিস আজম ২০৭, ২১৬

মজলিস আলা ২১৬

মজলিস উলুগ খুর্শাদ ২৬৫

মজলিস খান ২৬৩

মজলিস খানওয়ার ৪৩৭

মজলিস খান হামাযুন ২৫৭

মজলিস নূর ২৪১

মজলিস মাহমুদ ৩৫৫

মজলিস রাহৎ ৩৫৬

মজলিস সাদিক ৪৩৬

‘মংলা-ই-সদাইন’ ১৫৪-১৫৫, ৫৩০

মনোএল ৩৩৭

মনোমোহন চক্রবর্তী ১১৭, ১৩৭, ১৭২, ১৯১, ৩০০

মনোহর ১৯৬

‘মস্তথব-উৎ-তওয়ারিখ’ ৪, ৯, ৫৪, ২৮৫-২৮৬

মন্সুর শিরাজী ১২৯

\* ‘ময়মনসিংহের ইতিহাস’ ২৫৭

মরাবৎ খান ২০৭	২৪৪, ২৪৯-২৫০, ২৫২, ২৫৮, ২৬৩,
মসন্দর গাজী ৫৪০	২৬৫, ২৬৯, ২৭৮, ২৮০, ৪০২, ৪১৫,
মসুদ গাজী, শেখ ২৩, ৪৬	৫২৭-৫২৮
মহাদেব আচার্যসিংহ ২৮৪-২৮৫, ৩৫২	‘মাসির’ ( উদ্ পত্রিকা ) ১১৪
*‘মহাবংশাবলী’ ১২৫	মাহি আসোয়ার ৪২৫, ৪২৭
মহেন্দ্রদেব ১২৬ ১৩২, ১৪০, ১৪৩,	মা-হোয়ান ৮৫-৮৬, ৩৩১, ৪৭১, ৪৭৫-
১৫০-১৫২, ১৬৬, ৩৩০	৪৭৬, ৪৮৩
মহেশ ১১৩	‘মাহে-নগ’ ৮৯
*‘মাদলা পাঞ্জী, ২৬৯, ৩০০-৩০১, ৩০৩-	মাহ্ দী হোসেন, অধ্যাপক ৪৬৫, ৫১৩,
৩০৪, ৩১০, ৩১২	৫২৫
মাধাই ৩৮১-৩৮২	মাহ্ মুদ খান লোদী ২৮৬
মাক্ক ৪১৭	মাহ্ মুদ লোদী (ইব্রাহিম লোদীর ভ্রাতা)
মতিম-মাক্কো-দে-মেলো ৪৩২-৪৩৩,	৪১৮, ৪২৪
৪৪৭-৪৫০, ৪৫৩	মিঞা মুআজ্জম ৪৩৬
মার্ম্যান ১৫৬	‘মিং মাবিক’ ২২১
মালাধর বহু ১২৪-১২৫, ১২৮, ২০০,	মিনা খান ৪২৫-৪২৮
৩৭৩, ৪০০	*‘মিরাত-উল-আসরার’ ১৫৮
মালিক অভুদীনমাহিআ ২, ৩, ৭	মিশাদ খান ২১৬, ৬০৪, ৫১৬
মালিক আব্দিল ২০৮, ২৪০, ২৪৩,	‘মিং-শু’ ৭৮-৭৯, ৯৪, ৯৭, ১২১, ১৫৩,
২৪৫-২৫৩, ২৫৮, ২৬০, ২৬৬-২৬৭,	১৭৬-১৭৭, ৪৮৪
মালিক তাবুদীন ৪৬	মীর্জা মুহম্মদ কজবীনী ৬৫
মালিক সদ্দু আল-মিলাৎ ওয়াদান	মীর্জা মুহম্মদ কাজিম ২৮১
সুলতানী ১০৫, ১৬৫	মীরজুমলা ১০৪, ২২২
মালিক সারওয়ার (জঃ খওয়াজা-ই-	মীর-শিকার মালিক দিলান ৩০
জহান )	মুআজ্জম দীনর খান ১৬৫
মালিক সুলতা শাহী ১১৮	মুকাবর খান ৩৫৬
মালিক সৈফুদীন ৪৬	মুহম্মদ ( রাজপুত্র ) ১২৭, ২০৪-২০৫,
মালিক হিসামুদীন আবু রেজা ৩	৪৬১
মালিক হিসাম নওয়া ৩০	মুহম্মদ ( চৈতন্যদেবের পার্শ্ব ) ১২৭, ২০৩,
*‘মাসির-ই-বহিমী’ ১০২, ১৮৪, ২৩৯,	২৭৫, ৩৭৪-৩৭৫

- মুকুন্দ ভট্টাচার্য ২০৫  
 মুখতিয়ার খান ৪৩৭  
 মুখলিশ ৩, ৫, ১৩, ১৫  
 মুখলিশ খান ২৫৮  
 মুজাফফর শামস বখশি ৫৭, ৫৯, ৭০-৭৫,  
 ৮৩-৮৫, ৩৩০  
 মুজাফফর শাহ—ঈ: শামসুদ্দীন মুজাফফর  
 শাহ  
 মুতাবর খান কারফরমান ২৬৫  
 মুনী হেলাহী বখশ—ঈ: হেলাহী বখশ,  
 মুনী  
 মুনী শ্রামপ্রসাদ—ঈ: শ্রামপ্রসাদ, মুনী  
 মুবারক খান ৪৩৬  
 মুবারক খান মুহানি ২৮৬  
 মুবারিজ খান ৪২৫  
 মুরারি গুপ্ত ২২৯, ৩৬৩  
 মুরশিদকুলী খান ২৩৮  
 মুন্না তকিয়া ২৩, ১১৪-১১৭, ১৮৯-১৯১,  
 ১৯৭, ২০১, ৫৩৫  
 মুন্না মজহব ৪১৯, ৪২৩  
 মুস্তাফা ৪২০  
 \* 'মুসলিম কবির পদ-সাহিত্য' ৫৫২  
 \* 'মুসলিম বাঙ্গালা সাহিত্য' ৮৯  
 মুহম্মদ ইলিয়াস রহমান, মৌলবী ১১৪  
 মুহম্মদ-ই-মুলতান মীর্জা ৪২২  
 মুহম্মদ এনায়েল হক, ড: ৮৯-৯১, ৪৩৫  
 মুহম্মদ কুতাই ৫২৫  
 মুহম্মদ খান (মোহাম্মদ খান) ২০৬,  
 ৪২৫-৪২৮, ৫৪৪-৫৪৫  
 মুহম্মদ খান সরবন ৪২২  
 মুহম্মদ গুল-আনাম ৬৩, ৬৬  
 মুহম্মদ-ই-জমান মীর্জা ৪২১  
 মুহম্মদ বিন্ তোঘলক ২, ১৩, ১৫, ৪১,  
 ৪৩  
 মুহম্মদ বিন্ রজ্জদান বখশ্ ৩৩৮, ৩৩৪  
 মুহম্মদ বদই উক্ সৈয়দ মীর অলাওরী  
 ৩৩৪  
 মুহম্মদ শাহীজলাহ, ড: ৪৩৫, ৫৪৯, ৫৫১  
 মুহম্মদ শাহ (ইসমাইল গাজীর প্রাক্সুজ)  
 ১৮৬  
 মুহম্মদ শাহ (বাহাদুরী রাজ্যের মুলতান)  
 ৬৫  
 মুহম্মদ, শেখ ১৮৭  
 \* 'মৃগাবতী' ২৭০, ৩৮৪, ৩৯৫-৩৯৯  
 'মেঘদূত' ১৯২, ৪৮৭  
 মেং-খরি ২০২, ৩৩০, ৩৩২  
 মেং-সোয়া-ম্উন্ ১৫৬-১৫৭, ২০৯, ৩৩২  
 'মোক্ধমার্থদীপিকা' ২০২, ৫৩৬  
 মোমতাজুর রহমান তরফদার, অধ্যাপক  
 ২৮৩  
 মোলাহেব খান ৪৪৪  
 ম্যাগেলান ৩৩৮, ৪২৪  
 যতীন্দ্রমোহন ভট্টাচার্য, অধ্যাপক ৫৪০  
 যহ ১০০, ১০৮-১০৯, ১৩৯, ১৫৭, ১৫৭

বহুনাথ সরকার, আচার্য ১৪, ১০৩, ১১১,

১৫০, ১৬৬, ২০২, ৫২৮, ৫৪৫

বশোরাজ খান ৩৭৬-৩৭৭, ৩৯৩

\* 'বশোহর-খুলনার ইতিহাস' ১০৩

'বাঈ' ১১২

'বোগিনীতন্ত্র' ৮১

বাকুৎ অনানী ৭৬-৭৭

বাহিআ বিন্ সিরহিন্দ ২, ৯, ৩৩,

৩৫-৩৬

\* 'বিত্ত-ব্রা-শ্রু-লান, ৮৫, ১৮০, ৩৩০,

৪৭১, ৪৭২, ৪৮৪

বুত্রাশ খান ২৪৬, ২৪৮-২৫০

বু-লো ৭৮-৭৯, ৯৫, '১২১-১২২, ১৫৩,

১৫৫, ১৭৫-১৮১

বুহুফ ( দিল্লীর শাসনকর্তা ) ৪, ১৩

বুহুফ ( হোসেন শাহের ভ্রাতা ) ২৭০

বুহুফ খান ২১৫

য়েন-ৎসুং-চিয়েন ১৭৫

বকহিল ১২১, ৪৭২, ৪৭৫, ৪৮২

বখুনন্দন ২০৩, ৩৭৪, ৫৪২

বখুনাথ দাস ৩৬৩, ৩৭৮-৩৭৯, ৪০৮

'বখুবংশ' ১৬৪, ১৯২-১৯৩, ৪৮৭, ৫৩৭

বজনীকান্ত চক্রবর্তী ১৭৩, ২৫৬, ২৬৬-২৬৭,

৩৩৯, ৩৪১, ৩৫৪, ৩৮৩

\* 'বকীক আল-আরেকীন' ৪৩, ৫৭, ৬৯

ববীন্দ্রনাথ ৫৫১

ববাবল্লভ ১৩৪

বমেশচন্দ্র বন্দ্যোপাধ্যায় ৪১০

বমেশচন্দ্র দত্ত ৩৯৯

বমেশচন্দ্র বজ্রবদার, ডঃ ১০৩

'বসকল্পবলী' ৫৪৯

'বসমঞ্জরী' ৩৭৬

বসাকমর্দন নারায়ণ ৩১৮, ৩২৩, ৩৩১

বসিকদাস ৩৭৭, ৪৫৪, ৫৪৯

\* 'বসুলবিজয়' ২১৪-২১৫

বাইকছর ৩১৮, ৩২৩

বাইকছাগ ৩১৮, ৩২২-৩২৩

বখালদাস বন্দ্যোপাধ্যায় ১১, ৩৩, ১১৭,

১৬৬, ২০৭, ২১৫, ২৪৩-২৪৪, ২৪৯,

২৫৯-২৬০, ৩৮৩, ৪১৫

\* 'বাগতরঙ্গিনী' ৮৮, ৪১৬, ৪৫৩-৪৫৪,

৫৫০

\* 'বাজমালা' ২২৩, ৩১৩-৩১৪, ৩২৪-

৩২৭, ৩২৯, ৩৩১-৩৩২, ৩৫৮, ৩৬০,

৩৮০, ৩৮২, ৩৮৮, ৪১১, ৪২৪-৪২৫

\* 'বাজা গণেশের আমল' ১১৯, ৫১৩

বাজা বিদ্যাবানি, শেখ ৩৭, ৪৫

বাজেন্দ্রচন্দ্র হাজরা, ডঃ ৫৩৩

বাজেনশ' ১২৮

বামকৃষ্ণ কবি ১১৮

বামগোপালদাস—ডঃ গোপালদাস

বামচন্দ্র ১৩৪

বামচন্দ্র খান ( বাংলার সীমান্তরক্ষী )

২৯৫, ৩১১, ৩৭৫-৩৭৬

বামচন্দ্র খান ( বেনাপোলের জমিদার )

৩৭৫, ৪০৭-৪০৮

বামচন্দ্র খান ( মহাভারত-রচয়িতা )

৩৭৫-৩৭৬

বামনাথ ১৩৪

বামনাথ দত্তজমর্দন দে ১৩২, ১৩৪

\* রায়নারায়ণ দেব ৩১৩

রায়প্রাণ গুপ্ত ২৭৫, ৩৩৯

রায়ভদ্রসিংহ ৪১৬

রায়ানন্দ ৩৫৩

রায়নন্দন (?) ৩৫৫

রায় রাজাধর ১৬০-১৬১, ১৬৪, ৫৩২-

৫৩৫, ৫৩৭

রায় রায়ানন্দ ৩৪৬

রাস্তি খান ১৯৭, ২০৬, ২১০, ৩৩০,

৪২৫-৪২৭

রিচার্ড (৩য়) ২৭৮

রিজকুলা, শেখ ৩৩৪

রিফায়ৎ খান ৩৫৬

\* 'রিয়াজ-উস-সলাতীন' ৪, ১০, ১৫-২০,

৩৭, ৪৪-৪৬, ৫৩, ৫৫-৫৬, ৫৮-৬১,

৬৬-৬৮, ৭২, ৭৪, ৯৪, ৯৬-৯৮,

১০২-১০৫, ১০৯-১১১, ১১৮-১২১,

১২৬, ১২৮-১৩১, ১৩৮-১৪০, ১৪৫-

১৪৬, ১৪৮-১৫০, ১৫২, ১৫৭, ১৬১,

১৬৫, ১৬৭-১৬৮, ১৭০, ১৭২, ১৮৪,

২০৬, ৬-২১৮, ২২১, ২৩৮-২৩৯, ২৪৪,

২৪৭, ২৪৯-২৫২, ২৫৪, ২৫৮-২৬৩,

২৬৫, ২৬৭, ২৬৯-২৭১, ২৭৩, ২৭৫,

২৭৮-২৮৩, ২৮৮-২৯০, ২৯৩, ৩৩৮,

৩৪১, ৩৯০, ৪০২, ৪১৫-৪১৭, ৪২৪,

৪২৯, ৪৩৬-৪৩৮, ৪৪০-৪৪১, ৪৪৪-

৪৪৫, ৫২৭-৫২৮, ৫৪১

\* 'রিসালৎ-ই-গুহাদা' ১৮৪, ১৮৭-১৮৯ ২০১,

২০২, ৩০১

রুই-ভাজ-পেয়েরা ৪৩২

রুকমুদীন কান্ধকাউন চ

রুকমুদীন বারবক শাহ ১৪৭, ১৭২,

১৮২-১৮৩, ২৩৮, ২৪১, ২৫৭, ২৬৬,

৩০১, ৩৩১, ৩৭৪, ৩৮৪, ৪০০,

৪০১, ৪১৫, ৪২৭, ৪৮৮, ৫১৬, ৫৩১,

৫৩৫-৫৩৯

রুকমুদীন রুক্ন খান ৩৫৪

রূপ (গোন্দামী) ১৪১-১৪২, ২০৫, ২৫৬,

২৭২, ৩৪০-৩৪১, ৩৪৮-৩৪৯, ৩৫১-

৩৫২, ৩৬৪-৩৭৩, ৩৭৯, ৩৯৩, ৪০১,

৫৪৭-৫৪৮

রূপনারায়ণ ২৮৮-২৮৯,

রেনেল ১০৪, ৩৩৯

\* 'লঘু বৈষ্ণবতোষণী' ১৪১, ৩৭১

লতিফ খান ১৮২

লক্ষ্মণসেন ১০৬

লক্ষ্মীধর ১৯৬

লক্ষ্মীনাথ—দ্রঃ কংসনারায়ণ

'লালমোনের কেচ্ছা' ৩৫৩

লালা ৬২

'লায়সী-মজলু' ৩৫৭, ৩৫৮, ৫৪৩, ৫৪৫,

৫৪৭

লোচন চচ, ৪১৬, ৪৫৩, ৫৪৯

লোচনদাস ৩৮১-৩৮২

লোপো-ভাজ-দে-সম্পয়ো ৪৩২

লোপো-সোরস-দে-আলবার্গারিআ ৩৩৭

লোন্ লক্ষ্মীধর ৩০৬-৩০৭

লক্‌-উলা ৪৩৩

লক্‌-আচার্য ৩৫৩

লরিন্দুনায়ারায়ণ বার ৪১০

শরফুদ্দীন রাহিআ মনরি ৪৩-৪৪, ৫৭,

৭১

\* 'শরফ নামা' ১৮২, ১৯৮, ২১৫-২১৮

২১৯, ৫৩৭

'শরহ-ই-নজ্-হল্-উল্-আরগুয়াহ্' ৫২৫

শহাব খান ৮০

শহাবুদ্দীন হকীম কিরমানী ১৯৯

\* 'শহীহ্-অল-বুখারী' ৩৩৮, ৩৯৪

শাহ জাহান ১৮৪, ৩২৮

শামস্-ই-শহাব আফিক ৪৮

শামস্-ই-সিরাজ আফিক ৯, ১২, ১৫, ২৪,

২৯, ৩৬, ৩৯-৪০, ৪৫, ৪৭-৪৮, ৫১,

৫৩, ৩৩৯

শামসুদ্দীন আহমদ, মৌলভী ১০৬

শামসুদ্দীন আহমদ শাহ ১৫৪, ১৬৫-১৬৬,

১৬৭-১৬৯, ১৭০-১৭৩, ২৪৩, ৫৩৪

শামসুদ্দীন ইলিয়াস শাহ ৮-১০, ১২-১৮,

২০-৪৬, ৪৭-৪৯, ৫৬, ৬০, ৬৮, ৮০,

৮৩, ৯৫, ১৭১-১৭২, ১৮৯, ৩৩৯,

৫৬২, ৫৬৫

শামসুদ্দীন ইলতুৎমিশ্ ২৪৩, ৫২৩

শামসুদ্দীন ( ওরফে শিহাবুদ্দীন বায়াজিদ

শাহ ) ৯৬

শামসুদ্দীন কিরোজ শাহ ১, ৮, ৪২,

১৮৪, ২১৫, ২৫৮, ৪৬৭

শামসুদ্দীন মুজাফফর শাহ ২৪২, ২৪৪,

২৬২, ২৬৩-২৬৭, ২৭৪, ২৭৭-২৮২,

৪১৭

শামসুদ্দীন মুহম্মদ শাহ ১৮৩, ১৯৫, ২১০-

২১১, ২১৩-২১৬, ২১৬-২১৭, ২৩৮-

২৩৯, ২৪১, ২৫২, ৪১৫, ৪৩৪, ৫১৬-

৫১৭, ৫৩০-৫৩১

শায়দা ৬, ১২, ৪৬৭-৪৬৯

শায়েস্তা খান ৫৪৭

শাহ জালাল দকীনী ২১০, ২১৮, ২১৯

শাহ মুহম্মদ ( মোহাম্মদ ) সঙ্গী ৮২-৯৩

শাহ রুখ ১৫৪-১৫৫, ১৬০, ৫২৯-৫৩০

শিবদাস সেন ২০১

শিবনাথ, ডঃ ৩৯৬

শিবসিংহ ( Sheo Singh ) ৮২,

১১৪-১১৭, ১৪৫, ৪৫৪

\* 'শি-য়াং-ছাও-কুং-তিয়েন-লু' ৭৮, ৯৭,

১৭৫

'শিশুপালবধ' ১৬৪, ১৯২-১৯৩, ৪৮৭, ৫৩৭

শিহাবুদ্দীন তালিশ ৫, ৭, ২০৯, ২৮১,

২৯২, ৫৪৫

শিহাবুদ্দীন বায়াজিদ শাহ ৯৬-৯৮, ৪৩৮,

৫২৮

'শিং-ছা-গুং-লান' ১২১, ১৭৭, ১৮০,

৩৩০, ৪৮০, ৪৮৪

শুভরাজ খান ২০৩

\* 'শু-য়ু-চৌৎজ-লু' ৭৮-৭৯, ৯৭, ১৭৫

শের-এ-মালিক ৪৩৭

শের খান ৩৫৬

শের খান সুর ৩৯৮, ৪১৮, ৪২৪, ৪৪১-

৪৪৫, ৪৪৭-৪৫১, ৫৪১, ৫৪৪

শের শাহ—ঔঃ শের খান সুর

\* 'শৈবসর্বস্বসার' ৮২, ১১৬, ৪৫৪

শ্রামপ্রসাদ, মুনশী ১৫৭, ২৫৪, ২৫৬, ২৫৮

শ্রামসুন্দর দাস ৩৯৫

‘শ্রাদ্ধবিবেক’ ১৮০

শ্রীকর নন্দী ২৬৯, ৩২৭-৩৩০, ৩৫৬, ৩৮৮,

৩৯৩, ৪০০, ৪২৭, ৪৩৪-৪৩৫, ৫৫৪

শ্রীকান্ত ৩৭০-৩৭২, ৩৮৫, ৩৯২

‘শ্রীকৃষ্ণকীর্তন’ ৩৮২, ৪৬০

\* ‘শ্রীকৃষ্ণচৈতন্তচরিতামৃত’ ২২৯, ৩৬৩

\* ‘শ্রীকৃষ্ণবিজয়’ ১৯৪-১৯৫

শ্রীচন্দ্রসুধার্মা ৫৪৫

\* ‘শ্রীচৈতন্তচরিতের উপাদান’ ৩০০

\* ‘শ্রীচৈতন্তদেব ও তাঁহার পার্শ্বদগণ’

২২৭, ৩৬৫

শ্রীধর ১৯৭, ২০৪-২০৫

শ্রীধর ১৩৪

শ্রীধাস ২৩২, ২৩৩, ৪০৩-৪০৪

শ্রীভাস্বর ৫৩৩-৫৩৪

‘শ্রীশ্রীব্রজধাম ও গৌরাঙ্গবিগণ’ ৫৪৭

‘সঙ্গীত-দামোদর’ ৩৭৭

‘সঙ্গীতমাধব নাটক’ ৩৭৬

‘সঙ্গীতশিরোমণি’ ১১১, ১১৮-১২০, ১২৯,

১৪৫, ১৫৫, ১৫৮

‘সতী ময়না ও লোর-চন্দ্রানী’ ৫৪৫

সতীশচন্দ্র মিত্র ১০৩

সত্য খান ২০২-২০৩, ৫৩৬

সদর জাহা ৫৪৪-৫৪৫

সনাতন ১৪১-১৪২, ২৫৫-২৫৬, ২৭২,

৩৪০-৩৪১, ৩৪৮-৩৪৯, ৩৫১-৩৫২,

৩৬৩-৩৭৩, ৩৭৯, ৩৮৫, ৩৮৭, ৩৯২-

৩৯৩, ৪০১, ৪০৫, ৪৯১-৪৯২, ৫১৩,

৫৪৭-৫৪৮

‘সপ্তগোবিন্দী’ ৩৬৫

সরফরাজ খান ১৮২

সরফুদ্দীন, মোলবী ২৫২,

\* ‘সরস্বতীবিদ্যাসন্’ ৩০৬-৩০৭

সরস্ব ৬২

সহদেব ৩৬, ৩৭, ৮৩

সাজিদ ২৫৮

সার্বভৌম ভট্টাচার্য—ডঃ বাসুদেব

সার্বভৌম

‘সাহিত্য পত্রিকা’ ৪০৬, ৪২৮, ৫৪৪, ৫৪৬

‘সাহিত্য-পরিষৎ-পত্রিকা’ ৩২৬, ৩৩২, ৫১৩,

৫৪৪, ৫৫১

সাদী খান ১৬৭-১৬৮, ১৭১

সিকন্দর শাহ ( ইলিয়াস শাহী বংশ ) ১২,

২১, ২৪, ৩৪, ৪০, ৪৩, ৪৬, ৪৭-৫০,

৬০-৬১, ৬৬, ৬৮, ৭১, ৮০-৮১, ৮৩,

৯০, ৯৫, ১৮৪, ২৮৫, ৩৩৯, ৫১৫, ৫৩২

সিকন্দর শাহ (মাহমুদ শাহী বংশ) ২১৬-

২১৮, ২৪১

সিকন্দর শাহ সোদী ১০২, ২৮০, ২৮৫-

২৮৬, ৩৩০-৩৩৬, ৩৮৫, ৩৯৫, ৩৯৭,

৪১১, ৪১৭, ৫৩৭-৫৩৮

সিদ্দি বদর ( সিদ্দি বদর ) ২৬২, ২৬৬-২৬৭

সিদ্দিক ৪২৫

‘সিরাৎ-ই-কিরোজ শাহী’ ৩১-৩২, ৩৪-৩৬,

৩৯-৪০, ৪৬-৪৭, ৫১-৫৩, ৩৪১

সুকুমার সেন, ডঃ ১১২-১২০, ১৪২, ২৭৫,

৩৮৪, ৩৯৫, ৩৯৭, ৫২২

সুল্লেন ৫২৩

সুন্দর-কা ৮১



স্বধীন্দ্রনাথ ভট্টাচার্য ২২২, ৩৫৫, ৪২০,

৪৪৫-৪৪৬

স্বধীরচন্দ্র রায় ৫৫০

সুনন্দ ১২৬, ২০৪-২০৫

সুন্দর ১২৭, ২০৪-২০৫

সুপ্রসন্ন বন্দ্যোপাধ্যায়, ত্রিযুক্ত ৩১৩

সুবুদ্ধি রায় ২৭১-২৭২, ২৭৪, ২৭৬, ৩৭৩-

৩৭৪, ৪০৫

সুলতান আহমদ ভূঁইয়া, জনাব ৯২

সুলতান শাহজাদা ২৪২, ২৪৪-২৫১,

২৬০, ২৬৬

সুভক্তি গরম কুমারী ২২২

সুবেণ পণ্ডিত ১২৫-১২৬

\*'সুইটল-ই-রমন' ৫২৫

সুফী খান ২১৬

সৈফুদ্দীন কিরোজ শাহ ২০৮, ২৫২, ২৪৪,

২৫১-২৫২, ২৫২-২৬২, ২৬৭, ২৮০,

৪০১, ৫১৭

সৈফুদ্দীন হুমজা শাহ ৮৫, ৯৪-৯৫, ৯৬-৯৮,

১৭৭-১৭৮, ১৮১, ২৫৪, ৫২৮, ৫৩২

সৈয়দ আশরাফ আল-হোসেনী ২৭০, ২৭৭

সৈয়দ জলাল ১২৯

সৈয়দ দস্তুর ২৪১

সৈয়দ মুহম্মদ রুক্ন ১২৯

সৈয়দ রহুলদার ৫৪

সৈয়দ হাসান ১২৯

সৈয়দ হাসান আলকারি, অধ্যাপক

৮৫, ১১৪, ১২৩, ২০০, ৩৯৫-৩৯৮

সৈয়দ হোসেন ২৬৩-২৬৫

স্টয়ার্ট ১৫৪, ১৫৬, ২১৬-২১৭, ২৫০, ২৭৫,

৩২০, ৫২২-৫৩০

স্টেশনটন ১৮, ৫৪, ১৫০, ১৬৬, ৩৩৯

স্ট্যানলী লেনপুল ৫৩৮

\* 'স্বতিরত্নহার' ১৬০, ১৬৪, ১৯২-১৯৩,

৪৮৭, ৪৮৯, ৫৩২-৫৩৩, ৫৩৭

স্বর্গদেও সুলক্ষা ডিহিঙ্গিয়া রাজা ২৯২

স্বামী কাহ্নপিল্লাই ৪১৬

হজরৎ মুহম্মদ ৭১, ২৭৬, ৪৩৩

হবিবুল্লাহ, ডঃ—ডঃ এ. বি. এম.

হবিবুল্লাহ, ডঃ

হরপ্রসাদ শাস্ত্রী, ডঃ ৫৩৩, ৫৩৬

হরিদাস ঠাকুর ১২৬, ২২৪-২২৯, ২৩৭-

২৩৯, ২৮৮, ৩৬৫-৩৬৬, ৩৭৯, ৪০৭-

৪০৮, ৪১১

হরিদাস ( স্মার্ত গ্রন্থকার ) ১৮৩

হরিবল্লভ ১৩৪

হলিরাম ঢেকিয়াল মুকন ২৯৩, ৫৪০

হসামুদ্দীন মানিকপুরী, লেখ ৪৩, ৫৭-৫৮,

৬৯

হসমু খান ৪৪২

হাজী খান ৩৩৩

হাজী মুহম্মদ কন্দাহারী ২৫২-২৬২, ২৬৫,

২৭৯

হাজী সারং ৩৩৪

হাতিম ৪২৫

হাকিম ৬১-৬৬, ৭৭, ৮৭, ৮৯

হাব্‌স্‌ খান (হাব্‌স্‌ খাঁ) ২৬২, ২৬৬-২৬৭

হামিদ্দীন কুন্‌জ্‌নশীন নগোরী ৬৮

হামিদ্দাহ্‌ খান, মৌলবী ৩২৩

- হামিদ খান ৩৫৭-৩৫৮, ৫৪৪  
 হামিদ দানিশমন্, মোলানা ৪০৩  
 হামজা খান ৪২৫-৪২৯, ৪৫৩  
 হার্ভে ১৫৫-১৫৬  
 হাসান ২৭১  
 হাসান খান ৪৩৭  
 ১১ হাসান খান সুর ৩৯৮  
 হাসান বিন্ অজলান, মোলানা ৭৬-৭৭  
 হিদ্দা ২৫৫-২৫৬  
 'হিদায়ৎ আল-রামী' ৩২৪  
 হিদ্দু খান ৩৫৪  
 হিরণ্যদাস মজুমদার ৩৬২-৩৬৩, ৩৭৮-৩৭৯,  
 ৪০৮, ৪৬০  
 ১২ হিলাৎ ১৮২  
 হুই-ভি ৭৯  
 হুমায়ূন ২০৮, ৪১৭, ৪২৪, ৪৪১, ৪৪৩-  
 ৪৪৫, ৫৪১  
 হুদয়ানন্দ ১৯৯  
 হৈতন ষাঁ ৩১৮-৩২১, ৩২৩-৩২৫, ৩৫৮-  
 ৩৫৯, ৩৬২, ৩৮২  
 হৈবৎ খান ৫০  
 ১৩ হোসেন খান ৪৪৬  
 হোসেন খান লস্কর উজীর ৪২৩, ৪৩৭  
 হোসেন খোকরগোশ, শেখ (পূর্ণিমা) ১১৩  
 হোসেন খোকরগোশ, শেখ (দিনাজপুর)  
 ১১৩  
 ১৪ হোসেন শাহ—ডঃ আব্দুলক্বীর হোসেন  
 শাহ  
 ১৫ হোসেন শাহ শর্কী ১৯০-১৯১, ২৮৫-২৮৬,  
 ৩৮৪, ৩৯৩, ৩৯৫, ৩৯৭-৩৯৯, ৫৩৭  
 হোয়াং-শিং-ংসাং ১৭৫  
 হৌ-শিয়েন ১২১-১২২, ১৫৩, ১৭৬-  
 ১৭৯,  
 \*A Descriptive Catalogue of  
 Sanskrit Manuscripts in the  
 Collections of the Asiatic  
 Society of Bengal ৫৩৬  
 \*A History of Orissa ৫৪১  
 \*Ahom Buranji from Khunlung  
 and Khunlai ২৯১  
 Andhra Patrika Annual ৩০৫  
 Ars Islamica ২১১-২১২  
 Arthur J. Arberry ৬৫  
 \*Asia Portugesa ২৭০  
 \*A Sino-Western Calender for  
 Two thousand years ১২২  
 Bengal, Past and Present ১১৫,  
 ১২৩  
 Bibliography of the Muslim  
 Inscriptions of Bengal ২১,  
 ৪৫, ১০৫, ১১৯, ১৬৫, ১৭০, ২১৪,  
 ৪৩৬, ৫৩১  
 \*Cambridge History of India  
 ৬২, ১৭২, ৩৯৮  
 Campos—ডঃ জে. জে. এ ক্যাম্পোস  
 \*Catalogue of the Arabic and  
 Persian Manuscripts in the  
 Oriental Public Library at  
 Bankipore ৩৪০, ৩৯৪  
 \*Catalogue of the Coins in the

- Indian Museum, Calcutta ২৮৭, ৩২৮
- \*Catalogue of Indian Coins, British Museum ২৮৭
- \*Catalogue of the Persian Manuscripts in the British Museum ৩২৪
- \*Catalogue of the Sanskrit and Prakrit Manuscripts, India Office Library ৩০৬
- Charles Rieu ৩২৪
- \*Coins and Chronology of the Early Independent Sultans of Bengal ১৪, ১২৭
- \*Coins of the Muhammadan States of India in the British Museum ৩০৮
- \*Corpus of the Muslim Coins of Bengal ২৪, ২৫২, ৩০১
- Current Studies ৭০
- \*Da Asia ২৭০, ৩৩৬, ৪২৯, ৫১৪
- E. G. Brown ২০
- Epigraphica Indica ৩০৫
- Fifty Poems of Hafiz ৫৫
- \*Further Sources of Vijaynagar History ৩০২
- \*Gait's Report on the progress of Historical Research in Assam ৫১
- \*History of Assam ২২২
- \*History of Bengal (D. U., Vol. II) ৮, ২৫, ১০৩, ১৫০, ১৮৩, ২১৬, ২১৮, ৩৮৩, ৫৫৪
- History of Bengal (Marshman) ১৫৬
- \*History of Bengal (Stuart) ১৫৪, ২১৬, ২৫০, ৩২০, ৫২২
- History of Bengali Language and Literature ৩০০
- History of Burma (Harvey) ১৫৫
- History of Burma (Phayre) ১৫৫-১৫৬, ২০২
- \*History of the Portugese in Bengal ৪৪৩, ৪৫০, ৫৫৫
- \*Indian Ephemerides ৪১৬
- Indian Historical Quarterly ৮, ২৮৩, ৩০৬
- \*Inscriptions of Bengal ১০৬, ১৬৫
- Islamic Culture ৭৬-৭৭, ১৫২, ১৬৫, ১৬৭-১৬৮
- Journal Asiatique ১০১
- Journal of the Andhra Research Society, ১১৮
- Journal of the Asiatic Society (of Bengal) ৪১, ১০২, ১০৪, ১৩৭, ১৫০, ১৫৭-১৫৮, ১৬৬, ১৭০, ১৭২, ১৯১, ২০২, ২০১, ২২০-২২৪, ৩০০, ৩০৮, ৪১৬, ৫২৮

- Journal of the Asiatic Society of Pakistan ৩৯, ১০৬, ১৮৩, ৪৩৮, ৪৫৯-৪৬৩
- Journal of the Bihar and Orissa Research Society ৩৯-৪০, ৬৫
- Journal of the Bihar Research Society ৩৩৪, ৩৯৫-৩৯৬, ৩৯৮, ৪১৭
- Journal of the Numismatic Society ১৭০, ২৮৭
- Journal of the Royal Asiatic Society ৭৯, ৪৭২-৪৭৩, ৫১৩
- \*Lendas da India ২৭০
- \*Literary History of Persia ৯৩
- \*Martin's Eastern India ১০০, ১০৫, ১৫৭, ২৭৭
- \*Memoirs of Gaur and Pandne ১৮, ৫৫, ১২৮, ১৪৮, ১৬৮, ২৫৬, ৩৬৩, ৪১২
- \*Mughal North-East Frontier Policy ২৯২, ৩৫৫, ৪২৯, ৪৪০, ৪৪৫
- Narameikhla ১৫৬
- On the Barah Bhuyas of Eastern Bengal ১৩২
- Proceedings of the Asiatic Society of Bengal ১৭০
- Proceedings of Indian History Congress ৭০, ৮০, ৩৩০, ৪১৬
- Report of the Search for Hindi Manuscripts ৩৯১-৩৯৬
- Ruins of Gaur ১২৯
- \*Select Inscriptions of Bihar ৪১৬
- \*Sher Shah ৪৪৩
- \*Social History of the Muslims in Bengal ৭৭, ২০০, ২১৮, ৫২২
- \*South Indian Inscriptions ৩০৪
- \*Studies in Mughal India ৫, ২০৯, ৫৪৫
- \*Supplement to the Catalogue of the Provincial Coin Cabinet, Shillong ২৮৭
- \*The Administration of the Sultanate of Delhi ৩৬৬
- \*The Delhi Sultanate ৮১, ৫৫৫
- \*The District of Backergaunj ১৩২
- \*The Gajapati Kings of Orissa ২৯৯, ৩০৪, ৩০৭, ৩০৯
- \*The Rehla of Ibn Battuta ৫১৩
- T'oung Pao ১২১, ৪৭২, ৫১৩
- \*Varendra Research Society's Monographs ৪৩৮
- \*Visva-Bharati Annals (Vol. I) ২৫, ১২১-১২২, ৫১৩

## সামাজিক ইতিহাসের বিষয়সূচী

[ বর্তমান গ্রন্থের একাদশ অধ্যায়ে আধীন সুলতানদের আমলের বাংলাদেশ সম্বন্ধে বিভিন্ন সমসাময়িক সূত্রের সাক্ষ্য উদ্ধৃত হয়েছে। ঐ যুগের বাংলার সামাজিক ইতিহাস সম্বন্ধে বহু তথ্যই তার মধ্যে পাওয়া যাবে। এই গ্রন্থের অন্তর্ভুক্ত সামাজিক ইতিহাস সংক্রান্ত ছ' একটি তথ্য উল্লিখিত হয়েছে। কিন্তু সে যুগের সামাজিক ইতিহাস বিষয়াক্রমে লিখিত না হওয়ায়—যাঁরা কোন নির্দিষ্ট বিষয় সম্বন্ধে জানতে চান, তাঁদের অনুবিধা হতে পারে। সেই অনুবিধা দূর করার জন্ত—আমরা এই গ্রন্থে পরিবেশিত সে যুগের বাংলাদেশের সামাজিক ইতিহাস সম্বন্ধীয় বাবতীয় তথ্যের একটি বর্ণাক্রমিক বিষয়সূচী এখানে সংকলন করে দিলাম। ]

অধ্যাপকগোষ্ঠী ৫০১-৫০২

অভিনয় ৫০৬-৫০৭

অমাত্য ৪৬১-৪৬২; ৪৭২, ৪৮৮, ৫১২

অলঙ্কার ৪৮২, ৫০৮

আবহাওয়া ৪৭০, ৪৭৬

উৎপন্ন দ্রব্য (বিবিধ) ৪৭৫, ৪৭৮, ৪৮৩,

৪৮৫, ৪৯৩, ৪৯৫-৪৯৬

উদ্ভিজ্জ দ্রব্য ৪৭৪, ৪৭৬

কর (রাজস্ব) ৪৫৯-৪৬০, ৪৬৯-৪৭০

কাগজ ৪৭৫, ৪৭৮

কীর্তন ৫০৭

কৃষি ৪৭০-৪৭১, ৪৭৬, ৪৮৩

কেশ-সংস্কার ৫০৮

কীর্তদাস-কীর্তদাসী ৪৬৬, ৫০৬

খাজ ৫০৮, ৫১১-৫১২

খেলা

—বাঘের খেলা ৪৭৩-৪৭৪, ৪৭৯

—সাঁতার ও জলক্রীড়া ৫০৯

গান-বাজনা ৪৭৩, ৪৭৮-৪৭৯, ৪৯৭,

৫০৩-৫০৬

খোলা বিক্রী ৫০৮

খোলায় ভাত খাওয়া ৫০৮

গৃহস্থালীর সরঞ্জাম ৪৭৫, ৪৭৮

চণ্ডীর (মঙ্গলচণ্ডীর) গীত ৫০২

চণ্ডীর পূজা ৫০২

চিকিৎসা ৫০৯

চোর-ডাকাত ৫০২, ৫০৯

জাল মহাপুরুষ ৫০২-৫০৩

জাহাজ ৪৬৬, ৪৭০, ৪৭৬, ৪৭৯-৪৮০, ৪৯৫

জীবনযাত্রার স্বচ্ছলতা ৫০৯

জীবিকা (পেশা) সমূহ ৪৭৩, ৪৭৮, ৫০১,

৫১১

জুতা ৪৭৬, ৪৯৭

টোল ৫০১

তীর্থস্থান ৫১০

দেবপূজা ৪০৬-৪৮৭

দুর্গোৎসব (দুর্গাপূজা) ৫০৩, ৫১২

দুর্ভিক্ষ ৫০৯

দোকান ৪৭৭

দ্রব্যমূল্য ৪৬৫-৪৬৬, ৪৭০, ৫১১

মানের দর বাড়ি ৫০২

সংগর-সঙ্কীর্জন ৫০৭

সাদী ৪৬৬, ৪৬৯, ৪৮৫, ৪৯৪-৪৯৫

নবদ্বীপের সমৃদ্ধি ৫০১

নৌকা-নির্মাণ ৪৮৫

পঞ্জিকা ৪৭৪, ৪৭৯

শতশাখী ৪৭৪, ৪৭৭

পার্বণ ৪৮৯, ৫০২

পান খাওয়া ৪৭৪, ৪৭৭, ৫০৮

পানাগার ৪৭৭

পোষাক

—সাধারণ পোষাক ৪৭০, ৪৭২-৪৭৩, ৪৭৬

—মেয়েদের পোষাক ৪৮২-৪৮৩, ৪৯৬

—সম্রাট মুসলমানদের পোষাক ৪৯৭

পুণ্য ৪৬৭-৪৬৯

কলম ৪৭৪, ৪৭৬-৪৭৭, ৪৮৩, ৪৮৫, ৪৯৬

কল ৫০৯

কর ৪৮০, ৪৯৫, ৫০০

বস্ত্র ১৮/০, ৪৭১, ৪৭৪-৪৭৫, ৪৭৭-৪৭৮, ৪৯৩-৪৯৪, ৪৯৬

বস্ত্রবরনে পুরুষ ৪৯৪

রাজনী ৪৭৩, ৪৭৮-৪৭৯, ৫০৩-৫০৬

মালক-চুরি ৪৯৬-৪৯৭, ৫০৯-৫১০

বাংলাদেশের বিভাগ ৪৫৯, ৪৯১, ৫০৯-৫১০

বিচার-ব্যবস্থা ৪৬২

বিদেশী ৪৯৩, ৪৯৫

বিশ্বের পণ্য ৪৯৩-৪৯৪

বিভাক্ষেত্র

—কর বাদের বিভাক্ষেত্র ৪৯০

—নবদ্বীপের বিভাক্ষেত্র ৫০১

বিবাহ

—বিবাহের সাধারণ উল্লেখ ৪৭৩, ৪৭৬, ৫০৯

—দক্ষিণ হিন্দুদের বিবাহ ৫০৩-৫০৪

—খনী হিন্দুদের বিবাহ ৫০৪-৫০৬

—ব্রাহ্মণদের চার বর্ষে বিবাহ ৪৮৯

বৈষ্ণবদের উৎসব ৫০৩

বৈষ্ণব-শাক্ত বিরোধ ৫১২

ব্যবসায়

—ব্যবসায়ের সাধারণ উল্লেখ ৪৮২

—চিনির ব্যবসায় ৪৯৬

ব্রাহ্মণদের আচার-আচরণ ৪৯০, ৫০২

ব্রাহ্মণদের খাওয়ার বাছ-বিচার ৫০৮

ব্রাহ্মণদের বেদ পাঠ ৪৮৯

ভাণ্ড সন্ধ্যালী ৫০২-৫০৩

ভাঁড় ৪৭৩, ৪৭৮

ভাষা ৪৭২, ৪৭৬

ভোজনাগার ৪৭৭

মনিমাণিক্য ৪৮০, ৪৮৩, ৪৯৩

মদ ৪৭৪, ৪৭৭, ৪৯৭

মুদ্রা ৪৭০, ৪৭২, ৪৭৬

মুসলমানদের বহুবিবাহ ৪৯৭

মুসলমান—সম্রাট শ্রেণী ৪৯৭

মুসলিম রাজ্যে হিন্দুদের অবস্থা ১/০-১৮/০,

৪৫৭-৪৫৮, ৪৬৩, ৪৬৯, ৪৮৮, ৪৯৬-

৪৯৭, ৫০৭-৫০৮, ৫১০

মুগানীর দ্রব্য ৪৮০, ৪৮৩

রাজকর্মচারী ৪৬০-৪৬১, ৪৭৩, ৪৭৮

রাজকীয় ব্যয় ৪৯৯

রাজধানী	শাসনকর্তা-উপশাসনকর্তা ৪৬১, ৪৯১
—পাণ্ডুরা ৪৮১	শাসনব্যবস্থা ৪৫৯-৪৬২
—গৌড় ৫০০	শাস্তি ৪৬৩, ৪৭৩, ৪৭৮
রাজপদের অনিশ্চয়তা ৪৯৮	শুদ্ধ ( দান ) ৪৬০, ৪৮০, ৫১০
রাজপ্রাসাদ ৪৬০-৪৬২, ৪৮১, ৪৮৯-৪৯২	শৌচাগারের অভাব ৫০৯, ৫১২
রাজসভা ৪৬০, ৪৮১, ৪৯০, ৪৯২	সহমরণ ( সতীদাহ ) ৪৮৬, ৫৭৮
রাজসংবর্ধনা ৪৮২, ৪৮৮, ৪৯০	সৈন্তবাহিনী ১৮/০, ৪৬২, ৪৭৩, ৪৭৮,
লোকেদের গায়ের রং ৪৭২, ৪৭৬	৪৯৩
লোকেদের চরিত্র ৪৮২-৪৮৩	হিন্দুদের বৈশিষ্ট্য ৪৮৩
লৌকিক দেবদেবীর পূজা ৫০২	হিন্দুদের যাগযজ্ঞ ৪৮৮
শস্ত্র ৪৭৪	হিন্দু-ধর্মবিধিঅনুসন্ধানকারী ৫০৮, ৫১০
শহর ৪৫২, ৪৭২, ৪৭৫-৪৭৬, ৪৮০-৪৮১,	হিন্দু-মুসলিম সম্পর্ক ১/০-১৭/০,
৪৮৫, ৪৯৩-৪৯৪, ৪৯৭-৪৯৮, ৫০০	৪৫৭-৪৫৮ ৫০৭-৫০৮, ৫১০-৫১১







